


*Abi'uai Apa'uana*

*Mahamahana*



The New Testament in the Waima Language of Papua New Guinea

## **'Abi'uai Apa'uana Mahamahana**

### **The New Testament in the Waima Language of Papua New Guinea Nupela Testamen long tokples Waima long Niugini**

Copyright © 2002 Wycliffe Bible Translators, Inc.

Language: Waima

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-09-20

---

PDF generated using Haiola and XeLaTeX on 11 Nov 2022 from source files dated 22 Nov 2019  
cec16783-6218-9255-85478fb5e61c

## Contents

Mataio . . . . .	1
Mareko . . . . .	50
Luka . . . . .	80
Ioane . . . . .	130
Iuhubeau Ekia Aka . . . . .	168
Roma . . . . .	216
1 Korinto . . . . .	238
2 Korinto . . . . .	261
Galatia . . . . .	275
Epeso . . . . .	283
Pilipo . . . . .	291
Kolose . . . . .	296
1 Tesalonika . . . . .	302
2 Tesalonika . . . . .	307
1 Timoteo . . . . .	310
2 Timoteo . . . . .	317
Tito . . . . .	322
Pilemona . . . . .	325
Heberu . . . . .	327
Iakobo . . . . .	344
1 Petero . . . . .	350
2 Petero . . . . .	356
1 Ioane . . . . .	360
2 Ioane . . . . .	366
3 Ioane . . . . .	367
Iuda . . . . .	369
Ibawaira Tinana . . . . .	371

## Pou Namona MATAIO Ererena Hauna

### *Puka Aona Irerena 'Abina*

Pou namona neiana aonai hanona Mataio netibaha, Iesu ehore Tirama ena 'abi'uai weiana aba 'uainai ena maearima Isaraela haukia herekiai ebabaina hauna ebatoha haraina, 'abi'uai weiana Tirama kehore hau ha keuhuna kemai maearima kebamaurinakia. Pou namona neiana hanona Iuda haukia weiakia baiatakiai Iesu emiaho haukia 'eukiai mo aha'i, ia hanopaka maikoina ekia pou namona.

Mataio hanona Iesu neia hanopakai emiaho aonai, herenai taba terama haukia ehina pou harainakia. Ena rama raninai eaomo teahu 'arina raninai, ba 'ariai emikiri mue mai ena maearima ehabonakia 'ubi eao.

Mataio taba apa'uana robaha eahuna hanona Tirama ena obia aiarana, weiana Iesu hanona pouuna ehina haraina.

Puka neiana iba'iobi paipana ima aonai, (1) Oeo ahanai bamarere 'abikia, weiakia Tirama ena obia aiarana aonai katemiaho haukia ekia hoahoa mai ekia babai (5—7); (2) Iesu i'abana haukia aka aeahomakia katebabainakia haukia robakia (10); (3) Tirama ena obia aiarana 'abikia ibabataikia (13); (4) Weiakia i'abana haukia tohakia timarere haukia ekia hoahoa mai ekia babai aea katehoma (18); mai (5) Taba weiakia hanopaka puuanai katerama haukia (24—25).

### *Puka Paipana Apa'uakia*

- Iesu Keriso ena kuputori mai ena rama (1:1—2:23)
- Ioane ba'uure robe hauna ena aka (3:1-12)
- Iesu ena 'uure robe mai baihobo (3:13—4:11)
- Iesu ena aka maearima herekiai Galilea aonai (4:12—18:35)

- Galilea eaomo Ierusalema (19:1—20:34)
- Hui orena Ierusalema herenai mai aonai (21:1—27:66)
- Obiapaka ena mikiri mue mai ena waira tina (28:1-20)

### *Iesu Keriso Ena Rama Kupu Torina* (Lk 3:23-38)

<sup>1</sup> Iesu Keriso ena rama kupu torina Aberahamo mai Davida bibrikai emai.

<sup>2</sup> Aberahamo ehore Isako ebarama, Isako ehore Iakobo ebaramana, Iakobo ehore Iuda uaho'abana kipokia ebaramanakia.

<sup>3</sup> Iuda ehore Perese mai Sera ebaramanakia, hinakia hanona Tamar, Perese ehore Hesarona ebarama, Hesarona ehore Ram ebarama.

<sup>4</sup> Ram ehore Aminadab ebarama, Aminadab ehore Nasona ebarama, Nasona ehore Salmon ebarama.

<sup>5</sup> Salmon ehore Boa ebaramana, hinana hanona Rahab rama haeani babi'ena.

Boa ehore Obeda ebaramana, hinana hanona Ruta rama haeani babi'ena.

<sup>6</sup> Iese ehore Obia 'arana Davida ebaramana.

Davida ehore Solomon ebarama, ia hinana hanona 'uainai Uria atawana.

<sup>7</sup> Solomon ehore Rehoboam ebaramana, Rehoboam ehore Abia ebarama,

Abia ehore Asa ebaramana.

<sup>8</sup> Asa ehore Iehosabat ebarama,

Iehosabat ehore Ioram ebarama,

Ioram ehore Usia ebaramana.

<sup>9</sup> Usia ehore Iotam ebaramana, Iotam ehore Ahasa ebaramana, Ahasa ehore Hesekia ebarama.

<sup>10</sup> Hesekia ehore Manase ebarama, Manase ehore Amon ebarama, Amon ehore Iosia ebaramana.

<sup>11</sup> Iosia ehore Iekonia mai uaho'abana ebaramanakia, rani weianai Babulono haukia tehore Isaraela haukia tea'inakia teaoainakia ekia hanopakai.

<sup>12</sup> Baika teaoainakia Babulono murinai Iekonia ehore Sealtiel ebaramana, Sealtiel ehore Serubabel ebaramana.

<sup>13</sup> Serubabel ehore Abiud ebarama, Abiud ehore Eliakima ebarama, Eliakima ehore Asoro ebarama.

<sup>14</sup> Asoro ehore Sadok ebarama, Sadok ehore Akim ebaramana, Akim ehore Eliud ebaramana.

<sup>15</sup> Eliud ehore Eleasara ebarama, Eleasara ehore Matan ebarama, Matan ehore Iakobo ebarama.

<sup>16</sup> Iakobo ehore Iosefa ebarama. Iosefa atawana Maria ehore Iesu ebaramana, maearima atana teaparina Keriso\* bamauri hauna.

<sup>17</sup> Weiana Aberahamo ai eao Davida herenai hanona uru harau haea bani, Davida herenai eaomo teaoainakia Babulono raninai hanona uru harau haea bani, haeamona teaoainakia Babulono murinai eaomo Keriso herenai hanona uru harau haea bani.

*Iesu Keriso Ena Rama.  
(Lk 2.1-7)*

<sup>18</sup> Iesu Keriso aea erama aiho hauna pouna hanona neiana. Hinana Maria hanona te'abi'uai aina, Iosefa keatawana. Ia a'i tebahamomo baha aonai e'iobina Auba Robe hiabunai miori ha ea'ina. <sup>19</sup> Iosefa hanona aka bero hauna, a'i enuatae Maria keba-haumaeana to'u wairakiai buonai, enuatae 'abi'uai weiana bunianai

kea'i ki'ana. <sup>20</sup> Raona weiana niraonana aonai, Obiapaka ena Aneru nibiai herenai ewaira tina e'abi etibaha, "Iosefa Davida 'aba'abana e, Maria iatawana a'i kota'uaina, pokina Auba Robe hiabunai miori weiana ea'ina. <sup>21</sup> Ia hanona miori ha kebaramana, atana katoaparina Iesu, pokina ia hanona ena maearima ekia ki'ai kebamaurinakia."

<sup>22</sup> Hoa neiana erama hanona Obiapaka ena mahabanai hauna herenai e'abi hauna nibatohana. <sup>23</sup> "Uaho rari ha kepuma miori ha kebaramana,

atana kateaparina Emanuela."

Isa 7.14

Anina hanona 'Tirama aika herekai'.

<sup>24</sup> Iosefa eno'a murinai, Obiapaka ena Aneru e'abi ihobona ebabaina Maria eatawana. <sup>25</sup> Ia terarua a'i tenoti oioi 'apua eaomo Maria miori ebaramana. Iosefa miori atana eaparina Iesu.

## 2

*Aotipa Haukia Taetana Tainai Temai.*

<sup>1</sup> Heroda Obia 'arana Iuda eobia aina raninai, Iesu hanona Iuda aonai Betelehemai erama. Rani weianai aotipa haukia taetana taina hanopaka haeai ai temai Ierusalema teao, <sup>2</sup> ba tebakai bakai tetibaha, "Iuda ekia Obia 'arana erama miorina hanona ae'eai? Ia ena bihiu taetana tainai taihana buonai tamai katakuti aina". <sup>3</sup> Heroda Obia 'arana 'abi weiana eona raninai nuana etae, mai Ierusalema ai maearima ikoinai abomo nuakia etae. <sup>4</sup> Ia ehore Iuda ekia robe haukia apa'uakia mai rauhubu poki haukia ikoikiai eaparinakia ebakainakia etibaha, "Keriso hanona ae'eai kerama?" <sup>5</sup> Ia ena 'abi tebamuena tetibaha, "Iuda Betelehemai aonai. Mahabanai hauna na erere aihona.

<sup>6</sup> 'Oi Betelehemai,  
Iuda hanona aonai,  
Iuda teiha 'inina aiarakia

\* **1:16:** (16) 'Ao "Mesia"

baiatakiai oi hanona  
a'i oko'iko'i ki'a baha,  
pokina oi heremuai  
poki hauna ha kemai  
ia hanona e'u Isaraela  
maearimakia ke'uai ainakia  
mamoe i'imana hauna 'abana.' "

Mik 5.2

<sup>7</sup> Ua buonai Heroda aotipa haukia eapari buninakia ebakainakia ke'iobi haraina rani tabana tohanai hanona bihiu weiana ewaira tina. <sup>8</sup> Euhunakia kateao Betelehema e'abi etibaha, "Katoao miori 'oru'oruna weiana katotabu haraina. Katotabu ahina hanona katoba'iorina'u, ba au abomo kaeao ia kakuti aina."

<sup>9</sup> Aotipa haukia Heroda obia 'arana aiana teona murinai teka'a, taearai teao aonai bihiu weiana taetana tainai teihana hauna e'uai ainakia eaomo miori nemiaho 'ekanai hanona e'oro. <sup>10</sup> Bihiu weiana teihana raninai aokia enamo banaina.

<sup>11</sup> Itu weiana aonai tetoto hanona miori hinana Maria ohi teihanakia ba tekaipahu miori tekuti aina. Murinai obia 'abana iberuberu bena tabakia gold, muramura timina orimona, mai muramura taburana hauani katetaronia hauna tetara 'aunakia teberuberu bena. <sup>12</sup> Ba nibiai Tirama eharabunakia a'i katemue Heroda herena, weiana taeara haeani tekana temue teao ekia hanopaka.

### *Iesu Te'uru aina Aikupito Teao.*

<sup>13</sup> Aotipa haukia teka'a murikiai Obiapaka ena aneru nibiai Iosefa herenai ewaira tina e'abi etibaha, "Momikiri miori hinana ohi moba ka'anakia mo'uru ainakia moao Aigupito. Weia katomiaho keaomo au kahina beni'o, pokina Heroda hanona aba miori ketabuna keahu 'arina." <sup>14</sup> Epua, Iosefa emikiri miori hinana ohi ebaka'anakia rabi weianai teka'a teao Aikupito, <sup>15</sup> weia temiaho keaomo Heroda ke'ari. Weiana Obiapaka ena mahabanai hauna pinanai ehinana hauna ibatohana,

"Au Aikupito ai  
Naha'u apari ahina."

Hos 11.1

<sup>16</sup> Heroda e'iorina aotipa haukia a'i katemue herena, weiana aona eopuere ki'a, aotipa haukia ebakainakia ranina eraonana ihobonai 'abi ebaibenri ena huari haukia Betelehema mai aiara herenai haukia aokiai miori ikoinai ihaukia rua mai ba'ai haukia teahu'arinakia. <sup>17</sup> Rani weianai mahabanai hauna Ieremia ehinana 'abina hanona etohana, <sup>18</sup> "Aia ha Rama ai teona hai mai aoko'o rarina 'akina, Rahela nahuna nihai ainakia, ia aona katebakirona hanona a'i nenuatae pokina ikoinai aba te'ari ore."

Ier 31.15

### *Aikupitoai Temue aina Nasareta Teao.*

<sup>19</sup> Heroda e'ari murinai Aigupito ai Obiapaka ena aneru Iosefa herenai nibiai ewaira tina, <sup>20</sup> e'abi etibaha, "Momikiri miori hinana ohi moba ka'anakia katomue Isaraela hanonai, weikia miori kateahu'arina haukia hanona aba te'ari". <sup>21</sup> Ba Iosefa emikiri miori hinana ohi ebaka'anakia teao Isaraela.

<sup>22</sup> Ia Akelao hamana Heroda 'ekana ea'ina Iuda neiha 'inina 'uruna eona raninai, keao hanona eta'u. Ba nibiai ba'iobi ea'ina ekabanai eao Galilea. <sup>23</sup> Ia teao aiara ha atana Nasareta wa'a temiaho, weiana hanona mahabanai haukia tehinana 'abina etohana, 'Ia hanona kateaparina Nasareta hauna.'

## 3

### *Ba'uere robe Hauna Ioane Eiroro.*

(Mk 1.28; Lk 3.1-18; Io 1.19-28)

<sup>1</sup> Rani weianai Ioane Ba'uere robe\* hauna ewaira tina Iuda hano'akunai ena iroro ea'i ramana etibaha, <sup>2</sup> "Emi ki'ai tomorona kabe, pokina Tirama ena obia aiarana hanona aba

\* 3:1: (1) Bapatiso

ekaibari.”<sup>3</sup> Neiana hanona mahabanai hauna Isaia 'abina ehinana hauna etibaha,  
“Hau ha hano'akunai eio etibaha,  
‘Obiapaka ena taeara  
tomoba'oruna,  
Ena kaoao boana  
tomobaberona.”

<sup>4</sup> Isa 41.3 Ioane ena habuni hanona mahi atana Kamela buirana tanatananai ebabaina, mai huana 'apana hanona poromakau paruna ehaina, ena aniani hanona pekaupekau mai hoho beina.  
<sup>5</sup> Ierusalemæ mæarimakia mai Iuda aonai aiara maikoina, haeamona Ioridana ate herenai aiara ikoimai haukia temai herena aiana kateona. <sup>6</sup> Ekia ki'a tehina pounakia, haeamona eba'uere robenakia Ioridana ate aonai.

<sup>7</sup> Ioane Parisea haukia mai Sadukea haukia bo'okia temai herenai keba'uere robenakia eihanakia raninai ehinabenakia etibaha, “Erau nahuna haumi e. Tai ehinabenimi puma weiana Tirama aba ketiuahina hauna herenai katobeau pare? <sup>8</sup> Raonakabe buabuana tomobawaira tinana. <sup>9</sup> Aomiai a'i kato'abi wai hanona Aberahamo 'aba'abana buonai puma weiana herenai kato-beau pare. Au wai nahinabenimi Tirama hanona mai hiabuna pihara neiakiai Aberahamo 'aba'abana kebabainakia! <sup>10</sup> Wapira hanona aba e'oru matiu pokinai, buabua namokia a'i tibaramanakia matiukia ikoinai hanona ke'uinkakia iruba aonai kekapo totonakia.

<sup>11</sup> Au hanona beiai mo naba'uere robenimi emi raona kabe hoana, ia weiana muri'uai nimai hauna hanona Auba Robeai mai irubai keba'uere robenimi. Ia hanona eapa'ua ki'a baha ba au, au a'i anamo ena tamaka kabuanakia. <sup>12</sup> Ena ikomo matiuna imanai ea'ina, ikomo 'ekana ea'i a'i haraina uho weiakia ikoinai kekomonakia paruakia keba'ehonakia, uho namokia ikoinai kebararonakia paraboa

aonai kero'anakia, ia hamarakia hanona weiana a'i ni'ao 'apua irubana aonai kehuhu orenakia.”

*Ioane Iesu Eba'uere Robena.*  
(Mk 1.9-11; Lk 3.21-22)

<sup>13</sup> Rani weianai Iesu hanona Galilea ai emai Ioridana atena Ioane herenai keba'uere robena.

<sup>14</sup> Ia Ioane ebaao etibaha, “Oi au poba'uere robena'u hanona penamo. Iamo omai au here'u.”

<sup>15</sup> Iesu Ioane ena 'abi ebamuena etibaha, “Bariu hanona neiana oi kobabaina. Aka neianai Tirama ena bero akakia ikoikiai kahabatohanakia.” Ba Ioane ehorø Iesu eba'uere robena.

<sup>16</sup> Iesu e'uere robe murinai, beronai beiai ekara'au aonai kupa ekaikau Tirama ena Auba eriri emai ahanai matoha rauria eriri 'abana eihana. <sup>17</sup> Ba aia ha Kupai emai e'abi etibaha, “Neiana hanona au Naha'u tohana, E'u raona'au. Au hanona ia naonamo aina.”

## 4

*Tiaporø Ehore Iesu Ehobona.*  
(Mk 1.12-13; Lk 4.1-13)

<sup>1</sup> Weiana Auba Robe ehorø Iesu eaoaina hanon'akunai tiaporø\* kehore kehobona. <sup>2</sup> Iesu wapu ikoimai bariabui erobe aniani ha a'i eani, murinai hanona mare'a e'ari ki'a. <sup>3</sup> Aonai baihobo hauna emai herena e'abi etibaha, “Peoi Tirama nahuna raninai, pihara neiakia mohina benakia pohamai temeo.” <sup>4</sup> Ia Iesu e'abi etibaha, “Puka robenai aba tererena, ‘Maearima hanona pohamai mo a'i katemauri, ia Tirama ena 'abi ehina haukia ikoinai katea'inakia hanona katemauri.’”

<sup>5</sup> Weiana tiaporø ehorø Iesu eaoaina Ierusalemæ aiara robenai, Marea robe 'ubina 'akinai ebakori 'auna, <sup>6</sup> ba ehinabenai etibaha, “Peoi Tirama nahuna raninai, kipomu naia morobo ahi. Pokina Puka robenai aba tererena, ‘Tirama ena aneru kehina benakia

\* 4:1: (1) Satani

kate'imani'o imakiai  
katea'i taeani'o,  
weiana piharai aemu  
a'i mokaina ta'una."

Sal 91.11, 12

<sup>7</sup> Iesu ia ena 'abi ebamuena etibaha, "Puka robenai abomo ɳa terere aihona,  
'Obiapaka emu Tirama baihobo 'ekanai a'i kohorotina."

<sup>8</sup> Haeamona tiaporor ehore Iesu eaoaina 'ubi 'akina kobiona kaipanai ebaehe 'auna, ba hanopaka aiarakia maikoina nuabina ebaihana. <sup>9</sup> Tiaporor e'abi etibaha, "Kokaipahu kokuti aina'u raninai, neiakia maikoinai oi kabeni'o." <sup>10</sup> Iesu haeamona e'abi etibaha, "Satani e, mokatu'a! Puka robenai ɳa terere aihona,  
'Obiapaka emu Tirama iamo ikupaiana kokuti aina, mai ta'arana koa'i."

<sup>11</sup> Weiana tiaporor Iesu herenai ekaobo, ba aneru temai tebaraina.

*Iesu Ena Aka Ea'i Ramana Galileai.*

(Mk 1.14-15; Lk 4.14-15)

<sup>12</sup> Iesu Ioane aba wapura itunai tehorotina pouna eona raninai emue eao Galilea hanonai. <sup>13</sup> Weia Nasareta aiaranai a'i emiaho, ia eao Sebulon mai Napatali hanokiae Galilea obu haianai aiara ha atana Kaperanauma ua'a emiaho. <sup>14</sup> Neiana erama hanona Isaia mahabanai hauna e'abi hanona kebatohana etibaha,

<sup>15</sup> "Sebulon hanonai, mai Napatali hanonai, obu haianai, Ioridana ate abihanai, Galilea rama haeai haukia ekia hano ai!"

<sup>16</sup> Maearima weiakia wapurai temiaho haukia ea rarina 'akina kateihana. Weiakia 'ari aiaiakia hanokiae temiaho haukia herekiae ea kerara."

Isa 9.1, 2

<sup>17</sup> Rani weianai Iesu ena iroro ea'i ramana etibaha, "Emi ki'ai tomoraona kabe, pokina Tirama

ena obia aiarana† hanona aba ekabari!"

*Iesu Ba'eha Haukia Bani Eaparinakia.*

(Mk 1.16-20; Lk 5.1-11)

<sup>18</sup> Iesu Galilea 'obu poena hiana ekana eao aonai, a'a hati rua Simona, teaparina Petero, uaho 'abana Andereea ohi eihanakia ekia re'e 'obu aonai tehorenakia, pokina ia hanona ba'eha haukia.

<sup>19</sup> Iesu ehina benakia etibaha, "Muri'uai tomai. Au kahore maearima iba'eha benikia hau-miai kabaonimi." <sup>20</sup> Beronai ekia re'e tehabonakia murinai teao.

<sup>21</sup> Eka'a haha eao hanona a'a hati rua Iakobo mai Ioane hamakia Sebedeo kipokia ekia ahi ahanai ekia re'e tiahu abunakia eihanakia ba eaparinakia. <sup>22</sup> Beronai ekia ahi mai hamakia tehabonakia Iesu murinai teao.

*Iesu Eiroro mai Inawa Ebamanakia.*

(Lk 6.17-19)

<sup>23</sup> Iesu Galilea hanona maikoina aona ekana, Iuda haukia ekia marea aokiae eba'iobi, Tirama ena obia aiarana pouna namona eiroro aina, mai maearima ekia inawa haeai haeai mai hau hαιara haeai haeai ikoaini ebamanakia. <sup>24</sup> Suria hanopakana maikoina aonai pouna erama otaraina, weiana maearima tehore inawa haeai haeai haukia temaiaiakia Iesu herena, hau hαιara haeai haeai haukia, aokiae auba ki'a obokia haukia, nawa ti'ari aina haukia, mai 'ome haukia. Ia ehore ikoaini ebamanakia. <sup>25</sup> To'u rarina 'akina Galileai mai weiakia Aiara Ha-rauhaeai, Ierusalemai mai Iudai, Ioridana atena abiranai hanokiae maearimakia Iesu murinai teka'a.

## 5

*Iroro Oeo 'Ubinai Hauna.*

(Lk 6.20-23)

<sup>1</sup> Iesu mako eihanakia raninai oeai ekara'au weia emiati.

† 4:17: (17) Basileia

I'abana haukia temai herena,  
 2 weia ena ba'iobi ea'i ramana,  
 ehina benakia etibaha,  
 3 "Aokia te'aiaunu haukia  
 hanona tenamo,  
 pokina Tirama ena obia aiarana  
 hanona ia 'eukia.  
 4 Tihai hai haukia  
 hanona tenamo,  
 pokina Tirama aokia  
 kebabaturanakia.  
 5 Mamata haukia hanona tenamo,  
 pokina hano e'abi'uai aina hauna  
 katea'ina.  
 6 Aka berona timare'a aina  
 mai ti'ako 'ororo aina haukia  
 hanona tenamo,  
 pokina Tirama kehore ekia raona  
 kebabonunakia.  
 7 Maearima tiaoko'o ainakia  
 haukia  
 hanona tenamo,  
 pokina ia abokiamo Tirama  
 keaoko'o ainakia.  
 8 Aokia timahamaha haukia  
 hanona tenamo,  
 pokina ia hanona  
 Tirama kateihana.  
 9 Baibua akana tibabaina haukia  
 hanona tenamo,  
 pokina Tirama kehore  
 nahunai kebaonakia.  
 10 Aka berona tibabaina paunai  
 ti'oatanakia haukia  
 hanona tenamo,  
 pokina Tirama ena obia aiarana  
 hanona ia 'eukia.  
 11 Au muri'uai tuka'a paunai  
 maearima kateaiahunimi  
 mai kate'oatanimi,  
 bai'oi 'abikia ki'a obokia  
 haeai haeai heremai katehina  
 hanona tonamo.  
 12 Aomi kenamo mai katoaonamo,  
 pokina kupai hana 'arami rarina.  
 'Uainai mahabanai haukia temi-  
 aho  
 raninai na te'oata aihonakia.

*Hanopaka Kikimaruna mai  
 Hanopaka Eana.*

(Mk 9.50; Lk 14.34-35)

13 Wai hanona maearima ekia  
 kikimaru. Ia kikimaru ena  
 'aku'aku ke'akauma raninai, aea  
 keiba'aku'aku mue aiho? Taba  
 baika herekiai ena aka aha'i

buonai, kahane'e ahina maearima  
 ahana'i kate'ehe hai 'ehe haina.

14 Wai hanona maearima ekia  
 ea. Aiara oeo 'ubinai tebabaina  
 hauna hanona kebuni a'i ketaina.  
 15 Hau ha ramepa keba'arana ran-  
 inai uro ba'anai a'i kehorotina. Ia  
 ihao'auna 'ekanai kehao'auna, ba  
 maearima ikoinai itu aonai haukia  
 ea kebenakia. 16 Taeara neiana  
 ihobonai, emi ea maearima  
 wairakiai tomobawaira tinana,  
 weiana aka namokia tubabai  
 hanona temeiha Hamami kupai  
 hauna temebanamona.

*Iesu Mose Ena Rauhubu 'Abikia  
 Kebatohanakia.*

17 Na a'i katoraona aiho au amai  
 hanona Mose ena Rauhubu mai  
 mahabanai haukia ekia ba'iobi  
 ka'i parenakia paunai. Au amai  
 hanona a'i ka'i parenakia, ia ekia  
 ba'iobi kabatohanakia. 18 'Abi  
 tohana au wai nahinabenimi,  
 hanopaka mai kupa katepua, ia  
 rererere puapuana 'aki ha 'ao 'abi  
 papana 'aki ha rauhubu aonai a'i  
 ke'akauma keao mo taba ikoinai  
 katerama ore. 19 Weiana buonai  
 hau ha rauhubu papana 'aki a'i  
 nika'aina ba maearima baika  
 ba'iobi weiana ihobona kebenakia  
 hanona Tirama ena obia aiaranai  
 ia hanona ke'aera 'aera 'aki. Ia  
 tai rauhubu nika'ai haraina mai  
 ba'iobi weiana ihobona nibenakia  
 hanona Tirama ena obia aiaranai  
 ia hanona keapa'ua. 20 Au wai  
 nahinabenimi, wai emi bero  
 akakia katehore weiakia Parisea  
 haukia mai rauhubu poki haukia  
 ekia bero akakia a'i katetara  
 haonakia raninai Tirama ena obia  
 aiaranai a'i katokatoto 'apua.

*Uaho'abami Kipokia Kato'abi  
 Oioi.  
 (Lk 12.57-59)*

21 'Uainai 'aba'abami herekiai  
 tehinana 'abina aba tonu. "A'i  
 koahuahu, ia hau ha keahuahu  
 hauna hanona bakai 'ekanai  
 kehoroti." 22 Ia bariu au nahin-  
 abenimi. Hau ha uaho'abana  
 niopuereaina hanona kateaoaina  
 bakai 'ekana. Haeamona hau

ha uaho'abana po'ona kehinana hanona kateaoaina bakai apa'uana te'imana haukia herekia. Ia hau ha uaho'abana kehinabena ketibaha, "Ao 'abaea tohamu." hanona kateaoaina 'eka ki'a obona iruba a'i ni'ao 'apua 'ekana.

<sup>23</sup> Weiana paunai emu ibeni tabana itara robena ahana nubaibenai aonai uaho'abamu herenai emu beho ha nemiaho hauna oraona tinana raninai, <sup>24</sup> emu ibeni tabana weia itara robena wairanai kohabona. Koao 'uai uaho'abamu herenai torarua kato'abi oioi, ba komue emu ibeni tabana kobaibenai.

<sup>25</sup> Hau ha oi beho 'ekanai ehorotini'o hauna bariu torarua bakai 'ekana tuao aonai moba'amena beho weiana tomobabero biaina, ba bakai wairanai kokoroti. Weiana a'i kobabaina raninai, oi ni'oatani'o hauna bakai ne'imana hauna imanai keutani'o, bakai ne'imana hauna habuni hauna imanai keutani'o, ba oi hanona wapura 'ekanai kate horotini'o. <sup>26</sup> 'Abi tohana au nahina beni'o, oi hanona a'i kokarahi 'apua keaomo emu beho 'arana pene orena kobaibenai.

### A'i Konabau Ki'a.

<sup>27</sup> Wai 'abi 'uruna aba tona na e'abi aiho, 'Oi hau ha atawana a'i konabau aina.' <sup>28</sup> Ia au wai nahina benimi hau ha babi'e neihana ba niraona ki'a hanona aonai aba nabau hoana ebabaina ia herenai.

<sup>29</sup> Mahamu itipana ki'ai nihorotini'o raninai, ko'ipa ahina kone'ena. Hauanimu puana ke'akauma hanona enamo ba haumu maikoina iruba a'i ni'ao 'apua 'ekana aonai a'i mekapo totoni'o marikina. <sup>30</sup> Mai imamu itipana ki'ai nihorotini'o raninai, kokabe hurina kone'ena. Haumu puana hamona ke'akauma hanona enamo ba haumu maikoina iruba a'i ni'ao 'apua 'ekana aonai a'i mekapo totoni'o marikina.

*Atawana A'i Kebakarahina.  
(Mt 19.9; Mk 10.11-12; Lk 16.18)*

<sup>31</sup> Abomo na e'abi aiho, 'Hau ha atawana nibakarahina raninai bakarahi marerena ha kererena kebena.' <sup>32</sup> Ia au wai nahinabenimi, hau ha atawana a'i nimaha porepore ia nibakarahi 'abaeana hanona ena behoai atawana nabau 'ekanai ehorotina, mai hau ha kehore tebakarahina babi'ena weiana keatawana hanona ia abomo nabau hoana ebabaina.

### 'Abi'uai Pahihina A'i Katobabaina.

<sup>33</sup> Haeamona 'uainai 'aba'abami herekiai tehinana 'abina aba tona, 'Emi 'abi'uai hanona a'i katokabena. Ia emi 'abi'uai pahihina Obiapaka herenai hanona katobabaina.'

<sup>34</sup> Ia au wai nahinabenimi. 'Abi'uai pahihina a'i katobabaina. Kupa ahana 'abi'uai pahihina a'i katohinana, pokina ia hanona Tirama ena imia'au.

<sup>35</sup> 'Ao hanopaka ahana 'abi'uai pahihina a'i katohinana, pokina ia hanona Tirama 'apuna ihorotina 'ekana, 'ao Ierusalema ahana 'abi'uai pahihina a'i katohinana, pokina ia hanona Obia 'arana apa'uana ena aiara.

<sup>36</sup> Mai oi 'aramu ahana 'abi'uai pahihina a'i kohinana, pokina oi buimu ha hamona kobaporena 'ao koba'umuna hanona a'i o'lobina. <sup>37</sup> Oi mo emu 'abi, 'E re'a 'E, 'ao Aha'i re'a Aha'i. Taba neiakia waira'akinai nohinanakia hanona hau ki'a obona herenai timai.

### Ki'a 'Arana A'i Kobamuena. (Lk 6.29-30)

<sup>38</sup> Wai 'abi neiana aba tona e'abi etibaha, 'Maha 'arana hanona maha, mai nihe 'arana hanona nihe.' <sup>39</sup> Ia au wai nahinabenimi, maearima ena ki'a 'arana hanona a'i kobamuena. Hau ha mekemu itipana kebo'ana raninai, koke'e banai awarimu abomo kobena.

<sup>40</sup> Hau ha nenuatae emu ibatoto kea'ina paunai bakai 'ekanai kehorotini'o raninai, emu iro'abu abomo kobena.

<sup>41</sup> Hau ha kebahai ahini'o maela hamona koka'aina raninai, torarua maela rua kataka'aina.

<sup>42</sup> Maearima tinoini'o

tabana hanona kabenakia, mai heremuai taba ha nenuatae aina kea'i 'abaeana hanona a'i koubo aina.

*'Ou Haukia Katoraona'au ainakia.*  
(Lk 6:27-28, 32-36)

<sup>43</sup> Wai 'abi 'uruna aba tonāna e'abi aiho, 'Heremai haukia katoraona'au ainakia mai emi 'ou haukia katobaki'anakia.' <sup>44</sup> Ia au wai nahinabenimi, emi 'ou haukia katoraona'au ainakia mai weiakia ti'oatanimi haukia paukiai kato bahuba'ari. <sup>45</sup> Weianai wai hanona Hamami kupai hauna nahunai katoao. Ia ena beraura ihobonai mo nibararana ki'a haukia mai namo haukia herekiai, mai abara ihobona mo nibatibona babai bero haukia mai babai ki'a haukia herekiai. <sup>46</sup> Wai maearima weiakia tiraona'au ainimi haukia mo turaona'au ainakia raninai 'arami' hanona taba katoa'ina? Moni bararo haukia abomo ua tibabai aiho. <sup>47</sup> Wai uaho'abami mo tubaonakia raninai, emi namo hanona taba maearima baika herekiai? Ai tia'ikakauma haukia abomo ua tibabai aiho. <sup>48</sup> Ua buonai wai katobero harai ihobona Hamami kupai nemiaho hauna ebero harai 'abana.'

## 6

*Maearima Ibaraikia Hoahoana.*

<sup>1</sup> "Kato'ima'ima harainimi, emi bero akakia maearima wairakiai a'i katobabai, a'i temeihanimi marikina. Ua katobabai aihona raninai wai hanona 'arami aha'i Hamami kupai hauna herenai.

<sup>2</sup> Weiana buonai baraiharai tabana uraru hauna kobena raninai, maearima wairakiai a'i koapa, ihobona bahaorea haukia marea aokiai mai aiara ibuakiai tibabaina 'abana maearima banamo ia katebenakia paunai. 'Abi tohana au wai nahinabenimi, ia hanona 'arakia maikoina aba tea'ina. <sup>3</sup> Ia wai uraru haukia tubarainakia raninai, imamu awarina hauna a'i ke'iorina imamu itipana hanona taba nibabaina.

<sup>4</sup> Weiana emu baiben'i hanona aomuai kobunina. Ba Hamamu taba bunianai tirama neihanakia hauna oi 'aramu kebeni'o.

*Bahuba'ari Hoana.*  
(Lk 11:2-4)

<sup>5</sup> Wai katobahuba'ari raninai bahaoreia haukia 'abakiai a'i katoao. Ia ekia nuatae apa'uana hanona marea aokiai mai aiara ibuakiai katekoroti katebahuba'ari maearima ia katehanakia paunai. 'Abi tohana au wai nahinabenimi, 'arakia maikoina aba tea'ina. <sup>6</sup> Ia kobahuba'ari raninai, emu ikaihuri aonai kokatoto ba emu pa'abi kokaiabuna kobahuba'ari Hamamu a'i noihana hauna herenai. Hamamu taba bunianai tirama neiha hauna 'aramu kebeni'o.

<sup>7</sup> Tubahuba'ari aonai 'abi anikia ha'i haukia bo'ona a'i katohina matoha rama haeai haukia tibabaina 'abana. Tiraonana ekia bahuba'ari nihoma'a hanona Tirama aiakia aba niona. <sup>8</sup> Ia 'abakiai a'i katoao. Wai Hamami a'i tunoi bahana aonai aba e'iorina wai taba tonuatae aina.

*Bahuba'ari Obiapaka Eba'iobinaka Hauna.*

<sup>9</sup> Wai hanona na katobahuba'ari aiho.

Hamamai e, kupai nomiaho.

Oi atamu hanona katabarobena.

<sup>10</sup> Emu obia aiarana kemai, ikoimaiai emu nuatae katababaina hanopakai, ihobona kupai tibabaina 'abana.

<sup>11</sup> Bariu rani neianai aniani tanuatae aina hauna kabenamai.

<sup>12</sup> Emai ki'a tababai haukia mohina hao, ihobona weiakia heremaiai tebabai ki'a haukia ekia ki'a tahina hao 'abana.

<sup>13</sup> Ai koaoainamai baihobo 'ekakiai, ia tiaporo herenai kobamaurinamai.

(Kupa aiarana oi 'eumu, Hiabu oi 'eumu, Nuabi oi 'eumu, keaomo banai banai. Amen.)\*

\* **6:13:** (13) Puka baika aokiai ( ) 'abina aha'i.

<sup>14</sup> Maearima weiakia heremai tebabai ki'a haukia ekia ki'a kato-hina haonakia raninai, Hamami kupai hauna emi ki'a abomo kehina haonakia. <sup>15</sup> Ia wai maearima ekia ki'a a'i kato'hina haonakia raninai, Hamami kupai nemiaho hauna abomo emi ki'a a'i kehina haonakia.

*Ani Robe Hoahoana.*

<sup>16</sup> Wai tuanirobe raninai wairami a'i katobabira biranakia matoha bahaore a haukia 'abakia. Ihakia tibamea mae'anakia maearima ikoinai kateihananakia kate'io bina ia hanona tianirobe. 'Abi tohana au wai nahina benimi, 'arakia maikoina aba tea'ina. <sup>17</sup> Ia oi koanirobe raninai, wairamu koutu mai 'aramu tehoroi koutuna. <sup>18</sup> Weiana maearima a'i kate'io bina oi hanona nuanirobe, iamo Hamaka a'i nahaihana hauna mo ke'io bina. Ba Hamamu taba bunianai tirama neihanakia hauna kehore 'aramu kebeni'o.

*Kepu Kupai Katoro'anakia.*

(Lk 12.33-34)

<sup>19</sup> Emi kepu hanopakai a'i katoro'anakia, weiana muhi mai 'abi'abi katehore katea'i ki'anakia, mai bainao haukia katehore itu kateahu pa'ana katebaina o ainakia. <sup>20</sup> Ia emi kepu kupai katoro'anakia, weia hanona muhi mai 'abi'abi a'i katea'i ki'anakia, mai bainao haukia itu a'i kateahu pa'ana a'i katebaina o ainakia. <sup>21</sup> Weiana oi emu kepu 'eka tabanai hanona aomu abomo weia.

*Hauani Ena Ramepa.*

(Lk 11.34-36)

<sup>22</sup> Maha hanona hauani ena ramepa, oi mahamu tenamo raninai hauanimu maikoina hanona ea aonai. <sup>23</sup> Ia mahamu kateki'a raninai hauanimu maikoina hanona wapura aonai. Ba oi aomu eana niwapura raninai wapura weiana hanona keapa'ua wairai.

*Poki Haukia Rua Ta'arakia A'i Koa'i.*

(Lk 16.13)

<sup>24</sup> Hau ha poki haukia rua rani hamonai ta'arakia a'i kea'i. Ia hamona 'arina a'i ke'ari mai ha keraona'au aina, 'ao hamona aiana keona mai ha kebaki'ana. Wai Tirama mai kepu terarua rani hamonai ta'arakia a'i katoa'i.

*Aomi A'i Katearo'ari.*  
(Lk 12.22-31)

<sup>25</sup> Weiana buonai au wai nahin-abenimi. Aomi a'i katearo'ari, taba patoana 'ao taba patoinu emi mauri paunai, 'ao hauanimai taba patobatotona hauna a'i katoraonana. Mauri hanona eapa'ua ki'a baha ba pohama, mai hauanimu hanona eapa'ua ki'a baha ba habuni. <sup>26</sup> Roborobo tirobo tomoi hanakia. Ia uho a'i titabito, a'i tieueu mai rere a'i tihoroti, ia Hamami kupai hauna ne'ima harainakia. Ia wai hanona tonamo ki'a baha ba roborobo. <sup>27</sup> Oi tai ha emu ao aro'ari kehore emu mauriai pomiaho homa'a 'apuana?

<sup>28</sup> Mai taba buonai aomi niaro'ari habuni herenai? Hoeahoea arabu hajanai aea ti'omu aiho katoihananakia. Ia a'i tiaro'ari 'ao kipokia habunikia a'i titabito.

<sup>29</sup> Ia au wai nahinabenimi, Solomon ena nuabai habuni namona ebabotona, iamo taitai neiakia hanona tenamo ki'a baha. <sup>30</sup> Weiana arabu tubukia bariu titaitai mara aba kate'ororo iruba aonai katekapo totonakia kate'ara haukia habunikia Tirama nihore na nibabatoto aihonakia raninai, wai emi habuni ua a'i kebabatoto aihonimi, u? Emi a'ikakauma teko'iko'i haumi. <sup>31</sup> Ua buonai aomi a'i katearo'ari, a'i kato'abi, "Aika taba kahana?" 'ao "Aika taba kahainu?" 'ao "Aika taba kahabatotona?" <sup>32</sup> Weiana rama haeani haukia taba nahomakia ikoinai titabunakia, ia wai Hamami kupai aba e'io bina taba neiakia tonuatae ainakia.

<sup>33</sup> Wai hanona Tirama ena obia aiarana mai ena nuatae akana berona katotabu 'uaina, ba taba nahomakia ikoinai hanona wai kebenimi. <sup>34</sup> Weiana paunai aomu

a'i kearo'ari mara 'eunai. Mara hanona kipona ena ao aro'ari. Wapu ha ha ekia aro'ari hanona kipokia 'eukia."

## 7

*Beho 'Ekanai A'i Katohorotinakia.*  
(Lk 6.37-38, 41-42)

<sup>1</sup> "Baika beho 'ekanai a'i katohorotinakia pokina Tirama wai beho 'ekanai a'i mehorotinimi.

<sup>2</sup> Weiana wai baika behoai tuhorotinakia taeara ihobonai Tirama kehore wai behoai kehorotinimi. Mai wai emi babai baika herekiae ihobokiae Tirama kehore heremai kebabai. <sup>3</sup> Taba buonai uaho'abamu mahana aonai matiu nabunabuna noihana, iamo oi kipomu mahamu aonai matiu rarina robana a'i nuahuna? <sup>4</sup> Aehoma buonai oi uaho'abamu nohinabena, "Mahamu aonai matiu nabunabuna ma'i ahina"? Ia oi hanona mahamu aonai matiu rarina nemiaho. <sup>5</sup> Oi bahaorea haumu! Kipomu mahamu aonai matiu rarina moa'i ahi 'uaina, ba koihaiha harai uaho'abamu mahana aonai matiu nabunabuna koa'i ahina.

<sup>6</sup> Robe tabana waeha a'i katobenakia, katekabe a'i teme 'urinimi marikina. Emi mairi a'i katokapo ahinakia aiporo wairakiai. Aekiai a'i teme'ehe banai 'ehe banaina marikina.

*Katonoi, Katotabuna, Kato-harahara.*  
(Lk 11.9-13)

<sup>7</sup> Katonoi hanona kebenimi, katotabuna hanona katotabu ahina, kato-harahara hanona pa'abimi kekaikauna. <sup>8</sup> Weiana maearima ha ha tinoinoi hanona katea'inakia, tabu tabu haukia hanona katetabu ahina, mai harahara haukia hanona pa'abikia kekaikauna.

<sup>9</sup> Oi hau tabamu, nahumu pohama penoi aina raninai pihara pobena, u? <sup>10</sup> Ao maia penoi aina raninai 'erau pobena, u? <sup>11</sup> Wai ki'a haumi, iamo nahumi taba namokia katobenakia hanona

to'ibina. Babita 'abana Hamami kupai hauna kehore tinoi haukia taba namokia tohakia kebenakia, u?

<sup>12</sup> Maearima baika heremai taba tonuatae aina katebabaina hauna wai abomo herekiae ihobona katobabaina. Neiana hanona Mose ena Rauhubu mai mahabanai haukia ekia ba'iobi 'abina anina tohana.

*Pa'abi 'Omo'omona Aonai Katokatoto.*  
(Lk 13.24)

<sup>13</sup> Wai hanona pa'abi 'omo'omona aonai katokatoto. Pokina pa'abi weiana eao 'ari banaibana ekana hanona emata mai taearana epanaba, maearima bo'ona hanona weia tikatoto. <sup>14</sup> Ia pa'abi weiana eao mauri 'ekana hanona e'omo'omo, mai taearana ika'ana hanona epahihi, maearima bitamo titabu ahina.

*Matiu Hanona Buanai Kaha'ibina.*  
(Lk 6.43-44)

<sup>15</sup> Mahabanai bai'oi haukia katoiha harainakia, katemai heremi ihakia matoha mamoe 'abakia, ia aokia hanona waeha 'aki aibarakia 'abakia. <sup>16</sup> Wai hanona maearima weiakia buabuakiae katobai'obi. 'Ama'ama 'ororo buana a'i keba ramana, 'ao 'ini boaboa maiha buana a'i kebaramana. <sup>17</sup> Ihobona mo matiu namokia ikoikiae hanona buakia namokia tibaramanakia, ia matiu ki'a obokia hanona buakia ki'a obokia tibaramanakia. <sup>18</sup> A matiu namona hanona buabua ki'a obona kebaramana a'i ketaina mai matiu ki'a obona hanona buabua namona kebaramana a'i ketaina. <sup>19</sup> Matiu weiakia ikoinai buabua namokia a'i tibaramanakia haukia hanona ikabe obo iruba aonai katekapo totonakia.

<sup>20</sup> Weiana buabua uahomakiae hanona mahabanai bai'oikia aba kato'ibinakia.

*Au Wai A'i A'iobinimi.*  
(Lk 13.25-27)

<sup>21</sup> Maearima tiaparina'u, "Obiapaka e, Obiapaka e," weiakia haukia maikoinai mo Tirama ena

obia aiarana aonai a'i katekato, ia tai Hama'u kupai nemiaho hauna ena nuatae akana kebabaina hauna mo kekatoto.

<sup>22</sup> Wapu weianai maearima bo'ona here'u ai kate'abi katetibaha, "Obiapaka e, Obiapaka e, ai atamuai tamahabanai, ai atamuai auba ki'a obokia tau'u ahinakia, mai hoa haeai haeai tababainakia!" <sup>23</sup> Ba au hanona wairakiai kahinabe harainakia katibaha, "Au wai a'i a'iobinimi. Here'uai tomokapare, wai ki'a ibabaina haumi!"

*Itu Ibakorotikia Taearakia Rua.*  
(Lk 6.47-49)

<sup>24</sup> Weiana paunai hau ha e'u 'abi neiana 'uruna niona mai akakia nibabai hanona matoha ao bero hauna 'abana ena itu wairo ahanai ebakori 'auna. <sup>25</sup> Abara etibo tou ekarahi mai baura rarina eabu 'au itu eabu ki'ana, ia a'i epobu, pokina itu hanona wairo ahanai ebakori 'auna. <sup>26</sup> Ia hau ha e'u 'abi neiana 'uruna niona, ia akana a'i nibabaina hanona matoha po'o hauna 'abana ena itu 'ano ahanai ebakorotina.

<sup>27</sup> Abara etibo tou ekarahi, mai baura eabu itu epobu earu otaraina." <sup>28</sup> Iesu 'abi weiana ebapuana hanona to'u haukia ikoikiai ena ba'iobiai teta'u ta'u huri. <sup>29</sup> Pokina ia ena ba'iobi hanona rauhubu poki haukia ekia ba'iobi 'abakia aha'i, ena 'abi hanona mai hiabuna.

## 8

*Iesu Morumoru Hauna Ebamona.*

(Mk 1.40-44; Lk 5.12-14)

<sup>1</sup> Iesu oeo ai eriri raninai maearima to'u rarina 'akina murnai te'au. <sup>2</sup> Morumoru hauna ha emai Iesu wairanai ekaipahu e'abi etibaha, "Obiapaka e, konuatae raninai kobanamona'u ketaina." <sup>3</sup> Iesu imana etiu ahina ea'i 'apuana e'abi etibaha, "Au nuuatae haumu menamo." Biaimo ena morumoru enamo. <sup>4</sup> Ba Iesu hau weiana ehinabena etibaha, "Hau ha haianai a'i ko'abi, ia koao kipomu robe hauna herenai

haumu kobaihana, mai beruberu Mose e'uhina hauna kobaibenai ia herenai kebatohani'o oi hanona aba onamo."

*Roma Huari Poki Hauna Ena A'ikakauma Hoana.*  
(Lk 7.1-10)

<sup>5</sup> Iesu Kaperanauma aiaranai ekatoto raninai, Roma huari poki hauna ha emai herena enoina kebaraina. <sup>6</sup> E'abi etibaha, "Obiapaka e, e'u ta'ara a'i hauna nimoituai enoti, hauna nihaiara ki'a."

<sup>7</sup> Iesu ehinabena etibaha, "Kawaii kabananoma." <sup>8</sup> Huari poki hauna e'abi etibaha, "Obiapaka e, au a'i anamo oi komai e'u itu, 'a ko'abi mo weiana e'u ta'ara a'i hauna kemauri. <sup>9</sup> Pokina au hanona hiabu hauna ha ba'anai qamiaho mai huari haukia baika au ba'a'uai temiaho. Au hau neiana qahina bena, 'Moao' hanona niao, haeamona hau weiana qahina bena, 'Omai.' hanona nimai. Abomo e'u ta'ara a'i hauna qahina bena, 'Neiana mobabaina.' hanona ia nihore nibabaina." <sup>10</sup> Iesu aia weiana eona raninai eta'u ta'u huri, ba murinai ti'au haukia ehinabenakia etibaha, "Abi tohana au wai nahinabenimi, Isaraela aonai hau ha herenai a'ikakauma qahomana ha a'i atabu ahi 'apuana.

<sup>11</sup> Au wai nahinabenimi maearima bo'ona 'akina taetanai mai tibotainai katemai Tirama ena obia aiarana aonai tatu 'ekanai Aberahamo, Isako, Iakobo kipokia katemati haeamo. <sup>12</sup> Ia maearima weiakia Tirama ena obia aiarana eba'oruna 'eukia haukia hanona mahana wapurana katekapo ahinakia weia katehai mai nihekia katearao'i arao'i."

<sup>13</sup> Iesu huari poki hauna ehinabena etibaha, "Moao emu itu, oa'ikakauma ihobonai heremuai aba kerama." Ena ta'ara a'i hauna beraura hoana weiana aonai beronai emauri mauri.

*Iesu Petero Rawana Babi'ena Ena Inawai Ebamona.*  
(Mk 1.29-31; Lk 4.38-39)

<sup>14</sup> Iesu Petero ena ituai ekatoto raninai, Petero rawana babi'ena eihana neinawa hauna nehiabu enoti. <sup>15</sup> Iesu ehore babi'e imana ea'i 'apuana, ba inawa ehabona, babi'e emikiri Iesu ta'arana ea'i.

*Iesu Ehore Inawa Haeai Haeai Ebanamonakia.*

(Mk 1.32-34; Lk 4.40-41)

<sup>16</sup> Weiana rabirabi eaoaina aonai maearima bo'ona auba ki'a obokia aokiai haukia temiaianakia Iesu herena. Iesu hanona ena'abiai auba ki'a obokia eu'u ahinakia mai inawa haukia ikoikiai ebamaurinakia. <sup>17</sup> Neiana hanona Isaia mahabanai hauna ena 'abi ibatohana na e'abi aiho, 'Ia kipona eka 'abe'abe kea'i parenakia mai eka inawa kebua obonakia.'

*Iesu I'abana Haukiai Kateau.*

(Lk 9.57-60)

<sup>18</sup> Iesu to'u rarina tekori kaiarona eihanakia raninai i'abana haukia ehina benakia katekabanai obu abirana kateau. <sup>19</sup> Rauhubu poki hauna ha emai Iesu ehinabena etibaha, "Ba'iobi haumu e, 'eka tabana koao ia au hanona oi murimuai ka'au." <sup>20</sup> Iesu ia ena 'abi ebamuena etibaha, "Waeha 'aki hanona mai ekia 'uri, mai 'ubi roborobokia hanona mai ekia ni'i, 'a au maearima nahuna hanona ara'u kahorotina karai 'ekana aha'i." <sup>21</sup> I'abana hauna ha Iesu ehinabena etibaha, "Obiapaka e, paeao 'uai hama'u pahorena." <sup>22</sup> A Iesu ia ehinabena etibaha, "Muri'uai mo'au, 'ari haukia hanona mohabonakia kipokia ekia 'ari temehorena."

*Iesu Rani Mai Roio Eba'omatanakia.*

(Mk 4.36-41; Lk 8.22-25)

<sup>23</sup> Weiana Iesu ahiai ehe'au, i'abana haukia kipokia teao.

<sup>24</sup> Weiana obuai kou rarina 'akina eabu 'au, roio rarikia temikiri ahi tebahu abuna, 'a Iesu hanona eparua 'ari. <sup>25</sup> I'abana haukia teao tebaona te'abi tetibaha, "Obiapaka e, moba maurinaka aba kahatono." <sup>26</sup> Ia ekia 'abi ebamuena etibaha, "Emi a'ikakauma

eko'i ko'i haumi, aehoma buonai tutau' u ki'a?" Ba Iesu emikiri rani mai roio erikenakia, weiana beronai e'omata harai 'aki. <sup>27</sup> Hau wejakia teta'u ta'u huri te'abi tetibaha, "Neiana hanona hau tabana, ba rani mai roio abomo aiana tika'aina."

*Iesu Hau Rua Aokiai Auba Ki'a Obokia Eu'u Ahinakia.*

(Mk 5.1-17; Lk 8.26-37)

<sup>28</sup> Iesu obu abirana Gadarene hanonai ekara'au raninai, hau rua aokiai auba ki'a obokia temiaho haukia 'ari ahanai temai herena. Ia teaiahui wairai paunai hau ha taeara weianai a'i ekabanai. <sup>29</sup> Ia teio tetibaha, "Tirama nahuna e, heremai ai taba nonuatae aina? Rani a'i nitai bahana ia o'i omai hanona ai kobahaiaranamai, u?" <sup>30</sup> Eka weianai baiatana a'i ehoma'a hanona aiporo to'una ha tianiani. <sup>31</sup> Ba auba ki'a obokia Iesu tenoina tetibaha, "O'i kobakarahniamai raninai, kouhunamai kataeo aiporo to'una weiana aokiai katatoto."

<sup>32</sup> Weiana ia ehinabenakia etibaha, "Tomoao." Ba ia tekarahi teao, aiporo aokiai tetoto. Aiporo to'una maikoinai herehere ai tebeau riri papaa ai terobo ahi obu aonai tetobu tetono 'ari.

<sup>33</sup> Aiporo 'ima haukia tebeau obo aiara apa'uana pou neiana mai auba ki'a obokia hau aokiai temiaho haukia pouna abomo tehinana. <sup>34</sup> Weiana aiara apa'uana maearimana maikoinai temai Iesu kateihana. Ba temai teihana raninai, tenoina ekia hano kehabona.

## 9

*Iesu Mero Hauna Ha Ebana-mona.*

(Mk 2.1-12; Lk 5.17-26)

<sup>1</sup> Iesu ahi ai ehe'au obu ebeau banai ena aiara tohana eao. <sup>2</sup> Maearima baika mero hauna ha toto'eai teaoaina herena. Iesu ekia a'ikakauma eihana raninai, mero hauna ehinabena etibaha, "Naha'u e, a'i kota'u, emu ki'a aba ihina hao."

<sup>3</sup> Weiana rauhubu poki haukia baika kipokia baiatakia te'abi'abi tetibaha, "Hau neiana hanona Tirama herenai ni'abi ki'a."

<sup>4</sup> Iesu ekia raona raona e'iobinakia ba e'abi etibaha, "Aehoma buonai raona ki'a obona aomiai turaonana?" <sup>5</sup> Aeana hauna e'ama'ama, ka'abi 'Emu ki'a ihinahao.' 'ao ka'abi 'Momikiri, moka'a.' <sup>6</sup> 'A wai kato'iorina au maearima nahuna hanona mai e'u hiabu hanopaka maearimakia ekia ki'a kahina hao." Ba Iesu mero hauna ehinabena etibaha, "Momikiri, emu toto'e moa'ina, moao emu itu." <sup>7</sup> Weiana ia emikiri, eao ena itu. <sup>8</sup> To'u haukia babai weiana teihana raninai teta'u ki'a, ba hiabu uahomana maearima ebenakia Tiramana tebanamona.

*Iesu Mataio Eaparina.  
(Mk 2.13-17; Lk 5.27-32)*

<sup>9</sup> Iesu 'eka weiana ehabona eao aonai hau ha eihana, ia atana Mataio moni a'i 'ekanai\* emiat, ehinabena etibaha, "Muri'uai mo'au." Mataio emikiri murinai eka'a.

<sup>10</sup> Iesu Mataio ena itu ai nianiani aonai, moni bararo haukia bo'ona mai aka ki'a haukia abomo temai ia mai i'abana haukia kipokia teaniani haeamo. <sup>11</sup> Parisea haukia baika hoahoa weiana teihana raninai i'abana haukia tebakainakia tetibaha, "Aehoma buonai emi ba'iohi hauna moni bararo haukia mai aka ki'a haukia kipokia tianiani haeamo?"

<sup>12</sup> Iesu aia neiana eona hanona ekia 'abi ebamuena etibaha, "A'i teinawa haukia hanona muramura baiben'i hauna† a'i tenuatae aina, 'a teinawa haukia mo ia tenuatae aina. <sup>13</sup> Wai tomoao Puka robena 'abina neiana anina taba hanona katotabuna, 'Au aoko'o nanuatae aina ia baiben'i tabana aha'i.' Au amai ena poki hanona bero haukia a'i kaparinakia, 'a aka ki'a haukia kaparinakia."

*Ani Robe 'Abina.  
(Mk 2.18-22; Lk 5.33-39)*

<sup>14</sup> Weiana Ioane i'abana haukia temai Iesu herena tebakaina tetibaha, "Aehoma buonai ai mai Parisea haukia kipokia tani robe, 'a oi i'abamu haukia hanona a'i tiani robe?" <sup>15</sup> Iesu ekia 'abi ebamuena etibaha, "Hawainibe mahamaha hauna ena baki haukia herekiae nemiaho aonai ia aea katehai aiho? 'A rani kemai hawainibe mahamaha hauna herekiae katea'i parena aonai ia kateani robe.

<sup>16</sup> Hau ha habuni mahamahana puana habuni 'ai'aina ohi a'i ketai orenakia, pokina itai 'ekana kepuhu pa'ana hanona tapa keapa'ua ki'a. <sup>17</sup> Maearima bine beina mahamahana beibei 'ai'aikiae a'i katebaharuna, pokina beibei katepa'a hanona bine beina kekiki oioi abomo beibei keki'a, 'a bine beina mahamahana hanona beibei mahamahakiae katebaharuna weiana terarua katenamo."

*Uaho E'ari Hauna Ha, Mai Inawa Babi'ena Ha.  
(Mk 5.22-43; Lk 8.41-56)*

<sup>18</sup> Iesu 'abi neiana nehinana aonai, marea poki hauna ha emai wairanai ekai pehu ehinabena etibaha, "Naha'u uahona hanona bariu mo e'ari, ia omai imamu ahnai kohao 'au hanona ke-mauri." <sup>19</sup> Ba Iesu emikiri murinai e'au, i'abana haukia abomo teao.

<sup>20</sup> Weia babi'e ekia inawa ea'ina ihau harau haea rua babi'ena ha Iesu murinai eka'a emai ena habuni puana ea'i 'apuana. <sup>21</sup> Pokina kipona aonai etibaha, "Ena habuni puana mo ka'i 'apuana hanona kanamo." <sup>22</sup> 'A Iesu eiha kabe eihana ba ehinabena etibaha, "Naha'u e, a'i kota'u, emu a'ikakauma ehore ebanamoni'o." Babie' beronai mo enamo.

<sup>23</sup> Weiana Iesu marea poki hauna ena ituai etoto, irarabu ahu haukia mai to'u rarina

\* **9:9:** (9) takiti a'i 'ekana   † **9:12:** (12) Doketa

urukia nebua eihanakia raninai,<sup>24</sup> ia ehinabenakia etibaha, "Tomokatu'a, uaho hanona a'i e'ari, ia hanona niparua." To'u haukia Iesu teiriri aina.<sup>25</sup> Ba to'u haukia tekarahi mahanai murinai, ia ikaihuri aonai etoto, uaho imanai ea'i hanona uaho emauri mauri ba emikiri.<sup>26</sup> Pou neiana eao hano weiana maikoinai tehina otaraina.

*Iesu Mahakia Teki'a Haukia  
Rua Mai Maeana Eki'a Hauna Ha  
Ebanamonakia.*

<sup>27</sup> Iesu 'eka weianai ekarahi aonai mahakia teki'a haukia rua murinai teka'a teio tetibaha, "Davida nahuna e, moaoko'o aina-mai."<sup>28</sup> Ia ituai etoto raninai mahakia teki'a haukia temai herena, ba Iesu ebakainakia etibaha, "Wai tua'ikakaumana'u au aka neiana kababaina hanona ketaina, u?" Ia te'abi tetibaha, "E, Obiapaka, ta'ikakaumani'o."<sup>29</sup> Weiana Iesu ia mahakia ea'i 'apuanakia ba e'abi etibaha, "Emi a'ikakauma ihobona heremai merama."<sup>30</sup> Weiana mahakia teno'a. Ba Iesu eharabunakia etibaha, "Hau ha a'i katoba'ibolina."<sup>31</sup> A ia tekarahi teao hano weiana maikoina aonai Iesu pouna tehina otaraina.

<sup>32</sup> Ia tekarahi teka'a aonai, maearima baika hau ha aonai auba ki'a obona nemiaho buonai maeana eki'a hauna teaoaina Iesu herena.<sup>33</sup> Auba ki'a obona eu'u ahina murinai maeana eki'a hauna enamo ba e'abi'abi, to'u haukia maikoinai tetu'u ta'u huri te'abi tetibaha, "Isaraela aonai hoa nahomana ha a'i haiha 'apuana."<sup>34</sup> A Parisea haukia te'abi tetibaha, "Ia hanona auba ki'a obokia ekia pokи hauna ena hiabuai auba ki'a obokia neu'u ahinakia."

*Iesu To'u Haukia Eaoko'o  
ainakia.*

<sup>35</sup> Weiana Iesu eao aiara apa'uakia mai papakia maikokiai aokiai ekaoao, ekia marea aokiai eba'obi, Tirama ena obia aiara pouna namona eiroro aina, inawa mai haiara haeai haeai ikoikiai ebanamonakia.<sup>36</sup> Iesu to'u haukia

eihanakia hana eaoko'o ainakia pokina tiaru 'abaea mai hau hororokia ihobona mamoe i'imakia nauna aha'i haukia 'abana.<sup>37</sup> Ba ia i'abana haukia ehinabenakia etibaha, "Umai aniani bo'ona aba te'oru, ia aka haukia hanona a'i ebo'o."<sup>38</sup> Ua buonai uma Poki Hauna katonoina aka haukia keuhunakia ena umai kateueu."

## 10

*Iesu Iuhubeau Haukia Harau  
Haea Rua Etina'anakia.*

(Mk 3.13-19; Lk 6.12-16)

<sup>1</sup> Iesu i'abana haukia harau haea rua eaparinakia temai herena, hi-abu ebenakia auba ki'a obokia kate'u ahinakia haeanamona inawa mai haiara haeai haeai ikoikiai kateba namonakia.

<sup>2</sup> Iuhubeau haukia harau haea rua atakia hanona neiakia, kori 'uaina Simona, ia hanona teaparina Petero, mai uaho'abana Anderea, Sebedeo nahuna Iakobo mai uaho'abana Ioane.<sup>3</sup> Pilipo, Batolomeo, Toma mai moni bararo hauna Mataio, Alepeo nahuna Iakobo, mai Tadeo.<sup>4</sup> Selote hauna Simona, mai Isakariote hauna Iuda, Iesu ehinahinaina hauna.

*Iabana Haukia Harau Haea  
Rua Eihu Ahinakia.*

(Mk 6.7-13; Lk 9.1-5)

<sup>5</sup> Iesu hau harau haea rua neiakia euhunakia mai ehinabenakia etibaha, "Rama haeai haukia ekia hano a'i katoao abomo Samaria aiarakia ha a'i katokatoto.<sup>6</sup> A katoao Isaraela itubuna ena mamoe te'akauma haukia herekia.<sup>7</sup> Katoao aonai katoiroro katotibaha, "Tirama ena obia aiarana hanona aba herekai."<sup>8</sup> Inawa haukia katoba namonakia, 'ari haukia katoba maurinakia, morumoru tea'ina haukia hauanikia katoba namonakia, mai auba ki'a obokia katou'u ahi. Wai toa'i 'abaeana buonai katobaibeni 'abaea.

<sup>9</sup> Emi mahoa ihiua ihiua aokiai moni apa'uana 'ao papana ha a'i katoutana.<sup>10</sup> Emi kaoao paunai mahoa, habuni ibatoto

ibaruana, tamaka, mai ikai'ini a'i katoa'inakia, pokina aka hauna hanona mai ena iro'o.

<sup>11</sup> Aiara tabanai tukatoto hanona kea'i taeanimi hauna katotabuna herenai katomiaho keaomo 'eka weiana katohabona. <sup>12</sup> Itu weianai tukatoto hanona banamo katobaiben. <sup>13</sup> Itu maearimakia katea'i taeanimi raninai emi baibua banamona ahakiai kemiaho, 'a a'i katea'i taeanimi raninai emi banamo hanona kemue heremi. <sup>14</sup> 'A tai ha a'i kea'i taeanimi 'ao aiami a'i keona raninai aiara 'ao itu weiana katohabona aonai 'apumi 'apurorokia katotabu tabu obonakia. <sup>15</sup> 'Abi tohana au wai nahina benimi, bakai orena berauranai Sodoma mai Gomora aiarakia ekia puma ma ke'aera, ia aiara weiana ena puma hanona keapa'ua.

*Bai'oata Katemai.  
(Mk 13.9-13; Lk 21.12-17)*

<sup>16</sup> Au wai nauhunimi hanona ihobona matoha mamoe 'abakia tuao waeha 'aki baiatakiai. Ua buonai 'erau 'abakiai katoao katoaobero mai rauria 'abakiai katoao aomiai ki'a a'i katoro-nana. <sup>17</sup> Maearima herekiai kato'ima 'ima harainimi, pokina ia kateaoainimi bakai 'ekanai katehorotinimi, abomo marea aokiai kate'atinimi. <sup>18</sup> Au buo'uai wai kateaoainimi pokina haukia apa'uakia mai obia haukia apa'uakia wairakiai katebabakainimi, aonai ia mai rama haeai haukia herekiai pou namona ihina pouna haumiai katoao. <sup>19</sup> Kateaoainimi bakai 'ekana raninai aomi a'i kearo'ari 'abi tabana katohinana 'ao aea kato'abi aiho. Rani weianai taba katohinana hauna Tirama kebenimi. <sup>20</sup> Pokina ihinana hanona wai aha'i, 'a Hamami Tirama Aubana aomiai hauna ke'abi.

<sup>21</sup> Uaho'aba ha kehore uaho'abana kehinahina aina kateahu 'arina, hama kehore nahuna ua kehomana, nahu katehore hamakia mai hinakia

kate'oatanakia 'ari 'ekanai katehorotinakia. <sup>22</sup> Maearima ikoikiai au buo'uai kateaotata ainimi, 'a tai kekori 'ini keao puana hauna kemauri. <sup>23</sup> Aiara hai kate'oatanimi raninai kato'uru katoao aiara 'abana ha. 'Abi tohana au wai nahinabenimi, Isaraela aiarakia ikoikiai a'i katokatoto ore bahanakia aonai au maearima nahuna hanona kamai.

<sup>24</sup> Marere miorina ena ba'iohi hauna a'i ketara haona 'ao ta'ara'i hauna ena poki hauna a'i ketara haona. <sup>25</sup> Marere miorina ena ba'iohi hauna ohi kateihobo hanona enamo, mai ta'ara a'i hauna ena poki hauna ohi kateihobo hanona enamo. Itu poki hauna kateaparina Belesbulu raninai itu maearimakia baika abomo ata ki'a obokiae kateaparinakia.

*Kahata'u aina Hauna.  
(Lk 12.2-7)*

<sup>26</sup> Ua buonai a'i katota'u ainakia. Taba tebahu abunakia haukia ikoikiai hanona katea'i kau mai taba bunikia ikoikiai hanona katebawaira tinanakia kate'iohi.

<sup>27</sup> Taba wapurai nahina benimi haukia hanona ea aonai kato-hinanakia mai taba haiamiai abateteai haukia hanona itu kape-nai katoiroro ainakia. <sup>28</sup> Weiakia hauani kateahu 'arina haukia a'i katota'u ainakia pokina auba hanona a'i kateahu 'arina. Ia Tirama katota'u aina ia hanona hauani mai auba terarua kea'i ki'a bahanakia iruba aonai.

<sup>29</sup> Komure rua hanona pene hamonai katekawanakia. Iamo Hamami ena nuatae aha'i raninai ha a'i ke'eho 'anoai. <sup>30</sup> Weiana buimi ikoikiai aramiai haukia aba etuabi orenakia. <sup>31</sup> Ua buonai a'i katota'u wai hanona komure bo'ona'akina totara haonakia.

*Iesu Ihina Pouna Hoana.  
(Lk 12.8-9)*

<sup>32</sup> Hau ha maearima wairakiai ke'abi ia au ni'abana'u hauna hanona au abomo Hama'u kupai nemiaho hauna wairanai ka'abi ia hanona au i'aba'u. <sup>33</sup> 'A hau

ha maearima wairakiai au kebuniai aina'u hauna hanona au abomo Hama'u kupai nemaiho hauna wairanai ia kabuniai aina.

*Kareba Amaiaina Hanopakai.*

(Lk 12.51-53; 14.26-27)

<sup>34</sup> A'i katoraonana au amai hanona baibua hanopakai kamaaina. Au hanona baibua a'i amaiaina ia kareba amaiaina bai'oata kerama. <sup>35</sup> Au amai pokina hanona neiana,

'Hau kehore hamana ke'oatana, uaho kehore hinana ke'oatana, rawa babi'ena 'aru'aruna kehore rawana babi'ena kirona ke'oatana. <sup>36</sup> Maearima ha ena itu haukia hanona ena 'ou haukiai kateao.'

Mik 7.6

<sup>37</sup> Hau ha hamana 'ao hinana niraona'auai ki'a bahana ba au, ia hanona a'i ketaina here'uai. Hau ha nahuna hauna 'ao uahona niraona'auai ki'a bahana ba au, ia hanona a'i ketaina here'uai.

<sup>38</sup> Hau ha ena matiu ibiri ropo a'i nebuana muri'uai a'i ni'au hauna, ia hanona a'i ketaina here'uai. <sup>39</sup> Hau ha ena mauri keani ki'aina hauna hanona ena mauri keba'akaumana, hau ha ena mauri keba'akaumana au pau'uai hauna hanona ena mauri ketabu ahina.

*Ara Namona Kebenakia.*

(Mk 9.41)

<sup>40</sup> Maearima tabana wai nia'i taeanimi hauna hanona au nia'i taeana'u, mai au nia'i taeana'u hauna hanona euhuna'u Tirama abomo nia'i taeana. <sup>41</sup> Hau ha mahabanai hauna ha nia'i taeana pokina ia mahabanai hauna paunai, ia hanona mahabanai 'arana ihobona kea'ina, mai hau ha bero hauna ha nia'i taeana pokina ia bero hauna paunai, ia hanona bero hauna 'arana ihobona kea'ina. <sup>42</sup> Hau ha bei 'amarina ereai miori neiakia atakia a'i teapa'ua haukia kebenakia pokina ia au i'aba'u haukia paunai, 'abi tohana au wai nahina benimi, 'ara ia'ina aonai ia a'i kekapu."

## 11

*Iesu Ba'uere Robe Hauna Ioane Robana Eahuna.*  
(Lk 7.18-35)

<sup>1</sup> Iesu i'abana haukia harau haea rua 'abi neiakiai erobenakia murinai, 'eka weiana ehabona eao Galilea aiarakia aokiai weia keba'obi mai keiroro.

<sup>2</sup> Ioane wapura ituna aonai Keriso ena aka poukia eo'o raninai i'abana haukia euhunakia herena teao, <sup>3</sup> Iesu tebakaina tetibaha, "Kemai hauna hanona oi? 'Ao haeai ha kata'imana?"

<sup>4</sup> Iesu ekia 'abi ebamuena etibaha, "Tomomue tomoao, taba to'o mai toihā haukia Ioane haianai katohinanakia. <sup>5</sup> Maha ki'a haukia aba teihaiha mue, ome haukia tika'a, morumoru haukia aba tinamo, haia po'o haukia aia tio'o, 'ari haukia temikiri timauri, mai uraru haukia herekiai pou namona teiroro aina. <sup>6</sup> Hau ha here'uai aona a'i nikai'au kai'au hauna Tirama nibanamona."

<sup>7</sup> Ioane i'abana haukia tekamuri aonai, Iesu to'u haukia herekiai Ioane pouna ehina ramana. "Wai taba katoihana buonai toao hano'akunai? Baura kopura nibaibiunakia katoihanakia, u?

<sup>8</sup> Aha'i raninai, toao hanona taba katoihana? Hau ha habuni ta'eta'ekia ebatotonakia hauna, u? Weiakia habuni ta'eta'ekia fibatoto haukia hanona obia arana ena ituai temiaho. <sup>9</sup> Ba taba katoihana buonai toao? Mahabanai hauna ha? 'E, au wai nahinabenimi, Ioane hanona mahabanai haukia etara haonakia. <sup>10</sup> Ia pouna Puka robenai na tererena aihona,

'Au e'u iuhubeau hauna kauhu 'uaina wairamuai, ia kehore emu taeera kea'ia'i haraina.'

Mal 3.1

<sup>11</sup> 'Abi tohana au wai nahinabenimi, weiakia babi'e tebaramanakia haukia baiatakiai hau ha ba'uere robe hauna Ioane a'i etara haona, iamo weiana Tirama ena obia aiaranai eko'i ko'i hauna Ioane etara haona.

<sup>12</sup> Ba'uere robe hauna Ioane ena raniai emaimo bariu, Tirama ena obia aiarana hanona tikakina, kakikaki haukia hanona tibahobona katepuhu boina.<sup>13</sup> Pokina mahabanai haukia mai Mose ena rauhubu ikoikiai aokiai Tirama ena obia aiarana pouna tehinana emai mo Ioane ena raniai.<sup>14</sup> Wai tua'i taeana raninai kato'ibina Ioane hanona Elia weiana kemai hauna.<sup>15</sup> Mai haiana hauna hanona aia keona.

<sup>16</sup> Uru neiana haukia tabai kaba batainakia? Ia hanona matoha miori papakia kawakawa 'ekanai temiati 'abakia tiaparinakia tetibaha,<sup>17</sup> 'Ai irarabu tahunakia wai paumiai, iamo wai a'i tuewa. 'Ari huikia ta'i, iamo wai a'i tuhai.'<sup>18</sup> Weiana Ioane emai hanona a'i eaniani mai a'i einuinu, ba ia te'abi tetibaha, 'Auba ki'a obona ha ia aonai.'<sup>19</sup> Au Maearima nahuna amai aniani mai ainuinu hanona ia te'abi tetibaha, 'Ia hanona aniani ki'a mai inuinu ki'a, moni bararo mai aka ki'a haukia ekia hau.' Aaobero hanona ena buabua nihore ena bero nibatohana."

*A'i Teraona Kabe Aiarakia  
Herekiai Keki'a Wairai.  
(Lk 10.13-15)*

<sup>20</sup> Weiana Iesu aiara weiakia aokiai hiabu hoakia bo'okia ebabai 'ekakia maearimakia ebatanakia, pokina ia ekia ki'ai a'i teraona kabe buonai.<sup>21</sup> "Korasina e, heremuai keki'a wairai! Bete-saida e, oi abomo heremuai keki'a wairai! Hiabu hoakia heremai ababai haukia Turo mai Sidono haukia herekiai pababai raninai, ia hanona aba wa'i baha 'akinai pateraona kabe, habuni ki'a obokia patebatoto mai arakiai rabu patehoroti.<sup>22</sup> 'A au wai nahina benimi, Tirama ena bakai apa'uana berauranai Turo mai Sidono haukia ekia puma hanona ma ke'ama'ama ba wai 'eumi.<sup>23</sup> Kaperanauma e, oi katea'i taeani'o koao kupa ubinai, u? Aha'i, oi hanona katekapo ririni'o koao iruba aonai. Hiabu hoakia

weiakia heremuai ababai haukia Sodoma herenai pababai raninai, ia hanona pemiaho mo pemai bariu rani neianai.<sup>24</sup> 'A au wai nahinabenimi, Tirama ena bakai apa'uana berauranai Sodoma ena puma hanona ma ke'ama'ama ba wai 'eumi.

*Tomai Here'uai Katoarai.  
(Lk 10.21-22)*

<sup>25</sup> Rani weianai Iesu ena bahuba'ariai e'abi etibaha, "Hama'u e, kupa mai hanopaka Obiana. Au oi nabananom'i'o pokina taba neiakia ohore buninakia aotipa mai 'obi haukia herekiai, ia miori papakia herekiai obawaira tinanakia.<sup>26</sup> Hama'u e, 'abi tohana, pokina neiana hanona oi emu aonamo tohana.<sup>27</sup> Hiabu ikoikiai hanona Hama'u aba ebena'u. Ia Nahuna a'i te'ibina Hamana mo kipona, mai hau ha Hamana a'i e'ibina Nahuna mai Nahuna etina'anakia haukia weiakia herekiai kipona kebawaira tinana haukia mo."

<sup>28</sup> "Tuhan hororo haumi mai puma tobuana haumi, ikoimiai ena here'u tomai, au wai arai kabenimi.<sup>29</sup> E'u iebebe tomoa'ina 'aromiai tomobuana mai here'uai 'obi katoa'ina pokina au hanona ao 'amari mai 'aiaunu hau'u. Weiana wai aubami katearai.<sup>30</sup> Pokina e'u iebebe hanona e'ama'ama mai e'u buabua hanona a'i epuma."

## 12

*Beraura Robe Obiana.  
(Mk 2.23-28; Lk 6.1-6)*

<sup>1</sup> Rani weiana beraura robenai Iesu witi umana aonai ekabanai. I'abana haukia mare'a te'ari buonai witi buakia te'ini huri teani.<sup>2</sup> Parisea haukia babai weiana teihana raninai Iesu tehinabena tetibaha, "Moihana, oi i'abamu haukia hanona beraura robenai taba a'i katebabaina hauna tibabaina."<sup>3</sup> Iesu ekia 'abi ebamuena etibaha, "Wai, Davida te'abana haukia kipokia mare'a te'ari aonai taba ebabaina hauna a'i totuabina?"<sup>4</sup> Ia Tirama ena

ituai etoto, weia parawa robena ea'ina, parawa weiana hanona erobe, robe haukia ikupaiakia mo kateana hauna, ia mai te'abana haukia kipokia teana.<sup>5</sup> Haeamona robe haukia marea robe aonai beraura robe akana tibabai ki'ana iamo a'i tibeho, rauhubuna weiana a'i totuabina? <sup>6</sup> Au wai nahinabenimi, hau ha neia hauna ehore marea robe etara haona.

<sup>7</sup> 'Au nanuatae aoko'o, ia a'i nanuatae baibenitabakia.'

Hos 6.6

Puka robenai 'abi neiakia anikia pato'iobi raninai maearima a'i tebeho haukia behoai a'i katohorotinakia. <sup>8</sup> Pokina au Maearima nahuna hanona beraura robe obiana."

*Iesu Ehore Ima Kobekobe Hauna Imana Ebanamona.*

(Mk 3.1-6; Lk 6.6-11)

<sup>9</sup> Iesu 'eka weiana ehabona eao ekia marea ha aonai etoto, <sup>10</sup> hau ha imana kobekobena abomo weia, maearima baika taeara tetabu Iesu beho 'ekanai katehorotina, ba Iesu tebakaina tetibaha, "Beraura robenai inawa kahabanamo hanona behona aha'i?" <sup>11</sup> Iesu ehinabenakia etibaha, "Wai ha emu mamoe beraura robenai 'uriae petoa raninai a'i poa'i 'auna, u?" <sup>12</sup> Maearima hanona mamoe etara haona. Ua buonai beraura robenai namo kahababaina hanona ebero." <sup>13</sup> Ba Iesu hau weiana ehinabena etibaha, "Imamu motiu berona." Weiana imana etiu berona hanona maikoina enamo ihobona imana abihana 'abana. <sup>14</sup> 'A Parisea haukia tekarahi teao teroba ahu aea katehoma Iesu kateahu'arina.

*Tirama Etina'ana Hauna.*

<sup>15</sup> Iesu aba e'lobina paunai 'eka weianai ekapare. Maearima bo'ona 'akina murinai te'au, ekia inawa ikoikiai ebanamonakia, <sup>16</sup> ehara abunakia tai ha haianai a'i kate'abi ia hanona tai. <sup>17</sup> Neiana hanona Isaia mahabanai hauna ehinana 'abina ibatohana.

<sup>18</sup> 'Tomoihana ia hanona atina'ana e'u ta'ara'i hauna, naraona'au aina

mai naonamo aina. Au e'u Auba Robe ia ahana kahorotina, bero keiroroaina hanopaka haukia herekiai.

<sup>19</sup> Ia hanona a'i kebajihara tae 'ao a'i keio abomo aiana aiara ibukiai a'i kateona.

<sup>20</sup> Ia hiribo aba nimohu hauna matoha 'abe'abe haukia 'abana ia a'i kebamohu hurina, abomo baubaea aba ni'ao hauna matoha ekia buabeni e'aera 'aera haukia 'abana ena buabeni a'i keba'aona keaomo bero akana kebawaira tinana.

<sup>21</sup> Hanopaka maearimakia ikoikiai ekia buabenia ia atanai ahana katehorotinakia.'

Isa 42.1-4

*Iesu Mai Belesebulo.*

(Mk 3.20; Lk 11.14-23; 12.10)

<sup>22</sup> Hau ha aonai auba ki'a obona emiaho hauna temaiaina Iesu herena ia hanona mahana teki'a mai maeana eki'a, Iesu ehore ebanamona, weiana ia e'abi'abi mai eihaiha mue. <sup>23</sup> Maearima ikoikiai teta'u ta'u huri tetibaha, "Pa'e hau neiana hanona Davida Nahuna." <sup>24</sup> 'A Parisea haukia pou neiana teona raninai te'abi tetibaha, "Neiana hanona auba ki'a obokia ekia poki Belesebulo ena hiabuai auba ki'a obokia naiakia neu'u ahinakia."

<sup>25</sup> Iesu ekia raona e'lobina buonai ehinabenakia etibaha, "Hanopaka ha kipona kebapa'ana kate'au hanona ke'iti'iti, mai aiara ha kipona 'ao itubu ha kipona kebapa'ana kate'au raninai kekor 'ini hanona a'i ketaina.

<sup>26</sup> Ba Satani kehore Satani keu'u ahina raninai ia hanona kipona nibapa'ana, weiana ena hanopaka hanona aea kekor 'ini aiho? <sup>27</sup> Au Belesebulo hiabunai auba ki'a obokia nau'u ahinakia raninai tai 'eunai wai emi maearima auba ki'a obokia teu'u ahi? Ua buonai emi maearima katehore behoai katehorotinimi. <sup>28</sup> 'A au Tirama ena Auba hiabunai auba ki'a obokia nau'u ahinakia raninai weiana Tirama ena obia aiarana hanona aba emai wai heremai.

<sup>29</sup> Hau ha tabura hauna ena itu a'i keahu pa'ana ena taba a'i kea'i parenakia keaomo ia tabura hauna kea'ina kebiri 'uaina, ba ena taba kebaina o aimakia.

<sup>30</sup> Maearima ha tai'u a'i niti hauna hanona au ni'oatana'u, mai maearima ha au tararua a'i tabararo bararo hauna hanona nikapo kapo otarai.

<sup>31</sup> Weiana buonai au wai nahina benimi, maearima ekia aka ki'a mai ekia 'abi ki'a ikoikia hanona kehina hao ketaina, ia Auba Robe herenai e'abi ki'a hauna hanona a'i kehina hao 'apuana. <sup>32</sup> Hau ha ke'abi ki'a Maearima nahuna herenai hanona kehina hao ketaina, 'a hau ha Auba Robe herenai ke'abi ki'a hauna hanona a'i kehina hao 'apuana bariu mauri neianai mai mauri wairai abomo.

*Matiu Hanona Buabuakiai Kaha'ibinakia.  
(Lk 6.43-45)*

<sup>33</sup> Matiu namonai hanona buabua namokia katerama, matiu ki'a obonai hanona buabua ki'a obokia katerama, pokina matiu aea homana hanona buabuanai i'lobina nirama. <sup>34</sup> 'Erau nahukia e, emi raona teki'a aeahomanai mo 'abi namokia katohina? Pokina pina hanona aoai taba ebonu hauna nehinana. <sup>35</sup> Hau namona aonai taba namokia euta haukia namokia nibakarahi, hau ki'a obona aonai taba ki'a obokia euta haukia ki'a obokia nibakarahi.

<sup>36</sup> Au wai nahinabenimi, maearima ikoinal te'abi 'abaea haukia ikoikiai Tirama ena bakai berauranai 'ara katebaibenit toha. <sup>37</sup> Ua buonai emu 'abi kehore bero kebeni'o abomo emu 'abi kehore puma kebeni'o."

*Tenuatae Hiabu Hoana Katehana.  
(Mk 8.11-12; Lk 11.29-32)*

<sup>38</sup> Ba Parisea haukia mai rauhubu poki haukia baika Iesu tehinabena tetibaha, "Ba'iobi haumu e, ai tenuatae oi heremuai hiabu hoana ha pobabaina pataihana."

<sup>39</sup> Iesu ekia 'abi ebamuena etibaha, "Uru neiana ki'a obona mai a'ikakauma aha'i haumi, aehoma buonai hiabu hoana tubakai bakai aina? Ia hoa kabenimi hauna hanona mahabanai hauna Iona mo ena hoa. <sup>40</sup> Iona mararani aihau mai rabi aihau maia apa'uana nuana aonai emiaho, ihobona mo au maearima nahuna abomo mararani aihau mai rabi aihau hano aonai kamiaho. <sup>41</sup> Bakai ranina kemai Nineba maearimakia uru neiana haumi beho 'ekanai katehorotinimi, pokina Iona ena iroroi teraona kabe. Ia bariu Iona etara haona hauna hanona neia. <sup>42</sup> Ahitaina hanopakana obia babi'en\* bakai 'ekanai kemikiri uru neiana haumi beho 'ekanai kehorotinimi, pokina ia hanopaka puanai emai Solomon ena aobero 'abikia eo'o. Ia bariu Solomon etara haona hauna hanona neia."

*Auba Ki'a Obona Emue.  
(Lk 11.24-26)*

<sup>43</sup> "Auba ki'a obona hau ha aonai ekarahi raninai eao hano 'ororonal ekaaoao 'eka etabu kearai, ia 'eka ha a'i etabu ahina, <sup>44</sup> ba kipona e'abi etibaha, 'Au hanona kamue e'u itu abahona hauna kaeao', weiana emue eao itu 'abaeana etabu ahina aba tetarona mai e'oru harai. <sup>45</sup> Ba ekarahi eao 'abana baika 'abaihau hamomo teki'a ki'a baha haukia emaiainakia tetoto weia temiaho. Hau weiana 'uainai ena miao eki'a, ia bariu hanona eki'a ki'a baha. Weiana hanona uru ki'a obona neiakia haukia herekiai ua kerama aiho."

*Iesu Hinana Mai Uaho'abana.  
(Mk 3.31-35; Lk 8.19-21)*

<sup>46</sup> Iesu maearima nehinabe ohonakia aonai hinana mai uaho'abana tekara'au. Mahanai tekoroti tenuatae Iesu kipokia kate'abi'abi. <sup>47</sup> Hau ha ia tehinabena etibaha, "Hinamu mai uaho'abamu hanona mahanai tekoroti, oi tenuatae aini'o kato'abi'abi." <sup>48</sup> Iesu ia ena 'abi ebamuena etibaha,

\* **12:42:** (42) atana Seba 1 King 10.1-10

“Tai hauna au hina'u, mai tai haukia au uaho'aba'u?”<sup>49</sup> Imana etiu i'abana haukia e'uahinakia etibaha, “Neiakia haukia hanona au hina'u mai au uaho'aba'u.<sup>50</sup> Pokina maearima ha au Hama'u kupai nemiaho hauna ena nuatae nibabaina hauna hanona au uaho'aba'u, haibu'u mai hina'u.”

## 13

### *'Abi Ibabatai Hau Ha Uho Ebatonakia.*

(Mk 4.1-9; Lk 8.4-8)

<sup>1</sup> Beraura hamona weianai Iesu ituai ekarahi eao 'obu poenai emiati. <sup>2</sup> Herenai to'u eapa'ua ki'a baha buonai emikiri ahi hai ehe'au emiati, maearima ikoikiai hanona poeai tekoroti. <sup>3</sup> Ba ia ehore taba bo'ona 'abi ibabataiai ehinanakia etibaha, “Biraura hauna ha ekarahi eao ena umai uho kebatonakia. <sup>4</sup> Ena uho ekapo kapo otarainakia aonai, baika hanona taearai te'eho, weiana roborobo temai teani orenakia. <sup>5</sup> Baika bohuai te'eho, te'omu noanoa pokina hano enibinibi. <sup>6</sup> Ba beraura ekara'au raninai hubukia tepaea abomo te'ororo pokina ramukia aha'i. <sup>7</sup> Uho baika 'ini boaboa aokiai te'eho, ia 'ini boaboa te'omu tetara tara abunakia. <sup>8</sup> A uho baika hano namonai te'eho. Weiana buakia terama baika hanona hinabu hamomo, baika imabui harauhaea, mai baika harau aihaus. <sup>9</sup> Mai haiana hauna aia keona.”

*'Abi Ibabatai Pokina.*  
(Mk 4.10-12; Lk 8.9-10)

<sup>10</sup> Ba i'abana haukia temai Iesu herena tebakaina tetibaha, “Taba buonai maearima 'abi ibabataiai nohina benakia?”<sup>11</sup> Iesu ekia 'abi ebamuena etibaha, “Tirama ena obia aiarana aotipana bunikia hanona aba heremai tewaira tina, 'a ia herekiai hanona aha'i.<sup>12</sup> Pokina maearima ha mai 'euna hauna bo'ona katebena, weiana ia 'euna hanona kebo'o harai. Maearima ha 'eunai aha'i hauna herenai papana nemiaho hauna

abomo katea'i boina.<sup>13</sup> 'Abi ibabataiai nahina benakia ena poki hanona neiana, kateihana mo ia a'i kateiha tinana, katebahu mo ia aia a'i kateona mai obona a'i kateobo.<sup>14</sup> Ua buonai 'eka neianai Isaia ena mahabanai 'abina hanona emai etohana, ‘Wai aia katobahu ai 'arimo ia obona a'i katobo, wai katoiha to'o baihana mo ia a'i katoiha tinana.

<sup>15</sup> Weiana hanona maearima neiakia aokia tewapura, haiakia te'ou abunakia mai mahakia tekaiabunakia, pokina mahakiai a'i temeihaiha, haiakiai aia a'i temeo'o, aokiai obo a'i temeobo, a'i temeraona kabe here'uai, a'i mabamaurinakia paunai.’

Isa 6.9, 10

<sup>16</sup> “Wai hanona Tirama nibanamonimi, pokina mahamiai toihā mai haiamiai aia tuo'o.<sup>17</sup> 'Abi tohana au nahina benimi, mahabanai haukia mai bero haukia bo'okia tenuatae ki'a baha taba toihā haukia pateiha, ia a'i teiha, mai taba wai tuo'o haukia pateo'o, ia a'i teo'o.”

*'Abi Ibabatai Anina.*  
(Mk 4.13-20; Lk 8.11-15)

<sup>18</sup> “Ba tomobahu 'abi ibabataiai batobato anina hanona taba.<sup>19</sup> Hau ha Tirama ena obia aiarana 'abina pouna niona 'a obona a'i niobo aonai tiaporō nimai taba aonai tebatona hauna nia'i parena. Neiana hanona uho

weiakia taearai te'eho 'abakia.<sup>20</sup> Uho bohu ahana e'eho hanona hau ha Tirama ena 'abi aiana niona mai aonamona nia'i taea noanoana.<sup>21</sup> Ia ramuna a'i teriri harai buonai a'i nemiaho homa'ana. Tirama ena 'abi weiana paunai atetua 'ao bai'oata timai raninai beronai mo ni'eho.<sup>22</sup> Ba uho 'ini boaboa baiatakiai e'eho hanona hau ha Tirama ena 'abi aiana niona 'a hanopaka aoanina mai kepu raonaraonakia tihore 'abi weiana tit'a ta'a abuna ba a'i nebua'a.<sup>23</sup> A uho hano namonai e'eho hanona hau ha Tirama ena

'abi aiana niona mai obona niobo. Ia hanona nebua'a buabuana hinabu hamomo nibarama, baika imabui harauhaea, mai baika harau aihau."

*'Abi Ibabatai Witi Mai Awa.*

<sup>24</sup> Iesu 'abi ibabatai ha herekiai ehinana. "Tirama ena obia aiarana hanona matoha hau ha uho namokia ena umai ebatonakia. <sup>25</sup> A maearima ikoikiai teparua rea aonai, ena 'ou hauna emai witi baiatakiai awa ebatonakia ba eka'a. <sup>26</sup> Witi te'omu buakia tekapo ahi raninai, awa abomo tekere. <sup>27</sup> Poki hauna ena ta'ara'i haukia temai herena te'abi tetibaha, 'Poki haumu e, oi emu umai uho namokia obatonakia, ia awa hanona ae'eai temai?'

<sup>28</sup> Ia ekia 'abi ebamuena etibaha, 'Ou hauna ha naiana ebabaina.' Ena ta'ara'i haukia tetibaha, 'Nonuatae kataeo awa katapuhu 'aunakia?' <sup>29</sup> Ia e'abi etibaha, 'Aha'i, pokina awa katopuhu 'aunakia raninai witi abomo awa kipokia a'i tomopuhu 'aunakia marikina. <sup>30</sup> Tomohabonakia terarua teme'omu haeamo keaomo witi iarikia ranina. Rani weianai hanona iarina haukia kahina benakia, 'Awa tomobararo 'uainakia katotoba 'ininakia kate'ara, ba witi kato bararonakia katomaiaiakia e'u paraboa aonai." ,"

*'Abi Ibabatai Tuaba Uhona.*  
(Mk 4.30-32; Lk 13.18-19)

<sup>31</sup> Iesu 'abi ibabatai ha herekiai ehinana. "Tirama ena obia aiarana hanona matoha tuaba uhona 'abana. Weiana hau ha ea'ina ena umai ebatona. <sup>32</sup> Uho ikoikiai baiatakiai ia hanona e'aera 'aera 'aki, iamo eomu raninai ia hanona eapa'ua ba umai batobato tabakia ikoikiai eberenakia, matiu hai eao ubi roborobokia timai weia kakanai tiarai."

*'Abi Ibabatai Bakupu Muramurana.*

(Lk 13.20-21)

<sup>33</sup> Iesu 'abi ibabatai ha haeamona ehinana. "Tirama ena obia aiarana hanona matoha bakupu

muramurana 'abana. Babi'e ha bakupu mura murana ea'ina pani rarina aonai parawa bo'ona kipokia eu banai eu banaina eaomo parawa maikoina ekupu."

*'Abi Ibabatai Ekia Aka.*

(Mk 4.33-34)

<sup>34</sup> Iesu 'abi neiakia ikoikiai to'u haukia ehinabenakia hanona 'abi beronai a'i ehina benakia, ia 'abi ibabatai mo ehinabenakia. <sup>35</sup> Neiana hanona mahabanai hauna ehinana hauna nibatohana. "Ka'abi benakia raninai 'abi ibabatai kahina benakia, hanopaka erama raninai emai mo bariu taba bunikia haukia au kahore kahina pounakia."

Sal 78.2

*Witi Mai Awa 'Abi Ibabataina Anina.*

<sup>36</sup> Ba mako ehabonakia eao itu aonai etoto, i'abana haukia temai herena te'abi tetibaha, "Abi ibabatai neiana awa uma aonai hauna heremaiai mohina hina haraina."

<sup>37</sup> Iesu e'abi etibaha, "Weiana uho namona ebatona hauna hanona au maearima nahuna.

<sup>38</sup> Uma hanona hanopaka, uho namokia hanona Tirama ena obia aiarana maearimakia, awa hanona hau ki'a obona ena maearima. <sup>39</sup> 'Ou hauna weiana awa ebatonakia hauna hanona tiaporu. Iarina ranina hanona hanopaka puana, ariari haukia hanona aneru.

<sup>40</sup> Awa ipuhu 'au ibararo irubai kate'ara ihobona hanona hanopaka puuanai kerama.

<sup>41</sup> Au maearima nahuna e'u aneru kauhu ahinakia e'u aiara aonai beho tibaramana haukia mai aka ki'a tibabai haukia ikoinai katebararonakia.

<sup>42</sup> Ia katehore iruba a'i ni'ao 'apua 'ekana aonai katekapo totonakia, weia katehai mai 'aki'akikia katearao'i arao'i.

<sup>43</sup> Ba bero haukia hanona Hamakia ena obia aiarana aonai katea matoha beraura 'abana. Mai haiana hauna aia keona.

*Tirama Ena Obia Aiarana 'Abina Ibabataikia Aihau.*

<sup>44</sup> "Tirama ena obia aiarana hanona matoha kepu namona uma aonai ihore buni 'abana. Hau ha etabu ahina raninai ehore buni muena, mai aonamona eao ena taba maikoinai ekawa kawa ainakia moninai hano weiana mai umana ekawana.

<sup>45</sup> Haeamona Tirama ena obia aiarana hanona matoha kawakawa hauna ha hoea raia namona nitabuna 'abana. <sup>46</sup> Ba hoea raia namona 'akina ha etabu ahina raninai, ia eao ena taba maikoinai ekawa kawa ainakia moninai hoea raia weiana ekawana.

<sup>47</sup> Abomo Tirama ena obia aiarana hanona matoha re'e 'obuai tehorena weiana maia haeai haeai terewa 'abana.

<sup>48</sup> Ba'eha haukia re'e ebonu raninai teberi 'auna poeai, ba temiati maia namokia pohea aonai teutanakia, 'a ki'a obokia hanona tene'enakia. <sup>49</sup> Hanopaka ena puai hanona ua kerama aiho. Aneru katemai bero haukia mai ki'a haukia katebina'anakia. <sup>50</sup> Ki'a haukia hanona iruba a'i ni'ao 'apua 'ekana aonai katekapo totonakia, weia katehai mai 'aki'akikia katearao'i arao'i."

### Kepu Mahamahakia Mai 'Ai'aikia.

<sup>51</sup> Ba Iesu ebakainakia etibaha, "Abi neiakia ikoikiai obokia aba tuobo?" Ena 'abi tebamuena tetibaha, "E, obokia aba taobo." <sup>52</sup> Ia ehina benakia etibaha, "Weiana paunai rauhubu pokia haukia weiakia Tirama ena obia aiarana pouna aba te'io bina haukia ha ha hanona matoha itu pokia hauna 'abana, ena ro'aro'a ikaihurinai kepu mahamahakia mai 'ai'aikia nia'i ahinakia."

### Iesu Ena Aiara Haukia Tebaki'ana.

(Mk 6.1-6; Lk 4.16-30)

<sup>53</sup> Iesu 'abi ibabatai neiakia ehinanakia murinai 'eka weiana ehabona, <sup>54</sup> emai ena aiarai marea aonai maearima eba'io binakia hanona teta'u ta'u huri. Tebakai bakai tetibaha, "Hau neiana aobero mai hiabu akakia neiakia

ae'eai ea'inakia? <sup>55</sup> Ia hanona kamuta hauna nahuna tohana, ia hinana atana Maria, uaho'abana hanona Iakobo, Iosepa, Simona mai Iuda. <sup>56</sup> Haibuna ikoikiai hanona neia kipokia nahamiaho. Ba hau neiana taba neiakia ikoikiai ae'eai ea'inakia?" <sup>57</sup> Weiana ia tehore Iesu tebaki'ana. 'A Iesu ia ehina benakia etibaha, "Mahabanai hauna hanona katemariki aina, ia ena aiarai mai ena itu haukia hanona a'i katemariki aina." <sup>58</sup> Weiana ekia a'ikakauma aha'i paunai hiabu hoakia bo'okia weia a'i ebabai.

## 14

### Ba'uere Robe Hauna Ioane Ena 'Ari.

(Mk 6.14-29; Lk 3.19-20; 9.7-9)

<sup>1</sup> Rani weianai obia 'arana Herod hanona Galilea epoki aina aonai Iesu pouna eona. <sup>2</sup> Ba ena aka haukia ehinabenakia etibaha, "Ioane ba'uere robe hauna ahu'arina hauna 'ariai emue emai, weiana buonai hiabu akakia neiakia ia aonai tiaka."

<sup>3-4</sup> 'Uaina raninai Herod hanona uaho'abana Pilipo atawana Herodia eatawana. Ba Ioane ba'uere robe hauna rani ikoinai Herod ehinabena etibaha, "Babi'e neiana oatawana hanona a'i ebero." Weiana paunai Herod 'abi ebaiben'i Ioane tebirina wapura itunai tekaabuna. <sup>5</sup> Herod ena nuatae Ioane keahu 'arina, ia maearima eta'u ainakia, pokina ia hanona mahabanai haunai tebaona.

<sup>6</sup> Rani ha Herod ena rama beraurana tatunai Herodia nahuna uahona to'u wairakiai ewa, ba Herod aona ebaonamo ki'ana. <sup>7</sup> Weiana Herod e'abi'uai uaho herenai, ena 'abi'uai taburana ehinana weiana taba kenoiaina hauna kebena mo.

<sup>8</sup> Hinana ena 'abiai uaho Herod enoina etibaha, "Bariu mo Ioane ba'uere robe hauna arana tihuai koutana kobena'u."

<sup>9</sup> Obia 'arana hauna aona earo'ari. Ia ena 'abi'uai baki haukia wairakiai ehinana hauna

paunai, 'abi ebaiben i uaho ena noi akana katebabaina.<sup>10</sup> Weiana euhunakia wapura ituna aonai Ioane 'akona tekabe hurina.<sup>11</sup> Ioane 'arana tihu aonai teutana temaiaina uaho tebena, ba uaho eaoaina hinana ebena.<sup>12</sup> Ioane i'abana haukia temai hauanina tea'ina teaoaina tehorena. Ba teao Iesu teba'iobina.

*Iesu Maearima Taha Ima Ebani-aninakia.*  
(Mk 6.31-44; Lk 9.10-17; Io 6.1-13)

<sup>13</sup> Iesu pou weiana eona raninai ahiai ehe'au ikupaiiana eao 'eka 'abaeana ha, maearima bo'ona 'uru neiana teona hanona ekia aiarai aekiai Iesu murinai teao.<sup>14</sup> Iesu ahiai eriri raninai to'u raringa eihana eaoko'o ainakia mai ekia inawa ebanamonakia.

<sup>15</sup> Aba erabirabi aonai i'abana haukia teao Iesu herena te'abi tetibaha, "Neiana hanona 'eka 'abaeana mai aba kerabi. To'u haukia mouhunakia temeo, aiara baika aokiai kipokia ekia aniani temekawa hanona kenamo."<sup>16</sup> Iesu e'abi etibaha, "Ia hanona a'i kauhunakia, wai taba ha katobenakia kateani."<sup>17</sup> I'abana haukia te'abi tetibaha, "Ai here-maiai hanona parawa ima mai maia rua 'akimo."<sup>18</sup> Iesu e'abi etibaha, "Tomaiaianakia here'u."

<sup>19</sup> Ba maearima ehina benakia tubu ahanai katemiati, weiana parawa ima mai maia rua ea'inakia ea'a taea kupa Tirama ebanamona ba parawa ehobinakia, i'abana haukia ebennakia teaoai maearima tebenakia.<sup>20</sup> Ia ikoikiai teaniani teani 'ari, i'abana haukia aniani harikia tebararo areha ikoinai harauhaea rua tebabonunakia.<sup>21</sup> Weiakia teaniani haukia hanona taha\* ima (5,000) 'abana, hau mo tetuabinakia babi'e mai miori hanona a'i tetuabinakia.

*Iesu Bei Kapanai Eka'a.*  
(Mk 6.45-52; Io 6.16-21)

<sup>22</sup> Weiana murinai Iesu beronai i'abana haukia ahiai ebaehe

'aunakia kate'uai kateao obu abi-ranai, aonai ia hanona maearima euhunakia kateka'a.<sup>23</sup> Maearima euhunakia teka'a murinai, ia ikupaiiana oeo ha ai ekara'au kebahuba'ari. Rabi emai aonai ia hanona ikupaiiana weia.<sup>24</sup> A ahi hanona aba ekarahi 'akau-mana obu kapenai, roio niahua ahuaona pokina baura hanona wairakiai emai.<sup>25</sup> Raurani wapuranai kokoro'u ibaihauna ni'arara ihobonai Iesu bei kapenai eka'a eao herekia.<sup>26</sup> I'abana haukia Iesu bei kapenai eka'a teihana raninai tetau ki'a, mai ta'ukia teio tetibaha, "Ei, biriua."<sup>27</sup> Iesu beronai mo ehina benakia etibaha, "Tomobakiro, na au, a'i katotau'u."

<sup>28</sup> Ba Petero etae e'abi etibaha, "Obiapaka e, oi tohamu raninai mo'abi, bei kapenai mawahie heremu."<sup>29</sup> Iesu e'abi etibaha, "Omai." Weiana Petero ahiai eriri bei kapenai eka'a ha ha Iesu herena eao.<sup>30</sup> 'A roio rarina eihana raninai eta'u, beiai nepurupuru aonai eio etibaha, "Obiapaka e, mobamaurina'u!"

<sup>31</sup> Beronaimo Iesu imana etiu ahina Petero ea'ina ehinabena etibaha, "Emu a'ikakauma e'aera haumu, taba buonai aomu ekai'au kai'au?"<sup>32</sup> Ba terarua ahi ahanai tehe'au hanona baura e'oko.<sup>33</sup> I'abana haukia weia ahi aonai haukia Iesu tekutiaina te'abi tetibaha, "Abi tohana oi hanona Tirama Nahuna."

*Iesu Genesaretai Inawa Haukia Ebamaurinakia.*  
(Mk 6.53-56)

<sup>34</sup> Obu tebeau banai temai Genesareta hanonai tekara'au.<sup>35</sup> 'Eka weiana haukia Iesu teiha 'iobi aina hanona 'abi teuhuna eao aiara weiakia herekiai haukia herekia, ba maearima weiakia ekia inawa haukia ikoikiai temai ainakia herena.<sup>36</sup> Maearima Iesu tenoina inawa haukia ena habuni puana mo patea'i 'apuana. Ba tea'i 'apuana haukia ikoikiai hanona tenamo.

\* **14:21:** (21) 1,000 (thousand)

## 15

### *Maeearima Ekia Rauhubukia Mo Tiba'iobinakia. (Mk 7.1-13)*

<sup>1</sup> Rani weianai Parisea haukia mai rauhubu poki haukia baika Ierusalemai temai Iesu herena tebakaina tetibaha, <sup>2</sup> "Aehoma buonai i'abamu haukia 'ai'ai ekia hoahoa tikabenakia? Imakia a'i teutu'uai, ia tianiani mo."

<sup>3</sup> Iesu ekia 'abi ebamuena etibaha, "Aehoma buonai wai Tirama ena rauhubu 'abina tukabena, ia emi 'ai'ai ekia hoahoa tua'i taeanakia? <sup>4</sup> Pokina Tirama e'abi etibaha, 'Hamamu mai hinamu komariki ainakia,' abomo 'Hau ha hamana 'ao hinana keururu aina hauna hanona kateahu 'arina.' <sup>5</sup> Ia wai hanona emi ba'iobiai tu'abi tötibaha, 'Hau ha hamana 'ao hinana kehina benakia ketibaha, "Kepu neiakiae pabarainimi haukia hanona kabaiben'i Tirama 'euna." <sup>6</sup> Ba hau weiana hanona hamana mai hinana kohu weianai a'i kemariki ainakia.' Taeara nahomanai wai Tirama ena 'abi taba aha'iai tubaona, ia 'ai'ai ekia hoahoa mo tua'i taeanakia.

<sup>7</sup> Bahaore'a haumi e, Isaia emahabanai harai wai ahamiai e'abi etibaha,

<sup>8</sup> "Maearima neiakia hanona pinakia kapenai mo ata'u tibanamona, 'a aokia hanona atau'a 'akinai.  
<sup>9</sup> Tekutiai 'abaeaana'u, pokina tiba'iobi rauhubukia hanona maearima ekia rauhubu 'abikia mo."

Isa 29.13

### *'Abi Maearima Niba'opuna.*

*(Mk 7.14-23)*

<sup>10</sup> Iesu mako eaparinakia teao herena, ehinabenakia etibaha, "Katobahu abomo obona katobo.

<sup>11</sup> Taba pinai nitoto niao aoai hauna hanona Tirama wairanai maearima a'i niba'opuna, ia taba pinai nikarahi hauna maearima niba'opuna."

<sup>12</sup> Ba i'abana haukia temai herena tebakaina tetibaha, "Parisea

haukia aiamu teona raninai aokia teopuere hanona o'ioquina?"

<sup>13</sup> Ekia 'abi ebamuena etibaha, "Matiu ikoikiai Hama'u kupai nemiaho hauna a'i ebatonakia haukia mai ramukia kepuhu 'aunakia. <sup>14</sup> Tomohabonakia. Ia mahakia teki'a ba maha ki'a haukia te'uai ainakia. Maha ki'a hauna ha kehore maha ki'a hauna ha kebaka'ana raninai terarua 'uriat kateotao."

<sup>15</sup> Ba Petero e'abi etibaha, "Abi ibabatai neiana anina mohina hina haraina heremai'i." <sup>16</sup> Iesu ia ehina benakia etibaha, "Wai abomimo obo a'i tuobo oho mo? <sup>17</sup> Taba ikoikiai pinai titoto tiao mo'oru haukia haeamona mo'oruai tikarahi timai atapakai hanona a'i to'ioquina?" <sup>18</sup> A taba pinai tikarahi haukia hanona aoai timai tikarahi, ba weiakia haukia tihere maearima tiba'opuna. <sup>19</sup> Weiana aoai nikarahi hauna hanona raona ki'a obokia maearima niao ainakia kateahuahu, katen-abau, katemaha porepore, katebainao, katebai'oi mai kate'uhi 'uahi. <sup>20</sup> Hoahoa weiakia haukia maearima tiba'opuna Tirama wairanai, ia imaka a'i nahautu nahani'i hauna maearima a'i niba'opuna."

### *Kanana Babi'ena Ena A'ikakauma. (Mk 7.24-30)*

<sup>21</sup> Iesu 'eka weiana ehabona Turo mai Sidono hanokia eao.

<sup>22</sup> 'Eka weianai Kanana babi'ena ha emai herena ba eapari etibaha, "Obiapaka Davida Nahuna e, moaoko'o aina'u, auba ki'a obona nahu'u uahouahona aonai nibahai'aia ki'a bahana." <sup>23</sup> A Iesu babi'e ena 'abi a'i ebamuena, ba i'abana haukia Iesu tenoi hao noi haona tetibaha, "Mouhuna mekatu'a, pokina ia murikai nimai niapari to'ona."

<sup>24</sup> Iesu e'abi etibaha, "Tirama au euhuna'u hanona Isaela mamoekia te'akauma haukia mo paukiai." <sup>25</sup> Babi'e emai Iesu wairanai ekai pehu, e'abi etibaha, "Obiapaka e, mobaraina'u." <sup>26</sup> Iesu

babi'e ena 'abi ebamuena etibaha, "Miori ekia aniani kahane'ena waeha kateani hanona a'i enamo."<sup>27</sup> Babi'e etibaha, "Abi tohana, ia mo obia hauna ena itara ai, aniani 'ika'ikakia ti'eho ba'ai hanona waeha abomo tiani."<sup>28</sup> Ba Iesu ia ehinabena etibaha. "Babi'e e, emu a'ikakauma hanona eapa'ua, emu nuatae tabana hanona kerama." Beraura hoana ihobonai nahuna uahouahona emauri mauri.

*Iesu Inawa Haeai Haeai Eba-maurinakia.*

<sup>29</sup> Iesu 'eka weiana ehabona, Galilea obu poena ekana eao, ba oeoai ekara'au emiati. <sup>30</sup> Mako rarina temai herena, temaiaianakia haukia hanona 'ome, maha ki'a, ima kobekobe, maeakia teki'a, abomo inawa haukia haeaihaeai Iesu herenai tehorotinakia, ba ia ehore eba maurinakia. <sup>31</sup> Maeakia teki'a haukia te'abi 'abi, ima kobekobe haukia imakia tebero, 'ome haukia teka'a, mahakia teki'a haukia teihaiha. Maearima hoa neiakia teihanakia raninai teta'u ta'u huri, welanal Isaraela ena Tirama tebanamona.

*Iesu Maearima Taha Bani Eba-nianinakia.*

(Mk 8.1-10)

<sup>32</sup> Rani weianai Iesu i'abana haukia eaparinakia temai herena, ehina benakia etibaha, "Au maearima neiakia naoko'o ainakia, pokina ia hanona aba wapu aihau au here'uai temiaho taba ha a'i tiana, mai mare'akia kauhunakia kateka'a hanona a'i nuuatae, pokina ha taearai mare'a a'i meba'ehona."<sup>33</sup> I'abana haukia te'abi tetibaha, "Neiana hanona hano 'abaeana, aniani ae'eai kata'inakia mako nahomana katabanianina?"<sup>34</sup> Iesu ebakainakia etibaha, "Aniani heremai bita?" Ia te'abi tetibaha, "Parawa 'abaihau hamomo mai maia papakia bita 'aki mo."

<sup>35</sup> Iesu ehore to'u haukia ehina benakia 'anoai katemiati. <sup>36</sup> Ba parawa 'abaihau hamomo mai maia ea'inakia Tirama ebana-mona, epua ehobi 'iti 'itinakia,

i'abana haukia ebenakia ba i'abana haukia maearima tebenakia.<sup>37</sup> Maearima ikoikiai teanaiani teani'ari, i'abana haukia aniani harikia areha 'abaihau hamomo tebabonunakia.<sup>38</sup> Weia teanaiani haukia tetuabinakia hanona 4,000, 'a babi'e mai miori hanona a'i tetuabinakia.<sup>39</sup> Iesu to'u haukia euhunakia teka'a murinai ahiai ehe'au ebeau banai Magadan hanona eao.

## 16

*Parisea Haukia Tenuatae Hoa Ha Kateihana.*

(Mk 8.11-13; Lk 12.54-56)

<sup>1</sup> Parisea haukia mai Sadukea haukia temai Iesu herena tehobona, tenoina hoa ha keba ihanakia katebatohana ia hanona kupai emai. <sup>2</sup> Iesu ehinabenakia etibaha, "Rabirabi beraura kaihu niaoaina raninai, tu'abi totibaha, 'Mara rani kenamo pokina kupa nipairu.' <sup>3</sup> Kerani raurani tu'abi totibaha, 'Bariu rani neianai abara mai baura katemai pokina kupa nipairu auhao ekaabu haraina.' To'iorina kupai hoa tabakia katerama, ia aehoma buonai rani neianai hoa tabana kerama hauna a'i to'iorina?<sup>4</sup> A'ikakauma aha'i mai aka ki'a uruna haumi, hoa tutabu, ia hoa ha a'i kabenimi, mahabanai hauna Iona ena hoa mo kabaihanimi." Ba Iesu ehabonakia herekiai ekaobo.

*Parisea Ekia Bakupu Muramu-rana.*

(Mk 8.14-21)

<sup>5</sup> Weiana i'abana haukia tekabani obu abiranai raninai parawa tereanakia a'i teai. <sup>6</sup> Ba Iesu ehina benakia etibaha, "Mahami katoba no'a, Parisea haukia mai Sadukea haukia ekia bakupu muramurana herenai kato'ima 'ima harainimi."<sup>7</sup> I'abana haukia kipokia te'abi'abi tetibaha, "Abi neiana nehinana pokina parawa ha a'i hamaiaina."<sup>8</sup> Iesu ekia raona e'iorina ba ehina benakia etibaha, "A'ikakauma papana haumi e, aehoma buonai kipomi

parawa ha a'i toa'ina hauna pau-nai tu'abi'abi? <sup>9</sup>Aomi a'i niea baha parawa ima 'aki maearima taha ima (5,000) teani'ari mai harikia areha bita tobabonu hauna a'i turaona 'inina? <sup>10</sup>Abomo parawa 'abaihau hamomoaimo maearima taha bani (4,000) teani'ari, harikia areha bita tobabonu haukia a'i toraona'in? <sup>11</sup>Aehoma buonai aomi a'i niea? Au hanona parawa robana a'i nahuna, ia Parisea haukia mai Sadukea haukia ekia bakupu muramurana herenai kato'ima'ima harainimi."

<sup>12</sup> 'Abi weianai aokia ea, te'iorina ia hanona parawa ibakupuna muramurana robana a'i niahuna 'a ia hanona Parisea haukia mai Sadukea haukia ekia ba'iobi 'abikia herekiai kate'ima'ima harainakia.

*Petero Iesu Ehina Pouna Keriso.  
(Mk 8.27-30; Lk 9.18-21)*

<sup>13</sup> Iesu Kaisarea Pilipo hanokiae ekara'au aonai, i'abana haukia ebakainakia etibaha, "Maearima taba na tiroma, au maearima nahuna hanona tai?" <sup>14</sup> Ena 'abi tebamuena tetibaha, "Baika ti'abi Ioane ba'uere robe hauna, baika ti'abi Elia, haeamona baika ti'abi Ieremia 'ao mahabanai hauna ha." <sup>15</sup> Iesu haeamona ebakai muenakia etibaha, "Ia wai taba na tuhoma, au hanona tai?"

<sup>16</sup> Simona Petero e'abi etibaha, "Oi hanona Keriso, mauri Tirama Nahuna."

<sup>17</sup> Iesu e'abi etibaha, "Simona Iona nahuna e, Tirama ebamanion'i, pokina maearima ha 'abi neiana oi a'i eba'iobin'i 'a Hama'u kupai nemiaho hauna eba'iobin'i 'o. <sup>18</sup> Nahina beni'o, oi hanona Petero, wairo neiana ahanai e'u marea kabakorina, 'ari ena hiabu e'u marea neiana a'i keba ibiuna. <sup>19</sup> Au kahore Tirama ena obia aiarana ikaikauna hiabuna kabeni'o, ba hanopaka ai kobirinakia haukia abomo kupa ai kebirinakia, hanopaka ai korubunakia haukia abomo kupa ai kerubunakia." <sup>20</sup> Ba Iesu

i'abana haukia eharabunakia, hau ha haianai a'i kate'abi ia hanona Keriso.

*Iesu Kehaiara Mai Ke'ari 'Abikia Ehinana.*

*(Mk 8.31—9.1; Lk 9.22-27)*

<sup>21</sup> Rani weianai Iesu i'abana haukia eba'iobi ramanakia ia hanona keao toha Ierusalema ai weia Iuda ekia maearima apa'uakia, robe haukia apa'uakia mai rauhubu poki haukia hauna katebahaiara ki'ana ba kateahu 'arina, ia wapu ibaihaunai Tirama kehore ia kebamikiri muena.

<sup>22</sup> Petero ehore Iesu ebakapare haiahaiai ehinabe pahi-hina etibaha, "Obiapaka e, ua a'i kehoma, oi hanona ua a'i katehomani'o." <sup>23</sup> Iesu ekori kabe Petero erikena etibaha, "Satani e, here'uai mokatua, oi au e'u taeara nukaiabuna, pokina emu raona raona hanona Tirama 'eunai aha'i ia maearima 'eukiai emai."

<sup>24</sup> Ba Iesu i'abana haukia ehinabenakia etibaha, "Hau ha kenuatae au muri'uai keka'a rani-nai ia kipona ena mauri kehabona, ena matiu ibiri ropo kebuana au muri'uai keka'a. <sup>25</sup> Hau ha kipona ena mauri nenuatae ai ki'ana hauna hanona keba'akaumana, ia hau ha au pau'uai kipona ena mauri kehabona hauna hanona kea'i muena. <sup>26</sup> Hau ha hanopaka maikoina ia'ina! ena mauri keba'akaumana hanona ena namo taba? 'Ao hau ha ena mauri tabai kekawa muena?

<sup>27</sup> Au Maearima Nahuna hanona Hamau'nuabina kamai e'u aneru kipokia, rani weianai maearima ha ha ekia aka ihobokiai 'arakia kabena. <sup>28</sup> 'Abi tohana au wai nahinabenimi, baika neia tikoroti haukia a'i kate'ari baha keaomo Au Maearima Nahuna kupa aiarana obia hiabunai kamai maearima baiatakiai hanona kateihana'u."

## 17

*Iesu Ihana Ehaeai.  
(Mk 9.2-13; Lk 9.28-36)*

<sup>1</sup> Wapu 'abaihau murinai Iesu ehore Petero mai Iakobo hatina Ioane ohi ia ikupaiakia mo e'uaiainkia oeo apa'uana ha ai tekara'au. <sup>2</sup> Ba weia ia wairakiai Iesu ihana ehaeai, wairana ea obo matoha beraura 'abana abomo ena habuni tepore ki'a te'imare 'imare. <sup>3</sup> Mawa'eai Mose mai Elia tewaira tina ia wairakiai, Iesu kipokia te'abi 'abi. <sup>4</sup> Ba Petero Iesu ehinabena etibaha, "Obiapaka e, aika neia nahamiaho hanona enamo, oi konuatae raninai au i'au aihau kababainakia ha oi 'eumu ha Mose 'euna ha Elia 'euna."

<sup>5</sup> Petero ni'abi ohomo aonai, 'auhao pore obona emai ebahu abunakia, ba aia ha 'auhao aonai emai e'abi etibaha, "Naiana hanona au naha'u, e'u raona'au, au ia naonamoaina, aiana katona."

<sup>6</sup> I'abana haukia aia weiana teona raninai te'eho 'anoai te'umuti, teta'u wairai. <sup>7</sup> 'A Iesu eka'a emai herekia, ea'i 'apuanakia e'abi etibaha, "Ai katota'u, tomomikiri." <sup>8</sup> Ba ia tea'a taea hanona tai a'i teihana ia Iesu mo ikupaiana.

<sup>9</sup> Oeoai teriri raninai Iesu eharabunakia etibaha, "Taba toihana hauna hau ha haianai a'i kato'abi keaomo au maearima nahuna 'ariai kamikiri mue." <sup>10</sup> Ba i'abana haukia tebakaina tetibaha, "Taba buonai rauhubu poki haukia ti'abi Elia hanona kemai 'uai?"

<sup>11</sup> Iesu ekia 'abi ebamuena etibaha, "Abi tohana, Elia hanona kemai haeamona taba kehorehore harainakia. <sup>12</sup> Ia au wai nahina benimi, Elia hanona aba emai, maearima ia a'i teiha 'iobiaina ia herenai ekia nuatae akakia tebabainakia, ihobona uahomanai au maearima nahuna hau'u ua katebahaia araiho." <sup>13</sup> Ba i'abana haukia obona teobo, ia hanona Ioane ba'uere robe hauna robana eahuna.

*Iesu Miori Ha Aonai Auba Ki'a Obona Eu'u Ahina.  
(Mk 9.14-29; Lk 9.37-42)*

<sup>14</sup> Weiana temue to'u haukia herekiai tekara'au raninai, hau ha emai Iesu wairanai ekaipehu e'abi etibaha, <sup>15</sup> "Obiapaka e, Naha'u moaoko'oaina pokina ia hanona nawa ni'ariaina ena haiara eapa'ua, rani baika kipona iruba ai neno'au 'ao beiai nitobu. <sup>16</sup> Amaiaina i'abamu haukia herekia, katebanamona hanona a'i etainakia."

<sup>17</sup> Iesu ehinabenakia etibaha, "A'ikakauma aha'i mai haia po'o uruna haumi, heremai kabapahihi kamiaho keaomo aita? Miori tomaiaina here'u." <sup>18</sup> Iesu auba ki'a obona ebatana, ba auba ki'a obona miori aonai ekarahi, miori beronai enamo. <sup>19</sup> Weiana murinai i'abana haukia bunianai teao Iesu tebakaina tetibaha, "Aehoma buonai ai auba ki'a obokia katau'u ahina hanona a'i etainamai?"

<sup>20</sup> Iesu ekia 'abi ebamuena etibaha, "Pokina emi a'ikakauma teko'iko'i 'aki. 'Abi tohana au wai nahina benimi, emi a'ikakauma petuaba uhona 'abana raninai, oeo neiana pohinabena, 'Moibiu moao weia' hanona beronai peibiu peao, taba ha heremi a'i kepahihi ki'a baha. <sup>21</sup> Ia taba nahomakia hanona kipokia a'i katekarahi 'apua, ia mo bahuba'ari ai mai ani robeai hanona katekarahi."

*Iesu Ena 'Ari Pouna Ehina Muena.*

*(Mk 9.30-32; Lk 9.43-45)*

<sup>22</sup> I'abana haukia ikoikiai temai Galileai tebahamomo, ba Iesu ehina benakia etibaha, "Au maearima Nahuna hanona ihina hinai kaeao ba kateahu'arina'u, <sup>23</sup> ia wapu ibaihaunai Tirama kebamikiri muena'u kamauri mauri." Weiana teona raninai i'abana haukia aokia eaoko'o.

*Iesu Petero Ohi Marea Monina Tebaiben'i.*

<sup>24</sup> Iesu mai i'abana haukia teao Kaperanaumai tekara'au raninai, marea robe takitina tibararo haukia temai Petero herena tebakaina tetibaha, "Emi

poki hauna Marea Robe takitina nibaiben?"<sup>25</sup> Petero e'abi etibaha, "E, nibaiben." Ba Petero eao itu aonai etoto a'i ni'abi baha aonai, Iesu Petero ebakaina etibaha, "Simona e, oi taba na nuho? Hanopaka obiakia hanona nahukia herekiae takiti tia'i 'ao maearima haeai herekiae tia'i?"<sup>26</sup> Petero e'abi etibaha, "Maearima haeai herekiae tia'i." Iesu etibaha, "O'abi harai, weiana nahukia hanona takiti a'i katehoroti.<sup>27</sup> Ia maearima neiakia aokia a'i hamaba opuerenakia paunai, moao obuai monaku, maia koberi'au 'uaina hauna pinana kohaokauna aonai moni kotabu ahina, koa'ina kobenakia hararua eka takiti 'arana."

## 18

*Tai Keapa'ua?*  
(Mk 9.33-37; Lk 9.46-48)

<sup>1</sup> Rani weianai i'abana haukia temai Iesu herena tebakaina tetibaha, "Tai hanona eapa'ua ki'a baha Tirama ena obia aiarana aonai?"

<sup>2</sup> Weiana Iesu miori papana ha eaparina emai baiatakiae ebakorotina. <sup>3</sup> Ba ehina benakia etibaha, "Abi tohana au wai nahina benimi, aomi a'i katoba ko'iko'ina miori papakia 'abakiae a'i katoao raninai wai hanona Tirama ena obia aiarana a'i katokatoto. <sup>4</sup> Ua buonai hau ha ke'aiaunu miori papana neiana 'abanai keao hauna, ia hanona keapa'ua ki'a baha Tirama ena obia aiarana aonai.

<sup>5</sup> Hau ha au ata'uai miori papana nahomana kea'i taeana hanona au abo'umo aba ea'i taeana'u.

*Baihobo Kebabaina Hauna Herenai Keki'a Wairai.*

(Mk 9.42-48; Lk 17.1-2)

<sup>6</sup> Ia hau ha au tia'ikakaumana'u miorina nahomana ha behoai kehorotina hauna hanona iata rarina 'akonai patetoba 'auna 'aku kunakunanai patekapo uhuna petono 'ari hanona penamo.

<sup>7</sup> Hanopaka neiana hanona keki'a wairai, pokina ia kehore maearima keaoainakia ki'ai kehorotinakia. Baihobo uahomakia hanona katerama, ia baihobo kebabaina hauna herenai keki'a wairai. <sup>8</sup> Imamu 'ao aemu ki'ai kehorotini'o raninai kokabe hurina kone'e 'akaumana. Ba imamu ki'a obonai 'ao aemu ki'a obonai mauri banaibanai 'ekanai kokatoto hanona enamo, ia a'i enamo imamu rua mai aemu rua weiakia kateaoaini'o a'i ni'ao 'apua ni'ara banaibanai irurbanai katekapo totoni'o. <sup>9</sup> Mahamu ki'ai kehorotini'o raninai ko'ipa ahina kone'e 'akaumana. Mahamu hamonai mauri banaibanai 'ekai kokatoto hanona enamo, ia a'i enamo mahamu rua namokiae a'i ni'ao 'apua irurbanai katekapo totoni'o.

*'Abi Ibabataina Mamoe E'akauma.*  
(Lk 15.3-7)

<sup>10</sup> Kato'ima'ima harainimi miori papakia neiakia ha taba aha'iai a'i katobaonakia, pokina ekia aneru kupa ai hanona rani ikoinai Hama'u kupai nemiaho hauna katehinabena ketaina. <sup>11</sup> Au maearima Nahuna hanona te'akauma haukia kabamaurinakia paunai amai.

<sup>12</sup> Waiaea turaona aihona? Hau ha ena mamoe hinabu hamomo, ba hamona pe'akauma raninai, imabui bariabui 'ababani hamomo oeoai pehobonakia ba peao e'akauma hauna petabuna. <sup>13</sup> Abi tohana au wai nahina benimi, petabu ahina raninai, aona penamo wairai weiana hamona etabu ahina hauna paunai ba weiakia imabui bariabui 'ababani hamomo a'i te'akauma haukia paukiae aha'i. <sup>14</sup> Weiana ihobonai Hamami kupai hauna nenuatae miori papakia neiakia ha a'i ke'akauma.

*Uaho'abamu Heremuai Beho Ebabaina Hauna Kobaberona.*

<sup>15</sup> Uaho'abamu ki'a ebabai heremuai raninai koao herena

torarua mo kato'abi'abi aina ena babai ki'a haianai kohinahina haraina, ba aiamu kea'i taeana raninai oi hanona uaho'abamu aba nua'i muena.<sup>16</sup> Ia aiamu a'i keona raninai maearima ha 'ao rua koaoainakia herena, ba maearima weikia rua 'ao aihau 'abi kato'abi'abi ainakia haukia ikoikiai katebatohanakia.<sup>17</sup> Ia keubo aiami a'i keona raninai, robe haukia a'ia'i harainai kohina karahina, ba kebaki'a aiakia a'i keona raninai rama haeai haunai 'ao ki'a haunai katobaona.

*Ibiri Ini, Mai Irubu Ta'i.*

<sup>18</sup> 'Abi tohana au wai nahina benimi, taba hanopakai katobirinakia hanona kupai abomo kebirinakia 'a taba hanopakai katorubunakia hanona kupai abomo kerubunakia.

<sup>19</sup> Haeamona nahinabe muenimi, hanopakai torarua taba ha aomi hamonai katonoi aina hauna Hama'u kupai nemiaho hauna kebabaina 'eumi.<sup>20</sup> Maearima rua 'ao aihau au ata'uai tito'u, au hanona weia ia herekiai."

*'Abi Ibabataina Ta'ara'i Hauna Ena Ki'a A'i Ehinahao.*

<sup>21</sup> Weiana Petero eao Iesu herena ebakaina etibaha, "Obiapaka e, uaho'aba'u kebabai ki'a here'uai hanona rani bita ena ki'a kahina haona? Rani 'abaihau hamomo, 'u?"

<sup>22</sup> Iesu e'abi etibaha, "Rani 'abaihau hamomo aha'i, ia rani imabui haraurua ikoinai rani 'abaihau hamomo 'abana kohina haonakia.

<sup>23</sup> Weiana Tirama ena obia aiarana hanona matoha obia arana ha 'abana, ena ta'ara'i haukia herenai taba bita tea'i haukia kebaberonakia.<sup>24</sup> Ua buonai ena aka ea'i ramana hanona ia herenai Kina kerepu\* harau haea ea'ina hauna temaiaina ia wairanai.<sup>25</sup> Ia poki hauna ena moni 'arana kehorena hanona imanai a'i etaina, ba poki hauna ia ehinabena etibaha, 'Oi mai atawamu, nahumu mai emu taba ikoikiai katekawa kawainakia

monikiai moni oa'ina hauna 'arana kohorena.'<sup>26</sup> Weiana ta'ara'i hauna ena poki hauna wairanai ekai pehu eba'amen, 'Rani papana mobai'ima, ba a'ina hauna 'arana maikoina kahorena.'<sup>27</sup> Poki hauna ta'ara'i hauna eaoko'oaina, ba moni ea'ina hauna ekakina ba euhuna eka'a.

<sup>28</sup> Ba ta'ara'i hauna ekarahi eao raninai 'abana ha etabu ahina hau weiana hanona ia herenai Kina harau rua ea'ina, emikiri hau weiana ea'i 'inina 'akona ebebena e'abi etibaha, 'E'u moni oa'ina hauna 'arana mohorena.'

<sup>29</sup> Ba ia 'abana ekai pehu eba'amen,<sup>30</sup> 'Rani papana mobai'ima 'arana aba kahorena.'<sup>31</sup> A ia a'i enuatae, hau weiana eaoaina wapura 'ekanai ehorotina weia kemiaho keaomo 'ara kehore obona.

<sup>31</sup> Ta'ara'i haukia baika hoa weiana teihana raninai aokia ehaiara, teao ekia poki hauna herena taba erama hauna pouna tehinana.<sup>32</sup> Ba poki hauna ta'ara'i hauna weiana eaparina emai, ehinabena etibaha, 'Oi ta'ara'i haumu ki'a obomu, onoina'u paunai moni oa'ina hauna maikoina akakinakia.<sup>33</sup> Ia aehoma buonai 'abamu a'i oaoko'o aina ihobona au aoko'o aini'o 'abana?'<sup>34</sup> Poki hauna eopuere ki'a ta'ara'i hauna eba wapurana haiara kateba-hoaina keaomo moni weiana ea'ina hauna 'arana maikoina kehore obona.

<sup>35</sup> Weiana paunai wai ha ha uaho'abami aomi tohakiai ekia ki'a a'i katohina haonakia rani-nai Hama'u kupai nemiaho hauna abomo ua kehomanimi."

## 19

*Hau Ha Atawana Kebakarahina.*  
(Mk 10.1-12; Lk 16.18)

<sup>1</sup> Iesu 'abi weiakia ebaorenakia murinai, Galilea ehabona eao Iuda hanonai Ioridana ate abihana tainai.<sup>2</sup> Mako rarina 'akina ia

\* **18:24:** (24) 1,000,000 (million)

murinai teao weia ekia inawa ebanamonakia.

<sup>3</sup> Weiana Parisea haukia baika temai Iesu herena tehobona tebakaina tetibaha, "Hau ha ena raona baika buonai atawana kebakarahina hanona mai ena bero ha 'ao aha'i?"

<sup>4</sup> Iesu ekia 'abi ebamuena etibaha, "Wai Puka Robena a'i totuabina, u? Bahabana 'akinai barama Tiramana ehore maearima ebabainakia hau mai babi'e ohi. <sup>5</sup> Ba e'abi etibaha, 'Weiana buonai hau kehore hamana mai hinana kehabonakia, ia atawana ohi katebahamomo, terarua hanona hauani hamona.'

<sup>6</sup> Ua buonai ia hanona hamona ia rua aha'i. Weiana paunai Tiramana ehore eba hamomonakia hauna hau ha a'i keboa 'apuana."

<sup>7</sup> Parisea haukia tebakai muena tetibaha, "Aehoma buonai Mose einabenenamai, hau kenuatae raninai bakarahi marerena kererena atawana kebena ba kebakarahina?"

<sup>8</sup> Iesu ekia 'abi ebamuena etibaha, "Wai emi ao pahihi paukiai Mose bero ebenimi atawami katoba karahinakia, ia popouna 'akinai hanona ua homana aha'i. <sup>9</sup> Au wai nahin-abenimi, hau ha atawana a'i enabau ia ebakarahi 'abaeana ia haeanona babi'e mahamahana ha eatawana, hau weiana hanona nabau hoana ebabaina."

<sup>10</sup> I'abana haukia Iesu tehin-abena tetibaha, "Hau mai babi'e baiatakiai ua niho raninai, hau a'i pehawainibe hanona penamo."

<sup>11</sup> Iesu ekia 'abi ebamuena etibaha, "Abi naiana maearima ikoikiai herekiai hanona a'i ketaina, ia weiakia Tiramana ea'i taeanakia haukia herekiai hanona ketaina. <sup>12</sup> Maearima baika hanona a'i katehawainibe, hau baika hanona uahomanai terama a'i katehawainibe, hau baika hanona maearima tehore teuanakia a'i katehawainibe, hau baika hanona Tiramana ena obia aiarana paunai hawainibe a'i tiraonana. Tai herenai etaina hauna 'abi neiana kea'i taeana."

*Iesu Miori Papakia Ebanamon-akia.*

(Mk 10.13-16; Lk 18.15-17)

<sup>13</sup> Rani weianai maearima baika nahukia temaiainakia Iesu herena ahakiai kehao'au kebahuba'ari, ia i'abana haukia tehore maearima weiakia terikenakia, <sup>14</sup> Iesu e'abi etibaha, "Miori papakia tomo habonakia, temai here'u a'i kato kaiabunakia, pokina Tiramana ena obia aiarana hanona nahomakia haukia 'eukia." <sup>15</sup> Iesu miori papakia ahakiai imana ehao'au ebanamonakia, murinai 'eka weiana ehabona.

*Iesu Kepu Hauna 'Aru'aruna Ohi Te'abi'abi.*

(Mk 10.17-31; Lk 18.18-30)

<sup>16</sup> Weiana hau ha emai Iesu herena ebakaina etibaha, "Ba'iobi haumu e, aka namona tabana kababai hanona mauri banaibai ka'ina?"

<sup>17</sup> Iesu ia ena 'abi ebamuena etibaha, "Aehoma buonai au here'uai aka namona nubakaibakai aina? Weiana Tiramana mo ikupaihana enamo, oi konuatae mauri banaibanai koa'ina raninai, rauhubu 'abikia ko'ima harainakia."

<sup>18</sup> Ia e'abi etibaha, "Rauhubu 'abikia aeakia?" Iesu etibaha, "Rauhubu neiakia, a'i koahuahu, a'i konabau, a'i kobainao, a'i kohinau bai'o. <sup>19</sup> Hamamu mai hinamu komariki ainakia, abomo heremu hauna koraona'au aina matoha oi kipomu nuraona'au aini'o 'abana."

<sup>20</sup> Hau 'aru'aruna e'abi etibaha, "Naiakia ikoikiai aba a'ima harainakia, ba taba akapu aina?"

<sup>21</sup> Iesu ia ehinabena etibaha, "Konuatae konamo harai ki'a baha raninai moao emu kohu ikoikiai kokawa kawainakia monikia uraru haukia kobenakia, weiana emu kepu hanona aba wa'a kupai koa'ina, ba komai muri'uai moka'a." <sup>22</sup> Hau 'aru'aruna aia weiana eona raninai aona earo'ari ekaobo, pokina ia herena kepu ebo'o.

*Kepu Haukia Kupa Katekatoto Hanona Kepahihi.*

<sup>23</sup> Ba Iesu i'abana haukia ehina benakia etibaha, "Abi tohana au wai nahina benimi. Kepu hauna Tirama ena obia aiaranai kekatoto hanona kepahihi ki'a baha." <sup>24</sup> Haeamona nahinabe muenimi. Mahi atana Kamela kopi ererenai kekuri banai hanona epahihi, ba kepu hauna Tirama ena obia aiaranai kekatoto hanona kepahihi ki'a baha."

<sup>25</sup> I'abana haukia 'abi weiana teona raninai teta'u ta'u huri tebakai bakai tetibaha, "Ba tai hanona mauri kea'ina?"

<sup>26</sup> Iesu eiha 'ini 'ininakia e'abi etibaha, "Maearima herekiae neiana katebabaina hanona a'i ketaina, ia Tirama herenai taba ikoikiae kebabai hanona ketaina."

<sup>27</sup> Ba Petero Iesu ebakaina etibaha, "Ai taba ikoikiae tahabonakia oi mo murimuai taka'a, ba murimuai taka'a hanona taba kata'ina?"

<sup>28</sup> Iesu ehina benakia etibaha, "Abi tohana au wai nahina benimi. Taba ikoikiae ekia mahamaha raninai, au Maearima Nahuna e'u imia'au nuabina ahnai kamia'au aonai, wai harauhaea rua muri'uai tuka'a haumi abomo imia'au harau haea rua ahakiae katomia'au, Isaraela itubukia harau haea rua maearimakia kato bakainakia." <sup>29</sup> Hau ha au pau'uai ena itu 'ao uaho'abana haibuna hamana hinana nahuna 'ao ena hano kehabonakia hauna hanona hinabu hinabu ketabu ahi muena, abomo mauri banai banai kea'ina." <sup>30</sup> Ia bo'okia te'uai haukia hanona murihai katedoto, ba bo'okia temurihai haukia hanona katedoto 'uai."

## 20

*'Abi Ibabataina Aka Haukia Bine Haharuana'i.*

<sup>1</sup> "Tirama ena obia aiarana hanona hano poki hauna ha 'abana, raurani 'amarinai ekarahi eao aka haukia etabunakia ena bine haharuana'i kateaka." <sup>2</sup> Poki hauna kipokia 'abi tebatohana

'arakia beraura hamona aonai kina harau haea katea'ina, ba euhunakia ena haharuua teao. <sup>3</sup> Beraura hoana 9 'abana hanona ekarahi eao aiara ibuanai weia maearima baika tekoroti 'abaea eianakia. <sup>4</sup> Ba ehinabenakia etibaha, 'Wai abomo tomoao e'u haharuui katoaka, 'arami kahorenakia.' <sup>5</sup> Ba ia abomo teao kateaka. Atiaha ekarahi eao haeamona rabirabi beraura hoana 3 'abana ekarahi mue eao hoahoa hamonamo weiana ebabaina.

<sup>6</sup> Haeamona rabirabi beraura hoana 5 'abana ekarahi eao hanona baika mo tekoroti 'abaea eianakia, ebakainakia etibaha, 'Aehoma buonai neia tukoroti rabi 'abaea taba ha a'i tubabai 'apuana?' <sup>7</sup> Ena 'abi tebamuena tetibaha, 'Pokina tai ha aka ha a'i ebenamai.' Ba ehinabenakia etibaha, 'Wai abomo tomoao e'u haharuui katoaka.'

<sup>8</sup> Beraura ekaihuna, haharuua poki hauna haharuua i'imana hauna ehinabena etibaha, 'Teaka haukia koaparinakia 'arakia kobenakia, muri 'akinai temai teaka haukia herekiae koa'i ramana keaomo temai 'uai haukia herekiae kobapuana.' <sup>9</sup> Rabirabi beraurana hoana 5 'abanai tetoto teaka haukia temai ha ha kina harauhaea harauhaea ebenakia tea'i. <sup>10</sup> Ba teaka 'uai haukia temai, ekia raona hanona 'arakia keapa'ua, 'a ia abokiamo ha ha kina harauhaea harauhaea tea'inakia. <sup>11</sup> Ekia moni tea'inakia aonai haharuua poki hauna teururuaina, <sup>12</sup> te'abi tetibaha, 'Muriai temai haukia hanona beraura hoana hamonamo teaka, 'a ai hanona beraura neiana ena aro'ari ena hiabu maikoina tahoaina, ia kipokia 'aramai obaihobona.'

<sup>13</sup> Haharuua poki hauna aka hauna ha ena 'abi ebamuena etibaha, 'E'u hau e, heremuai a'i abeho. Aika hararuua 'abi aba habatohana koaka beraura hamona aonai kina harau haea kabeni'o.' <sup>14</sup> Oi 'eumu hauna moa'ina moao. Au e'u nuataeai muriai emai eaka hauna 'euna

kabena oi 'eumu abeni'o hauna ihobonai.<sup>15</sup> Au kipo'u e'u taba kipo'u e'u nuataeai a'i kababaina, u? Au e'u namo paunai nuwae'e aina'u, u?

<sup>16</sup> Taeara ihobonai temurihai haukia kate'uai, 'a te'uai haukia katemurihai.'

*Iesu Rani Ibaihauna Ena 'Ari Pou'a Ehinana.*

(Mk 10.32-34; Lk 18.31-33)

<sup>17</sup> Iesu taearai eka'a niao Ierusalem aonai i'abana haukia harauhaea rua ebakaparenakia haiahaiai ehinabenakia etibaha,<sup>18</sup> "Bariu aika hanona Ierusalem ai kahakara'au, au Maearima Nahuna hanona robe haukia apa'uakia mai rauhubu poki haukia imakiai kateutana'u behoai katehorotina'u kateahu 'arina'u.<sup>19</sup> Au hanona rama haea haukia imakiai kateutana'u katebataejina'u kate'atina'u mai matiu ibiri ropo 'ubinai kateahu 'arina'u, 'a wapu ibaihaunai kamikiri mue."

*Babi'e Nahuna Paukiai Iesu Enoina.*

(Mk 10.35-45)

<sup>20</sup> Sebedeo nahuna rua hinakia kipokia temai Iesu herena, hinakia Iesu wairanai ekaipehu ena nuatae tabana ha enoiaina.<sup>21</sup> Iesu ia ebakaina etibaha, "Taba nonuatae?" Ia e'abi etibaha, "Mo'abi 'uai here'uai, naha'u neiakia rua ha itipamu tainai ha awarimu tainai temati emu kupa aiarana aonai."

<sup>22</sup> Iesu e'abi etibaha, "Wai a'i to'iorina taba tunoiaina? Haukia 'erena kainu hauna wai kato'inu ketaina, u?" Terarua te'abi, "Katainu ketaina."<sup>23</sup> Iesu ia ehinabenakia etibaha, "Abi tohana e'u 'ere hanona katoinu, 'a itipa'u mai awari'u tainai temati haukia hanona au a'i katina'anakia, ia 'eka weiana hanona aba Hama'u eba'oruna etina'anakia haukia mo kebenakia."

<sup>24</sup> T'abana haukia harauhaea aia weiana teona raninai uaho'aba rua weiakia teopuere ainakia.

<sup>25</sup> Ua buonai Iesu i'abana haukia

ikoikiai eaparinakia temai herena ehina benakia etibaha, "Wai to'iorina rama haeai haukia ekia obia haukia hanona ekia nuataeai maearima tipoki ainakia ekia hau apa'uakia abomo ekia hiabuai tibaeh'eau maearima tiaiahunakia.<sup>26</sup> A wai heremai hanona ua a'i kehoma, hau ha baiatamiai nenuatae keapa'ua hauna hanona ikoimiai emi ta'ara'i haunai keao.<sup>27</sup> Abomo nau ha baiatamiai nenuatae ke'uai hauna hanona ikoimiai emi ta'ara ia'ina'i keao.<sup>28</sup> Ihobona au Maearima Nahuna amai hanona ta'ara'u a'i katea'i ia maearima ta'arakia ka'i, abomo e'u mauri kabaiben'i maearima ekia ki'ai kabakarahinakia paunai."

*Iesu Maha Ki'a Haukia Rua Mahakia Ebanamonakia.*

(Mk 10.46-52; Lk 18.35-43)

<sup>29</sup> Iesu i'abana haukia kipokia Ieriko tihabona aonai mako rarina ia murinai teka'a.<sup>30</sup> Maha ki'a haukia rua taeara haianai temati herekiai Iesu ekabanai 'uruna teona raninai, teapari aota tetibaha, "Obiapaka, Davida Nahuna e! Moaoko'o ainamai!"<sup>31</sup> A mako ia terikenakia kateunu. 'A terarua teapari aota ki'a, "Obiapaka, Davida Nahuna e! Moaoko'o ainamai!"

<sup>32</sup> Iesu ekoroti eaparinakia temai herena, ba ebakainakia etibaha, "Taba tonuatae 'eumiai kababaina?"<sup>33</sup> Ia te'abi tetibaha, "Obiapaka e, tanuatae mahamai katekaikau."<sup>34</sup> Iesu eaoko'o ainakia, mahakia ea'i 'apuanakia. Beronai mahakia tekaikau teihaiha, ba Iesu murinai teka'a.

## 21

*Iesu Ierusalem ai Ekatoto Obia 'Arana 'Abana.*

(Mk 11.1-11; Lk 19.28-40; Io 12.12-19)

<sup>1</sup> Iesu i'abana haukia kipokia Ierusalem aba wairakiai Betefage ai tekara'au Olibe oeonai, weia Iesu ehore i'abana haukia rua euhu 'uainakia,<sup>2</sup> ehina benakia etibaha, "Katoao aiara

aonai toniki ha tetoba 'auna mai nahuna ohi katotabu ahinakia, katorubunakia katomai ainakia here'u.<sup>3</sup> Hau ha 'abi ha kehinana raninai kato'abi, 'Obiapaka nenuatae ainakia,' ba beronai kebenimi."

<sup>4</sup> Neiana hanona Mahabanai hauna ena 'abi ibatohana etibaha,

<sup>5</sup> "Siona aiara haukia kohina benakia, Tomoihana, emi obia 'arana nimai heremi.

Ia mai 'aiaununa toniki kapenai emia'au, toniki nahuna ahanai emia'au."

Sek 9.9

<sup>6</sup> I'abana haukia teao Iesu ehina benakia akakia ihobona tebabainakia. <sup>7</sup> Toniki mai nahuna ohi temaiainakia, ekia habuni ahanai teabari 'aunakia ba Iesu emia'au. <sup>8</sup> Mako rarina ekia habuni taearai teabarinaakia, baika abomo matiu rekia tehara obonakia taearai teabarinaakia. <sup>9</sup> Iesu wairanai mai murinai teka'a haukia teio tetibaha, "Hosana,\* Davida Nahuna 'euna! Obiapaka atanai nimai hauna Tirama kehore kebanamona! Hosana 'ubi toha tohanai!"

<sup>10</sup> Iesu Ierusalemai ekatoto raninai aiara haukia te'uri'uri tebakaibakai tetibaha, "Neiana hanona hau tabana?" <sup>11</sup> Mako te'abi tetibaha, "Neiana hanona Iesu mahabanai hauna Galilea Nasareta ai emai."

*Iesu Marea Robeai Kawakawa Hauki Eu'u Ahinakia.*

(Mk 11.15-19; Lk 19.45-48; Io 2.13-22)

<sup>12</sup> Iesu marea robe aonai ekatoto weia tikawakawa haukia ikoikiai eu'u ahinakia, moni a'i banai haukia ekia itara mai rauria tikawakawai haukia ekia imia'au etori tori ku'a banainakia.

<sup>13</sup> Ehinabenakia etibaha, "Puka robenai aba tererena, 'E'u itu hanona kateaparina bahuba'ari ituna,' ia wai hanona kakikaki haukia ekia paparo'ai tubaona."

<sup>14</sup> Mahakia teki'a haukia mai 'ome haukia teao Iesu herena

marea robe aonai, ba ia ehore ebanamonakia.<sup>15</sup> Robe haukia apa'uakia mai rauhubu poki haukia Iesu bamauri hoakia ebabai teihana abomo miori marea aonai teio tetibaha, 'Hosana Davida Nahuna 'euna!' raninai ia aokia teopuere,<sup>16</sup> tebakaina tetibaha, "Oi miori ti'abi aiakia hanona nuona?" Iesu ekia 'abi ebamuena etibaha, "E, aiakia aba naona. Wai 'abi neiana aba totuabina? 'Miori 'oru'orukia mai 'ae tiana miorikia pinakiai atamu tibanamona.'"

Sal 8.2

<sup>17</sup> Ba Iesu ehabonakia aiara apa'uanai ekarahi eao Betani ai erabi weia emiaho.

*Iesu Matiu Eururuaina.*  
(Mk 11.12-14; 11.20-24)

<sup>18</sup> Erani raurani amarinai Iesu emue aiara apa'uana niao aonai mare'a e'ari. <sup>19</sup> Suke matiuna ha taeara haianai eihana eao herena. Ia buana ha a'i eihana 'a rau 'abaeakia mo, ba ehimabena etibaha, "Oi a'i kobua'a mue!" Matiu weiana beronai rauna tepaea ba e'ororo.

<sup>20</sup> I'abana haukia hoa weiana teihana hanona teta'u ta'u huri tetibaha, "Aehoma buonai rani a'i ehoma'a matiu weiana aba e'ororo?"

<sup>21</sup> Iesu ehimabenakia etibaha, "Abi tohana au wai nahina benimi, patoa'ikakauma aomi a'i patekai'au kai'au raninai, Suke herenai erama hauna ikupaiana mo aha'i, ia kobio patohinabena, 'Moao 'akuai moeno uhu,' weiana abomo kerama. <sup>22</sup> Taba ikoinali bahuba'ari ai katonoi ainakia mai a'ikakaumami hanona kato'inakia."

*Iesu Ena Hiabu Tebakaibakai aina.*  
(Mk 11.27-33; Lk 20.1-8)

<sup>23</sup> Iesu haeamona Marea Robe ai ekatoto eba'iobi aonai, robe haukia apa'uakia mai Iuda ekia maearima apa'uakia temai herena

\* 21:9: (9) anina 'Kobamaurinamai'

tebakaina tetibaha, "Hiabu tabanai aka neiakia nubabai, abomo tai hiabu ebeni'o?"<sup>24</sup> Iesu ekia 'abi ebamuena etibaha, "Au abomo wai bakai bakai hamona kabeni, e'u 'abi katobamuena raninai au hiabu tabanai aka neiakia nababai haukia kaba'ioibinimi.<sup>25</sup> Ioane ena ba'uere robe hiabuna hanona ae'e ai emai? Kupai emai 'ao maearima herekiae emai?"

Ia kipokia baiatakiae te'abi'abi tetibaha, "Kaha'abi, 'Kupai emai.' hanona kebakainaka ketibaha, 'Aehoma buonai a'i toa'i taeana?'<sup>26</sup> A kahatibaha, 'Maearima herekiae emai.' raninai, to'u haukia neiakia abomo kahata'uainakia, pokina ia ikoikiae tiraonana Ioane hanona mahabanai hauna."<sup>27</sup> Ua buonai ia Iesu ena 'abi tebamuena tetibaha, "Ai a'i ta'lobina." Ba Iesu ehinabenakia etibaha, "Au abo'umo hiabu tabanai aka neiakia nababai hanona a'i kaba'iobinimi."

### *Ori Ibabataina Miori Rua.*

<sup>28</sup> "Wai taba na tuhoma? Hau ha nahuna hanona rua, ba eao pakana hauna herena ehinabena etibaha, 'Naha'u e, bariu beraura neianai koao e'u bine haharanai koaka.'<sup>29</sup> Miori hamana ena 'abi ebamuena etibaha, 'A'i kaeao.' 'A muriai eraonaraona haraina ba eao eaka.<sup>30</sup> Haeamona hamakia eao nahuna ibaruana herena 'abi ihobonamo ehinana, ba miori e'abi, 'E, hama'u, kaeao.' Ia a'i eao.<sup>31</sup> Weiakia terarua hanona aeana hauna hamakia ena nuatae akana ebabaina?" Ia te'abi tetibaha, "Kori 'uaina hauna."

Iesu ia ehina benakia etibaha, "Abi tohana au wai nahina benimi, moni bararo haukia mai maha porepore babi'ekia hanona Tirama ena obia aiaranai katekatoto 'uai ba wai.<sup>32</sup> Pokina ba'uere robe hauna Ioane emai heremi bero taearana ebaihanimi, ia wai a'i toa'i taeana 'a moni bararo haukia mai mahaporepore babi'ekia hanona tea'i taeana. Wai haeamona hoahoa weiana toihana, iamo a'i toraona kabe a'i toa'i taeana."

### *Ori Ibabataina Haharua I'mana Haukia Ki'a Obokia. (Mk 12.1-12; Lk 20.9-19)*

<sup>33</sup> "Tomobahu 'abi ibabatai ha neiana. Hano hauna ha ena bine haharua ebabaina, arana eoko kakaiaronia, bine buakia kehari iti 'itina urina ehabina mai bai'ima ituna ebakorina. Haharua hanona biraura haukia baika eba'ima'imana, 'a ia hanona eharima hano haeani eao.<sup>34</sup> Bine buana ia'ina ranina aba ekaibari, poki hauna emikiri ena ta'ara'i haukia baika euhunakia buabua ibararokia teao.<sup>35</sup> Haharua te'imana haukia tehore ta'ara'i haukia tea'i 'ininakia ha teahu ki'ana ha teahu 'arina ha piharai tekuina.<sup>36</sup> Haeamona poki hauna ta'ara'i haukia euhunakia teao, 'uaina hanona bita mo bariu hanona bo'ona teao, ia hoa ihobonamo ia herekiae tebabaina.

<sup>37</sup> Muri 'akinai hanona poki hauna nahuna euhuna eao herekiae etibaha, 'Au naha'u buonai aba katemarikiaina.'<sup>38</sup> Haharua te'imana haukia poki hauna nahuna teihana raninai kipokia te'abi'abi tetibaha, 'Kepoki hauna neiana. Tomai hamahu'arina, haharua hanona aika 'eukai keao.'<sup>39</sup> Ba weia tea'ina haharua aonai teberi ahina teaoaina parabu kapenai teahu'arina.<sup>40</sup> Ba wai turanana, haharua poki hauna kemai raninai haharua te'imana haukia herekiae taba kebabaina?"

<sup>41</sup> Ia ena 'abi tebamuena tetibaha, "Poki hauna kehore i'mana haukia ki'a obokia keahu'ari orenakia, 'a haharua hanona haharua i'imana haukia haeani kebenakia kate'imana, bine ekia bua'a raninai buakia kateaoainakia ia 'euna."

<sup>42</sup> Iesu ia ehinabenakia etibaha, "Wai puka robena a'i totuabi 'apuana, u? Na terere aihona, Itu babai haukia tebaki'ana piharana hanona aba piharapaka ebabaina, nahaihana nahata'u ta'u huri!"

## Sal 118.22

<sup>43</sup> Ua buonai au wai nahinabenimi, Tirama ena obia aiarana heremai kea'i parena, buabua nibaramanakia itubuna maearimakia kebenakia. <sup>44</sup> Hau ha ke'eho pihara neiana ahnai hanona kepa'a, ia pihara ke'eho hau ha ahnai hauna hanona ke'iti 'iti apuroroai keao."

<sup>45</sup> Robe haukia apa'uakia mai Parisea haukia Iesu ena 'abi ibabatai weiana ehinana aiana teona hanona te'ibina ia robakia ni-ahuna. <sup>46</sup> Ia tenuatae katea'i 'inina, 'a mako teta'uainakia pokina maearima teraonana Iesu hanona mahabanai hauna ha.

## 22

*Ori Ibabataina Hawainibe Mahamaha Tatuna.  
(Lk 14.16-24)*

<sup>1</sup> Iesu haeamona 'abi ibabatainai ehinabe muenakia etibaha, <sup>2</sup> "Tirama ena obia aiarana hanona matoha obia hauna ha nahuna ena hawainibe tatuna ebabaina 'abana. <sup>3</sup> Ia ena ta'ara'i haukia euhunakia tebeau beau enuatae ainakia haukia tehina benakia, ia enuatae ainakia haukia teubo a'i temai. <sup>4</sup> Ba ia haeamona ena ta'ara'i haukia haeai baika euhunakia etibaha, 'Abeunakia haukia katohinabe muenakia katotibaha, 'E'u poromakau mai e'u mahi namokia aba ahunakia aba teiuia 'iti'itinakia taba ikoikiai aba teba'orunakia, hawainibe tatuna katomai."

<sup>5</sup> 'A maearima weiakia hanona ia robana a'i teahuna tekamuri, ha ena uma eao ha ena aka 'ekana eao. <sup>6</sup> Harina haukia ta'ara'i haukia tea'i 'ininakia tebatae ainakia ba teahu 'arinakia. <sup>7</sup> Weiana obia hauna eopuere wairai, ba emikiri ena huari haukia euhunakia, ahuhu haukia weiakia teahu 'arinakia ekia aiarra abomo tehuhuna.

<sup>8</sup> Ba ia ena ta'ara'i haukia ehinabenakia etibaha, 'Hawainibe anianina aba e'oru, 'a abeaunakia haukia a'i tenamo a'i katemai. <sup>9</sup> Tomoao aiara ibuanai taimo taimo katobabu ahinakia

haukia katobeunakia katemai hawainibe neiana tatumai.' <sup>10</sup> Ua buonai ta'ara'i haukia teao aiara ibuanai tetabu ahi maearimakia namo haukia mai ki'a haukia ikoikiai temaiainakia, baki baki haukia hawainibe ituna tebabonai 'auna.

<sup>11</sup> 'A obia hauna eao baki haukia eihanakia raninai hau ha eiha tinana hawainibe tatuna habunina a'i ebatotona. <sup>12</sup> Ebakaina etibaha, 'E'u hau e! Hawainibe tatuna habunina aha'i ia aea ohoma ototo?' Hau weiana ke'abi 'ekana aha'i. <sup>13</sup> Obia hauna ena ta'ara'i haukia ehma benakia etibaha, 'Aena imana katobirinakia atapaka wapuranoi katokapo ahina, ua'a kehai mai 'aki'akina kearao'i aroa'i.'

<sup>14</sup> Iesu ena 'abi orenai etibaha, "Bo'ona eaparinakia 'a bita mo etina'anakia."

*Takiti Bakaibakaina.  
(Mk 12.13-17; Lk 20.20-26)*

<sup>15</sup> Parisea haukia teto'u roba teahu aea patehoma Iesu ena 'abiai patebarewana. <sup>16</sup> Ekia maearima baika mai Heroda murinai ti'au haukia kipokia teuhunakia teao Iesu herena tehnabena tetibaha, "Ba'iobi haumu e, ai ta'ioquina oi hanona 'abi tohana haumu, Tirama ena taeara tohana nuba'iobi aina abomo maearima taikia a'i nutai pokina ia aea homakia haukia robakia a'i nuahuna. <sup>17</sup> Ua buonai emu raona taba hanona moba'iobinamai, Takiti monina Kaisara katabena hanona ebero 'ao aha'i?"

<sup>18</sup> Ekia raona ki'a obona weiana Iesu aba e'ioquina buonai e'abi etibaha, "Wai bahaoreaa haumi, aehoma buonai au tuhobona'u? <sup>19</sup> Takiti tubaibenai monina ha tomobaihana'u." Ba silba monina ha temaiaina tebena. <sup>20</sup> Iesu ia ebakainakia etibaha, "Neiana tai aubaubana abomo tai atana?"

<sup>21</sup> Ia te'abi, "Kaisara 'euna." Ba Iesu ia ehinabenakia etibaha, "Kaisara 'euna Kaisara katobena, 'a Tirama 'euna Tirama katobena."

<sup>22</sup> 'Abi neiana aiana teona raninai te'arara ki'a ba tehabona teka'a.

*'Ariai Mikiri Mue Bakaibakaina.  
(Mk 12.18-27; Lk 20.27-40)*

<sup>23</sup> Beraura hamona weianai Sadukea haukia temai Iesu herena, ia hanona mikiri mue a'i tibatohana haukia, Iesu tebakaina, <sup>24</sup> tetibaha, "Ba'iobi haumu e, Mose na eba'iobi aihonamai. Hau ha ehawainibe ia nahuna aha'i ebaramana e'ari raninai uaho'abana kehore wapu weiana keatawana miori kebaramana uaho'abana e'ari hauna nahunai keao. <sup>25</sup> Bariu a'a hati haukia ikoinai 'abaihau hamomo baiatamaiai temiaho. Pakana ehawainibe, miori ha a'i ebaramana aonai e'ari wapu uaho'abana ibaruana hauna herenai ehabona, eatawana. <sup>26</sup> Haeamona uaho'abana ibaruana abomo nahuna aha'i e'ari, taeara ihibonai mo erama uaho'abana ibaihauna herenai eao mo iba'abaihau hamomona herenai epua. <sup>27</sup> Puana 'akinai babi'e abomo e'ari. <sup>28</sup> Bariu mikiri mue raninai babi'e weiana hanona tai atawanai keao, pokina haukia 'abaihau hamomo babi'e weiana teatawana?"

<sup>29</sup> Iesu ekia 'abi ebamuena etibaha, "Wai aba tuhaorea pokina Puka robenai terere 'abikia mai Tirama ena hiabu a'i to'ibinakia paunai. <sup>30</sup> Mikiri mue ai maearima hanona a'i katehawainibe. Ia haukia hanona kupa anerukia 'abakiai kateao.

<sup>31</sup> 'Ari haukia katemikiri mue 'abina Tirama ehina benimi hauna a'i totuabina, u? Ia etibaha, <sup>32</sup> 'Au hanona Aberahamo ena Tirama, Isako ena Tirama, Iakobo ena Tirama'. Ia hanona 'ari haukia ekia Tirama aha'i, ia hanona mauri haukia ekia Tirama." <sup>33</sup> Mako 'abi neiana teona raninai ia ena ba'iobi 'abinai teta'u ta'u huri.

*Rauhubu Apa'uana Tohana.*

*(Mk 12.28-31; Lk 10.25-28)*

<sup>34</sup> Iesu Sadukea haukia ebaunu baihanakia pouna Parisea haukia

teona raninai ia abomo teto'u. <sup>35</sup> 'Abakia ha rauhubu hauna Iesu ehobona ebakaina etibaha, <sup>36</sup> "Ba'iobi haumu e, rauhubu 'abina aeana hauna eapa'ua ki'a baha?"

<sup>37</sup> Iesu e'abi etibaha, "Obiapaka emu Tirama koraona'au aina mai aomu ikoinai mai aubamu ikoinai mai emu raona ikoinai. <sup>38</sup> Neiana hauna hanona rauhubu 'abina apa'uana abomo kori'uaina. <sup>39</sup> Rauhubu 'abina apa'uana ibaruana hanona neiana, heremu ai hauna koraona'au aina kipomu nuraona'au aini'o 'abana. <sup>40</sup> Rauhubu 'abikia ikoikiai mai mahabanai 'abikia ikoikiai hanona rauhubu neiakia rua ahakiai tekori 'au."

*Iesu Parisea Haukia Ebakaibakai ainakia.*

*(Mk 12.35-37; Lk 20.41-44)*

<sup>41</sup> Parisea haukia titou ohomo aonai Iesu ia ebakainakia etibaha, <sup>42</sup> "Wai hanona Keriso aea turaona aihona? Abomo ia hanona tai nahuna?" Ia tehinabena tetibaha, "Davida nahuna."

<sup>43</sup> Ba Iesu ebakainakia etibaha, "Aehoma buonai Davida Auba Robeai ebonu hanona ia Keriso eaparina Obiapaka? Pokina Davida e'abi etibaha,

<sup>44</sup> 'Obiapaka hanona e'u Obia ehinabena etibaha, "Itipa'u tainai komiati keaomo emu 'ou haukia 'apumu ba'anai kahorotinakia."

Sal 110.1

<sup>45</sup> Davida Keriso eaparina e'u Obia raninai, aea homanai mo Keriso hanona Davida nahunai keao?"

<sup>46</sup> Hau ha Iesu ena 'abi kebamuena hanona a'i etaina, abomo rani weianai hau ha a'i enuako'o, Iesu a'i ebakaina.

## 23

*Rauhubu Poki Haukia  
Kate'ima'ima Harainakia.*

*(Mk 12.38-39; Lk 11.43, 46;  
20.45-46)*

<sup>1</sup> Weiana Iesu ehore mako mai ia i'abana haukia ehinabenakia etibaha, <sup>2</sup> "Rauhubu poki haukia

mai Parisea haukia hanona Mose ena imia'auai temia'au tipoki.<sup>3</sup> Ua buonai aiakia katoka'aina, tehina benimi akakia ikoikiai katobabai, 'a tibabai hoahoakia hanona a'i katobabai, pokina ia teiroroai akakia hanona a'i tibabainakia.<sup>4</sup> Puma rarikia iebebeai tebir 'aunakia maearima 'arokiai tihore 'aunakia, 'a ia kipokia katea'i taeana hanona imakia riuriuna ituna ha a'i niata 'apuana.<sup>5</sup> Ekia babai ikoikiai hanona maearima kateihanakia kateba apa'uanaakia, puka robena 'abikia tererena teutanakia kohukohukia weia kia bahuba'ari aonai paukiai tebir 'aunakia haukia tibapairi pairinakia abomo ekia bahuba'ari habunikia buibuikia tibawaro waronakia.<sup>6</sup> Tatu 'ekakiai hanona imia'au namokia 'arikia ti'ari, marea aokiai imia'au 'orukia tenuatae ainakia.<sup>7</sup> Ekia natae hanona kawakawa 'ekakiai maearima katehore kateba namonakia mai katemariki ainakia haeamona kate'abi ia hanona maearima apa'uana ha.

<sup>8</sup> Ia maearima a'i teme'abi wai hanona maearima apa'uami, pokina wai emi apa'ua hauna hanona hamona abomo wai ikoimiai hanona a'a mai hati.<sup>9</sup> Hanopakai hau ha a'i katoaparina hamami, pokina wai hamami hanona hamona kupai nemiaho.<sup>10</sup> Abomo a'i kate'abi, wai hanona pokia haumi, pokina wai emi pokia hauna hanona hamona Keriso.<sup>11</sup> Baiatamiai ha kebapa'ua hauna wai emi ta'ara ia'ina haunai keao.<sup>12</sup> Hau ha kipona nibapa'uana hauna Tirama kehore ia kebak'o'i ko'ina, ia kipona nibako'i ko'ina hauna Tirama kehore ia kebapa'uana."

*Iesu Parisea Ekia Bai'oi Hoakia Paukiai Erikenakia.*

(Mk 12.40; Lk 11.39-42, 44, 52; 20.47)

<sup>13</sup> Rauhubu pokia haumi mai Parisea haumi bahaorea haumi, heremiai keki'a wairai, Tirama ena obia aiarana pa'abina

maearima wairakiai tukaiabuna, wai kipomi a'i tutoto abomo weia kia tenuatae katetoto haukia tuehe abunakia.<sup>14</sup> Rauhubu pokia haumi mai Parisea haumi, bai'oi haumi, heremiai keki'a wairai, wapu ekia itu tuani 'aunakia, maearima tuba haoreanakia emi bahuba'ari tuba homa'anakia. Ua buonai puma rarina katoa'ina.

<sup>15</sup> Rauhubu pokia haumi mai Parisea haumi bahaorea haumi, heremiai keki'a wairai, hanopaka maikoina tukakaiaronia maearima i'abami haukiai katobaonakia, ba weiana tubabaina hanona ia ena ki'a barua tubapa'uana ia tua'i ki'ana keao iruba a'i ni'ao 'apua 'ekana wai 'abana.

<sup>16</sup> Baka'a haumi mahami tekia haumi, heremiai keki'a wairai, wai tu'abi maearima ha marea robe atana ke'abi'uai hanona robana a'i kateahuna, 'a peia gold weiana marea robe aonai hauna atanai ke'abi'uai hanona kebatohana.<sup>17</sup> Wai po'o abomo mahami tekia haumi, aeana hauna eapa'ua? Gold 'ao marea robe weiana gold nibarobena hauna?<sup>18</sup> Wai haeamona tu'abi, maearima ha itara robena atanai ke'abi'uai hanona robana a'i kateahuna, 'a peia beruberu tabana itara robena ahana hauna atanai ke'abi'uai hanona kebatohana.<sup>19</sup> Wai mahami tekia haumi, aeana hauna eapa'ua? Beruberu tabana itara robena ahana hauna 'ao itara robena weiana beruberu tabana nibarobena hauna?<sup>20</sup> Ua buonai itara robena atanai ni'abi'uai hauna hanona itara robena mai ahana temiaho tabakia ikoinai atakiai ni'abi'uai.<sup>21</sup> Abomo marea robe atanai ni'abi'uai hauna hanona marea robe mai aonai nemiaho hauna atanai ni'abi'uai.<sup>22</sup> Abomo kupa atanai ni'abi'uai hauna hanona Tirama ena imia'au mai nemia'au hauna atanai ni'abi'uai.

<sup>23</sup> Rauhubu pokia haumi mai Parisea haumi wai bahaorea haumi, heremiai keki'a wairai, uma anianikia weia kia aniani

tiba'orimona haukia hanona tubaharau haeanakia hamohamo tubaibeni obiapaka ena bararoai, 'a rauhubu akakia apa'uakia, bero, aoko'o mai a'ikakauma tureanakia, ba neiakia patobabai hanona penamo, weiakia abomo a'i patoreeanakia.<sup>24</sup> 'Uai haumi mahami teki'a, nene 'abiai tu'ato ahina ia mahi atana kamela hanona tutonona.

<sup>25</sup> Rauhubu pokи haumi mai Parisea haumi bahaorea haumi, heremiai keki'a wairai, ere mai 'ororo kapekia toutunakia ia aokia hanona bainai mai ripuripu ai toa'i tabakiae tebonu 'au.<sup>26</sup> Parisea haumi mahami teki'a, ere mai 'ororo aokia tomoutu 'uainakia ba kapekia abomo aba katemahamaha.

<sup>27</sup> Rauhubu pokи haumi mai Parisea haumi bahaorea haumi, heremiai keki'a wairai, wai hanona 'ariahakia tebaporenakia 'abakia, kapekia temahamaha 'a aokia hanona 'ari haukia huria mai pari ikoinai tebonu'au.<sup>28</sup> Taeara ihobonai mo maearama wai haumi teihanakia bero haumi 'abanai, 'a aomi hanona bai'oi mai ki'a tebonu'au.

*Iesu Parisea Ekia Puma Ehina Uaina.*  
(Lk 11.47-51)

<sup>29</sup> Rauhubu pokи haumi mai Parisea haumi bahaorea haumi, heremiai keki'a wairai, mahabanai haukia ekia 'ariahakia tubabai mai bero haukia ekia 'ariahakia tubataitai harainakia.<sup>30</sup> Wai tu'abi, 'Kupumai ekia raniai tamarama raninai mahabanai teahu'arinakia aonai ai hanona a'i pata'i turinakia.<sup>31</sup> Weiana hanona wai kipomi tohina pounimi, wai hanona mahabanai haukia teahu'arinakia haukia 'aba'abakia.<sup>32</sup> Kupumi hamami ekia ki'a tea'i ramana hauna wai katobapa'ua haraina.<sup>33</sup> Wai 'erau abomo 'erau nahukia

haumi, Tirama ena puma keaoainimi iruba a'i ni'ao 'apua 'ekana herenai aea katokapare aih?

<sup>34</sup> Mahabanai haukia aobero haukia mai ba'iobi haukia kauhunakia heremi katewahi, baika katoahu'ari, baika matiu ibiri ropoai katokoko 'aunakia, baika marea aokiai kato'atinakia, abomo aiara hai katouranakia kateao aiara ha.<sup>35</sup> Ua buonai bero haukia aruarukia ikoinai hanopaka ahanai ekiki oioi pumana hanona wai ahamiai keriri, aka bero hauna Abela aruarunai kea'i ramana keao mo Berekia nahuna Sekaraia aruaruna ia ikaihuri robena mai itara robena baiatakiae toahu'arina hauna herenai kepua.<sup>36</sup> 'Abi tohana au wai nahinabenimi, ahuhu neiakia ikoikiai ekia puma hanona uru neiana maearimakia ahakiae keriri.

*Iesu Ierusalem Ehaiaina.*  
(Lk 13.34-35; 19.41-44)

<sup>37</sup> Ierusalem e, Ierusalem e, mahabanai haukia nuahu'arinakia abomo Tirama iuhubeau euhunakia heremu tewahi haukia piharai nokuinakia, rani babita anuatae nahumu kabaronakia ihobona kokoro'u ha banina ba'anai nahuna ne'umu hao 'abana, 'a a'i onuatae.<sup>38</sup> Ua buonai emu marea robe hanona kahabo 'abaeana abomo ke'aburu.<sup>39</sup> Au oi nahinaben'i'o, a'i koiha muenau keao mo oi ko'abi kotibaha, "Tirama kehore Obiapaka atanai nimai hauna kebanamona!"

## 24

*Iesu Marea Robe Kerbutaina Pouuna Ehinana.*  
(Mk 13.1-2; Lk 21.5-6)

<sup>1</sup> Iesu marea robeai ekarahi taearai nika'a aonai i'abana haukia teka'a haha herena marea robe ituna robana teahuna.<sup>2</sup> Iesu ia ehina benakia etibaha, "Taba neiakia ikoikiai toihanakia? 'Abi tohana au wai nahinabenimi, pihara ha pihara ha ahanai a'i

keno'au a'i kemiaho, ikoikiai hanona kateriri kate'eho."

*Iesu E'abi, Haiara Bo'ona Katerama.*  
(Mk 13.3-13; Lk 21.7-19)

<sup>3</sup> Iesu olibe oeonai emiati aonai i'abana haukia tekabuni teao herena tehinabena tetibaha, "Moba 'iobinamai, taba neiakia aita katerama? Emu mai mue abomo hanopaka puana hoana hanona aea homana?"

<sup>4</sup> Iesu ekia 'abi ebamuenä etibaha, "Kato'ima'ima harainimi, hau ha a'i me'oинimi. <sup>5</sup> Pokina au at'aui maearima bo'ona katemai kate'abi katetibaha, 'Au Keriso neia'u,' ba maearima bo'ona kate'oinakia. <sup>6</sup> Wai hanona huari 'urukia mai poukia kato'o raninai nuami a'i katetae, taba uahomakia katerama ia puana hanona wairai. <sup>7</sup> Hanopaka ha kehore hanopaka ha kehuarina, itubu ha kehore itubu ha ke'oatana. 'Eka haeai haeai 'arobo katerama mai 'eka bo'onai kanokau kateka'a. <sup>8</sup> Neiakia ikoikiai hanona miori nrama haiarana kori'uaina 'abana.

<sup>9</sup> Weiiana wai hanona kateaoainimi katebahaiaranimi, kateahu 'arinimi, au buo'uai hanopaka ikoikiai wai kate'oatanimi. <sup>10</sup> Rani weiana maearima bo'ona ekia a'ikakaumai kate'eho haha kipokia hinahinakia katehina, abomo katebai'oata. <sup>11</sup> Weiiana mahabanai haukia bai'oikia bo'ona abomo katewaira tina maearima bo'ona kate'oinakia. <sup>12</sup> Aka ki'a hanona keapa'ua buonai maearima bo'ona ekia raona'au ke'abe'abe. <sup>13</sup> Ia kekoru 'ini keao puanai hauna hanona mauri kea'ina. <sup>14</sup> Tirama ena obia aiarana pouna namona neiana hanona hanopaka maikoina aonai kateiroro aina, itubu ikoikiai kate'ibina, ba murinai hanopaka puana kemai.

*Rani Ki'a Obona Tohana.*  
(Mk 13.14-23; Lk 21.20-24)

<sup>15</sup> Ua buonai kaiba'uku ki'a obona tohana weiana mahabanai hauna Daniela robana eahuna hauna 'eka robenai kekoroti

katoihana raninai, (tuabi tuabi hauna me'ibina.) <sup>16</sup> weiakia Iudai temiaho haukia hanona oeo aokiai katebeau toto. <sup>17</sup> Weiana itu kapenai hauna hanona a'i keriri ena taba itu aonai haukia a'i kea'inakia. <sup>18</sup> Mai weiana umai nemiaho hauna a'i kemue ena itu ena habuni ia'ina a'i keao. <sup>19</sup> Rani weiakia aokiai babi'e mai nuakia abomo miori 'oru'orukia tiba'aenakia babi'ekia herekiai hanona keki'a ki'a baha. <sup>20</sup> Katobahuba'ari Tirama herenai, emi beau obo ipi mai hiribo 'ao beraura robenai a'i merama paunai. <sup>21</sup> Pokina atetua rarina 'akina kerama, weiana hanopaka ea'i ramana emai mo bariu uahomana ha a'i erama, muriai abomo ihobona ha a'i kerama. <sup>22</sup> Tirama beraura weiakia a'i pebak'o'nakia raninai maearima ha a'i kemauri, 'a ia ena tina'a maearimakia paukiai beraura weiakia kebako'nakia.

<sup>23</sup> Rani weianai hau ha kehina benimi ketibaha, 'Tomoihana Keriso neiana', 'ao 'Ia weiana,' raninai a'i katobatohana. <sup>24</sup> Pokina Keriso bai'oikia mai mahabanai bai'oikia hanona katewaira tina bata'u ta'u huri akakia mai hoa rarikia katebabai, petaina raninai Tirama ena tina'a maearimakia abomo kate'oinakia.

<sup>25</sup> Katoraona 'inina Au aba naba'obi 'uainimi. <sup>26</sup> Ua buonai ia katehina benimi katetibaha, 'Keriso weia hano'akunai' raninai a'i katoao, 'ao 'Ia neiana ikaihuri aonai', raninai a'i katobatohana. <sup>27</sup> Pokina kupa neimare taetana niaomo tibotaina 'abana au maearima nahuna e'u mai hoana abomo ua homana.

<sup>28</sup> 'Ari hauarina enoti 'ekanai, po'i abomo weia kateto'u.

*Au Maearima Nahuna Kamai.*  
(Mk 13.24-27; Lk 21.25-28)

<sup>29</sup> 'Atetua weiakia kateore murikiai beronai beraura kewapura, nawa a'i kerara, bihiu hanona kupai kate'eho, kupa hiabu tabakia ikoikiai kateibiu ibiu.'

Isa 13.10, 34.4

<sup>30</sup> Weiana maearima nahuna au e'u mai hoana hanona kupa kewaira tina, ba hanopaka maearimakia ikoikiae hanona katehai, au maearima nahuna hi-abu mai nuabi rarina aonai auhao ahakiae kamai kateihana'u. <sup>31</sup> Pihi kateubainakia urukia rarikia aonai e'u aneru kauhunakia kupa puanai keao kupa puanai baura bani 'ekakiae atina'anakia maearimakia katebararonakia.

*Kuropouai Iobi Kaha'ina.*

*(Mk 13.28-31; Lk 21.29-33)*

<sup>32</sup> Kuropou matiuna herenai 'iobi katoa'ina. Kuropou kehubu rauna kateahu boa raninai, wai aba kato'ibina hioro aba nikaibari. <sup>33</sup> Taeara ihobonai taba neiakia katoihanakia raninai, wai aba kato'ibina rani hanona aba herekai au hanona aba pa'abi herenai. <sup>34</sup> 'Abi tohana au wai nahinabenimi, uru neiana a'i ke'ari ore keao mo taba neiakia ikoikiae katerama. <sup>35</sup> Kupa mai hanopaka hanona kate'akauma, ia au e'u 'abi hanona a'i ke'akauma.

*Tai Ha A'i E'ibina Rani Tabanai.*

*(Mk 13.32-37; Lk 17.26-30, 34-36)*

<sup>36</sup> E'u mai beraurana abomo beraurana hoana hau ha a'i e'ibina, kupa anerukia a'i te'iobina Nahuna abomo a'i e'ibina, ia Hama'u ikupaiana mo e'ibina. <sup>37</sup> Noa ena raniae 'abana, au maearima nahuna e'u mai ranina abomo ua kehoma. <sup>38</sup> Tou rarina a'i nimai baha aonai maearima hanona teaniani teinuinu tehwainibe eao mo wapu weianai Noa aunohiae etoto.

<sup>39</sup> A'i te'iobi 'apuana taba kerama eao mo tou apa'uana ekara 'au, ba ikoikiae tetono 'ari. Au maearima nahuna e'u mai rarina abomo ua kehoma. <sup>40</sup> Rani weianai hau rua umai kateaka, Tirama kehore hamona kea'i taeana 'abana kehabona. <sup>41</sup> Babi'e rua witi ibautuna piharana katebaherena aonai, Tirama kehore hamona kea'itaeana 'abana kehabona.

<sup>42</sup> Ua buonai katomaha no'a pokina emi Obiapaka ena mai beraurana hanona a'i to'ibina. <sup>43</sup> Ia neiana katoraona 'inina, itu poki hauna pe'iobina rabi hoana tabanai bainao hauna kemai hanona ia aba pemaha no'a, ba ena itu a'i patetapania a'i patetoto. <sup>44</sup> Ua buonai wai abomimo katoba'oru rani ikoinai, pokina au maearima nahuna hanona rani weiana wai a'i tubahu bahuaina aonai kamai.

*Ta'ara'i Hauna Namona Mai  
Ta'ara'i Hauna Bai'oina.*

*(Lk 12.42-46)*

<sup>45</sup> Tai hanona ta'ara'i hauna namona mai aoberona ia ena poki hauna kehore kea'i taeana ena itu i'imaikeao, ta'ara'i miorikia ekia aniani kebenakia aniani ranina tohanai? <sup>46</sup> Ia aka weiana nibabaina aonai ena poki hauna kemue keihana raninai ia hanona kenamo. <sup>47</sup> 'Abi tohana au wai nahinabenimi, poki hauna kehore ia kea'i taeana ena taba ikoikiae i'imakia haunai kebaona. <sup>48</sup> Ia ta'ara a'i hauna ki'a obona hanona ke'abi ketibaha, 'E'u poki hauna a'i nimai baha.' <sup>49</sup> Ba ia kehore 'abana ta'ara'i haukia keahunakia abomo iniuinu haukia kipokia kateaniani kateinuinu haeamo. <sup>50</sup> Rani ha ta'ara'i hauna weiana ena poki hauna a'i nibahu bahu aina abomo beraura hoana a'i e'ibina aonai ia kekara'au. <sup>51</sup> Poki hauna kehore ia keahu ki'ana kehu ahina bahaorea haukia kipokia 'eka hamonai, weia ia kehai mai 'aki'akina kearao'i arao'i."

## 25

*Ori Ibabataina Uaho Harau Haea.*

<sup>1</sup> "Rani weiana Tirama ena obia aiarana hanona matoha uaho harau haea 'abakia, ekia ramepa tea'i teao hawainibe mahamaha hauna kipokia katebaitabu ahi.

<sup>2</sup> Ima hanona teaopo'o 'a ima hanona teaobero. <sup>3</sup> Weiana aopo'o uahokia ekia ramepa tea'inakia, ia karatini harikia a'i tea'i. <sup>4</sup> 'A

aobero uahokia ekia ramepa tebaharu abomo karatini harikia tea'i.<sup>5</sup> Hawainibe mahamaha hauna hanona a'i emai baha, ba uaho parua ea'i ki'anakia teako rai tenoti teparua.

<sup>6</sup> Wapuka'a ibuanai io aiana teona etibaha, 'Hawainibe mahamaha hauna aba nimai, tomokarahi kipokia katobaitabu ahi.'<sup>7</sup> Ba uaho ikoikiae teno'a temikiri, ekia ramepa tea'ia'i harai.<sup>8</sup> Weiana ao po'o uahokia tehore ao bero uahokia tenoinakia tetibaha, 'Emi karatini harua tomobenamai emai ramepa aba kate'ao.'<sup>9</sup> Ia ekia 'abi tebamuena tetibaha, 'Aha'i. Wai mai ai kipokia kahabaharu hanona a'i ketaina. Namona hanona tomoao tikawa kawa 'ekanai 'eumi tomokawa.'<sup>10</sup> Ao po'o uahokia kawakawa 'ekana teao aonai hawainibe mahamaha hauna ekara'au, teba'oru uahokia ima kipokia teao hawainibe tatuna aonai tekatoto ba pa'abi tekaiabuna.

<sup>11</sup> Murinai ao po'o uahokia temai teapari tetibaha, 'Poki haumu e, Poki haumu e, pa'abi mokaikauna tamatoto.'<sup>12</sup> A ia ekia 'abi ebamuena etibaha, 'Abi tohana au wai nahina benimi, au wai a'i a'iobinimi.'

<sup>13</sup> Weiana paunai katomaha no'a, beraura mai beraura hoana hanona wai a'i to'ioquina.

*'Abi Ibabataina Ta'ara'i Haukia Aihau Moni Te'ima.  
(Lk 19.11-27)*

<sup>14</sup> Haeamona Tirama ena obia aiarana hanona matoha hau ha harima keao 'eka homa'ana 'abana, ena ta'ara'i haukia ea-parinakia, ehinabenakia ena taba ikoikiae kate'imanakia.

<sup>15</sup> Poki hauna weiana ehore ena ta'ara'i haukia ha ha ekia tabura ihobokiae moni ebenakia, hamona kina hinabu ima ebena, ha kina hinabu rua, ha hanona kina hinabu hamomo ebena ba ia harima eao.<sup>16</sup> Kina hinabu ima ea'ina hauna hanona beronai eao

akanaka ebabaina ba ahanai kina hinabu ima ha ebabaina.<sup>17</sup> Kina hinabu rua ea'ina hauna abomo uamo ehoma, ba ahanai kina hinabu rua ha ebabaina.<sup>18</sup> A kina hinabu hamona ea'ina hauna eao 'uri ehabina poki hauna ena moni ehano abuna.

<sup>19</sup> Rani homa'ana eao murinai ta'ara'i haukia weiakia ekia poki hauna emue emai ena moni ebakai bakai ainakia.<sup>20</sup> Kina hinabu ima ea'ina hauna kina hinabu ima ha kipokia emai-ainakia etibaha, 'Poki haumu e, kina hinabu ima obena'u. Ba moihana, ahanai kina hinabu ima ha neiakia ababainakia.'<sup>21</sup> Poki hauna e'abi etibaha, 'Ta'ara'i haumu namomu aka bero haumu, obabai harai, taba papakia o'ima harainakia buonai bariu taba apa'uakia i'imakiae kabaoni'o. Omai e'u aonamo aonai mototo.'

<sup>22</sup> Kina hinabu rua ea'ina hauna abomo emai e'abi etibaha, 'Poki haumu e, kina hinabu rua obena'u. Ba moihana, ahanai kina hinabu rua ha neiakia ababainakia.'<sup>23</sup> Poki hauna e'abi etibaha, 'Ta'ara'i haumu namomu aka bero haumu, obabai harai, taba papakia o'ima harainakia buonai bariu taba apa'uakia i'imakiae kabaoni'o. Omai e'u aonamo aonai mototo.'

<sup>24</sup> A kina hinabu hamona ea'ina hauna emai e'abi etibaha, 'Obi-apaka e, au a'iobina oi hanona hau pahihimu, maearima haeai tebato bato 'ekakiae nuaeueu mai maearima haeai uho tekapo kapo otarai 'ekakiae nubararo bararo.<sup>25</sup> Ua buonai au ata'u aeao emu moni hinabu hamona hano aonai ahano abuna ba namaiaina. Moi-hana oi emu moni 'ekanai mo-neiana.'

<sup>26</sup> Poki hauna e'abi etibaha, 'Ta'ara'i haumu ki'a obomu abomo o'aboro, oi nuraonana au maearima baika tebato bato 'ekakiae nuaeueu mai maearima tekapo kapo otarai 'ekakiae nubararo bararo, 'u?<sup>27</sup> Ua homana raninai moni i'imana haukia herekiae pohorotina ba

amue amai raninai ahanai papana ha perama kipokia pa'i haeamona.<sup>28</sup> Bariu hanona herenai kina hinabu hamona tomoa'i boina, kina hinabu harau haea ea'i hauna tomobena.<sup>29</sup> Pokina mai 'euna hauna hanona bo'ona kabena, ena taba kebo'o ki'a, 'a ekapu hauna hanona papana herenai nemiaho hauna abomo ka'i boina.<sup>30</sup> Ta'ara'i hauna neiana ena namo aha'i hauna tomokapo ahina meao 'eka wapurana'i weia kehai mai 'aki'akina kearao'i arao'i.'

### *Bakai Apa'uana Orena 'Akina.*

<sup>31</sup> Au maearima nahuna mai nuabi'u e'u aneru ikoikiae kipokia katamai raninai e'u imia'au nuabina ahanai kamia'au.<sup>32</sup> Hanopakai itubu ikoikiae au waira'uai katebararona, ba au kahore maearima kabahu boanakia, mamoe 'ima hauna mamoe mai nani nibahu boana 'abana.<sup>33</sup> Au kahore mamoe hanona itipa'u tainai, nani hanona awari'u tainai kahorotinakia.<sup>34</sup> Ba au Obia arana kahore itipa'u tainai haukia kahina benakia katibaha, 'Hama'u ebanamonimi haumi, tomai kupa aiarana neiana hanopaka ebabaina raninai eba'oruna wai 'eumi hauna tomoa'ina wai barimi ai keao.<sup>35</sup> Pokina au mare'a a'ari hanona wai aniani tobena'u ani, 'ako'u e'ororo hanona wai bei tobena'u ainu. Au maearima haeai hau'u hanona wai toa'i taeana'u emi 'ekai.<sup>36</sup> Here'uai habuni aha'i hanona wai habuni tobabatotona'u. Au ainawa hanona wai au to'imana'u. Au wapura 'ekanai hanona wai totoana'u.'

<sup>37</sup> Ba bero haukia ena 'abi katebamuena katebibaha, 'Obiapaka e, aita raninai mare'a o'ari, ba tabanianini'o, 'ao aita raninai 'akomu e'ororo ba bei tabeni oinu?<sup>38</sup> Aita raninai taihani'o maearima haeai haumu ba ta'i taeani'o emai 'ekai, 'ao aita raninai heremuai habuni aha'i ba habuni tabeni'o?<sup>39</sup> Aita oinawa 'ao owapura raninai ba tatoani'o?

<sup>40</sup> Weiana au Obia arana ia kahinabenakia katibaha, 'Abi tohana au wai nahinabenimi. Uaho'aba'u urarukia neiakia ha herekiae ua tobabai aiho hanona au here'uai abomo aba ua tobabai aihona.'

<sup>41</sup> Ba au Obia arana kahore awari'u tainai haukia kahinabenakia katibaha, 'Tirama eururu ainimi haumi, here'uai tomokapare tomoao niara banai banai irubana teba'oruna tiaporu mai ena miori kipokia 'eukia hauna aonai katototo.

<sup>42</sup> Pokina au mare'a a'ari hanona a'i tobanianina'u, abomo 'ako'u e'ororo hanona bei a'i tobena'u a'i ainu.<sup>43</sup> Au maearima haeai hau'u hanona emi 'ekanai a'i toa'i taeana'u, here'uai habuni aha'i hanona habuni ha a'i tobabatotona'u. Au ainawa mai wapura 'ekanai hanona a'i totoana'u.'

<sup>44</sup> Ia abokiamo ena 'abi katebamuena kate'abi katebibaha, 'Obia arana e, aita raninai taihani'o, mare'a o'ari, 'ao 'akomu e'ororo, 'ao maearima haeai haumu, 'ao habuni heremuai aha'i, 'ao oinawa abomo wapura 'ekanai, ba a'i tabaraini'o?

<sup>45</sup> Weiana au ia kahinabenakia katibaha, 'Abi tohana au wai nahinabenimi, uaho'aba'u urarukia neiakia ha herekiae ua a'i tobabai aiho raninai au abomo here'uai ua a'i tobabai aiho.'<sup>46</sup> Ba ia haukia hanona keuhunakia hawaii banaibana'i 'ekana kateao, 'a bero haukia hanona keuhunakia mauri banaibana'i 'ekana kateao."

## 26

*Iesu Iahu'arina Taearana Tetabuna.*  
(Mk 14.1-2; Lk 22.1-2; Io 11.45-53)

<sup>1</sup> Weiana Iesu 'abi neiakiae ikoikiae ebapuanakia murinai i'abana haukia ehinabenakia etibaha,<sup>2</sup> "Wai to'lobina Kabanai tatuna\* hanona wapu rua mo wairai. Weiana au maearima

\* **26:2:** (2) Isaela haukia ekia tatu apa'uana ha.

nahuna hanona hinahina'u katehina matiu ibiri ropoai katekoko 'auna'u ka'ari."

<sup>3</sup> Rani weianai robe haukia apa'uakia mai Iuda ekia maearima apa'uakia kipokia, robe haukia arakiae hauna atana Kaipasi ena ituai teto'u. <sup>4</sup> Ia terobahu temaea hamomo bunianai Iesu katea'ina kateahu 'arina. <sup>5</sup> A ia kipokia te'abi tetibaha, "Tatu aonai a'i kahababaina maearima a'i hamaba 'uri'urinakia."

### *Babi'e Ha Tehoroai Iesu 'Arana Eheina.*

(Mk 14.3-9; Io 12.1-8)

<sup>6</sup> Jesu Betani ai morumoru hauna Simona ena ituai emiaho aonai, <sup>7</sup> Babi'e ha kabapu mai tehorona 'arana rarina pahakawana hauna ea'ina emai Iesu aniani 'ekanai emiati hanona arana eheina. <sup>8</sup> I'abana haukia teihana raninai teopuere tetibaha, "Taba buonai tehoro neiana nine'e 'abaeana? <sup>9</sup> Tehoro neiana 'arana rarina pekawa kawaina monina uraru haukia pebenakia."

<sup>10</sup> A Iesu e'lobina taba robana tiahuna hanona ehina benakia etibaha, "Taba buonai babi'e aona tuba aro'arina? Ia aka namona 'akina au here'uai ebabaina. <sup>11</sup> Uraru haukia hanona rani ikoinai wai heremiai katemiaho, ia au hanona rani ikoinai heremiai a'i kamiaho. <sup>12</sup> Tehoro neiana ia eheina au aha'uai hanona ihore'u akana ia'i a'i haraina ebabaina. <sup>13</sup> 'Abi tohana au wai nahinabenimi, hanopaka mai koina aonai pou namona kateiroro aina hanona babi'e aka neiana ebabaina hauna katehinana ia iraonanai keao."

### *Iuda Eao Kehinahina.*

(Mk 14.10-11; Lk 22.3-6)

<sup>14</sup> Rani weianai i'abana haukia harau haea rua 'abakia ha atana Iuda Isakario te hauna hanona robe haukia apa'uakia herekia eao, <sup>15</sup> ebakainakia etibaha, "Iesu imamiai kautana raninai taba katobena'u?" Weiana silba monikia harau aihau tebahunakia tebena. <sup>16</sup> Rani weiana eaoaina

Iuda taeara etabu rani namona tabanai Iesu imakiai keutana.

### *Iesu Kabanai Anianina I'abana Haukia Kipokia Teani.*

(Mk 14.12-21; Lk 22.7-14, 21-23; Io 13.21-30)

<sup>17</sup> Parawa 'abaeana ikine tatuna beraurana kori'uainai, i'abana haukia temai Iesu herena tebakaina tetibaha, "Kabanai tatuna anianina ae'eai kata'ia'i haraina koana?" <sup>18</sup> Ia ekia 'abi ebamuena etibaha, "Tomoao aiari hau weiana herenai katohina bena katotibaha, 'Emai pok'i hauna e'abi, "E'u rani aba ekaibari, Kabanai tatuna i'aba'u haukia kipokia emu ituai katababaina." <sup>19</sup> Ua buonai i'abana haukia Iesu ehinabenakia akana ihobonai tebabaina, Kabanai tatuna anianina tea'ia'i haraina.

<sup>20</sup> Erabirabi aonai Iesu mai i'abana haukia harauhaea rua kipokia aniani 'ekanai temiati teaniani. <sup>21</sup> Tianiani aonai ia e'abi etibaha, "'Abi tohana au wai nahinabenimi, wai ha hanona au hinahina'u kohinahina."

<sup>22</sup> I'abana haukia aokia earo'ari ha tehore tebakaina tetibaha, "Obiapaka e, nuraonana au, u?" <sup>23</sup> Ia e'abi etibaha, "Hau weiana imana au ima'u ohi 'ororo hamonai tahao uta hauna hinahina'u kehinahina." <sup>24</sup> Au maearima nahuna hanona Puka robenai tererena ihobonai ka'ari, ia maearima nahuna hinahinana kehinahina hauna herenai keki'a wairai maearima weiana a'i perama hanona penamo."

<sup>25</sup> Ehinahina hauna Iuda etibaha, "Ba'iobi haumu e, nuraonana au, u?" Iesu e'abi etibaha, "'Abi mo naiana ohinana."

### *Obiapaka Ena Ani To'u.*

(Mk 14.22-26; Lk 22.15-20; 1Kr 11.23-25)

<sup>26</sup> Ia tianiani aonai Iesu parawa ea'ina ebanamona ba eholina, i'abana haukia ebenakia e'abi etibaha, "Tomoa'ina tomoana, neiana hanona au hau'u." <sup>27</sup> Ba 'ere ha ea'ina ebanamona ba etiu

benakia e'abi etibaha, "Ikoimiai neiana tomoinu.<sup>28</sup> Neiana hanona au aruaru'u, 'abi 'uai aruaruna mako paukiai kekiki oi ki'a ihina haona.<sup>29</sup> Au wai nahina benimi, bine beina neiana au a'i kainu mue keao mo Hama'u ena aiarai bine beina mahamahana wai kipokia kahainu haeamo."

<sup>30</sup> Weiana hui ha tea'ina murinai tekarahi, Olibe oeona teao.

*Iesu Ehina 'Uaina Petero Ia Kebuniaina.*  
(Mk 14.27-31; Lk 22.31-34; Io 13.36-38)

<sup>31</sup> Ba Iesu ehiñabenakia etibaha, "Bariu rabi neianai emi a'ikakauma ke'eho katohabona'u, pokina Puka robenai tererena, 'Au mamoe i'imana hauna kahuna ba mamoe to'una hanona kerama otaraina.'<sup>32</sup> Ia au kamikiri mue murinai au hanona ka'uai kaeao Galilea ba wai katoao."<sup>33</sup> Petero etae e'abi etibaha, "Ikoikiai oi katehaboni'o katebeau re'a, au hanona oi a'i kahabo 'apuani'o."<sup>34</sup> Iesu Petero ena 'abi ebamuena etibaha, "Abi tohana au oi nahina beni'o, bariu rabi neiana kokoro'u a'i kearara baha aonai, oi rani aiha au kobuniai aina'u. Ko'abi oi au a'i o'ibina'u."<sup>35</sup> Petero haeamona e'abi etibaha, "Abina aha'i, hararu paha'ari haeamo, ia au hanona a'i kabuniai aini'o." Ba i'abana haukia abokiamo 'abi hamona weiana tehinana.

*Iesu Getesemaneai Ebahuba'ari.*  
(Mk 14.32-42; Lk 22.39-46)

<sup>36</sup> Iesu i'abana haukia kipokia teao 'eka atana Getesemane, ba ehina benakia etibaha, "Au kaeao weia kabahuba'ari aonai wai hanona neia katomiasi."<sup>37</sup> Ia Petero mai Sebedeo nahuna rua ebaka'anakia teao. Weiana aona e'abe'abe ena raona eore,<sup>38</sup> ba ehiñabenakia etibaha, "Au ao'u hanona ni'abe'abe wairai matoha pa'ari moioina. Neia katomiaho kipokia kahabai'ima."<sup>39</sup> Eka'a haha 'apua aonai 'anonai e'umuti ebahuba'ari etibaha, "Hama'u e, heremuai ketaina raninai haiara 'erenia neiana here'uai poa'i

parena. Ia au e'u nuataeai aha'i, oi emu nuatae ai."

<sup>40</sup> Ba emue emai i'abana haukia herekia hanona tiparua eihanakia, ia ehore Petero ehinabena etibaha, "Aehoma buonai wai toaihau beraura hoana hamona kipokia a'i naha bai'ima?<sup>41</sup> Katobai'ima katobahuba'ari baihobo aonai a'i tomototo marikina. Aubami hanona nenuatae ia hauanimi mo ni'abe'abe."

<sup>42</sup> Emue eao rani ibaruna ebahuba'ari mue etibaha, "Hama'u e, haiara 'erenia ia'i obona taearan aha'i raninai kainu. Ba emu nuatae akana kerama."<sup>43</sup> Emue emai raninai tiparua eiha muekia pokina mahakia teparua ki'a baha.<sup>44</sup> Ua buonai ehabonakia emue rani ibaihauna ebahuba'ari, 'abi hamokia mo ehinanakia.

<sup>45</sup> Ba emue emai i'abana haukia herekia ehiñabenakia etibaha, "Wai tuparua mai tuarai oho mo? Tomoihana, beraurana aba ekara'au, au maearima nahuna hanona aba ki'a haukia imakiai kateutana'u."<sup>46</sup> Tomomikiri, hamaeo. Tomoihana ehinanaina'u hauna aba nimai."

*Iesu Tea'i Inina.*  
(Mk 14.43-50; Lk 22.47-53; Io 18.3-12)

<sup>47</sup> Iesu ni'abi ohomo aonai i'abana haukia harau haea rua 'abakia ha Iuda ekara'au, maearima bo'ona kipokia kareba mai pura'a tea'inakia temai. Ia hanona robe haukia apa'uakia mai Iuda ekia maearima apa'uakia teuhunakia haukia.<sup>48</sup> Hinahina hauna hoa ha eba 'ibinakia etibaha, "Kapauna hauna maearimana mo weiana ba katoa'ina."<sup>49</sup> Iuda beronai eka'a eao Iesu herena e'abi etibaha, "Ba'obi haumu e, oi onamo?" Ba epauna.<sup>50</sup> Iesu Iuda ena 'abi ebamuena etibaha, "E'u hau e, emu mai akana mobabaina." Ba teka'a haha Iesu tea'i 'ini haraina.<sup>51</sup> Weiana Iesu te'abana hauna ha etara kipona ena kareba eberi 'auna robe haukia arakiai hauna

ena ta'ara'i hauna ha haiana ehara obona.<sup>52</sup> Iesu ia ehinabena etibaha, "Emu kareba 'ekanai mohorotina, pokina karebai ti'au haukia ikoikiai karebai kate'ari.<sup>53</sup> Au hama'u panoina raninai ia beronai aneru itubuna harau haea rua† peuhunakia here'u hanona a'i o'iobina, 'u?<sup>54</sup> Ua perama aiho raninai, Puka robenai tererena au here'uai kerama toha hauna aea ketoha aiho?"

<sup>55</sup> Rani hamona weianai Iesu ehore to'u ehinabenakia etibaha, "Au kakikaki hau'u buonai wai imami mai karebakia mai pura'akia tomai katoa'ina'u, 'u?<sup>56</sup> Rani ikoinai au hanona wai kipokia marea robe aonai amiati aba'iobi, ia a'i toa'ina'u a'i tobirina'u.<sup>57</sup> Ia mahabanai haukia ekia rererere ketohana paunai neiakia ikoikiai na terama aiho."

Ba i'abana haukia ikoikiai Iesu tehabona tebeau 'akauma.

*Iesu Bakai 'Ekanai Ekoroti.*  
(Mk 14.53-65; Lk 22.54-55, 63-71; Io 18.13-14, 19-24)

<sup>57</sup> Weiakia Iesu tea'ina hanona teaoaina robe haukia arakiai hauna Kaipasi herena, rauhubu poki haukia mai Iuda ekia maearima apa'uakia hanona weia tebararona.<sup>58</sup> A Petero ehore ekaiturina atau'a tainai eka'a, teaomo robe haukia arakiai hauna ena parabu aonai tekatoto. Ia etoto 'ima haukia kipokia temiati taba kerama hanona keihana.

<sup>59</sup> Robe haukia apa'uakia mai rauhubu poki haukia hinai bai'oi haukia titabu Iesu beho 'ekanai katehorotina kateba'arina.<sup>60</sup> Maearima bo'okia tekarahi bai'oi 'abikia herenai tehina, taba ha a'i tetabu ahina puanai hau rua tekarahi,<sup>61</sup> te'abi tetibaha, "Hau neiana e'abi Tirama ena marea robe hanona keahu 'iti'itina ba wapu aihau aonai kebakori muena hanona ketaina."

<sup>62</sup> Robe haukia arakiai hauna emikiri Iesu ebakaina etibaha, "Mai emu 'abi ha? Hau neiakia

babehomu 'abina tehinana hanona ekia 'abi 'arana kobamuena 'ao aha'i?"<sup>63</sup> Ia Iesu 'abi ha a'i ehinana. Robe haukia arakiai hauna haeamona ehinabena etibaha, "Mauri Tiramana atanai nabakaini'o kobatohana. Oi hanona Keriso Tirama nahuna raninai mo'abi!"

<sup>64</sup> Iesu e'abi etibaha, "Abimo naiana aba ohinana. Ikoimiai nahinabenimi, bariu rani neiana keaoaina au maearima nahuna hiabu Tiramana itipanai kamiat mai kupa aiaranai auhao ahana kamai katoihana'u."<sup>65</sup> Ba robe haukia arakiai hauna kipona ena habuni etapana e'abi etibaha, "Ia hanona Tiramana atana nia'i ki'ana. Taba buonai hinai 'abikia kahatabu? Bariu kipomi haiamiai Tiramana atana ea'i ki'ana aiana aba tonu.<sup>66</sup> Wai taba na tuho?" Maearima ena 'abi tebamuena tetibaha, "Ia hanona ebeho buonai ke'ari."

<sup>67</sup> Ba Iesu wairana te'atotina mai teahuna, ba baika tebo'ana,<sup>68</sup> te'abi tetibaha, "Oi Keriso, momahabanai tai ebo'ani'o hauna mo'hina pouna."

*Petero Iesu Ebuniai Aina.*  
(Mk 14.66-72; Lk 22.56-62; Io 18.15-18, 25-27)

<sup>69</sup> Rani weianai Petero hanona parabu aonai itu wairanai emiati, ba ta'ara'i uahona ha emai herena e'abi etibaha, "Oi abomo Iesu Galilea hauna o'abana."<sup>70</sup>

Petero maearima ikoikiai wairakiai ebuniai etibaha, "Au a'i o'iobina oi taba robana nuahuna."<sup>71</sup> Ba Petero ekarahi eao pa'abi 'akonai, weia ta'ara'i uahona haeai ha ehore ia ei-hana ba maearima ehinabenakia etibaha, "Hau neiana hanona Iesu Nasareta hauna e'abana."<sup>72</sup> Petero haeamona ebuniai mue e'abi'uai pahihi etibaha, "Ubi hauna e'iobina, hau weiana au a'i o'iobina."<sup>73</sup> Rani a'i ehoma'a murinai weia tekoroti haukia teao Petero herena te'abi tetibaha, "Abi tohana oi abomo 'abakia ha, pokina oi emu 'abi 'urunai

† 26:53: (53) Huari anerukia taha 'abaihau (6,000)

tabai'iobi." <sup>74</sup> Ba ia e'abi'uai pahihi etibaha, "Ubi hauna e'ioquina 'abi tohana nahinana. Aha'i raninai Tirama puma kebena'u. Hau naiana au a'i a'ioquina." Beronai kokoro'u e'arara. <sup>75</sup> Ba Petero Iesu ena 'abi ehinana hauna eraona tinana, "Kokoro'u a'i ke'arara baha aonai oi rani aihau kobuniai aina'u." Weiana ekarahi eao atapakai ehai ki'a.

## 27

### *Iesu Teaoaina Pilato Wairanai. (Mk 15.1; Lk 23.1-2; Io 18.28-32)*

<sup>1</sup> Raurani amarinai robe haukia apa'uakia mai Iuda ekia maearima apa'uakia ikoikiai terobahu 'abi tebahamona Iesu kateba'arina. <sup>2</sup> Ba Iesu tebirina tebaka'ana teaoaina Kabana hauna Pilato imanai teutana.

### *Iuda Ena 'Ari. (Ih 1.18-19)*

<sup>3</sup> Weiana Iuda hinahina hauna Iesu eihana aba puma kea'ina raninai eraona raona haraina, Silba monina harau aihau emueainā eao robe haukia apa'uakia mai Iuda ekia maearima apa'uakia kebenakia, <sup>4</sup> e'abi etibaha, "Au aba ki'a ababaina, pokina ena beho aha'i hauna hinahinana ahinahina." Ia ena 'abi tebamuenā tetibaha, "Weiana hanona ai aha'i oi kipomu emu aro'ari." <sup>5</sup> Ua buonai Iuda moni weiana marea robe aonai ekapo totona ba ia ekarahi eao kipona ebato'ona e'ari.

<sup>6</sup> Robe haukia apa'uakia moni tea'ina te'abi tetibaha, "Neiana hanona aika eka rauhubu, moni neiana marea robe mauanai a'i kahautana pokina 'ari 'aranai eao." <sup>7</sup> 'Ari boi monina terobahu aina puuanai puou babai hauna herenai hano tekawana, hano weiana hanona maearima haeai ekia 'ariahanai keao. <sup>8</sup> Weiana buonai hano atana teaparina 'Aruaru Hanona' emai mo bariu. <sup>9</sup> Ieremia mahabanai hauna rani weiana ena 'abi ehinana hauna emai etohana etibaha, 'Isaraela

haukia 'ara teuahina ia 'aranai keao hauna Silba monina harau aihau tea'ina, <sup>10</sup> moni weiana puou babai hauna ena hano tekawana Obiapaka ehina bena'u ihobona.'

### *Pilato Iesu Ebakaina. (Mk 15.2-5; Lk 23.3-5; Io 18.33-38)*

<sup>11</sup> Rani weianai Iesu Kabana wairanai ekoroti, Kabana hauna ehore Iesu ebakaina etibaha, "Oi hanona Iuda haukia ekia obia arana, u?" Iesu ia ena 'abi ebamuena etibaha, "E, aba nu'abi mo naiana." <sup>12</sup> Ia robe haukia apa'uakia mai Iuda ekia maearima apa'uakia tehinau aina raninai Iesu hanona ekia 'abi ha a'i ebamuena. <sup>13</sup> Weiana Pilato ehore Iesu ehinabena etibaha, "Tehinau aini'o 'abikia haeai haeai tehina aiakia a'i nuona?" <sup>14</sup> Ba Iesu 'abi ha a'i ehina 'apuana, buonai Kabana hauna aona earo'ari.

### *Pilato E'abi Iesu Kateahu'arina. (Mk 15.6-15; Lk 23.13-25; Io 18.38-19.16)*

<sup>15</sup> Kabanai tatkia ranikiai Kabana hauna ena hoahoa tainai maearima wapura hauna katenuatae aina hauna kebakarahi 'abaeana. <sup>16</sup> Rani weianai wapura hauna wapura itunai emiaho hauna Baraba atana te'iobi haraina. <sup>17</sup> Mako weia teto'u aonai Pilato ebakainakia etibaha, "Tai tonuatae aina kabakarahi 'abaeana, Baraba 'ao Iesu tuaparina Keriso hauna?"

<sup>18</sup> Pokina Pilato e'iobi haraina Iuda ekia hau apa'uakia hanona Iesu tewamuruaina paunai imanai teutana. <sup>19</sup> Ia bakai imia'aunai emiai aonai atawana 'abi etiu ahina eao herena, "Hau naiana ena beho aha'i hauna herenai taba ha a'i kobabaina, pokina rabi ia anibi aina hanona ao'u earo'ari ki'a baha."

<sup>20</sup> Aonai robe haukia apa'uakia mai Iuda ekia maearima apa'uakia mako tebahi ahinakia Baraba katenoi aina kebakaruhina ia Iesu 'ariai kehorotina. <sup>21</sup> Haeamona Pilato

mako ebakainakia etibaha, "Terarua neiakia tai tonuatae aina kabakarahina?" Ia ena 'abi tebamuena tetibaha, "Baraba."<sup>22</sup> Pilato e'abi etibaha, "Ba Iesu tuaparina Keriso hauna hereinai taba kababaina?" Ikoikiai te'abi tetibaha, "Matiu ibiri ropo 'ubinai kokoko 'auna!"<sup>23</sup> Pilato ebakainakia etibaha, "Aehoma, beho tabana ebabaina?" Ia mo teio aota ki'a tetibaha, "Matiu ibiri ropo 'ubinai kokoko 'auna!"

<sup>24</sup> Pilato e'iorina ena hiabu aba aha'i, weiana 'uri'uri rarina aba kerama. Buonai bei eberi hahana mako wairakiai imana eutunakia etibaha, "Au hau neiana ena 'ari buona a'i ka'arana, wai kipomi emi aro'ari."<sup>25</sup> Maearima ikoikiai te'abi tetibaha, "Ia ena 'ari pumana ai mai nahumai kipokia tamahoaina."<sup>26</sup> Ba Pilato Baraba ebakarahina eao herekia, ia Iesu ebenakia kate'atina matiu ibiri ropo 'ubinai katekoko 'auna.

*Huari Haukia Iesu Tebapo'ona.  
(Mk 15.16-20; Io 19.2-3)*

<sup>27</sup> Kabana hauna ena huari haukia Iesu tea'ina teaoaina Kabamani itunai, ba huari haukia ikoikiai temai tekori kakaiarona.<sup>28</sup> Ia tehore Iesu ena habuni tebakuri ahina ia habuni birona tebabatotona.<sup>29</sup> Aranai kebau'una hauna 'ini boaboi tebahuna aranai tebabau'una. Bitobito ha imana itipanai teba'ina, wairanai tekaipehu tebataeaina tetibaha, "Iuda haukia ekia obia arana e, oi onamo?"<sup>30</sup> Ba te'atotina bitobito tea'i boina, aranai te'ati ba te'ati hao 'ati haona.<sup>31</sup> Tebataeaina epua habuni birona weiana tebakuri ahina, ia ena habuni tohakia tebabatotona. Tebaka'ana matiu ibiri ropo 'ubinai katekoko 'auna.

*Iesu Matiu Ibiriropo 'Ubinai Tekoko'auna.  
(Mk 1.21-32; Lk 23.26-43; Io 19.17-27)*

<sup>32</sup> Huari haukia Iesu tebaka'ana raninai Kurene hauna atana Simonia tetabu ahina tebahi ahina Iesu ena matiu ibiri ropo kebuana.<sup>33</sup> Eka hai tekara'au atana Kolkota. (Anina hanona 'Ara huriakia 'ekana'.)<sup>34</sup> Weia bine beina mai muramura mabina ha ohi tebarai haemiona Iesu tebena keinu, etema hobona mo ia a'i einu.<sup>35</sup> Huari haukia Iesu matiu ibiri ropo 'ubinai tekoko 'auna epua baiatakiai ena habuni pu'ai tebina'a. <sup>36</sup> Weiana murinai temiati mahakia hanona ia teiha 'inina.<sup>37</sup> Iesu arana 'ubinai himau bai'oi 'abina tererena teahu 'auna tetibaha,

**'NEIANA IESU, IUDA HAUKIA  
EKIA OBIA 'ARANA.'**

<sup>38</sup> Rani weianai kakikaki haukia rua Iesu kipokia ha ha ekia matiu ibiri ropo 'ubinai tekoko 'aunakia, ha itipana tainai mai ha awarina tainai.<sup>39</sup> Maearima weia tekabananai haukia arakia tekaiai kaiainakia mai bataeai bataeai 'abikia Iesu herenai tehina,<sup>40</sup> tetibaha, "Oi o'abi marea robe koahu 'iti'itina wapu aihau aonai kobakori muena haumu, oi Tirama nahuna raninai kipomu moba maurini'o, matiu ibiri ropo 'ubinai moriri omai."<sup>41</sup> Robe haukia apa'uakia rauhubu pokia haukia mai Iuda ekia maearima apa'uakia abomo tebataeaina te'abi tetibaha,<sup>42</sup> "Ia maearima baika ebamaurinakia, ia ae-homa kipona a'i nibamaurina? Ia hanona Isaraela ekia obia arana, bariu matiu ibiri ropo 'ubinai meriri emai hanona kaha'ikakaumana."<sup>43</sup> Ia Tirama ea'ikakaumana ba Tirama ia pen-uatae aina raninai bariu meba-maurina, pokina e'abi ia hanona Tirama nahuna."<sup>44</sup> Kakikaki haukia rua matiu ibiri ropo 'ubinai tekoko 'aunakia haukia abomo ua te'abi pahihi aiho ia herenai.

*Iesu Ena 'Ari.  
(Mk 15.33-41; Lk 23.44-49; Io 19.28-30)*

<sup>45</sup> Atiaha hanona wapura rarina hanopaka maikoinai ekaabuna eaomo beraura ebaeno hoana 3. <sup>46</sup> Beraura hoana 3 aonai Iesu eio etibaha, “*Eloi eloi lama sabakatani!*” Anina hanona ‘E'u Tirama e, E'u Tirama e, oi aehoma buonai ohabona'u!” <sup>47</sup> Maeearima baika weia tekoroti aiana teona haukia te'abi tetibaha, “Hau neiana hanona Elia niaparina.”

<sup>48</sup> Beronai 'abakia ha ebeau eao rora'e ha ea'ina bine beina manoinai ehao uhuna, matiuai etiu taeana Iesu keinu. <sup>49</sup> Ia baika te'abi tetibaha, “Mohabona, Elia kemai kebamaurina re'a kahaihana.” <sup>50</sup> Iesu haeamona eio aota ki'a murinai e'ari.

<sup>51</sup> Rani weianai marea robe iaea hurina habunina etapa boana 'ubiai eriri eao mo ba'ai. Kanokau eka'a pihara tepa'a. <sup>52</sup> 'Ari ahana 'urikia tekaikau Tirama ena robe haukia bo'okia te'ari haukia temikiri temauri mauri. <sup>53</sup> Iesu emikiri mue murinai ekia 'ariahakiai tekarahi Ierusalema ai tekatoto mearima bo'okia herekiai tewaira tina. <sup>54</sup> Huari poki hauna ena huari haukia kipokia Iesu te'imana, kanokau eka'a mai taba terama haukia ikoikiai teihanakia raninai teta'u wairai te'abi tetibaha, “Abi tohana hau neiana hanona Tirama nahuna.”

<sup>55</sup> Babi'e bo'ona abomo weia atau'ai tekoroti teihana, weiakia hanona Galilea ai Iesu murinai te'au mai ta'arana tea'i babi'ekia. <sup>56</sup> Baiatakiai hanona Maria Magdalena babi'ena mai Maria ha Iakobo Iosepa ohi hinakia mai Sebedeo nahuna rua hinakia.

*Iesu Tehorena.*  
(Mk 15.42-47; Lk 23.50-55; Io 19.38-42)

<sup>57</sup> Rabirabi weianai kepu hauna ha emai atana Iosepa Arimatea hauna ia abomo Iesu te'abana hauna ha. <sup>58</sup> Ia Pilato herena eao ba Iesu hauanina enoaina, Pilato 'abi ebaiben'i weiana Iesu hauanina Iosepa katebena. <sup>59</sup> Weiana Iosepa Iesu hauanina ea'i obona, habuni mahamahana

namonai e'apana. <sup>60</sup> 'Ariahana mahamahana pihara ekuina ia kipona 'euna hauna aonai eholena, pihara apa'uana ha ebaherena eao pa'abina ebahu abuna ba eka'a. <sup>61</sup> Maria Magadala babi'ena 'abana Maria ha ohi hanona weia 'ariahana abihanai temati teihana.

### *Huari Haukia 'Ariahana Te'imana.*

<sup>62</sup> Erani raurani beraura robe-nai robe haukia apa'uakia mai Parisea haukia teao Pilato herena, <sup>63</sup> te'abi tetibaha, “Hau apa'uana e, ai bai'oi hauna weiana maurinai emiaho aonai ena 'abi ehinana hauna taraona 'inina etibaha, 'Wapu ibaihaunai kamikiri mue.’ <sup>64</sup> Ua buonai 'abi kobaiben'i 'ariahana kate'ima haraina keao mo wapu ibaihaunai. Pokina a'i enamo, i'abana haukia kateao Iesu hauanina katebainao aina ba mearima haiakiai kate'abi 'Ia hanona 'ari haukia baiatakiai aba emikiri mue.' Bai'oi neiana muriai hauna atetuana keki'a wairai ba 'uaina hauna.” <sup>65</sup> Pilato ehinabenakia etibaha, “Bai'ima haukia tomoaoainakia, 'ariahana kate'ima haraina.” <sup>66</sup> Ua buonai teao 'ariahana ikaabuna piharana tekaabu haraina ahanai rauhubu mani'ana tehorotina, ba 'ima'ima haukia weia tehabona kateiha 'inina.

## 28

*Iesu 'Ariai Emikiri Mue.*  
(Mk 16.1-10; Lk 24.1-10; Io 20.1-18)

<sup>1</sup> Beraura robe eore murinai hui beraurana koriuaina raurani amarinai, Maria Magadala babi'ena mai Maria ha ohi teao 'ariahana kateihana.

<sup>2</sup> Rani weianai kanokau rarina 'akina eka'a aonai Obiapaka ena aneru ha kupai eriri emai 'ariahana pa'abina piharana ebahere parena ahanai emia'au. <sup>3</sup> Ia hauna ea obo matoha 'imare 'abana ena habuni temore wairai matoha 'auhao porena 'abana. <sup>4</sup> 'Ariahana

te'imana haukia aneru teihana raninai tet'a'u ki'a te'ururu aokia terea te'eho matoha te'ari.

<sup>5</sup> Ia aneru hanona babi'e ehina benakia etibaha, "A'i tomota'u, au a'io bina wai Iesu matiu ibiri ropo ubinai tekoko 'auna hauna tutabuna." <sup>6</sup> Ia hanona neia aha'i. Ia hanona aba emikiri 'uainai ehinabenimi ihobona. Tomai enoti 'ekana tomoihana. <sup>7</sup> Ba tomoao biai i'abana haukia katohina benakia, 'Ia hanona 'ari haukia baiatakiai aba emikiri mue ba aba ne'uai niao Galilea, weia katoihana.' 'Abi neiana kabeni mimi paunai amai.'

<sup>8</sup> Ua buonai babi'e 'ariahanai tekarahi noanoa mai ta'ukia mai aonamokia tebeau i'abana haukia herekia katehina benakia. <sup>9</sup> Taearai tiao aonai Iesu kipokia tebaitabu ahi. Ehinabenakia etibaha, "Raurani namona!" Ba teao herena te'umuti aena tea'i to'o tekutiaina. <sup>10</sup> Ba Iesu ehina benakia etibaha, "A'i tomota'u, katoao uaho'aba'u katohina benakia kateao Galilea ua'a kateihana'u."

### *'Ariahana Te'imana Haukia Ekia 'Abi.*

<sup>11</sup> Babi'e taearai teka'a teao aonai, huari haukia 'ariahana te'imana haukia baika temue aiara apa'uana teao taba terama haukia poukia ikoikiai robe haukia apa'uakia herekiai tehinanakia. <sup>12</sup> Robe haukia apa'uakia hanona Iuda ekia maearima apa'uakia kipokia tet'o'u te'abi'abi ekia raona tebakorina huari haukia welakia moni rarina ha tebenakia, <sup>13</sup> ba tehina benakia tetibaha, "Wai kato'abi katotibaha, 'Tabana haukia rabi taparua rea aonai temai Iesu hauanina tebaina o aina.' <sup>14</sup> Pou neiana Kabana hauna keona raninai ai kataba'amena, aona kataba kabanaina keraonana wai hanona emi ki'a aha'i, abomo taba ha aomi a'i kebaro'arina." <sup>15</sup> Huari haukia moni tea'ina ba tehina benakia ihobona tebabaina. Ua buonai 'abi neiana Iuda haukia baiatakiai tehina otaraina rani weianai emai mo bariu.

*Iesu I'abana Haukia Herekiai Ewaira Tina Aka Ebenakia.  
(Mk 16.14-18; Lk 24.36-49; Io 20.19-23; Ih 1.6-8)*

<sup>16</sup> Ba i'abana haukia harau haea hamomo teao Galilea Iesu ehina benakia oeona teao. <sup>17</sup> I'abana haukia ia teihana raninai tekuti aina, 'a baika hanona aokia tekai'au kai'au. <sup>18</sup> Iesu eka'a ha ha eao herekia ba ehinabenakia etibaha, "Tirama ehore hiabu ikoinai kupai mai hanopakai hauna aba ebena'u. <sup>19</sup> Ua buonai katoao itubu ikoikiai maearamakia herekia i'aba'u haukiai katobaonakia, katoba'uere robenakia Hamana Nahuna mai Aub'a Robe atakiai, <sup>20</sup> ahinabenimi 'abikia ikoikiai katoba 'iobinakia kateka'ainakia. Tomobahu, au hanona rani ikoinai wai heremai keao mo hanopaka kepua."

## Pou Namona MAREKO Ererena Hauna

### Puka Aona Irerena 'Abina

Pou namona neiana Mareko ererena, ena 'abi kori'uakia aokia na e'abi aiho, "Iesu Keriso Tirama Nahuna Pou'a Namona." Puka neiana aonai hanona kaha'iobina Iesu hanona mai ena hiabu taba ikoikiai kebabainakia. Maearima nibamarerenakia ranikiai, auba ki'a obokia neu'u ahinakia ranikiai, mai maearima ekia ki'a nehina haonakia ranikiai ena hiabu hanona kahaihana. Iesu kipona eaparina Maearima Nahuna, ia emai kipona kebaibeni aina maearima ikoikiai kekawa muenakia ki'a herenai katerubu 'abaea paunai.

Mareko kipona ena nuatae 'abina hanona bo'ona a'i nehinana, ia beronai Iesu ena aka pou'a nehinana. Kori'uaina Mareko ehore Ioane ba'uere robe hauna robana eahuna, mai Iesu aea e'uere robe aiho mai Satani ia ehobona hauna robaha eahuna. Ba Iesu ehore maearima weiakia puma bo'ona tebunakia haukia eaoko'o ainakia, ba ebamaurinakia mai ebamarere harainakia. Popounai hanona murinai ti'au haukia Iesu taba nibabai obokia a'i teobo, iamo mai aiaunukia ia kipokia tekaoao haeamo eaomo te'iobi haraina. Weiakia ia ti'oatana haukia ekia opuere hanona eao eapa'ua hao apa'ua hao. Puka neiana puuanai hanona Iesu ena 'ari mai ena mikiri mue robakia eahuna.

### Puka Paipana Apa'uakia

- Pou namona ia'i ramana. (1.1-13)
- Iesu ena aka maearima herekiai Galilea aonai. (1.14-9.50)
- Galilea eaomo Ierusalema. (10.1-52)
- Hui orena Ierusalema hereinai mai aonai. (11.1—15.47)
- Iesu ena mikiri mue. (16.1-8)

- Obiapaka ena waira tina mai ena kara'au kupa. (16.9-20)

### Ba'uere Robe Hauna Ioane Eiroro.

(Mt 3.1-12; Lk 3.1-18; Io 1.19-28)

<sup>1</sup> Tirama Nahuna Iesu Keriso pou'a namona kori'uaina hanona neiana. <sup>2</sup> Isaia mahabanai hauna ererena etibaha, "Tirama e'abi, 'E'u iuhubeau hauna ɣauhu 'uaina kewahi heremu, emu taeara kea'ia'i haraina.'

<sup>3</sup> Aia ha hano'akunai neio netibaha,  
'Obiapaka ena taeara tomoba'oruna.  
Ena kaoao boana tomobaberona.'"

Mal 3.1

<sup>4</sup> Ua buonai Ba'uere robe hauna Ioane hano'akunai ewaira tina, eba'uere robe mai eiroro etibaha, "Emi ki'ai tomoraona kabe, kato'uere robe, Tirama emi ki'a kehina haonakia."<sup>5</sup> Maearima bo'ona Judea hanonai mai Ierusalema haukia ikoikiai teao Ioane Ba'uere robe hauna aiana teona, ekia ki'a tehina pou, abomo Ioridana atenai eba'uere robenakia.

<sup>6</sup> Ioane habuni ebatotona hauna hanona Kamela buirana. Huana 'apana hanona Poromakau paruna, ena aniani hanona pekaupekau mai hoho beina. <sup>7</sup> Na eiroro aiho maearima wairakiai. "Hau ha au muri'uai kemai hauna eapa'ua ki'a baha ba au. Au hanona a'i anamo kakuti, ena tamaka warona irubunai abomo a'i etaina'u. <sup>8</sup> Au wai beiai naba'uere robenimi, 'a ia hanona Auba Robeai keba'uere robenimi."

### Iesu E'uere Robe Mai Satani Ehobona.

(Mt 3.13; 4.11; Lk 3.21-22; 4.1-13)

<sup>9</sup> Rani weianai Iesu Nasareta Galileai emai. Ioane ehore eba'uere robena Ioridana atenai. <sup>10</sup> Iesu beiai ekara'au raninai, kupa epa'a eihana Auba Robe eriri ia ahanai ihana matoha rauria.

Isa 40.3

<sup>11</sup> Abomo aia ha kupai emai etibaha, "Oi hanona Au Naha'u, e'u raona'au. Au oi naonamoai ki'a bahani'o."

<sup>12</sup> Rani a'i ehoma'a muri-nai Auba Robe Iesu eaoaina hano'akunai. <sup>13</sup> Iesu weia emiaho wapu bariabui, Satani ia eholona, 'aki tabakia kipokia temiaho, ba aneru temai tebaraina.

*Iesu Ba'eha Haukia Bani Eaparinakia.*

(Mt 4.12-22; Lk 4.14-15; 5.1-11)

<sup>14</sup> Ioane Ba'uere robe hauna wapura itunai tekaibuna muri-nai, Iesu hanona eao Galilea ai Tirama ena pou namona eiroro aina. <sup>15</sup> Etibaha, "Abi'uai ranina tohana abekara'au, Tirama ena obia aiarana aba ekaibari, emi ki'ai tomoraona kabe, Pou Namona tomo a'ikakaumana."

<sup>16</sup> Iesu hanona Galilea 'obu poena 'ekana eao raninai, Simona mai hatina Anderea ohi eihanakia, re'e 'obuai tehorena, pokina terarua hanona ba'eha haukia. <sup>17</sup> Iesu ehina benakia etibaha, "Muri'uai tomai, au kahore wai maearima iba'ehakia kaba 'iobinimi." <sup>18</sup> Beronai mo ekia re'e tehabonakia murinai teao.

<sup>19</sup> Ia ekataeana eao Sebedeo nahuna Iakobo mai hatina Ioane ohi eihanakia ahiai ekia re'e tia'ia'i harainakia. <sup>20</sup> Ba Iesu beronai terarua eaparinakia, hamakia Sebedeo mai teba'eha oioi miorikia ahiai tehabonakia murinai teao.

*Iesu Hau Ha Aonai Auba Ki'a Obona Eu'u Ahina.*

(Lk 4.31-37)

<sup>21</sup> Iesu mai i'abana haukia kipokia teao Kaperanauma aiaranai. Beraura Robeai Iesu hanona Iuda haukia ekia marea aonai ekatoto ena ba'iobi ea'i ramana. <sup>22</sup> Maearima weiakia ena ba'iobi 'urukia teo'o raninai teta'u ta'u huri, pokina ena ba'iobi hanona mai hiabukia, rauhubu poki haukia 'abakia aha'i.

<sup>23</sup> Weia hanona hau ha aonai auba ki'a obona etoto hauna marea aonai eio etibaha, <sup>24</sup> "Iesu

Nasareta haumu e! Taba here-maiai kobabaina, Oi ai koa'i ki'anamai paunai omai, u? Au oi a'io bin'i'o, oi hanona Robe haumu Tirama ea'i taeani'o."

<sup>25</sup> Iesu auba ki'a obona ehina bena etibaha, "Mounu hau naiana aonai mokarahi."

<sup>26</sup> Auba ki'a obona hau weiana eba'ururu ki'ana, mai ioiona hau weiana aonai ekarahi.

<sup>27</sup> Maearima weia ikoikiai teta'u ta'u huri, ha ha kipokia tebakai bakai, tetibaha, "Neiana taba? Ba'io bi mo mahamahana ha mai hiabuna. Auba ki'a obokia nehina benakia hanona aiana tionia."

<sup>28</sup> Ua buonai Iesu pouna Galilea hanona maikoinai tehina otaraina.

*Iesu Maearima Bo'ona Ebamanakia.*

(Mt 8.14-17; Lk 4.38-41)

<sup>29</sup> Iesu i'abana haukia Ioane mai Iakobo kipokia marea tehabona berokiai teao Simona mai Anderea ekia ituai. <sup>30</sup> Simona rawana babi'ena einawa, hauna ehiabu ena ituai enoti. Iesu emai raninai, haianai ena inawa pouna tehnana. <sup>31</sup> Iesu eao ia herena, imanai ea'i ebaraina eberi korina. Ena hau hiabu eore, babi'e emikiri ekia aniani ebabai.

<sup>32</sup> Beraura ekaihuna rabirabinai inawa haukia mai maearima aokiai auba ki'a obokia temiaho haukia teaoainakia Iesu herena.

<sup>33</sup> Aiara maearimakia ikoikiai temai itu weiana wairanai teto'u.

<sup>34</sup> Inawa haeai haeai haukia bo'okia Iesu ebanamonakia, haeamona auba ki'a obokia bo'ona eu'u ahinakia, 'a auba ki'a obokia hanona Iesu te'io bina buonai ekaiabunakia a'i kate'abi.

*Iesu Galileai Eiroro.*

(Lk 4.42-44)

<sup>35</sup> Raurani wapurana, a'i nirani baha aonai Iesu emikiri itu ehabona, eao 'eka 'abaeana ha, ua'a ehabuba'ari.

<sup>36</sup> Ba Simona 'abana kipokia tekarahi itabuna teao.

<sup>37</sup> Weia tetabu ahina ba tehina bena tetibaha, "Maearima ikoikai hanona oi titabuni'o."

<sup>38</sup> Ia Iesu ekia 'abi ebamuena etibaha, "Aika hamaeao aiara

herekai haukia, aokiae abomo kairoro, aka weiana hauna paunai amai.”<sup>39</sup> Iesu hanona Galilea aona maikoina ekana, Iuda haukia ekia marea aokiae eiroro mai auba ki'a obokia maearima aokiae haukia eu'u u'u ahinakia.

### *Iesu Morumoru Hauna Ebana-mona.*

(Mt 8.1-4; Lk 5.12-16)

<sup>40</sup> Morumoru hauna ha emai Iesu wairanai ekai pehu, enoina etibaha, “Ponuatae raninai, poba-maurina'u.”<sup>41</sup> Iesu ehore eaoko'o aina, abomo etara ea'i 'apuana, ehina bena etibaha, “E. Au nanuatae konamo. Haumu men-am!”<sup>42</sup> Rani hamona morumoru hanona hau weiana ehabona, hauna enamo.<sup>43</sup> Iesu hau weiana euhuna aonai eharabuna etibaha,<sup>44</sup> “Aia'u nona, hau ha haianai a'i ko'abi 'apua. Beronai koao, Robe hauna herena, haumu keihana. Mose ena rauhubu ihobona, onamo hanona beruberuna Tirama herenai kobaiben, oi emu namo ibatohana.”<sup>45</sup> 'A hau weiana eao 'eka ikoinai ena namo pouna ekikipa otaraina. Ena kikipa weiana buonai Iesu hanona aiara aokiae a'i ekatoto. 'A 'eka 'abaeakiae mo emiaho, 'eka haeai haeai maearimakia hanona teao herena.

## 2

### *Iesu Mero Hauna Ebamikirina.*

(Mt 9.1-8; Lk 5.17-26)

<sup>1</sup> Wapu baika teore muri-nai Iesu haeamona emue eao Kaperanauma aiarana, maearima pouna teona ia hanona ituai.<sup>2</sup> Maearima bo'ona 'akina temai teto'u itu ebonu 'auna, 'eka hana ha a'i emiaho eao mo pa'abi 'akonai epua, ba Iesu neiroro aiana tiona.<sup>3</sup> Hau bani hanona mero hauna ha tebuana teaoaina.<sup>4</sup> Maearima ebo'o ki'a baha buonai, hau weiana kateaoaina Iesu herenai hanona a'i etaina. Ua buonai Iesu 'arana paipana kapeheneai 'erere ha tebabaina. Mero hauna mai 'irena weia

tebaririna eao Iesu wairanai.<sup>5</sup> Iesu ekia a'ikakauma weiana eapa'ua ki'a baha eihana buonai, mero hauna ehina bena etibaha, “Naha'u e! Emu ki'a aba ihina hao.”

<sup>6</sup> Rauhubu poki haukia baika weia temiati, kipokia teraona raona.<sup>7</sup> “Taba buonai hau neiana na ni'abi aiho? Ia Tirama herenai ni'abi ki'a. Tirama mo kipona ki'a kehina haonakia.”<sup>8</sup> Iesu abahamo aokia e'lobina, ba wairakiae e'abi, etibaha, “Taba buonai 'abi neiana turaonana?”<sup>9</sup> Ki'a ihina hao 'abina hanona e'ama'ama, a'i tubatohana re'a, bariu hau neiana kahina bena kemikiri keka'a katoihana.<sup>10</sup> Ba katobatohana, au Maearima nahuna hanona mai hiabu'u hanopakai ki'a kahina haonakia.” Ba mero hauna ehina bena etibaha,<sup>11</sup> “Au oi nahina beni'o. Omikiri, emu 'ire moa'i taeana, moka'a emu itu!”<sup>12</sup> Maearima wairakiae emikiri, ena 'ire eouna ea'i taeana eka'a. Ikoikiae teta'u ta'u huri, Tirama tebanamona tetibaha, “Aika hoa ɣahomana ha a'i haiha 'apuana.”

### *Iesu Lebi Eaparina.*

(Mt 9.9-13; Lk 5.27-32)

<sup>13</sup> Iesu haeamona emue eao Galilea 'obu poena. Maearima bo'ona 'akina temai herena ba eba'lobinakia.<sup>14</sup> 'A ia eka'a eao aonai, takiti a'i hauna Lebi Alepeo ena aka 'ekanai emiati eihana, Iesu ia ehina bena etibaha, “Muri'uai omai!” Lebi beronai mo emikiri murinai eao.

<sup>15</sup> Lebi ena ituai aniani 'ekanai temiati, takiti a'i haukia mai ki'a haukia bo'okia Iesu mai i'abana haukia kipokia teani-ani, pokina mako Iesu muri-nai teka'a.<sup>16</sup> Rauhubu poki haukia Parisea itubunai temai Iesu ki'a haukia mai takiti a'i haukia kipokia teaniani haeamo teihankia raninai, i'abana haukia tebakainakia tetibaha, “Taba buonai Iesu maearima uahomakia kipokia tianiani haeamo?”<sup>17</sup> Iesu aiakia eona raninai, ekia 'abi

ebamuenakia etibaha, "Maearima a'i teinawa haukia hanona muramura baibeni hauna a'i tenuatae aina, 'a inawa haukia mo tenuatae aina. Au aka bero haukia paukiai a'i amai, ia au hanona ki'a haukia paukiai amai."

*Anirobe Bakai bakaina.*  
(Mt 9.14-17; Lk 5.33-39)

<sup>18</sup> Rani ha ba'uere robe hauna Ioane i'abana haukia mai Parisea haukia hanona teani robe. Ua buonai maearima baika temai Iesu tebakaina tetibaha, "Ba'uere robe hauna Ioane i'abana haukia mai Parisea haukia i'abakia haukia tiani robe, 'a oi i'abamu haukia aehoma buonai a'i tiani robe?" <sup>19</sup> Iesu ekia 'abi ebamuena, etibaha, "Tomoraona haraina! Hawainibe mahamaha hauna ena baki haukia aonamo weiana aonai hanona aea kateani robe aiho? Aha'i baihana! Kipokia temiaho oioi hanona a'i kateani robe. <sup>20</sup> A rani kemai aonai hawainibe mahamaha hauna herekiae katea'i parena. Ua raninai ia abomo kateani robe.

<sup>21</sup> Habuni mahamahana puapuana ha habuni 'ai'aina marana a'i kehuri abuna, pokina habuni mahamahana puapuana keberi o'onaina habuni 'ai'aina ketapana. Mara rarina kerama. <sup>22</sup> Abomo bine mahamahana beibei 'ai'ainai a'i kebaharuna, pokina bine mahamahana kehore beibei 'ai'aina kebua 'iti'itina, bine mai beibei ohi kateki'a haeamo. Ua buonai bine mahamahana hanona beibei mahamahanai mo katebaharuna."

*Beraura Robe Obiana.*  
(Mt 12.1-8; Lk 6.1-5)

<sup>23</sup> Beraura Robenai Iesu Witi umanai ekabanai, i'abana haukia ka'akiai Witi buakia terurunkia teani. <sup>24</sup> Parisea haukia hanona Iesu tehina bena tetibaha, "Moihana! Taba buonai oi i'abamu haukia hanona Beraura Robe rauhubuna tia'i ki'ana?"

<sup>25</sup> Iesu ekia 'abi ebamuena etibaha, "Davidia ena maearima kipokia rani weianai mare'a te'ari, emikiri taba ebabaina

hauna pouna a'i totuabi 'apuana?  
<sup>26</sup> Abiata Robe hauna ena raniai, Davida emikiri eao Marea Robeai parawa robe weia robe haukia kateani hauna eani, baika ena maearima ebenakia teani."

<sup>27</sup> Iesu haeamona ehinabe muenakia etibaha, "Tirama ehore Beraura Robe ebabaina hanona maearima ena namo paunai, ia maearima hanona Beraura Robe paunai a'i ebabaina. <sup>28</sup> Ua buonai Maearima Nahuna hanona Beraura Robe abomo keobia aina."

### 3

*Hau Ha Imana Ekobekobe.*  
(Mt 12.9-14; Lk 6.6-11)

<sup>1</sup> Iesu haeamona emue eao Iuda haukia ekia mareai ekatoto, weia hanona hau ha imana kobekobena eihana. <sup>2</sup> Maearima baika aba weia Iesu te'itimana beho ha kebabaina re'a katehana, hau weiana kebamaurina Beraura Robeai hanona behoai katehorotina. <sup>3</sup> Iesu ima kobekobe hauna ehina bena etibaha, "Momikiri, omai na'a maearima wairakiai." <sup>4</sup> Iesu ehore maearima ebakainakia etibaha, "Eka Rauhubu taba e'uhina kahababaina Beraura Robeai? Namo kahababaina 'ao ki'a kahababaina? Maearima kahaba maurina 'ao kahaba'arina?" Weia hanona taba ha a'i tehinana, a'i aia aiakia. <sup>5</sup> Iesu mai opuerena eihia 'ini'ininakia, haeamona eaoko'o ainakia, pokina ekia aopahihi paunai. Ima kobekobe hauna ehina bena etibaha, "Imamu motiu pahihina!" Imana etiu pahihina hanona beronai enamo. <sup>6</sup> Ua buonai Parisea haukia mareai tekarahi, beronai teao Heroda titaina haukia kipokia teto'u, Iesu iahu'arina taearana terobahu aina.

*Mako Iesu Murinai Teao.*

<sup>7</sup> Iesu i'abana haukia kipokia tekarahi teao Galilea 'Obuna hanona mako rarina Galileai murikiae teao. <sup>8</sup> Abomo maearima Iudeai, Ierusalemai, Idumeai, Ioridana ate abirana taetana

haukia, Turo mai Sidono haukia abomo temai, ena poki hanona Iesu hoa weiakia ebabai poukia teo'o paukiai.<sup>9</sup> Mako rarina 'akina buonai, Iesu i'abana haukia ehina benakia ahi ha kateba'oruna, maearima taeara a'i temekaikai abuna marikina.<sup>10</sup> Iesu maearima bo'ona 'akina ebamaurinakia buonai, inawa haukia taeara tetabu hanona tebaituaina, Iesu katea'i 'apuana na tehma. <sup>11</sup> Abonomo aokiai auba ki'a obokia temiaho haukia Iesu teihana raninai, temai wairanai te'eho teio tetibaha, "Oi hanona Tirama Nahuna!"<sup>12</sup> 'A Iesu hanona auba ki'a obokia eharabunakia, pouna a'i katehinana ia hanona tai.

*Iesu Iuhubeau Haukia Harau Haea Rua Etina'anakia.  
(Mt 10.1-4; Lk 6.12-16)*

<sup>13</sup> Iesu oeoai ekara'au enuatae ainakia haukia eaparinakia, teao herena.<sup>14</sup> Haukia harauhaea rua ea'i taeanakia, atakia ehinana Iuhubeau haukia, ia kate'abana, keuhu ahinakia kateiroro,<sup>15</sup> abomo hiabu kebenakia auba ki'a obokia kate'u ahinakia.<sup>16</sup> Harauhaea rua haukia neiakia. Simona (Iesu ata ibaruana ebena Petero),<sup>17</sup> Sebedeo nahuna Iakobo, hatina Ioane ohi (Iesu ata ebenakia hanona Boanere, anina hanona 'Kupa niro'u nahuna.')<sup>18</sup> Anderea, Pilipo, Batolomeo, Mataio, Toma, Alepeo nahuna Iakobo, Tadeo, Simona Kanana hauna,<sup>19</sup> mai Iuda Kariote hauna Iesu hinahinana ehinahina hauna.

*Iesu Mai Belesebulo.  
(Mt 12:22-32; Lk 11.14-23; 12.10)*

<sup>20</sup> Iesu ituai etoto, maearima haeamona teto'u mue, i'abana haukia kipokia kateanianai hanona a'i etaina.<sup>21</sup> Hatia'ana pouna teona raninai teao katebaka'ana, pokina maearima te'abi ia hanona nibeau 'ari.

<sup>22</sup> Rauhubu poki haukia baika Ierusalemai temai haukia te'abi

tetibaha, "Auba ki'a obokia ekia poki hauna Belesebulo Iesu aonai etoto, hiabu ebena, auba ki'a obokia neu'u ahinakia."<sup>23</sup> Ua buonai Iesu eaparinakia temai herena 'abi ibabataiai ehina benakia etibaha, "Aea homanai Satani hanona Satani keu'u ahina?"<sup>24</sup> Hanopaka ha kipona kebapa'ana ba terarua katehuari raninai, hanopaka weiana hanona a'i kekori 'ini 'apua.<sup>25</sup> Itubu ha abomo kipona kebapa'ana ba kate'au raninai, itubu weiana abomo a'i kekori 'ini.<sup>26</sup> Satani abomo ena itubu kebapa'ana ba kipokia katehuarinakia raninai, ena itubu a'i kekori 'ini, ia kepua.

<sup>27</sup> Hau ha a'i kehore tabura hauna ena itu a'i ketoto 'apua, ena itu kepukia a'i kebainaoai 'apua, keao mo ia kebiri 'uaina ba ena itu tabakia kebainao ainakia.

<sup>28</sup> 'Abi tohana mo au wai nahina benimi, Tirama hanona maearima ekia ki'a ikoikiai abomo ekia 'abi ki'a obokia ikoikiai kehina haonakia mai taeearana.<sup>29</sup> 'A hau ha Auba Robe herenai ke'abi ki'a hauna ena ki'a a'i kehina hao 'apuana kemiaho keao mo banai banai."<sup>30</sup> Iesu ua e'abi aiho, pokina baika tetibaha, "Ia aonai hanona auba ki'a obona nemaho."

*Iesu Hinana Mai Hatina.  
(Mt 13.1-9; Lk 8.4-8)*

<sup>31</sup> Ba Iesu hinana mai hatina temai atapakai tekoroti, 'abi mo teuhuna eao herena.<sup>32</sup> To'u raringa 'akina Iesu temia kaiaronia haukia tehina bena tetibaha, "Oi hinamu mai hatimu hanona atapakai, tenuatae aini'o."<sup>33</sup> Iesu ekia 'abi ebamuena etibaha, "Tai hanona au hina'u mai hati'u?"<sup>34</sup> Iesu maearima temia kaiaronia haukia eihanakia ba ehina benakia etibaha, "Neiakia hanona au hina'u mai uaho'aba'u.<sup>35</sup> Tirama ena nuatae akakia tibabai haukia hanona au uaho'aba'u, haibu'u mai hina'u."

**4**

*'Abi Ibabataina Batobato Hauna.*

(Mt 13.1-9; Lk 8.4-8)

<sup>1</sup> Iesu haeamona eao Galilea 'obu poenai eba'iobi mue. To'u rarina 'akina teao herena tekori abuna buonai, Iesu ahi ha ahana iekara'au emiati. Ahi papana ekaraha 'apua 'ourai, to'u haukia ikoikiai hanona poeai tekorina. <sup>2</sup> Iesu hanona taba bo'okia 'abi ibabataiai to'u haukia eba'lobinakia.

Ena ba'iobi aonai na e'abi aiho. <sup>3</sup> "Tomobahu. Biraura hauna ha eao ena uho kebatonakia. <sup>4</sup> Ia uho umai ekapo kapo otarainakia aonai, baika hanona taearai te'eho, ba roborobo temai teani orenakia. <sup>5</sup> Baika hanona bohuai te'eho, te'omu noanoa, pokina 'ano enibinibi 'aki. <sup>6</sup> Ia beraura etae eraranakia hanona tepaea te'ororo, pokina ramukia a'i teriri harai. <sup>7</sup> Baika hanona awa 'ini'inikia aokiae te'eho. Te'omu, ia awa 'ini'inikia tet'a ta'a abunakia buonai, a'i tebua'a. <sup>8</sup> Haeamona baika hanona hano namonai te'eho, ba te'omu harai tebua'a, baika buakia harau aihau, baika imabui harau haea, mai baika hinabu hamomo." <sup>9</sup> Abi puuanai Iesu ehina benakia etibaha, "Mai haiana hauna hanona aia keona."

*Iesu 'Abi Ibabataiai E'abi Ena Poki.*

(Mt 13.10-17; Lk 8.9-10)

<sup>10</sup> Iesu eikupai aonai, i'abana haukia harau haea rua mai maearima baika murinai ti'au haukia kipokia teao herena tebakaina 'abi ibabatai anikia kehina harainakia. <sup>11</sup> Iesu ehina benakia etibaha, "Tirama ena obia aiarana 'abikia bunikia hanona wai heremai tewaira tina harai, 'a kapeai temiaho haukia taba ikoikiai hanona 'abi ibabataiai mo nahina benakia. <sup>12</sup> Ua buonai, 'Teihana ia a'i mo te'iha tinana, abomo tibahu aia tiona ia a'i mo te'iobina.

Pokina a'i temeraona kabe, Tirama ekia ki'a a'i mehina

haonakia marikina.'"

Isa 6.9, 10

*'Abi Ibabataina Anina.*  
(Mt 13.18-23; Lk 8.11-15)

<sup>13</sup> Iesu haeamona ebakainakia etibaha, "Abi ibabataina 'ama'amana neiana a'i to'lobina, u? Ba 'abi ibabatai baika hanona aea kato'obi aihonakia. <sup>14</sup> Biraura hauna uho weiana ekapo kapo otaraina hanona Tirama ena 'abi ekapo kapo otaraina. <sup>15</sup> Uho

weiakia taearai te'eho hanona maearima baika 'abana Tirama ena 'abi 'uruna tiona, ia Satani nimai hanona nia'i parenakia. <sup>16</sup> Uho weiakia bohuai te'eho hanona Tirama ena 'abi 'uruna tiona mai aonamokia tia'i taea noanoana haukia 'abana. <sup>17</sup> A ramukia a'i teriri harai 'ano aonai buonai, rani papana mo katemiaho, ba Tirama ena 'abi paunai kate'oatanakia 'ao kateba hiaranakia raninai, kate'eho.

<sup>18</sup> Uho weiakia awa 'ini'inikia aokiae te'eho haukia hanona maearima baika 'abana Tirama ena 'abi uruna tiona. <sup>19</sup> A hanopaka ena aoaro'ari mai kepu inuataekia tihore Tirama ena 'abi aokiae haukia tia'i parenakia. Ua buonai buakia hanona aha'i. <sup>20</sup> A uho weiakia hano namonai te'eho hanona maearima Tirama ena 'abi 'uruna tiona mai aokiae tia'i taeana, buakia tirama baika hanona harau aihau, baika imabui harau haea, baika hinabu hamomo."

*Ramepa Ihao 'Auna 'Ekanai Ke-hao 'Auna.*

(Lk 8.16-18)

<sup>21</sup> Iesu haeamona ehina benakia etibaha, "Hau ha ramepa keba'arana raninai, uro aonai a'i keutana 'ao maua aonai a'i keutana. 'A ramepa ihao 'auna 'ekana tohanai kehao 'auna.

<sup>22</sup> Pokina taba tebuni haukia ikoikiai katewaira tina, abomo tehore buni tabakia ikoikiai hanona katekarahi, taba ha a'i kebuni 'apua. <sup>23</sup> Mai haiana hauna hanona aia keona."

<sup>24</sup> Haeamona ehina benakia etibaha, "Tuo'o 'abikia hanona to-moraona harainakia. Emi baiben ihibokiae mo Tirama kebenimi, haeamona weiakia ahakiae harua kehore 'au. <sup>25</sup> Pokina mai ena taba hauna ahanai kehore 'auna kebena, 'a herenai ha aha'i hauna hanona 'eunai papana nemiaho hauna abomo kea'i obona."

*'Abi Ibabataina Uho E'omu.*

<sup>26</sup> Iesu e'abi etibaha, "Tirama ena obia aiarana hanona na-homana, hau ha uho umai ekapo kapo otaraina. <sup>27</sup> Hau weiana rabi eparua mararani emiaho, ia uho hanona te'omu tehulu, a'i e'lobina aea te'omu aiho. <sup>28</sup> Hano kipona anina ebaramana, uho eba'omuna, hubuna etae erewa, ba murinai buana ebaramana. <sup>29</sup> Buana ekiro iarina beraurana etaina raninai, biraura hauna ena akiua ea'ina eao, earina."

*'Abi Ibabataina Tuaba Uhona.*

(Mt 13.31-32; Lk 13.18-19)

<sup>30</sup> Iesu haeamona e'abi mue etibaha, "Tirama ena obia aiarana hanona tabai kahababataina? Ori tabanai 'abi ibabatai kahabaihobona? <sup>31</sup> Tirama ena obia aiarana hanona matoha tuaba uhona 'abana, uho ikoikiae baiatakiae hanona ia mo pa-pana 'aki, ba 'anoai ebatona, <sup>32</sup> muriai ia e'omu raninai, aniani matiukia ikoikiae eberenakia, abomo eapa'ua ki'a. Ia rena rarikia tekarahi, 'ubi roborobokia ikoikiae temai 'arunai tiarai."

<sup>33</sup> Iesu hanona maeearima weiakia ekia 'obi ihibonai 'abi ibabatai bo'okia eba'lobinakia. <sup>34</sup> 'A ia 'abi ibabatai ai mo ehina benakia, 'abana haukia kipokia teikupai hanona 'abi anikia eba'obi harainakia.

*Iesu Baura Mai Roio Eba'omatanaka.*

(Mt 8.23-27; Lk 8.22-25)

<sup>35</sup> Beraura weiana mahabu mahabunai Iesu 'abana haukia ehina benakia etibaha, "Hamakabanai hamaeao 'obu abirana." <sup>36</sup> 'Abana haukia to'u tehabona teao, ahi weiana Iesu emia'au aina haunai

tehe'au kipokia teao. Ahi baika abomo murikiae teao. <sup>37</sup> Baura rarina 'akina eabu 'au, roio emikiri bei ahi aonai etoto, hereka 'akinai pateuhu. <sup>38</sup> Iesu hanona ena iuna eunana ahi murinai enoti eparua. I'abana haukia teao herena, tebaona tetibaha, "Ba'iobi haumu e, aika kahatono hauna a'i nuraonana?" <sup>39</sup> Iesu emikiri baura erikena haeamona roio ehina bena etibaha, "Tomo'oro!" Baura e'oro, roio abomo e'omata. <sup>40</sup> Weiana Iesu i'abana haukia ebatanakia etibaha, "Aehoma na tutau aiho? Emi a'ikakauma niahai oho mo?" <sup>41</sup> 'A ia ikoikiae tutau ki'a, tebaimai aina, tetibaha, "Nahuna tai? Baura mai roio abomo aiana tional!"

## 5

*Iesu Hau Ha Aonai Auba Ki'a Obokia Eu'u Ahinakia.*

(Mt 8.28-34; Lk 8.26-39)

<sup>1</sup> Iesu i'abana haukia kipokia tekabanai 'obu abirana teao, Gerasa hanonai tekara'au. <sup>2</sup> Rani weianai Iesu ahiai eriri hanona, hau ha auba ki'a obokia aonai temiaho hauna 'ariahanai ekarahi emai Iesu ohi tebaitabu ahi. <sup>3</sup> Ena miahao 'ekana hanona 'ariahana, hau ha tabiri ai kebiri 'inina hanona a'i etaina. <sup>4</sup> Pokina rani bo'ona hanona tabiri mai 'anaua ai tebirina, ia 'anaua ebamohunakia mai tabiri eba pa'anakia, ia ibamamatana hanona hau ha a'i e'lobina. <sup>5</sup> Rabi mai mararani ia hanona 'ariahanai mai oeo ai rani ikoikiae eio, abonomo ia kipona hauna wairoai eiuaiau 'auna.

<sup>6</sup> Hau weiana Iesu atau'ai nimai eihana raninai, ebeau eao wairanai ekaipehu. <sup>7-8</sup> Iesu auba ki'a obona ehina bena etibaha, "Auba ki'a obona! Hau najana agnai mokarahi." Hau weiana eio aota etibaha, "Iesu 'Ubi 'akina Tiramana Nahuna e. Here'u ai taba kobabaina? Tirama atanai nanoini'o, a'i kobahiarana'u." <sup>9</sup> Iesu ehore ebakina etibaha, "Oi atamu hanona tai?" Ia ena 'abi ebamuena etibaha, "Ata'u hanona

Mako, pokina ai hanona tabo'o ki'a baha." <sup>10</sup> Ia Iesu enoi hao noi haona, 'eka weianai a'i keuhu ahinakia.

<sup>11</sup> Aiporo to'una rarina 'akina oeo mekenai tetuautua. <sup>12</sup> Auba ki'a obokia weiakia tehore Iesu tenoina tetibaha, "Kouhunamai, aiporo weiakia aokiae katatoto." <sup>13</sup> Ua buonai Iesu ena 'abi ai auba ki'a obokia hau weiana aonai tekarahi teao aiporo aokiae tetoto, aiporo to'una hanona taha rua (2,000) tebeau teao papa'ai terobo ahi 'obu ai tetobu, tetono 'ari.

<sup>14</sup> Aiporo 'ima haukia tebeau teao, aiara haukia mai umai tea- iara haukia herekiae pou tehinana, ua buonai maearima tera'a teao taba erama hauna kateihana. <sup>15</sup> Teao Iesu herenai tekarahi au raninai, 'uainai hau weiana aonai auba ki'a obokia temiaho hauna aona aba ebero, ena habuni eba- totonakia emiati teihana raninai, teta'u ki'a. <sup>16</sup> Maearima weiakia Iesu taba ebabaina teihana haukia maearima baika herekiae hau weiana auba ki'a obokia aonai temiaho hauna pouna mai aiporo poukia teba 'iobinakia. <sup>17</sup> Aiara haukia tehore Iesu tenoina, ekia hano kehabona.

<sup>18</sup> Iesu ahiai ehe'au hanona auba ki'a obokia aonai temiaho hauna ehore Iesu enoina ke'abana kateao. <sup>19</sup> A la ebamuena etibaha, "Komue koao emu itu haukia herekia, Tirama aea eaoko'oai aihoni'o abomo ebamaurini'o hauna hatia'amu koba'iobinakia." <sup>20</sup> Ua buonai hau weiana eao Tekapoli aiarakia aokiae Iesu taba herenai ebabaina hauna pouna eiroro aina, maearima ikoikiae teta'u ta'u huri.

*Iairo Nahuna Uahona, Mai Iesu Ena Habuni Ea'i Apuana Babi'ena.  
(Mt 9.18-26; Lk 8.40-56)*

<sup>21</sup> Iesu haeamona ahi ai ehe'au, tekabanai 'obu abiranai tebatai 'au, mako rarina hanona weia poeai haeamona teto'u mue. <sup>22</sup> Marea poki hauna ha, atana Iairo, eao weia Iesu eihana aena

pokinai ekaipehu, <sup>23</sup> mai aona ikoinai enoi, etibaha, "Naha'u uahouahona hanona aba ke'ari, pahaeao, haunai pohao 'au pemauri." <sup>24</sup> Iesu emikiri Iairo ohi teao, 'a mako rarina hanona Iesu te'opu abuna teka'a. <sup>25</sup> Babi'e ha abomo weia babi'e ekia inawa ehaiara aina ihauna ikoinai harau haea rua. <sup>26</sup> Muramura baiben i haukia bo'okia ia ena inawa katebanamona ia a'i etainakia, ena moni mai kepu bo'ona ebaorenakia, 'a ena inawa a'i enamo, inawa hanona eapa'ua. <sup>27</sup> Ia Iesu pouna eona raninai, mako baiatakiae ia murinai ekataeana, ena habuni ea'i 'apuana. <sup>28</sup> Pokina ia eraonana, 'Ena habuni mo pa'i 'apuana hanona pamauri.' <sup>29</sup> Ena habuni ea'i 'apuana beronai aruaru e'oro, hauna eonobaina ena inawa hanona aba enamo. <sup>30</sup> Iesu beronai eonobaina bamauri hiabuna aonai hauna ekarahi buonai ekori kabe ebakai bakai etibaha, "Tai e'u habuni ea'i 'apuana?" <sup>31</sup> I'abana haukia te'abi tetibaha, "Mako rarina 'akina tiba'i abi aina heremuai, aehoma buonai nubakai bakai, tai ea'i 'apuan'i'o." <sup>32</sup> 'A Iesu hanona eihao ihao ia ea'i 'apuana hauna etabuna. <sup>33</sup> Babi'e herenai erama akana aba e'io bina buonai, eta'u ki'a mai 'ururu 'ururuna eka'a eao Iesu wairanai ekaipehu, ena pou maikoina ehinana. <sup>34</sup> Iesu ia eihina bena etibaha, "Naha'u e, emu a'ikakauma buonai aba omauri. Mai baibuamu moao. Emu haiara ikoikiae aba teore."

<sup>35</sup> Iesu ni'abi oho mo aonai, Iairo ena ituai maearima baika temai herena tehina bena tetibaha, "Nahumu hanona aba e'ari. Ba'iohi hauna a'i mobar'arina." <sup>36</sup> 'A Iesu 'abi weiana eona raninai a'i ea'i taeana, marea poki hauna eihina bena etibaha, "A'i mota'u, moa'ikakauma mo." <sup>37</sup> Ia ehore ikoikiae ebamuenakia, tai ha a'i ke'abana, 'a Petero, Iakobo mai uaho'abana Ioane iamo teaihau kate'abana. <sup>38</sup> Teao marea poki hauna ena ituai tekarahi 'au,

maearima eihanakia tehai aoko'o mai tehai apa'ua.<sup>39</sup> Iesu itu aonai ekatoto, maearima ehina benakia etibaha, "Taba buonai tuhai, uru rarina 'akina tubabuana, uaho neiana a'i e'ari, 'a ia hanona ni-parua."<sup>40</sup> 'A ia hanona Iesu teiriri aina. Maearima ikoikiai ehina benakia tekarahi, epua murinai, uahouaho hamana mai hinana abomo ia mai i'abana haukia aihau kipokia teao uahouaho enoti 'ekanai tetoto.<sup>41</sup> Iesu uahouaho imanai ea'i, ehina bena etibaha, "*Tarita Kumi!*" (Anina hanona 'Uahouaho e, nahina beni'o, momikiri.)<sup>42</sup> Uaho uaho weiana beronai mo emikiri, ekaoao kaoao. Teihana haukia ikoikiai teta'uta'u huri. Uahouaho ihauna hanona harau haea rua.<sup>43</sup> Iesu ehore eharabunakia pouna a'i katehinana. Haeamona ehina benakia, uahouaho ena aniani katebena.

## 6

### *Iesu Nasaretai Tebaki'ana.* (Mt 13.53-58; Lk 4.16-30)

<sup>1</sup> Iesu 'eka weiana ehabona, i'abana haukia kipokia teao ia ena aiara tohana. <sup>2</sup> Beraura robeai ia ena ba'iobi ea'i ramana. Mareai aiana teona haukia ikoikiai teta'u ta'u huri, tetibaha, "Aotipa neiana tai ebena? Hiabu ae'eai emai hoa neiakia nibabai."<sup>3</sup> Ia tebaki'ana, te'abi tetibaha, "Ia hanona kamuta hauna, Maria nahuna, Iakobo, Iosepa, Iuda mai Simona a'akia, haibuna baiatakai temiaho."

<sup>4</sup> Iesu ehina benakia etibaha, "Mahabanai hauna hanona 'eka ikoikiai aokiai katea'i taeana, 'a ena aiara tohanai mai hatia'ana tohakia hanona a'i katea'i taeana."<sup>5</sup> Weia hanona hoa bo'okia a'i ebabainakia, ia inawa haukia bita 'aki mo ahakiai ehao 'au, ebamaurinakia. <sup>6</sup> Eta'u ta'u huri pokina ekia a'ikakauma aha'i buonai. Ia eao aiara haeai baika aokiai eba'iobi.

*Iesu I'abana Haukia Harau  
Haea Rua Euhu Ahinakia.*  
(Mt 10.5-15; Lk 9.1-6)

<sup>7</sup> Haeamona Iesu i'abana haukia harau haea rua eaparinakia temai herena, hiabu ebenakia, rua rua euhunakia auba ki'a obokia kateu'u parenakia. <sup>8</sup> Erobenakia e'abi etibaha, "Emi kaoao aokiai taba ha a'i katoa'inakia, ikai'in i mo hamona katoa'ina. Mahoa, aniani abomo moni ha a'i katoa'ina. <sup>9</sup> Emi tamaka katoaba'au, ibatoto ibaruakia a'i katoa'inakia. <sup>10</sup> Katokara'au ituna weianai mo katomiaho keao mo aiara weiana katohabona. <sup>11</sup> A'i katea'i taeanimi ao aiami a'i kateona raninai katohabonakia, aemi apurorokia katotabu tabu obonakia ekia behoai keao ekia ki'a ibatohana."<sup>12</sup> Weiana i'abana haukia teao, teiroro maearima katebaraona kabena, <sup>13</sup> abomo auba ki'a obokia bo'okia teu'u u'u ahinakia, inawa haukia bo'okia tehorai ai tetaronakia tebamaurinakia.

*Ba'uere Robe Hauna Ioane Ena Ari.*

(Mt 14.1-12; Lk 9.7-9)

<sup>14</sup> Heroda obia hauna pou weiana eona, pokina Iesu atana aba tehina otaraina. Baika te'abi tetibaha, "Ba'uere robe hauna Ioane 'ari ai aba emikiri mue ba hiabu akakia neiakia nibabainakia."<sup>15</sup> Haeamona baika te'abi tetibaha, "Neiana hanona Elia." Baika tetibaha, "Neiana hanona mahabanai hauna ha, mahabanai 'uaikia 'abakia."<sup>16</sup> 'A Heroda uru weiana eona raninai, e'abi etibaha, "Ioane, 'akona akabe hurina hauna 'ari ai aba emikiri mue."

<sup>17</sup> 'Uainai Ioane a'i e'ari baha aonai, Heroda hanona aba ebaiuhu, Ioane tea'ina tebirina wapura itunai tekaabuna, weiana ebabaina hanona Herodia paunai. Heroda ehore hatina Pilipo atawana Herodia eatawana.

<sup>18</sup> Ba Ioane ehore Heroda ehina bena etibaha, "Oi ohore hatimu atawana oatawa boina hanona obeho."<sup>19</sup> Weiana Herodia hanona Ba'uere robe hauna Ioane eopuere aina, iahu 'arina taearana etabuna, 'a ena taeara aha'i.<sup>20</sup> Pokina Heroda hanona Ioane

eta'u aina, e'iorina ia hanona aka bero abomo robe hauna, ua buonai ia ehore e'ima haraina. Rani bo'okia Heroda Ioane ena 'abi 'urukia eo'o, aona earo 'ari, ia enuatae aiana keona.

<sup>21</sup> Heroda ena rama ranina ekara'au buonai tatu apa'uana ha tebabaina, aiara obiakia, huari poki haukia, abomo Galilea maearimakia apa'uakia tebeaunakia temai. <sup>22</sup> Herodia nahuna uahona emai to'u haukia wairakiai ewa. Heroda mai ena baki haukia ikoikiai aokia enamo, ba Heroda ehore uaho weiana ehina bena etibaha, "Nonuatae aina tabana ko'uhina hanona kabeni'o." <sup>23</sup> Herenai e'abi'uai tabura etibaha, "Taba konuatae aina hanona kabeni'o, e'u hanopaka abirana konoi aina re'a abomo kabeni'o."

<sup>24</sup> Weiana uaho ekarahi eao hinana ebakaina etibaha, "Au taba kanoiaina?" Hinana e'abi etibaha, "Ba'uere robe hauna Ioane 'arana konoiaina." <sup>25</sup> Uaho haeamona emue ebeau toto eao Heroda obia 'arana hauna ehina bena etibaha, "Bariu bariu mo Ba'uere robe hauna Ioane 'arana tihu ai koutana, kobena'u." <sup>26</sup> Heroda obia 'arana hauna aona earo'ari, ia aba e'abi'uai uaho taba kenuatae aina hauna kebaibenimo, abomo ena baki baki haukia weia teaniani haeamo haukia ena 'abi'uai 'uruna teona buonai keubo hanona taearana aha'i. <sup>27</sup> Ua buonai Heroda obia 'arana hauna huari hauna ha euhuna keao Ba'uere robe hauna Ioane 'arana kemaiaina. Huari hauna weiana eao wapura itunai Ba'uere robe hauna Ioane 'akona ekabe hurina. <sup>28</sup> 'Arana tihu ai eutana eaoaina uaho ebena, uaho ehore eaoaina hinana ebena.

<sup>29</sup> Ba'uere robe hauna Ioane i'abana haukia pouna teona raninai teao hauanina tea'ina teaoaina 'ariahanai tehorena.

*Iesu Taha Ima (5,000) Ebaniianakia.*  
(Mt 14.13-21; Lk 9.10-17; Io 6.1-14)

<sup>30</sup> Iesu ena iuhubeau haukia temue teao herenai tetu'u mue, tebabai tabakia mai teba'obi i'abikia ikoikiai haianai tehananakia. <sup>31</sup> Mako rarina tiao timai buonai i'abana haukia ekia aniani 'ekana aha'i, ia emikiri ehina benakia etibaha, "Eka 'abaeanana ha hamaeao, ua'a katoarai." <sup>32</sup> Ua buonai ahiai tehe 'au, tebeau banai 'eka 'abaeanana ha teao.

<sup>33</sup> Ekia beau ahi ai maearima bo'ona tehore teihanakia, te'ibinakia, aiara maearimakia ikoikiai tebeau raina te'uai teao 'eka weianai tekarahi.

<sup>34</sup> Tebahahaha 'au aonai Iesu mako ranina eihana hanona eaoko'o ainakia matoha mamoe i'imakia hauna aha'i 'abana. Ua buonai mauri 'abikia eba'ibinakia.

<sup>35</sup> Rabirabi beraura aba kekaihuna ba i'abana haukia teao herena, tehina bena tetibaha, "Neiana hanona hano'akuna abomo beraura aba kerabi." <sup>36</sup> Ua buonai maearima neiakia pouhunakia pateao umai abomo aiarai weia ekia aniani patekawa pateani."

<sup>37</sup> Iesu ehina benakia etibaha, "Wai kipomi aniani ha tomobenakia, temeani." 'A i'abana haukia ia tehina bena tetibaha, "Ai katahore 200 kina anianina katakawana, katabenakia, 'u'?" <sup>38</sup> Iesu ebakainakia etibaha, "Aniani bita heremai? Tomoao, tomoihana." Teao teiha harai temue temai, tehina bena tetibaha, "Parawa ikine ima mai maia rua."

<sup>39</sup> Iesu i'abana haukia ehina benakia, maearima katewatenakia to'uto'ukia ha ha tubu ahakiai katemiati. <sup>40</sup> Ua buonai maearima ikoikiai hinabu ha ha mai imbui ha ha tebamiatinakia.

<sup>41</sup> Ba ia ehore parawa ima abomo maia rua ea'inakia ea'a taea kupa eihana aniani ebanamonakia. Parawa ehobinakia i'abana haukia ebenakia tewatenakia mako ikoikiai tebenakia. Maia rua abomo ua tewate aihonakia.

<sup>42</sup> Teaniani ikoikiai teani 'ari.

<sup>43</sup> Parawa mai maia harikia tebararonakia, areha ikoinai harau haea rua tebonu. <sup>44</sup> Teaniani

haukia baiatakiai hau 'abaeana hanona taha ima (5,000).

*Iesu Bei Kapanai Eka'a.*

(Mt 14.22-33; Io 6.15-21)

<sup>45</sup> Iesu beronai i'abana haukia euhunakia ahi ai katehe'au kate'uai kateao Betesaida abirana. 'A ia hanona to'u haukia euhunakia. <sup>46</sup> Maearima teka'a murikiai ia ekara'au eao oeo ai kebahuba'ari. <sup>47</sup> Beraura emahabu mahabu raninai ahi obu ibuanai, 'a ia ikupaihana hanona 'anoai. <sup>48</sup> Ia eihanakia tipara tiaro'ari pokina rani wairakiai emai buonai. Kokoro'u ekia 'arara hoanai Iesu 'aku kapenai eka'a eao herekia matoha ahi pekahaona moioina. <sup>49</sup> Ia teihana 'aku kapenai eka'a eao teraonana biriu re'a tetu'u teio. <sup>50</sup> Ikoikiai teihana nuakia etae. Ia beronai ehina benakia etibaha, "A'i tomota'u, tomonua ko'o. Na Au." <sup>51</sup> Ahiai ehe'au ba rani e'oko hanona tetu'uta'u huri. <sup>52</sup> Pokina Iesu maearima parawa ebenakia teani, i'abana haukia hoa weiana obona a'i teobo, aokia tetubu abuna.

*Iesu Genesaretai Inawa Haukia Ebanamona'akia.*

(Mt 14.34-36)

<sup>53</sup> Iesu i'abana haukia kipokia ahiai tebeau banai Genesareta poenai to'o tene'ena. <sup>54</sup> Ahiai teriri hanona maearima beronai Iesu te'iobina. <sup>55</sup> Teka otaraina hano weiana aonai ekia inawa haukia toto'eai tebuanakia teo Iesu pouna teona nemiaho'ekakia. <sup>56</sup> Iesu eao 'ekakia ikoikiai aiara papakia mai aiara apa'uakia. Maearima inawa haukia tebuanakia teaoainakia kawakawa 'ekakiai tehorotinakia, tenoina ena habuni korina mo patea'i 'apuana. Ena habuni tea'i 'apuana haukia ikoikiai hanona temauri.

## 7

*Kupukia Ekia Ba'iobi.*

(Mt 15.1-9)

<sup>1</sup> Parisea mai rauhubu poki haukia baika Ierusalemai temai Iesu herenai tetu'u. <sup>2</sup> Aonai

Iesu i'abana haukia baika imakia a'i teutu, mai 'opukia teaniani, weiana hanona Iuda ekia hoahoai a'i ebero Parisea haukia wairakiai.

<sup>3</sup> Parisea mai Iuda haukia ikoikiai hanona a'i tianiani 'abaea, ia ekia babai ihobonai imakia teutu 'uai ba tianiani kupukia 'aba'abakia ekia hoahoia ihobona. <sup>4</sup> Kawakawa 'ekakiai timai raninai ekia kawakawa tabakia a'i tiani baha, ia teutu 'uainakia mai ia abokiamo te'uere ba tianiani. Kupukia ekia rauhubu bo'ona abomo te'ima harainakia matoha 'ere, uro 'ao puou iutukia 'abana.

<sup>5</sup> Ua buonai Parisea mai rauhubu poki haukia Iesu tebakaina tetibaha, "Tabamu haukia kupuka 'aba'abaka tebabai akakia a'i tibabai, aehoma buonai imakia mai 'opukia tianiani?" <sup>6</sup> Iesu ekia 'abi ebamuena etibaha, "Isaia ena mahabanaiai wai bahaorea haumi robami eahuna. Na erere aihona. Maearima neiakia hanona pinakiai mo Au tibanamona'u.

'A aokia tohana hanona atau'a'akinai.

<sup>7</sup> Tekutiai 'abaeana'u mo, pokina rauhubu neiakia maearima tiba'ibinakia hanona maearima tebabai rauhubukia.'

Isa 29.13

<sup>8</sup> Wai hanona Tirama ena rauhubu aba tohabonakia, 'a maearima ekia rauhubu mo tua'i 'ininakia.'

<sup>9</sup> Haeamona ehina benakia etibaha, "Wai emi aotipai Tirama ena rauhubu tobunina, kipomi emi hoahoia tua'i 'ininakia.

<sup>10</sup> Pokina Mose e'abi etibaha, 'Hamamu hinamu komariki ainakia', 'a 'hau ha hamana 'ao hinana herenai ke'abi ki'a hauna hanona katoahu 'arina.' <sup>11</sup> Ia wai tu'abi totibaha, 'Hau ha hamana 'ao hinana kehina bena, barai barai tabakia pabenimi ia aba Koban.' (Koban anina hanona 'Beruberu tabakia Tirama 'euna'). <sup>12</sup> Ua buonai maearima tu rauhubunakia, hamakia hinakia a'i katebarainakia. <sup>13</sup> Hoahoia neiana tubabai hanona wai kipomi emi 'obiai maearima tuba'ibinakia, Tirama ena 'abi

tobunina. Weiana mo aha'i, ia uahomakia bo'okia tubabai."

*Maearima Niba'opuna Tabana.  
(Mt 5.10-20)*

<sup>14</sup> Haeamona Iesu mako ea-pari muenakia teao herena, ehina benakia etibaha, "Ikoimiai katobahu, kato'iobi haraina. <sup>15</sup> Taba weiana atapakai nitoto maearima aonai hauna maearima a'i niba'opuna, ia taba weiana maearima aonai nikarahi hauna maearima niba'opuna. <sup>16</sup> Mai haiana hauna aia keona."

<sup>17</sup> Iesu to'u haukia ehabonakia ituai etoto raninai l'abana haukia teao herena, 'abi ibabatai weiana anina tebakai bakai aina. <sup>18</sup> Iesu ehina benakia etibaha, "Wai aomi a'i niea, 'u? A'i to'ioquina? Aniani nitoto maearima aonai hauna maearima a'i niba'opuna. <sup>19</sup> Pokina weiana hanona aoai a'i nitoto, ia mo'oru aona niao haeamona kekarahi." (Iesu 'abi neiana ehinana ena poki hanona aniani ikoinai tenamo kahani, a'i kateba 'opunaka.) <sup>20</sup> E'abi mue etibaha, "Taba aoai kekarahi hauna kehore maearima keba'opunakia. <sup>21</sup> Raona ki'a obokia maearima aonai tikarahi tabakia hanona neiakia, nabau, bainao, ahuahu, <sup>22</sup> aniki'a, raonaki'a, bai'oi, rea, wamuru, apa, 'uahi'uahi, mai babai 'abaea. <sup>23</sup> Taba ki'a obokia ikoikiai aoai tikarahi haukia tihere maearima tiba 'opunakia."

*Surofenise Babi'ena Ena  
A'ikakauma.  
(Mt 15.21-28)*

<sup>24</sup> Iesu 'eka weianai ekaobo eao Turo hanonai, ia ena nuatae tai ha a'i ke'ioquina ia hanona weia, ua buonai itu ha aonai eka toto, iamo ena pihi taearana aha'i. <sup>25</sup> Babi'e ha nahuna uahona aonai auba ki'a obona emiaho, Iesu pouna eona raninai, beronai emai aena pokinai ekaipehu. <sup>26</sup> Babi'e weiana hanona Iuda babi'ena aha'i, 'a ia hanona Helene babi'ena Surofenike ai erama. Iesu enoina auba

ki'a obona nahuna aonai hauna keu'u ahina. <sup>27</sup> 'A Iesu ia ehina bena etibaha, "Miori pateaniani 'uai, pokina miori ekia aniani kaha'ina kahakapo ahina waeha kateani hanona a'i enamo."

<sup>28</sup> 'A babi'e e'abi etibaha, "Obi-apaka e, 'abi tohana, ia waeha abomo miori tianiani 'ika'ikakia itara ba'anai haukia tiani." <sup>29</sup> Iesu ia ehina bena etibaha, "Ua nu'abi aiho buonai, momue moao emu itu, auba ki'a obona nahumu aonai hauna aba ekarahi." <sup>30</sup> Babi'e emue ena itu eao nahuna aba enamo etabu ahina ena parua 'ekanai, auba ki'a obona aba ekarahi.

*Iesu Haia Po'o Mai Maea 'Orare Hauna Ebanamona.*

<sup>31</sup> Haeamona Iesu Turo ehabona Sidono mai Dekapoli hanokiae ekabanai eao Galilea 'obunai ekarahi. <sup>32</sup> Maearima baika tehore haiana tepo'o abomo maeana e'orare hauna ha temaiaina Iesu herena, tenoina ahanai kehao'au kebanamona. <sup>33</sup> Iesu ehore hau weiana to'u baiatakiae ebakaparena, ba ia imana riuri-una haiana aonai etiu totona, haeamona imana e'atotina hau weiana maeana ea'i 'apuana. <sup>34</sup> Iesu ea'a taea kupa eihana aona ebahi, ba hau weiana ehina bena etibaha, "Efata!" (Anina hanona mokaikau!) <sup>35</sup> Beronai hau weiana haiana te'erere abomo maeana ebero e'abi'abi harai. <sup>36</sup> Iesu ehore eharabunakia pou neiana tai ha haianai a'i katehinana. Eharabu 'ari iamo aiana a'i teona, ia pouna tehina hina otaraina. <sup>37</sup> Maearima ikoinai tetu'u ta'u huri ki'a, te'abi tetibaha, "Ia taba ikoinai nibabai harai. Haiakia tepo'o haukia aia tiona abomo mae'a 'orare haukia ti'abi'abi harai."

## 8

*Iesu Taha Bani (4,000) Ebanian-inakia.  
(Mt 15.32-39)*

<sup>1</sup> Rani weianai maearima bo'ona haeamona teao Iesu herenai teto'u

mue. Ia aniani aha'i buonai, Iesu i'abana haukia eaparinakia temai herenai ehina benakia etibaha,<sup>2</sup> "Maearima neiakia hanona naoko'o ainakia, pokina wapu aba aihau here'uai temiaho ekia aniani hanona aba eore.<sup>3</sup> Mai mare'akia kauhunakia taearai hanona baika a'i teme'eho, pokina baika hanona 'eka homa'anai temai."<sup>4</sup> I'abana haukia tehina bera tetibaha, "Aika hanona hano'akunai. Aniani ae'e ai kaha'ina, maearima neiakia kahabani aninakia?"<sup>5</sup> Iesu ehole ebakainakia etibaha, "Emi aniani ikoinai bita?" Ia tetibaha, "Parawa 'abaihau hamomo."

<sup>6</sup> Iesu maearima ehina benakia 'anoai katemiati. Ba parawa weiakia 'abaihau hamomo ea'i taeanakia namo 'abina Tirama ebena, ba ehobi 'iti'itinakia i'abana haukia ebenakia katewatena, maearima katebenakia. E'abi ihobona tebabaina. <sup>7</sup> Ekia maia papakia abomo weia, ebamonakia, ba i'abana haukia ebenakia katewatenakia. <sup>8</sup> Ikoikiai teanianai, teami 'ari. I'abana haukia aniani harikia tebararonakia hanona areha 'abaihau hamomo.<sup>9</sup> Haukia hanona ikoinai taha bani (4,000) 'abana.

Ba euhunakia haha ekia 'eka teao,<sup>10</sup> Haeamona i'abana haukia kipokia ahiai tehe'au teao Dalmanuta hanona.

#### *Parisea Haukia Tenuatae Hoa Ha Kateihana.* (Mt 16.1-4)

<sup>11</sup> Parisea haukia temai Iesu tebakaina katehobona, hoa ha kebabaina kateihana, katebatohana ena hiabu hanona Tirama hereinai emai. <sup>12</sup> Iesu aona ebahi mai aohaiarana, e'abi etibaha, "Taba buonai uru neiana haumi hoa tutabuna? 'Abi tohana mo au wai nahina benimi, uru neiana haumi hoa ha a'i kabaihanimi."<sup>13</sup> Weiana ia ehabonakia ahiai ehe'au mue ekabanai 'obu abirana eao.

#### *Parisea Haukia Mai Heroda Ekia Bakupu Muramurana.* (Mt 16.5-12)

<sup>14</sup> I'abana haukia parawa ikoinai tereanakia, parawa hama mo ahiai emiaho. <sup>15</sup> Iesu ia erobenakia etibaha, "Mahami katobano'anakia, Parisea haukia mai Heroda ekia bakupu mai ekia aoani hoahoakia a'i tomobabai marikina."<sup>16</sup> I'abana haukia kipokia baiatakiai te'abi'abi tetibaha, "Aniani ha a'i hamaina buonai na ni'abi aiho."<sup>17</sup> Iesu e'lobina taba te'uhina, ebatanakia etibaha, "Taba buonai aniani heremi aha'i hauna robana tuahuna? Wai a'i to'iohi bahana abomo obonai a'i tuobo? Aomi nama ua tepahihi aiho?<sup>18</sup> Mai mahami, ia a'i toihana? Mai haiami, ia aiana a'i tuona? Taba a'i turaona 'ini?"<sup>19</sup> Au parawa ima ahobi 'iti'itinakia maearima taha ima (5,000) teami 'ari, harikia areha bita tobabonunakia?" Ia te'abi tetibaha, "Areha harau haea rua."<sup>20</sup> Ia e'abi etibaha, "Abomo parawa 'abaihau hamomo ahobi 'iti'itinakia maearima taha bani (4,000) teami 'ari, harikia areha bita tobabonunakia?" Ia te'abi tetibaha, "Areha 'abaihau hamomo."<sup>21</sup> Ia ehina benakia etibaha, "Wai aehoma buonai aomi a'i niea?"

#### *Iesu Bedesaiddai Maha Ki'a Hauna Mahana Ebanamonakia.*

<sup>22</sup> Temai Betesaida aiaranai tekara'au raninai, maearambaika maha ki'a hauna ha tebaka'ana temai Iesu herena tenoina ahana kehao'au mahana kebanamonakia. <sup>23</sup> Iesu maha ki'a hauna imanai e'ebi tekarahi aiaru murinai, imana e'atotina ia mahana etaronakia epua imana ia mahana ahana eha'o'au ba ebakaina etibaha, "Taba aba noiha?"<sup>24</sup> Maha ki'a hauna ea'a taea, e'abi etibaha, "Maearamba naihanakia tikaoao matoha matiu 'abakia."<sup>25</sup> Haeamona mahana eha'o'au mue, weiana eihao ihao aonai ena ihaiha abenamo, taba ikoinai aba eihaiharainakia. <sup>26</sup> Euhuna keao ena itu, ia ehina bera etibaha, "Aiara aonai a'i kokatoto."

*Petero Iesu Ehina Pouna Keriso.*  
(Mt 16.13-20; Lk 9.18-21)

<sup>27</sup> Iesu i'abana haukia kipokia Kaisarea Pilipo aiarakia teao, taearai i'abana haukia ebakainakia etibaha, "Maearima hanona taba na tiroma, au hanona tai?" <sup>28</sup> Ena 'abi tebamuena tetibaha, "Baika ti'abi tetibaha, oi hanona Ba'uere robe hauna Ioane, 'a baika tetibaha, oi hanona Elia, haeamona baika tetibaha, oi hanona mahabanai hauna ha." <sup>29</sup> Haeamona ia ebakainakia etibaha, "Ia wai hanona taba na tuhoma, au tai?" Petero ia ehina bena etibaha, "Oi hanona Keriso,\* Tirama ena a'i taea haumu." <sup>30</sup> Iesu eharabunakia ia pouna hau ha a'i kateba'io bina.

*Iesu Kehaiara Mai Ke'ari 'Abikia Ehina.*

(Mt 16.21-28; Lk 9.22-29)

<sup>31</sup> Ia i'abana haukia eba'io bia ramanakia, Maearima Nahuna hanona haiara bo'okia ke-hoainakia, aiara pok'i haukia, robe haukia apa'uakia, mai rauhubu pok'i haukia kate'oatana abomo kateahu 'arina, ia wapu ibaihaunai hanona kemikiri mue. <sup>32</sup> 'Abi neiana ehina pou haraina raninai, Petero ehore Iesu eba kaparena haiahiai ehinabe pahihina. <sup>33</sup> A Iesu hanona ekori kabe, i'abana haukia eihanakia, Petero ebatana etibaha, "Satani, Mokapare, muri'u moao! Pokina emu raona hanona Tirama 'euna aha'i, ia maearima 'eukia."

<sup>34</sup> Weiana Iesu mako eaparinakia abomo i'abana haukia kipokia ehina benakia etibaha, "Hau ha kenuatae au ke'abana'u raninai, ia kipona ena mauri kehabona, ena matiu ibiri ropo kea'i taeana kebuana, au muri'u ai keka'a." <sup>35</sup> Pokina ena mauri kea'i 'inina hauna ena mauri keba 'akaumana, 'a au pau'uai mai pou namona paunai ena mauri kene'ena hauna hanona

ena mauri kea'ina. <sup>36</sup> Hau ha hanopaka maikoinai pe'a'ina ia ena mauri peba'akaumana hanona 'eunai ena namo taba? <sup>37</sup> Hau ha taba kebaiben'i ena mauri kea'i muena? <sup>38</sup> Hau ha au pau'uai 'ao e'u 'abi paukiai nabau abomo aka ki'a uruna neiana wairakiai kehaumaea aina'u hauna, au Maearima Nahuna abomo ia kahaumaea aina Hama'u ena nuabiai ena aneru robekia kipokia katemai raninai."

## 9

<sup>1</sup> Haeamona Iesu ehina benakia etibaha, "Abi tohana mo au wai nahina benimi, baika neia tekoroti haukia a'i kate'ari baha keao mo Tirama ena obia aiarana mai hi-abuna kemai hanona kateihana."

*Iesu Ihana Ebahaeaina.*  
(Mt 17.1-13; Lk 9.28-36)

<sup>2</sup> Beraura 'abaihau teao murinai, Iesu hanona Petero, Iakobo mai Ioane mo ebaka'anakia oeo apa'uana ha ai tekara'au, weia teikupai aonai wairakiai ihana ehaeai, <sup>3</sup> ena habuni e'imare 'imare epore obo, epore ki'a baha hanopakai habuni utu hauna ha ua a'i pebapole aihona. <sup>4</sup> Weiana Elia mai Mose ohi tewaira tina ja wairakiai, terarua Iesu kipokia te'abi 'abi. <sup>5</sup> Petero ehore Iesu ehina bena etibaha, "Ba'io bina haumu e, aika neia hanona enamo, i'aua aihau kata babainakia, ha oi 'eumu, ha Mose 'euna, ha Elia 'euna." <sup>6</sup> Pokina teta'u ki'a baha buonai, Petero aea ke'abi aiho hanona a'i e'io bina. <sup>7</sup> 'Auhao ha emai ekaiabunakia, abonamo aia ha 'auhao aonai emai, etibaha, "Neiana hanona au naha'u, e'u raona'au hauna, aiana katona." <sup>8</sup> Beronai teiha banai iha banai ia tai ha a'i teihana, Iesu ikupai ana mo ia baiatakiai.

<sup>9</sup> Oeoai teriri raninai, Iesu eharabunakia teiha tabakia hanona hau ha haianai a'i kate'abi, keao mo Maearima

\* **8:29:** (29) Mesia, Bamauri Hauna weiana tebai'ima hauna.

Nahuna 'ari ai kemikiri mue.  
<sup>10</sup> Ena 'abi tea'i inina, ia kipokia mo te'abi'abi aina, 'ariai mikiri mue anina hanona taba.

<sup>11</sup> Ia tehore Iesu tebakaina tetibaha, "Taba buonai Rauhubu pokia haukia te'abi Elia hanona kemai'uai?" <sup>12</sup> Iesu ehina benakia etibaha, "Abi tohana. Elia hanona kemai 'uai, taba ikoinai keba'orunakia. Ia taba buonai Maearima Nahuna 'abina Puka Robenai tererena kehaiara ki'a baha abomo kat'e'oatana?" <sup>13</sup> Au wai nahina benimi, Elia hanona aba emai, maearima ekia nuatae akakia ikoinai herenai tebabai, ia 'abina tererena ihobonai."

*Iesu Miori Ha Aonai Auba Ki'a Obona Hauna Ebamaurina.*  
(Mt 17.14-21; Lk 9.37-43)

<sup>14</sup> Temai i'abana haukia baika herekiae raninai, maearima bo'ona 'akina tekori kakaiaronakia, rauhubu pokia haukia mai i'abana haukia kipokia tibaihara tae teihanaakia. <sup>15</sup> To'u haukia Iesu teihana raninai, teta'u ta'u huri tebeau herena teao tebanamona. <sup>16</sup> Iesu i'abana haukia ebakainakia etibaha, "Ia kipokia taba tubaihara taeaina?" <sup>17</sup> To'u aonai hau ha e'abi etibaha, "Ba'iobi haumu e! Au nahau'amaiaina oi heremu, pokina aonai maea ki'a aubana nemiaho a'i ni'abi'abi. <sup>18</sup> Rani baika auba ki'a obona neibiu hanona niba'ehona 'anoai nienoti pinana 'uto'uto mai niara rabina hauna nipahihi obo. I'abamu haukia anoinakia, auba ki'a obona kate'u ahina, ia a'i etainakia."

<sup>19</sup> Iesu ehinabe pahihinakia etibaha, "Uru neiana haumi emi a'ikakauma aha'i, heremai kamiaho keao mo rani tabanai? Kahau haiara heremai keao mo rani tabanai? Miori tomaiaina here'u." <sup>20</sup> Miori teaoaina Iesu herena, auba ki'a obona Iesu eihana raninai, miori eba'ururu ki'ana, weiana e'eho 'anoai ehene banai here banai, pinana 'uto'uto tekarahi.

<sup>21</sup> Iesu miori hamana ebakaina etibaha, "Aita raninai nahomana

ea'i ramana?" Ia e'abi etibaha, "Aba ko'iko'ina raninai. <sup>22</sup> Rani bo'ona auba ki'a obona nihore iruba ahanai nikapo 'auna mai beiai nikapo uhuna keba'arina. Kobabaina ketaina re'a, poaoko'o ainamai, pobrainamai." <sup>23</sup> Iesu ehina bena etibaha, "Taba buonai kababaina ketaina na ohoma! Tirama nia'ikakauma hauna herenai taba ikoikiai kebabai hanona ketaina." <sup>24</sup> Beronai miori hamana eio etibaha, "Au hanona aba na'ikakauma, mobaraina'u e'u a'ikakauma papana hauna mobapa'uana." <sup>25</sup> Iesu to'u haukia eihanakia, tera'a herena teao. Weiana ia auba ki'a obona ebatana etibaha, "Maea ki'a mai haia po'o aubana, au oi nahina beni'o. Miori aonai mokarahi, naia a'i kototo mue." <sup>26</sup> Auba ki'a obona eio, miori eba'ururu ki'ana, ba ia ekarahi, miori enoti matoha e'ari, maearima te'abi miori aba e'ari baihana. <sup>27</sup> 'A Iesu miori imanai ea'i eberi taeana, beronai emikiri ekoroti.

<sup>28</sup> Ia itu aonai tekatoto, i'abana haukia bunianai tebakaina tetibaha, "Taba buonai ai auba katau'u ahina hanona a'i etainamai?" <sup>29</sup> Ia ehina benakia etibaha, "Taba nahomakia iu'u ahikia taeearana ha aha'i, bahuba'ari mo ikupaiana."

*Iesu Ena 'Ari Poua Ehina Muena.*

(Mt 17.22-23; Lk 9.43-45)

<sup>30</sup> Iesu i'abana haukia kipokia 'eka weiana tehabona, Galilea hanonai tekabani. A'i enuatae hau ha ke'ibina ia hanona ae'eai, <sup>31</sup> pokina i'abana haukia niba'ibinakia, ehina benakia etibaha, "Hau ha au Maearima Nahuna kehinahina aina'u maearima imakiai keutana'u, kateahu 'arina'u. 'A beraura ibai-haunai au hanona kamikiri mue." <sup>32</sup> 'A ia hanona a'i te'ibina taba e'uhina abonomo katebakaina hanona teta'u.

*Tai keapa'ua?*  
(Mt 18.1-5; Lk 9.46-48)

<sup>33</sup> Kaperanauma aiaranai tekara'au, itu aonai Iesu i'abana haukia ebakainakia etibaha, "Bariu taearai hamai hanona taba tobaihara taeaina?" <sup>34</sup> Ia a'i te'abi, pokina taearai temai hanona tai atana keapa'ua hauna tebaihara taeaina. <sup>35</sup> Iesu emiati, i'abana haukia harau haea rua eaparinakia, ehina benakia etibaha, "Tai nenuatae ke'uai hauna, ia kipona muri 'akinai kehorotina abomo maearima ikoikiai ekia ta'ara ia'ina haunai keao." <sup>36</sup> Weiana Iesu miori papana ha ea'ina wairakiai ebakorotina huanai ea'i ba ehina benakia etibaha, <sup>37</sup> "Hau ha au ata'u ai miori papana na homana nia'i taeana hauna au abo'umo nia'i taeana'u, au nia'i taeana'u hauna hanona au mo ikupaia'u aha'i, ia euhuna'u Tiramana abomo nia'i taeana."

*A'i Ni'oatanaka Hauna Aika Abaka.*

(Lk 9.49-50)

<sup>38</sup> Ioane ehore ehina bena etibaha, "Ba'iobi haumu e, hau ha taihana, atamuai auba ki'a obokia eu'u ahinakia, ai tahore tahina bena kebaupuana, pokina ia hanona aika 'abaka aha'i." <sup>39</sup> Iesu ehina benakia etibaha, "Ai patokaiabuna, pokina au ata'uai hiabu akakia nibabai hauna, muriai au ata'u a'i kea'i ki'ana. <sup>40</sup> Pokina a'i ni'oatanaka hauna hanona aika abaka. <sup>41</sup> 'Abi tohana mo au wai nahina benimi. Ata'uai hau ha bei 'aki 'ereai kebenimi katoинu pokina wai hana Keriso 'euna, hau weiana hanona mai 'arana.

*Baihobo Kebabaina Hauna Herenai Keki'a Wairai.*

(Mt 18.6-9; Lk 17.1-2)

<sup>42</sup> "Tai au tia'ikakaumana'u miorikia ha kebabehona hauna hanona iata rarina 'akina ha 'akonai patetoba 'auna patekapo uhuna 'akuai hanona ma enamo ba Tirama ena puma kebaibenai hauna. <sup>43</sup> Imamu kebabehoni'o raninai, kokabe obona, imamu hamonai mauri

namona aonai kototo, ba a'i enamo imamu ruai koao iruba a'i ni'ao 'apua 'ekana. <sup>44</sup> 'Eka weiana 'erau'eraukia maearima tiani haukia hanona a'i ti'ari 'apua, abomo irubana a'i ni'ao 'apua. <sup>45</sup> Aemu kebabehoni'o raninai, kokabe obona, aemu hamonai mauri namona aonai kototo, ba a'i enamo aemu rua namokiae iruba 'ekanai katekapo totoni'o. <sup>46</sup> 'Eka weiana 'erau'eraukia maearima tiani haukia hanona a'i ti'ari 'apua, abomo irubana a'i ni'ao 'apua. <sup>47</sup> Mahamu kebabehoni'o raninai, ko'ipahina, mahamu hamonai Tirama ena obia aiaranai kototo ba a'i enamo mahamu rua namokiae iruba 'ekanai katekapo totoni'o. <sup>48</sup> 'Eka weiana 'erau'eraukia maearima tiani haukia hanona a'i ti'ari 'apua, abomo irubana a'i ni'ao 'apua.

<sup>49</sup> "Weiana puma iruba 'abana kehore maearima ikoikiai kebahaiara banainakia matoha kikimaru ai tekapanakia 'abana.

<sup>50</sup> "Kikimaru hanona taba namona, 'a kikimaru a'i ke'aku'aku hanona iba'aku muena taearana aha'i. Wai hanona uahomanai a'i katoao, ia kikimaru katoa'ina baiatamiai, katomiaho oioi mai baibuami."

## 10

*Ha Atawana A'i Kebakarahina.*  
(Mt 19.1-12; Lk 16.18)

<sup>1</sup> Iesu 'eka weiana ehabona eao Iuda hanonai ekabanai eao Ioridana taina. Maearima bo'ona temai Iesu herenai tetu'u mue, haeamona eba'ibinakia rani ikoinai nibabai ihoboki.

<sup>2</sup> Parisea haukia baika herena teao tehobona tetibaha, "Eka rauhubuai hau ha atawana kebakarahina hanona mai ena bero, 'ao?" <sup>3</sup> Iesu ehina benakia etibaha, "Mose ena rauhubuai hanona taba na ehoma?" <sup>4</sup> Ia ena 'abi tebamuena tetibaha, "Mose ena rauhubu e'abi, hau ha atawana kebakarahina hanona marerena kererena keao babi'e herena, ba babi'e kebakarahina." <sup>5</sup> Iesu ehina

benakia etibaha, "Pokina emi ao pahihi paunai Mose rauhubu neiana ebenimi. <sup>6</sup> Ia Tirama hanopaka ebaramana raninai, maearima ebatainakia hau mai babi'e. <sup>7</sup> Ua buonai hau hanona hamana hinana nihabonakia, ia atawana ohi katemiahō haeamo. <sup>8</sup> Ia terarua hauanikia hanona hamona 'abana. Ua buonai terarua hauanikia hanona hamona, ia rua aha'i. <sup>9</sup> Tirama ehore ebahamomonakia hauna maearima a'i katebapa'ana."

<sup>10</sup> Teao itu ha aonai, i'abana haukia hanona Iesu herenai 'abi weiana anina tebakai bakai muena. <sup>11</sup> Iesu ehina benakia etibaha, "Hau ha atawana kebakarahina haeamona babi'e ha keatawa muena ia hanona nabau ki'a hauna. <sup>12</sup> Babi'e abomo atawana kehabona hau ha keatawana re'a ia hanona nabau ki'a babi'enā."

### *Iesu Miori Papakia Ebanamonakia.*

(Mt 19.13-15; Lk 18.15-17)

<sup>13</sup> Maearima baika nahukia teaoainakia Iesu herena ahakiai kehao'au kebanamonakia, ia i'abana haukia tehore tebatanakia. <sup>14</sup> Iesu babai weiana eihana raninai eopuere, etibaha, "Miori papakia naiakia tomo-habonakia, temai au here'u, a'i tomou'unakia, pokina nahomakia hanona Tirama ena obia aiarana haukia. <sup>15</sup> 'Abi tohana au wai nahina benimi, hau ha Tirama ena obia aiarana ia'inai miori papana 'abanai a'i keao raninai, ia hanona a'i kekatoto 'apua." <sup>16</sup> Weiana Iesu miori ea'inakia, imana ahakiai ehao'au ebanamonakia.

### *Kepu hauna.*

(Mt 19.16-30; Lk 18.18-30)

<sup>17</sup> Iesu taearai eka'a eao aonai, hau ha ebeau turina eao wairanai ekaipahu ebakaina etibaha, "Ba'obi haumu namomu e, au aea kahoma mauri banaibana ka'ina?" <sup>18</sup> Iesu ehore ehina bena etibaha, "Taba buonai au namo'u ohinana? Hau ha a'i enamo, ia Tirama ikupaiana mo

enamo. <sup>19</sup> Rauhubu aba o'ioina. A'i koahuahu, a'i konabau, a'i kobainao, a'i kohinau bai'oi, a'i kobai'oi, hamamu hinamu komariki ainakia." <sup>20</sup> Hau weiana e'abi etibaha, "Ba'obi haumu e, rauhubu naiakia hanona ko'iko'i'u raninai a'i ma'harainakia emai mo bariu." <sup>21</sup> Weiana Iesu ia eiha ini'inina mai raona'auna ba e'abi etibaha, "Taba hamona okapu aina hanona neiana, emu kepu kokawa kawainakia, monikia uraru haukia kobenakia weiana kupai 'aramu koa'ina, ba komai muri'uai koka'a." <sup>22</sup> 'Abi weiana eona raninai, wairana ebirabira ekaobo mai ao haiarana, pokina ia hanona kepu hauna.

### *Kepu haukia Kupa Kaketoto Hanona Kepahihi.*

<sup>23</sup> Iesu eiha ihao, i'abana haukia ehina benakia etibaha, "Taba herekia tebo'o haukia Tirama ena obia aiarana aonai kaketoto hanona epahihi ki'a baha." <sup>24</sup> I'abana haukia 'abi weiana teona hanona tetau ta'u huri, haeamona ehinabe muenakia etibaha, "Naha'u e, Tirama ena obia aiarana ikatotona hanona epahihi ki'a baha." <sup>25</sup> Kamela kopi ererenai kekuri banai hanona ketaina, 'a obia hauna Tirama ena obia aiaranai ketoto hanona epahihi ki'a baha." <sup>26</sup> I'abana haukia tetau ta'u huri, kipokia baiatakiai te'abi'abi tetibaha, "Tai hanona mauri kea'ina?" <sup>27</sup> Iesu eiha 'ini'ininakia, ba etibaha, "Taba ibabaikia maearima herekiai a'i ketaina, ia Tirama herenai hanona etaina. Pokina taba ikoikiai ibabaikia Tirama herenai hanona etaina."

<sup>28</sup> Weiana Petero ehore Iesu ehina bena etibaha, "Ai hanona emai taba ikoikiai tahabonakia, oi murimuai taka'a." <sup>29</sup> Iesu e'abi etibaha, "Abi tohana au wai nahina benimi, hau ha kehore au pau'uai 'ao pou namona paunai ena itu, uaho'abana, haibuna, hinana, hamana, nahuna, 'ao ena hano kehabonakia, <sup>30</sup> bariu rani

neianai ia hanona taba bo'okia kea'i, ena itu, uaho'abana, hai'buna, hinana, hamana, nahuna 'ao ena hano ikoikiai hinabu hinabu kea'i, abomo kateba hiarana, ba rani kemai aonai ia hanona mauri banaibana'i kea'ina.<sup>31</sup> Bariu bo'okia te'uai haukia hanona katemurihai, ia temurihai haukia hanona kate'uai."

*Iesu Ibaihaunai Ena 'Ari Poua Ehinana.*

(Mt 20.17-19; Lk 18.31-34)

<sup>32</sup> Taearai teka'a Ierusalema teao aonai Iesu hanona e'uai i'abana haukia aokia earo 'ari, abomo murinai teka'a haukia teta'u, weiana Iesu ehore i'abana haukia eapari parenakia, hereinai taba kerama hauna poua wairakiai ehinana.<sup>33</sup> Etibaha, "Aika bariu nahakara'au Ierusalemai weia hau ha au Maearima Nahuna hinahina'u kehinahina Robe haukia mai Rauhubu poki haukia herekiai, iahu'ari'u 'abina katebatohana, rama haeai haukia katebenakia.<sup>34</sup> Maearima weiakia au katebatae aina'u kate'atotina'u kate'atina'u ba kateahu 'arina'u, ia wapu ibaihaunai kamikiri mue."

*Iakobo Mai Ioane Ekia Nuatae Ha Iesu Herenai.*

(Mt 20.20-28)

<sup>35</sup> Sebedeo nahuna rua Iakobo mai Ioane ohi temai Iesu herena, tehina bena tetibaha, "Ba'iobi haumu e, emai nuatae tabana ha heremu ai katanoiaina hanona kobabaina."<sup>36</sup> Iesu e'abi etibaha, "Taba tonuatae aina heremai kababaina?"<sup>37</sup> Ia te'abi tetibaha, "Emu nuabi koa'ina raninai, ai tararua ha oi itipamuai ha awarimuai patamiati."

<sup>38</sup> 'A Iesu ia ehina benakia etibaha, "tunoiaina tabana hanona a'i to'ibina. Au kainu 'erenai wai katoiu ketainimi? Abomo au kateba'uere robena'u 'uere robena wai kateba'uere robenimi ketaina?"<sup>39</sup> Terarua te'abi tetibaha, "E, ketainamai."

Ba Iesu ehina benakia etibaha, "Au kainu 'erenai hanona wai abomimo katoiu, abomo au

kateba'uere robena'u 'uere robena wai abomimo kateba'uere robenimi.<sup>40</sup> 'A itipa'uai mai awari'uai katemiatiai haukia hanona au a'i katina'anakia. Miati 'ekakia weiakia hanona Tirama aba eba'orunakia, ia ena nuatae haukia mo'eukia."

<sup>41</sup> I'abana haukia harau haea 'uru weiana teona hanona Iakobo mai Ioane ohi teopuere ainakia.<sup>42</sup> Iesu eaparinakia temai herena ehina benakia etibaha, "Wai to'ibina. Rama haeai haukia ekia maearima tiobia ainakia, ia hanona taburai maearima te'uai ainakia, haeamona ekia hiabuai maearima te'imanaikia.<sup>43</sup> 'A wai baiatamiai hanona ua homana aha'i, tai apa'ua keraonana hauna hanona ta'arami ia'inai keao.<sup>44</sup> Tai nenuatae ke'uai hauna hanona wai ikoimiai ta'arami ia'inai haunai keao.<sup>45</sup> Pokina au Maearima Nahuna amai hanona ta'ara'u a'i katea'i, 'a ta'ara ka'i paunai amai, abonamo e'u mauri kababenai maearima bo'ona kakawanakia katemauri."

*Iesu Batimeo Mahana Ebamanakia.*

(Mt 20.29-34; Lk 18.35-43)

<sup>46</sup> Ia Ierikoai tekara'au. Iesu haeamona i'abana haukia mai maearima bo'ona kipokia Ieriko tihabona, taeara hainai maha ki'a hauna atana Batimeo (anina hanona Timeo nahuna) emiati weia enoi ba'ame.<sup>47</sup> Hau weiana Iesu Nasareta hauna atana tehinana 'uruna eona raninai, beronai eapari etibaha, "Iesu Davida nahuna e! Moaoko'o aina'u."<sup>48</sup> Maearima tehore terikena 'uruna keaha'i, 'a ia hanona eapari hao apari hao eapari 'aota etibaha, "Davida nahuna e! Moaoko'o aina'u."<sup>49</sup> Iesu ekoroti, ehina benakia etibaha, "Tomoaparina." Ua buonai ia tehore maha ki'a hauna tehinana bena, "Aomu menamo, momikiri, ia hanona oi niaparini'o."<sup>50</sup> Beronai ena habuni iro'abuna ene'ena, emikiri eka'a eao Iesu herena.<sup>51</sup> Iesu ia

ebakaina etibaha, "Taba nonu-  
atae aina kababaina heremuai?"  
Maha ki'a hauna e'abi etibaha,  
"Ba'iobi haumu e. Nanuatae  
maha'u pobano'anakia."<sup>52</sup> Iesu  
ehina bena etibaha, "Moao,  
emu a'ikakauma ehore aba eba  
maurini'o." Mahana aba teno'a,  
weiana Iesu murinai eka'a.

## 11

*Iesu Ierusalemai Ekatoto Obia  
Arana 'Abana.*  
(Mt 21.1-11; Lk 19.28-40; Io  
12.12-19)

<sup>1</sup> Ierusalem tetabuna teao, temai Olibe oeonai, Betefage Betani herekiae, weia Iesu i'abana haukia rua euhu 'uainakia,<sup>2</sup> e'abi etibaha, "Katoao aiara weiana wairakai hauna aonai katokatoto, doniki nahu ha katotabu ahina hau ha a'i nemia'au 'apua hauna ua'a aba tetoba 'au, katorubuna katomaiaina.<sup>3</sup> Hau ha kebakainimi, ketibaha, 'Taba buonai naiana tubabaina?' raninai, katohina bena katotibaha, 'Obiapaka nenuatae aina, rani papana haeamona kemueaina.'<sup>4</sup> Terarua teao doniki nahu ha tetabu ahina aiara ibuanai itu ha pa'abina 'akonai itoba 'au teihana. Terubuna aonai,<sup>5</sup> maearima baika weia tekoroti haukia tebakinakia, tetibaha, "Taba buonai doniki nahu torubuna?"<sup>6</sup> Iesu ehi-nana ihobonai mo maearima weiakia tehina benakia hanona tehabonakia.<sup>7</sup> Doniki nahu tema-iaina Iesu herena raninai, kapenai ekia habuni teabari 'aunakia, ba Iesu emia'au.<sup>8</sup> Maearima bo'ona ekia habuni taearai teabari, 'a baika hanona taeara haianai matiu raukia tehara huri teabarnakia.<sup>9</sup> Wairanai mai murinai teka'a haukia teio tetibaha, "Hosana! Obiapaka atanai nimai hauna hamabanamona.<sup>10</sup> 'Aba'abaka Davida ena obia aiarana aba nimai hauna hamabanamona.

Hosana,\*

'ubi toha tohana Tiramana hamabanamona."

<sup>11</sup> Iesu Ierusalemai ekara'au Marea Robe aonai ekatoto, taba ikoikiae eihanakia, ia beraura eko'iko'i buonai i'abana haukia harau haea rua kipokia temue teao Betani.

*Iesu Suke Matiuna Ena.  
(Mt 21.18-19)*

<sup>12</sup> Erani Betani tehabona hanona Iesu mare'a e'ari.<sup>13</sup> Suke mai rauna atau'ai eihana, eao herena keiha haraina buana ha re'a, rau 'abaeakia mo taba aha'i etabu ahina, pokina Suke ekia bua'a ranina aha'i.<sup>14</sup> Iesu matiu weiana ehina bena etibaha, "Oi buabamu hau ha a'i keani 'apuana keao mo banai banai." I'abana haukia aiana weiana teona.

*Iesu Marea Robe ai Etoto.  
(Mt 21.12-17; Lk 19.45-48; Io  
2.13-22)*

<sup>15</sup> Ierusalemai tekara'au, Iesu Marea Robe ai ekatoto kawakawa haukia eu'u ahinakia, moni tia'i banai haukia ekia itara ebaku'a banainakia haeamona rauria tikawakawa ainakia haukia ekia imia'au tabakia etori ku'a banainakia.<sup>16</sup> Iesu ekia taeara ekaiabunakia ha ena kawakawa tabana a'i kebua banaina Marea Robe i'aeana aonai.<sup>17</sup> Weiana maearima eba'ibinakia etibaha, "Puka Robenai tererena, Tirama e'abi, 'E'u itu hanona maearima ikoikiae kateaparina ekia bahuba'ari ituna', ia wai aba kakikaki haukia ekia paparo'ai tubaona."

<sup>18</sup> Robe haukia apa'uakia mai Rauhubu poki haukia 'uru neiana teona buonai, iahu'arina taearana tetabuna, ia tetau aina pokina maearima ikoikiae hanona ena ba'iobi 'abikia weiakia teaonamo ainakia buonai.<sup>19</sup> Rabirabi hanona aiara apa'uana weiana tehabona.

*Suke Matiuna Aba Epaea.  
(Mt 21.20-22)*

\* **11:10:** (10) anina 'Kebamaurinamai'

<sup>20</sup> Raurani tekabananai raninai, Suke weiana teihana aba e'ororo eao mo ramunai epua. <sup>21</sup> Petero eraona tinana ba Iesu ehina bina etibaha, "Ba'iobi haumu e! Moihana. Suke orikena hanuna hanona aba e'ororo." <sup>22</sup> Iesu ehina benakia etibaha, "Tirama katoa'ikakauma. <sup>23</sup> 'Abi tohana au wai nahina benimi. Hau ha oeo neiana pehina bina, 'Kipomu momikiri 'aku aonai moeno uhu', kebatohana aona a'i kekai'au kai'au raninai tabana kerama. Ia nenuatae aina hanona kea'ina. <sup>24</sup> Ua buonai au wai nahina benimi, tonuatae ainakia tabakia ikoikiai bahuba'ari ai katono, weiana katoa'ikakauma hanona katotabu ahinakia wai 'eumi.

<sup>25</sup> Weiana bahuba'ari aokiai katokoroti raninai, tea'i ki'animi haukia ekia ki'a katohina haonakia, ba Hamami kupai hanuna emi ki'a abomo kehina haonakia. <sup>26</sup> A ekia ki'a a'i katohina haonakia raninai, Hamami kupai nemiaho hanuna emi ki'a abomo a'i kehina haonakia."

*Iesu Ena Hiabu Tebakai bakai Aina.*

(Mt 21.23-27; Lk 20.1-8)

<sup>27</sup> Haeamona Ierusalemai tekara'au, Iesu eao Marea Robe wairanai nikabanai aonai, Robe haukia apa'uakia, Rauhubu poki haukia, abomo aiara haukia apa'uakia teao Iesu herena. <sup>28</sup> Tebakaina, te'abi tetibaha, "Hiabu tabanai aka neiakia nubabainakia, abomo tai hiabu ebeni'o?"

<sup>29</sup> Iesu e'abi etibaha, "Au abomo bakaibakai ha kabeni, anina katobena'u raninai tai ena hiabu aka neiakia nababai hanona kaba'iobinimi. <sup>30</sup> Ioane ena ba'uere robe hanona kupai emai 'ao maearima herekiai emai? Tomo'abi."

<sup>31</sup> Kipokia baiatakiai terobahu aina tetibaha, "Kaha'abi kupai emai' raninai kebakainaka 'Taba buonai a'i tubatohana?' <sup>32</sup> Ao kaha'abi 'Maearima herekiai emai re'a'..." Ia maearima mo teta'u ainakia, pokina maearima ikoinai

te'jobina Ioane hanona maha bina hauna tohana. <sup>33</sup> Weiana ia Iesu tehina bina tetibaha, "A'i ta'jobina." Iesu abomo ehina benakia etibaha, "Au abo'umo hi-abu tabanai aka neiakia nababai hanona a'i kaba'iobinimi."

## 12

*'Abi Ibabataina Haharua I'mana Haukia.*

(Mt 21.33-46; Lk 20.9-19)

<sup>1</sup> Iesu ehore 'abi ibabatainai ehina benakia etibaha "Hau ha bine haharua ebabaina, arana ea'i abuna, bine buakia ibahari iti'itikia 'urina ehabina, mai iha 'inina ituna ebabaina. Maearima baika ebenakia kate'imana, 'a ia hanona harima eao. <sup>2</sup> Bine te'aiba raninai hau weiana ena ta'ara ia'ina hauna ha euhuna eao haharua te'imana haukia herekia. Bine anikia harua herekiai kea'inakia. <sup>3</sup> A haharua i'mana haukia tehore ta'ara ia'ina hauna tea'i 'inina, te'atina, teuhuna imana 'abaeana emue.

<sup>4</sup> Haeamona poki hauna ta'ara ia'ina hauna ha euhuna eao herekia hanona 'arana tebaman'i ana abomo teba haumaeana. <sup>5</sup> Haeamona ena ta'ara ia'ina hauna ha euhuna eao hanona teahu 'arina. Bo'okia euhunakia teao, baika teahu ki'anakia, ia baika hanona teahu 'arinakia. <sup>6</sup> Hamona emiaho keuhuna hauna hanona nahuna niraona'au aina hauna. Orena 'akinai ia euhuna, e'abi etibaha, 'Naha'u neiana kauhuna keao hanona aba katemariki aina.' <sup>7</sup> Ia haharua i'mana haukia teroba ahu, te'abi tetibaha, 'Tomai, neiana hanona haharua poki hauna nahuna, hamahu 'arina, ena haharua neiana hanona aika 'eukai keao.'

<sup>8</sup> Ua buonai tea'i 'inina, teahu 'arina, hauanina tekapo banaina haharua murinai."

<sup>9</sup> Iesu ia ebakainakia etibaha, "turaonana, haharua poki hauna hanona taba kebabaina? Ia kemai haharua i'mana haukia keahu 'arinakia, bine haharua kea'ina maearima baika kebenakia kate'imana.

<sup>10</sup> Puka Robenai tererena hauna a'i totuabina? Na e'abi aiho, 'Itu ibabaina haukia tebaoao aina piharana hanona itu ibua 'inina kupuana piharana namonai eao. <sup>11</sup> Neiana hanona Obiapaka ena babai, nahaihana nahata'u ta'u huri!"

Sal 118.22, 23

<sup>12</sup> Iuda haukia apa'uakia Iesu ia'i 'inina teraonana pokina te'io bina 'abi ibabataina hanona ia ahakiai ehinana. Ia maearima tet'a'u ainakia buonai tehabona teka'a.

*Takiti Baibenit Bakai bakaina.  
(Mt 22.15-22; Lk 20.20-26)*

<sup>13</sup> Muriae ia tehore Parisea haukia mai Heroda titaina haukia baika teuhunakia teao Iesu herena bakai bakai ai katebarewana. <sup>14</sup> Ba teao herena tebakaina tetibaha, "Ba'iobi haumu e, ai ta'iobina oi hanona 'abi tohakia nohina, maearima ekia raona 'abikia a'i nuta'u ainakia, ia aea homakia robakia a'i nuahu, ia Tirama ena taeara tohanai mo nuba'iobi. Ba 'ara kahahore Kaisara herenai hanona ebero 'ao aha'i?

<sup>15</sup> 'Ara kahahore 'ao aha'i?" Iesu ekia bai'oi weiana e'io bina, ebakainakia etibaha, "Taba buonai tuhobona'u! Moni ha tomaiaina, maihana." <sup>16</sup> Moni ha temaiaina tebena hanona ebakainakia etibaha, "Neiana hanona tai aubaubana? Mai tai atana?" Ia te'abi, "Kaisara 'euna." <sup>17</sup> Iesu ehina benakia etibaha, "Kaisara 'euna Kaisara katobena, Tirama 'euna Tirama katobena." Weiana teona hanona tet'uta'u huri.

*Hawainibe Bakai bakaina  
Weiana 'Ariai Mikiri Mue Murinai Hauna.*

*(Mt 22.23-33; Lk 20.27-40)*

<sup>18</sup> Sadukea haukia mikiri mue a'i tibatohana haukia baika ekia bakaibakai ha teaoaina Iesu herena. <sup>19</sup> Tebakaina tetibaha, "Ba'iobi haumu e, Mose na erere aihona, 'Hau ha nahuna aha'i ke'ari wapuna kemiah, 'ari hauna hatina

kehore wapu weiana keatawana nahuna kebaramanakia 'ari hauna 'euna.' <sup>20</sup> Ba bariu a'a hati ikoikiai 'abaihau hamomo. Pakana ehawainibe, nahuna aha'i e'ari. <sup>21</sup> Hatina ibaruana wapu weiana eatawana, nahuna aha'i e'ari. Hatikia ibaihauna abomo uahomana herenai erama. <sup>22</sup> Te'abaihau hamomo babi'e weiana hamona teatawana, ia ha nahuna a'i ebaramana. Muri 'akinai babi'e abomo e'ari. <sup>23</sup> Hau 'abaihau hamomo ikoikiai teatawana, ba mikiri mueai hanona tai atawana tohanai keao?"

<sup>24</sup> Iesu ehina benakia etibaha, "Wai hanona tobego pokina Puka Robena anina a'i to'io bina abomo Tirama ena hiabu a'i to'io bina. <sup>25</sup> 'Ari haukia katemikiri raninai ia hanona aneru kupai haukia 'abakia, a'i katehawainibe.

<sup>26</sup> 'Ariai katemikiri mue 'abina a'i to'io bina, Mose ena Pukai a'i totuabina? Arabu e'ara 'ekanai Tirama Mose ehina bena, 'Bariu Au hanona Aberahamo ena Tirama, Isako ena Tirama, Iakobo ena Tirama.' <sup>27</sup> Tirama ua e'abi aiho buonai aika kaha'iobina, Ia hanona 'ari haukia ekia Tirama aha'i, ia mauri haukia ekia Tirama. Wai tohaorea ki'a baha."

*Rauhubu Apa'uana Tohana.  
(Mt 22.34-40; Lk 10.25-28)*

<sup>28</sup> Rauhubu poki hauna ha weia ekia baihara tae 'uruna ebahu aina, ebabataina, Iesu Sadukea haukia ekia bakaibakai 'arana ebamue haraina. Ba ia ehore Iesu ebakaina etibaha, "Rauhubu ikoikiai, aeana hauna ikoikiai 'arakiai?" <sup>29</sup> Iesu ehina bena etibaha, "Ikoikiai 'arakiai hauna neiana. 'Isaraela haumi e, aia tomona. Obiapaka eka Tirama hanona Obiapaka hamomona mo. <sup>30</sup> Obiapaka emu Tirama koraona'au aina, mai aomu ikoinai, mai aubamu ikoinai, mai emu raona ikoinai, mai taburamu ikoinai." <sup>31</sup> Ibaruana hanona neiana. 'Heremuai hauna abomo

koraona'au aina, kipomu nuraona'au aini'o 'abana.' Rauhubu ua'a ha a'i nemiaho neiakia rua 'araki.'<sup>32</sup> Hau weiana e'abi etibaha, "Ba'iobi haumu e, oi hanona obero. O'abi harai, Tirama hanona hamona mo, ha ua'a aha'i."<sup>33</sup> Haeamona Tirama kaharaona'au aina mai aoka ikoinal, mai eka raona ikoinal, mai eka tabura ikoinal, weiana herekai nemiaho hauna kaharaona'au aina hanona eapa'ua ki'a baha ba mahi mai barobe tabakai ikoikiai kahabaibenai Tirama wairanai."

<sup>34</sup> Iesu hau weiana eihana, e'abi harai buonai ehina bena etibaha, "Oi mai Tirama ena obia aiarana hanona baiatami a'i ehoma'a." Weiana murinai maearima ia katebakaina hanona teta'u.

*Keriso Ebakai bakai Ainakia.  
(Mt 22.41-46; Lk 20.41-44)*

<sup>35</sup> Iesu Marea Robe aonai eba'iobi raninai maearima ebakainakia etibaha, "Aehoma buonai Rauhubu poki haukia ti'abi, 'Keriso hanona Davida Nahuna?'"<sup>36</sup> Weiana hanona Auba Robe hiabunai Davida pinanai e'abi etibaha,  
'Obiapaka hanona e'u obia  
ehina bena etibaha,  
Itipa'u tainai momiati  
keao mo emu 'ou haukia ikoikiai  
'apumu ba'anai kahorotinakia.'

Sal 110.1  
<sup>37</sup> Davida kipona ehore Keriso eaparina Obiapaka raninai, aea homanai mo ia nahunai keao?" Mako tebahu haukia mai aonamokia ia aiana teona.

*Rauhubu Poki Haukia Kate'ima  
'ima Harainakia.  
(Mt 23.1-36; Lk 20.45-47)*

<sup>38</sup> Haeamona eba'iobi muenakia, etibaha, "Rauhubu poki haukia herekiai kato'ima 'ima harainimi, ia hanona habuni homa'akia tibatotonakia tikabanai kabanai taearai mai kawakawa 'ekakiai, ekia nuatae hanona maearima ia katehanakia katemariki ainakia."<sup>39</sup> Haeamona marea aokiai ekia nuatae imia'au namokiai katemia'au, tatu aokiai

abomo 'eka apa'uakia namokiai mo katemia'au.<sup>40</sup> Wapu ekia itu tiba'arenakia, ekia bahuba'ari tibahoma'a ki'anakia kateihanakia buonai. Maearima uahomakia hanona ki'a rarina 'akina katetabu ahina."

*Wapu Ena Baibenai.  
(Lk 21.1-4)*

<sup>41</sup> Iesu Marea Robe aonai beruberu mauana wairanai emiati, to'u haukia ekia moni mauai teuta eihanakia, obia haukia bo'ona hanona ekia moni bo'okia teuta.<sup>42</sup> Ia wapu uraruna ha emai, ena moni papakia rua emaiainakia eutanakia, ekia ihobo hanona pene hamona 'abana.<sup>43</sup> I'abana haukia eaparinakia teao herena ehina benakia etibaha, "Abi tohana au wai nahina benimi, wapu uraruna weiana eutana hauna hanona eapa'ua ki'a baha ba ia ikoikiai teuta haukia.<sup>44</sup> Pokina obia haukia ekia moni tebo'o ia papakia mo teuta, 'a wapu uraruna hanona ena tabu ahi tabana keaniani aina hauna maikoina eutana."

## 13

*Iesu Marea Robe Kerabu Ta'ina Pouna Ehinana.  
(Mt 24.1-2; Lk 21.5-6)*

<sup>1</sup> Iesu Marea Robeai ekarahi aonai, i'abana hauna ha ehore ehina bena etibaha, "Ba'iobi haumu e, Marea Robe namo abuna piharai tebabaina, moi-hana."<sup>2</sup> Iesu e'abi etibaha, "Itu rarikia 'akikia neiakia noi-hanakia?" Maikoikiai katerabu tai ore, katehere obo, pihara ha pihara ha ahanai a'i keno'au a'i kemiaho."

*Kate'oinimi Mai Kateba haiaranimi.  
(Mt 24.3-14; Lk 21.7-19)*

<sup>3</sup> Iesu Olibe qeonai emiati Marea Robe ewairana, Petero, Iakobo, Ioane mai Anderea abomo teao herena tebakai bunina.<sup>4</sup> "Moba'iobinamai, taba neiakia aita katerama?" Haeamona katerama ranina hoana hanona aea homana?"

<sup>5</sup> Iesu ehina benakia, etibaha, ‘Kato’ima ‘ima harainimi, hau ha a’i me’oinimi. <sup>6</sup> Maearima bo’okia au ata’uai katemai kate’abi katetibaha, ‘Au hanona Keriso’, maearima bo’okia kate’oinakia.

<sup>7</sup> “Huari ‘urukia mai poukia kato’o raninai, nuami a’i katetae, taba neiakia katerama, ia puana hanona wairai. <sup>8</sup> Itubu ha kemikiri itubu ha kehuarina, hanopaka ha kemikiri hanopaka ha kehuarina. Kanokau keka’a ‘eka haeai haeai, ‘arobo rarikia katerama. Neiakia hanona matoha miori nirama hararana koriiuaina ‘abana.

<sup>9</sup> “Kipomi kato’ima ‘ima harainimi, pokina katea’i ‘ininimi bakai ‘ekakiai katehorotinimi marea aokiai kate’atirimi. Au pau’uai rauhubu haukia mai hanopaka obiakia wairakiai katokoroti, herekiai pou’u kato hinana. <sup>10</sup> Puana hanona a’i kemai baha keao mo pou namona kateiroro aina itubu ikoikiai herekiai. <sup>11</sup> KATEA’I ‘ININIMI BAKAI ‘EKANAI KATEHOROTINIMI RANINAI, taba katouahina hauna a’i katoraonana, rani ketaina kebenimi ‘abina mo kato hinana, pokina wai a’i kato’abi, ia Auba Robe ke’abi. <sup>12</sup> A’A hati katehore kipokia hinahinakia katehinahina, hama katehore nahukia hinahinakia katehinahina kateahu ‘arinakia. Nahu katehore hinakia hamakia kateba ki’anakia kateaoainakia, kateahu ‘arinakia. <sup>13</sup> Au pau’uai maearima ikoinai kate’oatanimi, ia tai kebapahihi keao puuanai hauna hanona kemauri.

*Orenai Rani Ki’ a Obona Tohana.  
(Mt 24.15-28; Lk 21.20-24)*

<sup>14</sup> “Baki’ a mai bata’u hauna a’i pekoroti ‘ekanai kekoroti katoi hana. (Tuabituabi haumu, ‘abi neiana anina ko’iobi haraina.) Rani weianai Iudeai temiaho haukia hanona katebeau ‘akauma kobio kateao. <sup>15</sup> Maearima ha ena itu kapenai re’ a ia hanona a’i keriri itu aonai a’i ketoto ena taba a’i kea’inakia, ia kebeau ‘akaumana. <sup>16</sup> Umai niaka hauna

abomo a’i kemue itu ena habuni a’i kea’ina. <sup>17</sup> Rani weiakia aokiai babi’e mai nuakia haeamona batutu babi’ekia herekiai hanona keki’ a ki’ a baha, <sup>18</sup> Katobahuba’ari Tirama herenai taba neiakia ‘ipi mai hiribo aokiai a’i katerama. <sup>19</sup> Pokina rani weiakia ekia ki’ a hanona kateki’ a ki’ a baha, ba Tirama hanopaka ebabai ramana raninai emai mo bariu rani neiana ena ki’ a kipokia a’i katei-hobo ‘apua, muriai haeamona uahomana ha a’i kerama mue. <sup>20</sup> ‘A Obiapaka rani weiakia a’i pebak’ onakia hanona tai ha a’i pemauri ‘apua, ‘a ia ena a’itaea maearimakia buokiai rani weiakia kebak’ onakia.

<sup>21</sup> “Rani weianai hau ha kehina benimi, Tomoihana, Keriso neiana’ ‘ao Tomoihana, Keriso weiana’ hanona a’i katobatohana. <sup>22</sup> Pokina Keriso bai’oikia mai mahabanai bai’oikia haukia katemai, hoa haeai haeai mai hiabu haeai haeai katebabai, ekia nuatae hanona Tirama ena a’i taea maearimakia kate ‘oinakia, iamo a’i ketainakia. <sup>23</sup> Ua buonai kato’ima ‘ima harainimi, wairai ua’ a a’i tirama baha tabakia ikoikiai aba naba’iobinimi.

*Au Maearima Nahuna kamai.  
(Mt 24.29-31; Lk 21.25-28)*

<sup>24</sup> “Ki’ a weiana keore murinai, Beraura hanona kewapura abuna, nawa a’i kerara.

<sup>25</sup> Bihiu kupai kate’eho, abomo kupai hiabu tabakia haeai haeai kateibiuihi.

*Isa 13.10; 34.4*

<sup>26</sup> Rani weianai maearima hanona au Maearima Nahuna kateihana’u ‘auhao ahanai kamai mai hiabu’u abomo mai nuabi’u. <sup>27</sup> Weiana e’u aneru kauhunakia kateao ‘uni puakia bani baura timai ‘ekakiai, e’u a’itaea maearimakia katebararonakia hanopaka puana keao puana

*Kuropou Kahaihana.*

*(Mt 24.32-35; Lk 21.29-33)*

<sup>28</sup> “Kuropou herenai ihaiha namona katoi hana, Kuropou

kehuhubu rauna mahamahakia katoihanakia hanona kato'io bina ihau aba nikaibari.<sup>29</sup> Wai abomimo taba nahomakia katoihanakia raninai kato'io bina ia aba herekai pa'abi 'akonai.<sup>30</sup> 'Abi tohana au wai nahina benimi, uru neiana a'i keore baha keao mo taba neiakia katerama.<sup>31</sup> Kupa mai hanopaka kate'akauma, ia au e'u 'abi hanona a'i ke'akauma.

*Tai Ha A'i E'io bina Rani Tabanai.*  
(Mt 24.36-44)

<sup>32</sup> "Beraura hoana 'ao ranina tai ha a'i e'io bina, ena aneru kupai a'i te'io bina, Nahuna abomo a'i e'io bina, ia Hamana ikupai ana mo e'io bina.

<sup>33</sup> "Katomaha no'a, katobai'ima pokina rani kemai hanona wai a'i to'io bina. <sup>34</sup> Ihobona hau ha harima eao raninai, ena ta'ara'i haukia hiabu ebenakia ena itu kate'imana, ha ha ekia aka katebabai abomo pa'abi i'imana hauna ehina bema kemaha no'a keba'i'ima. <sup>35</sup> Ua buonai wai katobai'ima, pokina itu hauna ena mue hanona a'i to'io bina rabi, wapuka'a, kokoro'u ai, 'ao rani tainai kemai. <sup>36</sup> Ia kebata'u kemai re'a, parua reami a'i metabu ahinimi. <sup>37</sup> Wai nahina benimi 'abina maearima ikoikiai abomo nahina benakia natibaha, 'Katobai'ima!'"

## 14

*Iesu Kateahu 'arina Taearana Tetabuna.*  
(Mt 26.1-5; Lk 22.1-2; Io 11.45-53)

<sup>1</sup> Beraura rua wairai temiaho Kabanai mai Parawa 'abaeana tatuna. Robe haukia apa'uakia mai rauhubu poki haukia tebahamomo terobahu, bunianai taeara tetabu Iesu katea'ina kateahu 'arina. <sup>2</sup> Tetibaha, "Aika tatu weiana aonai a'i kahababaina. To'u haukia 'uri'uri rarina a'i temebabaina ta'una."

*Babi'e Ha Iesu 'Arana Tehoro Eheina.*  
(Mt 26.6-13; Io 12.1-8)

<sup>3</sup> Iesu hanona Betaniai, Simona morumoru hauna ena ituai, ua'a nianiani aonai, babi'e ha tehoro (atana Nado) timina 'orimona abomo 'arana rarina 'akina hauna kabapu namona 'akina eaoaina. Ba eahu pa'ana Iesu 'aranai eheina. <sup>4</sup> Maearima baika weia hanona teopuere, kipokia ba-iatakiai te'abi'abi tetibaha, "Taba buonai tehoro neiana nibaore 'abaeana? <sup>5</sup> Mekawakawaina pa'e Kina hinabu aihau petabu ahina, monina weiana hanona uraru haukia pebenakia." Ia tehore babi'e weiana teururuai ki'ana. <sup>6</sup> 'A Iesu ehina benakia etibaha, "Tomohabona! Taba buonai tuopuere aina? Ia hanona aka namona au here'u ai ebabaina. <sup>7</sup> A uraru haukia hanona rani ikoinai heremai temiaho, katonuatae raninai rani tebo'o emi banamo tabakia katobenakia. Ia au hanona rani ikoinai heremai a'i kamiaho. <sup>8</sup> Ena 'jobi ihobonai ebabaina here'u ai. A'i tinore bahana'u, ia hau'u tehoroai eutuna, wairai kerama hauna eba'oru baihana. <sup>9</sup> 'Abi toha tohana mo au wai nahina benimi, Pou Namona kateiroro aina hanopaka maikoinai babi'e neiana aka ebabaina hauna abomo katehinana, ia iraonana."

*Iuda Kehinahina Eao.*  
(Mt 26.14-16; Lk 22.3-6)

<sup>10</sup> Iuda Isakariote hauna harau haea rua haukia 'abakia ha eao Robe haukia apa'uakia herekia Iesu hinahinana kehinahina. <sup>11</sup> Robe haukia apa'uakia Iuda herenai 'uru weiana teona hanona aokia enamo ki'a, te'abi'uai moni katebena, ua buonai Iuda taeara etabu, taeara namona tabanai hanona Iesu robe haukia apa'uakia imakiai keutana katea'ina.

*Iesu I'abana Haukia Kipokia Ekia Kabanai Tatuna Teaniani.*  
(Mt 26.17-25; Lk 22.7-14, 21-23; Io 13.21-30)

<sup>12</sup> Parawa 'abaeana tatuna wapuna kori'uaina Kabanai tatuna mamoekia iahu'arikia berauranai, Iesu i'abana haukia tehore tebakaina tetibaha, "Nuraonana Kabanai tatuna anianina ae'e kataba'oruna koani." <sup>13</sup> Iesu i'abana haukia rua euhunakia, e'abi etibaha, "Katoao aiara aonai katokatoto, ua'a hau ha katoihana puou mai beina kebuana, murinai kato'au katoao." <sup>14</sup> Ketoto itunai itu poki hauna katohina bena katotibaha, 'Ba'iobi hauna e'abi, bakibaki ikaihurina ae'e ai? I'aba'u haukia kipokia Kabanai tatuna anianina katani.' <sup>15</sup> Ba ia kipona ikaihuri rarina ha 'ubiai aba e'oru hauna keba ihanimi. Weia eka aniani katoa'ia'i haraina." <sup>16</sup> I'abana haukia teao, aiara aonai tekatoto hanona Iesu ehina benakia tabakia ikoikiai tetabu ahinakia. Kabanai tatuna anianina tea'ia'i haraina.

<sup>17</sup> Rabirabi eaoaina aonai, Iesu i'abana haukia harauhaea rua kipokia temai. <sup>18</sup> Aniani 'ekanai temiati tianiani aonai, Iesu ehina benakia etibaha, "Abi tohana au wai nahina benimi, baiatamiai tararua taniani oioi hauna ha au hinahina'u kehinahina." <sup>19</sup> I'abana haukia aokia earo'ari, weiana ha ha tebakaina, "Nuraonana au, 'ao?" <sup>20</sup> Iesu ekia 'abi ebamuena etibaha, "Wai harauhaea rua haumi ha, tararua 'ororo hamonai tahao uta hauna. <sup>21</sup> Au Maearima Nahuna hanona ka'ari Puka Robenai ererena ihobona, 'a au Maearima Nahuna hinahina'u kehinahina hauna aoko'ona mo, ki'a rarina 'akina ketabu ahina, a'i perama hanona penamo."

### *Obiapaka Ena Anito'u.*

(Mt 26.26-30; Lk 22.14-20; 1Kr 11.23-25)

<sup>22</sup> Teaniani aonai, Iesu ehore parawa ea'ina, Tirama ebanamona ba eholina, i'abana haukia ebenakia, e'abi etibaha, "Tomoa'ina, tomoana! Neiana hauna au hauani'u." <sup>23</sup> Haeamona 'ere ha ea'ina, Tirama ebanamona i'abana

haukia ebenakia, ikoikiai teinu. <sup>24</sup> Iesu e'abi etibaha, "Neiana hanona au aruaru'u maearima bo'okia paukiai kekiki oioi. Au aruaru'u hanona maearima mai Tirama ekia baibua 'abi'uaina mahamahana ibatohana hoana. <sup>25</sup> Au wai nahina benimi, bine beina ha a'i kainu mue keao mo Tirama ena obia aiarana aonai mahamahana kainu."

<sup>26</sup> Epua hui ha tea'ina, ba tekarahi Olibe oeona teao.

*Iesu Petero Kehinana 'Abina Ehina 'Uaina.*

(Mt 26.31-35; Lk 22.31-34; Io 13.36-38)

<sup>27</sup> Iesu i'abana haukia ehina benakia etibaha, "Ikoimiai katohabona'u katobeau otaraina, pokina Puka Robenai tererena, 'Au kahore mamoe i'imakia hauna kakomo 'arina, weiana mamoe ikoinai katebeau otaraina.'

Sek 13.7

<sup>28</sup> 'A au 'ariai kamikiri mue murinai ka'uai kaeao Galilea."

<sup>29</sup> Petero ehore Iesu ehina bena etibaha, "Aba'u neiakia ikoikiai oi katehaboni'o re'a, ia au hanona a'i kababo 'apuani'o." <sup>30</sup> Iesu Petero ehina bena etibaha, "Abi tohana au oi nahina beni'o, bariu rabi neiana kokoro'u ibaruana a'i ke'arara baha aonai, oi rani aihau au kobuniai aina'u." <sup>31</sup> Petero e'abi pahihi etibaha, "Aika hararua kaha'ari haeamo re'a, 'a au hanona oi a'i kabuniai 'apuani'o." I'abana haukia ikoikiai abomo ua te'abi aiho.

*Iesu Getesemane ai Ebahuba'ari.*  
(Mt 26.36-46; Lk 22.39-46)

<sup>32</sup> Eka ha atana Getesemane ai tekara'au. Weiana Iesu i'abana haukia ehina benakia etibaha, "Wai na'a tomoiati, au kaeao kabahuba'ari." <sup>33</sup> Ba Petero, Iakobo, mai Ioane mo ebaka'anakia, aona e'abe'abe abomo earo'ari.

<sup>34</sup> Ua buonai ehina benakia etibaha, "Au hanona auba'u nihaiara matoha pa'ari moioina. Neia kato miaho, katomaha no'a katobai'ima."

<sup>35</sup> Papana eka'a ha ha 'apua eao, ba 'anoai e'umuti, ebahuba'ari, pe mai taearana haiara ranina weiana ia herenai pekaobo. <sup>36</sup> Ia ebahuba'ari etibaha, "Hama'u e, Hama'u e, taba ikoikiai heremuai hanona tetai, 'Ere neiana here'uai poa'i obona. 'A au e'u nuataae aha'i, ia oi emu nuataae mo."

<sup>37</sup> Iesu emue emai i'abana haukia aihau parua reakia etabu ahinakia, ia ehore Petero ehina bera etibaha, "Simona e, oi nuparua, 'u? Rani papana pomaha no'a pobai'ima a'i petaina? <sup>38</sup> Katobahuba'ari kato bai'ima, pokina baihobo ai a'i tomototo. Auba hanona nenuataae tabura, ia hauani mo ni'abe'abe."

<sup>39</sup> Haeamona emue eao ebahuba'ari, ena bahuba'ari 'abikia haeamokia ehina muenakia. <sup>40</sup> Weiana emue emai, teihau parua reakia etabu ahinakia, pokina mahakia tepuma buonai, herenai 'abi tabana katebamuena hanona a'i te'ioina.

<sup>41</sup> Rani ibaihauna emue emai, ehina benakia etibaha, "Wai tuparua oho mo tuarai. Hinoku'u, tomoihana ranina aba ekara'au. Maearima Nahuna hanona ki'a haukia imakiai aba enouta. <sup>42</sup> Tomomikiri hamaka'a, hinahina'u ehinahina hauna aba nimai."

*Iesu Tea'i Inina.*  
(Mt 26.47-56; Lk 22.47-53; Io 18.3-12)

<sup>43</sup> Iesu ni'abi oho mo aonai, Iuda weiana harauhaea rua haukia 'abakia ha hauna ekara'au, mako rarina imakia mai pura'akia abomo mai karebakia murinai te'au, ikoikiai hanona Robe haukia apa'uakia mai Rauhubu poki haukia mai aiara haukia apa'uakia ekia 'abiai teao. <sup>44</sup> Hinahina hauna mako weiana aba ehina benakia etibaha, 'Kapauna hauna hanona hau mo weiana katoa'i 'inina katoaoaina.'

<sup>45</sup> Iuda ekarahi beronai eao Iesu herena, "Ba'iobi haumu e." Ba epauna. <sup>46</sup> Murinai Iesu tea'ina ba

tebirina. <sup>47</sup> A Iesu kipokia tekoroti haeamo hauna ha emikiri kareba eberi 'auna, Robe haukia 'arakiai hauna ena ta'ara'i hauna haiana ehara obona. <sup>48</sup> Iesu ehore ehina benakia etibaha, "Wai imami mai karebakia mai pura'akia tomai au katoa'ina'u ihobona kakikaki hau'u ai tubaona'u. <sup>49</sup> Rani ikoikiai au hanona wai kipokia Marea Robe aonai aba'iohi, ia a'i toa'ina'u. 'A neiana hanona Puka Robeai terere 'uaina 'abina ketohana paunai." <sup>50</sup> Weiana i'abana haukia ikoikiai Iesu tehabona tebeau otaraina.

<sup>51</sup> Hau 'aru'aruna ha Iesu murinai e'au, habuni hamona mo ero'abuna. Maearima tehore hau weiana tea'i 'inina aonai, <sup>52</sup> ena habuni imakiai ehabona hauna 'abaeana ebeau 'akaumana.

*Iesu Iuda Ekia Obia Haukia Wairakiai Ekoroti.*  
(Mt 26.57-68; Lk 22.54-55; Io 18.13-14, 19-24)

<sup>53</sup> Ia tehore Iesu tebaka'ana teaoaina Robe haukia 'arakiai hauna herena, ba Robe haukia apa'uakia, aiara haukia apa'uakia mai Rauhubu poki haukia ikoikiai weia teto'u. <sup>54</sup> Petero hanona Iesu ekaiturina, ia mai baiatokia teao Robe haukia 'arakiai hauna ena ara aonai, ua'a bai'ima haukia baika kipokia temiati haeamo, iruba eraranakia.

<sup>55</sup> Weiana Robe haukia apa'uakia mai Iuda ekia obia haukia tehore Iesu iba'arina taearana tetabuna, ia beho ha a'i tetabu ahina. <sup>56</sup> Maearima bo'ona 'akina tehore hinau 'abikia tehina herenai, ia ekia hinau 'abikia hanona ha a'i teihobo.

<sup>57</sup> Haeamona maearima baika temikiri ekia bai'oi 'abina neiana tehinana Iesu herenai, tetibaha,

<sup>58</sup> "Ai aiana taona, e'abi etibaha, 'Au Marea Robe neiana maearima imakiai tebabaina hauna hanona karubuna, wapu aihau aonai maearima imakiai a'i katebabaina Marea Robena ha kababaina." <sup>59</sup> 'A ekia bai'oi 'abikia neiakia abomo a'i teihobo.

<sup>60</sup> Weiana Robe haukia 'arakiae hauna emikiri to'u wairakiae eko-roti Iesu ebakaina etibaha, "Oi emu 'abi ha aha'i 'abi neiakiae tehina haukiae ahakiae?" <sup>61</sup> A Iesu hanona 'abi ha a'i ehinana abomo ena 'abi a'i ebamuena.

Weiana Robe haukiae hauna haeamona ebakai muena etibaha, "Oi Keriso, tibanamona Tiramana Nahuna, u?" <sup>62</sup> Iesu e'abi etibaha, "Au mo neia'u, ikoimiae hanona au Maearima Nahuna katoihana'u, hiabu 'ubi tohana Tiramana imana itipanai kamiati, kupa 'auhaonai kamai." <sup>63</sup> Robe haukiae 'arakiae hauna 'abi weiana 'uruna eona raninai aona ehaiara ki'a, kipona ena habuni etapana, eio etibaha, "Abi tabana nahatabuna?" <sup>64</sup> Tiramana 'i ki'anai 'abina aba tonai, emi raona taba?" Weiana ikoikiae te'abi, ke'ari.

<sup>65</sup> Weiana baika tehore Iesu te'atotina, haeamona mahana te'apa abuna abomo teahuna, te'abi tetibaha, "Mo'abi, tai ehore eahuni'o?" Ima haukiae abomo tebo'ana.

#### *Petero Iesu Ebuniai aina.*

(Mt 26.69-75; Lk 22.56-62; Io 18.15-18, 25-27)

<sup>66</sup> Petero hanona ara aonai 'anoai, ba Robe haukiae 'arakiae hauna ena ta'ara'i uahona ha emai. <sup>67</sup> Ia Petero iruba nirarana eihana raninal, eiha 'ini'inina ehina bena etibaha, "Oi abomumo Iesu Nasareta hauna o'abana."

<sup>68</sup> A Petero hanona ebuniae etibaha, "Taba robana nuahuna hauna hanona au a'i na'lobina." Ba ekapare eao pa'abi 'akonai. <sup>69</sup> U'a uaho weiana haeamona eiha muena, ba baiaruru haukiae ehina benakiae etibaha, "Abakiae ha neiana." <sup>70</sup> Ia haeamona ebuniae mue.

Rani a'i ehoma'a Petero kipokia tekoroti haeamo haukiae tehina bena tetibaha, "Abi tohana, oi abomumo ia 'abakiae ha. Pokina oi abomo Galilea haumu." <sup>71</sup> Weiana Petero ia ehinabe pahihinakiae etibaha, "Wai taba to'uhina hauna hanona au a'i

na'lobina. Nabai'oi re'a Tirama puma mebena'u." <sup>72</sup> Ba kokoro'u ibaruana e'arara. Weiana Petero Iesu ehinana 'abina eraona tinana, 'Kokoro'u ibaruana a'i ke'arara baha aonai, oi rani aihau kobuniae aina'u.' Weiana ia ehai ki'a.

## 15

#### *Iesu Pilato Wairanai.*

(Mt 27.1-2, 11-14; Lk 23.1-5; Io 18.28-38)

<sup>1</sup> Raurani wapuranae robe haukiae apa'uakiae, aiara haukiae apa'uakiae, rauhubu poki haukiae mai bakai apa'uana haukiae ikoikiae 'abi tebahamomona, Iesu tebirina teaoaina Pilato tebena. <sup>2</sup> Pilato Iesu ebakaina etibaha, "Oi Iuda haukiae ekia Obia 'arana haumu, 'u?" Iesu e'abi etibaha, "Aba nu'abi mo naia."

<sup>3</sup> Robe haukiae apa'uakiae tehore 'abi bo'okiae Iesu ahanai tehina. <sup>4</sup> Pilato haeamona Iesu ebakai muena etibaha, "Oi a'i ko'abi, 'u? Oi o'lobina 'abi haeai haeai oi ahamuai tehinanakiae." <sup>5</sup> A Iesu 'abi ha a'i ebamuena, weiana buonai Pilato ebaaoao.

#### *Pilato E'abi Iesu Kateahu 'Arina.*

(Mt 27.15-26; Lk 23.13-25; Io 18.39—19.16)

<sup>6</sup> Pilato ena hoahoa rani ikoinai tatu aokiae maeearima wapura hauna ha tenuatae aina hauna hanona nibakarahina. <sup>7</sup> Rani weianai hau ha atana Baraba 'abana kipokia tewapura. Ia hanona Roma haukiae te'oatanakiae, 'au aonai maeearima baika eahu 'arinakiae. <sup>8</sup> Ba to'u haukiae tehore Pilato tenoina rani ikoinai hoahoa weiana nibabaina hauna kebabaina. <sup>9</sup> Pilato ehore ebakainakiae etibaha, "Tunuatae Iuda emi Obia 'arana hauna kabakarahina?" <sup>10</sup> Pokina Pilato aba e'lobina robe haukiae apa'uakiae hanona Iesu tiwamuru aina buonai tea'ina ia imanai teutana. <sup>11</sup> A robe haukiae apa'uakiae temikiri to'u haukiae tekai ta'ata'anakiae, kate'abi, Pilato Baraba kebakarahina ia Iesu

hanona kemiaho. <sup>12</sup> Pilato haeamona to'u haukia ebakai muenakia etibaha, "A wai tu'abi Iuda ekia Obia 'arana hauna hanonaaea kahomana?" <sup>13</sup> Ikoikiai teio tetibaha, "Matiu ibiri ropo 'ubinai koba'arina!" <sup>14</sup> Pilato ehore ebakai muenakia etibaha, "Aea ehoma, ena beho taba?" 'A ia teio aota tetibaha, "Matiu ibiri ropo 'ubinai koba'arina!" <sup>15</sup> Weiana Pilato hanona to'u haukia aokia ibanamona enuatae aina buonai Baraba erubuna. 'A Iesu hanona e'atina huari haukia ebenakia, matiu ibiri ropo ahnai kateahu 'arina.

*Huari Haukia Iesu Tebapo'ona.  
(Mt 27.27-31; Io 19.2-3)*

<sup>16</sup> Huari haukia Iesu tebaka'ana teaoaina rauhubu ituna apa'uana aonai ekia hau ikoikiai tebararonakia. <sup>17</sup> Habuni birona tebabatotaina, abomo 'ini boaboa tea'i kaiarona 'aranai tehore 'auna. <sup>18</sup> Ekia bapo'o po'o tea'i ramana tetibaha, "Iuda obia 'arana e, komauri." <sup>19</sup> Moheai 'arana te'atina te'atotina, wairanai tekaipehu haeamona tekutiai bai'oina. <sup>20</sup> Tebapo'o nonoana murinai, habuni birona haunai tebakuri ahina, ena habuni tohana tebabatoto muena tebakarahina matiu ibiri ropo 'ubinai kateahu 'arina teao.

*Iesu Matiu Ibiriropo 'Ubinai Tekoko 'Auna.  
(Mt 27.32-44; Lk 23.26-43; Io 19.17-27)*

<sup>21</sup> Kurene hauna ha atana Simona 'uniai emai Ierusalem niao, ia hanona Alesanda mai Rufo hamakia. Huari haukia Simona kipokia tebai tabu ahi aonai tebahi ahina Iesu ena matiu ibiri ropo kebuana.

<sup>22</sup> Iesu tebaka'ana teaoaina 'eka ha atana Golgota, anina hanona 'Ara Huriana 'Ekana. <sup>23</sup> Ia tehore bine beina mabina mai haiara ibako'iko'ina muramurana kipokia teu kibukibuna tebena keinu. Iesu hanona a'i einu. <sup>24</sup> Ba Iesu matiu ibiri ropo 'ubinai tekoko 'auna. Epuia murinai

huari haukia ena habuni pu'ai tewatenakia ha ha katea'i.

<sup>25</sup> Raurani beraura ehiabu hiabu aonai (9 a.m.) Iesu matiu ibiri ropo 'ubinai tekoko 'auna. <sup>26</sup> Ia 'arana 'ubinai beho marerena na terere aihona.

**'UDA HAUKIA EKIA OBIA 'ARANA.'**

<sup>27</sup> Kakikaki haukia rua Iesu kipokia rani hamomonai matiu ibiri ropo 'ubikiai tekoko 'aunakia, ha itipanai ha awarinai. <sup>28</sup> Puka Robena 'abina aba etohana etibaha, 'Aka ki'a haukia kipokia tetuabi haeamonakia.'

<sup>29</sup> Tekabanai haukia tehore 'abi ki'a obokia tehina herena, abomo 'arakia tekapokapo te'abi tetibaha, "Oi neiamu haumu Marea Robe korubuna haeamona wapu aihau kobakori muena.

<sup>30</sup> Bariu naia matiu ibiri ropo 'ubinai moriri, kipomu moba-maurini'o." <sup>31</sup> Taeara ihobonai mo Robe haukia apa'uakia mai rauhubu poki haukia Iesu te'abi papura aina tetibaha, "Maearima baika ebamaurinakia, ia kipona kebamaurina hanona a'i nitaina. <sup>32</sup> Keriso Isaraela ekia Obia 'arana, bariu weia matiu ibiri ropo 'ubinai meriri hamaihana ba kaha'ikakaumana." Iesu kipokia matiu ibiri ropo 'ubinai tekokonakia haukia terarua abomo 'abi ki'a obokia tehina herenai.

*Iesu Ena 'Ari.  
(Mt 27.45-56; Lk 23.44-49; Io 19.28-30)*

<sup>33</sup> Atiahahohanai hanopaka maikoinai ewapura abuna eao mo beraura ebaeno hoana aihau 'abana.

<sup>34</sup> Beraura ebaeno aonai Iesu eapari aota etibaha, "Eloi Eloi, lama sabakatani." Anina hanona 'E'u Tirama e, 'E'u Tirama e, taba buonai ohabona'u.' <sup>35</sup> Herenai tekoroti haukia baika Iesu aiana teona, te'abi tetibaha, "Tomobahu, ia hanona Elia niaparina." <sup>36</sup> Weiana hau ha ebeau eao poame ea'ina bine beina mabina aonai ehao uhuna, hiribo ai ekai to'ona ba etiu taeana

Iesu ebena keinu ba e'abi etibaha, "Hamabai'ima, hamaihana. Elia pa'e kemai kea'i obona." <sup>37</sup> A Iesu eio aota, ba e'ari.

<sup>38</sup> Rani weianai Marea Robe aonai i'aea huri habunina ibuananeta pa boana 'ubi ai eriri eao ba'a. <sup>39</sup> Huari poki hauna ha Iesu herena 'akinai ekoroti eihana ia eio aiana eona, ua e'ari aiho raninai e'abi etibaha, "Hau neiana hanona Tirama Nahuna tohana."

<sup>40</sup> Babi'e baika abomo ata'uai tekoroti tebairuru, baiatakiai hanona Maria Magadala babi'ena Iakobo ko'iko'i Iosepa ohi hinakia Maria mai Salome. <sup>41</sup> Babi'e neiakia hanona Galileai Iesu murinai teka'a tebaraina. Iesu kipokia Ierusalemai tekara'au haeamo babi'ekia bo'okia abomo weia.

*Iesu Tehorena.*  
(Mt 27.57-61; Lk 23.50-56; Io 19.38-42)

<sup>42</sup> Wapu weiana hanona A'ia'i harai ranina, kerani mara hanona Beraura Robe. Beraura aba kaihu niaoaina aonai, <sup>43</sup> Iosepa Arimatea hauna aona ebanua ko'ona eao Pilato wairanai Iesu huanina enoaina. Ia hanona Iuda ekia obia hauna ha maearima abomo timariki aina, Tirama ena obia aiarana kemai ne'imana hauna ha. <sup>44</sup> Pilato Iesu e'ari noanoa pouna eona raninai eta'u ta'u huri. Ia emikiri huari poki hauna eaparina Iesu ena 'ari ranina ebakai bakai aina. <sup>45</sup> Pilato Iesu ena 'ari 'uruna huari poki hauna herenai eona murinai, Iesu huanina e'uhina Iosepa kea'ina. <sup>46</sup> Iosepa ehore habuni namona tohana ha ekawana, Iesu huanina ea'i obona habuni weianai e'apania eaoaina 'ariahana pihara ikui aonai ehorotina, pihara rarina ha ebaherena ebaahu abuna. <sup>47</sup> Maria Magadala babi'ena mai Iosepa hinana Maria terarua Iesu huanina tehorotina 'ekana teihana.

## 16

*Iesu 'Ariai Emikiri Mue.*  
(Mt 28.1-8; Lk 24.1-12; Io 20.1-10)

<sup>1</sup> Beraura Robe eore murinai Maria Magadala babi'ena Iakobo hinana Maria mai Salome tehoro timikia 'orimokia tekawa kateao Iesu huanina kateutuna. <sup>2</sup> Hui beraurana raurani 'amari 'amari-nai, beraura nitae aonai, babi'e weiakia taearai teka'a 'ariahana teao aonai, <sup>3</sup> kipokia te'abi'abi tetibaha, "Tai kebarainaka, 'ariahana pa'abi piharana ketori parena." <sup>4</sup> Mahakia eao 'ariahana pa'abina, pihara rarina 'akina aba itori pare teihana. <sup>5</sup> Ia 'ariahana aonai tekatoto hanona hau 'aru'aruna ha habuni porekia eba totonakia itipa tainai emiati teihana raninai teta'u ki'a.

<sup>6</sup> Hau weiana e'abi etibaha, "A'i tomota'u. Wai Iesu Nasareta hauna tekoko 'auna hauna tutabuna. Ia hanona aba emikiri. Na'a aha'i. Tehorotina 'ekana tomoihana. <sup>7</sup> Tomoao i'abana haukia mai Petero katohina benakia, katotibaha, 'Katoao Galileai, Iesu aba ke'uai ua'a, katoihana e'abi ihobona!"

<sup>8</sup> Ua buonai babi'e weiakia tekarahi 'ariahana tehabona mai nuataekia haeamona mai ta'ukia. Teta'u buonai tai ha haianai a'i te'abi.

*Iesu Maria Magadala Herenai Mai Hau Rua Herekiae Ewaira Tina.*  
(Mt 28.9-10; Io 20.11-18)

<sup>9</sup> Hui beraurana raurani 'amarinai, Iesu 'ariai emikiri murinai, Maria Magadala babi'ena herenai ewaira tina 'uai, ia hanona 'uainai Iesu auba ki'a obokia 'abaihau hamomo aonai eu'u ahinakia babi'ena. <sup>10</sup> Maria Magadala babi'ena eao Iesu te'abana haukia tiaoko'o tihaihai herekiae Iesu poune ehinana. <sup>11</sup> Maria herenai pou teona Iesu aba emauri, haeamona eihana na ehoma hanona ena 'abi a'i tea'i taeana.

<sup>12</sup> Muriai Iesu ihana ebahaeaina hau rua taearai teka'a 'uni tiao

aonai, herekiai ewaira tina.<sup>13</sup> Ba terarua temue teao 'abakia ha-iakiai te'abi. Ia abokiamo a'i tebatohanakia.

*Iesu Harau Haea Hamomo  
Herekiai Ewaira Tina.  
(Mt 28.16-20; Lk 24.36-49; Io  
20.19-23; Ih 1.6-8)*

<sup>14</sup> Weiana murinai haukia harau haea hamomo tianiani aonai, Iesu ewaira tina herekiai. Ekia a'ikakauma aha'i haeamona ekia ao pahihi paunai ebatanakia. Pokina emikiri murinai teihana haukia aiaakia a'i tebatohanana.<sup>15</sup> Ba ia ehina benakia etibaha, "Katoao hanopaka ikoinai Pou Namona maearima ikoikiai herekiai katoiroro aina.<sup>16</sup> Kea'ikakaumana mai 'uere robe kea'ina hauna hanona mauri kea'ina, 'a a'i kea'ikakaumana hauna hanona puma kehoaina.<sup>17</sup> A'ikakauma haukia hanona bata'uta'u huri akakia nahomakia katebabai. Au ata'uai auba ki'a obokia kate'u'u u'u ahinakia, haeamona maea haeai haeai kate'abi,<sup>18</sup> imakiai 'erau kateainakia, muramura ki'a obokia kateinu ia herekiai taba ha a'i kerama, haeamona imakia inawa haukia ahakiai katehao'au hanona ekia inawa katenamo."

*Iesu Ea'i Taeana Kupa Eao.  
(Lk 24.50-53; Ih 1.9-11)*

<sup>19</sup> Obiapaka Iesu ia ehina benakia murinai, ekara'au eao kupa, Tirama itipana tainai emiati.<sup>20</sup> I'abana haukia ikoikiai weia tekarahi 'eka ikoikiai aokiai teiroro. Obiapaka etai turinakia buonai hoa haeai haeai tebabai, aka weianai ekia iroro ebato-hanakia.]\*

---

\* **16:20:** (9-20) Pu ka baika hanona 'abi neiana a'i terere 'apuana.

## Pou Namona LUKA Ererena Hauna

### *Puka Aona Irerena 'Abina*

Pou namona neiana Luka ererena aonai ebaihanaka Iesu hanona hau weiana aba e'abi'uai aina kemai Isaraela haukia mai hanopaka maearimakia ikoikiae kebamaurinakia hauna. Luka hanona Iesu ena aka kea'i ramana raninai, Auba Robe ia ebabonu, weiana ia keao uraru haukia herekiae Pou Namona kehinana (4.18), haeamona maearima mai ekia puma aea ebarai aihonakia hauna robana eahu haraina. Taba weiakia Iesu ebabainakia hanona maearima neiakia ebaonamo ki'a bahanakia ba ia teaonamoai ki'a bahana. Maria ia ebaramana raninai maearima teaonamo (1.42-48; 2.10), haeamona puka a'enai Iesu auhao aokiae ekara'au raninai ekia aonamo eapa'ua ki'a baha (24.52).

Puka neiana iro'ana rua aokiae (1 — 2 mai 9 — 19) taba baika hanona Luka mo ikupaiana ehina, matoha Aneru mai mamoe iha'ini haukia orina, Iesu miori papanai marea robe aonai, 'abi ibabataikia wejakia Samaria hauna namona mai Miori ha hamana ehabona hauna. Taba baika hanona Luka ehina taburanakia, rani ikoikiae kahabahuba'ari tabura taearana, Auba Robe ena aka, mai Tirama ena namoai maearima ikoikiae ekia ki'a ehina hao. Luka ehore babi'e tebabainakia tabakia bo'okia ehinanakia.

Luka ena irere hanona neiamo a'i epua, ia ehore puka welana 'Iuhubeau haukia ekia aka' abomo ererena weiana hanona Iesu ekara'au kupa eao murinai taba tebabai haukia robakia eahunakia.

### *Puka Paipana Apa'uakia*

- Roba ahu. (1.1-4)
- Ioane mai Iesu ohi ekia rama mai miorikiae aonai. (1.5 — 2.52)

- Ioane ba'uere robe hauna ena aka. (3.1-20)
- Iesu ena 'uere robe mai baihobo. (3.21—4.13)
- Iesu ena aka maearima herekiae Galilea aonai. (4.14—9.50)
- Galileai eaomo Ierusalemai. (9.51—19.27)
- Hui orena Ierusalema aonai mai herenai. (19.28—23.56)
- Obiapaka ena mikiri mue, ena wairatina, mai ena kara'au kupa. (24.1-53)

### *Luka Marere Ererena Eao Teofiloherenai.*

<sup>1</sup> Obia haumu Teofilo e. Maearima bo'ona baiatamai ai taba tohakia terama haukia aba tererenakia, <sup>2</sup> bahabanai mahakiae aka neiana teihana mai teiroro aina haukia tehina benamai ihobona. <sup>3</sup> Au abo'umo popouna 'akinai ea'i ramana 'abikia ikoikiae atabu harainakia. Ba naraonana enamo buonai au marere ha karerena oi 'eumu. <sup>4</sup> Weiana ko'ioibi haraina taba teba'ibini'o 'abikia hanona tohakia.

### *Aneru Sakaria Ehinabena Nahuna Ioane Kerama.*

<sup>5</sup> Heroda Iuda eobia aina raninai robe hauna ha weia atana Sakaria, Abia ena itubu hauna, atawana Elisabeta hanona Arona ena rama babi'ena. <sup>6</sup> Terarua hanona aka bero maearimakia Tirama wairanai, Obiapaka ena rauhubu mai bairobe te'ima harainakia, ki'a ha a'i tebabaina. <sup>7</sup> Iamo terarua hanona nahukia aha'i pokina Elisabeta hanona 'one'one haeamona terarua aba teanepaka.

<sup>8</sup> Sakaria ena itubu haukia ekia aka raninai, ia ehore robe akakia ebabai Tirama wairanai. <sup>9</sup> Robe haukia ekia hoahoa tainai, pu'iai ia tea'i taeana 'eka robena ketoto muramura timina 'orimona kekinena. <sup>10</sup> Ikinena ranina etaina, bahuba'ari haukia ikoikiae atapakai tetu'una tibahuba'ari.

<sup>11</sup> Obiapaka ena aneru ha herenai ewaira tina muramura timina 'orimona ikinena itarana

abihanai itipana tainai ekoroti.<sup>12</sup> Sakaria aneru eihana raninai nuana etae abomo eta'u ki'a baha. <sup>13</sup> Iamo aneru ia ehina bera etibaha, "Sakaria e, a'i kota'u. Emu bahuba'ari 'uruna Tirama aba eona, oi atawamu Elisabeta hanona nahumu hau ha kebaramana, atana koaparina Ioane. <sup>14</sup> Aomu hanona kenamo, mai koaonamo ki'a baha, mako abomo ena ramai kateaonamo; <sup>15</sup> Pokina Obiapaka wairanai ia hanona keapa'ua, bine 'ao muramura kirokia a'i keinu, abomo hinana nuanai a'i kerama baha aonai Auba Robeai kebonu. <sup>16</sup> Ia kehore Isaraela maearimakia bo'ona 'akina kebaraona kabenaakia Obiapaka ekia Tirama herena kateao. <sup>17</sup> Ke'uai Obiapaka wairanai Elia ena aka mai ena hiabu ihobona, hama mai nahu aokia keba hamomonakia, mai aia o'o aha'i haukia bero haukia ekia aotipa taearanai kebaka'anakia, maearima keba'orunakia Obiapaka 'euna."

<sup>18</sup> Sakaria aneru ebakaina etibaha, "Neiana hanona aea ka'iobi harai aihona? Au hanona aba anepaka mai atawa'u abomo eanepaka."

<sup>19</sup> Aneru ena 'abi ebamuena etibaha, "Au hanona Gabriel, Tirama wairanai nakoroti, eu-huna'u pou namona neiana amaiaina heremu kaba'ibini'o. <sup>20</sup> Bariu oi hanona maeamu keki'a a'i ko'abi'abi keaomo taba neiakia ekia rama ranina ketaina. Pokina e'u 'abi rani weianai ketohana hauna a'i obatohana paunai."

<sup>21</sup> Maearima hanona Sakaria te'ima 'arina abonamo aokia earo'ari pokina marea robe aonai rani homa'ana emiaho. <sup>22</sup> Ia ekarahi raninai 'abi kehinana hanona a'i etaina. Weiana te'ibina ia hanona marea robe aonai taba ha eihana. Hoahoamo ebabai maeana eki'a a'i e'abi'abi. <sup>23</sup> Ena aka beraurana ebaorena hanona emue ena itu eao. <sup>24</sup> Murinai ia atawana Elisabeta epuma, nawa ima itu aonai mo emiaho. <sup>25</sup> E'abi etibaha,

"Neiana hanona Obiapaka ena nuatae hoana here'uai, maearima baiatakiai e'u haumaea kea'i parena."

### *Aneru Maria Ehinabena Iesu Kebaramanā.*

<sup>26</sup> Elisabeta nawana 'abaihau aonai Tirama ehore aneru ha atana Gabriel euhuna Galilea aonai aiara ha atana Nasareta eao.

<sup>27</sup> Uaho rari ha weia te'abi aina hau ha atana Iosepa keatawana Davida ena rama hauna, uaho weiana atana hanona Maria. <sup>28</sup> Aneru eao herena ehina bera etibaha, "Moaonamo. Oi hanona enuataeai apa'uani'o. Obiapaka hanona oi heremuai." <sup>29</sup> 'Abi weiana Maria aona ebaro'arina, mai eraonaraona banamo weiana anina hanona taba. <sup>30</sup> Ia aneru e'abi etibaha, "Maria e, a'i mota'u, Tirama ena nuatae aba oa'ina.

<sup>31</sup> Oi hanona kopuma, miori ha kobaramana, atana koaparina Iesu. <sup>32</sup> Ia hanona ketarahi mai kateaparina 'Ubi toha tohana Hauna Nahuna, Tirama Obiapaka kehore 'aba'abana Davida ena obia kebena. <sup>33</sup> Mai Iakobo ena itubu keobia aina keaomo banai banai, ena obia hanona a'i kepua."

<sup>34</sup> Maria aneru ebakaina etibaha, "Au hau ha a'i a'iobina. Neiana hanona aea kerama aihoa?"

<sup>35</sup> Aneru ehina bera etibaha, "Auba Robe keriri oi ahamuai, 'Ubi toha tohana Hauna ena hiabuai kebahu abuni'o, Robe Hauna kerama atana kateaparina Tirama Nahuna.

<sup>36</sup> Oi hatia'amu Elisabeta te'abi ia hanona 'one'one, ia ena anepakai miori ha ea'ina, bariu nawana aba 'abaihau. <sup>37</sup> Tirama herenai hanona taba ha a'i epahihī."

<sup>38</sup> Maria e'abi etibaha, "Au hanona Obiapaka ena ta'ara'i babi'e'u. Emu 'abi ihobona here'uai merama." Ba aneru Maria ehabona.

### *Maria Eao Elisabeta Herena.*

<sup>39</sup> Rani weianai Maria ea'i a'i harai mai enoanoa eao oeo aiarana ha Iudea puro'onai.

<sup>40</sup> Sakaria ena ituai etoto Elisabeta ebanamona. <sup>41</sup> Elisabeta Maria ena banamo 'uruna eona raninai nuana aonai miori eibiuibiu mai Auba Robe Elisabeta aona ebabonuna. <sup>42</sup> Weiana e'abi aota, "Babi'e ikoikiai baiatakiai oi hanona onamo ki'a baha, miori kobaramana hauna abomo enamo. <sup>43</sup> E'u namo hanona taba e'u Obiapaka hinana here'u emai! <sup>44</sup> Berona 'akinai emu banamo 'uruna aona raninai miori nua'u aonai mai aonamona eibiu ibiu. <sup>45</sup> A'ikakauma babi'emu e, aba onamo pokina Obiapaka ena 'abi ehina heremuai haukia katemai katetoha."

*Maria Ena Aonamo Huina.*

<sup>46</sup> Maria e'abi etibaha,  
"Au ao'u Obiapaka nibanamona.  
<sup>47</sup> Mai auba'u abomo e'u bamauri Tiramana niaonamo aina,  
<sup>48</sup> pokina ena uraru mai ta'ara'i babi'e'u eraona tinana'u paunai. Bariu rani neianai keao uru ikoikiai namo'u katehinana,  
<sup>49</sup> pokina hiabu Tiramana taba rarikia 'eu'uai ebabainakia. Ia atana hanona eroibe,  
<sup>50</sup> uru ha keao uru ha ena aoko'o hanona nibawaira tinana weiakia timariki aina haukia herekia.  
<sup>51</sup> Ia imanai ena tabura ebakarahina, apa haukia ekia raona ekipu otarainakia.  
<sup>52</sup> Ia ehore obia haukia taburakia ekia obia 'ekakiai ebaririnakia, mai uraru haukia ebakara'aunakia.  
<sup>53</sup> Mare'a ti'ari haukia taba namokiae ebabonu 'aunakia, ia kepu haukia euhunakia imakia 'abaeakia temue.  
<sup>54</sup> Ena 'abi'uai eraona tinana ena ta'ara'i itubuna Isaraela haukia ebarainakia.  
<sup>55</sup> 'Aba'abaka herekiai ehinana hauna ena aoko'o ebawaira tinana Aberahamo mai kupuna 'aba'abana herekiai keaomo banai banai."  
<sup>56</sup> Maria Elisabeta ohi temiaho nawa alihau 'abana ba emue eao ena aiara.

*Elisabeta Nahuna Ioane Ebaramanā.*

<sup>57</sup> Elisabeta ena mauri ranina etaina hanona nahuna hau ebaramanā. <sup>58</sup> Herenai temiaho haukia mai hatia'ana pou teona, Obiapaka ena aoko'o rarina 'akina herenai ebawaira tinana hanona kipokia teaonamo haeamo.

<sup>59</sup> Wapu iba'ababanina emai hanona ikoikiai temai miori itarena to'una, haeamona hamana Sakaria atana kateaparina. <sup>60</sup> Ia hinana etae etibaha, "Aha'i, ia atana kahaparina Ioane."

<sup>61</sup> Ikoikiai tehina bena tetibaha, "Hatia'amu ha atana uahomana aha'i." <sup>62</sup> Weiana mahakia tebairu hamana herenai miori ata tabana keaparina. <sup>63</sup> Weiana ia rererere piharana ebakai bakai aina, weia ahanai na erere aihona, "Atana hanona Ioane," raninai ikoikiai teta'uta'u huri.

<sup>64</sup> Mawa'eai pinana ekaikauna, maeana ebero e'abi'abi mue, Tirama ebanamona. <sup>65</sup> Herekiai temiaho haukia ikoikiai teta'u ki'a, mai Judea oeo aiarakia maikoinai pou neiana tehina otaraina. <sup>66</sup> Pou teona haukia aokiae teraona 'ini'inina tetibaha, "Miori neiana aea homanai keao." pokina Tirama imana hanona ia ahanai.

*Sakaria Ena Mahabanai 'Abina.*

<sup>67</sup> Miori hamana Sakaria aona Auba Robe ebabonuna, ba Tirama ena 'abi ehinana etibaha,

<sup>68</sup> "Obiapaka Isaraela ekia Tirama kahabanamona, pokina emai ena maearima aba ekawa muenaka.

<sup>69</sup> Bamauri Pokina \* ebamikirina aika 'euka ena ta'ara'i hauna Davida ena itubuai.

<sup>70</sup> Aba wa'i baha raninai ena 'abi mahabanai robekia pinakiae tehinana 'abana.

<sup>71</sup> Eka 'ou haukia mai 'arika a'i ti'ari haukia ikoikiai imakiae kebamaurinaka.

<sup>72</sup> Kupuka eaoko'o ainakia mai ena 'abi'uai robena

\* 1:69: (69) 'ao Bamauri Pihina.

eraona 'inina.

<sup>73</sup> Kupuka Aberahamo herenai ena 'abi'uai ehinana:

<sup>74</sup> Eka 'ou haukia imakiae kebamaurinaka,

a'i kahata'u ena aka kahababaina

<sup>75</sup> robeai mai beroai ia wairanai

eka miao ranikia ikoikiae.

<sup>76</sup> "Haeamona naha'u e,

oi hanona kateaparini'o

'ubi toha tohanai hauna

ena mahabana'i haumu.

Pokina oi ko'uai

Obiapaka wairanai ena taeara

koa'ia'i haraina,

<sup>77</sup> ena maearima bamauri  
aoberona

koba'ibinakia

ekia ki'a ihina haonai keao.

<sup>78</sup> Aika eka Tirama ena aoko'o pau-

nai.

Beraura nitae eana kupai

keriri kemai hereka,

<sup>79</sup> 'ari aiaianai mai wapurai  
temiaho

haukia ahakiae kerara, weiana

aea kebaka'anakia baibua

taearanai kebaka totonakia."

<sup>80</sup> Miori hauaniae eapa'ua mai  
aubai etabura. Ia hano'akunai  
emiaho eaomo ekarahi Isaraela  
mako herekiae.

## 2

*Iesu Erama.*

(Mt 1.18-25)

<sup>1</sup> Rani weiana aonai Augusto obia 'arana rauhubu 'abina ha euhuna eao Roma ena iha'ini hanopakana maikoinai ata katerere. <sup>2</sup> Neiana hanona ata rere kori'uaina Kurene Suria hanopakana eiha 'inina raninai. <sup>3</sup> Weiana maearima ikoikiae atakia katebaibenai paunai temue ikau ena aiara teao. <sup>4</sup> Iosepa abomo Nasareta Galilea hanonai emikiri eao Davida ena Aiara Betelehema Iudea ai, pokina ia hanona Davida ena itubu mai ena rama hauna. <sup>5</sup> Atakia katebaibenai paunai ia te'abi aina babi'ena Maria ohi teao, Maria hanona mai nuana. <sup>6</sup> Terarua weia temiaho aonai kemauri ranina etaina. <sup>7</sup> Weiana

emauri nuahobo miorina hau ebaramana, habuniai tebaro'a abuna poromakau ekia aniani ahiahinai tebaeno utana, pokina 'ima'ima itunai 'eka aha'i.

*Aneru Mamoe 'Ima Haukia Teihana benakia.*

<sup>8</sup> Hano weiana hamona aonai mamoe 'ima haukia baika tubuai rabi aonai ekia mamoe te'imankia. <sup>9</sup> Obiapaka ena

aneru ha herekiae ewaira tina, Obiapaka nuabinai ebaea obonakia raninai tet'a'u wairai. <sup>10</sup> Aneru ia ehina benakia etibaha,

"A'i tomota'u. Au pou namona amaiaina weiana maearima ikoikiae aokia kebaonamonakia. <sup>11</sup> Bario rani neianai Davida ena aiarai emi Bamauri hauna

ha erama, ia hanona Keriso Obiapaka. <sup>12</sup> Hoana hanona nahomana, miori 'oru'oruna ha katotabu ahina, habuniai tero'a abuna poromakau ekia aniani ahiahinai tebaeno utana."

<sup>13</sup> Mawa'eai kupai aneru to'una tewaira tina aneru weiana hereinai, Tirama tebanamona tetibaha,

<sup>14</sup> "Kupa 'ubi toha tohanai nuabi hanona Tirama 'euna, hanopakai ena baibua hanona niaonamo ainakia haukia herekiae."

*Mamoe 'Ima Haukia Teao Miori Kateihana.*

<sup>15</sup> Aneru to'una ia herekiae tekao bo temue kupa raninai mamoe 'ima haukia kipokia te'abi'abi tetibaha, "Aika hamaeo Betelehema, Obiapaka eba'ibinaka taba weiana erama hauna kahaihana." <sup>16</sup> Tenoanoa teao Maria Iosepa mai miori 'oru'oruna poromakau ekia aniani ahiahinai enouta tetabu ahinakia. <sup>17</sup> Weiana teihana raninai aneru miori robana eahuna 'abina maearima teba 'ibinakia,

<sup>18</sup> mamoe 'ima haukia pou weiana tehinana raninai aia teona haukia ikoikiae tet'a'u ta'u huri. <sup>19</sup> Maria hanona 'abi weiakia ikoikiae aonai eraona 'ininakia mai eraona raona

\* 2:11: (11) 'ao Mesia.

ainakia. <sup>20</sup> Mamoe 'ima haukia temue Tirama tekuti aina mai teapaina pokina taba weiakia 'urukia teo'o mai teiha haukia ikoikiai ia ehina benakia ihobona tohanai terama.

*Miori Atana Iesu Teaparina.*

<sup>21</sup> Wapu iba'ababaninai ena itare ranina etaina hanona atana teaparina Iesu, aneru ata ebena hinana nuanai a'i erama baha aonai.

*Simeona Mai Ana Marea Robe Aonai Iesu Tera'una.*

<sup>22</sup> Mose ena rauhubu ihobona ena kopa kopa ahu ranina eore murinai miori teaoaina Ierusalema Obiapaka wairanai katebawaira tinana. <sup>23</sup> Obiapaka ena rauhubuai tererena ihobona, "Hobohobo miorikia hau ikoikiai hanona katebaiben'i Obiapaka 'euna." <sup>24</sup> Obiapaka ena rauhubu e'abi ihobona barobe tabakia katebaiben'i mumu rua 'ao rauria nahu rua.

<sup>25</sup> Weia Ierusalemai hau ha atana Simeona ia hanona bero hauna haeamona Tirama nimariki aina. Isaraela ena bamauri hauna ne'imana, aona Auba Robe ebonu. <sup>26</sup> Auba Robe ia ehina bena ia a'i ke'ari keaomo Obiapaka ena Keriso keiha 'uaina. <sup>27</sup> Auba Robe ia ebakatotona Marea Robe aonai. Maria Iosepa ohi Iesu teaoaina Marea rauhubu ena hoahoa katebabaina paunai. <sup>28</sup> Simeona imanai miori era'una Tirama ebanamona etibaha,

<sup>29</sup> "Obiapaka e, emu 'abi'uai ihobona

emu ta'ara'i hauna bariu  
mai baibuana aba nuhabona.

<sup>30</sup> Pokina maha'u ai  
emu Bamauri Pokina aba aihana,

<sup>31</sup> weiana oi aba oba'oruna  
maearima ikoikiai wairakiai.

<sup>32</sup> Eana neiana hanona  
rama haeani haukia ibaeakia  
abomo oi emu maearima  
Isaraela ibanquabikia."

<sup>33</sup> Miori hamana hinana 'abi  
weiakia teo'o hanona tet'a'u ta'u  
huri. <sup>34</sup> Simeona ehore terarua  
eba namonakia haeamona hinana  
Maria ehina bena etibaha, "Miori

neiana hanona e'oru Isaraela haukia bo'ona iba'ehokiai mai ibamikirikiai keao, abomo ena hoahoa kate'oatana, <sup>35</sup> maearima bo'ona ekia raona bunikia kabakarahinakia. Mai kareba itatona 'abana kehore oi aomu abomo kebahaiarana."

<sup>36</sup> Weia hanona mahabanai babi'ena ha atana Ana, Panuela nahuna ena itubu hanona Asere, aba eanepaka, ena hawainibe ihauna 'abaihau hamomo atawana ohi temiaho, <sup>37</sup> ba ewapu emiaho bariu ihauna imabui harau aihau bani (84). Ia marea robe a'i ehabo 'apuana Tirama ekuti aina rabi mai mararanai eanirobe mai ebahuba'ari. <sup>38</sup> Rani weiana hamona aonai Ana emai marea aonai Tirama ebanamona ba maearima ikoikiai Ierusalema kebamaurina hauna 'te'imana haukia herekiai miori pouna ehinana.

*Iesu Nasareta Eapa'ua.*

<sup>39</sup> Iosepa mai Maria ohi Obiapaka ena rauhubu e'abi ihobonai aka ikoikiai tebaorenakia raninai temue Galilea ekia aiaara tohana Nasareta teao. <sup>40</sup> Miori eapa'ua mai etabura; aoberoai ebonu, Tirama ena baraibarai ia ahanai emiaho.

*Miori Iesu Marea Robe Aonai.*

<sup>41</sup> Ihau ikoinai hamana mai hinana Ierusalema teao kabanai tatuna paunai. <sup>42</sup> Iesu ihauna harau haea rua raninai, teaihau teao Ierusalema ekia tatu hoahoana taina. <sup>43</sup> Tatu eore murinai hamana mai hinana temue 'a miori Iesu hanona Ierusalemai emiaho, hamana mai hinana a'i te'lobina. <sup>44</sup> Teraonana ia hanona baiatakiai, wapu hamona teka'aina murinai tetabu ramana 'abana mai hatia'a herekiai. <sup>45</sup> A'i tetabu ahina paunai temue teao Ierusalemai weia katetabuna. <sup>46</sup> Wapu aihau teao murinai marea robe aonai tetabu ahina bamarere haukia baiatakiai emiati aia ebahuai mai ebakainakia. <sup>47</sup> Ena iobi mai 'abi bamueai aiana teona haukia ikoikiai tet'a'u ta'u huri. <sup>48</sup> Hamana mai hinana

teihana raninai teta'u ta'u huri. Weiana hinana ia ehina bena etibaha, "Naha'u e, taba buonai nahomana heremai ai obabaina? Au hamamu ohi aomai maihaina tatabu 'arini'o." <sup>49</sup> Iesu ehina benakia etibaha, "Taba buonai wai au tutabuna'u? A'i to'io bina au hanona hama'u ena itu aonai namiaho, u?" <sup>50</sup> 'A ia ena 'abi ehinana hauna obona a'i teobo.

<sup>51</sup> Eriri kipokia teao Nasareta, weia aikia eka'ai haraina, 'a hinana hanona taba weiakia terama ikoikiai aonai eraona 'ininakia. <sup>52</sup> Iesu eapa'ua hauanai mai aoberoai, abomo Tirama mai maearima ia tenuatae aina.

### 3

#### *Ioane Ba'uere Robe Hauna Eiroro.*

(Mt 3:1-12; Mk 1:1-8; Io 1:19-28)

<sup>1</sup> Tiberio obia 'arana Roma hanopakana eobia aina ihauna harauhaea ima aonai Pontio Pilato hanona Iudea ekia Kabaña. Heroda hanona Galilea eobia aina, abomo hatina Pilipo hanona Iturea mai Trakonito eobia ainakia, Lusania hanona Abilene aiarakia eobia ainakia. <sup>2</sup> Robe haukia arakiai haukia Ana mai Kaiafa ekia raniai, Tirama ena 'abi emai Sakaria nahuna Ioane herena hano'akunai. <sup>3</sup> Ioane eao Ioridana ate haiana hanokia ikoikiai aokiai raona kabe 'uere robena eiroro aina ekia ki'a ihina hao paunai. <sup>4</sup> Isaia mahabanai hauna ena pukai ererena 'abana: "Aia ha hano'akunai neio netibaha,

'Obiapaka ena taeara tomoa'i a'i haraina, ena ka'a 'ekana tomobaberona.

<sup>5</sup> Tataira ikoikiai katepupu abunakia, kobio mai oeo ikoikiai katebaririnakia.

Taeara tebeho haukia katebero, mai tehiroa hiroa haukia kateta'eta'e.

<sup>6</sup> Weiana maearima ikoikiai Tirama ena bamauri kateihana,"

Isa 40:3-5

<sup>7</sup> Mako tekarahi temai Ioane herena keba'uere robenakia,

eiroro benakia etibaha, "Erau nahukia e, tai ehina benimi opuere nimai hauna herenai katobreau pare? <sup>8</sup> Raona kabe aonai katomiaho buabuami katerama, ia a'i kato'abi 'Aberahamo hanona aika 'aba'abaka.' A'i katoraonana aba katonamo. Pokina au wai nahina benimi, Tirama mai ena hiabu pihara neiakiai Aberahamo nahuna kebaramanakia. <sup>9</sup> Wapira hanona aba e'oru matiu pokinai, matiu ikoikiai buabuakia namokia a'i tibaramanakia haukia hanona kate'uinkakia, irubai katekapo 'aunakia."

<sup>10</sup> Ba to'u haukia ia tebakaina tetibaha, "Ba ai taba katababaina?"

<sup>11</sup> Ioane e'abi etibaha, "Mai ena ibatoto rua hauna 'abana weiana herena aha'i hauna ha kebena, mai ena aniani hauna abomo ua kebabai aiho." <sup>12</sup> Moni bararo haukia abomo temai keba'uere robenakia tebakai bakai tetibaha, "Ba'obi haumu e, ai taba katababaina?" <sup>13</sup> Ioane ehina benakia etibaha, "Moni koa'ina raninai ihobonai mo koa'ina, a'i koa'i banaina." <sup>14</sup> Huari haukia baika abomo tebakai bakai tetibaha, "Ai hanona taba katababaina?" Ioane ehina benakia etibaha, "Aiahua'i 'ao 'abi bai'oikiai maearima a'i kato'oinakia ekia moni a'i katoa'i. Aomi namorai arami tohana mo katoa'ina."

<sup>15</sup> Maearima hanona tebai'ima paunai aokia teraona raona Ioane hanona pa'e Keriso. <sup>16</sup> Ioane ikoikiai ehina benakia etibaha, "Au hanona belai wai naba'uere robenimi, a muri'uai nimai hauna ena hiabu au eu'u etara haona, ena tamaka warokia karubunakia abomo here'uai a'i etaina. Ia hanona Auba Robe mai iruba ai keba'uere robenimi. <sup>17</sup> Ena ikomo matiuna hanona imanai, witi ahu 'iti'iti 'ekana kea'ia'i haraina, weiana witi uhokia kebararonakia paraboai kero'anakia, 'a hamarakia hanona a'i ni'ao 'apua irurbanai kehuhunakia."

<sup>18</sup> Ioane bairobe 'abikia bo'okiai maearima ehina benakia mai pou namona eiroro aina herekiai.

*Heroda Ioane Wapura Itunai  
Ekaiabuna.*

<sup>19</sup> Ioane ehore Heroda obia apa'uana erikena, pokina ia hatina atawana Herodia eatawana mai aka ki'a obokia bo'okia ebabai paunai. <sup>20</sup> Heroda ena ki'a weiakia ikoikiae ahakiae ki'a mo ha ebabai muena, Ioane wapura 'ekanai ekaiabuna.

*Ioane Iesu Eba'uere Robena.  
(Mt 3.13-17; Mk 1.9-11)*

<sup>21</sup> Maearima ikoikiae eba'uere robenakia raninai, Iesu abomo eba'uere robena. Iesu ena bahuba'ari aonai kupa ekaikau. <sup>22</sup> Weiana Auba Robe rauria hauanina ihobonai eriri ia ahanai. Aia ha kupai emai e'abi etibaha, "Oi hanona Au Naha'u. E'u Raona'au, naonamo aini'o."

*Iesu Ena Rama Kuputorina.  
(Mt 1.1-17)*

<sup>23</sup> Iesu ihauna harau aihau hanona ena aka ea'i ramana. Maearima teraonana ia hanona Iosepa nahuna.

Iosepa hamana hanona Heli,  
<sup>24</sup> hamana Matata, hamana Lebi,

hamana Meleki, hamana Ianai,  
hamana Iosepa,

<sup>25</sup> hamana Matatia, hamana Amosa,

hamana Nauma, hamana Eseli,  
hamana Nagai,

<sup>26</sup> hamana Mata, hamana Mata-

tia,  
hamana Semeina, hamana Ioseka,

hamana Ioda,  
<sup>27</sup> hamana Ioanana, hamana Resa,

hamana Sorobabela, hamana Salatielle, hamana Neri,

<sup>28</sup> hamana Meleki, hamana Adi,  
hamana Kosama, hamana Elamadama, hamana Ere,

<sup>29</sup> hamana Iosua, hamana Eliesere,

hamana Iorima, hamana Matata,

hamana Lebi,  
<sup>30</sup> hamana Simeona, hamana Iuda,

hamana Iosepa, hamana Ionama,  
hamana Eliakima,  
<sup>31</sup> hamana Melea, hamana Mena,  
hamana Matata, hamana Natana,  
hamana Davida,  
<sup>32</sup> hamana Iese, hamana Obeda,  
hamana Boa, hamana Salam-one,  
hamana Nasona,  
<sup>33</sup> hamana Aminadab, hamana Admina,  
hamana Areni, hamana Hesarona,  
hamana Pare, hamana Iuda,  
<sup>34</sup> hamana Iakobo, hamana Isako,  
hamana Aberahamo, hamana Tera,  
hamana Nahoro,  
<sup>35</sup> hamana Seruka, hamana Reu,  
hamana Peleka, hamana Ebere,  
hamana Sala,  
<sup>36</sup> hamana Kainana, hamana Apasada,  
hamana Sema, hamana Noa,  
hamana Lameka,  
<sup>37</sup> hamana Metusala, hamana Enoka,  
hamana Jareta, hamana Mahalale,  
hamana Kainana,  
<sup>38</sup> hamana Eno, hamana Seta,  
hamana Adamu,  
hamana Tirama.

## 4

*Satani Iesu Ehobona.  
(Mt 4.1-11; Mk 1.12, 13)*

<sup>1</sup> Iesu Ioridana atenai emue emai aona Auba Robe ai ebonu weiana Auba ehore ebaka'ana hano'akuna eaoaina, <sup>2</sup> wapu bariabui weia tiaporō ehore ehobona.

Rani weiakiae aniani ha a'i eani 'apuana, puanai ia mare'a e'ari.

<sup>3</sup> Tiaporō ehore ia ehina bena etibaha, "Peoi Tirama Nahuna raninai pihara neiakia pohina benakia pohamai pateao." <sup>4</sup> Iesu ia

ehina bena etibaha, "Aba tererena, 'maearima hanona pohamai mo a'i kemaauri.'"

<sup>5</sup> Tiaporor ehore Iesu ebakara'auna eao hano oeonai rani papana hanopaka aiarakia ikoikiai ebaiana. <sup>6</sup> Tiaporor ia ehina bena etibaha, "Au kahore hiabu mai nuabi neiakia maikoinai kabeni'o, pokina ikoikiai au ima'u ai eutana, haeamona tai nanuatae aina hauna kabena. <sup>7</sup> Weiana oi au kokuti aina'u hanona ikoinai 'eumu.' <sup>8</sup> Iesu ena 'abi ebamuena etibaha, "Aba tererena, 'Obiapaka oi emu Tirama kokuti aina, iamo kipona ta'arana koa'i.'"

<sup>9</sup> Haeamona ebaka'ana eaoaina Ierusalema marea robe kaipanai ebakori 'auna, ehina bena etibaha, "Peoi Tirama Nahuna hanona neia kipomu morobo ahi. <sup>10</sup> Pokina aba tererena,

'ia ena aneru kehina benakia kate'imani'o.

<sup>11</sup> Abomo ia imakiae katea'i taeani'o, aemu piharai a'i mokaina ta'una.'

Sal 91.11, 12

<sup>12</sup> Iesu ia ehina bena etibaha, "Aba tererena, 'Obiapaka emu Tirama baihobo 'ekanai a'i kohorotina.'"

<sup>13</sup> Tiaporor ena baihobo ikoinai ebaorenakia hanona ia herenai ekapare keaomo rani namona ha kemai.

*Iesu Ena Aka Ea'iramana Galileai.*

(Mt 4.12-17; Mk 1.14, 15)

<sup>14</sup> Iesu Auba Robe ena hi-abuai emue eao Galilea weia pouna tehina otaraina hano weiana aiarakia ikoikiai aokiae. <sup>15</sup> Iuda haukia ekia marea aokiae eba'ibinakia, ikoikiae tebana-mona.

*Nasareta Haukia Iesu Tebaki'ana.*  
(Mt 13.53-58; Mk 6.1-6)

<sup>16</sup> Iesu ena apa'ua aiarana Nasareta eao, ena hoa hoa taina Beraura Robenai Iuda haukia ekia marea aonai etoto, ekoroti Puka ketuabina. <sup>17</sup> Isaia Mahabanai

hauna ena puka tebena, weiana puka ekaikauna, na terere aihona 'ekana etabu ahina etuabina etibaha,

<sup>18</sup> "Obiapaka Aubana hanona au aha'uai, pokina ebatohana'u pou namona kairoro aina uraru haukia herekiae. Euhuna'u kairoro tebirinakia haukia irubukia mai maha ki'a haukia kateiha mue, atetua aonai temiaho haukia kabakarahinakia,

<sup>19</sup> Obiapaka ena maearima kebamaurinakia ihauna aba etaina pouna kairoro aina."

Isa 61.1, 2

<sup>20</sup> Iesu puka ekaabuna i'imana hauna ebena ba emati, marea aonai haukia ikoikiae mahakia ia teiha 'ini'irina.

<sup>21</sup> Weiana ia ehinabe ramanakia etibaha, "Abi tono Puka Robenai hauna bariu rani neianai aba etohana." <sup>22</sup> 'Abi namokia pinanai ehinanakia paunai ikoikiae ia tebanamona haeamona tetau ta'u huri tebakai bakai tetibaha, "Neiana hanona Iosepa nahuna, u?"

<sup>23</sup> Iesu ia ehina benakia etibaha, "Abi tohana wai 'abi ibabatai ha katohinana here'u ai, 'Toketa haumu e, kipomu mobamaurinio.' abomo katohina bena'u katotibaha, 'Taba taba weia Kaperanauma ai obabai urukia tao'o haukia, neia emu aiara tohanai abomo kobabainakia.'"

<sup>24</sup> Ia etibaha, "Abi tohana au wai nahina benimi, mahabanai hauna ena aiara tohanai hanona a'i katea'i taeana. <sup>25</sup> 'Abi tohana au wai nahina benimi, Elia ena raniae wapu babi'ekia bo'okia Israelai temiaho, kupa ekaabuna abara a'i etibo ihau aihau mai nawa 'abaihau arobo rarina 'akina erama hano maikoina. <sup>26</sup> Ba Elia a'i euhuna weiakia ha herena a'i eao, 'a eao Sarepata aiarana Sidono hanonai wapu babi'ena ha herena. <sup>27</sup> Abomo mahabanai

hauna Elisa ia ena raniai Isaraela aonai weia hanona morumoru haukia bo'okia, ha aha'i enamo, 'a Suria hauna Namana ikupaiana mo enamo."

<sup>28</sup> Marea aonai maearima ikoikiai 'abi weia kia teo'o raninai teopuere wairai. <sup>29</sup> Temikiri aiarai tetori ahina tebaka'an teaoaina teaiara oeona ahanai papa'ai katekapo ahina. <sup>30</sup> Ia hanona to'u baiatakia tohanai ekaobo.

*Iesu Hau Ha Aonai Auba Ki'a Obona Eu'u Ahina.*  
(Mk 1.21-28)

<sup>31</sup> Eriri eao Galilea aiarana ha Kaperanauma Beraura Robeai maearima eba'iobi ramanakia. <sup>32</sup> Ena ba'iobi 'abikiai tet'a'u ta'u huri pokina ena 'abi hanona mai hiabuna.

<sup>33</sup> Hau ha aonai auba ki'a obona etoto hauna weia marea aonai eio aota ki'a, <sup>34</sup> etibaha, "Ai, Iesu Nasareta hauna e, taba heremai ai kobabaina? Omai hanona ai koahu 'arinamai? Au a'io bina oi hanona Tirama ena Robe hauna."

<sup>35</sup> Iesu ia ebabana etibaha, "Uri'urimu. Ia aonai mokarahi." Ikoikiai wairakiai auba ki'a obona hau weiana eba'eho ki'ana ba ekarahi, a'i ebamani'ana. <sup>36</sup> Maearima ikoinai tet'a'u ta'u huri, tebainabane aina tetibaha, "Neiana hanona ba'iobi tabana? Mai hiabuna haeamona mai taburana auba ki'a obokia nehina benakia hanona tikarahi." <sup>37</sup> Hano weiana maikoinai Iesu pouna tehina otaraina.

*Iesu Simona Rawana Babi'ena Ena Inawa Ebanamona.*  
(Mt 8.14-17; Mk 1.29-34)

<sup>38</sup> Iesu marea ehabona eao Simona ena itu. Simona rawana babi'ena hau hiabu inawana ea'ina, Iesu tenoina kebaraina. <sup>39</sup> Weiana ia babi'e herenai ekoroti hau hiabu inawana erikena, ba inawa epua, beronai babi'e emikiri ta'arakia ea'i.

*Iesu Inawa Haeai Haeai Ebana-monakia.*

<sup>40</sup> Beraura kaihu niaoaina aonai maearima ikoikiai herekiai inawa haeai haeai haukia temai

ainakia Iesu herena, imana ha ha ahakiai ehao'au ebamaurinakia. <sup>41</sup> Auba ki'a obokia maearima bo'okia abomo aokiai tekarahi teio tetibaha, "Oi hanona Keriso Tirama Nahuna." Iesu erikenakia eharabunakia a'i kate'abi pokina te'io bina ia hanona Keriso.

*Iesu Iudea Mareakia Aokiai Eiroro.*  
(Mk 1.35-39)

<sup>42</sup> Rani nirerena aonai Iesu ekarahi 'eka 'okona ha eao. Makoa itabuna teao, tetabu ahina raninai tehina bina herekiai a'i pekaobo. <sup>43</sup> A Iesu ehina benakia etibaha, "Au hanona Tirama ena obia aiarana pouna kairoro aina aiara haeai haeai herekiai pokina weiana paunai euhuna'u." <sup>44</sup> Ba Iudea mareakia aokiai eiroro.

## 5

*Iesu Tabana Haukia Bani Eaparinakia.*

(Mt 4.18-22; Mk 1.16-20)

<sup>1</sup> Rani ha Iesu Genesareta obu haianai ekoroti hanona mako tekori kakaiaronia Tirama ena 'abi aiana kateona. <sup>2</sup> Ia ahi rua obu haianai tetai'au eihanakia, ba'eha haukia tehabonakia poeai ekia re'e teutunakia. <sup>3</sup> Iesu Simona ena ahiai ehe'au, ehina bina papana kekai ahi 'apuana, ia ahi ai emiati ba mako eba'io binakia.

<sup>4</sup> Iesu ena 'abi eore murinai ia Simona ehina bina, "Ourahamaeao, re'e kohorenakia maia kobarewa." <sup>5</sup> Simona ena 'abi ebamuena etibaha, "Poki haumu e, ai rabi maikoina taro 'ari rani taba ha a'i ta'ina, 'a emu 'abi paunai re'e kabaririnakia."

<sup>6</sup> Weiana tebabaina hanona maia bo'ona 'akina tebarewanakia, ekia re'e herekai mo patetapa. <sup>7</sup> Abakia baika ahi ha ai haukia tebakonakia katemai katebarainakia, ba temai ahikia rua tebabonunakia herekai mo pateuhu. <sup>8</sup> Simona Petero hoa weiana eihana raninai Iesu aena pokinai ekai pehu e'abi etibaha, "Obiapaka e, au hanona ki'a hau'u, here'u ai

a'i komiaho." <sup>9</sup> Ia mai 'abana kipokia teta'u ta'u huri pokina maia uahomana bo'ona 'akina tebarewanakia buonai, <sup>10</sup> Simona kipokia teba'eha oioi haukia Sebedeo nahuna Iakobo mai Ioane abokiamo teta'u ta'u huri. 'A lesu Simona ehina bena etibaha, "A'i kota'u. Bariu keaomo waira ranikiai oi hanona maearima koba'eha benakia." <sup>11</sup> Ekia ahi teberi 'aunakia poeai, taba ikoinai tehabonakia Iesu murinai teka'a.

*Iesu Morumoru Hauna Ebamona.*

(Mt 8.1-4; Mk 1.40-45)

<sup>12</sup> Iesu emiaho aiara ha aonai hau ha hauna maikoinai emoromoru, ba Iesu eihana raninai e'eho aena pokinai e'umuti enoina e'abi etibaha, "Obiapaka e, ponuatae raninai pobanamona'u." <sup>13</sup> Iesu imana etiu ahina ea'i 'apuana, ehina bena etibaha, "Nanuatae, monamo." Beronai morumoru hau weiana ehabona. <sup>14</sup> Ia eharabuna etibaha, "Hau ha haianai a'i ko'abi, ia koao robe hauna herenai keihani'o, mai banamo baibenina Mose e'abi ihobona tabana kobaibeni, ba maearima katebatohana oi aba onamo." <sup>15</sup> Ia pouna tehina otaraina mai to'u rarikia temai tebararona aiana kateona ekia inawa kebanamonakia. <sup>16</sup> 'A Iesu ekaobo hano 'abaeana ha eao ehabuba'ari.

*Iesu Mero Hauna Ebanamona.*

(Mt 9.1-8; Mk 2.1-12)

<sup>17</sup> Rani ha Iesu eba'iobi aonai Parisea haukia mai rauhubu poki haukia baika weia temiati, ia hanona Galilea aiara ikoikiai, Iudea mai Ierusalem aokiai temai. Obiapaka hiabuna hanona Iesu ahanai inawa haukia ebanamonakia. <sup>18</sup> Maearima baika mero hauna ha toto'eai tebuana teaoaina taearana tetabu katetoto aina Iesu wairanai katehorotina. <sup>19</sup> Katetoto aina aonai taeara ha a'i tetabu ahina pokina to'u rarina buonai, ba tekara'au aina teao itu kapenai, kapehene teu kauna mai toto'ena tebaririna Iesu

wairanai mako baiatkaiai. <sup>20</sup> Iesu ekia a'ikakauma eihana raninai e'abi etibaha, "E'u hau e, emu ki'a aba ihina hao." <sup>21</sup> Rauhubu poki haukia mai Parisea haukia aokiai teraonaraona tetibaha, "Neiana hanona hau tabana Tirama nia'i ki'ana? Tai ki'a kehina hao, Tirama mo kipona." <sup>22</sup> 'A Iesu ekia raona e'ioquina paunai ehina benakia etibaha, "Taba buonai raona nahomakia aomiai turaonananakia?" <sup>23</sup> Aeana hauna e'ama'ama kahaihana, emu ki'a aba ihina hao 'ao momikiri moka'a. <sup>24</sup> Ia wai kato'ioquina Maearima Nahuna hanopakai mai hiabuna ki'a kehina hao." Ia mero hauna ehina bena etibaha, "Au oi nahina beni'o, momikiri emu toto'e moa'ina moao emu itu." <sup>25</sup> Beronai mo wairakiai emikiri ena toto'e ea'i taeana eao ena itu Tirama ebanamona. <sup>26</sup> Ikoikiai teta'u ta'u huri mai Tirama tebanamona, mai ta'ukia te'abi tetibaha, "Bariu taba neiana haeai tohana haihana."

*Iesu Lebi Ena Aka 'Ekanai Eaparina.*

(Mt 9.9-13; Mk 2.13-17)

<sup>27</sup> Weiana murinai Iesu ekarahi eao moni bararo hauna ha atana Lebi moni a'i 'ekanai emiati eihana, eaparina etibaha, "Muri'uai omai." <sup>28</sup> Lebi emikiri taba ikoikiai ehabonakia Iesu murinai eka'a.

<sup>29</sup> Lebi ena ituai Iesu kero'ona anianina ha ebabaina, weia moni a'i haukia bo'okia mai maearima haeai baika kipokia temiati teanianai haeamo. <sup>30</sup> Parisea haukia mai rauhubu poki haukia tehore i'abana haukia herekiai te'abi hara tae tetibaha, "Taba buonai moni a'i haukia mai ki'a haukia kipokia tuaniani mai toinu inu haeamo?" <sup>31</sup> Iesu ekia 'abi ebamuena etibaha, "A'i teinawa haukia hanona toketa hauna a'i titabuna, ia inawa haukia mo toketa hauna titabuna.

<sup>32</sup> Au amai hanona bero haukia a'i kaparinakia, ia ki'a haukia kateraona kabe paunai amai."

*Ani Robe Bakai bakaina.*  
(Mt 9.14-17; Mk 2.18-22)

<sup>33</sup> Ia Iesu tehina bena tetibaha, "Ioane i'abana haukia rani bo'okia tiani robe mai tibahuba'ari, Parisea i'abakia haukia abomo ihibona tibabaina, ia oi i'abamu haukia tianiani mai teinuinu."  
<sup>34</sup> Iesu ehina benakia etibaha, "Wai turaonana hawainibe mahamaha hauna ena baki haukia kipokia temiaho oioi aonai kateani robe hanona ketaina, u?" <sup>35</sup> 'A rani kemai aonai hawainibe mahamaha hauna herekiai katea'i parena, rani weiakiai ia hanona kateani robe."

<sup>36</sup> Ia 'abi ibabataiai ehina benakia, "Hau ha habuni maha mahana puana a'i ketapa obona habuni 'ai'aina maranai a'i kehuri abuna pokina habuni mahamahana ketapa obona raninai habuni 'ai'aina mai habuni mahamahana ohi hanona ihakia a'i kateihobo.<sup>37</sup> Hau ha bine beina mahamahana aparu 'ai'ainai a'i kebaharuna, weiana kebabaina raninai bine beina mahamahana kekupu aparu 'ai'aina kebua pa'ana haeamona kekiki oioi mai 'aparu keki'a.<sup>38</sup> 'A bine beina mahamahana hanona aparu mahamahanai kebaharuna, ba terarua katenamo.<sup>39</sup> Hau ha bine beina 'ai'aina keinu murinai bine beina mahamahana a'i kenuatae aina pokina ke'abi bine 'ai'aina hanona enamo."

## 6

*Beraura Robe Obiana.*  
(Mt 12.1-8; Mk 2.23-28)

<sup>1</sup> Beraura robenai Iesu mai i'abana haukia kipokia witi umana ha aonai tekabananai, i'abana haukia witi buakia te'ini hurinakia imakia aokiai temutunakia teani.<sup>2</sup> Parisea haukia baika te'abi tetibaha, "Wai taba buonai Beraura Robenai a'i katobabaina akana tubabaina?"<sup>3</sup> Iesu ekia 'abi ebamuena etibaha, "Wai pa'e Davida orina a'i totuabi 'apuana. Ia mai 'abana kipokia mare'a te'ari raninai taba ebabaina?"<sup>4</sup> Ia

Tirama ena ituai etoto tebarobena parawakia robe haukia ikupaiakia mo kateani haukia ea'inakia eani mai i'abana haukia ebenakia."  
<sup>5</sup> Haeamona ehina benakia etibaha, "Maearima Nahuna hanona Beraura Robe obiana."

*Iesu Hau Ha Imana Kobekobena Ebanamona.*

(Mt 12.9-14; Mk 3.1-6)

<sup>6</sup> Beraura robe haeai ha ai Iesu Iuda haukia ekia mareai etoto eba'obi. Hau ha weia imana itipana hanona ekobe kobe.<sup>7</sup> Rauhubu poki haukia mai Parisea haukia ia te'itimana Beraura Robeai kebamauri 'ao, Iesu beho 'ekanai katehorotina taearana tetabu.<sup>8</sup> 'A Iesu ekia raona e'lobina, weiana ima kobe kobe hauna ehina bena etibaha, "Momikiri baiatakiai mokoroti." Ba emikiri ekoroti.<sup>9</sup> Iesu ehina benakia etibaha, "Au wai nabakainimi, aeana hauna ebero Beraura Robeai kahabanamo 'ao kahabaki'a, kahabamauri 'ao kahaba'ari?"<sup>10</sup> Iesu ikoikiai eiha kakaiaronakia murinai ima kobe hauna ehina bena etibaha, "Imamu motiu berona." Ia ebabaina hanona imana ebero mue.<sup>11</sup> 'A ia hanona aokia teopuere ki'a, kipokia teroba ahu Iesu herenai taba katebabaina.

*Iesu Iuhubeau Haukia Harauhaea Rua Etina'anakia.*  
(Mt 10.1-4; Mk 3.13-19)

<sup>12</sup> Rani weianai Iesu oeoai ekara'au kebahuba'ari, rabi maikoina ebahuba'ari Tirama herenai.<sup>13</sup> Aba rani nimaiaina aonai ia i'abana haukia eaparinakia temai, baiatakiai harau haea rua ea'i taeananakia ata ebenakia iuhubeau haukia.<sup>14</sup> Ia hanona Simona atana eaparina Petero mai hatina Anderea ohi, Iakobo mai Ioane ohi, Pilipo mai Batolomeo ohi,<sup>15</sup> Mataio, Toma, Alepeo nahuna Iakobo, mai Simona teaparina Selote hauna ohi,<sup>16</sup> Iakobo nahuna Iuda mai Isakariote hauna Iuda ia hinahinana kehina hauna.

*Iesu Mako Eiroro aina Mai Inawa Haukia Ebanamonakia.*  
(Mt 4.23-25)

<sup>17</sup> Iesu i'abana haukia kipokia oeoai teriri hano beronai tekoroti. I'abana haukia to'una rarina weia mai maearima bo'ona 'akina Iudea hanona 'ekakia ikoikiae Ierusalemai ai Turo mai Sidono poe hanokia ikoikiae temai,  
<sup>18</sup> aiana kateona mai ekia inawa katenamo. Auba ki'a obokia tebaro 'arinakia haukia abomo temai ebanamonakia.  
<sup>19</sup> To'u maikoina tebabobona katea'i 'apuana pokina hiabu ia aonai ekarahi ikoikiae ebamaurinakia.

*Maearima Tabakia Haukia Tenamo.*

(Mt 5.1-12)

<sup>20</sup> Iesu i'abana haukia eihanakia ena 'abi ea'i ramana etibaha, "Wai touraru haumi tonamo, pokina Tirama ena obia aiarana hanona wai 'eumi.

<sup>21</sup> Wai bariu tumare'a haumi tonamo, pokina wai hanona nuami katebonu.

Wai bariu tuhai haumi tonamo, pokina wai katoiriri.

<sup>22</sup> Maearima Nahuna paunai maearima ti'oatanimi, hoami tihorena, ti'abi ki'a heremai, atami tia'i ki'anakia raninai wai hanona tonamo.

<sup>23</sup> Rani weianai aomi katenamo katorobo katoaonamo wairai, pokina kupai arami rarina 'akina. Weiana ihobona tohanai 'aba'abakia ua tebabai aiho mahabanai haukia herekiae.

<sup>24</sup> "A bariu tuobia haumi heremai hanona keki'a ki'a baha, pokina emi namo maikoinai aba toa'ina.

<sup>25</sup> Bariu tuani 'ari haumi heremai hanona keki'a ki'a baha, pokina wai katomare'a.

Bariu toiriri haumi heremai hanona keki'a ki'a baha, pokina aomi katehaiara mai katohai.

<sup>26</sup> Maearima ikoikiae atami tibanamona raninai heremai hanona keki'a ki'a baha,

pokina 'aba'abakia babai ihobona tohana tebabaina mahabanai bai'oi haukia herekiae.

*Emi 'Ou Haukia Katoraona'au Ainakia.*

(Mt 5.38-48; 7.12a)

<sup>27</sup> "Iamo aia'u tuona haumi nahina benimi. Emi 'ou haukia katoraona'au ainakia, weiakia 'arimi a'i ti'ari haukia herekiae katobabai harai.  
<sup>28</sup> Weiakia teururu heremai haukia katoba namonakia, tibabai ki'a heremai haukia ahakiae katobahuba'ari.

<sup>29</sup> Hau ha mekemu kebo'ana raninai, koke'e banai abirana abomo kobena. Mai hau ha emu kota kea'i parena raninai, emu habuni ibatoto a'i koubo aina.  
<sup>30</sup> Maearima heremuai taba tinoiae haukia kobenakia, mai hau ha emu taba ha ea'ina rea imue aina robana a'i koahuna.  
<sup>31</sup> Wai emi nuatae maearima ua patebabai aiho heremai, wai abomo ua katobabai aiho maearima herekiae.

<sup>32</sup> Weiakia tiraona'au ainimi haukia mo katoraona'au ainakia hanona ena namo taba wai heremai? Aka ki'a haukia abomo tiraona'au ainakia haukia ua tiraona'auai aihonakia.  
<sup>33</sup> Weiakia heremai tibabai harai haukia herekiae mo tubabai harai hanona ena namo taba? Aka ki'a haukia abomo ua tibabai aiho.  
<sup>34</sup> Weiakia taba katebamue haukia mo tube-nakia hanona ena namo taba wai heremai? Aka ki'a haukia abomo aka ki'a haukia tibenakia weiana 'arakia katebamue.

<sup>35</sup> 'A emi 'ou haukia katoraona'au ainakia, mai katobabai harai herekiae, mai katobaibeni tabakia 'arakia ibamuekia a'i katoraonanakia. Weiana 'arami apa'uana katoa'ina, mai wai hanona 'ubi toha tohana Tirama nahunai katoao, pokina ia hanona a'i tibanamona haukia mai ki'a haukia abokiamo eaoko'o ainakia.  
<sup>36</sup> Aoko'o akakia katobabai Hamami 'abana, ia hanona mai ena aoko'o.

*Oi Hau Ha Ena Ki'a Robana A'i Koahuna.*

(Mt 7.1-5)

<sup>37</sup> "Abami a'i katoba bakainakia ba Tirama abomo wai a'i mebabakainimi, 'abami a'i katobaki'anakia ba Tirama abomo wai a'i mebabaki'animi, 'abami ekia ki'a katohina hao ba Tirama abomo wai emi ki'a kehina hao.  
<sup>38</sup> Katobaiben'i abami herekiae ba Tirama abomo kebenimi, ihobona taba ha kebonu 'auna 'abana kehao 'inina keahu 'inina kekiki oioi, ua kebeni aihonimi. Pokina tobaiben'i ihobonai Tirama abomo wai kebeni muenimi."

<sup>39</sup> Iesu 'abi ibabatai neiana ehina benakia etibaha, "Maha iau hauna ha kehore maha iau hauna ha a'i kebaka'ana, weiana kebabaina raninai terarua 'uri aonai katetoa.  
<sup>40</sup> Marere miorina ha ena ba'iobi hauna a'i ketara haona, 'a marere miorikia ekia marere katebaore haraina hanona ba'iobi hauna kipokia kateihobo.

<sup>41</sup> "Taba buonai matiu nabunabuna weiana 'abamu mahana aonai noihana, 'a arako'o rarina oi mahamu aonai hauna a'i nuraonana.  
<sup>42</sup> Oi kipomu mahamu aonai arako'o rarina weiana a'i noihana raninai, aea homanai uaho'abamu kohina bena, 'Uaho'aba'u e, mahamu aonai matiu nabunabuna ma'i ahina.' Bahaorea haumu e, mahamu aonai arako'o rarina moa'i ahi 'uaina, murinai uaho'abamu mahana aonai matiu nabunabuna koiha haraina koa'i ahina."

### Matiu Ha Ha Buabuakiae Kaha'io bina.

(Mt 7.16-20; 12.33-35)

<sup>43</sup> "Weiana matiu namona buabua ki'a obona a'i kebarama, abomo matiu ki'a obona buabua namona a'i kebarama. <sup>44</sup> Pokina matiu haha buabuakiae 'obi nirama, weiana maeearima 'ini boaboi ororo a'i tebubu obona, haeamona awa 'ini'iniai 'aruhi a'i tia'ina. <sup>45</sup> Hau namona ehore aonai taba namokia ebararo 'ekanai taba namokia nitara'au, hau ki'a obona ehore aonai ki'a tabakia ebararo 'ekanai ki'a tabakia nitara'au. Pokina aonai taba ebonu hauna pinanai nehinana.

### *Itu Bakori Haukia Rua.*

(Mt 7.24-27)

<sup>46</sup> "Wai taba buonai tuaparina'u, 'Obiapaka e, Obiapaka e,' ia e'u 'abi a'i tua'i taeana.  
<sup>47</sup> Maearima here'u timai mai e'u 'abi aiana tiona mai akana tibabaina haukia kabaihanimi ia hanona aea homakia.  
<sup>48</sup> Ia hanona matoha nau ha itu ebabaina, 'uri ehabi 'ourana pihara ahanai hoboro ebakorinakia, tou ekarahi raninai itu etorina 'a itu a'i ebaibiuna, pokina itu hanona ebakori harai ki'a bahana.  
<sup>49</sup> Iamo aia eona akana a'i ebabaina hauna ihobona matoha hau ha itu 'ano ahanai ebakorina hoborona aha'i, tou ekarahi itu etouna, beronai mo itu epobu, itu epobu hanona earu otaraina."

## 7

### *Iesu Roma Huari Poki Hauna Ena Aka Hauna Ena Inawa Ebana- mona.*

(Mt 8.5-13)

<sup>1</sup> Iesu ena 'abi ikoinai ehina orenakia maeearima herekiae murinai ekatoto Kaperanauma.  
<sup>2</sup> Roma huari pokи hauna ha weia ena ta'ara'i hauna 'arina e'ari ki'a baha hauna hanona einawa ki'a aba ke'ari.  
<sup>3</sup> Ia Iesu pouna eona raninai Iuda haukia apa'uakia baika euhunakia katenoina kemai ena ta'ara'i hauna kebamaurina.  
<sup>4</sup> Temai Iesu herena raninai tenoi hao noi haona tetibaha, "Hau neiana pobraina hanona penamo.  
<sup>5</sup> Pokina ia eka itubu niraona'au aina, ia ehore marea ebakorina 'eumai."  
<sup>6</sup> Weiana Iesu kipokia teao, bariu Iesu itu ebarina aonai huari pokи hauna ena hau euhunakia Iesu tehina bena tetibaha, "Obiapaka e, a'i koaro'ari, pokina au a'i anamo komai e'u ituai kototo.  
<sup>7</sup> Ua buonai kawahи heremu abomo a'i etaina.  
<sup>8</sup> Weiana au hanona hau ha ena hiabu ba'anai, mai huari haukia abomo au ba'a'uai. Au hau neiana ha nahina bena moao hanona ia niao, 'abana nahina bena omai hanona ia nimai. E'u

ta'ara'i hauna nahina bena neiana mobabaina hanona ia nibabaina."

<sup>9</sup> Iesu aia weiana eona rani-nai eta'u ta'u huri, ekabe to'u murinai haukia ehina benakia, "Au wai nahina benimi, Isaraela aonai a'ikakauma nahomana ha a'i atabu ahina." <sup>10</sup> Weiakia eu-hunakia haukia temue teao itu raninai, ta'ara'i hauna aba enamo tetabu ahina.

*Iesu Wapu Nahuna 'Ariai Ebamikirina.*

<sup>11</sup> Rani papana eao murinai Iesu eao aiara ha atana Nain, i'abana haukia mai mako ia kipokia teao. <sup>12</sup> Aiara pa'abina aba tibarina aonai, 'ari hauna ha tebua ahina weiana hanona wapu ha nahuna hamo hamona, aiara haukia bo'okia wapu te'abana.

<sup>13</sup> Obiapaka wapu eihana raninai eaoko'o aina, weiana ehina bena etibaha, "A'i kohai." <sup>14</sup> Ia eka'a ha ha eao ko'o ea'i 'apuana, ba ko'o tebuana haukia tekoroti. Iesu e'abi etibaha, "Hau aruaruna e, au nahina beni'o, momikiri."

<sup>15</sup> E'ari hauna emikiri emiati e'abi'abi, Iesu miori hinana ebeni muena. <sup>16</sup> Ikoikiai teta'u wairai, weiana Tirama tebanamona tetibaha, "Mahabanai apa'uana ha baiatakai ewaira tina." Haeamona tetibaha, "Tirama aba emai ena maearima herekia." <sup>17</sup> Iesu pouna neiana Judea 'eka maikoina mai herena hanokia ikoikiai aokiai tehina otaraina.

*Ioane I'abana Haukia Rua Eu-hunakia Iesu Herena Teao.*

(Mt 11.2-19)

<sup>18</sup> Ioane i'abana haukia 'abi neiakia ikoikiai tehinanakia ia herenai. <sup>19</sup> I'abana haukia rua eaparinakia euhanukia Obiapaka katebakaina katetibaha, "Kemai hauna hanona oi, 'ao haeai ha kata'imana?" <sup>20</sup> Temai Iesu herena raninai tehina bena tetibaha, "Ba'uere Robe hauna Ioane eu-hunamai heremu katabakaini'o, 'Kemai hauna hanona oi, 'ao haeai ha kata'ima?'"

<sup>21</sup> Rani weianai Iesu hanona maearima bo'ona 'akina ekia

inawa, hau haiara mai auba ki'a obokia aokiai haukia ebanamon-akia, abomo maha 'iau haukia bo'ona mahakia ebano'a. <sup>22</sup> Iesu terarua ekia 'abi ebamuena etibaha, "Tomoao, taba toihā mai urukia to'o haukia Ioane katohina bena. Maha 'iau haukia aba teihaiha, 'ome'ome haukia aba tika'a, morumoru haukia aba tet'a'e ta'e, haia po'o haukia aia aba tiona, 'ari haukia aba temikiri timauri mauri, abomo uraru haukia herekiai pou namona nairoro aina." <sup>23</sup> Haeamona e'abi etibaha, "Aona a'i nikai'au kai'au here'uai hauna hanona enamo."

*Iesu Ioane Pouna Ehinana.*

<sup>24</sup> Ioane euhunakia haukia temue murinai, Iesu haeamona to'u haukia herekiai Ioane pouna ehinana etibaha, "Toao hano 'akunai hanona taba katoihana? Baura kopura eabunakia katoihankia, u?" <sup>25</sup> Aha'i raninai taba katoihana buonai toao weia? Hau ha habuni 'arana rarina ebatotona katoihana, u? Weiakia habuni namoabukia tibatotonakia mai ekia obia tabakia tebo'o haukia hanona obia arana hauna ena ituai katotabu ahinakia. <sup>26</sup> Taba katoihana buonai toao weia? Mahabanai hauna ha, u? 'E, 'abi tohana, au wai nahina benimi, neiana hauna ehore mahabanai haukia bo'ona etara haonakia.

<sup>27</sup> Weiana hauna pouna Puka Robenai tererena,  
'E'u iuhubeau hauna  
kauhuna ke'uai,  
emu taeara kea'ia'i  
harai 'uaina.'

Mal 3.1

<sup>28</sup> Au wai nahina benimi. Babi'e nuakiai terama haukia ikoikiai baiatakiai ha Ioane a'i etara haona. Ia Tirama ena obia aiarana aonai eko'i ko'i ki'a baha hauna mo Ioane etara haona."

<sup>29</sup> Maearima ikoinai abomo moni bararo haukia Iesu ena 'abi 'uruna teona raninai Tirama ena taeara berona tebatohana, pokina ia hanona Ioane eba'uere robenakia. <sup>30</sup> 'A Parisea haukia mai rauhubu poki haukia Ioane

ena ba'uere robe a'i tenuatae aina buonai Tirama ena nuatae 'eukiae hauna tebaaoao aina.

<sup>31</sup> Iesu haeamona e'abi etibaha, "Uru neiana maearimakia hanona tabai kababatainakia? Ia hanona tabai kabaihobonakia?" <sup>32</sup> Ia hanona matoha miori papakia aiara ibuanai temiati 'abakia tiaparinakia tetibaha, 'Ai pihi taubainakia, ia wai a'i toewa, 'ari huikia ta'i, ia wai a'i tuhai." <sup>33</sup> Pokina ba'uere robe hauna Ioane emai raninai a'i eaniani mai bine beina a'i einu, ba wai to'abi totibaha, 'Ia aonai auba ki'a obona ha nemiaho.' <sup>34</sup> Maearima Nahuna emai nianiani mai neinuinu hanona wai tu'abi totibaha, 'Aniani ki'a mai inuinu ki'a hauna abomo moni bararo haukia mai aka ki'a haukia ekia hau.' <sup>35</sup> 'A Tirama ena aobero hanona katea'i taeana haukia herekiae ena bero kewairaea tina."

### *Babi'e Ha Tehoro Timina 'Orimoni Iesu Eheina.*

<sup>36</sup> Parisea hauna ha Iesu enuatae aina ena ituai kateaniani haeamo, ba Iesu eao ituai etoto aniani 'ekanai emiati. <sup>37</sup> Aiara weiana aonai aka ki'a babi'ena ha, Iesu Parisea hauna ena ituai kateaniani pouna eona raninai, ia pihara kabapuna aonai muramura timina 'orimona hauna emaiaina. <sup>38</sup> Eao Iesu murinai aena pokinai ekoroti ehai ba mahana beikiae aena ebabeinakia, buinai eba'ororonakia abomo epaunakia, muramura timina 'orimona eheina ahakiae.

<sup>39</sup> Parisea hauna weiana Iesu eaparina hauna babi'e ena babai eihana raninai, kipona aonai eraonana etibaha, "Neiana mahabanai hauna tohana raninai, ia aba pe'iohina, babi'e tabana ia nia'i 'apuana, pokina ia hanona ki'a babi'ena."

<sup>40</sup> Iesu ehore ehina bena etibaha, "Simona e, au 'abi ha oi heremu ai, kahinana." Ia etibaha, "Ba'iobi haumu e, mo'abi." <sup>41</sup> Iesu e'abi etibaha, "Hau rua moni

baiben'i hauna ha herenai moni tea'inakia, hamona hanona kina hinabu ima\* ea'ina, ha hanona kina imabui ea'ina. <sup>42</sup> Ara katehore a'i etainakia buonai terarua moni katemue ainakia haukia ekakinakia, ba aeana hauna ia 'arina ke'ari ki'a baha?"

<sup>43</sup> Simona e'abi etibaha, "Narao-nana, pa'e weiana ena a'i 'uai apa'uana ekakina hauna." Iesu ia ehina bena etibaha, "Aba o'abi harai."

<sup>44</sup> Iesu ekabe babi'e eihana, ba Simona ehina bena, "Babi'e neiana noihana? Au amai emu ituai atoto hanona ae'u beikia a'i obaiben'i. 'A ia hanona mahana beikiae ae'u eutunakia abomo buinai eba'ororonakia. <sup>45</sup> Oi a'i opauna'u, 'a babi'e neiana akatoto ramana raninai ae'u ipaukiae a'i e'oro 'apua. <sup>46</sup> Oi ara'u tehoroai a'i oheina, 'a ia tehoro timina 'orimonai ae'u eheinakia. <sup>47</sup> Ua buonai nahina beni'o, ena ki'a bo'ona 'akina haukia aba ihina hao, pokina ena raona'au eapa'ua paunai, ia tai ena raona'au papana hauna hanona ena ki'a papana ihina hao." <sup>48</sup> Ba Iesu babi'e ehina bena etibaha, "Emu ki'a aba ihina hao." <sup>49</sup> Aniani 'ekanai temiati haukia kipokia baiatakiae te'abi'abi tetibaha, "Neiana hanona tai, ba ki'a abomo nehina hao." <sup>50</sup> Iesu babi'e ehina bena etibaha, "Emu a'ikakauma ehore ebamaurini'o, mai baibuamu moao."

## 8

### *Babi'e Baika Iesu Murinai Teka'a.*

<sup>1</sup> Neiana murinai rani a'i ehoma'a Iesu eao aiara apa'uakia mai papakia aokiae Tirama ena obia aiarana pouna namona eiroro aina. I'abana haukia harauhaea rua hanona te'abana kipokia teao, <sup>2</sup> mai babi'e baika abomo, auba ki'a obokia 'eukiae eu'u ahinakia mai hau haiarai

\* **7:41:** (41) Helene moninai Denari hinabu ima. Denari hamona hanona aka hauna wapu hamona 'arana.

ebanamonakia babi'ekia, ha Maria Magadala babi'ena aonai auba ki'aobokia 'abaihau hamomo eba karahinakia babi'ena,<sup>3</sup> ha Ioanna, atawana Kusa hanona Heroda obia arana ena itu kohukia nipoki ainakia hauna, mai Susanna, mai babi'e bo'okia baika. Babi'e neiakia kipokia ekia tabai Jesu mai i'abana haukia tebarainakia.

*'Abi Ibabataina Biraura Hauna Ena Uho Ebatonakia.*

(Mt 13.1-9; Mk 4.1-9)

<sup>4</sup> Maearima bo'ona aiara ha ha ai temai Jesu herenai to'u rarina tebabaina aonai Jesu 'abi ibabatai neiana ehinana etibaha,<sup>5</sup> "Biraura hauna ha eao ena uho kebatonakia. Ekapo kapo otarainakia aonai baika taeearai te'eho, ba maearima ahakia tehe'au haeamona ubi roborobokia teani orenakia.<sup>6</sup> Uho baika bohu ahanai te'eho, te'omu ia tepaea pokina hano a'i emapu mapu. <sup>7</sup> Uho baika awa 'ini'inikia aokiai te'eho, awa 'ini'inikia kipokia te'omu haeamo ba tetara tara abunakia, <sup>8</sup> Uho baika hano namonai te'eho, te'omu harai tebua'a buakia hinabu ha ha 'abana." Jesu ena 'abi puanai e'abi aota etibaha, "Mai haiana hauna hanona ke'ibina."

*'Abi Ibabatai Ena Poki*  
(Mt 13.10-17; Mk 4.10-12)

<sup>9</sup> I'abana haukia Jesu tebakaina 'abi ibabatai neiana anina taba. <sup>10</sup> Ia e'abi etibaha, "Tirama ena obia aiarana 'iobikia bunikia hanona aba wai ebenimi, ia baika herekiai hanona 'abi ibabataiai nahina benakia, weiana, 'kateihana mo ia a'i kateiha tinana aia kateona ia obona a'i kateobo."

Isa 6.9

*Iesu 'Abi Ibabataina Anina Ehi-nana.*

(Mt 13.18-23; Mk 4.13-20)

<sup>11</sup> "Abi ibabatai anina neiana. Uho hanona Tirama ena 'abi. <sup>12</sup> Uho taeearai te'eho haukia hanona weiakia, aia tiona ia tiaporoi nimai 'abi aokiai nia'i parena

pokina a'i teme a'ikakauma mai a'i tememauri ta'una.<sup>13</sup> Uho weiakia bohu ahanai te'eho haukia hanona weiakia, aia tiona raninai 'abi tia'ina mai aonamokia, iamo ramukia aha'i rani papana motia'ikakauma ba baihobo nimai raninai ti'eho.<sup>14</sup> Uho weiakia awa 'ini'inikia aokiai te'eho haukia hanona weiakia, aia tiona ia mauri neiana ena ao aro'ari ena obia tabakia mai ena aonamo tabakiai aokia nikaiabunakia ba buabuakia tepure.<sup>15</sup> 'A uho weiakia hano namonai te'eho haukia hanona weiakia, aokia beronai mai namonai 'abi uruna tiona tia'i 'inina tibakiro niao mo buabuakia tibarama."

*Ramepa 'Ekana Tohanai Ko-hao'una.*

(Mk 4.21-25)

<sup>16</sup> Iesu haeamona ehina be-nakia etibaha, "Hau ha ramepa niba'arana raninai uro aonai a'i nibahu abuna 'ao parua itarana ba'anai a'i nikai tina 'a ia ramepa iha'o'una 'ekanai niha'o 'auna ba weiakia katetoto haukia hanona ea kateihana.<sup>17</sup> Taba ikoinai tehore buni haukia hanona katekarahi mahanai, taba ikoinai tebahu abu haukia hanona eai katebawaira tinanakia.

<sup>18</sup> Aia aea nuo aihona hanona ko'ima haraina, pokina mai 'euna hauna hanona ahanai baika Tirama kehore 'auna kebena, ia 'euna aha'i hauna hanona herenai papana nemiaho niraonana 'euna hauna abomo kea'i obona."

*Iesu Hinana Mai Uaho'abana.*  
(Mt 12.46-50; Mk 3.31-35)

<sup>19</sup> Ba Iesu hinana mai hatina temai kateihana iamo a'i etainakia pokina to'u rarina paunai.<sup>20</sup> Hau ha Iesu ehina bena etibaha, "Oi hinamu mai hatimu mahanai tekoroti tenuatae kateihani'o."<sup>21</sup> Ba ena 'abi ebamuena etibaha, "Neiakia Tirama ena 'abi aiana tiona mai akana tibabaina haukia hanona au hina'u mai hati'u."

*Iesu Rani Mai Roio Eba'omatanakia.*  
(Mt 8.23-27; Mk 4.35-41)

<sup>22</sup> Rani ha Iesu i'abana haukia kipokia ahi ai tehe'au ba ehina benakia etibaha, "Aika hamaeao obu abiran." Ba tebeau ahi. <sup>23</sup> Tebeau oho aonai, Iesu hanona enoti eparua 'ari. Ba kou rarina obu aonai eabu 'au, bei ahi aonai teraku uta hereka 'akinai pateuhu. <sup>24</sup> I'abana haukia teao Iesu tebaona tetibaha, "Poki haumu e, poki haumu e, aika aba kahatono 'ari." Ba ia emikiri baura mai roio erikenakia, baura e'oro roio e'omata. <sup>25</sup> Ba i'abana haukia ehina benakia etibaha, "Emi a'ikakauma ae'e?" Ia teta'u ta'u huri abomo teta'u ki'a kipokia baiatakiai tebakai bakai tetibaha, "Neiana hanona hau tabana, baura mai roio ehina benakia hanona aiana tika'aina."

*Iesu Hau Ha Aonai Auba Ki'a Obokia Eu'u Ahinakia.*

(Mt 8.28-34; Mk 5.1-20)

<sup>26</sup> Iesu i'abana haukia kipokia ahiai tebeau banai teao Gerasene hanonai weiana hanona Galilea obu abiranai. <sup>27</sup> Iesu ekara'au poeai raninai, aiarai hau ha aonai auba ki'a obokia temiaho hauna emai tebaitabu ahi. Aba wa'i baha 'akinai habuni ha'i ebatotona haeamona ituai a'i emiaho, ia 'ari ahanai emiaho. <sup>28</sup> Ia Iesu eihana raninai eio ki'a haeamona e'eho aena pokinai eio aota ki'a etibaha, "Iesu 'ubi tohanai Tiramana Nahuna e, taba nonuatae aina here'uai kobabaina. Nanoini'o puma a'i kobena'u." <sup>29</sup> Pokina Iesu auba ki'a obokia aba ehina benakia hau weiana aonai katekarahi. Rani bo'okia auba ki'a obokia tehaburi abuna, maearima tehore imana aena tabiriai tebirinakia te'ima haraina iamo tabiri eba mohunakia haeamona auba ki'a obokia tebabreau totona hano 'akunai.

<sup>30</sup> Iesu ia ebakaina etibaha, "Atamu tai?" Ia etibaha, "Ata'u hanona Mako." Pokina auba ki'a obokia bo'ona 'akina aonai temiaho. <sup>31</sup> Ia auba ki'a obokia Iesu tenoina a'i keuhunakia a'i

kateao 'uri 'ourana aena aha'i hauna aonai.

<sup>32</sup> Aiporo to'una ha weia teba korinakia oeo mekenai teaniani, ba auba ki'a obokia Iesu tenoina keuhunakia kateao aiporo aokiai katetoto buonai euhunakia teao. <sup>33</sup> Ba auba ki'a obokia hau weiana aonai tekarahi teao aiporo aokiai tetoto, aiporo to'una tebeau riri papa'ai terobo ahi, 'obu aonai tetono 'ari.

<sup>34</sup> Aiporo bakori haukia taba weiana erama teihana raninai tebeau 'akauma aiarai mai umai pou neiana tehinana. <sup>35</sup> Maearima teao taba erama hauna kateihana Iesu herenai tekara'au raninai, hau weiana aonai auba ki'a obokia tekarahi hauna Iesu aena pokinai emiati habuni ebatotona abomo aona aba ebero teihana ba ikoikiai teta'u ki'a. <sup>36</sup> Weiakia teihana haukia maearima herekiai hau weiana aonai auba ki'a obokia tetoto hauna aea enamo aiho hauna pouna tehinana. <sup>37</sup> Gerasene maearimakia ikoikiai Iesu tenoina hano weianai kekapare pokina teta'u ki'a. Weiana ia ahiai ehe'au kemue. <sup>38</sup> Hau weiana aonai auba ki'a obokia tekarahi hauna Iesu enoina pe'abana, ia Iesu ehore ebamuena ehina bena etibaha, <sup>39</sup> "Komue emu aiara, Tirama taba ebabaina heremuai hauna pouna kohinana." Ua buonai hau weiana eao aiara maikoinai aokiai Iesu taba ebabaina herenai hauna pouna ehinana.

*Iairo Nahuna Mai Babi'e Ha Iesu Ena Habuni Ea'i Apuana Hauna.*

(Mt 9.18-26; Mk 5.21-43)

<sup>40</sup> Iesu emue raninai, to'u haukia tehore tea'i taeana pokina ikoikiai ia te'imana. <sup>41</sup> Weiana hau ha atana Iairo marea poki hauna ha emai Iesu aena pokinai ekuti enoina kateao ena itu. <sup>42</sup> Pokina nahuna uahona hamo hamonamo ihauna harauhaea rua hanona aba ke'ari.

Iesu niao oho aonai to'u rarina aonai eka'a. <sup>43</sup> Ba babi'e ha

weia, ia hanona babi'e ekia inawa ea'ina aba ihau harauhaea rua, muramura haukia herekiai ena kohu ebaorenakia, hau ha ia a'i ebanamona.<sup>44</sup> Ia Iesu murinai ekataeana eao ena habuni puana ea'i 'apuana, beronai mo ena inawa e'oro.<sup>45</sup> Iesu ebakai bakai etibaha, "Tai ea'i 'apuana'u?" Ikoikiai tebuniai aonai Petero e'abi etibaha, "Poki haumu e, maearima tekori abuni'o abomo tetuani'o."<sup>46</sup> A Iesu e'abi etibaha, "Hau ha ea'i 'apuana'u pokina a'io bina hiabu hau'uai hauna aba ekarahi."<sup>47</sup> Weiana babi'e e'io bina kepihi taearana aha'i ba eao mai 'ururu 'ururuna e'eho Iesu aena pokinai, taba buonai ea'i 'apuana abomo aea enamo aiho pouna maearima ikoikiai wairakiai ehinana.<sup>48</sup> Ba Iesu babi'e weiana ehina bena etibaha, "Naha'u e, emu a'ikakauma ehore aba ebanamoni'o mai baibuamu moao."

<sup>49</sup> Iesu ni'abi ohomo aonai hau ha Iairo ena ituai emai Iairo ehina bena etibaha, "Nahumu aba e'ari. Ba'obi hauna a'i mobaro 'ari 'abaeana."<sup>50</sup> Iesu aia weiana eona ba Iairo ehina bena etibaha, "A'i kota'u, koa'ikakaumana'u. Nahumu hanona kenamo."<sup>51</sup> Iesu Iairo ena ituai ekara'au raninai maearima ikoikiai ebamuenakia, ia Petero, Iakobo, mai Ioane mai uaho hamana hinana mo te'abana tetoto.<sup>52</sup> Weia hanona maearima ikoikiai uaho tihai aina mai tiaoko'o aina. Iesu e'abi etibaha, "Hai tomobapuana, uaho hanona a'i e'ari, ia niparua."<sup>53</sup> Maearima Iesu teiriri aina, te'io bina uaho hanona aba e'ari toha.<sup>54</sup> Iesu uaho imanai ea'i eparina etibaha, "Naha'u e, momikiri."<sup>55</sup> Uaho aubana emue beronai emikiri, ba Iesu ehina benakia taba ha katebena keana.<sup>56</sup> Uaho hamana mai hinana teta'u ta'u huri, 'a Iesu ehara abunakia taba erama hauna hanona tai ha haianai a'i kate'abi.

## 9

*Iesu I'abana Harau Haea Rua*

### *Euhunakia Kateiroro.*

(Mt 10.5-15; Mk 6.7-13)

<sup>1</sup> Iesu ehore i'abana haukia harau haea rua eparinakia, ebato'unakia, tabura mai hiabu ebenakia paipai ki'a obokia ikoikiai kateu'u ahinakia mai inawa haeai haeai kateba maulinakia,<sup>2</sup> ba euhunakia Tirama ena obia aiarana pouna kateiroro aina abomo inawa haukia kateba namonakia.<sup>3</sup> Ehina benakia, etibaha "Emi harima ai taba ha a'i katoa'ina, ikai'ini aha'i, mahoa aha'i, aniani aha'i, moni aha'i, abomo emi ibatoto ibaruakia a'i katoa'inakia.<sup>4</sup> Itu tabanai katokara'au raninai weiamo katomiaho keaomo aiara weiana katohabona.<sup>5</sup> Ba maearima a'i katea'i taeanimi raninai 'apumi apurorokia katoahuahu obo ba ekia aiara katohabona ia irobekia 'abinai keao."<sup>6</sup> Ba i'abana haukia temiki teao aiara haha aokiae pou namona teiroro aina abomo maearima tebamaurinakia.

### *Heroda Ena Nuatae Ke'iobi Haraina Iesu Hanona Tai.*

(Mt 14.1-12; Mk 6.14-29)

<sup>7</sup> Heroda Obia hauna taba ikoinai Iesu ebabai poukia eo'o raninai aona earo'ari, pokina baika tehina bena ba'uere robe hauna Ioane aba 'ariai emikiri mue.<sup>8</sup> Baika tetibaha Elia aba ewaira tina, haeamona baika tetibaha mahabanai hauna 'ai'aina ha bariu emikiri mue.<sup>9</sup> Ia Heroda etibaha, "Ioane 'akona aba akabe hurina, 'a 'uruna naona aka nahomakia nibabai hauna hanona tai?" Ba ena nuatae hanona keihana.

### *Iesu Taha Ima (5,000) Ebanianakia.*

(Mt 14.13-21; Mk 6.30-44; Io 6.1-14)

<sup>10</sup> Iuhubeau haukia temue Iesu herena taba taba tebabai haukia ia wairanai tehinanakia. Weiana ia ehore ebaka'a obonakia ia kipokia teao aiara ha atana Betesaida ai.<sup>11</sup> Ia maearima te'io bina Iesu aba weia hanona ikoikiai ia murinai teao. Ea'i taeanimakia, Tirama ena obia aiarana 'abina ehinana

abomo mauri tenuatae haukia ebamaurinakia.<sup>12</sup> Beraura aba erabirabi i'abana haukia harau haea rua temai herena tehina bena tetibaha, "Maeearima neiakia mouhunakia, temera'a temeo aiara 'ao uma herekai haukia weia katemiaho kipokia ekia aniani katetabu pokina 'eka neiana hanona hanon'a'akuna."<sup>13</sup> Iesu ekia 'abi ebamuenetibaha, "Wai taba ha tomobenakia temeani." Ia tetibaha, "Ai heremaiatemiaho haukia hanona parawa ima maia rua mo, konuatae kataeo aniani katakawanakia maeearima neiakia 'eukia, 'u?'"<sup>14</sup> Hau 'abaeanan hanona ikoinai taha ima (5,000) 'abana.

Iesu i'abana haukia ehina benakia etibaha, "Maeearima neiakia haukia imabui imabui katoba miatinakia."<sup>15</sup> Ehinana hauna ihobonai i'abana haukia tebabaina ba maeearima ikoikia temati.<sup>16</sup> Iesu ehore parawa ima mai maia rua ea'inakia ea'a taea kupa eihana ebanamona murinai ehobi 'iti'itnakia. Ba i'abana haukia ebenakia katekaitinakia maeearima wairakiai.<sup>17</sup> Weiana ikoikiai teaniani eao teani 'ari, i'abana haukia aniani harikia pohea harauhaea rua tebabonunakia.

### *Petero Iesu Ehina Pouna Ia Hanona Keriso.*

(Mt 16.13-19; Mk 8.27-29)

<sup>18</sup> Rani ha Iesu kipona ebahuba'ari, i'abana haukia hanona ia herenai temiaho ebakainakia etibaha, "Maeearima au aha'uai taba na tihoma?"<sup>19</sup> Ia ena 'abi tebamuenetibaha, "Baika ti'abi Ioane Ba'uere robe hauna, baika ti'abi Elia, baika ti'abi mahabanai hauna ha aba 'uainai e'ari hauna bariu emauri mue."<sup>20</sup> Ebakainakia, "Ia wai hanona taba na tuhoma? Au hanona tai?" Petero ena 'abi ebamuenetibaha, "Oi hanona Keriso Tirama euhuni'o haumu."

*Iesu Ena 'Ari Pouna Ehinana.*  
(Mt 16.20-28; Mk 8.30—9.1)

<sup>21</sup> Ia ehore eharabunakia hau ha a'i katehinabe 'apuana.<sup>22</sup> Haeamona etibaha, "Maeearima Nahuna hanona kehaiara ki'a baha, aiara hau apa'uakia, robe haukia apa'uakia mai rauhubu poki haukia kate'oatana abomo kateahu 'arina, ia wapu ibaihau-nai kemikiri mue."

### *Iesu Paunai Mauri Kene'ena Hauna Mauri Kea'ina.*

<sup>23</sup> Ikoikiai ehinabe muenakia etibaha, "Tai ha nenuatae au ke'abana'u raninai, ia kipona ena mauri kehabona ena matiu ibiri ropo kea'i taeana kebuana rani ikoinai au muri'uai keka'a.<sup>24</sup> Pokina ena mauri kea'i 'inina hauna hanona ena mauri keba'akaumana, 'a au pau'uai ena mauri kene'ena hauna hanona mauri kea'ina.<sup>25</sup> Hau ha hanopaka tabakia maikoinai pea'ina ena mauri peba 'akau-mana 'ao pea'i ki'ana raninai ena namo hanona taba?<sup>26</sup> Hau ha au pau'uai 'ao e'u 'abi paukiai kehaumaea raninai, Maeearima Nahuna abomo ia kehaumaeaina ena nuabai abomo Hamana ena nuabai ena aneru robekia kipokia ekia mai raninai.<sup>27</sup> 'Abi tohana mo au wai nahina benimi, neia tikoroti haukia baika hanona a'i kate'ari keaomo Tirama ena obia aiarana kateihana."

### *Iesu Ihana Ebahaeaina.*

(Mt 17.1-8; Mk 9.2-8)

<sup>28</sup> 'Abi neiakia ehinanakia wapu 'ababani teore murikiai Iesu ehore Petero, Ioane mai Iakobo eba ka'anakia oeoai tekara'au ke-bahuba'ari paunai.<sup>29</sup> Ebahuba'ari aonai ia wairana ehaeai ena habuni epore e'imare 'imare.<sup>30</sup> Hau rua ia kipokia te'abi'abi, Mose mai Elia.<sup>31</sup> Mai nuabikia tewaira tina Iesu kipokia Tirama ena nuatae ihobonai Ierusalemai ke'ari hauna terobahu aina.<sup>32</sup> Petero 'abana kipokia hanona teparua 'ari ba teno'a, Iesu nuabina mai hau rua herenai tekoroti haukia abomo teihananakia.<sup>33</sup> Hau rua Iesu aba katehabona

aonai, Petero ehore Iesu ehina bera etibaha, "Poki haumu e, aika neia nahamiaho hanona enamo ki'a baha! Ai i'aua aiha katababainakia, ha oi 'eumu, ha Mose 'euna, ha Elia 'euna." Ia hanona a'i e'io bina paunai e'abi 'abaea.

<sup>34</sup> Ia ni'abi ohomo aonai 'auhao emai ikoinai ekaabunakia, ba ia 'auhao aonai hanona teta'u ki'a. <sup>35</sup> Aia ha 'auhao aonai emai etibaha, "Neiana hanona Au Naha'u, atina'ana hauna, aiana katona." <sup>36</sup> Aia weiana epua murinai Iesu ikupaihana teihana. I'abana haukia 'abi ha a'i tehina 'apuana, abomo taba teihanakia haukia rani weianai hanona hau ha a'i tehina bena.

*Iesu Miori Aonai Auba Ki'a Obona Eu'u Ahina.*

(Mt 17.14-18; Mk 9.14-27)

<sup>37</sup> Erani ia oeoai teriri Iesu maearima bo'ona kipokia tebaitabu ahi. <sup>38</sup> Hau ha maearima baiatakiai eio etibaha, "Ba'obi haumu e, au oi nanoini'o, naha'u neiana moihana, naha'u hamomona mo neiana. <sup>39</sup> Rani baika auba ha miori neiana nia'ina, beronai neio, niba'ororo abuna, pinanai 'uto'uto tikarahi, a'i nihabona keaomo hauna nimani'a obo. <sup>40</sup> Au ti'abani'o haukia anoinakia auba ki'a obona kateu' ahina, ba ia a'i etainakia."

<sup>41</sup> Iesu ehina benakia etibaha, "A'ikakauma aha'i mai ki'a babai uruna haumi, heremiai kamiaho keaomo aita? Nahumu omaaina here'u." <sup>42</sup> Miori eka'a haha aonai biriuu ki'a obona ehore miori 'anoai e'atiaina eba'ororo abuna, Iesu ehore auba ki'a obona ebatana ba miori eba'maurina, eaoaina hamana ebena. <sup>43</sup> Tirama ena hiabu rarina 'akinai maearima ikoikiai teta'u ta'u huri. Ia Iesu taba ebabaina hauna tiaonamoai ohona aonai i'abana haukia ehina benakia etibaha,

*Iesu Ke'ari 'Abina Ehina Poua.*  
(Mt 17.22, 23; Mk 9.30-32)

<sup>44</sup> "Abi tabana heremiai aba kahinana hauna tomobahuai haraina. Maearima Nahuna

hanona hinahinana katehina maearima herekiai." <sup>45</sup> 'A ia ena 'abi neiana anina a'i te'io bina. Ia herekiai taba e'uhina hauna ebuni buonai obona a'i teobo, ba katebakaina hanona teta'u.

*Tai Hanona Eapa'ua.*

(Mt 18.1-5; Mk 9.33-37)

<sup>46</sup> Rani ha i'abana haukia kipokia mo baiatakiai tebaihara tae tai hanona keapa'ua ki'a baha.

<sup>47</sup> Iesu ekia raona weiana e'io bina buonai miori papana ha emaiaina herenai ebakorotina. <sup>48</sup> Ba ehina benakia etibaha, "Tai ha au ata'uai miori papana neiana nia'i taeana hauna hanona au nia'i taeana'u, au nia'i taeana'u hauna hanona euhuna'u Tirama abomo nia'i taeana. Wai ikoimiai baiatamiai ha eko'i ko'i ki'a baha hauna ia hanona keapa'ua ki'a baha."

*A'i Ni'oatanimi Hauna Emi Hau.*  
(Mk 9.38-40)

<sup>49</sup> Ioane Iesu ehina bera etibaha, "Poki haumu e, ai hau ha taihana oi atamuai auba ki'a obokia eu'u ahinakia. Ba ai tahina bera kebapuana pokina ia hanona aika 'abaka aha'i." <sup>50</sup> Iesu ehina benakia etibaha, "A'i patoba'orona, pokina a'i ni'oatanimi hauna hanona wai 'abami."

*Samaria Haukia Iesu A'i Tenuatae aina.*

<sup>51</sup> Iesu kemue kupa keao ranina ekaibari aonai ia aona ebatburana emikiri Ierusalem keao. <sup>52</sup> Ba iuhubeau haukia ehuu 'uainakia teao Samaria aiarana ha aonai taba ikoikiai kateba'orunakia. <sup>53</sup> 'A maearima weia haukia a'i tea'i taeana, pokina ia te'io bina Iesu hanona Ierusalem niao. <sup>54</sup> I'abana haukia Iakobo mai Ioane babai weiana teihana raninai tebakaina tetibaha, "Obiapaka e, nonuatae iruba kupai kataparina, keriri keba'ara koukounakia, u?" <sup>55</sup> 'A Iesu ekabe terarua erikenakia, <sup>56</sup> ba ia teao aiara haeai ha.

*Iesu I'abana Hoana Aeahomana.*  
(Mt 8.19-22)

<sup>57</sup> Ia taearai teka'a aonai hau ha Iesu ehina bena etibaha, "Au oi aeana nuao hanona murimuai ka'au." <sup>58</sup> 'A Iesu ia ehina bena etibaha, "Waeha 'aki hanona mai ekia 'uri, 'ubi roborobokia abomo mai ekia ni'i, ia Maearima Nahuna kenoti kearai hanona 'ekana aha'i." <sup>59</sup> Haeamona Iesu hau ha ehina bena etibaha, "Muri'uai mo'au." 'A hau weiana e'abi etibaha, "Obiapaka e, maeao hama'u mahore 'uaina." <sup>60</sup> Iesu ia ehina bena etibaha, "Ti'ari haukia ekia 'ari temehorena, 'a oi moao Tirama ena obia aiarana pouna koiroro aina."

<sup>61</sup> Haeamona hau mo ha e'abi etibaha, "Obiapaka e, au murimuai ka'au, ia maeao 'uai e'u rama haukia herekiai haparua mahinana." <sup>62</sup> Iesu ena 'abi ebamuena etibaha, "Hau ha 'ani ihiuana imanai nia'ina, 'a keiha kabē to'o baihana hauna hanona Tirama ena obia aiarana akana kebabaina hanona a'i ketaina."

## 10

### *Iesu Maearima Imabui Harau Rua Rua Euhunakia.*

<sup>1</sup> Neiana murinai Obiapaka ehore haukia imabui harau-rua rua etina'anakia, ikoikiai baiatakiai rua rua euhunakia kate'uai kateao ia kipona keao aiarakia mai 'ekakia ikoikiai. <sup>2</sup> Ehina benakia etibaha, "Umai aniani aba ebo'o harai ia aka haukia mo a'i ebo'o, ua buonai uma poki hauna katonoina, ia kehore aka haukia keuhunakia ena umai kateaka.

<sup>3</sup> Tomoao! Au wai nauhu ahinimi ihobona mamoe nahukia 'abakia, waeha 'aki baiatakiai. <sup>4</sup> Mahoa ihiua hiua, pute 'ao tamaka ha a'i katoa'i. Taearai abomo maearima ha kipokia a'i katokikipa. <sup>5</sup> Itu tabanai katokara'au, katohina 'uaina 'abina hauna neiana, 'Baibua hanona itu neianai!' <sup>6</sup> Hau weiana aona kebaibua raninai, wai emi baibua hanona ia anahai

kemiaho. Ia keaha'i raninai emi baibua hanona kemue heremi. <sup>7</sup> Kipokia itu weianai katomiah oioi, taba tibaiben'i haukia katoani 'ao katoinu, pokina aka hauna mai 'arana hanona enamo. Itu ha ha a'i katoao.

<sup>8</sup> Aiara tabana aonai katokatoto, katea'i taeanimi raninai wairamiai taba tekaitina hauna katoana, <sup>9</sup> aiara weianai inawa haukia katoba maurinakia, abomo katohina benakia, katotibaha, 'Tirama ena obia aiarana hanona aba nimai heremi.' <sup>10</sup> Ia aiara ha aonai katokatoto, a'i katea'i taeanimi raninai katokarahi taearanai kato'abi katotibaha, <sup>11</sup> 'Emi aiara apurorona weiana eta to'ona 'apumaihai hauna aba tatabu tabu obona niwahi heremi. Weia kato'io bina Tirama ena obia aiarana aba herekai.' <sup>12</sup> Au wai nahina benimi, bakai berauranai Sodoma ena haiara ma kenamo 'apua ba aiara weiana ena haiara keapa'ua.

### *Aiara Haukia A'i Teraona Kabe. (Mt 11.20-24)*

<sup>13</sup> "Korasina e! Heremuai hanona keki'a wairai. Betesaida e! Oi abomo heremuai hanona keki'a wairai. Ba ta'u ta'u huri akakia neiakia heremi ai ababai haukia weia Turo mai Sidono aokiai pababai raninai, aba wa'i baha pateraona kabe, habuni ki'a obokia patebatotonakia rabuai pateata patemati. <sup>14</sup> Bakai berauranai Turo mai Sidono ekia haiara ma kenamo 'apua ba wai 'eumi keapa'ua. <sup>15</sup> Kaperanauma e! Oi abomu mo. Kipomu pokara'au poao kupa ubinai na nuhomma. Ia aha'i. Oi hanona katetori oboni'o koriri 'ari 'ekana."\*

<sup>16</sup> Iesu i'abana haukia ehina benakia etibaha, "Wai aiami niona hauna au aia'u abomo aba niona, wai nibaki'animi hauna au abomo nibaki'ana'u, ia au nibaki'ana'u hauna euhuna'u hauna abomo nibaki'ana."

\* **10:15:** (15) 'ao Hades.

*Haukia Imabui Haraurua Rua  
Temue Iesu Herena.*

<sup>17</sup> Haukia imabui haraurua rua teao haeamona mai aonamokia temue herena te'abi tetibaha, "Obiapaka e, oi atamuai auba ki'a obokia tau'u ahinakia hanona aiamai teona." <sup>18</sup> Iesu ia ehina benakia etibaha, "Au Satani kupai e'eho hanona aihana matoha 'imare 'abana." <sup>19</sup> Au hiabu wai aba abenimi, 'erau 'ao hara katoehe 'ininakia abomo 'ou hauna ena hiabu ikoinai katotara haona, taba ha a'i kebamani'animi. <sup>20</sup> Auba ki'a obokia aiami teona paunai a'i katoaonamo, 'a atami kupai aba terere hauna katoaonamo aina."

*Iesu Eaonamo.*

(Mt 11.25-27; 13.16, 17)

<sup>21</sup> Rani weianai Iesu Auba Robe paunai aona enamo ki'a e'abi etibaha, "Hama'u e, kupa mai hanopaka Obiana nabananamoni'o, pokina taba neiakia aotipa mai aobero haukia herekiae obun-inakia haukia miori papakia herekiae obawaira tinana. E, hama'u, pokina neiana hanona oi emu raona namona. <sup>22</sup> Taba ikoinai hanona Hama'u aba ebaibenai here'uai, Nahuna hauna tai ha a'i e'io bina ia Hamana ikupai anamo, Hamana hauna tai ha a'i e'io bina Nahuna mai nahuna nenuatae ainakia herekiae kebawaira tinana haukia ikupaiakia mo."

<sup>23</sup> Weiana Iesu eiha kabé i'abana haukia ehinabe buninakia etibaha, "Taba neiakia toihanakia haumi hanona tutai harai toihā tinanakia. <sup>24</sup> Pokina au wai nahina benimi, mahabanai haukia mai aiara obiakia bo'okia tenuatae wai toihā haukia pateiha ia a'i teiha, tuo'o haukia pateo'o ia a'i teo'o."

*Ori Ibabataina Samaria Hauna  
Namona.*

<sup>25</sup> Weia rauhubu poki hauna ha emikiri Iesu ehobona etibaha, "Ba'iobi haumu e, taba kababaina hanona mauri banaibana ka'ina?" <sup>26</sup> Iesu ia ena 'abi ebamuena etibaha, "Rauhubu pukana aonai aea terere aihona?

Aea o'iobi aihona?" <sup>27</sup> Ia ena 'abi ebamuena etibaha, "Obiapaka emu Tirama koraona'au aina mai aomu ikoinai, mai aubamu ikoinai, mai taburamu ikoinai, mai emu raona ikoinai, abomo heremu hauna koraona'au aina oi kipomu nuraona'au aini'o 'abana." <sup>28</sup> Iesu ia ena 'abi ebamuena etibaha, "Emu 'abi hanona ebero, na kobabai aihohanona komauri."

<sup>29</sup> Rauhubu poki hauna kipona eapaina ebakai bakai etibaha, "Ba here'u hauna hanona tai?" <sup>30</sup> Iesu ia ena 'abi ebamuena etibaha, "Hau ha Ierusalem ai eriri Ieriko eao aonai kakikaki haukia tehe abuna, ena habuni tebakurinakia teahu ki'ana herekai mo pe'ari ba tehabona. <sup>31</sup> Rani weianai Robe hauna ha taeara weianai eka'a eao, eihana raninai taeara haia haianai ekabanai. <sup>32</sup> Ihobonaimo Lebi itubuna hauna ha taeara weianai eao, eihana raninai taeara haia haianai ekabanai.

<sup>33</sup> 'A Samaria hauna ha ena kaoao ai hau weiana herenai ekara'au, eihana raninai eaoko'o aina.

<sup>34</sup> Eao herena hauna mani'akia tehorai mai bine beinai etaronakia e'apanakia. Ba ena doniki ahanai ebamia'auna, eaoaina iha'ini itunai ua'a e'imana. <sup>35</sup> Erani hau weiana ehore moni rua etara 'aunakia itu iha'inina hauna ebena ehina bina etibaha, 'Ko'ima haraina, herenai bita kone'e hanona e'u mueai'arakia kabeni'o.'

<sup>36</sup> Iesu ia ebakaina etibaha, "Oi taba na nuhoma? Hau weia kia teahau aonai aeana hauna kakikaki haukia imakiae enouta hauna herena haunai ebaona?" <sup>37</sup> Ia etibaha, "Weiana eaoko'o aina hauna." Iesu ia ehina bina etibaha, "Moao ebabaina ihobona mo kobabaina."

*Iesu Eao Maretia Mai Maria  
Herekia.*

<sup>38</sup> Iesu i'abana haukia kipokia taearai teao aiara haeai tekara'au, weia babi'e ha atana Maretia ehore ea'i taeana ena ituai. <sup>39</sup> Ia hatina atana Maria hanona eao Obiapaka aena pokinai emiati

ena ba'iobi 'abikia aiakia nio'o.  
<sup>40</sup> A Maretia baki ia'i taeakia a'i a'i haraina ebaibaina hanona aona earo'ari, ba emikiri eao Iesu ehina bena etibaha, "Obiapaka e, oi a'i nuraonana hati'u naiana ehabona'u kipo'u aka ikojinai nababai. Mohina bena mebaraina'u." <sup>41</sup> Obiapaka ia ena 'abi ebamuena etibaha, "Maretia e, Maretia e, oi hanona aomu niaro'ari taba bo'okia paukiae nuatetua, <sup>42</sup> ia taba hamona mo nahauataeai hauna Maria aba enuatae aina, ia herenai a'i katea'i pare 'apuana."

## 11

*Iesu Bahuba'ari Eba'ibinakia.*  
*(Mt 6.9-13; 7.7-11)*

<sup>1</sup> Rani ha Iesu 'eka ha ai ebaibuba'ari, ena bahuba'ari epua murinai i'abana haukia ha ehore ehina bena etibaha, "Obiapaka e, bahuba'ari moba'iobinamai Ioane i'abana haukia eba'ibinakia 'abana." <sup>2</sup> Ba Iesu ia ehina benakia etibaha, "Katobahuba'ari raninai na kato'abi aiho.

'Hamamai e.

Oi atamu hanona katabarobena. Emu obia aiarana kemai.

<sup>3</sup> Rani ikojinai tanuatae aina anianina kabenamai.

<sup>4</sup> Emai ki'a kohina haonakia, pokina ai tibaki'anamai haukia ekia ki'a tahina haonakia.

Abomo baihobo aonai a'i kobakatotonamai."

<sup>5</sup> Ia haemona ehina benakia etibaha, "Wai haumi ha wapuka'a ibuanai peao ena hau ena ituai penoina petibaha, 'E'u hau e, parawa aihau mo pobena'u.

<sup>6</sup> Pokina e'u hau ha ena kaoao aonai emai here'u, karo'ona ia aniani mo here'u aha'i." <sup>7</sup> Aonai ua'a ke'abi ketibaha, 'A'i kobar'oarina'u, pa'abi hanona aba ikaibau abomo au naha'u kipokia hanona taparuua. A'i kamikiri taba ha a'i kabeni'o.' <sup>8</sup> Au wai nahina benimi, ena hau paunai ia a'i kemikiri taba ha a'i kebenia, 'a ia ena noi 'ariai 'ariai paunai

kemikiri, ia nenuataeai tabakia ikoikiai kebenia. <sup>9</sup> Haeamona au wai nahina benimi, katonoai hanona katoa'ina, katotabuna hanona katotabu ahina, kato'hara hara hanona pa'abi ikaikau 'eumi. <sup>10</sup> Weiakia tinoiai haukia hanona tia'i, weiakia titabu haukia hanona titabu ahi, nihara hara hauna 'eunai pa'abi hanona ikaikau.

<sup>11</sup> Wai hama haumi ha nahumu maia penoi raninai 'erau pobena, u? <sup>12</sup> 'Ao ahoi penoi raninai hara pobena, u? <sup>13</sup> Wai ki'a haumi re'a, taba namokia nahumi ibenikia fo'iobi. Namo babita Hamami kupa'i nemiaho hauna Auba Robe tinoi noi aina haukia kebenakia."

*Baika Te'abi Iesu Belesebulo Hibunai Niaka.*

*(Mt 12.22-30; Mk 3.20-27)*

<sup>14</sup> Iesu ehore 'aiaunu paipaina hau ha aonai eu'u ahina, paipai weiana ekarahi ba e'aiaunu hauna e'abi'abi, teihana haukia tetau ta'u huri. <sup>15</sup> Ia maearima baika te'abi tetibaha, "Belesebulo paipai ekia obia arana ena hiabuai ia paipai neiakia eu'u ahinakia."

<sup>16</sup> Baika Iesu tehobona ekia nuatae kupa ena hoa ha pebabaina pateihana. <sup>17</sup> Ia Iesu hanona ekia raona e'ioquina, ba ehina benakia etibaha, "Hanopaka kipona niwatena ba nibai'oata hanona keki'a, abomo itubu kipona niwatena ba nibai'oata hanona ke'eho. <sup>18</sup> Satani kipona kewatena ba kipona ke'oatana raninai, ena hanopaka aea kekorini aiho? Neiana nahinana pokina wai tu'abi 'Belesebulo ena hiabuai paipai au'u ahinakia." <sup>19</sup> Au Belesebulo ena hiabuai paipai nau'u ahinakia raninai, tai ena hiabuai wai i'abami haukia tihere paipai teu'u ahinakia? Ua buonai ia katehore wai kateba beronimi.

<sup>20</sup> Ia au Tirama ena hiabuai paipai au'u ahinakia raninai, Tirama ena obia aiarana aba ekara'au heremi. <sup>21</sup> Tabura hauna mai ena pura'a ena itu ke'imana hanona ena kohu

ikoikiai katemiaho harai.<sup>22</sup> 'A etabura ki'a hauna ha ia pehuari bena ba peahuna raninai, ena pura'a imanai kea'i obonakia ena kohu ikoikiai kewate otaraina.

<sup>23</sup> Tai'u a'i nitai hauna hanona au ni'oatana'u, au kipokia a'i tabararo bararo hauna hanona nikapo kapo otarinakia.

*Auba Ki'a Obona Emue Ena 'Eka Ai'aina.*

(Mt 12.43-45)

<sup>24</sup> "Auba ki'a obona ha hau ha aonai nikarahi raninai, 'eka 'oro-rokia 'ekakiai nikaoao, ena nuatae kearai ia 'eka mo ha aha'i. Kipona ni'abi netibaha, 'Kamue kaeao amiaho 'uai ituna.'<sup>25</sup> Ba emue eao itu hanona aba itaro abomo aba e'oru harai etabu ahina.<sup>26</sup> Weiana ia eao auba ki'a obokia 'akikia 'abaihau hamomo ebaka'anakia, ba teo tetoto weia temiaho, hau weiana ena mauri 'uainai papana enamo, 'a bariu ena mauri aba eki'a ki'a baha."

<sup>27</sup> Iesu 'abi neiakia nehinanakia aonai babi'e ha mako baiatakiai Iesu eiona etibaha, "Oi ebaraman'i o mai oi eba'aen'i o babi'ena hanona enamo."<sup>28</sup> 'A Iesu ena 'abi ebamuena etibaha, "Ua a'i kehoma, ia Tirama ena 'abi tiona abomo te'ini bena haukia tenamo ki'a baha."

*Parisea Haukia Tenuatae Hoa Ha Kateihana.*

(Mt 12.38-42)

<sup>29</sup> Maearima Iesu teto'u aina aonai, ena 'abi ea'i ramana etibaha, "Uru neiana hanona uru ki'a obona, bata'u ta'u huri hoakia nitabu, ia ha a'i kerama herekiai, Iona ikupaiana mo bata'u ta'u huri hoanai keao.<sup>30</sup> Iona hanona bata'u ta'u huri hoanai eao Nineba haukia herekiai ihobona mo Maearima Nahuna hanona uru neiana herenai.<sup>31</sup> Bakai ranina aonai obia babi'ena Seba kemikiri uru neiana haukia behoai kehorotinakia, pokina ia hanona hanopaka puanai emai Solomona ena aotipa 'abikia keo'o, ia bariu ha neia hanona Solomona etara haona.<sup>32</sup> Bakai ranina

aonai Nineba haukia hanona katemikiri uru neiana haukia behoai katehorotinakia pokina Iona ena iroroai teraona kabe, ia bariu ha neia hanona Iona etara haona.

*Ramepa Ihao'auna 'Ekana Tohanai Kohao'auna.*

(Mt 5.15; 6.22, 23)

<sup>33</sup> "Hau ha ramepa keba'arana raninai itu bunianai 'ao uro aonai a'i kekai tina, ia ramepa ihao 'auna 'ekana tohanai kehao 'auna ba weia titoto haukia hanona ea weiana kateihana.<sup>34</sup> Oi mahamu hanona hauanimu ena ramepa, ba oi mahamu enamo raninai hauanimu maikoina abomo ea aonai, ia mahamu keki'a raninai hauanimu maikoina hanona wapura aonai.<sup>35</sup> Ua buonai ko'ima 'ima haraini'o ea aomuai hauna a'i mewapura abuna ta'una.<sup>36</sup> Oi hauanimu maikoinai niea obo papana ha wapura aonai aha'i raninai, maikoina hanona kea obo harai matoha ramepa eana maikoina nibeni'o nibaeani'o 'abana."

*Iesu Rauhubu Poki Haukia Erikenakia.*

(Mt 23.1-36; Mk 12.38-40)

<sup>37</sup> Iesu e'abi nonoa raninai, Parisea hauna ha ia enoina terarua kateaniani haeamo buonai ia etoto eao emiati keaniani.<sup>38</sup> Parisea hauna Iesu eihana hanona eta'u ta'u huri, pokina aniani raninai imana a'i eutu.<sup>39</sup> Weiana Obiapaka ia ehina bena etibaha, "Bariu wai Parisea haumi hanona 'ere mai uro kapekia mo toutu harainakia, 'a ia aomi hanona bainao mai ki'a ebonu 'au.<sup>40</sup> Po'o po'o haumi, ia kapena ebabaina hauna, aona abomo a'i ebabaina, u?<sup>41</sup> Ia aonai temiaho tabakia uraru haukia katobenakia. Ba taba ikoikiai aba terau'a wai 'eumiai.

<sup>42</sup> "Parisea haumi e, heremiai hanona keki'a wairai! Pokina emi aniani iba'orimokia mai ibahiabu hiabukia papakia tubahunakia harauhaea aonai hamomona tubaiben'i Tirama herenai, 'a

Tirama herenai bero mai raona'au pato babaina hauna tohabona. 'A neiana abomo katobabaina, ia weiana abomo a'i katohabona.

<sup>43</sup> "Parisea haumi e, heremai hanona keki'a wairai! Pokina emi nuatae hanona marea aonai miati 'ekakia namokiae katomati, abomo kawakawa 'ekakiae katemariki ainimi katebanamoni.

<sup>44</sup> 'Heremai keki'a ki'a baha! Pokina wai hanona ihibona 'ariyahakia 'a'i aikia 'akikia, maearima a'i te'ioibina ahakiae tiaoaina timaiaina Tirama wairanai aba te'opu.'

<sup>45</sup> Rauhubu pokи hauna ha ia ehina bena etibaha, "Ba'iobi haumue, oi na nu'abi aiho hanona ai abomo nubahaumaenamai." <sup>46</sup> 'A ia etibaha, "Rauhubu pokи haumi e, heremai hanona keki'a ki'a baha! Wai maearima iebebe pumakia tubabuanakia, 'a wai kipomi ha iebebe weiana ena puma aea homana imami kiri'u kiri'una hamona a'i ni'ata 'apuana.

<sup>47</sup> "Heremai keki'a wairai! Wai hamami mahabanai haukia teahu 'arinakia, ba wai tuhore ekia 'ariahakia tubabainakia. <sup>48</sup> Ua buonai wai hamami ekia babai tubatoha akakia tubaihanakia, pokina ia teahu 'arinakia, wai hanona ekia 'ariahakia tubabainakia.

<sup>49</sup> "Ua paunai Tirama ena 'iobi 'abina etibaha, 'Au mahabanai haukia mai iuhubeau haukia kauhungakia kateao, baika hanona kateahu 'arinakia, baika katebaki'anakia. <sup>50</sup> Weiana paunai hanopaka erama emai mo bariu mahabanai haukia ikoikiae aruarukia tekiki oioi, pumana hanona uru neiana haukia katehoaina. <sup>51</sup> Abela aruarunai ea'i ramana emai mo Sakaria aruarunai, ia hanona banamo itarana mai marea robena baiatakiae teahu 'arina. 'E, au wai nahina benimi, pumana hanona uru neiana haukia katehoaina.

<sup>52</sup> "Rauhubu pokи haumi e, heremai hanona keki'a wairai!

Pokina aotipa taearana aba tokaiabuna, wai kipomi a'i katototo, katetoto haukia ekia taeara abomo toehe abuna."

<sup>53</sup> Iesu 'eka weiana nihabona raninai, rauhubu pokи haukia mai Parisea haukia te'oatana, ekia bakaibakai haeai haeai tehina herenai. <sup>54</sup> Ena 'abi te'itimana, ha kehina ki'ana raninai katebato'ona.

## 12

*Bai'oi Haukia Ekia Hoaho  
Taikia A'i Katotai.  
(Mt 10.26, 27)*

<sup>1</sup> Rani weianai maearima bo'ona 'akina tebaehe aina, 'a Iesu i'abana haukia eba'iobi 'uainakia etibaha, "Parisea haukia ekia bai'oi akana herenai Kato'ima 'ima harainimi weiana hanona bakupu muramura 'abana. <sup>2</sup> 'A tebahu abunakia tabakia ikoikiae katekarahi abomo tehore buninakia tabakia ikoikiae kate'iobi. <sup>3</sup> Wapura aonai taba ohinana hauna beraura eanai kateona abomo ikaihuri aonai hananai obatete aina hauna itu kape-nai kateiroro aina.

*Tirama Ikupaiana Mo Kahata'u aina.*

*(Mt 10.28-31)*

<sup>4</sup> "E'u hau e, au wai nahina benimi. Hauani iahu'arina mo te'ioibina ia murinai taba ha ahanai a'i katebabai muena haukia a'i katota'u ainakia. <sup>5</sup> Ia katota'u aina hauna au kahore kaba'iobinimi. Ia hanona hau-nimi keahu 'arina murinai mai ena hiabu ni'ara banai banai irubana aonai kekapo 'aunimi hauna Tiramana katota'u aina.

<sup>6</sup> Komure ima pahakawanakia 'arakia toea rua mo. 'A Tirama hanona weiakia ha a'i ereana. <sup>7</sup> 'Abi tohana, bui bita aramiae haukia aba etuabi orenakia. A'i katota'u, wai hanona komure bo'okia aba totara haonakia.

*Iesu Poune Kahahinana, Ia A'i Kahahaumaea.*

*(Mt 10.32, 33; 12.32; 10.19, 20)*

<sup>8</sup> "Au wai nahina benimi. Hau ha au pou'u kehinana

maearima wairakiai, Maearima Nahuna abomo Tirama ena aneru wairakiai ia pouna kehinana.<sup>9</sup> A maearima wairakiai au kebunaina'u hauna abomo Tirama ena aneru wairakiai au ia kabuniaina.

<sup>10</sup> Hau ha Maearima Nahuna herenai ke'abi ki'a hanona aba kehina haona ia hau ha Auba Robe herenai ke'abi ki'a hanona a'i kehina haona.

<sup>11</sup> "Kateaoainimi marea obiakia rauhubu mai hiabu haukia wairakiai raninai, aomu a'i kearo 'ari ekia 'abi aea kobamue aihona 'ao oi aea ko'abi aiho.<sup>12</sup> Pokina rani weianai Auba Robe kehore oi taba ko'uahina hauna aba keba'ibini'o."

### *'Abi Ibabataina Kepu Hauna Ao'abaeana.*

<sup>13</sup> To'u aonai hau ha Iesu ehina bema etibaha, "Ba'obi haumu e. A'a'u mohina bema emai kohu hamamai e'ari boinakia haukia tararua baiatamai ai mewatenakia."<sup>14</sup> Iesu ia ena 'abi ebamuena etibaha, "Hau e, tai au ea'i taeana'u emi bakai kababaina abomo emi kohu kawatenakia?"<sup>15</sup> Ba maearima ehina benakia etibaha, "Kato'iben'i harainimi kohu a'i katouhoreai ki'a baha, pokina maearima ena mauri tohana hanona ena kohu bo'onai a'i nimai."

<sup>16</sup> Iesu 'abi ibabatai ha ehina benakia. "Herenai kepu ebo'o hauna ha ena hanoai uma anikia bo'ona etabu ahinakia.<sup>17</sup> Ba kipona aonai eraona raona etibaha, Taba kababaina? 'Eka aha'i, 'eka tabanai e'u ube kahorotinakia.<sup>18</sup> Haeamona etibaha, 'Na kababai aiho, paraboa 'ai'aina karubuna apa'uana ha mahamahana kababaina, ba e'u biraura aniani ubekia mai e'u kohu ikoikiae weia kahorotinakia.<sup>19</sup> Au kipo'u ka'abi katibaha, "Au hanona taba namokia here'u aba ebo'o harai aro'anakia ihau bo'okia 'eukia. Bariu karai kaniani kainuinu kaonamo harai."<sup>20</sup> 'A Tirama ehore ehina bema etibaha, 'Po'o haumu e! Bariu rabi neianai au oi emu mauri ka'i obona raninai naiakia oro'anakia haukia hanona

tai kea'inakia?"<sup>21</sup> Ba Iesu ena 'abi orenai etibaha, "Neiana hanona maearima ha kipona ena taba nibararonakia ia kipona 'euna, ia Tirama wairai hanona ena ibararo a'i ebo'o."

*Aomi A'i Kearo'ari.  
(Mt 6.25-34)*

<sup>22</sup> Ba Iesu i'abana haukia ehina benakia etibaha, "Weiāna buonai au wai nahina benimi. Emi mauri paunai taba patobatotona hauna aomi a'i kebaro 'arina.<sup>23</sup> Pokina mauri hanona eapa'ua ba aniani hauani abomo eapa'ua ba habuni.<sup>24</sup> Aokakara katoraonanakia. Aniani a'i tibato 'ao eueu berauranai aniani a'i tibararo abomo ekia rerea 'ekana aha'i ia Tirama akia nibenakia. Ia wai hanona roborobo totara haonakia.<sup>25</sup> Oi tai ha emu ao aro'ariai haumu papana pebahoma'ana hanona petaina, 'ao?<sup>26</sup> Weiāna taba papakia neiakia ibabaikia a'i to'obi raninai aehoma buonai taba haeai haeai aomi tibaro 'arinakia.

<sup>27</sup> "Bebetu ti'omu hanona katoihanakia. Kipokia habuni akana a'i tibabaina. Ia au wai nahina benimi. Solomona obia arana ena habuni tenuabi ki'a, iamo bebetu neiana hanona enamo ki'a baha ba Solomona ena habuni.<sup>28</sup> Tirama kipona hano tubukia nibataitainakia bariu timauri mara kate'ororo irubai kahakapo 'aunakia kate'ara. Tirama ehore ua nibataitai aihonakia, ia wai habuni a'i nibabatotonimi, u?<sup>29</sup> A'ikakauma papana haumi. Aomi taba patoana mai patoinu hauna a'i katotabuna, weiakia aomi a'i katebaro 'arina.<sup>30</sup> Hanopaka neiana aonai Tirama a'i tia'ikakaumana haukia ikoikiae taba neiakia titabunakia, ia Hamami kupai hauna taba neiakia tonuatae ainakia ikoikiae aba e'ibinakia.<sup>31</sup> Tirama ena obia aiarana katotabu 'uaina hanona neiakia ikoikiae wai kebenimi."<sup>32</sup> "To'u papana haumi e. A'i katota'u, pokina Hamami mai

aonamona ena aiara kebenimi.  
<sup>33</sup> Emi kohu katokawa kawainakia monikia uraru haukia katobenakia, a'i neki'a 'apua mahoia ihiua ihiuana katoba'oruna 'eumi, kupa kepuna a'i niore 'apua hauna katoa'ina. Bainao ha weia a'i niao abomo muhi taba weia ha a'i tia'i ki'ana. <sup>34</sup> Pokina emi kepu nemiaho 'ekana hanona wai aomi abomo weia."

*Ta'ara'i Hauna Namona Ni-bai'ima.*

(Mt 24.45-51)

<sup>35</sup> "Emi habuni katohai 'ininakia abomo emi ramepa hanona katoba'aranakia katobai'ima.  
<sup>36</sup> Wai hanona ihobona bai'ima haukia 'abakia, ekia poki hauna hawainibe mahamaha 'ekanai kemue kemai te'imana. Ba kemai pa'abi kehara harana raninai pa'abi beronai mo katekaikauna.  
<sup>37</sup> Ta'ara a'i haukia tibai'ima oho aonai ekia poki hauna kemai ketabu ahinakia hanona enamo. 'Abi tohana au wai nahina benimi. Poki hauna kipona ena habuni kehai 'inina ekia aniani 'ekanai kebamiatinakia, kero'onakia ekia aka kebabaina. <sup>38</sup> Rabi wapuka'a 'ao kokoro'u ti'arara aonai ta'ara a'i haukia tibai'ima oho aonai ekia poki hauna ketabu ahinakia hanona tenamo.

<sup>39</sup> Neiana kato'obi haraina. Itu poki hauna bainao hauna ena mai ranina ke'obi 'uaina raninai ena itu ke'imana a'i kepa'a. <sup>40</sup> Wai abomo katoba'oru, pokina a'i to'ioquina rani tabanai Maearima Nahuna kemai."

*Abi Ibabataina, Aka Hauna Namona Mai Aka Hauna Ki'a Obona.*

<sup>41</sup> Petero Iesu ebakaina etibaha, "Obiapaka e, 'abi ibabatai neiana ai ikupaiamai heremai ai nohinana 'ao maearima ikoikiai abomo?" <sup>42</sup> Obiapaka e'abi etibaha, "Tai aia iona mai ao bero hauna, ia ena poki hauna hiabu ebena ena itu kohukia keiha 'ini, weia ta'ara a'i haukia ekia aniani beraurakia tohakiai kebenakia? <sup>43</sup> 'Ima'ima hauna

weiana ena poki hauna ena mueai ua niaka harai aiho ketabu ahina hanona enamo. <sup>44</sup> 'Abi tohana au wai nahina benimi. Poki hauna kehore 'ima hauna kebapokina ena kohu ikoikiai ke'imana. <sup>45</sup> Ia 'ima'ima hauna kipona ke'abi ketibaha, "E'u poki hauna a'i kemai baha," ba ia kehore ta'ara a'i haukia mai babi'ekia ke'atinakia keani ani keinu inu keinu 'ari. <sup>46</sup> Rani ha 'ima'ima hauna a'i eraonana a'i eba'oru aonai ena poki hauna kekara'au hanona ia kekabe kabe hurina, puma kebena matoha aia a'i tiona haukia 'abana.

<sup>47</sup> "Ima'ima hauna ena poki hauna ena nuatae akana e'io bina kebabaina ia a'i eba'oru mai a'i ebabainakia, hau weiana hanona i'ati bo'ona katebena. <sup>48</sup> 'A iobi aha'i hauna ena aka ki'a 'arana hanona kate'atina ia i'ati 'ama'amana katebena. Taba bo'ona tebena hauna herenai taba bo'ona katenuataeai, taba bo'ona ke'imanakia hauna herenai taba bo'ona katenoiiai."

*Iesu Emai Hanona Baiata Kehorena.*

(Mt 10.34-36)

<sup>49</sup> "Au hanona iruba amaiaina hanopaka ahnai, e'u nuatae pe'ara biai. <sup>50</sup> Au hanona u'ererobe ha ka'ina weiana kaopuma aina keaomo kabaore haraina. <sup>51</sup> Wai turaonana Au amai hanona baibua amaiaina hanopaka, 'u? Au wai nahina benimi, aha'i. Baibua aha'i ia hoa hore. <sup>52</sup> Bariu wairaka kahaeaoaina, rama ha aonai haukia ima baiatakiai katehoa hore, aihau katehore rua kate'oatanakia abomo rua katehore aihau kate'oatanakia. <sup>53</sup> Ia baiatakiai katehoa hore, hama kehore nahu hauna ke'oatana, nahuna kehore hamana ke'oatana, hina kehore nahuna babi'ena ke'oatana, nahu babi'ena kehore hinana ke'oatana, hinana kehore rawana babi'ena ke'oatana, rawa babi'ena kehore hinana ke'oatana."

*Maearima Rani Tabana Obo A'i Teobo.*  
(Mt 16.2, 3)

<sup>54</sup> Iesu haeamona to'u haukia ehina benakia etibaha, "Tibotaina tainai 'auhao ha kemikiri katoihana raninai beronai kato'abi katotibaha, 'Abara ketibo,' hanona nirama. <sup>55</sup> Ahitai tibo baurana niabu raninai wai tu'abi totibaha, 'Beraura kehiabu,' hanona nirama. <sup>56</sup> Bahaoresa haumi e. Wai hanopakai mai kupai taba Tirama hanona 'abikia to'obi, ia aehoma buonai bariu rani neianai nirama hauna 'abina a'i to'obia?

*Bakaiai Ehorotini'o Hauna Ohi Emi Atetua Kobaberona.*

(Mt 5.25, 26)

<sup>57</sup> "Aehoma buonai wai kipomi ibaberomi raonana a'i tubabaina? <sup>58</sup> Oi behoai ehorotini'o hauna keaoaini'o bakai 'ekana, a'i niaoai bahani'o bakai 'ekana raninai taeara namona kotabuna torarua emi atetua kobaberona, keaha'i raninai keaoaini'o kebabakaini'o hauna herenai, ba ia kehore keaoaini'o habuni hauna herena, ba habuni hauna wapura 'ekanai kehorotini'o. <sup>59</sup> Au wai nahina benimi, weia a'i katokarahi 'apua keaomo 'ara maikoinai katohole orena."

## 13

*Iesu Maearima Ehina benakia Kateraona Kabe.*

<sup>1</sup> Rani weianai baika Iesu hanai Galilea haukia poukia tehnana, ekia ibeni tibabaina Tirama herenai raninai Pilato ena huar haukia euhunakia teahu 'arinakia aruarukia mahi aruarukia kipokia teutena. <sup>2</sup> Iesu ekia 'abi ebamuena etibaha, "Pokina Galilea haukia weiakia ua teahu aihonakia, wai turaoana Galilea haukia weiakia te'ari haukia ekia ki'a teapa'ua ki'a baha ba Galilea temiaho haukia ekia ki'a? <sup>3</sup> Au wai nahina benimi. Aha'i. Wai a'i katoraona kabe raninai, ikoimiai hanona ua kato'ari aiho. <sup>4</sup> Wai turaoana weiakia haukia harauhaea 'ababani Siloama ai itu ro'ena

epobu aonai te'ari haukia ekia ki'a teapa'ua ki'a baha ba baika Ierusalemai ai temiaho haukia ekia ki'a? <sup>5</sup> Au wai nahina benimi. Aha'i. Wai a'i katoraona kabe raninai ikoimiai hanona ua kato'ari aiho."

*'Abi Ibabataina, Matiu Ki'a Obona Buana Aha'i.*

<sup>6</sup> Iesu 'abi ibabatai ha ehnana etibaha, "Hau ha suke matiuna ha ebatona ena bine haharuana aonai, muriae eao buana erarainakia ia ha a'i etabu ahina. <sup>7</sup> Weiana ia haharua ne'imana hauna ehina bera etibaha, 'Thau aihau nakai mue matiuna neiana buana ararainakia, ia ha a'i natabu ahina. Mo'ui rabu taina. Taba buonai hano namona kebaore 'abaean?' <sup>8</sup> Haharua ne'imana hauna etibaha, 'E'u poki haumu e. Mohabo 'abaeania ihau neiana hamona memiaho. Au pokina ka'ani kakaiaronia kabahuna. <sup>9</sup> Ihau wairai buana baika katerama hanona enamo, aha'i raninai ia hanona i'ui kea'ina.'

*Beraura Robenai Iesu Kapena Ebarara Bab'i'ena Ebanamona.*

<sup>10</sup> Beraura robenai Iesu Iuda haukia ekia marea ha aonai eba'iohi, <sup>11</sup> babi'e ha weia auba ki'a obona ha ehore ebainawana ihauna harauhaea 'ababani kapena ebarara, kipona kebaberona hanona a'i etaina. <sup>12</sup> Iesu babi'e weiana eihana raninai eaparina etibaha, "Babi'e e! Aba enamo. Emu inawa aba epua." <sup>13</sup> Weiana Iesu imana babi'e ahnai ehao 'au raninai, beronai kapena ebero, ba emikiri Tirama ebanamona. <sup>14</sup> Marea poki hauna eopuere, pokina Iesu beraura robenai ebamauri pauhai. Ia maearima ehina benakia etibaha, "Wapu 'abaihau hanona wai emi aka wapukia. Beraura weiakiai katomai kebamaurini, ia beraura robenai aha'i." <sup>15</sup> Obiapaka ia ena 'abi ebamuena etibaha, "Wai bahaoresa haumi! Wai ha Beraura robenai emi poromakau 'ao emi toniki 'ekakiai

a'i torubunakia bei 'urina a'i tuaoainakia, u? <sup>16</sup> Babi'e neiana hanona Aberahamo ena itubu babi'ena. Satani ia ebainawana ihauna aba harauhaea 'ababani. Ba Beraura robe aonai ia bamauri a'i pea'ina, u?" <sup>17</sup> Iesu ia ena 'abi ua ebamue aihona hanona ti'oatana haukia ikoikiai tehau-maea ki'a, 'a to'u haukia ikoikia teaonamo aka nuabikia weiakia ebabainakia paukiai.

*'Abi Ibabataina Tuaba Uhona.  
(Mt 13.31, 32; Mk 4.30-32)*

<sup>18</sup> Iesu ebakai bakai etibaha, "Tirama ena obia aiaranana ibabataina taba? Tabai kababataina?  
<sup>19</sup> Ia hanona ihobona tuaba uhona papana, weiana hau ha ea'ina ena umai ebatona e'omu matiu rarinai eao renai 'ubi roborobokia ekia ni'i terobenakia."

*'Abi Ibabataina Bakupu Mura-murana.*

*(Mt 13.33)*

<sup>20</sup> Haeamona e'abi etibaha, "Tirama ena obia aiaranana tabai kababataina? <sup>21</sup> Ia hanona ihobona bakupu muramurana, weiana babi'e ha ea'ina parawa bo'ona uro aonai kipokia euta haeamona, euna eaomo maikoinai ekupu."

*Tirama Ena Obia Aiarana  
Taearana E'omo'omo.*

*(Mt 7.13, 14, 21-23)*

<sup>22</sup> Iesu ena kaoao Ierusalema taearanai eao aonai, aiara apa'uakia mai papakia aokiai maearima eba'iobinakia. <sup>23</sup> Hau ha Iesu ebakaina etibaha, "Obiapaka e! Maearima tebabita 'akimo katemauri, 'ao?" Ia ena 'abi ebamuena etibaha, <sup>24</sup> "Katotabura katoao pa'abi 'omo'omonai katooto. Pokina au wai nahina benimi, maearima bo'ona katen-uatae ketetoto ia a'i ketainakia. <sup>25</sup> Itu poki hauna kemikiri pa'abi kekaiabuna murinai, wai atapakai katokoroti ba pa'abi katohara harana katotibaha, 'Obiapaka e, pa'abi mokaikauna tamato.' 'A ia emi 'abi kebamuena ketibaha, 'Wai ae'eai tomai, au

a'i a'iobinimi.' <sup>26</sup> Ba wai kato'abi katotibaha, 'Ai oi kipokia hanona haniani mai hainuinu haeamo, abomo emai aiarai oba'iobi.' <sup>27</sup> 'A ia ketibaha, 'Wai ae'eai tomai, au a'i a'iobinimi, ki'a ibabaina haumi ikoimiai tomokatu'a here'uai.' <sup>28</sup> Weia mahami keao Aberahamo, Isako, Iakobo mai mahabanai haukia ikoikiai Tirama ena obia aiaranai katoianakia, ia wai aba katetori ahinimi atapakai raninai, wai hanona katohai 'aki 'akimi katoarao'i arao'i. <sup>29</sup> Maearima hanona taetanai tibo tainai mai toto tainai ahi tainai katemai tatu 'ekanai katemati Tirama ena obia aiaranana aonai. <sup>30</sup> Ba baika temurihai haukia hanona kate'uai, ia baika te'uai haukia hanona katemurihai."

*Iesu Ierusalem Eaoko'o aina.  
(Mt 23.37-39)*

<sup>31</sup> Rani weianai Parisea haukia baika temai Iesu herena tehina bena tetibaha, "Eka neiana kohabona koao 'eka haeai, pokina Heroda nenuatae keahu 'arini'o." <sup>32</sup> Iesu ekia 'abi ebamuena etibaha, "Tomoao, waeha 'aki weiana katohina bena. Au bariu mara hanona auba ki'a obokia nau'u ahinakia mai inawa haukia nabananmonakia, ba rani ibaihaunai e'u aka maikoinai kabaorena. <sup>33</sup> 'A au bariu mara mai erani hanona kaka'a kaeao, pokina mahabanai hauna hanona 'eka haeai a'i ke'ari, ia Ierusalemai mo."

<sup>34</sup> "Ierusalema e, Ierusalema e, oi ohore mahabanai haukia oahu 'arinakia, abomo Tirama euhunakia haukia piharai oahu 'arinakia. Rani bita au anuatae nahumu ikoinai ka'umu abunakia matoha kokoro'u hina nahuna ne'umu abunakia 'abana, ia wai hanona a'i tonuatae aina'u. <sup>35</sup> Weiana emu itu hanona ke'aburu. Au wai nahina benimi, a'i katoiha muena'u keaomo rani ha kemai ba katotibaha, 'Obiapaka atanai nimai hauna hamabanamona.'"

## 14

### *Iesu Beraura Robeai Hau Ha Ebanamona.*

<sup>1</sup> Beraura robena ha ai Iesu eao Parisea ekia poki hauna ha ena ituai kateanianani haeamo, ba baika hanona ia teiha 'ini haraina. <sup>2</sup> Weia bua haiarana hauna ha Iesu wairanai emiati. <sup>3</sup> Iesu emikiri Parisea haukia mai rauhubu poki haukia ebakainakia etibaha, "Kahabamauri Beraura robenai hanona mai rauhubuna 'ao aha'i?" <sup>4</sup> A ia 'abi ha'i tehihana. Ba Iesu emikiri hau weiana ea'ina ebamaurina euhuna eka'a. <sup>5</sup> Haeamona ehina benakia etibaha, "Wai ha beraura robenai nahumu 'ao emu poromakau 'uriai petoa raninai, a'i ponoanoa ia a'i poberi 'auna, u?" <sup>6</sup> Ena 'abi katebamuena taearana aha'i.

#### *Kipomu A'i Kobapa'uani'o.*

<sup>7</sup> Iesu baki haukia ekia miati 'ekakia namokia tetina'anakia eihanakia raninai, 'abi ibabatai neiana ehinabenakia. <sup>8</sup> "Hau ha ena beaubeau kemai heremu ena hawainibe tatuna koao raninai, miati 'ekana namona 'akinai a'i komiati, pokina a'i o'iobina tatu poki hauna oi aramuai hauna ha aba ehina bena. <sup>9</sup> Tatu poki hauna torarua ebeaunimi hauna kemai heremu kehina beni'o ketibaha, 'Imia'au naiana mohabona, hau neiana naia kemia'au.' Ba oi hanona mai haumaeamu koao muriai temiati haukia herekiae wa'a katomiati. <sup>10</sup> 'A beaubeau kemai heremu raninai koao muriai komiati, ba ebeauni'o hauna kemai heremu ketibaha, 'E'u hau e, oi emu imia'au hanona neiana 'ubiai.' Tatu weiana aonai tetoto haukia ikoikiai oi mo katebanamoni'o. <sup>11</sup> Hau ha kipona kebapa'uana hanona katebaririna, 'a kipona kebaririna hauna hanona katebapa'uana.'

#### *Emu Tatu Aonai Uraru Haukia Kobeauakia.*

<sup>12</sup> Iesu tatu poki hauna ehina bena etibaha, "Atiaha 'ao rabirabi anianina koba'oruna raninai, emu

hau, uaho'abamu, hatia'amu 'ao obia haukia a'i kobeauakia, pokina ia abokiamo oi katebeauni'o 'eumu 'arana katehorena. <sup>13</sup> 'A oi tatu ha kobabaina raninai, uraru, kaiti, 'ome mai 'iau haukia kobeauakia. <sup>14</sup> Weianai oi banamo koa'ina, pokina 'eumu 'arana a'i katehorena, ia aka bero haukia ibamikiri muekiai 'aramu koa'ina."

#### *Ori Ibabataina Tatu Rarina Ha. (Mt 22.1-10)*

<sup>15</sup> Weia kipokia tianiani haeamo hauna ha aia neiana eona, ba ia Iesu ehina bena etibaha, "Tirama ena obia aiaranai kateanianani haukia hanona katenamo." <sup>16</sup> Iesu ena 'abi ebamuena etibaha, "Hau ha tatu rarina 'akina ha ebabaina, ba maearima bo'okia ebeaunakia. <sup>17</sup> Tatu anianikia teba'orunakia aonai, ena ta'ara a'i hauna euhuna enuatae ainqakia haukia kehina benakia etibaha, 'Tomai taba ikoikiai aba te'oru.' <sup>18</sup> A ia ikoikiai teubo. Ba kori'uaina hauna ta'ara a'i hauna ehina bena etibaha, 'Au hanona hano ha akawana, ua buonai kaeao kaihana. Emu poki hauna kohina bena, a'i kawahii.' <sup>19</sup> Ha etibaha, 'Au hanona bariumo e'u poromakau harau haea akawanakia, ba aba naeao kabahobonakia, emu poki hauna kohina bena, a'i kawahii.' <sup>20</sup> Haeamona ha etibaha, 'Au hanona bariu mo ahawainibe, buonai a'i kawahii.'

<sup>21</sup> "Ta'ara a'i hauna emue emai ena poki hauna eba'ioina, ba poki hauna eopuere wairai, ena ta'ara a'i hauna euhuna etibaha, 'Moao biai aiara ibuakiae mai ikariri 'ekakiai, uraru haukia, kaiti haukia, 'iau haukia, 'ome haukia komaiainakia.'

<sup>22</sup> "Ba ta'ara a'i hauna eao aka weiana ebabaina emue emai ia ehina bena etibaha, 'Poki haumu e, ohina bena'u akana aba ababaina, ia miati 'ekana mo a'i ebonu.' <sup>23</sup> Ba poki hauna haeamona ena ta'ara a'i hauna ehina bena etibaha, 'Moao aiara aokiae mai ara pokikiae temiati

haukia komaiainakia, e'u itu katemia bonuna.<sup>24</sup> Au wai nahina benimi. Abeau 'uainakia haukia ha au e'u tatu anianina ha a'i kateani 'apuana.'

*Koraona Harai 'Uaina Ba Iesu Murinai Ko'au.*  
(Mt 10.37, 38)

<sup>25</sup> Mako rarina Iesu kipokia teao, ba ekori kabe ehina benakia etibaha,<sup>26</sup> "Hau ha here'u kemai raninai ia hamana 'ao hinana, atawana 'ao nahuna, uaho'abana 'ao haibuna, abomo ia kipona ena mauri keraona apa'uana hauna au i'aba'u ai a'i keao. <sup>27</sup> Abomo hau ha kipona ena matiu ibiri ropo a'i kebuana muri'u a'i kemai hauna hanona au i'aba'u haunai a'i keao.

<sup>28</sup> "Wai ha nonuatae itu ro'ena ha kobakorina raninai, oi komiati 'arana bita hanona kobahu 'uaina, itu weiana kobaorena monina aba ketaina, 'ao? <sup>29</sup> Itu weiana ebabai ramana, hoborona ebakoroti ia 'ubina a'i kebaorena raninai kateihana haukia ikoikiai kateiririna, <sup>30</sup> kate'abi katetibaha, 'Hau neiana ena itu akana ea'i ramana, ia kebaorena hanona a'i etaina.'

<sup>31</sup> "Ihobona obia 'arana ha pemikiri obia 'arana ha pehuari bena raninai, pemiatu 'uai peraona raona ia ena huari haukia taha harau haea ai kehore huari haukia weiakia taha harau rua timai haukia kehuari benakia hanona aba ketaina 'ao? <sup>32</sup> A'i ketaina raninai, weia atau'a'i temiaho oho aonai, ena iuhubeau hauna ha keuhuna keao, baibua 'abina katerobahu aina. <sup>33</sup> Ihobonaimo wai ha emu taba ikoikiai a'i kohabonakia raninai, oi hanona au i'aba'u haumuai a'i koao.

*Kikimaru Ena 'Aku'aku A'i Me'akauma.*  
(Mt 5.13; Mk 9.50)

<sup>34</sup> "Kikimaru hanona taba namona, ia kikimaru 'aku'akuna ke'akauma raninai aea kahaba'aku mue aihona? <sup>35</sup> Ia hanona hano mai batobato tabakia ibanamokia tabanai aha'i, ia hanona kahane'ena mo. Mai haiana hauna hanona ke'ioquina."

## 15

*Ori Ibabataina Mamoe Eka'a A'kaumana.*  
(Mt 18.12-14)

<sup>1</sup> Moni bararo haukia mai aka ki'a haukia ikoikiai temai Iesu herena aiana kateona. <sup>2</sup> A Parisea haukia mai Rauhubu poki haukia hanona teururu tetibaha, "Hau neiana hanona aka ki'a haukia nia'i taeanakia mai kipokia 'eka hamonai tianiani."

<sup>3</sup> Weianai Iesu ehore 'abi ibabatai neiana ehinana ia herekiai e'abi etibaha, <sup>4</sup> "Hau ha wai baiatamai ena mamoe hinabu hamomona. Ia hamona pe'akauma raninai, imabui baria bui 'ababani hamomo 'eka 'abaeanai pehabonakia, ia weiana e'akauma hauna murinai peao petabuna petabu ahina. <sup>5</sup> Petabu ahina raninai aronai pebuana mai aonamona, <sup>6</sup> peaoaina ena aiara. Ena hau mai herenai temiaho haukia pebeaunakia, patemai herena pehina benakia petibaha, 'Hamaonamo haeamo, pokina e'u mamoe e'akauma hauna aba atabu ahina.' <sup>7</sup> Au wai nahina benimi. Ihobonai mo weia kupai aonamo keapa'ua, pokina neia ki'a hauna hamona eraona kabe paunai, ia bero haukia weiakia imabui bariabui 'ababani hamomo raona kabe a'i tenuatae aina haukia paukiai aha'i."

*Ori Ibabataina Koini E'akauma.*

<sup>8</sup> "Babi'e ha ena Kina harau haea, ba hamona peba'akaumana raninai, ramepa peba'arana, ena itu aona petarona, 'eka maikoina peiha haraina peaomo petabu ahina. <sup>9</sup> Petabu ahina raninai, ena hau mai herenai temiaho haukia pebeaunakia, patemai herena, pe'abi petibaha, 'Hamaonamo, pokina e'u koini hamona e'akauma hauna aba atabu ahina.' <sup>10</sup> Au wai nahina benimi. Ihobonai mo, ki'a hauna hamona keraona kabe raninai, Tirama ena aneru wairakiai aonamo keapa'ua."

*Ori Ibabataina Miori Eka'a A'kaumana.*

<sup>11</sup> Jesu haeamona etibaha, "Hau ha nahuna rua. <sup>12</sup> Miori i'irina hamana ehina bena etibaha, 'Hama'u e, emu kohu powatenakia, au 'eu'u hanona kobena'u.' Weiana hamana ehore ena kohu ewatenakia terarua herekiai. <sup>13</sup> Wapu baika teao murinai, miori i'irina ena taba ea'i a'i harai, emikiri eao hanopaka haeai ha, weia mauri ki'a obonai ena kohu epapurai 'abaeanakia. <sup>14</sup> Ena kohu ikoikiai ebaorenakia murinai, hano weianai arobo rarina ekara'au, ia hanona aba neuraru. <sup>15</sup> Ba emikiri eao hano weiana hauna ha herenai emiaho, hau weiana ehore euhuna eao aiporo 'ima 'ekanai aiporo e'imakia. <sup>16</sup> Mare'a e'ari buonai aiporo ekia aniani harua peani nuana ke'ini hauna eraonana, ia tai ha aniani a'i ebena.

<sup>17</sup> "Weiana ia eraona raona harai aonai etibaha, 'Hama'u hanona mai ena aka haukia tebo'o, mai ekia aniani harikia, 'a au neia mare'a keba'arina'u. <sup>18</sup> Au kamikiri kaeao hama'u herena kahina bena katibaha, Hama'u e, Tirama wairanai mai oi wairamuai aba aka ki'a. <sup>19</sup> Nahumuai kaeao hanona a'i ketaina, ia emu aka hauna ha ai kobaona'u." <sup>20</sup> Weiana emikiri keao hamana herena. Taearai nika'a oho aonai, hamana atau'ai mahana eao nahuna nimai eihana eaoko'o aina ebeau eao nahuna huanai era'una epauna. <sup>21</sup> 'A miori etibaha, 'Hama'u e, Tirama wairanai mai oi wairamuai aba aka ki'a. Nahumuai kobaona'u hanona a'i ketaina.' <sup>22</sup> 'A hamana hanona ena ta'ara a'i haukia ehina benakia etibaha, 'Tomoao, habuni namoabuna ha tomaiai biaina katobabatotona, imana kiri'unai rini ha katohorotina, mai tamaka abomo ha aenai katobaba'auna. <sup>23</sup> Aniani poromakauna nahu namona ha katomaiaina katoahu 'arina, kahatatu kahaonamo. <sup>24</sup> Pokina naha'u neiana hanona e'ari ia emauri mue, e'akauma ia

atabu ahi muena.' Ba aonamo tea'i ramana.

<sup>25</sup> "Beraura weianai hau pakana hanona ua'a umai. Ena mueai, eao itu herenai hanona hui mai ewa 'urukia eo'o. <sup>26</sup> Ba emikiri ta'ara a'i hauna ha eparina ebakaina, 'Weiana taba nirama?' <sup>27</sup> Ta'ara a'i hauna e'abi etibaha, 'Oi hatimu aba emai, hamamu ehore aniani poromakauna nahu namona ha eahu 'arina, pokina ia hanona maurina abomo namona emue etabu ahina.' <sup>28</sup> Hau pakana aona eopuere, ebaki'a a'i ekatoto. Ba hamana ekarahi eao herena eba'amena. <sup>29</sup> 'A ia hamana ehina bena etibaha, 'Moihana! Ihau neiakia ikoikiai au oi ta'aramu a'i emu 'abi ha a'i abaki'ana. Ia oi nani nahu ha a'i obena'u, e'u hau kipokia a'i taonamo. <sup>30</sup> 'A nahumu naiana hanona rea babi'ekia herekiai emu kohu ebaorenakia hauna, emai aiara raninai omikiri aniani poromakauna nahu namona oahu 'arina ia 'euna.'

<sup>31</sup> "Hamana etibaha, 'Naha'u e, oi hanona rani ikoinai au here'uai omiaho, taba neiakia au 'e'u haukia ikoikiai hanona oi 'eumu. <sup>32</sup> Ia aika hanona kahaonamo, kahaonamo ki'a baha, pokina oi hatimu neiana hanona e'ari haeamona emauri, e'akauma haeamona hatabu ahina.'"

## 16

*Ori Ibabataina Kohu 'Ima Hauna Ki'a Obona Ena Aotipa.*

<sup>1</sup> Jesu ehore i'abana haukia ehina benakia etibaha, "Obia hauna ha mai ena kohu i'imana hauna ha, ba maearima baika tehore tehinau aina 'ima hauna hanona ena poki hauna ena kohu nipapura ainakia. <sup>2</sup> Ba obia hauna emikiri eparina emai ehina bena etibaha, 'Emu aka aonai hanona taba ha 'uruna aona, emu bai'ima akakia koba'iolina'u pokina oi e'u kohu i'imakiai hanona a'i ketaina.'

<sup>3</sup> "Kohu 'ima hauna aonai e'abi etibaha, 'Au bariu aea kababai aihio? E'u poki hauna aka neianai

aba keba'okona'u, ka'ani ia a'i mo atabura kanoi ia e'u haumaeamo eabu. <sup>4</sup> Au taeara ha aba naraonana aea kababai aiho. E'u akai kea'i obona'u raninai e'u hau baika, katehore katea'i taeana'u ekia ituai.' <sup>5</sup> Weiana ena poki hauna herenai tea'i 'abaea 'uai haukia ha ha eaparinakia. E'uai hauna ebakaina etibaha, 'Oi e'u poki hauna herenai oa'i 'abaea hanona bita?' <sup>6</sup> Ia etibaha, 'Tehoro puoukia hinabu hamomona.' Ba 'ima hauna ehina bena etibaha, 'Oa'i 'abaea 'uai pepana neiana, momiati, naia pepai imabui korerena.' <sup>7</sup> Haeamona hau ibaruana ebakaina etibaha, 'Oi oa'i 'abaea 'uai hanona bita?' Ia etibaha, 'Witi pute taha hamomona.' Ia ehina bena etibaha, 'Oa'i 'abaea 'uai, pepana neiana, momiati, pepai hinabu 'ababani korerena.'

<sup>8</sup> "Poki hauna ehore 'ima hauna ena bai'oi akana ea'i taeana, pokina aka weiana mai aotipana ebabaina. Bariu hanopaka neiana haukia ekia aotipa tehore ea haukia ekia aotipa tetara haonakia.

<sup>9</sup> Au wai nahina benimi, hanopaka ena obia tabakiai maearima kipokia katobaihau, ba wai heremiasi kekaobo raninai miahō banai banai itunai katea'i taeanimi.

<sup>10</sup> "Aka papana ha ebabai haraina hauna kehore aka apa'uana abomo kebabai haraina, ba aka papana a'i ebabai haraina hauna kehore aka apa'uana abomo a'i kebabai haraina. <sup>11</sup> Hanopaka ena kohu ki'a obokia a'i kato'ima harainakia raninai, tai kehore kupa kohu namokia kebenimi kato'imanakia? <sup>12</sup> Maearima haeai ekia kohu a'i kato'ima harainakia raninai, tai kehore emi kohu tohakia kebenimi?

<sup>13</sup> "Ta'ara'i hauna ha poki rua ta'arakia a'i kea'ina, pokina ha ke'oatana ha keraona'au aina, 'a ha ke'inī bena ha kebaaoaaina.

Tirama mai kepu rani hamonai ta'arakia a'i katoa'ina."

<sup>14</sup> Parisea haukia aia weiana teona raninai Iesu tebatae aina, pokina ia hanona moni 'arikia ti'ari paunai. <sup>15</sup> Iesu ehina benakia etibaha, "Wai hanona maearima wairakiai kipomi tobero na tuho, 'a Tirama hanona wai aomi e'iobinakia, pokina maearima tiaonamo ai tabakia hanona Tirama nibaoao ainakia.

*Rauhubu Mai Tirama Ena Obia Aiarana.*

(Mt 11.12, 13; 5.31, 32; Mk 10.11, 12)

<sup>16</sup> "Rauhubu 'abikia mai mahabanai haukia ekia 'abi hanona teiroro ainakia, emai mo Ioane Ba'uere Robe hauna ena raniai. Weiana murinai hanona Tirama ena obia aiarana pouna namona teiroro aina, maearima ikoikiai taburakiai taeara tetabu katedoto.

<sup>17</sup> Kupa mai hanopaka kate 'akauma hanona e'ama'ama ia rauhubu 'abina puana papana ha a'i ke'akauma 'apua.

<sup>18</sup> "Hau ha atawana kebakarahina haeamona babi'e mahamahana ha eatawana hanona nabau hoana ebabaina. Mai hau ha babi'e ibakarahi eatawana hauna abomo nabau hoana ebabaina.

*Ori Ibabataina Obia Hauna Ha Mai Noi Ba'ame Hauna Lasaro.*

<sup>19</sup> "Kepu hauna ha weia habuni namoabukia ebatotonakia abomo rani ikoikiai aonamo tatkia ebabai. <sup>20</sup> Ena pa'abi 'akonai hanona uraru hauna ha enoti atana Lasaro, ia hauna etua tua obo, <sup>21</sup> ena nuatae hanona kepu hauna ena itara ai aniani puapuakia ti'eho haukia ha peani. Waeha temai hauna tuakia tetemanakia.

<sup>22</sup> "Rani emai aonai uraru hauna e'ari hanona aneru teaoaina Aberahamo herenai. Kepu hauna abomo e'ari tehorena. <sup>23</sup> Kepu hauna 'ari 'ekanai\* weia haiara rarina 'akina aonai emiaho, ea'a

\* 16:23: (23) 'ao Hades.

taea atau'a 'akinai Aberahamo eihana, Lasaro hanona ia herenai.<sup>24</sup> Ia eapari etibaha, 'Hama'u Aberahamo e, moaoko'o aina'u, Lasaro mouhuna imana kiri'una beiai mekaihuna emai maea'u meba'amarina, pokina au hanona nahaiai ki'a baha iruba neiana aonai.'

<sup>25</sup> "Ia Aberahamo e'abi etibaha, 'Naha'u e, koraonana emu mauri beraurakiai oi hanona taba namokia oa'i ia Lasaro hanona taba ki'a obokia ea'i. 'A bariu ia hanona niaonamo ia oi hanona nuhaiara.<sup>26</sup> Abonomo aika baiatakai hanona 'oura rarina 'akina ha nemiaho, neia haukia na'a'i katewahi, naia haukia abomo ha a'i kemai neia.'

<sup>27</sup> "Kepu hauna e'abi etibaha, 'Hama'u Aberahamo e, enamo, nanoini'o Lasaro mouhuna meao hama'u ena itu.<sup>28</sup> Pokina au uaho'aba'u ima weia, keba'ibinakia ia abokiamo ha-iara 'ekana neiana a'i tememai.'<sup>29</sup> Aberahamo e'abi etibaha, 'Mose mai mahabanai haukia hanona weia ia herekiai aiakia temeona.'<sup>30</sup> 'A ia e'abi etibaha, 'Aha'i, hama'u Aberahamo e, ia hau ha 'ariai pemikiri peao herekia raninai aba kateraona kabe.'

<sup>31</sup> "Aberahamo e'abi etibaha, 'Weia Mose mai mahabanai haukia aiakia a'i tiona raninai, neia 'ari hauna ha keao hanona aiana abomo a'i kateona."

## 17

### Kebabehonakia Hauna Keki'a Wairai.

(Mt 18.6, 7, 21, 22; Mk 9.42)

<sup>1</sup> Iesu i'abana haukia ehina benakia etibaha, "Taba maearima kebabehonakia hanona aba timai, 'a hau weiana maearima behoai nihorotinakia hauna ki'ana.<sup>2</sup> Penamo 'akonai iata rarina patetoba 'auna 'akuai patekapo uhuna, pokina papakia neiakia ha a'i mea'i ki'ana.

<sup>3</sup> Kipomi kato'ima 'ima harainimi, uaho'abamu ki'a kebabaina raninai, koao herena korobe haraina. Ia keraona kabe raninai,

ena ki'a kohina hao.<sup>4</sup> Beraura hamonai rani 'abaihau hamomo heremuai ki'a kebabaina, haeamona kemue heremuai rani 'abaihau hamomo ke'abi 'Au naraona kabe.' raninai, ena ki'a kohina haonakia."

### Ta'ara'i Hauna Ena Aka.

<sup>5</sup> Iuhubeau haukia Obiapaka tehina bena tetibaha, "Emai a'ikakauma pobapa'uanakia."

<sup>6</sup> Obiapaka ekia 'abi ebamuena etibaha, "Pe wai emi a'ikakauma matoha sinapi uhona papana 'abana raninai matiu rarina nelana patohina bena, bariu mounu 'auni'o moao 'akuai mo'omu hanona aiami pea'i taeana.

<sup>7</sup> "Turaonana, wai ha emu ta'ara'i hauna 'ani 'ao mamoe 'ima 'ekanai pemai raninai, pohina bena potibaha, 'Omai biai momiati moaniani'? <sup>8</sup> Aha'i, ua a'i po'abi aiho, ia po'abi, 'E'u aniani kokai'auna koba'oruna, koa'ia'i harai ko'imana'u, au kaniani e'u arera kainu kepua murinai, ba oi koaniani emu arera koinu.<sup>9</sup> Ehina bena akakia ebabainakia paunai ena ta'ara'i hauna banamona kebena? Aha'i.<sup>10</sup> Ihobonai wai abomo ehina benimi akakia ikoikia tobaorenakia raninai kato'abi katotibaha, 'Ai hanona ta'ara'i 'abaeamai, emai aka ohina benamai hauna mo tababai.'

### Iesu Morumoru Haukia Harau Haea Ebanamonakia.

<sup>11</sup> Iesu taearai eka'a eao Ierusalem aonai, Samaria mai Galilea baihoakiai ekabanai.

<sup>12</sup> Aiara papana ha ai ekatoto aonai, morumoru haukia harauhaea kipokia tebaitabu ahi. Ia atau'a tainai tekoroti,<sup>13</sup> Iesu teaparina teio aota tetibaha, "Iesu pokи haumu e, moaoko'o ainamai."

<sup>14</sup> Iesu eihanakia raninai ehina benakia etibaha, "Tomoao, robe haukia herekia haumi kato-baihanakia." Ba tiao herekia aonai hanona haukia tenamo.<sup>15</sup> Baiatakiai hau hamona hauna eihana aba enamo hanona emue

emai Tirama ebanamona aiana 'ubi tohanai.<sup>16</sup> Hau weiana Iesu wairanai ekai pehu ebanamona, ia hanona Samaria hauna.<sup>17</sup> A Iesu ebakaina etibaha, "Haumi harauhaea tonamo, u? Ia 'ababani hamomo hanona ae'e?<sup>18</sup> Taba buonai rama haeai hauna neiana mo emue emai Tirama ebanamona?"<sup>19</sup> Iesu Samaria hauna ehina bena etibaha, "Momikiri moao, emu a'ikakauma ehore aba ebamaurini'o."

*Tirama Ena Obia Aiarana Ena Mai Ranina.*  
(Mt 24:23-28, 37-41)

<sup>20</sup> Parisea haukia baika Iesu tebakaina tetibaha, "Tirama ena obia aiarana aita kemai?" Ia ekia 'abi ebamuena etibaha, "Tirama ena obia aiarana hanona matoha taba ha nahaihana hauna 'abanai a'i kemai.<sup>21</sup> Hau ha a'i ketibaha, 'Moihana taba mo neiana' 'ao 'taba mo weiana,' pokina Tirama ena obia aiarana hanona wai aomiai."

<sup>22</sup> Iesu i'abana haukia ehina benakia etibaha, "Rani hanona nimai, emi nuatae Maeearima Nahuna ena beraura ha hamona patoilhana, ia mo a'i katoihana.

<sup>23</sup> Maearima baika katehina benimi katetibaha, 'Tomoihana, hauna neiana.' 'ao 'Tomoihana, hauna weiana.' Ia a'i katoao, murikiai a'i katoka'a.<sup>24</sup> Maearima Nahuna ena mai ranina hanona matoha kupa ne'imare 'abana, bariu mo kupa abiranai ne'imare abamo niao kupa maikoina nibaeana.<sup>25</sup> Ia bariu kori 'uaina hanona katebahaiara ki'a baha, abomo uru neiana haukia katebaki'ana.

<sup>26</sup> "Ihobona Noa ena raniai erama 'abana Maearima Nahuna ena raniai abomo ua kehoma.<sup>27</sup> Maearima hanona teani ani teinu inu hau mai babi'e tehawainibe eao mo Noa aunohi ai etoto, abara etibo tou ekarahi maearima maikoina tetono ore.<sup>28</sup> Lota ena raniai abomo uahomana, maearima hanona teani ani teinu inu tekawa kawa tebato bato mai itu terobe.<sup>29</sup> Rani weianai Lota Sodoma

aiarana ehabona ekarahi murinai iruba mai pihara hiabukia kupa 'ubinai te'eho, maikoikiai teba'ari orenakia.<sup>30</sup> Maeearima Nahuna kewaira tina ranina abomo ua kehoma.

<sup>31</sup> "Rani weianai, hau ha itu kapenai raninai ia a'i keriri itu aonai ena kohu a'i kea'i parenakia, ihobonai mo hau ha umai raninai ia a'i kemue ena aiara.<sup>32</sup> Lota atawana katoraonana!<sup>33</sup> Hau ha nenuatae ena mauri kea'i 'inina hanona ena mauri keba'akaumana, 'a ena mauri kene'ena raninai ena mauri kea'ina.

<sup>34</sup> "Au wai nahina benimi, rabi weianai maearima rua 'ire hamonai kateparua, hamona kea'i taeana 'abana kehabona.<sup>35</sup> Babi'e rua 'eka hamonai witi iba'iti 'itina piharana katebaherena, ha kea'i taeana 'abana kehabona.<sup>36</sup> Hau rua umai kateaka, ha kea'i taeana 'abana kehabona."<sup>37</sup> I'abana haukia tehore tebakaina tetibaha "Obiapaka e, ae'eai?" Obiapaka ekia 'abi ebamuena etibaha, "Ari tabakia ae'eai hanona po'i abomo weia tito'u."

## 18

*'Abi Ibabataina Bakai Hauna Mai Wapu.*

<sup>1</sup> Iesu i'abana haukia 'abi ibabatai ha ehinana kateraonana rani ikoinai kate bahuba'ari ia a'i katehau hororo.<sup>2</sup> Etibaha, "Aiara ha aonai bakai hauna ha emiaho, ia Tirama a'i eta'u aina haeamona maearima a'i eraonanakia.<sup>3</sup> Aiara weiana aonai wapu ha abomo emiaho, rani ikoinai eao bakai hauna herena enoina etibaha, 'Mobaraina'u, e'oatana'u hauna herenai kobaberona.'<sup>4</sup> Rani ehoma'a bakai hauna hanona eubo taba ha a'i ebabaina, muriai hanona kipona e'abi etibaha, 'Au hanona Tirama a'i nata'u aina abomo maearima a'i narao-nanakia.<sup>5</sup> Iamo wapu neiana nibaro 'arina'u paunai ena bakai ibaberona akana mababaina, a'i memue a'i mebaro 'arina'u.'

6 Obiapaka etibaha, “Bakai hauna ki'a obona ena 'abi uruna tomo'ona. <sup>7</sup> Tirama ea'i taeanakia haukia tiapari rabina tiapari ranina haukia ekia nuatae a'i kebaberonakia, u? Turaonana a'i kebarai noanoanakia, u? <sup>8</sup> Au wai nahina benimi, Tirama kehore ekia nuatae kebabero noanoanakia. Ia Maearima Nahuna kemai raninai hanopakai a'ikakauma haukia aba ketabu ahinakia? Aha'i.”

*Parisea Hauna Mai Takiti A'i Hauna Tebahuba'ari.*

<sup>9</sup> Abomo Iesu 'abi ibabatai neiana ehinana maearima weiakia kipokia ekia aka bero Tiapa ainakia haeamona maearima haeai teiha hahanakia haukia herekia. <sup>10</sup> “Hau rua teao Marea Robe aonai katebahuba'ari, ha Parisea hauna ha moni bararo hauna. <sup>11</sup> Parisea hauna hanona ekoroti kipona ahnai ebahuba'ari, ‘Tirama e, au hanona oi nabananom'i, pokina au hanona hau baika 'abakia aha'i, kakikaki haukia, babai ki'a haukia, nabau haukia 'ao moni bararo hauna neiana 'abana aha'i. <sup>12</sup> Au hui hamona aonai wapu rua ɣani robe, abomo e'u tabu ahi ikoikiae harauhaea aonai hamomona nabaiben ioi 'eumu. <sup>13</sup> 'A moni bararo hauna hanona atau'ai ekoroti, a'i ea'a taea kupia era'u ti'ou ekuti etibaha, ‘Tirama e, maoako'o aina'u, au hanona ki'a hau'u.’”

<sup>14</sup> Iesu e'abi etibaha, “Au wai nahina benimi, moni bararo hauna hanona Tirama wairanai ebero ba ena itu eao, 'a Parisea hauna hanona aha'i. Pokina kipona ebapa'uana hauna Tirama kehore kebaririna, 'a kipona ebaririna hauna Tirama kehore kebapa'uana.”

*Iesu Miori Papakia Ebanamonakia.*

(Mt 19.13-15; Mk 10.13-16)

<sup>15</sup> Maearima baika tehore nahukia papakia teaoainakia

Iesu herena ahakiai kehao'au, ia i'abana haukia teihanakia aonai terikenakia. <sup>16</sup> Ia Iesu hanona miori papakia eaparinakia temai herena ba e'abi etibaha, “Miori papakia hanona au here'u temai a'i tomo kaiabunakia, pokina Tirama ena obia aiarana hanona nahomakia haukia 'eukia. <sup>17</sup> 'Abi tohana au wai nahina benimi, hau ha Tirama ena obia aiarana ia'ina miori papana 'abawai a'i keao raninai, ia hanona a'i kekatoto 'apua.”

*Kepu Hauna Iesu Ohi Te'abi'abi.*  
(Mt 19.16-30; Mk 10.17-31)

<sup>18</sup> Iuda haukia ekia poki hauna ha Iesu ebakaina etibaha, “Ba'iohi haumu namomu e, au taba kababaina hanona mauri banai banai ka'ina?” <sup>19</sup> Iesu e'abi etibaha, “Taba buonai au namo'u ohinana, tai ha a'i enamo Tirama mo ikupaiana. <sup>20</sup> Rauhubu aba o'io bina, 'a'i konabau, a'i koahu ahu, a'i kobainao, a'i kohinau bai'oi, hamamu hinamu komariki ainakia.” <sup>21</sup> Ia e'abi etibaha, “Rauhubu naiakia hanona miori'u ai raninai a'ima harainakia emai mo bariu.” <sup>22</sup> Iesu aia weiana eona raninai ehina bena etibaha, “Taba hamona okapu aina hanona neiana. Emu taba ikoikiae kokawa kawa ainakia monikia uraru haukia kabenakia. Weianai kupa kohuna koa'ina, ba komai muri'u ai koka'a.” <sup>23</sup> 'A hau weiana 'abi eona raninai aona earo'ari pokina ia hanona eobia ki'a baha.

<sup>24</sup> Iesu hau weiana ena ao aro'ari eihana ba e'abi etibaha, “Herekiae kepu tebo'o haukia Tirama ena obia aiaranai katekatoto hanona epahihi ki'a baha. <sup>25</sup> Herenai kepu tebo'o hauna Tirama ena obia aiaranai kekatoto hanona epahihi ki'a baha ba kamela kopi\* ererenai kekuri banai.” <sup>26</sup> Aiana teona haukia tebakaina tetibaha, “Ba tai hanona mauri kea'ina?” <sup>27</sup> Iesu ekia 'abi ebamuena etibaha, “Taba katebabaina maearima herekiae

\* 18:25: (25) nira

a'i ketaina hauna Tirama herenai hanona ketaina."

<sup>28</sup> Petero, Iesu ehina bena etibaha, "Ai hanona emai taba ikoikiai tahabonakia, oi murimui taka'a." <sup>29</sup> Iesu ehina benakia etibaha, "Abi tohana mo au wai nahina benimi, hau ha ena itu, atawana, uaho'abana, hamana, hinana 'ao nahuna ehabonakia Tirama ena obia aiarana paunai, <sup>30</sup> ia hanona bariu rani neianai taba bo'okia keal'i abomo wairanai rani kemai aonai hanona mauri banai banai kea'ina."

*Rani Ibaihauna Iesu Ena Ari Pouuna Ehinana.*

(Mt 20.17-19; Mk 10.32-34)

<sup>31</sup> Iesu i'abana haukia harauhaea rua ebakaparenakia haia haiai ehina benakia etibaha, "Aika hanona bariu kahakara'au Ierusalema, mahabanai haukia tererenakia haukia ikoikiai bariu Maearima Nahuna herenai katetoha. <sup>32</sup> Ia hanona rama haeai haukia imakiai kateutana, katebapo'ona, kateba opuerena, kate'atotina, kate'atina, mai kateahu 'arina. <sup>33</sup> 'A wapu ibaihaunai ia hanona kemikiri mue." <sup>34</sup> Ia i'abana haukia taba neiakia obokia a'i teobo 'apua. 'Abi weiana anina ebuni ia herekiai, haeamona a'i te'io bina ia hanona 'abi tabana nehinana.

*Iesu Maha Ki'a Hauna Mahana Ebano'anakia.*

(Mt 20.29-34; Mk 10.46-52)

<sup>35</sup> Iesu Ieriko aiaranai abakekara'au aonai 'iau hauna hataearea haianai emiati ninoi ba'ame, <sup>36</sup> maearima bo'ona teka'a urukia eona, ba ebakai bakai weiana taba nirama. <sup>37</sup> Tehina bena tetibaha, "Iesu Nasareta hauna nikabanai." <sup>38</sup> 'Iau hauna eapari, "Iesu Davida Nahuna e, moaoko'o aina'u!" <sup>39</sup> Maearima wairai teka'a haukia terikena tetibaha, "Oi 'urumu." 'A ia hanona eapari aota, "Davida nahuna e, moaoko'o aina'u!" <sup>40</sup> Iesu ekoroti ehina benakia hau weiana katemaiaina herena. Ia emai herena raninai Iesu ia

ebakaina etibaha, <sup>41</sup> "Taba nonuatae oi heremuai kababaina?" Ia e'abi etibaha, "Obiapaka e, au e'u nuatae kaiha iha." <sup>42</sup> Iesu ia ehina bena etibaha, "Mahamu temeno'a, emu a'ikakauma ehore ebamanion'i'o." <sup>43</sup> Beronai mo mahana teno'a, Tirama ebanamona, Iesu murinai eka'a, maearima ikoinai teihana haukia abomo Tirama tebanamona.

## 19

*Iesu Mai Sakaio.*

<sup>1</sup> Iesu Ieriko ai ekatoto nikabanai aonai, <sup>2</sup> hau ha weia atana hanona Sakaio, takiti a'i haukia ekia poki ha, ia hanona kepu hauna. <sup>3</sup> Ia ena nuatae hanona Iesu keihana, ia a'i etaina pokina maearima ebo'o ia hanona eko'o ko'o. <sup>4</sup> Ua buonai ebeau 'uai eao matiuai etae Iesu taeara weianai kekabanai hanona keihana. <sup>5</sup> Iesu emai 'eka weianai ekarahi raninai ea'a taea eihana ehina bena etibaha, "Sakaio e. Moriri biai. Bariu rani neianai au hanona oi emu ituai kamiaho." <sup>6</sup> Ia beronai eriri biai mai aonamona Iesu eaoaina ena ituai ea'i taeana. <sup>7</sup> Maearima ikoikiai teihana hanona teururu tetibaha, "Ia hanona aba ki'a hauna ena bakiai niao."

<sup>8</sup> 'A Sakaio ekoroti Obiapaka ehina bena etibaha, "Obiapaka e. Bariu e'u kepu abirana maikoinai uraru haukia kabenakia, abomo hau ha ena kepu a'i 'abaeana hanona rani bani ena kepu 'arana kabamuena." <sup>9</sup> Iesu ia ehina bena etibaha, "Bariu rani neianai bamaauri hanona itu neianai aba ekara'au, pokina hau neiana ia abomo Aberahamo nahuna. <sup>10</sup> Maearima Nahuna emai ena poki hanona te'akauma haukia ketabunakia kebamaurinakia."

*'Abi Ibabataina Aka Haukia Gold Monina Tea'ina.*

(Mt 25.14-30)

<sup>11</sup> Maearima aia weiana tiona aonai 'abi ibabatai ha ehina benakia pokina ia aba emai

Ierusalema herenai abomo terao-nana Tirama ena obia aiarana hanona aba kewaira tina.<sup>12</sup> Ba Iesu etibaha, "Obia hauna ha eao hanopaka haeai weia ena obia arana hoana katebena ba kemue.<sup>13</sup> A'i eka'a baha aonai ena ta'ara'i haukia harauhaea eaparinakia, gold monikia atakia mina\* ha ha ebenakia etibaha, 'Moni neiakia hanona katoaka ainakia keaomo au kamue.' Ba eka'a.

<sup>14</sup> A ena aiara haukia a'i tenuatae aina ekia iuhubeau baika teuhunakia murinai teao katetibaha, 'Ai hau naiana a'i tanuatae aina, emai obia 'aranai a'i keao.'<sup>15</sup> Hau weiana obia 'arana hoana aba ea'ina emue emai raninai, ena ta'ara'i haukia moni ebenakia haukia eaparinakia aea teaka aiho hauna ke'iorina.

<sup>16</sup> Hau kori 'uaina emai e'abi etibaha, 'E'u poki haumu e, emu mina hamonai mina harauhaea atabu ahinakia.'<sup>17</sup> Poki hauna ia ena 'abi ebamuena etibaha, 'E'u ta'ara'i haumu namomu e, obabai harai. Taba papana 'akina ia o'ima haraina buonai aiara harauhaea ekia obia haunai koao.'

<sup>18</sup> Hau ibaruanu emai etibaha, 'E'u poki haumu e, emu mina hamonai ahanai mina ima atabu ahinakia.'<sup>19</sup> Poki hauna ehina bena etibaha, 'Oi hanona aiara ima ekia obia haunai koao.'<sup>20</sup> Haeamona ta'ara'i hauna ha emai etibaha, 'E'u poki haumu e, emu mina hamonai neiana, habuniai a'apania ahore buni haraina.<sup>21</sup> Au oi ata'u aini'o, pokina oi hanona hau pahihimu, a'i ohoroti tabana nua'i parena haeamona a'i obato tabana nukabe hurina.'

<sup>22</sup> Poki hauna ia ehina bena etibaha, 'Ta'ara'i haumu ki'a obomu, emu 'abiai kababakaini'o, oi o'ioina au hau pahihi'u, a'i ahorotina tabana na'i parena haeamona a'i abatona tabana nakabe hurina.<sup>23</sup> Ba taba buonai e'u mina moni itunai a'i ohorotina,

ba amue hanona hanai ha patabu ahina.'<sup>24</sup> Herenai tekoroti haukia ehina benakia etibaha, 'Ena mina hamona tomopuhu boina, weiana mina harauhaea ebabaina hauna tomobena.'<sup>25</sup> A ia te'abi tetibaha, 'Poki haumu e, ia mina harauhaea aba imanai.'

<sup>26</sup> Ekia 'abi ebamuena etibaha, 'Au wai nahina benimi, maearima ha mai ena taba hauna bo'ona katebena, ia taba aha'i hauna hanona herenai papana nemiaho hauna abonomo katea'i obona.<sup>27</sup> Abomo au e'u 'ou haukia, a'i tenuatae, au a'i kaobia haukia tomaiainakia neia, au waira'u ai katoahu 'arinakia.'

*Iesu Jerusalemai Ekara'au Obia 'Arana 'Abana.*

*(Mt 21.1-11; Mk 11.1-11; Io 12.12-19)*

<sup>28</sup> Iesu 'abi neiakia ehinanakia murikiaj e'uai ainakia Ierusalema teao.<sup>29</sup> Eka'a eao Betefage mai Betani aiarakia aba herekiae Olibe oeonai, Iesu i'abana haukia rua euhunakia,<sup>30</sup> ehina benakia etibaha, "Katoao aiara wairakai hauna aonai katokatoto, toniki nahuna ha ua'a tetoba 'auna katoihana, ahanai hau ha a'i nemia'u 'apua, katorubuna katomaiaina here'u."<sup>31</sup> Hau ha kebakainimi, "Taba buonai naiana torubuna?" Wai katohina bena, 'Obiapaka nenuatae aina.'<sup>32</sup> Euhunakia teao haukia ehina benakia ihobonai mo tetabu ahina.<sup>33</sup> Toniki nahuna terubuna aonai poki haukia tebakainakia, "Taba buonai doniki nahuna torubuna?"<sup>34</sup> Ia ekia 'abi tebamuena tetibaha, "Obiapaka nenuatae aina."

<sup>35</sup> Teaoaina Iesu herena, ekia habuni toniki nahuna kapenai teabari 'aunakia, ba Iesu emia'u.

<sup>36</sup> Eao aonai maearima ekia habuni taeearai teabarinakia.

<sup>37</sup> Teao aiara aba herekiae, taeara Olibe oeonai eriri 'ekanai ti'abana haukia ikoikiae mai aonamokiae teio Tirama tebanamona hiabu

\* **19:13:** (13) Helene monina, mina hamona hanona aka hauna nawa aihau 'arana 'abana.

akakia ebabai teiha haukia paukiai.<sup>38</sup> Ia tetibaha,  
“Aika eka Obia Arana Obiapaka atanai nimai hauna hamabana-mona.  
Baibua kupai, nuabina hanona 'ubi 'akinai.”

Sal 118.26

<sup>39</sup> Parisea haukia baika mako baiatakiai Iesu tehina bena tetibaha, “Ba'iobi haumu e, i'abamu haukia morikenakia temeunu.” <sup>40</sup> Iesu ekia 'abi eba-muena etibaha, “Au wai nahina benimi, neiakia kateunu raninai pihara kateio.”

#### *Iesu Ierusalem Ehaiaina.*

<sup>41</sup> Iesu eka'a eao Ierusalem herena tainai mahana eao aiara eihana raninai ehai aina. <sup>42</sup> Etibaha, “Ierusalem e, bariu rani neianai emu baibua pokina po'io bina hanona penamo, 'a mahamu ebuni. <sup>43</sup> Beraura weiana ketaina aonai, oi emu 'ou haukia 'anoai kekepirimu katekai kakaiarona, katekori kaiaroni'o, haia haia ikoikiai katekaibunakia. <sup>44</sup> Katekaponi'o koao 'ano tohanai oi mai nahumu emu pihia aonai temiaho haukia maikoinai kate'ari ore, pihara ha a'i katehabona pihara ha ahanai pokina Tirama kemai heremu beraurana a'i o'io bina.”

#### *Iesu Kawakawa Haukia Marea Robe Aona Eu'u Ahinakia.* (Mt 21.12-17; Mk 11.15-19; Io 2.13-22)

<sup>45</sup> Ba Iesu Marea Robe aonai ekatoto, weia tikawakawa haukia eu'u ahi ramanakia, <sup>46</sup> Ehina benakia etibaha, “Aba Puka Robenai ererena, ‘E'u itu hanona bahuba'ari itunai keao’, ia wai hanona kakikaki haukia ekia paparo'ai tubaona.”

<sup>47</sup> Rani ikoinai Iesu Marea Robe aonai eba'iobi, 'a robe haukia apa'uakia rauhubu poki haukia mai aiara obia haukia kipokia taearana tetabuna Iesu kateahu 'arina. <sup>48</sup> Taeara ha a'i tetabu ahina taba katebabaina pokina

maearima hanona ia mo ena 'abi ai tearuru reana.

## 20

#### *Iesu Tebakaina Hiabu Ae'eai Ea'ina.*

(Mt 21.23-27; Mk 11.27-33)

<sup>1</sup> Rani ha Iesu hanona Marea Robe aonai maearima eba'io binakia mai pou namona eiroro aina, robe haukia apa'uakia rauhubu poki haukia mai aiara haukia apa'uakia kipokia teba-hamomo tekara'au teao Iesu herena. <sup>2</sup> Tehina bena tetibaha, “Mohina benamai, bero tabanai aka neiakia nubabainakia, tai bero neiana ebeni'o?” <sup>3</sup> Iesu ekia 'abi ebamuena etibaha, “Au abomo wai kabakainimi, katohina bena'u. <sup>4</sup> Ioane ena ba'uere robe hanona kupai emai 'ao maearima herekiai emai?” <sup>5</sup> Kipokia baiatakiai te'abi'abi aina tetibaha, “Kaha'abi 'upai emai,’ raninai ia ke'abi, ‘Aehoma buonai a'i toa'ikakaumana?’ <sup>6</sup> 'A kahatibaha, ‘Maearima herekiai emai,’ raninai maearima neiakia piharai kateahunaka, pokina ia te'abi, ‘Ioane hanona mahabanai hauna.’” <sup>7</sup> Iesu ena 'abi teba-muena tetibaha, “Ai a'i ta'io bina ae'eai emai.” <sup>8</sup> Iesu ehina benakia etibaha, “Au abomo wai a'i kahina benimi, taba neiakia tai ena beroai nababainakia.”

#### *Abi Ibabataina Bine Haharua I'mana Haukia Ki'a Obokia.* (Mt 21.33-46; Mk 12.1-12)

<sup>9</sup> Ba Iesu 'abi ibabatai neianai maearima ehina benakia etibaha, “Hau ha bine haharuana ebatona, biraura haukia baika ea'inakia kate'imana, 'a ia hanona ekaobo rani homa'ana hanopaka haeai emiaho. <sup>10</sup> Bine buana ibararona ranina etaina, poki hauna ena ta'ara'i hauna ha euhuna eao haharua i'imana haukia herekiai bine buakia baika katebena. 'A bai'ima haukia tehore ta'ara'i hauna teahuna imana 'abaeana teuhuna emue. <sup>11</sup> Haemona ena ta'ara'i hauna haeai ha euhuna, ia bai'ima haukia aka hamomona

mo tebabaina, teahuna teba-haumaeana imana 'abaeaana teuhuna emue.<sup>12</sup> Ibaihauna euhuna, 'a bai'ima haukia tehore tebamani'ana teu'u ahina.<sup>13</sup> Weiana haharua poki hauna etibaha, 'Tabamo kababaina? Au Naha'u tohana, e'u raona au kauhuna keao hanona pa'e ia aba katemariki aina.'<sup>14</sup> 'A haharua i'mana haukia ia teihana raninai te'abi'abi aina tetibaha, 'Neiana hanona haharua poki hauna nahuna, hamahu 'arina, haharua hanona aika 'eukai keao.'<sup>15</sup> Temikiri teberi ahina haharua kapenai teahu 'arina.

Ba haharua poki hauna taba kebabaina haharua i'mana haukia herekiai?<sup>16</sup> Ia hanona kemai haharua i'mana haukia weiaikia keahu 'arinakia haharua hanona maearima haeai kebenakia." Maearima 'abi weiana teona raninai tetibaha, "Neiana ua a'i pehoma."

<sup>17</sup> Iesu eiha 'ini 'ininakia ba ebakainakia etibaha, "Puka Robenai tererena 'abina anina hanona taba?"

'Itu ibakorina haukia  
tebaao aina piharana hanona  
aba itu ibua 'inina piharanai\*  
eo.'

Sal 118.22

<sup>18</sup> Hau ha ke'eho pihara weiana ahanai hanona keahu ahu hurina, 'a pihara weiana ke'eho hau ha ahanai hanona hau weiana ke'iti 'iti obo matoha apuroro 'abana."

<sup>19</sup> Rani weianai rauhubu poki haukia mai robe haukia apa'uakia taeara tetabu Iesu katebirina, pokina 'abi ibabatai hanona ia mo ahakiai ehinana, ia maearima teta'u ainakia buonai a'i etainakia.

*Takiti Baiben'i Bakai bakaina.*  
(Mt 22.15-22; Mk 12.13-17)

<sup>20</sup> Iesu teiha 'inina, 'abi bai'oi haukia baika teuhunakia katebakai bai'oina matoha bero haukia 'abakia. Ena 'abiai hanona katea'ina, rauhubu mai hiabu haukia imakiai kateutana.

<sup>21</sup> Weiana bai'oi haukia tebakaina tetibaha, "Ba'iobi haumu e, ai ta'iorina oi emu ba'iobi mai emu 'abi hanona tebero ki'a baha, maearima ekia hoahoa hanona oi a'i nuraonanakia, 'a Tirama ena 'abi tohana taearanai nuba'iobi harainamai.<sup>22</sup> Ai takiti monina obia arana katabena hanona ebero 'ao aha'i?"<sup>23</sup> 'A Iesu ekia bai'oi weiana hanona aba e'iorina, ba ehina benakia etibaha,<sup>24</sup> "Moni ha tomobaihana'u. Tai aubaubana mai tai atana?" Ia te'abi, "Obia 'arana 'euna."<sup>25</sup> Iesu ehina benakia etibaha, "Obia 'arana 'euna hanona Obia 'arana katobena, 'a Tirama 'euna hanona Tirama katobena."<sup>26</sup> Maearima wairakiai ena 'abiai katebarewana hanona a'i etainakia, ia ena 'abiai mo tetuta'u huri, 'abi ha a'i tehina 'apuana.

*Ariai Mikiri Mue Bakai bakaina.*

(Mt 22.23-33; Mk 12.18-27)

<sup>27</sup> Sadukea haukia baika weiakia 'ariai mikiri mue a'i tibatohana haukia temai Iesu herena tebakaina tetibaha,<sup>28</sup> "Ba'iobi haumu e, Mose eka rauhubu na erere aihona, hau ha ke'ari atawana kemiaho nahuna aha'i raninai ia uaho'abana kehore wapu keatawana, miori katebarama e'ari hauna 'euna.<sup>29</sup> Weiana uaho'aba 'abaihau hamomo temiaho, pakana babi'e ha eatawana nahuna aha'i aonai e'ari.<sup>30</sup> Ibaruana wapu weiana eatawana ba e'ari,<sup>31</sup> ibaihauna abomo wapu weiana eatawana, ba taeara hamonaimo haukia 'abaihau hamomo teatawana nahukia aha'i te'ari.<sup>32</sup> Muri 'akinai babi'e weiana abomo e'ari.<sup>33</sup> Ba mikiri mue raninai babi'e weiana hanona tai atawanai keao, pokina ia haukia 'abaihau hamomo ikoikiai teatawana."

<sup>34</sup> Iesu ia ehina benakia etibaha, "Hanopaka neiana haukia hanona ikoikiai tihawainibe.<sup>35</sup> 'A hanopaka weiana haukia 'ariai katemikiri mue haukia hanona a'i katehawainibe.<sup>36</sup> Ia a'i kate'ari

\* **20:17:** (17) *Itu puapuana piharana.*

mue, pokina ia hanona aneru ihobokia abomo aba 'ariai temikiri mue Tirama nahunai kateao. <sup>37</sup> 'Ariai mikiri mue 'abina hanona Mose abomo ebaihana matiu 'ini'inina arabuna e'ara orina aonai. Ia Obiapaka e'uhina Aberahamo ena Tirama, Isako ena Tirama, Iakobo ena Tirama. <sup>38</sup> Ia hanona 'ari haukia ekia Tiramana aha'i, 'a mauri haukia ekia Tiramana, pokina Ia aonai maearima ikoikai nahamauri."

<sup>39</sup> Iesu ena 'abi teona raninai rauhubu poki haukia baika te'abi tetibaha, "Ba'iobi haumu e, 'abi tohana mo naiana." <sup>40</sup> Weiana murinai ibakaina tebaoao aina.

*Keriso Ebakai bakai ainakia.  
(Mt 22.41-46; Mk 12.35-37)*

<sup>41</sup> Iesu ehore maearima ebakainakia etibaha, "Aeahoma buonai maearima ti'abi Keriso hanona Davida nahuna?" <sup>42</sup> Davida kipona Salamo pukanai e'abi, 'Obiapaka hanona e'u Obia ehina bena etibaha, Itipa'u tainai momiati, <sup>43</sup> keaomo oi emu 'ou haukia ikoikiai oi 'apumu iehe'auna tabanai kabaonakia.'

Sal 110.1

<sup>44</sup> Neiana Davida ehore ia Obiana ehinana ba aea homanai mo Keriso hanona Davida nahuna?"

*Rauhubu Poki Haukia Kate'ima  
'ima Harainakia.*

*(Mt 23.1-36; Mk 12.38-40)*

<sup>45</sup> Maearima ikoinal tibahu aonai, Iesu i'abana haukia ehina benakia etibaha, <sup>46</sup> "Rauhubu poki haukia herekiae kato'ima harainimi, ekia nuatae hanona habuni homa'akia katebatoto katekaoao kaoao, mai kawakawa 'ekakiae maearima ia kateba namonakia, haeamona marea mai tatu 'ekakiae imia'au 'ekakiae namokiae mo katemia'au. <sup>47</sup> Wapu ekia itu tiani 'aunakia, maearima ia kateihanakia paunai ekia bahuba'ari Tibahoma'anakia. Maearima uahomakia haukia puma rarina katea'ina."

## 21

*Wapu Ena Baiben.*  
(Mk 12.41-44)

<sup>1</sup> Iesu mahana eao kepu herekia tebo'o haukia ekia baiben mare a monina iutana mauana aonai teuta eihanakia. <sup>2</sup> Abomo wapu uraruna ha ena toea papakia rua eutanakia eihana. <sup>3</sup> Iesu e'abi etibaha, "Abi tohana au wai nahina benimi, wapu uraruna neiana euta tabana eapa'ua ba ikoikiai. <sup>4</sup> Maearima neiakia ikoikiai ekia obiai baiben tabakia papakia tehoroti, 'a wapu neiana ena uraruai kemiaho aina tabana maikoina ehorotina."

*Iesu Marea Robe Kerabu Taina  
Pouna Ehinana.*

*(Mt 24.1, 2; Mk 13.1, 2)*

<sup>5</sup> I'abana haukia baika marea robe terobahu aina ena nuabi pi-harakia namoabukiae mai baiben Tirama tebena tabakiae tebabaina. 'A Iesu e'abi etibaha, <sup>6</sup> "Bariu toih tabakia neiakia rani kemai aonai pihara ha pihara ha ahana'i a'i kemiaho maikoinai kateruru ore."

*Kato'ima Harainimi, Ia  
Kate'oatanimi.*

*(Mt 24.3-14; Mk 13.3-13)*

<sup>7</sup> Tebakaina tetibaha, "Ba'iobi haumu e, aita raninai taba neiakia katerama? Abomo katerama ranina mai hoana hanona taba?"

<sup>8</sup> Iesu e'abi etibaha, "Kato'ima harainimi, a'i teme'o'inimi, weiana maearima bo'ona au ata'uai katemai kate'abi, 'Hauna neiana Au,' haeamona 'Rani aba herekai,' hanona murikiae a'i kato'au.

<sup>9</sup> Huari mai 'au urukia kato'o hanona a'i katota'u, taba neiakia hanona katerama 'uai, 'a puana hanona wairai."

<sup>10</sup> Haeamona ia ehina benakia etibaha, "Hanopaka ha kemikiri hanopaka ha kehuarina, itubu ha kemikiri itubu ha kehuarina.

<sup>11</sup> 'Eka haeai haeai kanokau apa'uakia, arobo, mai inawa ki'a obokia katerama, abomo ta'u tabakia mai hoa rarikia kupai katerama.

<sup>12</sup> "A taba neiakia ikoikiai a'i katerama baha aonai, au ata'u paunai katea'inimi haeamona katebapo'onimi ba kateaoainimi mareai mai wapura 'ekakiai katehorotinimi, abomo kateberinimi kateaoainimi obia mai kabamanu haukia wairakiai.<sup>13</sup> Ia rani neiana hanona wai Pou Namona kato-hinana herekiai ranina.<sup>14</sup> Aea katobakai aihou paunai, aomi a'i katearo 'ari.<sup>15</sup> Pokina Au kahore aobero 'abikia kabenimi, weiana emi 'ou haukia katebamuenakia 'ao katebuniai ainakia hanona a'i ketaina.

<sup>16</sup> "Hamami, hinami, uaho'abami, hatia'ami, mai emi hau katehore katehina hinainimi, abomo wai baika kateahu 'arinimi.<sup>17</sup> Maearima ikoikiai kate'oatanimi au pau'uai.<sup>18</sup> A aramiai bui ha hamona a'i keki'a.<sup>19</sup> Emi bapahihiai wai emi mauri katoa'inakia.

*Iesu Ierusalem Kateahu Iti'itina Pouna Ehinana.*

(Mt 24.15-21; Mk 13.14-19)

<sup>20</sup> "A huari haukia Ierusalema katekori kaiarona katoihanakia raninai, aba kato'lobina ena pua ranina aba herekai.<sup>21</sup> Ba weiakia Iudea ai temiaho haukia katebeau kobio kateao, weiakia aiara apa'uana aonai haukia katekarahi mahanai, weiakia mahanai haukia aiara apa'uanai a'i katekatoto.<sup>22</sup> Pokina rani neiakia hanona haiara ranikia taba ikoikiai Puka Robenai tererenakia haukia ibatohakia.<sup>23</sup> 'A rani weiakia aokiai babi'e mai nuakia abomo nahukia 'oru'orukia babi'ekia herekia hanona keki'a ki'a baha, haiara rarina 'akina hano ahanai kerama abomo Tirama ena opuere keriri maearima neiakia ahakiai.<sup>24</sup> Ia baika kareba mahanai kate'ari, ba baika katea'i maurinakia kateaoainakia hanopaka haeai haeai aokiai wapura haukiai kateao, rama haea haukia hanona Ierusalema katebaripu ripuna keaomo ekia rani Tirama e'uhina hauna ketaina.

*Maearima Nahuna Kemai Ranina.*

(Mt 24.29-31; Mk 13.24-27)

<sup>25</sup> "Beraura, nawa, mai bihiu aokiai hoa katerama mai 'aku roio mai harapuni urukiai hanopaka haukia ikoikiai aokia kearo 'ari abomo nuakia ketae.<sup>26</sup> Hanopakai taba kerama hauna kate'imana aonai maearima kateta'u aokia katerea, pokina kupai hiabu tabakia kateibiu ibiu.<sup>27</sup> Rani weianai maearima hanona Maearima Nahuna kateihana 'auhao ahanai kemai mai hiabuna mai nuabina.<sup>28</sup> 'A taba neiakia katea'i ramana raninai katokoroti arami katoa'i taeana, pokina ibamaurimi aba niherekai."

*Kuropou Matiunai Tobi Kaha'ina.*

(Mt 24.32-35; Mk 13.28-31)

<sup>29</sup> Ba Iesu 'abi ibabatai neiana ehina benakia etibaha, "Kuropou mai matiu ikoikiai katoihanakia.<sup>30</sup> Raukia hubu hubukia katekarahi katoihanakia raninai kato'lobina hioro aba herekai.<sup>31</sup> Ba ihobonaimo wai abomimo taba neiakia katerama katoihanakia raninai, kato'lobina Tirama ena obia aiarana hanona aba herekai.

<sup>32</sup> "Abi tohana au wai nahina benimi, uru neiana maearimakia a'i kate'ari ore baha aonai taba neiakia ikoikiai katerama.<sup>33</sup> Kupa mai hanopaka kate'akauma, 'a e'u 'abi hanona a'i ke'akauma 'apua.

*Iesu I'abana Haukia Ehina benakia Kate'ima 'ima Harainakia.*

<sup>34</sup> "Kipomi kato'ima 'ima harainimi. Tatuai inuinuai abomo hanopaka ena aoanai aomi a'i mebareana marikina, rani kemai hanona aba herekai matoha rio 'abana, a'i mebata'u ta'u hurinimi.<sup>35</sup> Rani weiana kemai hanona maearima ikoikiai hanopakai temiaho haukia ahakiai.<sup>36</sup> Rani ikoinai katobai'ima abomo kato-bahuba'ari, weianai katotabura taba neiakia ikoikiai katerama haukia herekiai katokapare Maearima Nahuna wairanai katokoroti."

<sup>37</sup> Iesu rani weiakiai mararani hanona marea robe aonai eba'iobi, 'a rabirabi hanona ekarahi eao Olibe oeonai rabi maikoina weia emiaho. <sup>38</sup> Raurani amarikiai maearima ikoikiai teao marea robe aonai aiana kateona.

## 22

*Iesu Ena 'Ari Taearana Tetabuna.*  
(Mt 26.1-5, 14-16; Mk 14.1-2, 10-11; Io 11.45-53)

<sup>1</sup> Parawa ibakupu aha'i tatuna beraurana teaparina Kabanai tatuna hanona aba niherekai. <sup>2</sup> Robe haukia apa'uakia mai rauhubu poki haukia Iesu iahu 'arina taearana tetabu iamo maearima teta'u ainakia.

<sup>3</sup> Satani ehore Iuda Kariote hauna Iesu i'abana haukia harauhaea rua ha aonai etoto.

<sup>4</sup> Iuda eao robe haukia apa'uakia mai marea robe te'imana poki haukia kipokia teroba ahu Iesu aea kehinahinai aihona. <sup>5</sup> Ia aokia enamo, ba te'abi'uai moni katebena. <sup>6</sup> Iuda ekia 'abi ea'i taeana, taeara etabu rani namona tabanai to'u aha'i aonai imakiai keutana.

*I'abana Haukia Rua Kabanai Anianina Teba'oruna.*  
(Mt 26.17-25; Mk 14.12-21; Io 13.21-30)

<sup>7</sup> Parawa ibakupu aha'i tatuna wapuna etaina hanona Kabanai banamo mamoechia kateahu 'arinkakia ranina. <sup>8</sup> Iesu Petero mai Ioane euhunakia 'abi etibaha, "Tomoao eka Kabanai anianina aika kahani hauna katoa'ia'i haraina." <sup>9</sup> Terarua tehina bena tetibaha, "Nonuatae ae'eai kata'ia'i haraina." <sup>10</sup> Ia ehina benakia etibaha, "Aiara apa'uanai katokatoto aonai hau ha puou mai beina aronai kebuana katoihana, murinai katoao ketoto itunai katokatoto. <sup>11</sup> Weiana itu poki hauna katohina bena, 'Ba'iobi hauna ninoini'o, baki ikaihurina hanona ae'e ai. Weia au mai i'aba'u haukia kipokia emai Kabanai tatuna anianina katana." <sup>12</sup> Ia

kehore ikaihuri apa'uana 'ubiai aba iba'oru hauna kebainanimi, weia aniani katoa'ia'i haraina." <sup>13</sup> Terarua tekaobo teao Iesu ehina benakia tabakia ikoinai ihobona tohanai tetabu ahinakia, weia Kabanai tatuna anianina tea'ia'i haraina.

*Obiapaka Ena Anita'u Robe Orena.*

(Mt 26.26-30; Mk 14.22-26; 1Kr 11.23-25)

<sup>14</sup> Beraura hoana etaina Iesu ena iuhubeau haukia kipokia aniani 'ekanai temiati. <sup>15</sup> Ia ehina benakia, etibaha, "Au e'u nuatae tohana hanona Kabanai tatuna anianina neiana kipokia kahaniani ojoi 'uaina ba kateba haiarana'u. <sup>16</sup> Pokina au wai nahina beninimi, Au hanona neiana a'i kani muena keaomo anina tohana Tirama ena obia aiaranai ketohana."

<sup>17</sup> Ba 'ere ha ea'ina ebanamona e'abi etibaha, "Neiana tomoa'ina ikoimiai tomooinu. <sup>18</sup> Pokina au wai nahina benimi, bine buana beina a'i kainu mue bariu keaomo Tirama ena obia aiarana kemai."

<sup>19</sup> Parawa ha ea'ina ebanamona haeamona ehobina ebenakia e'abi etibaha, "Neiana hanona au hau'u, wai paumiai nabaiben. Neiana katobabaina au iraona'u."

<sup>20</sup> Taeara ihobonaimo teaniani murinai ia 'ere ha ea'ina ehina benakia etibaha, "Ere neiana hanona baibua mahamahana ibatohana hoana au aruaru'u ai, wai paumiai kekiki oioi.

<sup>21</sup> Ia au hinahina'u kehinahina hauna imana abomo neia au ima'u kipokia aniani 'ekanai.

<sup>22</sup> 'Abi tohana Maearima Nahuna hanona keao Tirama ena raona ihobona, 'a hau weiana kehinahina hauna ki'ana herenai ki'a rarina kerama." <sup>23</sup> Ia kipokia ha ha tebakai bakai baiatakiai, tai hanona aka weiana kebabaina.

*I'abana Haukia Tebaihara tae Tai Keapa'ua.*

<sup>24</sup> I'abana haukia kipokia baiatakiai tebaihara tae tai hanona keapa'ua. <sup>25</sup> Iesu ehina benakia etibaha, "Rama haeai

obia arana haukia hanona ekia maearima Tiobia ainakia, ekia nuatae weiakia ekia iha 'ini ba'anai temiaho haukia hanona kateaparinakia ia maearima namokia.<sup>26</sup> 'A wai heremiai hanona ua a'i kehoma, keapa'ua baiatamiai hauna hanona aona mebamiorina, ne'uai ainimi hauna hanona matoha barai barai akana nibabaina hauna 'abana.<sup>27</sup> Tai hanona eapa'ua, weiana aniani 'ekanai nemia'au hauna 'ao barai barai akana nibabaina hauna? Weiana aniani 'ekanai nemiasi hauna hanona eapa'ua. Ia au wai baiatamiai hanona barai barai akana nibabaina haunai naeao.

<sup>28</sup> "Wai hanona au kipokia hamiaho haeamo baihobo ikoikiai aokiai.<sup>29</sup> Hama'u hiabu ebena'u ena 'eka ka'imana, ihobonai mo bariu Au hiabu kabenimi e'u 'eka kato'imana.<sup>30</sup> Weiana e'u obia aiaranai wai hanona e'u aniani 'ekanai katoaniani katoiinuu, haeamona obia imia'aunai katomia'au Isaraela itubuna harauhaea rua i'imana haumiai katoao.

*Iesu Petero Ia Kebuniaina Abina Ehina 'Uaina.*

(Mt 26.31-35; Mk 14.27-31; Io 13.36-38)

<sup>31</sup> "Simona e, Simona e, Satani aba enoinoi ikoimiai kebarobonimi kehobonimi ihobona witi 'abana.<sup>32</sup> Iamo Simona au aba ahamuai abahuba'ari emu a'ikakauma a'i me'eho, ba oi koraona kabe raninai uaho 'abamu abokiamo koba taburanakia."

<sup>33</sup> Petero ehore Iesu bena etibaha, "Obiapaka e, au aba aba'oru oi ka'abani'o kahaeao kahawapura 'ao kaha'ari."<sup>34</sup> Iesu ena 'abi ebamuena etibaha, "Petero e, au oi nahina beni'o, bariu rabi neianai kokoro'u a'i ke'arara baha aonai, oi rani aihau au kobuniaina'u, au a'i o'io'bina'u na kohoma."

*Iesu E'abi Imakiai Taba Hauna Katea'ina.*

<sup>35</sup> Iesu ehore i'abana haukia ebakainakia etibaha, "Uainai

ahuu ahinimi, toao mahoa ihiuahiu, mahoa mai tamaka aha'i toka'a raninai taba ha heremiai tokapu, 'ao?"<sup>36</sup> Ia te'abi tetibaha, "Aha'i."<sup>36</sup> Ia ehina benakia etibaha, "A bariu tai mahoa ihiuahiu herenai hanona kea'ina, mahoa abomo kea'ina, mai tai kareba herena aha'i hauna ena habuni kekawa kawa aina moninai kareba ha kekawana."<sup>37</sup> Pokina au wai nahina benimi, tererena 'Kakikaki haunai tebaona,' abina neiana hanona au here'uai ketohana, taba tererena au aha'uai hauna ibatohana ranina aba nimai."<sup>38</sup> I'abana haukia te'abi tetibaha, "Obiapaka e, moihana kareba rua neiakia." Weiana ia ehina benakia, "Abetaina."

*Iesu Getesemanai Ebahuba'ari.*  
(Mt 26.36-46; Mk 14.32-42)

<sup>39</sup> Iesu nibabai babai bena ihobonai ekarahi Olibe oeona eao, i'abana haukia ia murinai teao.<sup>40</sup> Eka weianai tekara'au raninai ia ehina benakia etibaha, "Tomobahuba'ari baihobo aonai a'i tomototo."<sup>41</sup> Herekiai ekaobo baiatakia ena homa'a matoha pihara ha pahakapona peao pe'eho ihobonai weia ekaipehu ebahuba'ari.<sup>42</sup> E'abi etibaha, "Hama'u e, konuatae raninai haiara 'erenai neiana here'uai koa'i obona, iamo au e'u nuataeai aha'i, 'a oi emu nuatae mobabaina."

<sup>43</sup> Ba aneru ha kupai emai ia herenai ewaira tina, ebataburana.

<sup>44</sup> Aona earo'ari, ebahuba'ari haeamona ebahuba'ari tabura tabura, maorona te'eho 'anoai ihobona aruaru kokoma'akia 'abana.<sup>45</sup> Ena bahuba'ari murnai emikiri eao i'abana haukia herekia, aoko'oai aba temahe harai buonai parua reakia etabu ahinakia.<sup>46</sup> Ehina benakia etibaha, "Taba buonai tuparua? Tomono'a, tomobahuba'ari baihobo aonai a'i tomototo marikina."

*Iesu Tea'i 'Inina.*

(Mt 26.47-56; Mk 14.43-50; Io 18.3-11)

<sup>47</sup> Iesu ni'abi oho mo aonai i'abana harauhaea rua haukia 'abakia ha atana Iuda to'u rarina e'uai ainakia temai, ba ekahaha Iesu herena eao kepauna. <sup>48</sup> 'A Iesu ehore Iuda ehina bena etibaha, "Oi hanona baipaauai Maearima Nahuna nohinahaina, u?"

<sup>49</sup> Weiakia herenai tekoroti haukia taba kerama hauna te'iobina aonai te'abi tetibaha, "Obiapaka e, karebai tamaharanakia, u?" <sup>50</sup> Ba 'abakia ha robe haukia 'arakiai hauna ena ta'ara a'i hauna haiana itipana ehara obona. <sup>51</sup> 'A Iesu e'abi etibaha, "Naiana mepua." Ba ia ehore hau weiana haiana ea'i 'apuana ebanamona.

<sup>52</sup> Iesu ehore robe haukia apa'uakia marea robe 'ima haukia mai aiara hau apa'uakia temai ia katea'ina haukia ehina benakia etibaha, "Mai karebami mai pura'ami tomai matoha bainao hauna katoa'ina 'abana, u?" <sup>53</sup> Rani ikoinai au hanona wai kipokia marea robe aonai, iamo wai a'i toa'i 'inina'u. 'A bariu rani neiana hanona wai emi rani, wapura ena hiabu ranina."

#### *Petero Iesu Ebuniai aina.*

(Mt 26.57, 58, 69-75; Mk 14.53, 54, 66-72; Io 18.12-18, 25-27)

<sup>54</sup> Ia tehore Iesu tea'ina tebaka'ana teaoaina robe haukia 'arakiai hauna ena ituai, 'a Petero hanona murikiai eao ia mo mai baiatakia. <sup>55</sup> Baika tehore ara aona ibuanai iruba teba'arana ba temia kakaiaronia, Petero abomo weia baiatakia emiati. <sup>56</sup> Ba ta'ara a'i uahona ha iruba eanai Petero emiati eihana, eiha iha haraina e'abi etibaha, "Hau neiana hanona Iesu 'abana ha." <sup>57</sup> 'A Petero ebuniai etibaha, "Uaho e, au ia a'i a'ioquina." <sup>58</sup> Rani a'i ehoma'a aonai, hau ha ia eihana e'abi etibaha, "Oi abomo 'abakia ha." Petero e'abi etibaha, "Hau e, au hanona aha'i." <sup>59</sup> Beraura hoana ha eao 'abana hau ha ia eihana ba e'abi tabura etibaha, "Abi tohana hau neiana abomo ia 'abana ha,

pokina ia abomo Galilea hauna."

<sup>60</sup> Ba Petero e'abi etibaha, "Hau e, au a'i a'ioquina oi taba robana nuahuna." Ni'abi oho mo aonai kokoro'u e'arara. <sup>61</sup> Weiana Obiapaka eiha kabe Petero eihana. Ba Petero ehore Obiapaka ena 'abi ehinana hauna eraona tinana, "Oi bariu rani neianai kokoro'u a'i ke'arara baha aonai au rani aihau kobuniai aina'u." <sup>62</sup> Weiana Petero ekarahi eao atapakai ehai ki'a.

#### *Iesu Tebapo'ona.*

(Mt 26.67, 68; Mk 14.65)

<sup>63</sup> Hau weiakia Iesu tea'i 'inina haukia tebatae aina. <sup>64</sup> Mahana te'apa abunakia te'atina ba tebakaina tetibaha, "Mohina benamai. Tai oi e'atini'o?" <sup>65</sup> Abomo 'abi ki'a obokia bo'ona herenai tehinanakia.

#### *Iesu Bakai Te'imana Haukia Wairakiai Ekoroti.*

(Mt 26.59-66; Mk 14.55-64; Io 18.19-24)

<sup>66</sup> Eranai aonai aiara hau apa'uakia, robe haukia apa'uakia, mai rauhubu pokis haukia kipokia teto'u ba Iesu temaiaina bakai apa'uana weiana wairakiai. <sup>67</sup> Bakai apa'uana haukia tebakaina tetibaha, "Mohina benamai. Oi hanona Keriso, 'ao?" 'A Iesu ia ehina benakia etibaha, "Pahina benimi hanona a'i patobatohana'u." <sup>68</sup> Abomo pabakainimi hanona a'i patoba-muena. <sup>69</sup> Ia bariu rani neiana keaoaina hanona Maearima Nahuna hiabu Tirama imana itipana tainai kemiasi."

<sup>70</sup> Ia ikoikiai tebakaina tetibaha, "Ba oi hanona Tirama Nahuna, u?" Weiana Iesu ia ehina benakia etibaha, "E, aba tu'abi mo naia." <sup>71</sup> Ba ia te'abi tetibaha, "Taba buonai hinau 'abikia nahatabunakia? Aika aba ia kipona pinanai Tirama nia'i ki'ana aiana haona."

## 23

*Iesu Pilato Wairanai.*  
(Mt 27.1, 2, 11-14; Mk 15.1-5; Io 18.28-38)

<sup>1</sup> Weiana bakai apa'uana haukia maikoina temikiri Jesu teaoaina Pilato herena. <sup>2</sup> Weia ena beho 'abikia tea'i ramana tetibaha, "Hau neiana tatabu ahina emai hanopaka maearimakia aokia ni-anan aiara niba'uri 'urina mai obia arana herenai takiti katabaibenai hauna nikaiabuna, abomo kipona ni'abi ia hanona Keriso, obia arana." <sup>3</sup> Ba Pilato ehore Iesu ebakaina etibaha, "Oi hanona Iuda haukia ekia obia arana, u?" Ia ena 'abi ebamuena etibaha, "Abimo naiana aba nohinana." <sup>4</sup> Pilato ehore robe haukia apa'uakia mai to'u haukia ehina benakia etibaha, "Au hau neiana herenai beho ha a'i atabu ahina." <sup>5</sup> Ia te'abi tabura tetibaha, "Ena ba'iobi 'abikiae Iuda maearimakia aba eba'uri 'urinakia, weia Galilea ai ea'i ramana emai mo aba 'eka neianai ekara'au."

<sup>6</sup> Pilato 'abi weiana 'uruna eona hanona ebakai bakai hau neiana Galilea hauna 'ao. <sup>7</sup> Pilato e'io bina Iesu hanona Heroda ena iha'ini ba'anai buonai euhuna teaoaina Heroda herena, rani weianai Heroda abomo weia Ierusalemai ai.

*Iesu Heroda Wairanai.*

<sup>8</sup> Heroda Iesu eihana raninai aona enamo ki'a pokina aba wa'i baha 'akinai Jesu pouna eona, enuatae ia peihana abomo ena nuatae Iesu hoa baika pebabai peihanakia. <sup>9</sup> Ua buonai 'abi bo'okiae ebakaina, 'a Iesu ia ena 'abi ha a'i ebamuena. <sup>10</sup> Robe haukia apa'uakia mai rauhubu poki haukia weia tekoroti te'abi pahihi herenai. <sup>11</sup> Ba Heroda mai ena huari haukia kipokia Iesu tebapo'ona, 'abi ki'a obokia haeai haeai tehina murinai, obia habunina ha tebabatotona, haeamona temue aina teaoaina Pilato herena. <sup>12</sup> Rani weianai Heroda mai

Pilato hanona tebaihau, ia 'uainai terarua hanona tebai'oata.

*Pilato Ehina benakia Iesu Kateahu 'arina.*

(Mt 27.15-26; Mk 15.6-15; Io 18.39—19.16)

<sup>13</sup> Pilato ehore robe haukia apa'uakia aiara obiakia mai aiara maearimakia eaparinakia ebato'unakia. <sup>14</sup> Ehina benakia etibaha, "Hau neiana tomaiaina here'uai to'abi, maearima aokia niani aiara niba'uri 'urina, ia au wairamiai 'abi weiakia tohina herenai haukia abakaina hanona ena ki'a ha a'i atabu ahina." <sup>15</sup> Heroda abomo ua homana buonai euhuna emue emai hereka, katoihana ia hanona 'ari akana ha a'i ebabaina. <sup>16</sup> Weiana buonai ka'atina ba kahabona keao." <sup>17</sup> Rani ikoinai Kabanai tatuna aonai Pilato ena hoa hoa tainai wapura hauna ha ebakarahina.

<sup>18</sup> 'A mako teio haeamo tetibaha, "Hau neiana moahu 'arina! Baraba morubuna mobenamai!"

<sup>19</sup> Baraba hanona aba ua'a wapura 'ekanai emiaho pokina aiara apa'uana aonai baripuripu mai ahuhu ebaramanakia paunai. <sup>20</sup> Pilato ena nuatae hanona Iesu pebakarahina paunai to'u haukia ehinabe muenakia. <sup>21</sup> 'A to'u haukia teio hao io hao tetibaha, "Matiu ibiri ropo 'ubinai me'ari! Matiu ibiri ropo 'ubinai me'ari!"

<sup>22</sup> Pilato rani ibaihauna to'u haukia ehinabe muenakia, "Hau neiana beho tabana ebabaina? Ia ke'ari hauna behona ha a'i atabu ahina. Ua paunai ka'atina ba kahabona keao." <sup>23</sup> 'A to'u haukia teio to'o baihana aiakia 'ubi tohanai Iesu matiu ibiri ropo 'ubinai ke'ari. Ekia ioai Pilato etara haona. <sup>24</sup> Ua buonai Pilato ehore ekia nuatae ebabaina Iesu behoai ehorotina. <sup>25</sup> Pilato ehore hau weiana baripuripu mai ahuhu ebaramanakia paunai wapura 'ekanai tehorotina hauna ebakarahina ekia noinoi ihobonai, ba Iesu ebenakia ekia nuatae akakia katebabai.

*Iesu Matiu Ibiriropoai Tekoko 'auna.*  
(Mt 27.32-44; Mk 15.21-32; Io 19.17-27)

<sup>26</sup> Huari haukia Iesu tebaka'ana teaoaina aonai Kurene hauna ha atana Simona ia hanona 'uniai emai Ierusalem niao tetabu ahina ba tea'ina matiu ibiri ropo tebabua ahina Iesu murinai eka'a aina.

<sup>27</sup> Maearima bo'ona 'akina Iesu murina te'au baiatakiai babi'e baika ia teaoko'o aina tehai. <sup>28</sup> Iesu ekabe ehina benakia etibaha, "Ierusalem nahuna babi'emi e, au a'i tomohai aina'u, 'a wai mai nahumi kipokia paumiai tomohai.

<sup>29</sup> Pokina rani kemai aonai maearima kate'abi katetibaha, 'Babi'e te'one 'one miori a'i tebarama, mai a'i teba'ae ba'ae baki'ekia hanona namo tea'ina.'

<sup>30</sup> Weiana 'kobio katehina benakia, "tomo'eho ahamai ai", mai oeo katehina benakia, "tomobahu abunamai."

Hos 10.8

<sup>31</sup> Au matiu maurina 'abana here'uai na tibabai aiho raninai, wai matiu 'ororona 'abana heremaiia aea patebabai aihona?"

<sup>32</sup> Beho haukia rua abomo tebaka'anakia teaoainakia Iesu kipokia kateahu 'arinakia.

<sup>33</sup> Temai 'eka atana "Ara huriana" ai tekara'au aonai, Iesu matiu ibiri ropo ahanai tekoko 'auna beho haukia rua kipokia hamona itipanai, ha awarinai. <sup>34</sup> Ba Iesu e'abi etibaha, "Hama'u e, mohina haonakia pokina ia a'i te'iobina taba tibabaina." Weiana huari haukia pu'i ai ena habuni tewatena.

<sup>35</sup> Maearima tekoroti tebpiaruru, aiara obiakia tehore Iesu tebapo'ona te'abi tetibaha, "Ia maearima haeai ebamaurinakia, ba ia Tirama ena Keriso Tirama etina'ana hauna raninai kipona mebamaurina." <sup>36</sup> Huari haukia abomo tebapo'ona tekahaha herena bine beina manoina tebena.

<sup>37</sup> Ba tehina bera tetibaha, "Oi Iuda ekia obia 'arana raninai

kipomu mobamaurini'o." <sup>38</sup> Iesu 'arana ubinai marere ha abomo weia na terere aihona,  
**'NEIANA HANONA IUDA EKIA OBIA 'ARANA!'**

<sup>39</sup> Beho haukia weia tekapa'au haukia ha Iesu ebapo'ona e'abi etibaha, "Oi bamauri haumu 'ao aha'i? Kipomu mobamaurini'o ai abomo mobamaurinamai." <sup>40</sup> 'A 'abana ehore erikena etibaha, "Oi puma ihobona nua'ina mo Tirama a'i nuta'u aina, u?" <sup>41</sup> Aika hararua kaha'ari hanona ebero, pokina puma na ha'ina hauna hanona eka babai ihobonai, 'a hau neiana hanona taba ha'i ebabai ki'ana." <sup>42</sup> Haeamona ia e'abi etibaha, "Iesu e, emu obia aiarana kokatoto raninai au koraonana'u." <sup>43</sup> Iesu ia ehina bera etibaha, "Abi tohana au oi nahina beni'o, bariu rani neianai oi mai au hararua hanona paradiso aonai kahamiaho."

*Iesu E'ari.*  
(Mt 27.45-56; Mk 15.33-41; Io 19.28-30)

<sup>44</sup> Ihobona matoha atiahā hororo aonai beraura ewapura, abomo wapura hanopaka maikoina ekaabuna eaomo beraura hoana aihau. <sup>45</sup> Abomo marea robe aona i'aea hurina habunina etapa boana rua.

<sup>46</sup> Iesu eapari aota, "Hama'u e, auba'u imamuai nautana." Ua e'abi aiho murinai e'ari.

<sup>47</sup> Weiana huari poki hauna taba terama haukia eihanakia aonai Tirama ebanamona etibaha, "Abi tohana hau neiana hanona bero hauna."

<sup>48</sup> Baiaruru haukia weia teto'una taba terama teihanakia raninai, haharakia teahu ahunakia mai aoko'okia temue aiara teao.

<sup>49</sup> 'A Iesu te'iobina haukia ikoikiai mai babi'e weiakia murinai te'au Galileai temai haukia atau'ai tekoroti taba terama haukia teihanakia.

*Iesu Tehorena.*  
(Mt 27.57-61; Mk 15.42-47; Io 19.38-42)

50 Bakai apa'uana hauna ha atana Iosepa ia hau namona abomo aka bero hauna,<sup>51</sup> ena aiara hanona Arimatea Iudea aiarana ha, Tirama ena obia aiarana ne'imana kemai. Ia bakai apa'uana haukia ekia raona mai babai a'i ea'i taeanakia.<sup>52</sup> Hau neiana eao Pilato herena Iesu hauanina enoi aina.<sup>53</sup> Weiana ia Iesu hauanina ea'i obona habuni imukinai e'apana 'ariahana pihara tekuina 'urina aonai ehorotina, 'uri weiana hanona tai aha'i tihere bahana;<sup>54</sup> Rani weiana hanona a'ia'i harai wapuna abomo beraura robena aba kea'i ramana.

55 Babi'e weiakia Iesu kipokia Galileai temai babi'ekia Iosepa murinai teao, 'ariahana mai Iesu hauanina aea tebaenoti aihona teiha haraina.<sup>56</sup> Weiana ia temue teao aiara muramura timikia namokia mai hauna katetaronia tehorokia teba'orunakia. Ba beraura robenai tearai rauhubu taina.

## 24

*Iesu 'Ariai Emikiri Mue.*  
(Mt 28.1-10; Mk 16.1-8; Io 20.1-10)

<sup>1</sup> Hui beraurana kori 'uainai raurani 'amari 'amarinai babi'e muramura timikia namokia teba'orunakia haukia tea'inakia 'ariahana teao. <sup>2</sup> 'Ariahana ikaibuna piharana aba ehore pare atau'ai teihana.<sup>3</sup> Ia 'ariahana aonai tetoto raninai Iesu Obiapaka hauanina a'i teihana. <sup>4</sup> Weiana paunai tekoroti aokia earo'ari aonai hau rua ekia habuni 'imare 'imarekia beronai herekia tekoroti. <sup>5</sup> Babi'e teta'u ki'a tekuti wairakia 'ano eao, hau rua babi'e tebakainakia tetibaha, "Taba buonai emauri hauna 'ari haukia baiatakiai tutabuna.<sup>6</sup> Ia hanona neia aha'i. Ia aba emikiri mue! Galileai emiaho oho aonai wai ehina benimi 'abina tomoraonana. <sup>7</sup> Etibaha, Maearima Nahuna hanona ki'a haukia imakiai kateutana, matiu ibiri ropo 'ubiai kateahu 'arina

haeamona wapu ibaihauna murnai kemikiri mue.'"

<sup>8</sup> Weia ia Iesu ena 'abi teraona tinanakia. <sup>9</sup> 'Ariahanai temue temai raninai taba neiakia ikoikiai i'abana haukia harauhaea hamomo mai harina baika herekiai tehinanakia. <sup>10</sup> Babi'e neiakia Maria Magadala babi'ena, Ioana, Iakobo hinana Maria, mai babi'e baika te'abanakia haukia kipokia pou neiana iuhubeau haukia herekia tehinana. <sup>11</sup> Iamo iuhubeau haukia babi'e ekia 'abi ori 'abaeanai tebaona buonai a'i tebatohana. <sup>12</sup> 'A Petero emikiri ebeau eao 'ariahana. Ekuti aona eribana te'apana habunikia mo weia kipokia tenoti 'abaea eihanakia, emue ena itu eao aonai kipona aona earo'ari taba weiana erama hauna paunai.

*Iesu Emao Taearanai Ewaira Tina.*

(Mk 16.12, 13)

<sup>13</sup> Rani weiana hamona aonai Iesu i'abana haukia rua tiao aiara ha atana Emao, aiara weiana mai Ierusalem baiatakiai ena homa'a hanona kilometra harauhaea hamomo 'abana. <sup>14</sup> Taearai teka'a aonai taba neiakia ikoikiai terama haukia terarua baiatakiai te'abi 'abi ainakia. <sup>15</sup> Ba terarua te'abi 'abi mai terobahu aonai Iesu kipona emai herekia teka'a oioi. <sup>16</sup> 'A maearimana teihana ia a'i te'ibina ia hanona Iesu.

<sup>17</sup> Iesu ia ebakainakia etibaha, "Wai torarua ka'amiai taba robana tuahuna?" Terarua tekori 'ororo wairakia mai birabirakia. <sup>18</sup> Ha weiana atana Kaleapa ebakai bakai etibaha, "Ierusalem aonai oi pa'e ikupaiamu mo taba rani murikai terama haukia a'i o'ibinakia?" <sup>19</sup> Ia ebakainakia etibaha, "Aka tabakia?"

Hau rua tetibaha, "Iesu Nasareta hauna pouna. Ia hanona mahabanai hauna, Tirama mai maearima ikoikiai wairakiai ena 'abi mai aka tehiabu wairai.<sup>20</sup> Robe haukia apa'uakia mai aiara haukia apa'uakia ia Roma haukia tebenakia matiu ibiri ropo 'ubinai teahu 'arina. <sup>21</sup> 'A ai

taraonana ia hanona aika Isaraela hauka kebamaurinaka hauna.

Haeamona taba neiakia terama wapu aihau teore.<sup>22</sup> Babi'e baika baiatamai ai tebata'u ta'u hurinamai. Ia raurani amarinai teao 'ariahana hanona<sup>23</sup> Iesu hauanina a'i tetabu ahina temue temai te'abi aneru teihanakia abomo aneru weiakia ia tehina benakia, 'Iesu hanona aba emauri mue.'<sup>24</sup> Ba 'abamai baika teao 'ariahana teihana hanona babi'e te'abi ihobonai mo tetabu ahina, 'a Iesu hauanina a'i teihana.'

<sup>25</sup> Iesu ehina benakia etibaha, "Hama na topo'o aiho abomo mahabanai haukia taba tehina haukia ibatohakiai aomi tema-hari.<sup>26</sup> Keriso na kehaiara aiho 'uai ba ena nuabi aonai ketoto, weiiana a'i to'ioquina, u?"<sup>27</sup> Iesu hanona Mose mai mahabanai ekia rere rereai ea'i ramana Puka Robena aonai ia kipona 'abina maikoinai hau rua eba'iobinakia.

<sup>28</sup> Aiara tiao hauna aba herekiaeia Iesu hanona kekabero na ehoma.<sup>29</sup> A terarua tebamuenu te'abi tetibaha, "Beraura aba kekaihuna abomo aba kerabi, kipokia pahamiaho." Ba ia ekatoto kipokia katemiaho.<sup>30</sup> Weiiana aniani 'ekanai kipokia temiati raninai Iesu ehore parawa ea'ina ebanamona ehorina terarua ebekakia.<sup>31</sup> Ba mahakia teno'a aokia tea weia te'ioquina ia hanona Iesu, haeamona wairakiae e'akauma 'abaea.<sup>32</sup> Ia terarua kipokia te'abi tetibaha, "Taearai ehina benaka abomo Puka Robena 'abikia eba'iobinaka raninai matoha iruba aokai eara, uhe?"

<sup>33</sup> Terarua beronai temikiri temue Ierusalema teao, i'abana haukia harauhaea hamomo 'abakia kipokia tito'u haukia tetabu ahinakia.<sup>34</sup> Ia hau rua tehina benakia tetibaha, "Obiapaka hanona emikiri toha, Simona herenai ewaira tina."<sup>35</sup> Weiakia terarua taearai taba erama pouna abomo parawa ehorina aonai aokia ea Iesu te'ioquina pouna tehinanakia.

*Iesu I'abana Haukia Iesu Teihana.*

(Mt 28.16-20; Mk 16.14-18; Io 20.19-23; Ih 1.6-8)

<sup>36</sup> 'Abi weiakia tehina oho mo aonai Iesu tohana ia baiatakiai ekoroti abomo e'abi etibaha, "Baibua wai heremai!"<sup>37</sup> Ia ikoikiae teta'ukia mai ubo ea'inakia, teraonana biriuu teihana.<sup>38</sup> 'A Iesu ehina benakia etibaha, "Ae homa buonai tutuu mai aomi tikai'au kai'au.<sup>39</sup> Ima'u mai ae'u tomoihananakia tomoa'i hobona'u tomo'ioquina'u, Nahuna au toha'u pokina auba hanona bitiona mai huriana aha'i ia au hanona mai eu'u."<sup>40</sup> 'Abi weiiana ehinana murinai imana mai aena ebaihanakia.<sup>41</sup> Ia teaonamo ki'a baha paunai Iesu a'i tebatoha bahana aokia raona raona ebonu buonai ia ebakainakia etibaha, "Wai taba katoani hauna ha na'a?"<sup>42</sup> Ia maia ha aba eawati hauna hana papana tebena.<sup>43</sup> Weiiana ia ea'ina wairakiae eana.

<sup>44</sup> Ba Iesu ia ehina benakia etibaha, "Au wai heremai ami-aho oho aonai taba robakia ahu haukia neiakia, Au pou'u tererenakia Mose ena rauhubuai mahabanai haukia ekia rere rereai mai Salamo aonai haukia ikoikiae katetoha."<sup>45</sup> Weiiana aokia ebaeanakia Puka Robena obona kateobo.<sup>46</sup> Haeamona Iesu ia ehina benakia etibaha, "Puka Robenai na terere aihona. Bamauri hauna hanona kehau haiara abomo 'ariai kemikiri mue wapu ibaihaunai."<sup>47</sup> Ia atanai raona kabe mai ki'a ihina haokia poukia kateiroro ainakia Ierusalema ai katea'i ramana keaomo hanopaka ikoikiae aokiae.<sup>48</sup> Wai hanona taba neiakia poukia ibatohakia haumi.<sup>49</sup> Aia'u tomona. Hama'u Auba Robe e'uhai 'uaina hauna au kipo'u kauhuna kemai ahamiai, 'a wai hanona Ierusalema aonai katobai'ima keao mo hiabu 'ubiai kemai hauna katoa'ina."

*Iesu Ea'itaeania Kupa Eao.*  
(Mk 16.19, 20; Ih 1.9-11)

50 Iesu ia aiara apa'uana'i ebakarahnakia teao Betani herena tainai, ba imana ea'i taea banamo ebenakia.  
51 Nibanamonakia aonai Tirama ehore herekiae ea'i taeana eaoaina kupa. 52 Ia tekuti aina ba mai aonamokia temue teao Ierusalema. 53 Rani ikoinai teao Marea Robe aonai temiaho Tirama tebanamona.

## Pou Namona IOANE Ererena Hauna

### *Puka Aona Irerena 'Abina*

Pou namona neiana Ioane ererena aonai ebaihanaka, Iesu hanona Tirama ena 'abi banaibainai hauna, ia hanona maearima hauaninai emai haeamona maearima baiatakai emiaho (1.14). Ioane ena nuatae hanona maearima Iesu katea'ikakaumana ia Tirama Nahuna, kate'iobina Iesu hanona Tirama e'abi'uai keuhuna kemai kebamaurinaka hauna. Ioane hanona e'ibina maearima Iesu tia'ikakaumana haukia hanona mauri banaibainai titabu ahina, ua buonai puka neiana ererena (20.31).

Kori'uaina hanona Ioane nehina benaka Iesu hanona Tirama ena 'Abi, ba bata'u ta'u huri akakia ebabai robana eahuna. 'Abi tohana, maearima baika hanona Iesu tea'ikakauma mai murinai te'au, iamo baika hanona ia ia'ikakaumana teubo aina. Puka iro'ana 13—17 aonai hanona i'oata haukia taearanai titabu rabinai robana eahuna, Iesu hanona i'abana haukia kipokia temiaho, ia ehore ba'iobi namokia ebenakia. Puanai hanona Iesu 'ariai emikiri mue mai i'abana haukia ia teihana mai tea'ikakaumana.

Taba hamona puka neiana aonai kahaiha to'ona hanona ena hoahoa weiana maearima ekia mauri aonai tabakia nia'inakia 'abi ibabataikiai nibaonakia a'ikakauma haukia rani ikoikiai katemauri ainakia, matoha bei, parawa, ea, bine buabuana, mamoe mai 'ima hauna 'abakia.

### *Puka Paipana Apa'uakia*

- a. 'Abi kori'uaina. (1.1-18)
- b. Ioane ba'uere robe hauna mai Iesu i'abana haukia kori'uakia. (1.19-51)
- c. Iesu ena aka maearima herekiai. (2.1—12.50)

- d. Wapu orekia Ierusalema aonai mai herenai. (13.1—19.42)
- e. Obiapaka ena mikiri mue mai ena waira tina. (20.1-31)
- f. 'Abi orekiai ena waira tina mo ha Galilea aonai. (21.1-25)

### *'Abi Hanona Maearima Hauanainai Emai*

<sup>1</sup> Bahabana 'akinai hanopaka a'i erama baha aonai 'Abi hanona aba ua'a, 'Abi hanona Keriso, 'Abi hana Tirama ohi temiaho, 'Abi hanona Tirama. <sup>2</sup> Ia hana bahabana 'akinai Tirama ohi temiaho, <sup>3</sup> Tirama ebabai tabakia ikoikiai hana 'Abi weianai terama, terama tabakia ikoikiai hanona ha kipona a'i erama. <sup>4</sup> 'Abi hanona mauri pokina, ba mauri weiana hanona maearima ekia ea. <sup>5</sup> Ea hanona e'ara wapura aonai, ia wapura hana ea a'i nihao abuna.

<sup>6</sup> Tirama hau ha euhuna emai, ia atana hanona Ioane. <sup>7</sup> Ia emai maearima herekiai ea pouna kehinana, ia paunai maearima ikoikiai ea pouna kateona ba katea'ikakauma. <sup>8</sup> Ia kipona hanona ea weiana aha'i, ia ea pouna kehinana paunai emai. <sup>9</sup> Ea tohana hanona emai hanopakai maearima ikoinai herekiai kebaeanakia.

<sup>10</sup> Ia hanona hanopaka aonai, hanopaka hanona ia 'eunai erama, iamo hanopaka hanona ia a'i e'ioina. <sup>11</sup> Ia ena hanopaka tohana haukia herekia emai, ia kipona ena maearima tohakia hanona a'i tea'i taeana. <sup>12</sup> Ia tia'i taeana mai atana tia'ikakaumana haukia ikoikiai hanona bero ebenakia Tirama nahunai kateao. <sup>13</sup> Tirama nahunai teao haukia hanona maearima ekia rama taearanai aha'i, 'ao hauani ena nuataeai aha'i, 'ao maearima ha ena nuataeai aha'i, ia Tirama ena nuataeai terama.

<sup>14</sup> 'Abi weiana hanona maearima hauaninai emai, baiata-mai ai kipokia tamiaho. Ena nuabi taihana, nuabina weiana hanona Hamana herenai emai Nahuna

hamohamona 'euna, ia aonai aoko'o hoana mai 'abi tohana ebonu 'auna.<sup>15</sup> Ioane ehore ia pouna ehinana eio etibaha, "Au pouna ahinana hauna hanona neiana, atibaha, 'Au muri'uai nimai hauna etara haona'u pokina ia hauna emiaho 'uai ba au arama.'

<sup>16</sup> Ia aoko'o hoanai ebonu 'auna ba aika ikoikai banamo ia hereinai naha'ihao a'ihaona.<sup>17</sup> Tirama rauhubu ebenaka Mose imanai, ia aoko'o hoana mai 'abi tohana hanona Iesu Keriso herenai temai.<sup>18</sup> Hau ha Tirama a'i eiha 'apuana, 'a Nahuna hamohamona Tirama herena 'akinai nemiaho mai ia kipona abomo Tirama, ia hauna ehore Tirama eba'iobinaka.

*Ba'uere Robe Hauna Ioane E'abi  
Au Hanona Keriso Aha'i.*

(Mt 3.1-12; Mk 1.1-8; Lk 3.1-18)

<sup>19</sup> Weja Ierusalemai Iuda haukia apa'uakia tehore robe haukia mai Lebi haukia teuhunakia teao Ioane herena katebakaina ia hanona tai.<sup>20</sup> Ioane a'i ebuniai ia ehina pou haraina etibaha, "Au hanona Keriso\* aha'i."<sup>21</sup> Ia tebakaina tetibaha, "Ba oi hanona tai? Oi hanona Elia?" Ia e'abi etibaha, "Au Elia aha'i." Ia tebakai muena tetibaha, "Oi mahabanai haumu 'ao?" Ekia 'abi ebamuena etibaha, "Aha'i."<sup>22</sup> Ua buonai ia tehina bena tetibaha, "Mohina benamai oi hanona tai. Emu 'abi kataeoaina teuhunamai haukia katahina benakia. Oi kipomu poumu aea nohina aihona?"<sup>23</sup> Ioane ekia 'abi ebamuena etibaha, "Au hanona mahabanai hauna Isaia ena rererere 'abina, ia e'abi etibaha, 'Aia ha hano'akunai eio hauna etibaha,  
Obiapaka ena ka'a taearana tomobaberona kekana.'"

Isa 40.3

<sup>24</sup> Baika hanona Parisea haukia teuhunakia haukia,<sup>25</sup> haeamona tebakaina tetibaha, "Oi Keriso aha'i 'ao Elia aha'i 'ao mahabanai haumu aha'i raninai aehoma

buonai nuba'uere robe?"<sup>26</sup> Ioane ehina benakia etibaha, "Au baihai naba'uere robenimi, 'a wai baiatamiai a'i to'iochina hauna ha ekoroti.<sup>27</sup> Ia hanona muri'uai nimai, iamo ia eapa'ua ba au, ia ena tamaka warokia karubunakia abomo here'uai a'i ketaina."<sup>28</sup> Neiakia ikoikiai hanona Ioane Ioridana ate abirana Betaniai eba'uere robe aonai terama.

*Iesu Hanona Tirama Ena  
Mamoe Nahu.*

<sup>29</sup> Erani Ioane ehore Iesu eka'a herena nimai hanona eihana ba e'abi etibaha, "Tomoihana Tirama ena mamoe nahuna hanopaka ena ki'a ibua parena hauna.<sup>30</sup> Maranjai au robana ahuna hauna neiana atibaha, 'Muri'uai nimai hauna hanona au etara haona'u, pokina ia emiaho 'uai ba au arama.'<sup>31</sup> Au kipo'u ia a'i a'iochina, ia au amai bejai kaba'uere robe hana ia kabawaira tinana Isaraela haukia ia kate'iochina paunai."

<sup>32</sup> Ba Ioane ia pouna ehinana etibaha, "Au Auba Robe aihana rauria 'abana kupai eriri ia ahanai ehiri'au.<sup>33</sup> Au a'i a'iohi bahana, ia weiana euhuna'u bejai kaba'uere robe na ehoma Tiramana ehina bena'u etibaha, 'Ahanai Auba Robe keriri kehiri'au koihana hauna ko'iochina ia hanona Auba Robe ai keba'uere robe.'<sup>34</sup> Au maha'uai aba aihana ba nahina pouna neiana hana Tirama Nahuna."

*Iesu I'abana Haukia Kori'uakia.*

<sup>35</sup> Erani Ioane haeamona weia i'abana haukia rua kipokia tekroto,<sup>36</sup> Ia Iesu nikabani eihana raninai e'abi etibaha, "Tomoihana Tirama ena mamoe nahuna."<sup>37</sup> Ioane i'abana haukia rua ia e'abi aiana teona raninai teao Iesu murinai teka'a.<sup>38</sup> Iesu eiha kabe murinai tika'a haukia eihana kia ba ebakainakia etibaha, "Wai taba tonuatae aina?" Ia ena 'abi tebamuena tetibaha, "Rapi e, oi ae'eai nomiaho?" (Maeakiai Rapi anina hanona 'ba'iohi hauna.)

\* 1:20: (20) 'ao Mesia

<sup>39</sup> Ia ehina benakia etibaha, "Tomai tomoihana." Ba teao ena emiaho 'ekana teihana, weiana hanona beraura ebaeno hoana bani, ia kipokia temiaho.

<sup>40</sup> Weiakia terarua Ioane e'abi aiana teona abomo Iesu murinai teao haukia ha hanona Anderea, ia hanona Simona Petero hatina. <sup>41</sup> Anderea beronai a'ana Simona etabu ahina ba ehina bera etibaha, "Ai Mesia aba tatabu ahina." (Mesia anina hanona Keriso, Bamauri hauna.) <sup>42</sup> Ba ia Simona eaoaina Iesu herena, Iesu Simona eiha ini 'inina e'abi etibaha, "Oi atamu hanona Simona, Ioane nahuna, bariu oi atamu kateaparina Kepa." (Kepa hanona ihibona Petero, anina hanona pihara.)

### *Iesu Pilipo Mai Natanaela Ohi Eaparinakia.*

<sup>43</sup> Erani Iesu enuatae keao Galilea aonai, Pilipo etabu ahina ba ehina bera etibaha, "Muri'uai omai."

<sup>44</sup> Pilipo hanona Bete-saida hauna Anderea mai Petero 'abakia. <sup>45</sup> Pilipo ehore Natanaela etabu ahina ehina bera etibaha, "Mose rauhubu aonai pouna ererena abomo mahabanai haukia ekia pukai tererena hauna ai aba tatabu ahina. Ia hanona Nasareta hauna Iesu, Iosepa nahuna."

<sup>46</sup> Natanaela ehore ebakai bakai, "Nasareta ai taba namona ha ua'a ha kerama ketaina, u?" Pilipo etibaha, "Omai mo, moihana."

<sup>47</sup> Iesu Natanaela eka'a herena nimai eihana raninai pouna ehinana, "Ia hana Isaraela hauna tohana. Ia aonai bai'oi hoana ha aha'i."

<sup>48</sup> Natanaela ehore ebakaina, "Aea o'iohi aihona'u?"

Iesu ia ena 'abi ebamuena etibaha,

"Oi suke matiuna ba'anai aiha 'uaini'o ba Pilipo eaparin'i'o."

<sup>49</sup> Ba Natanaela e'abi etibaha, "Ba'iohi haumu e, oi hana Tirama nahuna. Oi hana Isaraela ekia obia arana."

<sup>50</sup> Iesu ia ehina bera etibaha, "Au a'abi suke matiuna ba'anai aihani'o buonai nua'ikakaumana'u, u? Neiana mo

aha'i, wairai oi hana taba rarikia koihanakia." <sup>51</sup> Haeamona ehina benakia etibaha, "Abi tohana au wai nahina benimi, kupa kekaikau Tirama ena aneru katekara'au kateriri au Maeearima Nahuna aha'uai katoihanakia."

## 2

### *Kana Aiaranai Hawainibe Tatuna Ha.*

<sup>1</sup> Wapu rua murinai Galilea Kana aiarana aonai hawainibe tatuna ha erama. Iesu hinana hanona weia, <sup>2</sup> Iesu mai i'abana haukia kipokia abomo tebeau-nakia teao hawainibe tatuna weianai. <sup>3</sup> Tatu aonai bine beina teinu orena raninai Iesu hinana ehore Iesu haianai e'abi etibaha, "Ia herekiai bine beina aba eore."

<sup>4</sup> Iesu e'abi etibaha, "Hina'u, taba buonai ekia aro'ari hauna au nubena'u. Au e'u rani a'i nitai bahana."

<sup>5</sup> Ia hinana ta'ara'i

haukia ehina benakia etibaha, "Ia taba na keho hanona maikoinai katobabai."

<sup>6</sup> Weia pihara puoukia 'abaihau tekoroti, Iuda haukia ekia hoahoa taikia weia bei katerai'au imakia mai aekia kateutu, puou ha ha aokiai beibei matoha harau rua 'ao harau aihau 'abakia.

<sup>7</sup> Iesu ta'ara'i haukia ehina benakia etibaha, "Puou aokiai

bei tomoba bonunakia."

Ua buonai teheinakia tebabonu teao 'ako'akokiai. <sup>8</sup> Ba ia ehina benakia etibaha, "Bariu harua tomorai 'aunakia tomoaoaina tatu iha'ini nauna tomobena."

Ba harua teraina teaoaina ia tebena.

<sup>9</sup> Tatu neiha 'inina hauna bei weiana bine beinai eao hauna einu hobona, ae'e ai emai hanona ia a'i e'iohina, ta'ara'i haukia bei teraina haukia mo te'iohina. Ba iha'ini hauna hawainibe mahamahama hauna eaparina haiahaiai,

<sup>10</sup> e'abi etibaha, "Maearima ikoikiai hanona bine beina namona tiben'i uainakia, ba teinu 'ari murinai bine beina 'ama'amana tibenakia, ia oi hanona bine beina namona obamauaina emai mo bariu obaiben'i."

<sup>11</sup> Iesu bata'uta'u huri hoana kori'uaina neiana ebabaina Galilea Kana aonai. Ena nuabi ebawaira tinana ba i'abana haukia ia tea'ikakaumana.

<sup>12</sup> Tatu neiana murinai Iesu hinana hatina mai i'abana haukia kipokia teao Kaperanauma ua'a temiaho wapu baika teao.

*Iesu Ehore Kawakawa Haukia  
Marea Robeai Eu'u Ahinakia.*

(Mt 21.12, 13; Mk 11.15-17; Lk 19.45, 46)

<sup>13</sup> Iuda haukia ekia Kabanai tatuna beraurana ekaibari buonai Iesu ekara'au Ierusalema eao.

<sup>14</sup> Ua'a marea robe aonai hanona poromakau, mamoe, rauria tikawakawa ainakia haukia mai moni tia'i banai haukia temiahi eihanakia. <sup>15</sup> Ba i'ati'ati 'anauana ha ebabaina 'anauai marea robe aonai poromakau mai mamoe ikoikiai eura ahinakia, moni a'ibainai haukia ekia moni ebarobo otarainakia ekia itara etori ku'a banainakia. <sup>16</sup> Weiakia rauria tikawakawa ainakia haukia herekiai e'abi etibaha, "Neiakia tomoa'i katu'anakia 'eka neianai. Hama'u ena itu hanona wai emi kawakawa 'ekanai a'i to-mobaona!" <sup>17</sup> Ba i'abana haukia Puka robena aba tererena 'abina teraona tinana, "Oi emu itu iraona'au aina hanona au ao'uai iruba niara 'abana."

<sup>18</sup> Ba Iuda haukia apa'uakia tehore Iesu tebakaina tetibaha, "Bata'uta'u huri hoana tabana ai kobahanamai hanona katabatohani'o oi mai emu bero neiakia ikoikiai nubabai." <sup>19</sup> Iesu ekia 'abi ebamuena etibaha, "Marea robe neiana tomoahu 'iti'itina, au wapu aihau aonai kabakori muena." <sup>20</sup> Iuda haukia apa'uakia te'abi tetibaha, "Marea robe neiana tebabaina ihauna hanona bariabui 'abaihau, ia wapu aihau aonai aea kobakori mue aihona?"

<sup>21</sup> 'A Iesu marea robe robana eahuna hauna hanona ia kipona hauanina. <sup>22</sup> Weiana Iesu 'ariai emikiri mue murinai ia i'abana haukia ena 'abi ehinana hauna teraona tinana. Ba Puka robena

mai Iesu ehina 'abikia tebatohanakia.

*Iesu Maearima Ekia Hoaho  
Aba E'iobinakia.*

<sup>23</sup> Iesu Kabanai tatuna aonai Ierusalema ai emiaho, maearima bo'ona bata'uta'u huri hoakia ebabai teihana hanona tea'ikakaumana. <sup>24</sup> 'A Iesu kipona hanona maearima a'i ebatohanakia pokina ia hanona ikoinai e'iobinakia. <sup>25</sup> Iesu kipona maearima aokiai temiaho tabakia aba e'iobinakia paunai, hau ha a'i kehore maearima poukia ia herenai a'i kehinanakia.

### 3

*Iesu Nikodemo Ohi Te'abi'abi*

<sup>1</sup> Parisea hauna ha atanai Nikodemo ia hanona Iuda haukia ekia hau apa'uana ha. <sup>2</sup> Rabi ha ia eao Iesu herena ehina bena etibaha, "Ba'iobi haumu e, ai ta'iobina oi hanona Tirama herenai omai. Oi bata'uta'u huri hoakia nubabai hanona Tirama ia herenai aha'i hauna ha a'i kebabaina hoakia oi nubabai."

<sup>3</sup> Iesu ia ena 'abi ebamuena etibaha, "Abi tohana au oi nahina beni'o, maearima ha a'i kerama mue raninai ia hanona Tirama ena obia aiarana a'i keiha 'apuana."

<sup>4</sup> Weiana Nikodemo ebakai bakai etibaha, "Maearima aba eapa'ua raninai ia aea kerama mue aiho? 'Abi tohana rani ibaruana ia hinana nuanai a'i ketoto mue haeanoma a'i kerama."

<sup>5</sup> Iesu ia ena 'abi ebamuena etibaha, "Abi tohana au oi nahina beni'o, maearima hanona beiai mai Auba Robeai a'i kerama mue raninai ia hanona Tirama ena obia aiaranai a'i ketoto 'apuana. <sup>6</sup> Hauani nihore hauani nibaramana, ia Auba Robe nihore auba nibaramana. <sup>7</sup> Ahina beni'o korama mue 'abina hauna a'i kobaoao aina. <sup>8</sup> Baura niabu nenuatae aina 'ekanai niao, ia oi hanona 'uruna mo nuona, ia ae'eai nimai 'ao aeana niao hanona a'i o'iochina. Auba Robe ai terama haukia ikoinai abomo uamo homana."

<sup>9</sup> Nikodemo ehore ia ebakai muena etibaha, "Taba neiakia aea katerama aiho?" <sup>10</sup> Iesu ia ehina bena etibaha, "Oi hanona Isaraela ena ba'iobi haumu apa'uana ha, ia aehoma buonai taba neiakia obokia a'i nuobo? <sup>11</sup> Abi tohana au oi nahina beni'o, ai ta'iobi haukia tahinanakia, ai tahi'a haukia tahina pounakia, ia emai 'abi tahina pou haukia a'i tua'i taeanakia. <sup>12</sup> Au nahore hanopaka tabakiai nahina benimi hanona a'i tuba tohanakia, iamo kupa tabakiai kahina benimi raninai aea katobatoha aihonakia. <sup>13</sup> Maearima ha a'i ekara'au 'apua kupa, iamo au Maearima Nahuna ikupaia'u mo kupai ariri amai. <sup>14</sup> Hano'akunai Mose'erau aubaubana eih'i taeana ihobonai mo au Maearima Nahuna abomo kateihi taeana'u. <sup>15</sup> Weiana tia'ikakaumana'u haukia ikoinai hanona mauri banaibananai katea'ina.

<sup>16</sup> "Pokina Tirama hanopaka eraona'auai ki'a bahana paunai Nahuna hamohamona mo ebaibenai, tia'ikakaumana haukia ikoikiai hanona a'i kate'ari, ia mauri banaibananai katea'ina. <sup>17</sup> Tirama nahuna euhuna hanopakai hanona puma kebaibenai paunai aha'i, ia paunai hanopaka 'arana kebamaurina. <sup>18</sup> Tia'ikakaumana haukia ikoikiai hanona puma a'i katehoaina, ia a'i tia'ikakaumana haukia ikoikiai hanona aba puma tihoaina, pokina Tirama Nahuna hamohamona atana a'i tia'ikakaumana paunai. <sup>19</sup> Bakai hanona na eaka aiho. Ea aba emai hanopaka aonai, 'a maearima wapura 'arina ti'ari ia ea tibaki'ana, pokina ekia hoahoa hanona teki'a. <sup>20</sup> Weiana ki'a tibabai haukia ikoikiai ea ti'oatana ba a'i timai ea aonai pokina ekia hoahoa ki'a obokia a'i temewaira tina ta'uina. <sup>21</sup> Ia aka beronai timauri haukia hanona timai ea aonai pokina ekia hoahoa Tirama aiana tika'aina hauna katebawaira tinana."

*Ioane Ehore Iesu Poua Ehinana.*

<sup>22</sup> Neiana murinai Iesu i'abana haukia kipokia tekarahi Iudea hanona teao, ia weia kipokia temiaho beraura baika teao ba eba'uere robe. <sup>23</sup> Ioane ba'uere robe hauna abomo Salima abiranana Aenona ai eba'uere robe pokina weia hanona bei rarina mai maearima teao eba'uere robenakia. <sup>24</sup> Weiana hanona Ioane wapura 'ekanai a'i tekaibau bahana aonai.

<sup>25</sup> Ba Ioane i'abana haukia baika mai Iuda hauna ha kipokia te'abi baitaeai ekia hoahoa weiana Tirama wairanai katebamaha mahana hauna paunai. <sup>26</sup> Ua buonai ia temai Ioane herena tehina bena tetibaha, "Ba'iobi haumu e, hau weiana Ioridana atena abiranai kipokia tomiaho pouna ohinana hauna ia bariu niba'uere robe, ba maearima ikoinai tiao herena." <sup>27</sup> Ioane ekia 'abi ebamuena etibaha, "Maearima hanona Tirama kebaibenai hauna mo ketabu ahina. <sup>28</sup> Wai kipomi abomo aba tubatohana'u au aba ahina benimi, 'au hanona Keriso aha'i, ia au hanona euhu 'uaina'u ia wairanai." <sup>29</sup> Hawainibe mahamahana babi'ena weiana hanona ia niatawana hauna 'eunai, ba hawainibe mahamahana hauna ena hau ia herenai nifikoroti hauna hanona aiana niona raninai aonamo ni'opu abuna. Aonamona neiana hanona au 'eu'u, ba bariu ao'uai aba ebonu. <sup>30</sup> Ia hanona keapa'ua keaoaina, ia au hanona ka'aera'aera kaeaoina."

<sup>31</sup> "Ubiai emiaho ba emai hauna hanona taba ikoikiai 'ubikiai, ia hanopakai eraoma hauna hanona hanopaka 'euna, ena 'abi'abi ai hanopaka mo robana keahuna. Kupai emai hauna hanona taba ikoikiai 'ubikiai. <sup>32</sup> Ia eiha mai eo'o tabakia poukia nehinanakia, ia ena 'abi hau ha a'i nia'i taeanakia. <sup>33</sup> Ia ena 'abi ea'i taeana hauna hanona ebatohana Tirama hanona 'abi tohana hauna. <sup>34</sup> Tirama euhuna hauna hanona

Tirama ena 'abi nehinana, pokina Tirama ehore ia aonai Auba Robe nibabonu 'auna.<sup>35</sup> Hamana ehore nahuna niraona'au aina taba ikoikiai ia imanai eutanakia.<sup>36</sup> Nahuna nia'ikakaumana hauna hanona mauri banaibanoi ea'ina, ia nahuna nibaoao aina hauna hanona mauri a'i keiha 'apuana, ia Tirama ena opuere ia ahnai nemiaho."

## 4

### *Iesu Samaria Babi'ena Ohi Te'abi'abi.*

<sup>1</sup> Parisea haukia pou teona hanona Iesu maearima bo'ona nia'inakia ti'abana mai niba'uere robenakia ba Ioane ba'uere robe hauna hanona bita mo ea'inakia.<sup>2</sup> Taba tohana hanona Iesu kipona a'i eba'uere robe, ia i'abana haukia teba'uere robe.<sup>3</sup> Iesu Parisea haukia pou teona hauna e'ioibina raninai Iudea ehabona, emue haeamona keao Galilea.<sup>4</sup> Ia bariu hanona Samaria haukia ekia hano aona kekana keao.

<sup>5</sup> Ia emai Samaria aiarana ha atana Sukara, aiara weiana herenai Iakobo ehore nahuna Iosepa hano ebena hauna herenai ekarahi.<sup>6</sup> Iakobo ena bei 'urina hanona weia, ba Iesu taeara homa'ana ekana buonai emahe obo bei 'urina haianai emiat. Beraura hanona aba eatiaha.

<sup>7</sup> Weiana Samaria babi'ena ha emai ena bei kerai, ba Iesu ehore enoina etibaha, "Bei harua mobena'u mainu."<sup>8</sup> Ia i'abana haukia hanona aiara teao aniani katekawa.<sup>9</sup> Samaria babi'ena ehore ia ehina bena etibaha, "Oi hanona Iuda haumu ia au hanona Samaria babi'e'u, ba aehoma buonai here'uai bei inu nunoi aina?" (Pokina Iuda maearimakia mai Samaria maearimakia ekia bahamomo hanona aha'i.)

<sup>10</sup> Iesu ehore ehina bena etibaha, "Tirama ena beruberu po'ioibina mai tai bei ninoi aina heremuai hauna po'ioibina raninai, hereinai aba ponoina ba ia mauri beina pebeni'o."<sup>11</sup> Babi'e e'abi etibaha, "Hau apa'uamu e, bei

irai tabana heremuai aha'i abomo bei 'urina neiana hanona e'oura. Mauri beina weiana hanona ae'eai koa'ina?<sup>12</sup> Ai 'aba'abamai Iakobo hanona bei 'urina neiana ebenamai, ia kipona einu, nahuna teinu, ena mamoe mai poromakau abomo teinu, ba oi Iakobo otara haona?"<sup>13</sup> Iesu ena 'abi ebamuena etibaha, "Bei neiana teinu haukia ikoinai hanona 'akokia kate'ororo mue.<sup>14</sup> Ia au kabaiben'i beina hau ha keinu hanona 'akona a'i ke'ororo 'apua. 'Abi tohana, au kabaiben'i beina hanona ia aonai mauri beinai keao kebuti keharu haru mauri kebaiben'i keaomo banaibanoi."<sup>15</sup> Babi'e ehore Iesu enoina etibaha, "Hau apa'uamu e, bei weiana mobena'u, 'ako'u a'i ke'ororo mue abomo bei rai neia a'i kamai mue."

<sup>16</sup> Iesu ia ehina bena etibaha, "Moao atawamu koaparina torarua katomai."<sup>17</sup> Babi'e e'abi etibaha, "Au atawa'u aha'i." Iesu ia ehina bena etibaha,

"Oi atawamu aha'i na nuhoma hanona obero."<sup>18</sup> Pokina oi atawamu ikoinai ima, bariu heremuai nemiaho hauna hanona oi atawamu tohana aha'i. Bariu ohinana hauna hanona 'abi tohana."<sup>19</sup> Babi'e e'abi etibaha,

"Hau apa'uamu e, bariu ao'u aba ea, oi hanona mahabanai haumu.<sup>20</sup> Ai kupumai hamamai hanona oeo neiana ahnai Tirama tekuti aina, ia wai Iuda haumi tu'abi kuti 'ekana hanona hamona Ierusalemai mo."

<sup>21</sup> Iesu e'abi etibaha, "Babi'e e, e'u 'abi moa'i taeania, ranina nimaiaina aonai Hamaka katokuti aina hanona oeo neiana 'ubinai 'ao Ierusalemai mo aha'i.<sup>22</sup> Wai Samaria haumi a'i to'ioibina hauna tokuti aina, ai Iuda haumai ta'ioibina hauna takuti aina, pokina Tirama ena bamauri taeearana hanona Iuda haukia herekai nimai.<sup>23</sup> Ranina aba nimai katekutiai tohana haukia hanona aubai mai aokia maikoinai Hamaka katekuti aina. Bariu ranina aba ekara'au. Pokina Hamaka hanona ua tekutiai aihona haukia nenuatae ainakia.

<sup>24</sup> Tirama hanona Auba, ua buonai tekuti aina haukia hanona aubai mai aokia maikoinai katekuti aina.” <sup>25</sup> Babi'e e'abi etibaha, “Au a'iobina Mesia bamauri hauna atana Keriso kemai, ia kemai raninai taba ikoikiai kehina pou harai herekai.” <sup>26</sup> Ba Iesu ia ehina bena etibaha, “Hauna mo au neia'u bariu nahina beni'o.”

<sup>27</sup> Rani weianai ia i'abana haukia temue temai hanona teta'uta'u huri, pokina Iesu teihana babi'e ha ohi ti'abi'abi. ‘A tai ha a'i ebakaina, “Taba nonuatae aina?” ‘ao “Aehoma buonai torarua tu'abi'abi?” <sup>28</sup> Ba babi'e ena puou ehabona emue noanoa eao aiarai maearima ehina benakia etibaha, <sup>29</sup> “Tomai hamaeo hau ha tomoihana e'u babai 'uainai ababai haukia ikoikiai ehina pou, iamo taina Keriso mo pa'e weiana?” <sup>30</sup> Ba maearima aiarai tekarahi Iesu herena teao.

<sup>31</sup> Weiana aonai i'abana haukia Iesu tenoina tetibaha, “Ba'iobi haumu e, aniani ha moana.”

<sup>32</sup> ‘A ia ehina benakia etibaha, “Au mai e'u aniani kani weiana hanona wai a'i to'ioquina.” <sup>33</sup> Ba i'abana haukia kipokia te'abi'abi tetibaha, “Pa'e maearima ha aniani emaiaina ebena.” <sup>34</sup> Iesu ehina benakia etibaha, “E'u aniani hanona euhuna'u hauna ena nuatae kababaina abomo ia ebena'u akana kabaorena.

<sup>35</sup> Wai tu'abi ‘nawa bani temiaho ba ariari ranina ketaina.’ Ia au nahina benimi, mahami tomobano'a uma tomoiha harainakia, aniani aba te'oru katearinakia. <sup>36</sup> Ariari hauna 'arana nia'ina ba uma anianina nibararona mauri bananaibai 'ekanai, weiana buonai ibatona hauna mai iarina hauna terarua kateaonamo haeamo. <sup>37</sup> Tehinana 'abina hanona 'abi tohana, ‘Nibato bato hauna haeai ia niariari hauna abomo haeai.’ <sup>38</sup> Au nauhunimi a'i toaro'ari aina umanai aniani katoarina. Baika uma weianai aro'arina aba tebabaina ba wai tuhore ekia aro'ari anianina tua'ina.”

<sup>39</sup> Aiara weiana aonai Samaria haukia bo'ona Iesu tea'ikakaumana pokina babi'e ena batoha 'abina paunai, babi'e etibaha, “Ia ehore e'u babai ikoikiai ehina pounakia.” <sup>40</sup> Ua buonai Samaria maearimakia temai herena, ia tenoina kipokia katemiaho, ba Iesu wapu rua weia emiaho. <sup>41</sup> Weiana ena 'abi aiana teona aonai bo'ona haeamona tea'ikakaumana. <sup>42</sup> Maearima weiakia babi'e tehina bena tetibaha, “Ai bariu ta'ikakaumana hanona oi o'abi hauna paunai aha'i, ia ai bariu kipomai haiamai taona abomo ai ta'ioquina hau neiana 'abi tohana hanopaka ibamaurina hauna.”

### *Iesu Kabamani Hauna Apa'uana Nahuna Ebamaurina.*

<sup>43</sup> Wapu ibaruana eore murinai Iesu emikiri Galilea eao. <sup>44</sup> Iesu kipona e'abi etibaha, “Mahabanai hauna ena aiara tohana haukia hanona a'i katemariki aina.”

<sup>45</sup> Iesu Galileai ekara'au raninai, Galilea haukia tea'i taeana, pokina ia abomo teao Ierusalemai weia Kabanai tatuna aonai taba ebabai mahakiai teihanakia paunai.

<sup>46</sup> Iesu haeamona emue eao Galilea Kana aiarana ua'a bei ea'i banaina bine beinai eao. Weia Kaperanauma aonai obia 'arana hauna ena maearima ha nahuna hauna papana einawa.

<sup>47</sup> Hau weiana Iesu Iudeai emai Galileai pouna eona raninai, ia eao Iesu herena enoina keao nahuna kebamaurina pokina ia aba ke'ari. <sup>48</sup> Iesu ehina bena etibaha, “Wai hoa mai bata'u ta'u huri hoakia a'i katoiaha hanona a'i katoa'ikakauma 'apua.”

<sup>49</sup> Obia hauna e'abi etibaha, “Hau apa'uana e, hamariri hamaeo nahau'u hanona aba ke'ari.” <sup>50</sup> Iesu ia ehina bena etibaha, “Moao, nahumu hanona aba kemauri.” Obia hauna Iesu ena 'abi ebato-hana eka'a.

<sup>51</sup> Ia taeara weiana nião aonai ena ta'ara'i haukia temai taearai tebaitabu ahi, nahuna emauri

hauna pouna tehinana. <sup>52</sup> Ia ebakai bakai beraura hoana tabanai nahuna emauri mauri, ba ia tetibaha, "Warani rabirabi beraura hoana hamona hanona emauri mauri." <sup>53</sup> Hamana eraona tinana beraura hoana weianai hanona Iesu ia ehina beraura etibaha, "Nahumu hanona aba kemauri." Ua buonai ia mai ena itu haukia ikoikiai hanona tea'ikakauma. <sup>54</sup> Neiana hanona Iesu bata'uta'u huri hoana ibaruana ebabaina weia Iuda ehabona emai Galilea aonai.

## 5

### *Iesu Hau Ha Ebamaurina Bete-saida Obu Haianai.*

<sup>1</sup> Rani baika teao murinai Iuda haukia ekia tatu ha erama ba Iesu ekara'au eao Ierusalema. <sup>2</sup> Weia Ierusalema ai pa'abi ha atana 'Mamoe pa'abina' herenai obu papanha Heberu maeakiai atana teaparina 'Bettesaida', ba haianai hanona arai paraboakia ima temia kaiaronia. <sup>3</sup> Eka weiakiai inawa haukia bo'ona tenoti, maha ki'a haukia, 'ome haukia, mero haukia, (tibai'ima bei kebure bure. <sup>4</sup> Pokina rani ha ha aneru neriri obu beina nibabure burena, murnai inawa hauna ha obuai keriri 'uai hauna ena inawa taba ia niamo.)

<sup>5</sup> Inawa hauna ha 'eka weianai ena inawa ihauna ikoinai harau aihau 'ababani. <sup>6</sup> Iesu ehore inawa hauna weiana enoti eihana raninai e'lobina ia hanona rani homa'ana ua enoti aihau, ba Iesu ia ebakaina etibaha, "Oi nonuatae konamo, u?"

<sup>7</sup> Inawa hauna Iesu ena 'abi ebamuena etibaha, "Hau apa'uana e, bei nebure bure aonai au kebaraina'u hauna ha aha'i buonai au nabahobona kariri aonai hau ha abu ne'uai waira'uai." <sup>8</sup> Ba Iesu ia ehina beraura etibaha, "Momikiri, emu 'ire mouna moa'ina moka'a." <sup>9</sup> Beronai hau weiana emauri mauri, ba emikiri ena 'ire eouna ea'ina eka'a.

Weiana hanona beraura robe-nai hoa neiana erama. <sup>10</sup> Ua

buonai Iuda haukia apa'uakia hau weiana inawa ai enamo hauna tehina beraura robena, ia oi emu 'ire obuana hanona eka rauhubu nukabena." <sup>11</sup> Ia ekia 'abi ebamuena etibaha, "Ebamaurina'u hauna ehina beraura etibaha, 'Emu 'ire moa'ina moka'a.'" <sup>12</sup> Ba ia tebakaina tetibaha, "Hau tabana oi ehina beni'o, 'Emu 'ire moa'ina moka'a.'" <sup>13</sup> Emauri mauri hauna a'i e'lobina tai ia ebamaurina pokina Iesu abamo mako aokiae ehe toto eka'a 'akaumana.

<sup>14</sup> Muriai marea robe aonai Iesu hau weiana etabu ahina ehina beraura etibaha, "Aia'u mona, oi hanona aba omauri mauri, a'i koaka ki'a mue, taba ki'a obona ha heremuai a'i merama mue marikina." <sup>15</sup> Ba hau weiana eao Iuda haukia apa'uakia herekia ehina benakia ia ebamaurina hauna hanona Iesu.

### *Tirama Nahuna Ena Hiabu.*

<sup>16</sup> Ua buonai Iuda haukia apa'uakia hanona Iesu te'oatana pokina ia taba ikoikiai beraura robena aonai nibabainakia pau-nai. <sup>17</sup> Ia Iesu ehina benakia etibaha, "Au Hama'u hanona rani ikoinali niaka to'ona emai mo bariu beraura neiana. Au abo'umo naka." <sup>18</sup> 'Abi neiana paunai Iuda haukia apa'uakia hanona tenuatae ki'a baha Iesu kateahu 'arina. Beraura robe rauhubuna nikabena paunai mo aha'i ia Tirama niaparina hamana tohana na nihoma abomo ia kipona Tirama ohi nibaihobonakia.

<sup>19</sup> Weiana buonai Iesu ekia 'abi na ebamuene aihona, "Abi tohana au wai nahina benimi. Nahuna kipona 'eunai taba ha kebabaina hanona a'i ketaina. Ia hanona Hamana nibabai akakia eihananakia weiakia mo kebabainakia. Hamana nibabai haukia Nahuna abomo nibabai. <sup>20</sup> Pokina Hamana nihore Nahuna niraona'au aina paunai nibabai haukia ikoinai nibaihana. 'E, neiakia mo aha'i taba rarikia baika abomo kebaihana, ba

katoihana hanona katota'uta'u huri.<sup>21</sup> Weiana Hamana nihore 'ari haukia nibamikiri mue-nakia mauri nibenakia ihobonai mo Nahuna nihore nenuatae ainakia haukia mauri nibenakia.<sup>22</sup> Haeamona Hamana kipona tai ha a'i nibabakaina, bakai ena hi-abu maikoina aba Nahuna ebena.<sup>23</sup> Hamana timariki aina ihobonai ikoikiai Nahuna katemariki aina, Nahuna a'i nimariki aina hauna hanona Hamana weiana Nahuna euhuna hauna abomo a'i nimariki aina.

<sup>24</sup> "Abi tohana au wai nahina benimi, aia'u niona hauna mai eu-huna'u Tiramana nia'ikakaumana hauna hanona mauri banaibanoi aba ea'ina puma a'i kehoaina. Ia hanona 'ari aba ehabona ba aba mauri aonai etoto.

<sup>25</sup> "Abi tohana au wai nahina benimi, 'ari haukia Tiramana Nahuna aiana kateona ranina hanona aba nimai, weiakia aiana tiona haukia ikoikiai hanona katemauri mue, bariu ranina aba ekara'au.<sup>26</sup> Hamana hanona mauri pokī hauna, ihobonai ia ehore Nahuna mauri pokinai ebaona.<sup>27</sup> Tiramana ehore Nahuna bakai apa'uana ke'uai aina hiabuna aba ebena pokina ia hanona Keriso Maeearima Nahuna paunai.<sup>28</sup> E'u 'abi neiana paunai a'i katota'uta'u huri. Ranina aba nimai weiakia 'ariahakiai temiaho haukia ikoikiai Nahuna aiana kateona,<sup>29</sup> ekia 'ariahakiai katekarahi. Weiakia namo tebabai haukia katemikiri mauri banaibanoi katea'ina, ba weiakia ki'a tebabai haukia katemikiri puma katehoaina.

<sup>30</sup> "Au kipo'u eu'uai taba ha kababaina hanona a'i ketaina. Au aia naona hauna mo ihobonai nabakai, ua buonai e'u bakai hanona ebero, pokina au kipo'u e'u namo a'i natabuna, ia euhuna'u hauna ena nuatae natabuna.

### *Iesu Poua Tehinana Haukia Baika.*

<sup>31</sup> "Au kipo'u pou'u kahinana raninai, e'u pou hina hanona

a'i katebatohana.<sup>32</sup> Weiana au pau'uai pou'u nehinana hauna hanona haeai, ba au a'iobina ia nehinana 'abina hanona tohana.

<sup>33</sup> "Wai aba tobaijuhu Ioane herena ba ia ehore 'abi tohana poua ehinana.<sup>34</sup> Au pou'u berona hanona maearima herekiai a'i ni-mai, ia au Ioane ena batoha 'abina na'uhina hanona wai bamauri katotabu ahina paunai.<sup>35</sup> Ioane hanona e'ara ea nibaiben matoha lamepa 'abana, ia wai hanona rani papana ena ea toaonamo aina.

<sup>36</sup> "Au mai ibatoha'u hoana ha hanona Ioane 'euna etara haona. Nababai akakia neiakia Hama'u ebena'u kababai orenakia haukia tihere Hama'u euhuna'u poua tehinana.<sup>37</sup> Ba Hama'u euhuna'u hauna Ia kipona ehore au pou'u ehinana. Ia wai rani ha aiana a'i to'o 'apuana abomo wairana a'i toihana,<sup>38</sup> 'ao ena 'abi abomo aomiai a'i nemiaho, pokina ia euhuna hauna wai a'i tua'ikakaumana paunai.

<sup>39</sup> "Wai Puka robena tumarerai haraina pokina wai turao-nana weiana herenai mauri ba-naibanoi katotabu ahina paunai. Ia Puka robena neiana hanona au mo pou'u nehinana.<sup>40</sup> Wai katomai here'u mauri katoa'ina, iamo toubo aina.

<sup>41</sup> "Au hanona maearima ekia banamo a'i na'i taeanakia.<sup>42</sup> Au a'iobi harainimi, aomiai Tiramana iraona'au aina a'i nemiaho.<sup>43</sup> Au aba Hama'u atanai amai, ia wai au a'i tua'i taeana'u. Ia hau ha kipona atanai pemai raninai wai aba patoa'i taeana.<sup>44</sup> Wai kipomi emi banamo ha ha baiatamiai tutabunakia, iamo Tiramana ena banamo weiana ia ikupaina herenai nimai hauna a'i tutabu ahina, ua homana raninai aea katoa'ikakauma aihona'u?

<sup>45</sup> "Ia aomiai a'i katoraonana au Hama'u wairanai kababehon-im. Aha'i. Wai kebabehonimi hauna hanona Moše ia ahana wai emi buaben'i ekori.<sup>46</sup> Wai Mose tua'ikakauma tohana raninai au

abomo kato a'ikakaumana'u, pokina ia hanona au pou'u ererena.<sup>47</sup> Ia ererena hauna a'i mo tua'ikakaumana raninai au e'u 'abi hanona aea katoa'ikakauma aihona?"

## 6

*Iesu Taha Ima (5,000) Ebaniananakia.*

(Mt 14.13-21; Mk 6.30-44; Lk 9.10-17)

<sup>1</sup> Rani baika teao murinai Iesu ekabanai eao Galilea 'obu abiranai. (Weiana atana haeai hanona Tiberia 'obuna.) <sup>2</sup> Iesu inawa haukia ebanamonakia, bata'uta'u huri hoakia weiakia teiha paunai mako rarina ia murinai tera'a teao. <sup>3</sup> Ba Iesu oeoai ekara'au eao i'abana haukia kipokia temiati. <sup>4</sup> Iuda haukia ekia Kabanai tatuna hanona aba ekaibari. <sup>5</sup> Iesu mahana eao mako rarina timai herena eihanakia raninai, Pilipo ebakaina etibaha, "Aniani ae'eai kaha kawanakia maearima neiakia kateani?" <sup>6</sup> Ia kebabaina hanona aba eraonana, iamoa Pilipo kehobona paunai ua ebakai bakai aiho.

<sup>7</sup> Pilipo ia ena 'abi ebamuena etibaha, "Moni bo'ona 'akinal\*" aniani pahakawanakia abomo a'i petaina, papakia 'akimo pateani."

<sup>8</sup> I'abana haukia ha atana Anderea, Simona Petero hatina etae etibaha, <sup>9</sup> "Miori papana ha neia ena parawa papakia ima mai ena maia papakia rua. Ia weiana hanona aeamo kaha homanakia pokina maearima hanona ebo'o ki'a baha?" <sup>10</sup> Iesu i'abana haukia ehina benakia etibaha, "Maearima tomoba miatinakia." 'Eka weiana hanona panapana 'ekana, maearima ikoikiai temiati hau 'abaeana ikoinai taha ima (5,000).

<sup>11</sup> Iesu parawa ea'inakia Tirama ebanamona ba ebenakia weiakia temiati haukia teani eaomo ekia nuataes etaina, ba maia abomo ihobonai ebabaina. <sup>12</sup> Weiana

ikoikiai teani 'ari aonai Iesu i'abana haukia ehina benakia etibaha, "Harikia ikoikiai katabararonakia ha papana a'i katababona."<sup>13</sup> Ua buonai parawa ima teani 'ari harikia weiakia tebararonakia areha harau haea ru tebabonunakia.

<sup>14</sup> Iesu bata'uta'u huri hoana weiana ebabaina teihana murinai maearima te'abi tetibaha, "Abi tohana, mahabanai hauna kemai hanopakai hauna hanona neiana."

<sup>15</sup> Iesu e'ioquina ia ekia taburai katea'i taeana ekia obia 'aranai haunai katebaona, ua buonai ia kipona haeamona ekaobo oeoi ekara'au.

*Iesu Bei Ahanai Eka'a.*  
(Mt 14.22-33; Mk 6.45-52)

<sup>16</sup> Erabirabi raninai i'abana haukia teriri teao weia obuai,<sup>17</sup> ahiai tehe'au tebeau banai Kaperanauma tiao hanona aba ewapura abuna, Iesu hanona ia baiatakiai aha'i.<sup>18</sup> Baura apa'uana eabu'au roio ebuataea ehurehure ki'a.<sup>19</sup> Ia tepara homa'ana matoha maela aihau 'ao bani 'abana aonai Iesu bei kapenai eka'a herekia eao, teihana raninai teta'u ki'a.<sup>20</sup> Iesu ehina benakia etibaha, "Nahuna au. A'i tomota'u."<sup>21</sup> Ia aokia mai namokia ahiai tebaehe'auna, beronai mo tenuatae aina poenai tebahaha'au.

*Maearima Iesu Tetabuna.*

<sup>22</sup> Erani mako weia 'obu abiranai temiaho haukia te'ioquina ahia hamona mo ua'a Iesu hanona i'abana haukia baiatakiai a'i ehe'au i'abana haukia ikupaiakia mo tebeau ahi teka'a.<sup>23</sup> Ba ahi baika Tiberia ai temai Obiapaka parawa ebanamona ebaiben'i maearima ebenakia teani 'ekana herenai tebahoa.<sup>24</sup> Weiana mako te'ioquina Iesu mai i'abana haukia kipokia wairakia aha'i, ba ahi weiakiai tehe'au Kaperanauma Iesu itabuna teao.

*Iesu Hanona Mauri Parawana.*  
<sup>25</sup> Ia 'obu abiranai ua'a Iesu tetabu ahina raninai tebakaina

\* 6:7: (7) Helene moninai Denari hinabu rua

tetibaha, "Ba'iobi haumu e, oi hanona aita mo okabanai omai neia?"<sup>26</sup> Iesu ekia 'abi ebamuena etibaha, "Abi tohana au wai nahina benimi, wai au tutabuna'u hanona bata'uta'u huri hoana toihanakia paunai aha'i ia parawa toani nuami tebonu paunai.<sup>27</sup> Aniani weiana keki'a hauna akanai a'i katoaro'ari ia aniani weiana kemiaho keao mauri banaibanoi akanai katoaro'ari, weiana au Maearima Nahuna kabeni. Hamaka Tirama hanona hiabu weiana ebena'u."

<sup>28</sup> Ba ia tebakaina tetibaha, "Ai Tirama ena aka tabana katababaina?"<sup>29</sup> Iesu ekia 'abi ebamuena etibaha, "Tirama ena aka hanona neiana. Euhuna hauna hamona mo kato a'ikakaumana."

<sup>30</sup> Ua buonai ia tebakaina tetibaha, "Bata'uta'u huri hoana tabana kobabaina kataihana ba kata a'ikakaumani'o?" Tabana hauna kobabaina?<sup>31</sup> Aika 'aba'abaka hano'akunai mana teana, Puka robenai tererena ihibona, 'Kupai emai parawana hauna Mose ebenakia teana.'<sup>32</sup> Iesu ehina benakia etibaha, "Abi tohana au wai nahina benimi, kupa parawana ebenimi hauna Mose aha'i, ia au Hama'u eshore kupa parawana tohana wai ebenimi.<sup>33</sup> Tirama ena parawa hanona neiana, ia kupai eriri emai hauna hanopakai mauri nibaiben'i."<sup>34</sup> Ia tehina bena tetibaha, "Obiapaka e, aniani neiana hanona rani ikoinali kobenamai."<sup>35</sup> Ba Iesu ia ehina benakia etibaha, "Au hanona mauri anianina, here'u kemai hauna hanona mare'a a'i ke'ari 'apua, abomo kea'ikakaumana'u hauna hanona 'akona a'i ke'ororo 'apua.

<sup>36</sup> Ia au aba ahina benimi, wai aba toihana'u jamo a'i tua'ikakaumana'u.<sup>37</sup> Hama'u nibena'u haukia ikoikiai hanona katemai here'u, ba nimai here'u hauna hanona a'i kau'u ahi 'apua.<sup>38</sup> Pokina au kupai ariri amai hanona kipo'u e'u nuataeai

a'i kababaina, ia euhuna'u hauna ena nuataeai akana kababaina.<sup>39</sup> Ba euhuna'u Tiramana ena nuatae hanona neiana, weiakia ebena'u haukia ikoikiai ha a'i kaba'akaumana, ia rani orenai kabamikiri muenakia.<sup>40</sup> 'Abi tohana au Hama'u ena nuatae hanona neiana, Nahuna kateihana mai kate a'ikakaumana haukia ikoikiai hanona mauri banaibanoi katea'ina, ba rani orenai hanona kabamikiri muenakia."

<sup>41</sup> 'Abi neiana paunai Iuda haukia ia teururu aina, pokina ia e'abi, "Au hanona mauri anianina kupai ariri amai."<sup>42</sup> Ba ia te'abi tetibaha, "Iesu neiana hanona Iosepa nahuna, hamana mai hinana naha'iobinakia. Ia bariu aehoma buonai na ni'abi aiho, 'Au kupai ariri amai.'"

<sup>43</sup> Iesu ekia 'abi ebamuena etibaha, "Kipomi baiatamiae ururu naiana tomobapuana.

<sup>44</sup> Hau ha ena nuataeai here'u a'i kemai 'abaea ia Hama'u euhuna'u hauna kebaka'anakia haukia katemai here'u, ba au rani orenai kabamikiri muenakia.

<sup>45</sup> Mahabanai haukia Puka robenai aba tererena, 'Ikoikiai hanona Tirama aba keba'iobinakia.' Hama'u tibahuaina abomo herenai 'obi tia'ina haukia ikoikia timai here'u.

<sup>46</sup> Hau ha Hamaka a'i eiha 'apuana, ia Tirama herenai emai hauna ikupaihana mo Hamaka eihana.<sup>47</sup> 'Abi tohana au wai nahina benimi. Tia'ikakaumana'u haukia hanona mauri banaibanoi tea'ina.<sup>48</sup> Mauri anianina hanona Au neia'u.<sup>49</sup> Wai 'aba'abami hano'akunai mana teana, iamo ikoikiai te'ari,<sup>50</sup> Ia hau ha aniani neiana kupai eriri emai hauna keana hanona a'i ke'ari.<sup>51</sup> Au hanona aniani maurina weiana, kupai ariri amai. Hau ha aniani neiana keana hanona kema'uri banaibanoi. Aniani neiana au kabaiben'i hauna hanona au bitio'u, weianai hanopaka haukia mauri katea'ina."

<sup>52</sup> Weiana Iuda haukia kipokia baiatakiai tebahirara tae te'abi

tetibaha, "Hau neiana bitiona aea kebeni aihonaka kahana?"

<sup>53</sup> Iesu ehina benakia etibaha, "Abi tohana au wai nahina benimi. Wai au Maearima Nahuna bitio'u a'i katoana mai aruaru'u a'i katoinu raninai wai aomiai mauri a'i kemiaho. <sup>54</sup> Au bitio'u niana mai aruaru'u neinu hauna hanona mauri banaibananai aba nia'ina abomo rani orenai hanona kabamauri muena. <sup>55</sup> Pokina au bitio'u hanona aniani tohana abomo aruaru'u hanona inuinu beina tohana. <sup>56</sup> Au bitio'u niana mai aruaru'u neinu hauna hanona ia ao'uai nemiaho au abomo ia aonai namiaho. <sup>57</sup> Hama'u ni-mauri hauna ehore euhuna'u, au hanona Hama'u paunai namauri ihibonai mo au hau'u keana hauna hanona au pau'uai kemauri. <sup>58</sup> Au aniani neia'u hanona kupai ariri amai. 'Aba'abami mana teana 'abana aha'i, teani iamo te'ari, ia hau ha aniani neia'u keanina'u hauna hanona kemauri banaibananai." <sup>59</sup> Iesu Kaperanaumai weia eba'iobi raninai 'abi neiana ehiñana Iuda haukia ekia marea aonai.

### *Mauri Banaibananai 'Abikia.*

<sup>60</sup> Aiana teona murinai ti'abana haukia bo'ona te'abi tetibaha, "Abi neiana hanona epahihi, tai kehore 'abi neiana kea'i taeana?" <sup>61</sup> Iesu aba e'iorina ti'abana haukia 'abi weiana teururu aina ba ehina benakia etibaha, "Abi neiana aomi nibaro'arina, u? <sup>62</sup> Au Maearima Nahuna pakara'au amiaho 'uai 'ekana paeao patoihana'u raninai aea patohoma? <sup>63</sup> Auba Robe hanona mauri nibaiben'i, 'a hauani hanona taba ha a'i nibaramana. Ahina benimi 'abikia neiakia hanona auba 'abikia mai mauri 'abikia. <sup>64</sup> Ia baiatamai baika hanona a'i tua'ikakauma." Popounai Iesu aba e'iorina baiatakiai tai a'i tia'ikakauma mai tai ia hinahinana kehinahinaina. <sup>65</sup> Ia haeamona ehina benakia etibaha, "Ua buonai aba ahina benimi atibaha, 'Hama'u maearima a'i kemaiaina raninai hau ha kemai here'u taearana aha'i."

<sup>66</sup> Iesu ena 'abi weiana buonai te'abana haukia bo'okia tehabona Iesu murinai a'i teka'a mue. <sup>67</sup> Ba Iesu i'abana haukia harau haea rua ebakainakia etibaha, "Wai abomo tonuatae katohabona'u, u?" <sup>68</sup> Simona Petero ehore ehina bena etibaha, "Obiapaka e, ai tai herena kataeo? 'Abi weiana mauri nimaiaina hauna hanona oi heremua nemiaho. <sup>69</sup> Ai aba ta'ikakauma mai ta'iobina oi hanona robe haumu tohamu Tirama herenai omai."

<sup>70</sup> Ba Iesu ehina benakia etibaha, "Wai harau haea rua atina'animi. Ia 'abami hamona hanona tiaporo." <sup>71</sup> Ia e'uahina hauna hanona Iuda Isakariote hauna Simona nahuna, ia i'abana haukia harau haea rua ha Iesu hinahinana kehinahina hauna.

## 7

### *Iesu Uaho'abana Ia A'i Tea'ikakaumana.*

<sup>1</sup> Weiakia murikiai Iesu Galilea aonai ekaoao kaoao, ia a'i enuatae keao Iudea pokina Iuda haukia apa'uakia hanona te'imana kateahu 'arina. <sup>2</sup> Weiana Iuda haukia ekia l'aua tatuna ranina ekaibari. <sup>3</sup> Iesu hatina tehore tehina bena tetibaha, "Eka neiana kohabona koao Iudea ba weia bata'uta'u huri hoakia kobabai ti'abani'o haukia kate ihanakia. <sup>4</sup> Pokina hau ha kipona ibawaira tinana nenuatae aina raninai taba ha buniakiai a'i nibabai, neiakia aba nubabainakia buonai moba karahini'o hanopaka wairakiai teme'iobin'i'o." <sup>5</sup> Ua te'abi aiho pokina hatina abokiamo a'i tea'ikakaumana. <sup>6</sup> Ba Iesu ehina benakia etibaha, "E'u rani tohana hanona a'i nimai baha. Ia wai heremiai hanona rani mo 'akina ikoikiai tetai. <sup>7</sup> Hanopaka hanona a'i ke'oatanimi ia au ni'oatana'u, pokina au ia pouna nahinana weiana ia nibabaina hauna hanona eki'a. <sup>8</sup> Wai tomoao tatu 'ekana, au hanona a'i kawahii tatu 'ekana naiana pokina e'u rani tohana hanona a'i nitai bahana."

<sup>9</sup>Ia 'abi neiana ehinana ba Galileai emiaho.

*Iesu Eao Ierusalema I'aua Tatuna Aonai.*

<sup>10</sup>Hatina tatu 'ekana teao murikiai ia abomo tatu 'ekana eao bunianai mo to'u wairakiai aha'i. <sup>11</sup>Ba tatu weiana aonai Iuda haukia apa'uakia hanona Iesu titabuna tibakai bakaiaina, "Hauna weiana hanona ae'e?" <sup>12</sup>Weia to'u aonai hanona tebateteaina, baika te'abi, "Ia hanona hau namona." Ia baika te'abi, "Aha'i, ia hanona maearima ne'uaiai behonakia." <sup>13</sup>Ia Iuda haukia apa'uakia teta'utu ainakia paunai, hau ha to'u wairakiai ia 'abina a'i ehina 'apuana.

<sup>14</sup>Weia tatu ranina ibuanai Iesu ekara'au marea robeai eba'iobi ramanakia. <sup>15</sup>Ba Iuda haukia apa'uakia teta'utu'huri te'abi tetibaha, "Hau neiana marere 'ekana ha a'i eao, ia marere mahakia aea e'iobi aihonakia?" <sup>16</sup>Iesu ekia 'abi ebamuena etibaha, "E'u ba'iobi 'abikia hanona au kipo'u 'eu'u aha'i, ia euhuna'u Tirama herenai timai. <sup>17</sup>Hau ha Tirama ena nuatae akana kebabaina raninai ia aba ke'ioina, au e'u ba'iobi hanona Tirama herenai nimai 'ao au kipo'u e'u 'abi. <sup>18</sup>Hau ha kipona 'euna nehinana hauna hanona kipona ena namo nitabuna 'a euhuna hauna ena namo nitabuna hauna hanona ebero, ia aonai beho aha'i.

<sup>19</sup>Mose rauhubu aba ebenimi, aonai ha hamomomu rauhubu neiana a'i to'inibena. Taba buonai katoahu 'arina'u taearana tutabuna?" <sup>20</sup>To'u haukia ena 'abi tebamuena tetibaha, "Oi hanona nubeau 'ari, tai nenuatae keahu 'arini'o?" <sup>21</sup>Iesu ehina benakia etibaha, "Au beraura robenai bata'utu'huri hoana hamona ababaina, ba wai ikoinai tota'utu'huri. <sup>22</sup>Mose itare akana wai ebenimi buonai wai miori papakia beraura robenai itare tubenakia. (Itare akana hanona Mose herenai a'i emai, ia wai kupumi 'aba'abami herekiai emai.) <sup>23</sup>Bariu miori

beraura robe aonai tutarenakia hanona Mose ena rauhubu a'i tomokabena marikina. Taba buonai beraura robe aonai hau ha hauna maikoinai abanamona hanona tuopuere aina'u?" <sup>24</sup>Taba ihakiai a'i katobaihobo, ia taba ekia bero tohakiai katobaihobo."

*Ia Hanona Keriso 'Ao?*

<sup>25</sup>Rani weianai Ierusalema maearimakia baika tebakai bakai tetibaha, "titabuna kateahu 'arina hauna hanona neiana 'ao?" <sup>26</sup>Hauna mo naiana to'u wairakiai neiroro ba 'abi ha ia herenai a'i tehina 'apuana, hau apa'uakia pa'e aba teraona haraina ia hanona Keriso 'ao?" <sup>27</sup>Keriso kemai raninai ena mai 'ekana tai ha a'i ke'ioina, ia hau neiana ena mai 'ekana aika naha'ioina."

<sup>28</sup>Ba Iesu marea robe ai niba'iobi aonai eio etibaha, "Wai au to'ioina'u, ae'eai amai abomo to'ioina. Au kipo'u e'u nuatae ai a'i amai Tirama euhuna'u ba amai, ia hanona 'abi tohana. Wai ia a'i to'ioina. <sup>29</sup>'A au hanona ia na'ioina pokina au ia herenai amai abomo Ia au euhuna'u."

<sup>30</sup>'Abi neiana teona aonai ia katebirina hanona teraonana 'a hau ha ia ahanai a'i ehao'au pokina ena rani a'i nitai bahana. <sup>31</sup>To'u aonai maearima bo'ona ia tea'ikakaumana ba te'abi tetibaha, "Keriso kemai raninai, bata'utu'huri hoakia bo'okia kebabai ba hau neiana? Pa'e aha'i."

*Baika Tenuatae Iesu Katebirina.*

<sup>32</sup>Parisea haukia mako Iesu tebatete aina 'uruna teona ba robe haukia apa'uakia mai Parisea haukia tehore marea robe te'imana haukia teuhunakia Iesu katebirina. <sup>33</sup>Ba Iesu e'abi etibaha, "Au bariu rani papana wai heremai kamiaho ba kamue kaeao euhuna'u hauna herena. <sup>34</sup>Weiana wai katotabuna'u iamo a'i katotabu ahina'u. Au kamiaho 'ekana wai katoao hanona a'i ketaina." <sup>35</sup>Ba Iuda haukia apa'uakia kipokia baiatakiai te'abi'abi tetibaha, "Hau neiana hanona aeana keao, ba ni'abi aika ia a'i kahatabu ahina? Weia Iuda

haukia terama otaraina Helene haukia baiatakiai temiaho haukia herekiai keao ba Helene haukia keba'iobinakia, 'ao? <sup>36</sup> Ena 'abi 'Wai hanona katotabuna'u iamo a'i katotabu ahina'u.' abomo 'Kamiaho 'ekana katoao hanona a'i ketaina.' weiana anina hanona taba?"

*Mauri Kebaibenit Beina.*

<sup>37</sup> Tatū ranina orenai rani apa'uanai Iesu ekoroti e'abi etibaha, "Akona ni'ororo hauna emai here'u bei keinu. <sup>38</sup> Puka robenai tererena 'abana, 'Au nia'ikakaumana'u hauna hanona ia aonai mauri beina keharu ate 'abana.' <sup>39</sup> Neiana hanona Auba Robe 'abina ehinana ia weiakia tea'ikakaumana haukia muriae kebenakia, pokina Iesu ena nuabi a'i nia'i bahana buonai Auba Robe hanona a'i nibaibeni baha.

*Maearima Baiatakia Epa'a.*

<sup>40</sup> Iesu ena 'abi neiakia urukia teo'o raninai maearima baika te'abi tetibaha, "Abi tohana hau neiana hanona mahabanai hauna." <sup>41</sup> Baika te'abi tetibaha, "Ia hanona Keriso." 'a baika tebakai bakai tetibaha, "Ia aea homanai Keriso hanona Galileai kemai? <sup>42</sup> Puka robenai na a'i e'abi aiho? Keriso hanona Davida nininai kerama Davida emiaho aiarana Betelehema aonai." <sup>43</sup> Ua buonai maearima baiatakia epa'a Iesu paunai. <sup>44</sup> Baiatakiai baika tenuatae katebirina, ia mo hau ha imana ia haunai a'i ehao'au.

*Iuda Poki Haukia Iesu A'i Tea'ikakaumana.*

<sup>45</sup> Murinai marea robe te'imana haukia weiakia temue teao robe haukia apa'uakia mai Parisea haukia herekia, ba ia tehore tebakainakia tetibaha, "Aehoma buonai a'i tobaka'ana a'i toma-iaina?" <sup>46</sup> 'Ima'ima haukia ekia 'abi tebamuena tetibaha, "Ua raninai emai mo bariu hau ha ua a'i ni'abi aiho 'apua hau neiana ni'abi 'abana." <sup>47</sup> Ba Parisea haukia te'abi pahili tetibaha, "Wai abomimo aba ebaka'a behonimi, uhe? <sup>48</sup> Wai turaonana hau

apa'uakia 'ao Parisea haukia ha ia nia'ikakaumana? Aha'i. <sup>49</sup> To'u haukia weiakia Mose ena rauhubu a'i te'ioquina haukia hanona Tirama ena puma katehoaina."

<sup>50</sup> Ia 'abakia ha Nikodemo, rani ha eao Iesu herena hauna, ehore ehina benakia etibaha, <sup>51</sup> "Aika eka rauhubu tainai hau ha puma a'i kahaben 'abaeania, ia aiana kahao'o 'uaina, ia taba ebabaina hauna kaha'iobi 'uaina." <sup>52</sup> Ia tehina bena tetibaha, "Oi abomo Galileai omai, u? Puka robena koraona haraina mahabanai hauna hanona Galileai a'i kemai." <sup>53</sup> [Ba maearima ikoikiai temue ikau ena itu teao.

## 8

*Enabau Ki'a Aonai Tetabu Ahina Bab'i'ena.*

<sup>1</sup> 'A Iesu hanona Olibe oeona eao. <sup>2</sup> Erani raurani 'amarinai Iesu haeamona eao marea robe aonai maearima ikoinai ia herena teao tefo'una, ba ia emiati eba'iobinakia. <sup>3</sup> Rauhubu poki haukia mai Parisea haukia babi'e ha enabau ki'a aonai tetabu ahina temaiaina. To'u wairakiai tebakorotina, <sup>4</sup> ba Iesu tehina bena tetibaha, "Ba'iobi haumu e, babi'e neiana hanona ninabau ki'a aonai tatabu ahina. <sup>5</sup> Ba Mose ena rauhubu aonai na chinabe ai-honaka, babi'e nahomakia hanona piharai kahahu 'arinakia. Ia bariu oi hanona taba na nuhoma?" <sup>6</sup> Bakaibakai neiana teaoaina ia herenai hanona weianai patebarewana Iesu behoai patehorotina. Ia Iesu hanona ehiriti imana kiri'unai 'anoai erererere.

<sup>7</sup> Ia tehore tebakai hao bakai haona, ba emikiri ehina benakia etibaha, "Hau ha baiatamiai emu ki'a aha'i haumu, piha mokapo 'uaina babi'e neiana moahuna." <sup>8</sup> Haeamona ehiriti 'anoai erere rere mue. <sup>9</sup> Ba 'abi neiana teona haukia hanona kipokia ekia ki'a teraonanakia ba hamohamo tekaobo kironqai ea'i ramana eaomo 'aru'arunai epua,

Iesu ikupaiana tehabona babi'e ia herenai ekoroti.

<sup>10</sup> Iesu emikiri tai ha a'i eihana babi'e mo weia, ba ebakaina etibaha, "Babi'e e, maearima neiakia ae'e? Tai ha puma a'i ebeni'o?" <sup>11</sup> Babi'e e'abi etibaha, "Obiapaka e, tai ha aha'i." Iesu ia ehina bena etibaha, "Au abo'umo oi puma ha a'i kabeni'o, moao ki'a ha a'i kobabai muena."

### *Iesu Hanona Hanopaka Eana.*

<sup>12</sup> Haeamona Iesu maearima ehinabe muenakia etibaha, "Au hanona hanopaka eana. Hau ha au muri'uai keka'a hauna hanona wapura aonai a'i keka'a, weiana ia hanona mauri eana kea'ina." <sup>13</sup> 'Abi neiana teona raninai Parisea haukia na tehinabe aihona, "Oi kipomu poumu nohinana, emu pou hanona a'i ebero." <sup>14</sup> Iesu ehina benakia etibaha, "Kipo'u pou'u nahinana hanona ebero pokina amai 'ekana mai kaeao 'ekana au a'iobina ia wai hanona au amai 'ekana 'ao kaeao 'ekana a'i to'iobi 'apuana. <sup>15</sup> Wai maearima ekia hoahoa ihobonai au tukaiahina'u. Au hanona tai ha a'i nakaiahina. <sup>16</sup> Ia au e'u kaiahi pababaina re'a, e'u 'abi hanona ebero, pokina au hanona ikupaia'u aha'i, Hama'u euhuna'u hauna abomo here'uai. <sup>17</sup> Emi rauhubu aonai abomo na erere aihona, maearima rua ekia 'abi kehamona hanona 'abi tohana. <sup>18</sup> Au hau'u kipo'u pou'u nahinana mai Hama'u euhuna'u hauna abomo pou'u nehinana."

<sup>19</sup> Ba ia tebakaina tetibaha, "Hamamu hanona ae'e?"

Iesu e'abi etibaha, "Wai a'i to'iobina'u buonai Hama'u abomo a'i to'iobina. Wai au pato'iobina'u raninai Hama'u abomo pato'iobina."

<sup>20</sup> Iesu marea robe aonai baiben'i monina ihorotina 'ekanai 'abi neiakia eba'iobi ainakia. Weiana hau ha ia a'i ebirina pokina ia ena rani a'i nitai bahana.

### *Au Naeao 'Ekana Wai Katoao A'i Ketaina.*

<sup>21</sup> Iesu haeamona ia ehina benakia etibaha, "Au hanona naka'a 'akaumana, ia wai hanona au katotabuna'u ia emi ki'a aonai kato'ari. Au kaeao 'ekana katoao hanona a'i ketainimi." <sup>22</sup> 'Abi neiana paunai Iuda haukia apa'uakia kipokia tebakai bakai tetibaha, "Ia na ni'abi aiho, 'Au kaeao 'ekana hanona wai a'i katomai,' weiana hanona ia kipona keahu 'arina, 'ao?" <sup>23</sup> Iesu ehina benakia etibaha, "Wai hanona ba'a ai tomai au hanona ubiai amai, wai haumi hanona hanopaka neiana 'euna, au hau'u hanona hanopaka neiana 'euna aha'i. <sup>24</sup> Au aba ahina benimi, 'Emi ki'a aonai kato'ari,' weiana Au miaho banaibananai hau'u a'i kato a'ikakaumana'u raninai wai hanona emi ki'a aonai kato'ari."

<sup>25</sup> Ia tebakai bakai tetibaha, "Ba oi hanona tai?" Iesu ekia 'abi ebamuena etibaha, "Au tai hanona aba ahinabe hinabe benimi 'uainai emai mo bariu. <sup>26</sup> Wai paumiai au 'abi bo'ona pahinana abomo puma rarina pabahoainimi, ia euhuna'u hauna hanona toha tohana, au ia herenai naona hauna mo hanopaka nahina bena."

<sup>27</sup> Ia Hamana robana eahuna hanona obona a'i teobo. <sup>28</sup> Ua buonai Iesu ia ehina benakia etibaha, "Au Maearima Nahuna katotiu taeana'u raninai aba kato'iobina au hanona Keriso, abomo au kipo'u taba ha a'i nababaina ia Hama'u eba'iobina'u haukia mo nahinanakia. <sup>29</sup> Abomo euhuna'u hauna hanona ni'abana'u ia au a'i nihabo 'abaeana'u, pokina ia ena nuatae akakia rani ikoinai nababainakia." <sup>30</sup> 'Abi neiakia ehinanakia hanona maearima bo'ona ia tea'ikazaumana.

### *Aberahamo Bibirana.*

<sup>31</sup> Ba Iesu Iuda haukia tea'ikazaumana haukia ehina benakia etibaha, "E'u 'abi kato'ini benakia raninai wai hanona au i'aba'u haumi tohami. <sup>32</sup> Weiana

'abi tohana kato'io bina, ba 'abi tohana kehore kerubunimi." <sup>33</sup> Ia Iesu tehina bena tetibaha, "Ai Aberahamo bibirana haumai abomo tai ha ta'arana a'i ta'i. Aehoma buonai porubunamai na nuho?"

<sup>34</sup> Iesu ehina benakia etibaha, "Abi tohana au wai nahina benimi, ki'a nibabaina hauna hanona ki'a ena ta'ara ia'ina haunai niao. <sup>35</sup> Ta'ara'i hauna hanona poki hauna ena ituai a'i kemiaho banaibanai, nahuna hanona itu weianai kemiaho banaibanai. <sup>36</sup> Ua buonai Nahuna kehore kerubunimi raninai wai hanona aba erubu tai baihanimi.

<sup>37</sup> Au aba a'io binimi wai Aberahamo bibirana haumi, ia e'u 'abi aomiai a'i nemiaho paunai tonuatae katoahu 'arina'u. <sup>38</sup> Au hanona Hama'u wairanai aihana hauna nahina benimi, mai wai hanona hamami herenai tuo'o haukia tubabainakia."

<sup>39</sup> Ia ena 'abi tebamuenetetibaha, "Aberahamo hanona ai hamamai." Ba Iesu ehina benakia etibaha, "Wai Aberahamo nahuna raninai Aberahamo ebabai akakia patobabai. <sup>40</sup> 'Abi tohana Tirama herenai aona hauna nahina benimi, ia wai hanona taearea'u tutabuna katoahu 'arina'u. Aberahamo hanona na a'i ebabai aiho. <sup>41</sup> Wai hamami ebabai tabakia hanona wai tubabainakia." Ia Iesu tehina bena tetibaha, "Ai hanona tubu miorimai aha'i, ai hamamai hanona hamona Tirama mo iku-paiana." <sup>42</sup> Iesu haeanmona ehina benakia etibaha, "Wai hamami Tirama raninai au patoraona'au aina'u. Pokina au Tirama herenai akarahi amai neia. Au hanona kipo'u e'u nuataeai a'i amai ia Hama'u euhuna'u.

<sup>43</sup> Aehoma buonai nahinanakia 'abikia hanona aomi a'i tiea? Pokina wai e'u 'abi ia'i taeana a'i tonuatae aina. <sup>44</sup> Wai hamami hanona tiaporo, emi nuatae hanona hamami ena nuatae akana katobabaina. Ia hanona ahuahu hauna bahabanai emai mo bariu, 'abi tohanai a'i ekoroti,

pokina ia aonai 'abi tohana ha a'i nemiaho. Ia bai'oi nehinana hanona ia ena hoahoa tohana, pokina ia hanona bai'oi hauna abomo bai'oi ikoikiai hamakia. <sup>45</sup> Au 'abi tohana nahinana paunai wai au e'u 'abi a'i tua'i taeana. <sup>46</sup> Ba naia haumi tai ha au e'u ki'a o'io bina raninai 'ekana ko'uhina. Au 'abi tohana nahinana raninai aehoma buonai e'u 'abi a'i tua'i taeana? <sup>47</sup> Tirama nahuna hauna hanona Tirama ena 'abi aiakia nio'o, ia wai aia a'i tuona ena poki hanona wai Tirama nahuna aha'i."

### Iesu Mai Aberahamo.

<sup>48</sup> Iuda haukia apa'uakia Iesu ena 'abi tebamuenetetibaha, "Oi hanona Samaria haumu aomuai auba ki'a obona nemiaho, weiana hanona aba ta'abi harai 'ao?" <sup>49</sup> Ba Iesu ehina benakia etibaha, "Au ao'uai hanona auba ki'a obona aha'i. Au hanona Hama'u namariki aina ia wai au a'i tumariki aina'u. <sup>50</sup> Au hanona kipo'u e'u nuabi a'i natabuna, ia Tirama kehore e'u nuabi ketabuna abomo bakai kebabaina au pau'uai. <sup>51</sup> 'Abi tohana au wai nahina benimi, e'u 'abi ne'inibena hauna hanona a'i ke'ari 'apua."

<sup>52</sup> Weia Iuda haukia apa'uakia tehina bena tetibaha, "Bariu ai ta'io bi haraini'o, oi hanona aomuai auba ki'a obona nemiaho. Aberahamo e'ari mahabanai haukia abomo te'ari iamo oi nu'abi emu 'abi pe'inibena hauna hanona 'ari abiabina a'i keonobaina. <sup>53</sup> Oi hanona Aberahamo otara haona, u? Ia e'ari mahabanai haukia te'ari, ba nuraonana oi hanona tai?"

<sup>54</sup> Iesu ia ehina benakia etibaha, "Kipo'u pabauabina'u raninai e'u nuabi anina aha'i. Au Hama'u hauna tohana wai tu'abi 'Emi Tirama' hauna nihore au nibanabina'u. <sup>55</sup> Wai ia a'i to'io bina au mo a'io bina. Ba au pa'abi au ia a'i a'io bina raninai au hanona bai'oi hau'u wai 'abami. Ia au a'io bina mai ena 'abi na'inibenakia.

<sup>56</sup> Wai hamami Aberahamo e'u rani keihana paunai eaonamo, ba eihana hanona aona enamo."

57 Iuda haukia apa'uakia te'abi tetibaha, "Oi ihaumu hanona imabui a'i nia'i bahana, ia Aberahamo aba hamo oihana, u?" 58 Iesu ehore ehina benakia etibaha, "Abi tohana au wai nahina benimi. Aberahamo a'i erama baha au hanona aba amiaho."

59 'Abi weiana teona raninai ia pihara tea'i Iesu kateahuna, ia Iesu hanona kipona epihi to'u baiatakiai ekaobo marea robe ehabona eka'a.

## 9

### *Iesu Maha Ki'a Hauna Mahana Ebanamonakia.*

<sup>1</sup> Iesu taeara ekana eao aonai maha ki'a hauna ha eihana, ia hanona mahana ki'akiai erama. <sup>2</sup> I'abana haukia Iesu tebakaina tetibaha, "Ba'iobi haumu e, tai ena ki'a paunai hau neiana mai 'iauna erama, hau neiana ena ki'ai 'ao hinana hamana ekia ki'ai?" <sup>3</sup> Iesu ekia 'abi ebamuena etibaha, "Hau neiana ena ki'a aha'i abomo hinana hamana ekia ki'a aha'i, ia Tirama ena hiabu akakia ia haunai kewaira tina hauna kateihana paunai. <sup>4</sup> Au euphuna'u Tirama ena aka mararani kahababaina. Rabi kemai aonai hau ha keaka hanona a'i ketaina. <sup>5</sup> Au hanopakai namiaho aonai au hanona hanopaka ena ea."

<sup>6</sup> Iesu 'abi neiana ehinana muri-nai 'anoai e'atoti ba 'atotinai tipu emakana, 'iau hauna mahana rua etaronakia. <sup>7</sup> Ba ehina bera etibaha, "Moao, Siloama obunai wairamu koutuna." (Siloama anina hanona 'baiuhu.) Hau weiana eao wairana eutuna, emue emai mahana aba tenamo.

<sup>8</sup> Herenai haukia mai maearima baika ia 'uainai enoi ba'ame teihana haukia kipokia tebakai bakai tetibaha, "Hau neiana 'uainai weia emiati enoi ba'ame hauna, u?" <sup>9</sup> Harua etibaha, "Hauna mo naiana." Baika tetibaha, "Aha'i, ihana mo ia teaobena." Ia kipona ehina benakia etibaha, "Au mo neia'u."

<sup>10</sup> Ia tehore tebakaina tetibaha, "Bariu mahamu aea tehma noi-haiha?" <sup>11</sup> Ia ekia 'abi ebamuena etibaha, "Hau atana teaparina Iesu hauna tipu emakana maha'u etaronakia, ba ehina bera'u kaeao Siloama obuna waira'u kautuna. Ua buonai aeao waira'u autu ba naiha iha." <sup>12</sup> Ia tebakaina tetibaha, "Hau weiana hanona ae'e?" 'Iau hauna e'abi etibaha, "Au a'i a'ioibina."

### *Parisea Haukia Maha Tenamo Hauna Tehobona.*

<sup>13</sup> Ia tehore weiana 'uainai mahana tek'i'a hauna tebaka'ana teaoaina Parisea haukia herekia.

<sup>14</sup> Wapu weiana Iesu tipuai 'iau hauna mahana etaronakia tekaikau hanona beraura robena.

<sup>15</sup> Ua paunai Parisea haukia abomo ia tebakaina mahana aea tenamo aiho. Maha ki'a hauna e'abi etibaha, "Ia tipuai maha'u etaronakia, autunakia ba bariu aba naihaiha." <sup>16</sup> Parisea haukia baika te'abi tetibaha, "Hau neiana hanona Tirama herenai a'i emai pokina ia beraura robe a'i ne'inibena." Ia baika te'abi tetibaha, "Ki'a hauna ha hoa nahomakia aea kebabai aiho?" Weiana paunai ia kipokia baiatakia epa'a.

<sup>17</sup> Haeamona Parisea haukia maha ki'a hauna tebakai muena tetibaha, "Ia ehore mahamu ekaikaunakia, ba oi nuraonana ia hanona tai?" Hau weiana e'abi etibaha, "Ia hanona mahabanai hauna."

<sup>18</sup> Iuda haukia apa'uakia maha ki'a hauna mahana aba tenamo hauna a'i tebatohana eao mo hau weiana hinana mai hamana teaparinakia temai.

<sup>19</sup> Ba ia tebakainakia tetibaha, "Neiana hanona wai nahumi, u? Ma-

hana ki'a obokiae erama hauna neiana? Ia bariu hanona mahana aea tenamo aiho ba neihaiha?"

<sup>20</sup> Hinana mai Hamana ia ekia 'abi tebamuenetetibaha, "Ai ta'ioibina ia hanona ai nahumai abomo ia hanona mahana ki'a obokiae erama. <sup>21</sup> Ia bariu aeahoma neihaiha abomo tai ehore ia

mahana ekaikaunakia hanona ai a'i ta'io bina. Tomobakaina, ia abeapa'ua kipona robana meahuna.”<sup>22</sup> Hinana mai hamana Iuda haukia apa'uakia teta'u ainakia paunai ua te'abi aiho. Iuda haukia aba teroba ahu hau ha Iesu kehina pouna ia hanona Keriso raninai mareai katebakarahina.<sup>23</sup> Weiana buonai hinana mai hamana te'abi, “Ia hanona abeapa'ua tomobakaina.”

<sup>24</sup> Maha ki'a hauna rani ibaruana teaparina tehina bena tetibaha, “Ko'abi'uai Tirama wairanai ba 'abi tohana kohinana. Ai ta'io bina hau neiana ebanamoni'o hanona ki'a hauna.”<sup>25</sup> Hau weiana ekia 'abi ebamuena etibaha, “Ia ki'a hauna 'ao aha'i au a'i a'io bina. Taba hamona au a'io bina hanona maha'u teki'a ia bariu aba naihaiha.”

<sup>26</sup> Ba ia tebakaina tetibaha, “Oi heremuai taba ebabaina? Mahamu aea ekaikau aihonakia?”<sup>27</sup> Ia ekia 'abi ebamuena etibaha, “Au aba wa'i baha ahina benimi, ia aia'u a'i to'ona. Bariu aehoma buonai tonuatae katoao muena? Wai abomo tonuatae ia i'abana haumiai katoao, u?”

<sup>28</sup> Ia tehore terike ki'ana ba na te'abi aiho, “Oi hanona maearima weiana i'abana haumu, ia ai hanona Mose i'abana haumai.

<sup>29</sup> Ai ta'io bina Tirama ehore Mose ehina bena, ia maearima naiana ae'e ai emai hanona a'i ta'io bina.”<sup>30</sup> Hau weiana ekia 'abi ebamuena etibaha, “Bariu

taba haeai tohana erama pokina ia maha'u ekaikaunakia iamo wai hanona ena mai 'ekana a'i to'io bina.<sup>31</sup> Aika ha'io bina Tirama ki'a haukia aiakia a'i nibahu ainakia. Ia hanona tekuti aina haukia mai weiakia ena nuatae akana tibabaina haukia mo aiakia nibahu ainakia.<sup>32</sup> Uainai hanopaka erama raninai emai mo bariu hau ha ehore mahana teki'a erama hauna mahana ekaikaunakia pouna ha a'i hao'o 'apuana.<sup>33</sup> Hau neiana Tirama herenai a'i emai raninai ia hanona aka na homana ha a'i pebabaina.”

<sup>34</sup> Ia ena 'abi tebamuenetetibaha, “Oi hanona ki'a aonai orama ba oi nuhore ai kobamarerenamai, u?” Ia tehore mareai tectori ahina.

### *A'i Tia'ikakauma Haukia Hanona Maha Ki'a 'Abana.*

<sup>35</sup> Iesu hau weiana tectori ahina pouna eona ba etabu ahina raninai ia ebakaina etibaha, “Oi Maearima Nahuna nua'ikakaumana, u?”<sup>36</sup> Hau weiana Iesu ena 'abi ebamuena etibaha, “Hau apa'uana e, ia hanona tai? Mohina bena'u au kahore ia ka'ikakaumana.”<sup>37</sup> Iesu e'abi etibaha, “Oi bariu ia aba noihana hauna naiana oi nehina beni'o.”<sup>38</sup> Ba hau weiana e'abi etibaha, “Obiapaka e, au na'ikakauma.” Ba ia Iesu ekutiaina.

<sup>39</sup> Iesu haeamona e'abi etibaha, “Kabakai paunai amai hanopaka neianai, weiakia maha ki'a haukia kateihaiha, ia neiakia teihaiha haukia mahakia kateki'a.”<sup>40</sup> Parisea haukia baika ia herenai haukia 'abi weiana teona hanona tebakaina, “Abi tohana ai abomo mahamai teki'a, u?”<sup>41</sup> Iesu ehina benakia etibaha, “Wai mahami pateki'a raninai heremai ki'a peaha'i. Ia bariu wai tu'abi toihaiha buonai emi ki'a hanona 'ekakiai temiaho.”

## 10

### *'Abi Ibabataina Mamoe Ima Hauna.*

<sup>1</sup> Iesu e'abi etibaha, “Abi tohana au wai nahina benimi. Hau ha mamoe parabuna pa'abinai a'i nikatoto ia ara huunai nirobanai hauna hanona bainao mai kakikaki hauna.<sup>2</sup> Ia pa'abiai nikatoto hauna hanona mamoe i'imana hauna.<sup>3</sup> Pa'abi iha'inina hauna hanona pa'abi nikai kauna hau weiana 'euna ba ena mamoe hanona ia aiana tiona. Ia ena mamoe ha ha atakia tohakia niaparinakia mai ne'uai ainakia tikarahi.<sup>4</sup> Ia ena mamoe ikoikiai nibakarahi orenakia raninai, wairakiai nika'a

weiana ena mamoe ia murinai ti'au pokina ia aiana te'iobina. <sup>5</sup> Maearima haeai ha murinai a'i kate'au ia katebeau 'akaumana, pokina maearima weiana aiana a'i te'iobina." <sup>6</sup> Iesu 'abi ibabatai neianai ehina benakia, 'a ia taba e'uhina hauna obona a'i teobo 'apua.

### *Iesu Hanona Mamoe 'Ima Hauna Namona.*

<sup>7</sup> Weiana buonai Iesu e'abi mue etibaha, "Abi tohana au wai nahina benimi. Au hau'u hanona mamoe ekia pa'abi. <sup>8</sup> Weiakia ikoikiae temai 'uai haukia hanona bainao mai kakikaki haukia ua buonai mamoe ia aiakia a'i teona. <sup>9</sup> Au hau'u hanona pa'abi, hau ha au ao'uai nikatoto hauna hanona kemauri. Ia hanona kekatoto mai kekarahi aniani ketabu ahina.

<sup>10</sup> "Bainao hauna emai hanona kebainao, keahuahu mai kebapururu paunai emai. Au amai hanona mamoe mauri katea'ina mauri namona maikoinai katea'ina. <sup>11</sup> Au hanona mamoe 'ima hauna namo'u, mamoe 'ima hauna namona hanona ena mauri kebaibenai ena mamoe paukiai. <sup>12</sup> 'Ara tabu hauna hanona mamoe 'ima hauna tohana aha'i, mamoe abomo ia 'euna aha'i, ua buonai waeha 'aki nimai neihana raninai ia mamoe nihabonakia nibeau 'akaumana, ba waeha 'aki mamoe ne'urinakia tibeau otaraina. <sup>13</sup> Hau weiana nibeau 'akaumana pokina ia hanona 'ara tabu hauna mai mamoe robakia a'i niahuna.

<sup>14</sup> "Au hanona mamoe 'ima hauna namo'u, au hanona e'u mamoe a'iobinakia mai e'u mamoe abomo te'iobina'u. <sup>15</sup> Ihobona mo Hama'u au e'iobina'u au Hama'u a'iobina, ba e'u mauri kabaibenai e'u mamoe paukiai. <sup>16</sup> Au hanona e'u mamoe haeai baika, weiakia hanona parabu neiana aonai aha'i, weiakia abokiamo kamaiainkia ia abomo aia'u kateona, weia mamoe to'una kehamomo mai mamoe 'ima hauna hamona. <sup>17</sup> Hama'u niraona'au aina'u pokina au e'u mauri nabaibenai,

haeamona au kahore ka'i muena. <sup>18</sup> Hau ha here'uai e'u mauri a'i kea'i boina, 'a au kipo'u e'u nuataeai e'u mauri nabaibenai. Au mai e'u hiabu e'u mauri kabaibenai mai e'u hiabuai e'u mauri haeamona ka'i muena. Hama'u ebena'u 'abina hanona weiana."

<sup>19</sup> 'Abi neiakia paukiai Iuda haukia baiataktia epa'a mue.

<sup>20</sup> Maearima bo'ona te'abi tetibaha, "Auba ki'a obona ia aonai nemiaho nibeau 'ari. Taba buonai ia aiana tuona?" <sup>21</sup> Ia baika te'abi tetibaha, "Abi na homakia hanona auba ki'a obona aonai nemiaho hauna ua a'i ke'abi aiho. Ba auba ki'a obona maha ki'a hauna mahana a'i kekaikaunakia."

### *Iuda Haukia Iesu Tebaki'ana.*

<sup>22</sup> Ba Ierusalema ai marea barobe iraonana tatuna ranina etaina, weiana hanona iaia ranina. <sup>23</sup> Ba Iesu hanona Marea robe aonai itara ha ahanai eka'a, weiana hanona Solomonina ena itara. <sup>24</sup> Iuda haukia apa'uakia temai Iesu tekori kaiaronia te'abi tetibaha, "Aomai nubakai'au kai'auna, aita raninai kohinabe harainamai? Oi Keriso raninai mohinabe harainamai."

<sup>25</sup> Ba Iesu ekia 'abi eba-muena etibaha, "Au wai aba ahina benimi, ia wai hanona a'i tua'ikakauma. Au Hama'u atanai hiabu akakia ababainakia haukia hanona waira'u tia'i ahina. <sup>26</sup> Ba wai a'i tua'ikakaumana'u pokina wai hanona au e'u mamoe aha'i. <sup>27</sup> E'u mamoe hanona aia'u tiona. Au a'iobinakia, mai ia hanona muri'uai tika'a. <sup>28</sup> Au mauri banaibana nabenakia, ia hanona a'i kate'ari abomo hau ha ima'uai a'i kea'i boinakia.

<sup>29</sup> Hama'u mamoe weiakia ebena'u hauna hanona taba ikoikiae etara haonakia, hau ha Hama'u imanai weiakia ha a'i kea'i boina. <sup>30</sup> Au mai Hama'u tararua hanona hamomomai."

<sup>31</sup> Iuda haukia 'abi neiana teona raninai pihara tea'i taea ia kateahu 'arina. <sup>32</sup> A Iesu ehina benakia etibaha, "Aka

namokia bo'okia Hama'u herenai haukia abaihanimi, aka neiakia aeana hauna paunai piharai katoahuna'u?"

<sup>33</sup> Ia ena 'abi tebamuena tetibaha, "Ai piharai katahuni'o hanona aka namokia nubabai paunai aha'i, ia Tirama nu'abi ki'aina paunai, pokina oi hanona maearima 'abaeamu ia mo oi kipomu Tiramai nubaoni'o."

<sup>34</sup> Iesu ekia 'abi ebamuena etibaha, "Emi rauhubu aonai aba tererena, Tirama e'abi, 'Wai hanona tirama.' <sup>35</sup> Tirama ena 'abi emai herekiae haukia eaparinakia tirama, ba Puka robena 'abina weiana hanona a'i keikabe. <sup>36</sup> Weiana Tirama ebarobena'u mai euhuna'u amai hanopakai ba a'abi atibaha, 'Au hanona Tirama Nahuna,' raninai, aehoma buonai tu'abi au Tirama na'abi ki'aina?

<sup>37</sup> Hama'u ena aka a'i pababaina raninai a'i pato a'ikakaumana'u. <sup>38</sup> Ia Hama'u ena aka nababai raninai, wai a'i tua'ikakaumana'u re'a ia aka weiakia nababai haukia tomo a'ikakaumanakia. Weianai wai kato'ioquina mai obokia katobo Hama'u hanona au ao'uai mai au hanona Hama'u aonai."

<sup>39</sup> Weiana Iuda haukia apa'uakia taeara tetabu mue Iesu katebirina. Ia hanona herekiae ekaobo.

<sup>40</sup> Iesu ekabanai Ioridana atena abirana eao mue, 'uainai Ioane eba'uere robe 'ekanai weia emiaho. <sup>41</sup> Maearima bo'ona temai ia herena ba te'abi tetibaha, "Ioane hoa ha a'i ebabaina ia mo Ioane hau neiana robana eahuna tabakia ikoikiae hanona tetoha." <sup>42</sup> Ba maearima bo'ona weia Iesu tea'ikakaumana.

## 11

### *Lasaro Aba E'ari.*

<sup>1</sup> Hau ha atana Lasaro, Betani hauna, ia hanona einawa, Betani hanona Maria uaho'abana Maretia ohi ekia aiara. <sup>2</sup> Maria weiana kehore tehoru timina 'orimona Obiapaka Iesu aena keheinakia ba buinai keutu 'ororonakia babi'enae, ia haibuna hanona Lasaro weiana einawa. <sup>3</sup> Weiana

buonai uaho'aba rua 'abi teuhuna eao Iesu herena tetibaha, "Obiapaka e, nuraona'au aina hauna hanona neinawa." <sup>4</sup> 'A Iesu pou neiana eona raninai e'abi etibaha, "Inawa neiana hanona Lasaro a'i keba'ari baiha, ia neiana erama hanona Tirama ena nuabi kewairatina, weianai Tirama Nahuna nuabi kea'ina."

<sup>5</sup> Iesu hanona Maretia uaho'abana Maria ohi mai haibukia Lasaro kipokia eraona'au ainakia. <sup>6</sup> Weiana Iesu Lasaro ena inawa pouna eona raninai, ia 'ekanai mo weia wapu rua emiaho. <sup>7</sup> Ba Iesu i'abana haukia ehina benakia etibaha, "Aika hamamue hamaeo Iudea."

<sup>8</sup> Iabana haukia te'abi tetibaha, "Ba'obi haumu e, maraniai mo Iuda haukia apa'uakia tenuatae piharai kateahu 'arini'o, ia mo oi emu raona hanona komue koao weia?" <sup>9</sup> Iesu e'abi etibaha, "Mararani hamona aonai beraura hoana hanona harau haea rua, maearima ha mararani nik'a hauna hanona a'i kekai, pokina ia hanona hanopaka ena ea neihana. <sup>10</sup> Ia rabi keka'a hauna hanona kekai, pokina ia aonai hanona ea aha'i."

<sup>11</sup> Iesu 'abi weiana ehinana murinai e'abi etibaha, "Eka hau Lasaro hanona aba eparua rea. Ia au hanona kaeao kabaona."

<sup>12</sup> Iabana haukia te'abi tetibaha, "Obiapaka e, ia neinawa niparua raninai ia hanona aba kenamo mue." <sup>13</sup> Iesu hanona Lasaro ena 'ari robana eahuna, 'a i'abana haukia teraonana ia hanona niparua 'abaea. <sup>14</sup> Weiana buonai Iesu ehinabe mahanakia etibaha, "Lasaro hanona aba e'ari. <sup>15</sup> Wai paumiai au weia aha'i hanona ao'u ninamo, pokina wai katoohore au kato a'ikakaumana'u. Aika hamaeo ia herena."

<sup>16</sup> Ba Toma (tiaparina Bai'apaea hauna) 'abana ehina benakia etibaha, "Aika abomo hamaeo, ia kipokia kaha'ari haeamo."

*Iesu Hanona 'Ariai Mikiri Mue  
Mai Mauri Pokina.*

<sup>17</sup> Iesu weia ekara'au raninai tehina bena Lasaro hanona aba e'ari hauanina wapu bani uri aonai nemiaho. <sup>18</sup> Jerusalema mai Betani baiatakia hanona a'i ehoma'a matoha maela rua 'abana. <sup>19</sup> Weiana Maretia mai Maria haibukia Lasaro e'ari paunai Iuda haukia bo'okia temai ia herekia aokia katebataburana.

<sup>20</sup> Maretia Iesu emai pouna eona raninai, ia ekarahi eao keihana, ia Maria hanona ituai emiaho. <sup>21</sup> Maretia Iesu ehina bena etibaha, "Obiapaka e, oi neia pomiaho raninai haibu'u hanona a'i pe'ari." <sup>22</sup> Ia au a'io bina bariu taba Tirama herenai konoi aina hauna ia kehore kebeni'o."

<sup>23</sup> Iesu Maretia ehina bena etibaha, "Oi haibumu hanona kemikiri mue." <sup>24</sup> Maretia e'abi etibaha, "Au a'io bina ia hanona kemikiri mue rani orenai." <sup>25</sup> Iesu Maretia ehina bena etibaha, "Au hanona mikiri mue abomo mauri. Au nia'ikakaumana'u hauna hanona 'abi na aha'i pe'ari, ia kemauri. <sup>26</sup> Ba timauri mai tia'ikakaumana'u haukia ikoikiai hanona a'i kate'ari 'apua ia katemauri banaibanai. Oi 'abi neiana nua'ikakaumana, u?"

<sup>27</sup> Maretia e'abi etibaha, "E, Obiapaka, au na'ikakaumani'o, oi hanona Keriso, Tirama Nahuna weiana kemai hanopakai hauna."

*Iesu Ehai.*

<sup>28</sup> 'Abi neiana ehinana murinai emue eao uaho'abana Maria eapari ke'ena ehinana bena etibaha, "Ba'io bi hauna hanona aba emai oi nibakai bakai aini'o." <sup>29</sup> Maria 'abi neiana eona raninai emikiri noanoa eao Iesu herena. <sup>30</sup> Rani weianai Iesu hanona aiarai a'i ekatoto baha, ia weia Maretia ohi tebaitabu ahi 'ekanai emiaho oho. <sup>31</sup> Iuda haukia weiakia Maria kipokia ituai temiaho aona tebataburana haukia ia teihana emikiri noanoa ekarahi raninai murinai teao, teraonana ia hanona niao 'ariahanai weia kehui.

<sup>32</sup> Maria hanona Iesu emiaho 'ekanai ekara'au ba eihana raninai beronai aena pokinai e'umuti e'abi etibaha, "Obiapaka e, oi neia pomiaho raninai haibu'u hanona a'i pe'ari."

<sup>33</sup> Iesu Maria ehai eihana mai Iuda haukia weiakia kipokia temai haukia tehai eihanakia hanona aona eaoko'o mai e'abe'abe. <sup>34</sup> Ia ebakainakia etibaha, "Wai ia ae'eai tohorena?" Ia ena 'abi tebamuena tetibaha, "Obiapaka e, omai moihana." <sup>35</sup> Ba Iesu ehai. <sup>36</sup> Weiana Iuda haukia te'abi tetibaha, "Tomoihana hama ua niriona'auai aihona." <sup>37</sup> Ia baika te'abi tetibaha, "Hau neiana maha ki'a hauna mahana ebanamokakia ba ia pehore Lasaro 'ariai peba'orona a'i pe'ari."

*Iesu Lasaro 'Ariai Ebamikirina  
Emauri Mue.*

<sup>38</sup> Iesu aona eaoko'o ki'a. Ba eao 'ariahana, 'ariahana weiana hanona pihara paparo'ana ha pihara rarina temaiaina pa'abina tebahu abuna. <sup>39</sup> Iesu e'abi etibaha, "Pihara tomoa'i parenal!" Ia 'ari hauna haibuna Maretia e'abi etibaha, "Obiapaka e, timina aba na eki'a, pokina ia tehorena hanona wapuna aba ebani." <sup>40</sup> Ba Iesu ia ehina bena etibaha, "Au aba ahina beni'o, oi koa'ikakaumana'u raninai Tirama ena nuabi koihana." <sup>41</sup> Ua buonai ia tehore pihara tea'i parenal. Ba Iesu ea'a taea e'abi etibaha, "Hama'u e, au nabananomai'o pokina aia'u aba nuona. <sup>42</sup> Au a'io bina oi hanona rani ikoinai aia'u nuona, ia au neiana nahinana ena pokina hanona maeearima neiakia neia tekoroti haukia paukiai. Weiana kate a'ikakauma oi ohore au ouhuna'u."

<sup>43</sup> Iesu 'abi neiana ehinana murinai eapari aota etibaha, "Lasaro e, naia mokarahi omal!" <sup>44</sup> Ba 'ari hauna ekarahi emai, imana mai aena hanona 'ariahana habuninai te'apanakia haeamona wairana abomo habuni ha ai

te'apana. Iesu e'abi etibaha, "Ariahana habunikia tomorubunakia, tomohabona meao."

*Iesu Iahu'arina Raonana  
Tebabaina.*  
(Mt 26.1-5; Mk 14.1, 2; Lk 22.1, 2)

<sup>45</sup> Iuda haukia bo'ona temai Maria tetoana haukia hanona Iesu taba weiana ebabaina teihana ba tea'ikakaumana. <sup>46</sup> Ia baika hanona teao Parisea haukia herekia ba Iesu taba ebabaina hauna robana teahuna. <sup>47</sup> Ba robe haukia apa'uakia mai Parisea haukia bakai apa'uana te'imana haukia teaparina kipokia te'abi'abi, "Bariu aika taba kaha babaina hau weiana aba bata'u ta'u huri hoakia bo'ona nibabainakia. <sup>48</sup> Aika ia kahahabona hoa neiakia kebabai hao babai hao raninai maearima ikoinai ia kate a'ikakaumana, ba Roma haukia katemai eka marea robe mai eka hanopaka katea'i boinaka."

<sup>49</sup> Ba ia 'abakia ha atana Kailafa, ihau weiana aonai ia hanona robe haukia arakiae hauna ha etae e'abi etibaha, "Wai taba ha'i to'iobi 'apuana. <sup>50</sup> Wai obo a'i tuobo, namona hanona hau ha hamona pe'ari maearima paukiae, ba hanopaka maikoina keki'a hanona a'i enamo."

<sup>51</sup> Ia 'abi neiana ehinana hanona ia kipona ena raonai aha'i. 'A ihau weiana aonai ia hanona robe haukia 'arakiae hauna paunai, ena mahabanaiai ua e'abi aiho Iesu ke'ari Iuda haukia paukiae, <sup>52</sup> Iuda haukia ikupaiakia mo paukiae aha'i, ia Tirama nahuna 'eka haeai haeai temiaho haukia kebararonakia mai kebahamonakia.

<sup>53</sup> Rani weiana ea'i ramana eaoaina aonai Iuda haukia apa'uakia hanona terobahu Iesu kateahu 'arina. <sup>54</sup> Ua buonai Iesu Iuda haukia baiatakiae a'i eka'a maha. Ia weia ekaobo eao hano'akuna haianai aiara ha atana Eperaim, weia i'abana haukia kipokia temiaho.

<sup>55</sup> Iuda haukia ekia Kabanai tatuna aba ekaibari aonai Iuda maearimakia bo'ona aiara haeai haeai ai tekara au teao Ierusalema ai katea'ia'i harai katerobe 'uai ba tatu kerama. <sup>56</sup> Ia Iesu tetabuna ba marea robe aonai tekoroti kipokia baiatakiae tebakai bakai tetibaha, "Wai taba turaonana? Ia tatu kemai 'ao?" <sup>57</sup> 'A robe haukia apa'uakia mai Parisea haukia 'abi tebaiben, hau ha Iesu ena mi-aho 'ekana e'ioquina raninai ia keba 'iobinakia, weiana ia katehore katea'ina.

## 12

*Maria Iesu Aena Tehoroai Eheinakia.*

(Mt 26.6-13; Mk 14.3-9)

<sup>1</sup> Wapu 'abaihau wairai temiaho Kabanai tatuna kerama hanona Iesu eao Betani Lasaro nemiaho aiarana, hau weiana 'ariai ebamikirina hauna. <sup>2</sup> Rabirabi Iesu ia'i taeana hoana anianina ha teba'oruna, ba Maretia hanona ia ta'arakia ea'i, ia Lasaro hanona Iesu mai maearima baika kipokia aniani 'ekanai temiati. <sup>3</sup> Ba Maria ehore tehoro kawapu hamona arana rarina 'akinai pahakawana hauna ea'ina Iesu aena eheinakia ba buinai Iesu aena eutu 'ororonakia. Tehoro timana 'orimona weiana itu aona maikoinai ebabonu 'auna. <sup>4</sup> Iesu i'abana hauna ha Iuda Isakariote hauna wairai Iesu kehinahinaina hauna e'abi etibaha, <sup>5</sup> "Ei, tehoro neiana moni rarina 'akinai\* patekawa kawaina ba monina uraru haukia patebenakia." <sup>6</sup> Ia 'abi neiana ehinana hanona uraru haukia niraonanakia paunai aha'i, 'a ia hanona bainao hauna, moni puteputena weiana ea'ina haunai ia kipona nibaraina.

<sup>7</sup> Ba Iesu e'abi etibaha, "Tomohabo 'abaeana, tehoro neiana hanona kebamauaina keaomo wapu weiana au katehorenau hauna 'euna. <sup>8</sup> Rani ikoikiae uraru haukia hanona wai baiatamiae katemiaho, 'a au hanona rani

\* 12:5: (5) Helene moninai Denari hinabu aihau.'

ikoikiai wai baiatamiai a'i kami-aho."

*Lasaro Iahu'arina Raonana Tebabaina.*

<sup>9</sup> Weiana Iuda haukia to'una raria Iesu pouna teona ia hanona aba Betani ai, buonai teao 'eka weiana. Iesu mo kipona a'i kateihana, ia Lasaro 'ariai ebamikiri muena hauna abomo kateihana. <sup>10</sup> Ia robe haukia apa'uakia teroba ahu Lasaro abomo kateahu 'arina, <sup>11</sup> pokina hoa weiana Lasaro herenai erama hauna paunai Iuda haukia bo'ona ia tehabonakia tekabananai Iesu tea'ikakaumana.

*Iesu Ierusalemai Ekatoto Matoha Obia 'Arana 'Abana.*

(Mt 21.1-11; Mk 11.1-11; Lk 19.28-40)

<sup>12</sup> Erani wapu weianai to'u raria tatu paunai temai haukia Iesu pouna teona nimai Ierusalemai. <sup>13</sup> Ua buonai ia 'ari'ari tea'i tekarahi teao Iesu kipokia katebaitabu ahi, ba teio tetibaha, "Hosana!"

Tirama kehore Obiapaka atanai nimai hauna kebanamona!  
Tirama kehore Isaraela ekia obia 'arana kebanamona!"

<sup>14</sup> Iesu toniki nahu ha etabu ahina ahana emia'u. Weiana hanona Puka robenai tererena ihobona etibaha,

<sup>15</sup> "Siona aiara apa'uana haumi e, a'i katota'u.

Tomoihana,  
neiana hanona emi obia arana toniki nahu ahana emia'u ni-mai."

Sek 9.9

<sup>16</sup> Rani weianai i'abana haukia 'abi neiakia obokia a'i teobo eaomo Iesu ena nuabi ai emikiri mue murinai ba ia robana teahuna 'abikia tererenakia haukia mai taba neiakia ia herenai tebabai haukia teraona tinanakia.

<sup>17</sup> Maearima weiakia Iesu Lasaro 'ariai ebamikiri muena teihana haukia tehore ia hauna pouna tehina otaraina.

<sup>18</sup> Maearima bo'ona Iesu bata'u ta'u huri hoana weiana ebabaina pouna teona paunai tekarahi teao kateihana. <sup>19</sup> Ua buonai

Parisea haukia kipokia baiatakiai te'abi'abi tetibaha, "Tomoihana, aika hanona a'i ketainaka maearima maikoinai aba ia murinai tika'a."

*Helene Haukia Baika Iesu Titabuna.*

<sup>20</sup> Tatu weiana aonai weiakia teao Ierusalema Tirama katekuti aina haukia baiatakiai hanona Helene haukia abomo baika. <sup>21</sup> Ia temai Galilea Betesaida hauna Pilipo herena tehina bena tetibaha, "Poki haumu e, ai tanuatae Iesu kataihana." <sup>22</sup> Pilipo eao Anderea ehina bena ba terarua teao Iesu tehina bena. <sup>23</sup> Iesu ekia 'abi ebamuena etibaha, "Au Maearima Nahuna nuabi apa'uana ka'ina beraurana hanona aba ekara'au. <sup>24</sup> Abi tohana au wai nahina benimi, witi uhona ha a'i ke'eho hanoai a'i ke'ari raninai ia hanona uho 'abaeana mo kemiaho. 'A ke'ari raninai uho bo'ona kebaramanakia. <sup>25</sup> Hau ha ena mauri ibanamona niraonana hauna hanona ena mauri keba'akauma, hau ha hanopaka neiana aonai ena mauri ibanamona robana a'i niahuna hauna hanona ena mauri kea'i 'inina keaomo banai banai. <sup>26</sup> Hau ha au ta'ara'u kea'i hauna hanona muri'uai kemai, ba au ae'eai hanona e'u ta'ara'i hauna abomo weia. Hau weiana ta'ara'u nia'i hauna Hama'u kehore ia kea'i taeana.

*Iesu Kipona Ena 'Ari Pouna Ehinana.*

<sup>27</sup> Bariu hanona ao'u niaro'ari ki'a ba taba na kahoma? Au ka'abi, 'Hama'u, beraura hoana neiana aonai mobamaurina'u?" Aha'i. Au amai ena pokina tohana hanona beraura hoana neianai kahaiara. <sup>28</sup> Hama'u e, atamu mobanuabina." Ba

aia ha kupai emai etibaha, "Au aba abanuabina, haeamona kabantuabi muena." <sup>29</sup> To'u haukia aia weiana teona raninai te'abi tetibaha, "Kupa niro'u," baika hanona te'abi tetibaha, "Aneru ha Iesu ehina bena."

<sup>30</sup> Iesu ehina benakia etibaha, “Aia neiana emai hanona wai keba namonimi paunai, ia au aha'i.<sup>31</sup> Bariu rani neiana hanona hanopaka kebakai ranina, ba hanopaka neiana niobia aina hauna Satani bariu kateu'u ahina.<sup>32</sup> Weiana au hanopakai katetio taeana'u aonai maearima ikoikiai kaberinakia katemai here'u.”<sup>33</sup> Ia 'abi neiana ehinana hanona ia aea ke'ari aiho hauna ehina pouna.

<sup>34</sup> To'u haukia te'abi tetibaha, “Ai rauhubuai aia taona e'abi Keriso hanona kemiaho banai banai, ia aea homanai mo oi nu'abi notibaha, ‘Au Maearima Nahuna hanona katetio taeana'u.’ Tai hanona Maearima Nahuna?”

<sup>35</sup> Ba Iesu ekia 'abi ebamuena etibaha, “Wai hanona rani papana mo ea kipokia katomiaho. Ea toa'ina aonai tomoka'a, weiana wapura kehore a'i mekaibunimi marikina. Maearima wapura aonai nika'a hauna hanona a'i e'lobina aeana niao.<sup>36</sup> Ea heremiai nemiaho oho aonai tomo a'ikakaumana. Weiana wai hanona ea nahunai katoao.” Iesu ena 'abi neiana ebapuana murinai herekiae ekaobo eao epihi.

### *Iuda Haukia Bo'ona Iesu A'i Tea'ikakaumana.*

<sup>37</sup> Iesu bata'u ta'u huri hoakia bo'okia wairakiai ebabai, iamo to'u haukia ia a'i tea'ikakaumana.<sup>38</sup> Neiana hanona Isaia mahabanai hauna ena 'abi ibatohana na e'abi aiho,

“Obiapaka e, tai emai 'abi tahinana hauna ea'ikakaumana, haeamona Obiapaka imana hiabuna hanona tai herenai kebawaira tinana?”

Isa 53.1

<sup>39</sup> Neiana paunai to'u haukia kate a'ikakaumana hanona a'i etaina. Haeamona Isaia e'abi mue etibaha,

<sup>40</sup> “Obiapaka ehore mahakia eba'iaunakia, mai aokia ebapahihinakia, weiana mahakiae a'i temeihia iha mai ekia raonaraonai obo a'i temeobo,

a'i temeraona kabe  
a'i mabamaurinakia,  
Tirama ua e'abi aiho.”

Isa 6.10

<sup>41</sup> Isaia 'abi neiana ehinana pokina Iesu ena nuabi eihana ba pouna ehinana.

<sup>42</sup> Rani weianai Iuda haukia apa'uakia bo'ona Iesu tea'ikakaumana. Ia Parisea haukia tetu'u ainakia buonai ekia a'ikakauma a'i tehina pou, pokina marea aonai a'i temeba karahinakia ta'una.

<sup>43</sup> Pokina ekia nuatae hanona maearima ia kateba namonakia, 'a Tirama kebanamonakia hauna a'i tenuataeai haraina.

### *Iesu Ena 'Abi Katehore Maearima Kateba bakainakia.*

<sup>44</sup> Ba Iesu eio aota etibaha, “Hau ha au nia'ikakaumana'u hauna hanona au mo a'i nia'ikakaumana'u ia weiana eu-huna'u hauna abomo nia'ikakaumana.

<sup>45</sup> Hau ha au neihana'u hauna hanona weiana au eu-huna'u hauna abomo neihana.

<sup>46</sup> Au hanona ea 'abana amai hanopakai, ba maearima tia'ikakaumana'u haukia ikoikiae hanona wapura aonai a'i katemiaho.

<sup>47</sup> Hau ha e'u 'abi aiakia nio'o ia a'i nika'ainakia hauna, au ia a'i kababakaina, pokina au amai hanona hanopaka a'i kababakaina ia hanopaka 'arana kabamaurina.

<sup>48</sup> Hau ha au nibaki'ana'u mai e'u 'abi a'i nia'i taeanakia hauna hanona mai ibabakaina hauna ha nemiaho, rani orenai 'abi weikiae ahina haukia katehore ia katebabakaina.

<sup>49</sup> Pokina au kipo'u e'u nuataeai a'i a'abi, 'a Hama'u eu-huna'u hauna ena 'abi ebaiben'i 'abina kahinana abomo kahinahina haraina hauna ahinana.

<sup>50</sup> Ba au a'lobina ia ena 'abi ebaiben'i hanona keaoainimi mauri banai banai 'ekana, ua buonai 'abi ahinanakiae haukia hanona Hama'u mo ehina bena'u 'abikiae ahinanakiae.”

## 13

*Iesu I'abana Haukia Aekia Eutunakiae.*

<sup>1</sup> Mara hanona Kabanai tatuina, weiana Iesu e'iobina ena rani aba ekara'au hanopaka kehabona keao Hamana herena. Ia hanopakai ia 'euna haukia rani ikoinai eraona'au ainakia, ia bariu ena raona'au maikoinai kebainanakia keao mo ke'ari.

<sup>2</sup> Rabirabi teaniani aonai, tiaporo aba Simona nahuna Iuda Isakariote hauna aona eana Iesu hinahinana kehinahinaina. <sup>3</sup> Iesu hanona aba e'iobina Hamana ehore taba ikoikiai aba ia imanai eutanakia, weiana ia hanona Tirama herenai emai haeamona kemue Tirama herena. <sup>4</sup> Weiana Iesu aniani 'ekanai emikiri ena ibatoto habuni ahanai hauna ea'i obona ehorotina ba tauera ea'ina huanai ehaina. <sup>5</sup> Bei ebaharu ahina ritiai ba i'abana haukia aekia eutu ramanakia, tauera huanai ehaina hauna aekia eba'ororonakia.

<sup>6</sup> Iesu emai Simona Petero herenai ekara'au raninai Petero e'abi etibaha, "Obiapaka e, oi hanona au ae'u koutunakia, u?"

<sup>7</sup> Iesu Petero ena 'abi ebamuena etibaha, "Bariu au taba nababaina hauna oi obona a'i nuobo, 'a keao muriai hanona obona aba kobo."

<sup>8</sup> Petero Iesu ehina bena etibaha, "Oi hanona au ae'u a'i koutunakia." Iesu Petero ena 'abi ebamuena etibaha, "Aemu a'i kautunakia raninai oi hanona au i'aba'u haumu aha'i."

<sup>9</sup> Simona Petero ia ehina bena etibaha, "Obiapaka e, ae'u mo ikupaiakia aha'i, 'a ima'u mai ara'u abomo koutunakia." <sup>10</sup> Iesu ia ehina bena etibaha, "Hau ha aba e'uere hauna hanona hauna maikoina aba emahamaha ba aena mo keutunakia. Wai hanona aba tomahamaha, iamo hamona hanona aha'i."

<sup>11</sup> Pokina Iesu e'iobina tai hanona ia kehinahinaina, weiana buonai e'abi etibaha, "Ikoimiai hanona tomahamaha iamo hamona hanona aha'i."

<sup>12</sup> Weiana aekia eutunakia murinai ena ibatoto habuni ea'ina ebatoto muena. Emue 'ekanai emiati. Ia ehore ebakainakia etibaha, "Au taba heremai

babaina hauna anina to'iobina?

<sup>13</sup> Wai au tuaparina'u emi ba'iobi hau'u mai Obiapaka, ua tu'abi aiho hanona ebero, pokina au hanona ua homa'u. <sup>14</sup> Ba au emi Obiapaka mai emi ba'iobi hau'u iamo aemi autunakia raninai wai abomimo 'abami ha ha aekia katoutunakia. <sup>15</sup> Au babai neiana heremai ababaina toihana hauna ihobonai mo katobabaina. <sup>16</sup> 'Abi tohana au wai nahina benimi, ta'ara'i hauna hanona ena poki hauna a'i etara haona, ihobona mo iuhubeau hauna hanona euhuna hauna a'i etara haona. <sup>17</sup> Bariu babai neiakia ababainakia anikia aba to'iobinakia, ba taeara ihobonai katobabainakia hanona wai Tirama kebanamonimi.

*Iesu Ehore Ia Kehinahinaina Hauna Ehina Pou 'Uaina.  
(Mt 26.20-25; Mk 14.17-21; Lk 22.21-23)*

<sup>18</sup> "Au ikoimiai robami a'i nahuna, ia weiakia atina'anakia haukia hanona a'iobinakia. Ia weiana hanona Puka robennai tererena 'abina nibatohana, Tararua parawa tani haeamo hauna ehore au ni'oatana'u." <sup>19</sup> Bariu taba neiana a'i nirama baha aonai naba'iobi baihanimi, pokina taba weiana kerama raninai wai katoa'ikakauma au hanona miao banaibainai hau'u. <sup>20</sup> 'Abi tohana au wai nahina benimi, hau ha au auhuna hauna nia'i taeana hauna hanona au nia'i taeana'u, mai hau ha au nia'i taeana'u hauna hanona euhuna'u hauna abomo nia'i taeana."

<sup>21</sup> Iesu 'abi neiana ehinana murinai ia aona epuma e'abi etibaha, "Abi tohana mo au wai nahina benimi. Wai hau ha au kohinahinaina'u."

<sup>22</sup> Weiana buonai i'abana haukia kipokia tebaiha maiaina a'i te'iobina ia hanona tai robana niahuna.

<sup>23</sup> Ia i'abana haukia ha Iesu ena raona'au hauna Iesu herenai emiati. <sup>24</sup> Weiana Simona Petero mahana ebairu ia herenai ba etibaha, 'Mobakaina ia tai robana niahuna.'

<sup>25</sup> Ia Iesu herenai emiati hauna eiru haha Iesu herena ebakaina etibaha, "Obiapaka e,

oi tai robana nuahuna?"<sup>26</sup> Iesu ia ena 'abi ebamuena etibaha, "Parawa papana 'ororo aonai kakaihuna kabena hauna iamo weiana." Ba Iesu ehore parawa ea'ina 'ororo aonai ekaihuna ba Iuda ebena, ia hanona Simona nahuna Isakariote hauna.

<sup>27</sup> Beronai Iuda parawa ea'ina eana hanona Satani ia aonai etoto. Weiiana Iesu Iuda ehina bena etibaha, "Taba kobabaina hauna mobabai biaina."<sup>28</sup> Weiakia aniani 'ekanai temiati haukia Iesu Iuda ua ehinabe aihona hanona obona a'i teobo.<sup>29</sup> Iuda hanona moni puteputena e'imana paunai baika teraonana Iesu ia ehina bena taba tatuai tenuatae ainakia haukia kekawanakia, 'ao taba baika uraru haukia kebenakia.<sup>30</sup> Iuda parawa puana papana ea'ina eana murinai, beronai emikiri ekarahi, ba weiana hanona aba erabi.

### *Rauhubu 'Abina Mahamahana.*

<sup>31</sup> Iuda ekamuri aonai, Iesu 'abi etibaha, "Bariu hanona au Maearima Nahuna e'u nuabi kewaira tina mai au hau'uai Tirama ena nuabi abomo kewaira tina."<sup>32</sup> Ba au hau'uai Tirama ena nuabi kewaira tina raninai Tirama abomo au Maearima Nahuna e'u nuabi kebawaira tinana, ba beronai mo kebabaina.<sup>33</sup> E'u raona'au miorimi e, au hanona rani papana mo wai kipokia kahamiaho. Ba wai au katotabuna'u. Iuda haukia aba ahina benakia ihobonai bariu wai nahina benimi, au kaeao 'ekana wai katoao hanona a'i ketaina.<sup>34</sup> Au rauhubu 'abina mahamahana wai nabenimi, wai ha ha katoraona'au ainimi. Au wai araona'au ainimi ihobonai wai abomo ha ha katoraona'au ainimi.<sup>35</sup> Wai ha ha katoraona'au ainimi raninai, maearima ikoikiai kate'lobina wai hanona au i'aba'u haumi."

*Iesu Ehore Petero Ia Kebuniai aina Hauna Ehina Pou 'Uaina.*

(Mt 26.31-35; Mk 14.27-31; Lk 22.31-34)

<sup>36</sup> Simona Petero ia ebakaina etibaha, "Obiapaka e, oi hanona aeana nuao?" Iesu e'abi etibaha, "Au bariu naeo 'ekana oi muri'uai komai hanona a'i ketaina, 'a muriai hanona muri'uai komai."<sup>37</sup> Petero e'abi etibaha, "Obiapaka e, aehoma buonai bariu murimuai ka'au hanona a'i ketaina? Au hanona aba aba'oru oi paumuai ka'ari."

<sup>38</sup> Ba Iesu ia ena 'abi ebamuena etibaha, "Oi au pau'uai ko'ari, u? 'Abi tohana au oi nahina beni'o, kokoro'u a'i kearara baha aonai oi rani aihau au kobuniai aina'u."

## 14

### *Iesu Hanona Hamana Herena Kateao Haukia Ekia Taeara.*

<sup>1</sup> Iesu e'abi etibaha, "Aomi a'i katearo'ari. Tirama kato a'ikakaumana, au abo'umo kato a'ikakaumana'u."<sup>2</sup> Hama'u ena itu aonai miao 'ekakia hanona ebo'o, peaha'i raninai au wai aba pahina benimi. Au kaeao 'eka ha ka'ia'i haraina wai 'eumi.<sup>3</sup> Weiiana au kaeao 'eka ha ka'ia'i haraina wai 'eumi, murinai kamue kamai ka'inimi kahaeao au ae'eai kamiaho hanona wai abomimo weia.<sup>4</sup> Au kaeao 'eka weiana taearana hanona wai aba to'lobina."

<sup>5</sup> Toma Iesu ehina bena etibaha, "Obiapaka e, oi koao 'ekana hanona ai a'i ta'lobina, ba katawahi taearana hanona aea kata'lobi aihona?"<sup>6</sup> Iesu Toma ehina bena etibaha, "Taearana hanona au, 'abi tohana abomo au, haeamona mauri abomo au. Hamaka herena kateao haukia ikoikiai ekia taeara hanona au."<sup>7</sup> Wai au pato 'lobina'u raninai, Hama'u abomo aba pato'lobina, bariu waira keaoaina aonai ia aba to'lobina abomo aba toihana."

<sup>8</sup> Pilipo Iesu ehina bena etibaha, "Obiapaka e, emai nuatae tohana hanona neiana, Hamaka mobaihanamai."<sup>9</sup> Iesu ena 'abi ebamuena etibaha, "Pilipo e, rani ehoma'a aba kipokia hamiaho oioi, iamo oi hanona

au a'i o'iobina'u, u? Hau ha au eihana'u hauna hanona Hama'u aba eihana, ae homa buonai nu'abi, Hamaka mobaihanamai.<sup>10</sup> Pilipo, nua'ikakaumana'u, au hanona Hama'u aonai mai Hama'u hanona au ao'uai. 'Abi neiakia nahinanakia heremai hanona au kipo'u e'u nuataeai a'i na'abi, weiana hanona Hama'u au ao'uai nemiaho hauna ena aka nibabainakia.<sup>11</sup> Tomo a'ikakaumana weiana a'abi au hanona Hama'u aonai mai Hama'u hanona au ao'uai, aha'i raninai aka ababainakia haukia paukiai tomo a'ikakaumana'u.

<sup>12</sup> "Abi tohana mo au wai nahina benimi, hau ha au nia'ikakaumana'u hauna aka nababainakia haukia ia abomo kebabainakia. Haeamona aka apa'uakia tohakia abomo kebabainakia, pokina au naeo Hama'u herena.<sup>13</sup> Ba au ata'uai taba ikoikiai katonoai ainakia hanona kababainakia. Weiana Hama'u ena nuabi hanona kewaira tina nahuna paunai.<sup>14</sup> Weiana au ata'uai taba ikoikiai katonoai ainakia hanona au kahore kababainakia.

### *Iesu E'abi'uai Auba Robe Keuhuna Kemai.*

<sup>15</sup> "Wai au katoraona'au aina'u raninai e'u rauhubu 'abikia hanona katobabua 'aunakia.<sup>16</sup> Au kahore Hama'u kanoina ba Baraibarai hauna kebenimi, ia hanona 'abi tohana Auba Robena wai heremai kemiaho banaibanai.<sup>17</sup> Ia hanona 'abi tohana Auba Robena, hanopaka haukia hanona a'i katea'i taeana pokina a'i teihana mai a'i te'iobina, 'a wai hanona ia to'iobina pokina ia hanona wai heremai nemiaho mai wai aomiai kemiaho.

<sup>18</sup> "Au hanona a'i kahabo 'abaeanimi matoha miori hamana hinana aha'i hauna 'abana, au hanona kamue kamai heremi.<sup>19</sup> Rani papana murinai hanopaka haukia hanona au a'i kateiha muena'u, ia wai hanona au katoihana'u, pokina au namauri haeamona wai abomimo katomaauri

paunai.<sup>20</sup> Wapu weiana kemai aonai wai kato'iobina au hanona Hama'u aonai, wai hanona au ao'uai, ihobona mo au hanona wai aomiai.<sup>21</sup> Hau ha au e'u rauhubu 'abikia nia'i taeanakia mai nibabua 'aunakia hauna hanona au niraona'au aina'u, ia au niraona'au aina'u hauna Hama'u kehore ia keraona'au aina. Ba au abomo ia karaona'au aina, mai ia herenai kawaira tina."

<sup>22</sup> Iuda Isakariote hauna aha'i ia Iuda haeai ha hauna Iesu ebakaina etibaha, "Obiapaka e, aehoma buonai ai mo heremaiai kowaira tina, ia hanopaka haukia herekiai hanona a'i kowaira tina?"<sup>23</sup> Iesu Iuda ena 'abi ebamuena etibaha, "Hau ha au niraona'au aina'u hauna e'u ba'iobi 'abikia kebabua 'aunakia, Hama'u kehore ia keraona'au aina, haeamona au mai Hama'u ohi katamai herenai kipokia katamiaho.<sup>24</sup> Hau ha au a'i niraona'au aina'u hauna hanona e'u 'abi a'i nibabua 'aunakia. 'Abi neiakia aiakia tuo'o haukia hanona au kipo'u e'u 'abi aha'i ia Hama'u euhuna'u hauna ena 'abi.

<sup>25</sup> "Au wai kipokia hamiaho oioi aonai taba neiakia hanona aba ahinanakia heremai.<sup>26</sup> 'A Baraibarai hauna Auba Robe, au ata'uai Hama'u keuhuna hauna kehore taba ikoikiai keba'iobinimi, mai 'abi weiakia ikoikiai ahina haukia kebaraona tinanimi.

<sup>27</sup> "Baibua wai heremai nababona. Au e'u baibua wai nabenimi, weiana hanona hanopaka 'euna nibaiben'i hauna 'abana aha'i. Aomi a'i kearo'ari mai a'i katota'u.<sup>28</sup> Wai a'abi au kababonimi hanona aia'u aba to'ona, ia haeamona kamue kamai heremi. Wai au turaona'au aina'u raninai, au naeo Hama'u herena hanona aomi kenamo pokina ia hanona etarahi ba au.<sup>29</sup> Au taba neiakia bariu aba naba'iobi 'uainimi ba muriai katerama, ba weiakia katerama aonai wai hanona aba katoa'ikakauma.

<sup>30</sup> "Au wai kipokia a'i kaha'abi'abi homa'ana pokina

hanopaka neiana nipoki aina hauna aba nimai. Ia hanona au here'u ai ena hiabu aha'i,<sup>31</sup> ia hanopaka ke'ioquina, au hanona Hama'u naraona'au aina mai Hama'u ena 'abi ihobonai au nababaina. Tomikiri hamaka'a."

## 15

### *Iesu Hanona Bine Matiuna Tohana.*

<sup>1</sup> Iesu e'abi etibaha, "Au hanona bine matiuna toha'u, ia Hama'u hanona haharua poki hauna. <sup>2</sup> Ia nihore au re ikoikiai aha'uai a'i tebua'a haukia hanona nikabe obonakia mai re weiakia tebua'a haukia ikoikiai ia nihore nirorinakia katemahamaha weiana buakia bo'ona katehore ahinakia.<sup>3</sup> Wai hanona 'abi neiakia ahinabe ainimi haukia paukiai aba tomahamaha. <sup>4</sup> Wai au ao'uai katomiaho, au abomo wai aomiai kamiaho. Re kipona a'i kebua'a 'abaea, ia re hanona bine matiuna ahanai kekomo 'au harai hanona kebua'a. Weiana ihobonai mo wai au hau'uai a'i katokomo 'au harai hanona buami a'i katerama.

<sup>5</sup> "Au hanona bine matiuna wai hanona rena. Hau ha au ao'uai, mai au ia aonai namiaho hauna hanona buabua bo'okia kebaramanakia, au katohabona'u raninai wai taba ha katobabaina hanona a'i ketaina. <sup>6</sup> Hau ha au ao'uai a'i kemiaho raninai, ia hanona katene'ena re 'abana ke'ororo. Ba re uahomakia hanona katebararonakia iruba aonai katekapo totonakia weia kate'ara.

<sup>7</sup> "Wai au ao'uai katomiaho mai e'u 'abi wai aomiai katemiaho raninai tonuataeai tabakia katonoiakia haukia ikoikiai Hama'u kehore kebenimi. <sup>8</sup> Wai buabuami katebo'o au i'aba'u haumi ai katoao raninai Hama'u ena nuabi kewaira tina. <sup>9</sup> Hama'u au niraona'au aina'u ihobonai, au abomo wai ua naraona'au aihonimi. Bariu hanona e'u raona'au aonai katomiaho. <sup>10</sup> Au Hama'u ena rauhubu 'abikia ababua 'aunakia paunai ena raona'au aonai namiaho, ihobonai wai

e'u rauhubu 'abikia katobabua 'aunakia raninai, wai abomo au e'u raona'au aonai katomiaho. <sup>11</sup> Au 'abi neiana aba ahinabe ainimi buonai e'u aonamo hanona wai aomiai kemiaho, weianai emi aonamo hanona keapa'ua harai. <sup>12</sup> Au e'u rauhubu 'abina hanona neiana. 'Abami ha ha katoraona'au ainakia ihobona mo au wai araona'au ainimi 'abana. <sup>13</sup> Hau ha ena raona'au keapa'uana ki'a baha ena hau herekiai raninai, ena mauri kebaibeni ia paukiai. <sup>14</sup> Au taba a'uhina hauna katobabaina raninai, wai hanona au e'u hau. <sup>15</sup> Bariu keaoaina aonai au a'i kapari muenimi ta'ara'i haumi, pokina ta'ara'i hauna hanona ena poki hauna taba nibabaina hauna ia a'i e'ioquina. Ia au wai naparinimi e'u hau, pokina taba Hama'u herenai a'iobi haukia aba a'iobinimi.

<sup>16</sup> "Wai au a'i totina'ana'u 'a au wai atina'animi mai a'itaeanimi weiana katoao buabuami katorabrama, buabua weiakia katemiaho banaihanai. Ba taba au ata'uai katonoi ainakia haukia Hama'u kehore kebenimi. <sup>17</sup> E'u rauhubu 'abina hanona neiana. 'Abami ha ha katoraona'au ainakia.

### *Hanopaka Haukia kate'oatanimi.*

<sup>18</sup> "Hanopaka haukia kate'oatanimi raninai, kato'ioquina ia au te'oata 'uaina'u ba wai ti'oatanimi. <sup>19</sup> Wai hanopaka 'eunai katoao raninai, ia kehore keraona'au ainimi ihobona ia 'euna tohana. Ia wai hanona hanopaka 'euna aha'i. Ia au hanopakai atina'animi paunai hanopaka nihore wai ni'oatanimi. <sup>20</sup> 'Abi heremai ahina haukia katoraona 'ininakia, ta'ara'i hauna hanona ena poki hauna a'i etara haona. Au kateba haiaranau raninai, wai abomimo kateba haiaranimi. Au e'u 'abi katebabua 'aunakia raninai wai abomimo emi 'abi katebabua 'aunakia. <sup>21</sup> Wai hanona au eu'u paunai hoaho neiakia heremai katebabainakia, pokina euhuna'u hauna a'i te'ioquina.

<sup>22</sup> "Au a'i pamai a'i pahina benakia raninai ia hanona ekia ki'a behona peaha'i. Ia bariu ekia ki'a katebunina taearana hanona aba aha'i.<sup>23</sup> Hau ha au ni'oatana'u hauna hanona Hama'u abomo ni'oatana.<sup>24</sup> Au hoa neiakia hau ha a'i ebabai haukia a'i pababainakia ia baiatakiai raninai ia ekia ki'a hanona peaha'i. Ia bariu hanona hoa neiakia aba teihanaakia, iamo au Hama'u ohi tararua ti'oatananamai.<sup>25</sup> A ia neiana tebabaina hanona 'abi weiana ekia rauhubu pukana aonai tererena hauna katebato-hana paunai,  
'Ta au te'oata 'abaeana'u hanona ena poki aha'i."

Sal 35.19; 69.4

<sup>26</sup> "Baraibarai hauna 'abi tohana Auba Robena, Hama'u herenai kemai kauhuna kewahi heremi, ba ia hanona au pou'u kehinana.<sup>27</sup> Weiana wai abomimo au pou'u katohinana pokina kipokia po-pounai hamiaho emai mo bariu."

## 16

<sup>1</sup> Iesu ehina benakia etibaha, "Au 'abi neiakia ikoinai ahinanakia heremiae ena poki hanona emi a'ikakauma a'i me'akauma marikina.<sup>2</sup> Wai hanona mareai kateba karahinimi. 'Abi tohana beraura ha kemai aonai maearima katehore kateahu 'arinimi, ia kateraonana babai weiana hanona aba Tirama tibanamona.<sup>3</sup> Taba neiakia katebabainakia heremiae pokina ia hanona Hama'u 'ao au a'i te'iobinamai.<sup>4</sup> Ia 'abi neiakia heremiae ahinanakia hanona ranina kemai aonai au aba'iobinimi 'abikia aba katoraona tinanakia.

### Auba Robe Ena Aka.

"Ia 'uainai hanona a'i ahina benimi pokina au wai kipokia hamiaho paunai.<sup>5</sup> Ia bariu au hanona aba naeao euhuna'u Tiramana herena, ia wai hau ha a'i nubakaina'u a'i notibaha, 'Oi hanona aeana nuao?'<sup>6</sup> Ia 'abi neiakia ahinanakia heremiae paunai aomi aoko'o mo ebonu.

<sup>7</sup> 'Abi tohana mo au wai nahina benimi, au kaeao hanona wai namo katoa'ina. Pokina au a'i kaeao raninai baraibarai hauna a'i kemai heremi, iamo au kaeao raninai ia kauhuna kemai heremi.<sup>8</sup> Weiana ia kemai raninai hanopaka haukia ki'a, bero mai Tirama ena bakai taearana a'i te'iobina hauna keba'iobinakia.<sup>9</sup> Ia ki'a robana keahuna pokina maearima au a'i tia'ikakaumana'u.<sup>10</sup> Bero robana keahuna pokina au naeao Hama'u herena ba wai hanona au a'i katoiha muena'u paunai.<sup>11</sup> Bakai robana keahuna pokina hanopaka neiana obiana hauna aba bakai ea'ina puma nihoaina paunai.

<sup>12</sup> "Au hanona 'abi bo'ona temiaho wai pahina benimi, iamo katoa'inakia hanona a'i ketainimi.<sup>13</sup> Weiana 'abi tohana Auba Robena kemai raninai, ia kehore ke'uai ainimi 'abi tohana taearana ikoikiai aokiai. Ia kipona ena nuataeai a'i ke'abi, ia taba niona hauna mo kehinana mai taba kerama hauna wai keba'iobinimi.<sup>14</sup> Ia kehore e'u nuabi kebawaira tinana pokina taba au here'uai kea'i haukia wai keba'iobinimi.<sup>15</sup> Hama'u ena taba ikoikiai hanona au 'eu'u. Weiana buonai a'abi atibaha, Auba Robe taba 'eu'uai hauna kea'ina wai keba'iobinimi.<sup>16</sup> Rani papana aonai wai au a'i katoihana'u, ba rani papana murinai hanona wai au katoihana'u."

### Aoko'o Mai Aonamo.

<sup>17</sup> Ia i'abana haukia baika kipokia baiatakiai tebakai bakai tetibaha, "Ni'abi netibaha, 'rani papana aonai a'i katoihana'u, ba rani papana murinai hanona wai au katoihana'u,' 'pokina au hanona Hama'u herena naeao,' 'abi weiana anina hanona taba?'"<sup>18</sup> Ia kipokia te'abi 'abi tetibaha, "Rani papana anina hanona taba? Aika ia taba ne'uhina hauna obona a'i nahaobo."

<sup>19</sup> Iesu e'iorina i'abana haukia tenuatae katebakaina buonai ehina benakia etibaha, "E'u 'abi

neiana, 'rani papana aonai a'i katoihana'u ba rani papana muri-nai wai au katoihana'u' hauna wai kipomi baiatamai tubakai bakai aina, 'u? <sup>20</sup> 'Abi tohana au wai nahina benimi, wai hanona katohai mai aomi kehaihai, iamo hanopaka maearimakia hanona kateaonamo. Wai hanona aomi keaoko'o, ia emi aoko'o hanona kebaebo aonamoai keao. <sup>21</sup> Babi'e ha miori kebaramana raninai nihaiara pokina ena mauri ranina aba etaina, ia miori aba erama raninai ena haiara nirea 'iti'itina ia aona ninamo pokina miori ha aba erama hanopakai. <sup>22</sup> Ihobona uahomana bariu hanona emi aoko'o beraurana, ia au hanona wai kaiha muenimi weiana wai katoaonamo, ba hau ha emi aonamo weiana a'i kea'i parena.

<sup>23</sup> Rani weiana kemai aonai wai hanona au here'uai taba ha a'i katobakai bakaiaina. 'Abi tohana au wai nahina benimi, tonuatae tabakia au ata'uai Hama'u katonoina hanona kebenimi. <sup>24</sup> Ata'uai a'i tonoi 'apua emai mo bariu. Wai katonoina hanona kebenimi katoa'ina, weiana emi aonamo hanona aomiai kebonu 'auna.

### *Iesu Ehore Hanopaka Ehaohaina.*

<sup>25</sup> "Au ahina benimi 'abikia ikoinai hanona 'abi ibabatai ai ahinanakia, ia ranina kemai aonai au wai 'abi ibabatai ai a'i kahina benimi, ia Hama'u pouna kahina haraina. <sup>26</sup> Rani weiana aonai au ata'uai katonoi, ia au a'i na'abi Hama'u kanoina wai kebarainimi, <sup>27</sup> pokina Hama'u kipona wai niraona'au ainimi, weiana wai au turaona'au aina'u, abomo au Tirama herenai amai hauna tubatohana'u paunai. <sup>28</sup> Au hanona Hama'u herenai ba amai hanopaka neianai namiaho, ia bariu hanona hanopaka nahabona namue naeao Hama'u herena."

<sup>29</sup> Weiana i'abana haukia tehina bema tetibaha, "Bariu emu 'abi hanona ea harai, 'uaina 'abi

ibabataiai o'abi 'abana aha'i. <sup>30</sup> Bariu ai hanona oi a'i katabakai mueni'o, ba aba ta'ioquina oi hanona taba ikoikiai o'ioquinakia, weiana ai nuba a'ikakaumanamai oi hanona Tirama herenai omai."

<sup>31</sup> Iesu ekiia 'abi eba muena etibaha, "Bariu mo muri 'akina tua'ikakaumana'u, u?" <sup>32</sup> Rani hanona nimai, ia aba ekara'au, weiana wai ikoimiai katorama otaraina, haha emi aiara katoao.

Au katohabona'u kaikupai. Iamo au hanona a'i kaikupai, pokina Hama'u hanona au here'uai. <sup>33</sup> Au wai 'abi neiakiai aba ahina benimi, au wai kipokia kahabahamomo aonai baibua katoa'ina. Hanopaka neiana hanona kebatetuanimi, ia katonuako'o, au hanona hanopaka aba ahao haina."

## 17

*Iesu I'abana Haukia Mai A'ikakauma Haukia Ikoikiai Paukiai Ebahuba'ari.*

<sup>1</sup> Iesu 'abi neiana ehinana murinai, ea'a taea kupa eihana ba ebahuba'ari etibaha, "Hama'u e, rani aba ekara'au nahumu ena nuabi mobawaira tinana, ba nahumu abomo oi emu nuabi kebawaira tinana. <sup>2</sup> Pokina oi hiabu obena maearima ikoikiai ke'uai ainakia, maearimakia ikoikia weialka oi ohore nahumu obena haukia mauri banaibana kebenakia. <sup>3</sup> Mauri banaibana hanona neiana, maearima oi kate'iobini'o, oi hanona ikupiamu mo Tirama tohamu, abomo kate'ioquina Iesu Keriso oi ouhuna hauna.

<sup>4</sup> "Aka obena'u kababaina hauna aba abaorena, ba emu nuabi hanopaka ahanai aba abaiha baihaina. <sup>5</sup> Hama'u e, nuabi weiana hanopaka a'i erama baha aonai heremua hamiaho aina hauna ihobonai bariu wairamuai e'u nuabi mobawaira tinana.

<sup>6</sup> "Au atamu abawaira tinana maearima neiakia wairakiai, ia hanona oi 'eumu oi ohore au obena'u, ba ia emu 'abi

aiana teka'aina. <sup>7</sup> Bariu ia aba te'iobina taba ikoikiai obena'u haukia hanona oi heremuai temai. <sup>8</sup> Pokina 'abi weiakiai ohina bena'u haukia, ia aba'ibinakia hanona tea'i taeanakia, ba te'iobina au hanona oi heremuai amai abomo tebatohana oi hanona au ouhuna'u.

<sup>9</sup> "Au ia paukiai nabahuba'ari. Au hanopaka maearimakia paukiai a'i nabahuba'ari, ia weiakia obena'u haukia paukiai, nabahuba'ari pokina ia hanona oi 'eumu. <sup>10</sup> Au 'eu'u haukia ikoikiai hanona oi 'eumu, oi 'eumu haukia ikoikiai hanona au 'eu'u, ba ia paukiai e'u nuabi ewaira tina.

<sup>11</sup> "Au hanona hanopaka nahabona ba kawahi oi heremu, 'a ia hanona hanopakai temiaho oho. Hama'u Robemu e, atamu weiana obena'u hauna hiabunai ko'aeabunakia weiana ia ketehamomo ihobona aika habahamomo 'abana. <sup>12</sup> Au ia kipokia tamiaho aonai a'ima harainakia oi atamu obena'u hauna hiabunai a'aeabunakia. Ha a'i e'akauma, 'a ke'akauma maearimana hamona hauna mo e'akauma, puka robena 'abina kebatohana paunai. <sup>13</sup> Au hanona bariu nawahi oi heremu, ia hanopakai namiaho oho aonai 'abi neiakia nahnakanakia, weiana ia aokiai e'u aonamo maikoina katea'ina.

<sup>14</sup> "Emu 'abi aba abenakia ba hanopaka hanona aba ni'oatanakia, pokina au hanona hanopaka 'euna aha'i ihobona ia abomo hanopaka 'euna aha'i.

<sup>15</sup> E'u noi hanona hanopakai a'i koa'i parenakia ia tiaporoherenai ko'aeabunakia. <sup>16</sup> Au hanona hanopaka 'euna aha'i ihobonai ia abomo hanopaka 'euna aha'i. <sup>17</sup> Emu 'abiai kobarobenakia emu maearima tohakiai kateao, emu 'abi hanona 'abi tohana. <sup>18</sup> Oi au ouhuna'u amai hanopaka maearimakia baiatakiai amiaho

ihobona mo au ia auhunakia teao hanopaka maearimakia baiatakiai temiaho. <sup>19</sup> Ia paukiai au kipo'u abarobena'u oi 'eumu, weiana ia abomo kipokia kateba robenakia oi 'eumu.

<sup>20</sup> "Au e'u bahuba'ari hanona ia mo ikupaiakia ahakiai aha'i, ia ekia 'abiai au katea'ikakauma'u haukia ahakiai abomo nabahuba'ari. <sup>21</sup> Hama'u e, oi hanona au ao'uai mai au hanona oi aomuai, ihobonai ia ikoikiai hanona aokia kehamona. Ia abomo katemai aika aokai weianai hanopaka maearimakia kate'iobina oi hanona au ouhuna'u. <sup>22</sup> Nuabi obena'u hauna aba ia abenakia, weiana oi mai au aoka ehamona ihobonai ia abomo aokia kehamona. <sup>23</sup> Au hanona ia aokiai mai oi hanona au ao'uai. Ba ia aokia kehamomo harai hanopaka maearimakia kate'iobina oi hanona au ouhuna'u, au oraona'au aina'u ihobonai oi ia abomo nu-raona'au ainakia.

<sup>24</sup> "Hama'u e, au nanuatae weiakia obena'u haukia kipokia au ae'eai hanona ia abomo weia, ba ia weia e'u nuabi kateihana, nuabi weiana hanona hanopaka a'i obabai bahana aonai oi au oraona'au aina'u paunai obena'u hauna. <sup>25</sup> Hama'u bero haumu e, hanopaka maearimakia hanona oi a'i te'iobini'o, ia mo au hanona oi a'iobini'o mai e'u maearima neiakia te'iobina oi hanona au ouhuna'u. <sup>26</sup> Au hanona oi atamu aba'ibinakia mai rani ikoinai kaba'iohi to'onakia, pokina emu raona'au here'uai hauna hanona ia herekiai abomo kemiaho, ba au abomo ia aokiai kamiaho."

## 18

*Iesu Tea'ina Tebirina.  
(Mt 26.47-56; Mk 14.43-50; Lk 22.47-53)*

<sup>1</sup> Iesu ena bahuba'ari neiana ehinana epua murinai i'abana

haukia kipokia Kidron tatairanai tekabani teao Olibe haharuana aonai tekatoto.<sup>2</sup> Hinahina hauna Iuda abomo 'eka weiana e'io bina, pokina rani bo'ona Iesu mai i'abana haukia kipokia 'eka weianai teto'u.<sup>3</sup> Weiana Iuda ehore robe haukia apa'uakia mai Parisea haukia ekia miori weiakia marea robe teiha 'inina haukia mai huari haukia to'ukiai ebaka'anakia, imakia mai irubakia mai ramepakia abomo huari tabakia tea'i haharua weiana aonai tekatoto.<sup>4</sup> Iesu taba herenai katerama haukia ikoinai aba e'io bina, ua buonai ekahaha eao herekia ebakainakia etibaha, "Wai tai tutabuna?"

<sup>5</sup> Ia te'abi tetibaha, "Iesu Nasareta hauna." Ba Iesu e'abi, "Au neia'u." Hinahina hauna Iuda abomo weia kipokia tekoroti.<sup>6</sup> Iesu e'abi "Au neia'u." raninai ia teta'u teheme te'eho 'anoai tenoti.

<sup>7</sup> Iesu haeamona ebakai mue-nakia etibaha, "Wai tai tutabuna?" Ba ia te'abi mue tetibaha, "Iesu Nasareta hauna."<sup>8</sup> Iesu ehina benakia etibaha, "Aba ahina benimi 'au neia'u.' Wai au tutabuna'u raninai, hau neia kia katohabonakia kateka'a."<sup>9</sup> Babai neianai ena 'abi 'uaina ehinana hauna "Aba obena'u haukia ikoinai ha a'i aba'akaumana." hauna ebatohana.

<sup>10</sup> Simona Petero hanona mai ena kareba, ba weiana eberi 'auna, robe haukia arakiai hauna ena ta'ara'i hauna haiana itipana ehara obona. Ta'ara'i hauna weiana atana hanona Malaku.<sup>11</sup> Weiana Iesu Petero e'abi pahihi bena etibaha, "Kareba naiana iutana 'ekanai' moutana. Haiara 'erenia neiana Hama'u ebena'u hauna a'i kainu, u?"

### *Iesu Teaoaina Anna Herena.*

<sup>12</sup> Weiana huari haukia ekia poki hauna kipokia mai Iuda haukia apa'uakia marea robe teiha 'inina haukia kipokia Iesu tea'ina tebirina,<sup>13</sup> Anna herena teaoai 'uaina, pokina Anna

hanona Kaiafa rawana. Kaiafa hanona robe haukia 'arakiai hauna ihau weianai.<sup>14</sup> Weiana 'uainai Kaiafa ena raonai Iuda haukia apa'uakia ehina benakia etibaha, "Namona hanona hau hamona ke'ari maearima ikoikiai paukiai."

*Petero Rani Kori'uaina Iesu Ebuniai aina.*  
(Mt 26.69, 70; Mk 14.66-68; Lk 22.55-57)

<sup>15</sup> Simona Petero mai Iesu i'abana hauna ha ohi Iesu murinai teao. I'abana hauna weiana hanona robe haukia arakiai hauna e'io bobi haraina paunai ia hanona Iesu murinai robe haukia arakiai hauna ena itu parabuna aonai ekatoto.<sup>16</sup> 'A Petero hanona ua'a pa'abi 'akonai eba'iima, i'abana hauna weiana robe haukia arakiai e'io bobi haraina hauna emue emai pa'abi ne'imana uahona ehina bena, ba Petero ebatotona parabu aonai.<sup>17</sup> Pa'abi ne'imana uahona weiana Petero ebakaina etibaha, "Oi abomo hau weiana i'abana haumu ha, u?" Petero etibaha, "Au aha'i."<sup>18</sup> Ama ranina buonai ta'ara'i haukia mai marea robe teiha 'inina haukia iruba teba'arana herenai tekoroti eraranakia haukia katehiabunakia. Petero abomo ia baiatakiai iruba eraranakia.

*Robe Haukia 'Arakiai Hauna Ehore Iesu Ebakaina.*  
(Mt 26.59-66; Mk 14.55-64; Lk 22.66-71)

<sup>19</sup> Rani weianai robe haukia 'arakiai hauna Anna, Iesu herenai i'abana haukia mai ena ba'io bi 'abikia ebakai bakai ainakia.<sup>20</sup> Iesu ia ena 'abi ebamuena etibaha, "Au hanona rani ikoikiai mako wairakiai a'abi'abi, au rani ikoikiai Iuda haukia ekia to'u 'ekakiai weia marea aokiai mai marea robe aonai aba'io bi, au 'abi ha a'i abuni 'apuana.<sup>21</sup> Aehoma buonai oi au nubakaina'u? Weiakia e'u 'abi teona haukia mobakainakia, ia te'io bina au 'abi tabana ahinana."

<sup>22</sup> Iesu ua e'abi aiho raninai weia marea robe teiha 'inina hauna

ha emikiri Iesu wairana ebo'ana etibaha, "Robe haukia 'arakiae hauna ena 'abi ua a'i kobamue aihona." <sup>23</sup> Iesu e'abi etibaha, "Au 'abi ha ahina ki'ana raninai, weiana hauna mohina karahina. Ia au 'abi berona ahinana raninai taba buonai obo'ana'u?"

<sup>24</sup> Weiana Anna ehore Iesu eu-huna imana ibiri 'ini eao Kaiafa robe haukia arakiae hauna herena.

*Petero Iesu Ebuniae ai Muena.*  
(Mt 26.71-75; Mk 14.69-72; Lk 22.58-62)

<sup>25</sup> Simona Petero hanona weia iruba herenai ekoroti erarana. Weiana tebakaina tetibaha, "Oi abomo ia i'abana haumu ha, u?" Ia ebuniae etibaha, "Au hanona aha'i."

<sup>26</sup> Robe haukia arakiae hauna ena ta'ara'i hauna haiana Petero ehara obona hauna hatia'ana ha ehore Petero ebakaina etibaha, "Weia haharua aonai oi Iesu kipokia aihanimi, u?" <sup>27</sup> Petero haeamona ebuniae mue aonai, kokoro'u beronai e'arara.

*Iesu Pilato Wairanai.*  
(Mt 27.1, 2, 11-14; Mk 15.1-5; Lk 23.1-5)

<sup>28</sup> Iuda haukia apa'uakia Iesu Kaiafa ena ituai tebaka'ana teaoaina Kabana hauna ena aka itunai. Kabana hauna hanona Romai emai. Weiana hanona aba rani nirenenia ba Iuda haukia apa'uakia hanona Kabana ena itu aonai a'i tekatoto, pokina ia hanona ekia hoahoa tainai Tirama wairanai a'i kate'opu Kabanai tatuna aonai kateaniani paunai. <sup>29</sup> Ua buonai Pilato ekarahi eao herekia ebakainakia etibaha, "Hau neiana beho taba ebabaina buonai tomaiaina here'u?" <sup>30</sup> Ia ena 'abi tebamuena tetibaha, "Ia ki'a aha'i ebabaina raninai ai hanona ia a'i patamaiaina oi heremu."

<sup>31</sup> Pilato ehina benakia etibaha, "Wai kipomi tomoaoaina emi rauhubu ihobonai tomobabakaina." Iuda haukia apa'uakia te'abi tetibaha, "Ai hau ha 'ariai katahorotina hanona emai

rauhubuai hiabu uahomana aha'i." <sup>32</sup> Neiana erama hanona Iesu ena 'abi ehinana hauna ia aea ke'ari aiho 'abina ketohana.

<sup>33</sup> Pilato ena aka itunai etoto ba Iesu eparina, ebakaina etibaha, "Oi hanona Iuda haukia ekia obia 'arana, u?" <sup>34</sup> Iesu ia ena 'abi ebamuena etibaha, "Bakaibakai naiana hanona oi kipomu emu raonai nohinana, 'ao maearima baika au roba'u teahuna heremuai hauna nohinana?" <sup>35</sup> Pilato Iesu ena 'abi ebamuena etibaha, "Ba oi nuraonana au hanona Iuda hau'u? Oi emu maearima tohakia mai robe haukia apa'uakia oi temaiaini'o here'u. Oi beho taba obabaina?"

<sup>36</sup> Iesu e'abi etibaha, "E'u obia 'ekana hanona hanopaka neiana 'eunai aha'i. Ia e'u obia 'ekana hanopaka neiana 'eunai raninai, e'u maearima pate'au aina'u, Iuda haukia apa'uakia imakiae patebamaurina'u, ia mo e'u obia aiarana hanona hanopaka neianai aha'i."

<sup>37</sup> Pilato ia ebakaina etibaha, "Oi hanona obia 'arana ha, u?" Iesu ia ena 'abi ebamuena etibaha, "Abi mo naiana aba nohinana, au hanona obia 'arana ha, au arama amai hanopakai ena poki hanona 'abi tohana kabawaira tinana. 'Abi tohana tainai temiaho haukia hanona au aia'u kateona." <sup>38</sup> Pilato e'abi etibaha, "Abi tohana hanona taba?"

Ua e'abi aiho, ba ekarahi mue Iuda haukia apa'uakia ehina benakia etibaha, "Hau neiana herenai beho ha a'i atabu ahina.

<sup>39</sup> Weiana wai emi hoahoa tainai Kabanai tatuna ranina nitaina hanona wapura hauna ha nabakarahina heremi. Ba wai tonuatae Iuda haumi emi obia 'arana Iesu neiana kabakarahina, u?" <sup>40</sup> Weiana ena 'abi ioai tebamuena tetibaha, "Aha'i. Hau naiana aha'i. Ai tanuatae Baraba kabenamai." Baraba hanona kakikaki hauna.

## 19

*Pilato E'abi Iesu Matiu Ibiriropo 'Ubinai Kateahu 'arina.*  
*(Mt 27.15-31; Mk 15.6-20; Lk 23.13-25)*

<sup>1</sup> Weiana Pilato 'abi ebaibeni huari haukia Iesu tea'ina teaoaina te'atina. <sup>2</sup> Huari haukia 'ini boa boa tehao kaiaronia ia aranai tebabau'una, abomo habuni birona ha ia tebabatotona. <sup>3</sup> Weiana tekai haha kai haha herenai te'abi tetibaha, "Iuda haukia ekia Obia 'arana e, komauri banai banai!" Ba wairana tebo'ana.

<sup>4</sup> Pilato haeamona ekarahi, Iuda haukia apa'uakia ehina benakia etibaha, "Tomobahu, au kahore wairamiai kabakarahina weianai kato'io bina herenai beho ha a'i atabu ahi 'apuana." <sup>5</sup> Weiana Iesu ekarahi aonai 'aranai 'ini boaboa iha o kaiaro tebabau'una mai habuni birona tebabatotona ia haunai. Pilato ehina benakia etibaha, "Tomoihana, hauna neiana."

<sup>6</sup> Robe haukia apa'uakia mai marea teiha 'inina haukia Iesu teihana raninai teio tetibaha, "Matiu ibiri ropo 'ubinai tomoahu 'arina, matiu ibiri ropo 'ubinai tomoahu 'arina!" Pilato ia ehina benakia etibaha, "Wai kipomi tomoa'ina, matiu ibiri ropo 'ubinai tomoahu 'arina, pokina au beho ha ia hereinai a'i atabu ahina." <sup>7</sup> Iuda haukia apa'uakia ia ena 'abi tebamuenetetibaha, "Ai hanona mai emai rauhubu. Rauhubu weiana tainai ia hanona ke'ari, pokina ia kipona Tirama nahunai nibaona."

<sup>8</sup> Pilato aja weiana eona raninai eta'u banaina. <sup>9</sup> Pilato ena aka itunai ekatoto mue, Iesu ebakaina etibaha, "Oi ae'eai omai?" Ia Iesu 'abi ha a'i ehinana. <sup>10</sup> Weiana Pilato e'abi etibaha, "Oi noubo a'i kohina bena'u, u? Oi o'io bina au hanona mai e'u hiabu oi karubuni'o, 'ao matiu ibiri ropo 'ubinai kahu 'arini'o?"

<sup>11</sup> Iesu ia ena 'abi ebamuena etibaha, "Tirama hiabu oi a'i pebeni'o raninai oi au koahu

'arina'u hiabuna hanona here-muai aha'i. Ua buonai hau weiana imamuai eutana'u hauna ena ki'a hanona eapa'ua ki'a baha ba oi 'eumu." <sup>12</sup> Rani weianai Pilato taeara etatu Iesu kerubuna. Ia Iuda haukia apa'uakia teio to'ona tetibaha, "Hau naiana korubuna raninai oi hanona obia 'arana Kaisa ena maearima aha'i. Hau ha ia kipona obia 'arana nibaona hauna hanona Kaisa ni'oatana."

<sup>13</sup> Pilato 'abi neiana eona raninai Iesu ebakarahina, ba ia hanona ena bakai 'ekana imia'aunai emiati, 'eka weiana atana teaparina hanona 'pihara panabana', Heberu maeakiai atana hanona 'Gabata'. <sup>14</sup> Rani weiana hanona Kabanai tatuna ia'ia'i haraina ranina, beraura hanona aba eatiaha, Pilato Iuda haukia ehina benakia etibaha, "Emi obia 'arana neiana tomoihana." <sup>15</sup> Weiana ia teio tetibaha, "Tomoahu 'arina, tomoahu 'arina, matiu ibiri ropo 'ubinai tomoahu 'arina!" Pilato ebakainakia etibaha, "Wai au tonuataena'u emi obia 'arana naiana kahu 'arina?" Robe haukia apa'uakia te'abi tetibaha, "Emai obia 'arana ha aha'i, Kaisa mo ikupaiana." <sup>16</sup> Weiana Pilato ehoire Iesu huari haukia imakiai eutana matiu ibiri ropo 'ubinai kateahu 'arina. Ba huari haukia Iesu tebaka'ana teaoaina.

*Iesu Matiu Ibiriropo 'Ubinai Tekoko 'auna.*

*(Mt 27.32-44; Mk 15.21-32; Lk 23.26-43)*

<sup>17</sup> Kipona ena matiu ibiri ropo ebuana teao 'eka ha atana 'Ara 'ou'ouna', Heberu maeakiai hanona 'Golgota'. <sup>18</sup> Weia Iesu matiu ibiri ropo 'ubinai tekoko 'auna, hau rua abomo tekoko 'aunakia ha abirai ha abirai, Iesu hanona ibuakiai.

<sup>19</sup> Pilato hanona marere ha weia matiu ibiri ropo 'ubinai tekoko 'auna na erere aihona,

**'IESU NASARETA HAUNA, IUDA HAUKIA EKIA OBIA 'ARANA.'**

<sup>20</sup> Iuda haukia bo'okia marere weiana tetuabina, pokina

Iesu tekoko 'auna 'ekana mai Ierusalem aiarana hanona ba-iatakiai a'i eatau'ai ki'a baha. Abomo marere weiana hanona Heberu maeakiai, Roma maeakiai mai Helene maeakiai tererena.<sup>21</sup> Weiana Iuda haukia ekia robe haukia apa'uakia Pilato tehina bena tetibaha, "Iuda haukia ekia Obia 'arana' a'i porerena. Ia na porere aihona, 'Kipona e'abi, Au hanona Iuda haukia ekia Obia 'arana.'

<sup>22</sup> Pilato ekia 'abi ebamuena etibaha, "Abi na aha'i, aba arere 'auna hauna uahomana mo kemi-aho."

<sup>23</sup> Huari haukia Iesu tekoko 'auna murinai ena habuni tea'ina tetapa banina haha puakia tea'i. 'A ena habuni ibatoto aonai hauna hanona itaiore aha'i, maikoina hanona 'ubinai tetaina emai mo ba'ai epua. <sup>24</sup> Huari haukia kipokia te'abi'abi tetibaha, "A'i kahatapana ia pu'iai kaha'io bina tai kea'ina." Na erama aiho hanona Puka robenai tererena 'abina weiana, "Ia e'u habuni tewatena, e'u ibatoto hanona tepu'i aina"

Sal 22.18

hauna ketohana. Ba huari haukia hanona babai neiana tebabaina.

<sup>25</sup> Matiu ibiri ropo herenai tekoroti babi'ekia hanona Iesu hinana mai hinana hatina, ba Maria Klopa atawana mai Maria Magadala babi'ena. <sup>26</sup> Iesu hinana mai i'abana eraona'au aina hauna weia tekoroti eihanakia, ba hinana ehina bena etibaha, "Hina'u e, nahumu naiana."

<sup>27</sup> I'abana hauna herenai abomo ehina bena etibaha, "Aia'u mona, hinamu naiana." Rani weianai eaoaina i'abana hauna weiana ehore Maria ebaka'ana ena ituai temiaho.

*Iesu Ena 'Ari.*  
(Mt 27.45-56; Mk 15.33-41; Lk 23.44-49)

<sup>28</sup> Weiana murinai Iesu e'io bina aka ikoinai aba ebaorenakia, ba Puka robena 'abina kebatohana buonai e'abi etibaha, "Ako'u ni'ororo." <sup>29</sup> Puou ha weia bine

beina mabinai tebabonuna, ba poame ha tea'ina bine beina mabina aonai tehao uhuna, ba hiriboi tebiri 'auna, tetiu taeana eao pinana haianai.<sup>30</sup> Iesu bine beina manoina einu murinai e'abi etibaha, "Aba eore." Ba 'ekuna enobo, e'ari baihana.

### *Iesu Robuna Tekairuruna.*

<sup>31</sup> Bariu hanona a'ia'i harai wapuna ia mara hanona Kabanai tatuna, a'i kenamo 'ari haukia weia matiu 'ubinai katemiaho keao mo mara buonai, Iuda haukia apa'uakia Pilato tenoina, matiu 'ubinai tekoko 'aunakia haukia aekia huriakia kateahu hurinakia hauanikia katea'i obonakia.<sup>32</sup> Weiana huari haukia teao, Iesu kipokia tekoko 'aunakia haukia herekiai, ba hau kori'uaina aena huriakia teahu hurinakia, haeamona teao 'abana ha herenai aena huriakia teahu hurinakia.<sup>33</sup> Ia teao Iesu herenai teiha 'io bina aba e'ari hanona aena huriakia a'i teahu hurinakia.<sup>34</sup> Huari hauna ha ehore Iesu robuna arawaiai ekai ruruna, beronai mo aruaru mai bei tekiki oioi.<sup>35</sup> Mahanai eihana hauna abina aba ehinana, ia ena 'abi neiana hanona tohana, ia e'io bina ehinana hauna hanona tohana, ba wai ia ebatohana hauna kato a'ikakaumana.<sup>36</sup> Aka neiana erama hanona Puka robena 'abina "Huriana ha hamona a'i tebamohu 'apuana." hauna ebatohana.<sup>37</sup> Puka robenai ha haeamona e'abi etibaha, "Maearima robuna tekai ruruna hauna kateihana."

*Iesu Hauanina Tehorena.*  
(Mt 27.57-61; Mk 15.42-47; Lk 23.50-56)

<sup>38</sup> Iosepa Arimatea hauna abomo Iesu i'abana hauna ha, iamo kipona a'i ebawaira tinana pokina Iuda haukia apa'uakia eta'u ainakia. Taba weiakia murikiai ia eao Pilato herena enoi Iesu hauanina kea'i obona. Ba Pilato ena 'abiai Iosepa eao Iesu hauanina ea'i obona.<sup>39</sup> Nikodemo 'uainai rabi ha eao Iesu herena hauna abomo Iosepa e'abana

wapaea mai to'ore muramura timikia taburakia rua te'utenakia hauna ea'ina eaoaina, ena puma hanona kilogram harau aihau 'abana. <sup>40</sup> Weiana ia terarua Iesu huanina tea'ina muramurai teutuna mai habuni namona 'ari haukia tiapanakia haunai teapana, Iuda haukia ekia 'ari haukia tia'ia'i harainakia akana ihobonai tebabaina.

<sup>41</sup> Jesu teahu 'arina 'ekana hereinai hanona haharua ha, haharua weiana aonai 'ariahana mahamahana ha, aonai hanona 'ari hauna ha a'i tihore bahana. <sup>42</sup> Ba Iesu hanona weia tehorena, pokina 'ariahana weiana hanona herekiae abomo rani weiana hanona Kabanai tatuna a'ia'i haraina ranina.

## 20

*Iesu 'Ariai Emikiri Mue.*  
(Mt 28.1-8; Mk 16.1-8; Lk 24.1-12)

<sup>1</sup> Wapu kori'uaina Hui raurani wapurana Maria Magadala babi'ena eao 'ariahana keihana, mahana eao 'uri tekaiabuna piharana aba tea'i parena eihana. <sup>2</sup> Ia ebeau emue Simona Petero mai i'abana ha Iesu eraona'au aina hauna herekia e'abi etibaha, "Weiakia Obiapaka 'ariahanai aba tea'i parena, ai a'i ta'ioquina 'eka tabanai tehorotina."

<sup>3</sup> Weiana Petero mai i'abana hauna ha temikiri 'ariahana teao. <sup>4</sup> Terarua tebeau haeamona teao ba ha ehore Pereto ebeau haona e'uai eao 'ariahana. <sup>5</sup> Ia a'i etoto iamo 'uri 'akonai eriba toto, habuni namokia 'anoai tenoti haukia eihanakia. <sup>6</sup> Simona Petero murihai ebeau emai beronai eao 'ariahana 'urina aonai etoto, habuni namokia tenoti haukia eihanakia. <sup>7</sup> Abomo habuni ha Iesu 'arana te'apana hauna hanona iou harai habuni namokia kipokia a'i tenoti haeamo, ia 'eka haeai enoti. <sup>8</sup> Weiana aonai i'abana ha 'ariahanai ekara'au 'uai hauna etoto eao eihanakia ba ea'ikakauma. <sup>9</sup> Iamo Puka robena 'abina 'Ia hanona 'ariai kemikiri mue' hauna obona a'i tiobo baha.

*Iesu Hanona Maria Magadala Herenai Ewaira Tina.*  
(Mt 28.9, 10; Mk 16.9-11)

<sup>10</sup> Ba i'abana haukia rua temue ekia itu teao. <sup>11</sup> Maria hanona 'ariahana haianai ekoroti ehai, ehai aonai eriba toto 'ariahana aona eihana. <sup>12</sup> Weiana ia aneru rua habuni porekia tebatotonakia eihanakia, Iesu huanina tehorotina 'ekanai temiati, ha hanona aena tainai ha hanona 'arana tainai. <sup>13</sup> Ia tebakaina tetibaha, "Babi'e e, taba nuhai aina?" Ia e'abi etibaha, "E'u Obiapaka aba tea'i parena, 'ekana a'i a'ioquina ae'eai tehorotina." <sup>14</sup> Ua e'abi aiho ba ekori kabe hanona Iesu weia ekoroti eihana, ia a'i e'ioquina weiana hanona Iesu.

<sup>15</sup> Iesu ia ebakaina etibaha, "Babi'e e, taba nuhai aina? Tai nutabuna?" Maria eraonana ia hanona haharua i'imana hauna ha, ba e'abi etibaha, "Obiamu e, oi ia oaoaina ae'eai ohorotina hanona au moba'ioquina'u. Ba au kaeao ka'ina." <sup>16</sup> Iesu eapari, "Maria e!" Maria ekori kabe, Heberu maeanai e'abi etibaha, "Raboni!" ('Abi neiana anina hanona 'ba'ioobi haumu.') <sup>17</sup> Iesu Maria ehina bena etibaha, "A'i koa'i 'inina'u, pokina a'i nakara'au baha hama'u herena. Ia koao 'uahoaba'u kohina benakia, au hanona kakara'au au hama'u mai wai hamami abomo e'u Tirama mai emi Tirama herena kaeao."

<sup>18</sup> Weiana Maria Magadala babi'ena eao i'abana haukia ehina benakia ia Obiapaka eihana, haeamona Iesu 'abi ehinana haukia ia ehina benakia.

*Iesu I'abana Haukia Herekiae Ewaira Tina.*  
(Mt 28.16-20; Mk 16.14-18; Lk 24.36-49)

<sup>19</sup> Rani weiana hamonai wapu kori'uaina Hui beraura ekai-huna aonai, i'abana haukia ikoinai 'eka hamonai teto'una, itu pa'abina tekaiabunakia, pokina Iuda haukia apa'uakia teta'u ainakia. Ba Iesu eao baiatakiae ekoroti ehina benakia etibaha,

“Baibua heremiai kemiahō.”<sup>20</sup> 'Abi neiana ehinana muri-nai imana rua mai robuna ebaihanakia. Tabana haukia Obiapaka teihana buonai teaon-amo ki'a.<sup>21</sup> Iesu haeamona ehina benakia etibaha, “Baibua heremiai kemiahō. Hama'u au euhuna'u ihobonai, au abomo wai nauhunimi.”<sup>22</sup> Ua e'abi aiho murinai maeabuna ebahi benakia, e'abi etibaha, “Wai Auba Robe tomoa'ina.”<sup>23</sup> Maearima ekia ki'a katohina hao raninai ekia ki'a hanona ihina haoai kateao, ia ekia ki'a a'i katohina hao raninai ekia ki'a ihina hao aha'i.”

### *Toma Iesu Eihana.*

<sup>24</sup> Tabana haukia harau haea rua ha atana Toma, tiaparina bai'apaea, Iesu to'u weiana herekiai ewaira tina rabinai ia hanona weia baiatakiai aha'i.<sup>25</sup> Tabana haukia baika ia tehina bena tetibaha, “Ai Obiapaka taihana.” Ia Toma ehina benakia, “Au ikoko mani'akia imanai haukia kaihanakia haeamona ia robunai ima'u katiu totona, uahomana aha'i raninai au hanona ia a'i ka'ikakaumana.”

<sup>26</sup> Wapu 'ababani teao murinai i'abana haukia itu aonai teto'u mue, Toma abomo weia ia kipokia. Pa'abi tekaiabu 'inina. Iamo Iesu hanona eao ia baiatakiai ekoroti e'abi etibaha, “Baibua heremiai kemiahō.”<sup>27</sup> Ba ia Toma ehina bena etibaha, “Imamu riuriuna emai ima'u neiana moa'i 'apuana, abomo imamu emai robu'uai motiu totona, weiana aomu a'i kekai'au kai'au ia koa'ikakaumana'u.”<sup>28</sup> Toma Iesu ena 'abi ebaumea etibaha, “Oi hanona e'u Obiapaka, au e'u Tirama!”

<sup>29</sup> Iesu ia ehina bena etibaha, “Aba oihana'u buonai nua'ikakaumana'u. Ia weiakia a'i teihana'u iamo tia'ikakaumana'u haukia hanona tenamo.”

### *Puka Neiana Ena Poki.*

<sup>30</sup> Iesu hiabu hoakia bo'ona i'abana haukia waikiai ebabainakia haukia hanona

puka neiana aonai a'i arere 'aunakia.<sup>31</sup> Ia neiakia mo arerenakia ena pokī hanona wai katoa'ikakauma Iesu hanona Keriso, Tirama Nahuna. Weiana ia kato a'ikakaumana hanona atanai mauri katoa'ina.

## 21

### *Iesu Tabana Haukia Abaihau Hamomo Herekiai Ewaira Tina.*

<sup>1</sup> Weiana murinai, Iesu Tiberia\* obunai i'abana haukia herekiai ewaira tina mue, na ebawaira tina aihona.<sup>2</sup> Simona Petero, Toma tiaparina bai'apaea, Natanaela Galilea Kana hauna, Sebedeo nahuna rua, mai i'abana haukia rua abomo weia kipokia 'eka hamonai temiaho.<sup>3</sup> Simona Petero ehina benakia etibaha, “Au aba naeao kaba'eha.” Ia tetibaha, “Ai abomo kipokia hamaeao.” Weiana teao ahiai tehe'au, ia rabi weiana aonai hanona maia ha a'i tebarewana.

<sup>4</sup> Rani nirerena aonai Iesu hanona poe haianai ekoroti, ia i'abana haukia a'i te'lobina weiana hanona Iesu.<sup>5</sup> Ba Iesu ebakainakia etibaha, “E'u hau e, taba ha tobarewana?” Ia te'abi tetibaha, “Taba ha aha'i.”<sup>6</sup> Iesu haeamona ehina benakia etibaha, “Emi re'e ahi itipanai tomohorena, ba maia baika katobarewanakia.” Weiana tebabaina aonai re'e kateberi 'auna hanona a'i etainakia, pokina maia ebo'o ki'a baha.

<sup>7</sup> Ba Iesu i'abana hauna weiana eraona'au aina hauna ehore Petero ehina bena etibaha, “Weiana hanona Obiapaka.” Simona Petero hanona ena habuni ebakuri ahina eba'eha, ba 'abi neiana 'Ia hanona Obiapaka' hauna eona raninai emikiri ena habuni ehaina beronai obuai etobu.<sup>8</sup> Tabana haukia baika hanona ahiai re'e mai maiana ebonu hauna teberi ririna teaoaina poe, pokina poe hanona a'i ehoma'a roba hinabu hamomo 'abana.

<sup>9</sup> Ia poeai tekara'au raninai mahakia eao iruba baubaeana

\* 21:1: (1) 'ao Galilea

ahanai maia ihore'au teihanakia, parawa baika abomo weia. <sup>10</sup> Iesu ia ehina benakia etibaha, "Maia bariu toa'inakia haukia baika tomai ainakia." <sup>11</sup> Simona Petero emue ahiai ekara'au re'e eberi'auna poeai, re'e aonai maia rarikia mo 'abaeana ikoinai hinabu hamomo imabui aihau, maia rarikia 'abaeana ia ekia re'e hanona a'i etapa.

<sup>12</sup> Iesu ia eaparinakia etibaha, "Tomai, tomoaniani!" Ba i'abana haukia ia katebakaina, 'Oi tai?' hauna a'i tenuatae, pokina aba te'ioina ia hanona Obiapaka. <sup>13</sup> Iesu eka'a haha eao herekiae parawa ea'ina ba ebenakia, ihobonai maia abomo ua ebabai aihona.

<sup>14</sup> Neiana hanona Iesu 'ariai emikiri mue murinai rani ibai-hauna kipona i'abana haukia herekiae ewaira tina.

#### *Iesu Mai Petero.*

<sup>15</sup> Teaniani murinai Iesu Simona Petero ebakaina etibaha, "Simona Ioane nahuna e, oi emu raona'au here'uai eapa'ua ki'a baha ba neiaikia ekia raona'au, u?" Petero etibaha, "E, Obiapaka, o'ioina au 'arimu na'ari." Ba Iesu e'abi etibaha, "E'u mamoe nahu ko'ima harainakia."

<sup>16</sup> Rani ibaruana ebakai muena etibaha, "Simona Ioane nahuna e, oi au nuraona'au aina'u, u?" Petero etibaha, "E, Obiapaka, o'ioina au oi 'arimu na'ari." Ba Iesu e'abi etibaha, "E'u mamoe ko'ima harainakia."

<sup>17</sup> Iesu rani ibaihauna Petero ebakaina etibaha, "Simona Ioane nahuna e, oi au 'ari'u nu'ari, u?" Petero aona ehai hai pokina aba rani aihau ebakaina etibaha, "Oi au nuraona'au aina'u?" Weiana Petero e'abi etibaha, "Obiapaka e, oi hanona taba ikoinai o'ioinakia, o'ioina au oi 'arimu na'ari." Iesu etibaha, "E'u mamoe kobanianakia.

<sup>18</sup> 'Abi tohana au oi nahina beni'o, 'aru'arumuai raninai oi kipomu emu habuni obatotona abomo emu nuatae 'ekana ae'eai

hanona oao. Ia koanepaka raninai imamu kotiu ahinakia, hau ha kehore emu habuni kebabatotoni'o, keaoaini'o a'i nonuatae aina 'ekanai." <sup>19</sup> Iesu 'abi neiana ehinana hanona Petero aea ke'ari aiho Tirama ena nuabi kebawaira tinana. Ba ehina bena etibaha, "Muri'uai omai."

#### *Jesu I'abana Eraona'auai Ki'a Bahana Hauna Ena 'Abi.*

<sup>20</sup> Petero eiha kabe hanona Iesu i'abana niraona'au aina hauna eihana, ia hanona ani to'uai Iesu haunai ekape'au, ba ebakaina etibaha, "Obiapaka e, tai oi hinahinamu kehinahina?"

<sup>21</sup> Petero hau weiana eihana raninai Iesu ebakaina etibaha, "Obiapaka e, hau weiana hanona aea keho?" <sup>22</sup> Iesu ehole Petero ehina bena etibaha, "Panuatae ia pemiaho peaomo au pamue pamai, iamo oi emu aka hanona taba ia herenai? Oi hanona muri'uai omai." <sup>23</sup> 'Abi neiana paunai i'abana haukia kipokia baiatakiai te'abi'abi aina, i'abana hauna weiana a'i ke'ari na ehoma. Iamo Iesu hanona ua a'i e'abi aiho hau weiana a'i ke'ari, 'a ia e'abi, "Panuatae ia pemiaho peaomo au pamue pamai, iamo oi emu aka hanona taba ia herenai?"

<sup>24</sup> I'abana hauna weiana ehole 'abi neiakia ikoinai ehinanakia haeamona ererenakia, ba ha'ioina 'abi neiakia ehina haukia hanona tohakia.

<sup>25</sup> Iesu hanona hoa bo'ona 'akina ebabainakia. Au naraonana weiakia ikoikiai hamohamo temerere 'aunakia raninai, hanopaka maikoinai puka neiakia patebararonakia hanona 'ekana aha'i.

## IUHUBEAU EKIA AKA

### *Puka Aona Irerena 'Abina*

Puka neiana hanona Pou namona Luka ererena hauna muri-nai ererena. Puka neiana aonai kahaihana hanona Auba Robe ehore iuhubeau haukia taeara kateka'aina hauna ebaihanakia, weiana ia tehore Iesu pouna namona teiroro aina Ierusalemai mai Iudeai mai Samariai mai hanopaka puanai 'eka baika herekiae (1.8). Puka neiana hanona Keriso ena maearima to'ukia robakia eahuna, weiana Iuda haukia kipokia baiatakiae ea'i ramana, ba eapa'ua rani-nai, hanopaka maearima ekia a'ikakaumai eao. Luka hanona Keriso ena mauri robana eahu haraina mai ia murinai te'au haukia abomo, weiana hanona Keriso ehore Tirama ena 'abi'uai aba'uainai Isaraela haukia ebe-nakia hauna maikoina ebatoha haraina.

Puka neianai taba apa'uana ha robana eahuna weiana hanona Auba Robe ena aka, ia eriri emai iuhubeau haukia herekiae, ba e'uai ainakia mai ebataburankia. Taeara neianai Pou namona tea'i taeana, a'ikakauma haukia ekia bo'o hanona eapa'ua. Puka neiana aonai hanona iuhubeau haukia bo'ona orikia, haeamona Petero mai Paulo ekia aka tebabai 'abikia hanona tebo'o. Petero hanona iuhubeau hauna mai ia hanona Iesu e'abana. Iamo Paulo hanona uahomana aha'i. Kori'uainai Paulo ebatabura Iesu ena maearima kea'i ki'anakia. Iamo Iesu ia eaparina aonai eraona kabe, ba ta'ara'i haunai eao Iesu ena aka mo ebabainakia.

### *Puka Paipana Apa'uakia*

- Ba'oru 'abi tohana ihina pou. (1.1-26)
  - Iesu ena 'abi mai 'abi'uai orekia. (1.1-14)
  - Iuda 'ekana ia'ina hauna ha ia'i taea. (1.15-26)

- Ierusalemai 'abi tohana ihina pou. (2.1—8.3)
- Iudea mai Samariai 'abi tohana ihina pou. (8.4—12.25)
- Paulo ena aka maearima herekiae. (13.1—28.31)
  - Iroro akana harimana kori'uaina. (13.1—14.28)
  - Ierusalemai to'u 'abi'abina. (15:1-35)
  - Iroro akana harimana ibaruana. (15.36—18.22)
  - Iroro akana harimana ibai-hauna. (18.23—21.16)
  - Paulo wapura hauna Ierusalemai, Kaisareai, mai Romai. (21.17—28.31)

### *Iesu E'abi'uai Auba Robe Keuhuna Kemai.*

<sup>1</sup> Teofilo e, e'u puka 'uaina aonai Iesu ena aka mai ena ba'iobi ea'i ramanakia haukia, <sup>2</sup> emai mo ea'i taea kupa keao ranina pouna ikoikiae arerenakia. A'i ea'i taea baha aonai, Auba Robe hiabunai ena iuhubeau ia etina'anakia herekiae aka kate babainakia haukia robakia eahunakia. <sup>3</sup> Ena 'ari murinai, katebatohana ia hanona emauri toha paunai wapu bariabui aonai ia kipona rani bo'ona ewaira tina maearima wairakiae, abomo wairakiae Tirama ena obia aiarana pouna ehnana. <sup>4</sup> Rani ha ekia miato'uai Iesu 'abi neiana ebenakia etibaha, "Ierusalema a'i katohabona, ia Hama'u e'abi'uai aina Auba Robena kato'imana, 'abina weiana au wai aba ahina benimi. <sup>5</sup> Ioane hanona beiai maearima eba'uere robenakia, 'a wapu a'i kebo'o aonai wai hanona Auba Robe ai kato'uere robe."

### *Iesu Ekara'au Kupa Eao.*

<sup>6</sup> Iesu i'abana haukia kipokia tetou' u raninai ia tebakaina tetibaha, "Obiapaka e, bariu rani neianai Isaraela hanopakana ena hiabu kobeni muena, u?" <sup>7</sup> Iesu ekia 'abi ebamuena etibaha, "Rani mai wapu hanona Hama'u kipona ena hiabuai aba eba'orunakia, wai emi bero aha'i taba neiana aita kerama hauna

kato'ioibina. <sup>8</sup> 'A Auba Robe keriri wai ahamiai raninai hiabu katoa'ina, au pou'u katohinahina otaraina Ierusalemai, Iudea mai Samaria aiarakia maikoinai, abomo keaomo hanopaka puana."

<sup>9</sup> Iesu 'abi neiana ehinana murinai, ia mahakia tohanai ea'i taeana ekara'au kupa eao teihana, ba'auhao ha ia ekaiabuna, weiana ia a'i teiha muena. <sup>10</sup> Ia kupai ekara'au 'ekana teiha 'ini'inina aonai, beronai hau rua habuni porekia tebatotonakia hanona ia tekori turinakia. <sup>11</sup> Ba tehina benakia tetibaha, "Galilea haumi e. Taba buonai neia tukoroti tua'a taea kupa toihana? Iesu bariu heremai ea'i taeana kupa eao hauna haeamona kemue kemai bariu ekara'au toihana ihobonai."

### *Iuhubeau Hauna Ha Tea'itaeanan Iuda 'Ekanai.*

<sup>12</sup> Ba iuhubeau haukia Olibe oeonai teriri teao Ierusalema, 'eka weiakia baiatakia ena homa'a hanona kilometra hamona 'abana. <sup>13</sup> Ierusalema ai tekatoto raninai temiaho aina ituna ikaihuri 'ubiai weiana hauna teao. Maearimakia atakia hanona neiakia, Petero, Ioane, Iakobo, Anderea, Pilipo, Toma, Batolomeo, Mataio, Iakobo Alepeo, Simona Selote hauna, mai Iuda Iakobo. <sup>14</sup> Ia ikoikiai tea'i to'u 'eka hamonai, babi'e baika abomo ia baiatakiai mai Iesu hinana Maria mai hatina kipokia tebahuba'ari to'ona.

<sup>15</sup> Rani weiana a'ikakauma haukia 'abaeana haukia ikoinai hinabu hamomo harau rua teto'una, aonai wairakiai Petero emikiri ekoroti eiroronakia. <sup>16</sup> Etibaha, "Uaho'aba'u e! Puka Robena 'abina kemai ketohana hauna Auba robe ehore Davida pinanai Iuda robana aba hamo eahu 'uaina Iesu ia'ina kateao haukia hanona ia ke'uai ainakia. <sup>17</sup> Iuda hanona 'abamai ha, pokina ia abomo etina'ana kipokia tako haeamo aka neiana aonai."

<sup>18</sup> (Iuda ena aka ki'a moninai hano ha tekawana, ba weia e'eho 'arana benu eao mo'oruna

epou maikoina ekiki atapakai. <sup>19</sup> Ierusalemai temiaho haukia ikoikiai pou neiana teona, ua buonai hano weiana atana teaparina 'Akeledama', maeakiai 'abi weiana anina hanona 'Aruaru Hanona').

<sup>20</sup> "Pokina Salamo pukanai aba irere'au etibaha,  
'Ena itu hanona ke'oko.  
Tai ha ua'a a'i kemiaho.'

Sal 69.25

Haeamona ererena,  
'Ia 'ekana hanona hau ha kehore  
kea'ina.'

Sal 109.8

<sup>21</sup> Ua buonai bariu hanona aika 'abaka ha baiatakai kipokia hamiaho Obiapaka Iesu ena kaoao maikoina eihana hauna mai <sup>22</sup> Ioane ena ba'uere robe eramanu raninai emaimo Iesu ekara'au kupa eao hanona ia abomo ua'a hauna kaha'i taeana. Ai kipokia kataka haeamo Iesu ena mikiri mue pouna iihinanai."

<sup>23</sup> Weiana hau rua tenuatae ainakia ha katea'i taeana, ha atana Iosepa baika tiaparina Barasaba haeamona tiaparina Iusto, mai ha hanona atana Matia. <sup>24</sup> Weiana ia tebahuba'ari tetibaha, "Obiapaka e! Oi hanona maearima ikoinal aokia o'ioibina, hau neiakia terarua baiatakiai hanona aeana otina'ana hauna bariu kobaihanamai. <sup>25</sup> Ia hanona baralbarai mai iuhubeau akana neiana Iuda ehabona hauna kebabaina, pokina Iuda hanona aba ekaobo ena 'eka tohana eao." <sup>26</sup> Ba tepu'i, aonai ata ewaira tina hanona Matia, ba iuhubeau haukia harau haea hamomo hanona ebaharau haea ruanakia.

## 2

### *Auba Robe Emai Pentekoste Raninai.*

<sup>1</sup> Pentekoste berauranai a'ikakauma haukia ikoikiai 'eka hamomonai teto'una. <sup>2</sup> Weia kupai 'uru rarina ha biaimo emai ta'uainakia, matoha rani rarina ha eabu 'uruna 'abana, ia temia to'u ituna ebabonu

'auna. <sup>3</sup> Mai abonamo taba ha teihana ihana matoha iruba upana maeana 'abana eao ha ha kaipakia 'ubinai. <sup>4</sup> Ia ikoikiai Auba Robe ai aba tebonu, ba Auba Robe ebenakia ihobonai aiara haeai haeai maeakiai te'abi.

<sup>5</sup> Ua raninai Iuda haukia Tirama marikina temariki haukia hanopaka haeai haeai temiaho haukia temai Jerusalemai. <sup>6</sup> 'Uru weiana teona raninai, 'eka hamomonai teto'una abomo to'u hanona rarina 'akina, to'u haukia tehaoreia, pokina ha ha maeakia tohanai a'ikakauma haukia pou weiana tehinana hauna teona. <sup>7</sup> Ikoikiai teta'u ta'u huri mai aokia tearo 'ari tetibaha, "Ai, neiakia ti'abi haukia hanona Galilea haukia, u?" <sup>8</sup> Aehoma buonai aika ikoikai hanona haha maeaka tohanai ti'abi aiakia naona? <sup>9</sup> Aika hanona hanopaka haeai haeai ai hamai, Patia, Media, Elama ai, Mesopotamia, Iudea, Kapadokia ai, Ponto, Asia ai, <sup>10</sup> Furugia, Pamfulia ai, Aigupito ai abomo Kurene ai, ia hanona Libia ekia 'eka ha. Roma ai tamai haumai, baika hana Iuda haumai baika hana Iuda haukia aha'i ia kuti taearanai Iuda haukiai tibaonakia haumai, <sup>11</sup> ai baika hanona Krete mai Arabia ai tamai. Hau weikakia maeaka tohanai Tirama hoa apa'uana ebabaina hauna tehinana 'uruna haona." <sup>12</sup> Ikoikiai teraona raona mai aokia a'i etaina, ia ha ha kipokia tebakai bakai tetibaha, "Neiana hanona taba?" <sup>13</sup> A baika hanona a'ikakauma haukia teiriri ainakia tetibaha, "Aba bia teinu 'ari."

### Petero Pentekoste Raninai Eiroro.

<sup>14</sup> Weiana Petero mai 'abana harauhaea hamomo kipokia temikiri, ia aiana ebapa'uana eiroro benakia etibaha, "Iuda haumi mai Jerusalemai tomiaho haumi e. Aia'u tomobahu bahu aina. Taba neiana aea erama aiho hauna pouna kaba'iobinimi. <sup>15</sup> Ai neiamai hanona a'i tainu 'ari, wai turaonana 'abana aha'i, abomo

bariu hanona raurani beraura hoana 'ababani hamomo. <sup>16</sup> Ia mahabanai hauna Ioel na e'abi aiho etibaha,

<sup>17</sup> 'Tirama etibaha, Hanopaka ena pua raninai, Au Auba'u hanona maearima ikoikiai ahakiai kabakiki oioina. Nahumi hau haukia mai babi'ekia kateaobero, emi hau 'aru'arukia hanona katemahabanai, abomo emi anepaka katenibi.

<sup>18</sup> Haeamona rani weianai au e'u ta'ara ia'ina haukia mai babi'ekia ahakiai au Auba'u kabakikina weiana kateaobero.

<sup>19</sup> Ta'u tabakia baika kupa 'ubinai kabawaira tinanakia, hanopaka ahanai abomo taba baika katerama, weiana aruaru, iruba abomo hiabu imukina. <sup>20</sup> Obiapaka ena beraura apa'uana mai nuabina kekaibari raninai, beraura hanona kewapura abuna, nawa hanona kebiro matoha aruaru 'abana.

<sup>21</sup> 'A Obiapaka atana kateaparina haukia katemauri.'

Iol 2.28-32

<sup>22</sup> "Isaraela haumi e, tomobahu aia'u tomona. Iesu Nasareta hauna hiabu akakia haeai haeai mai hoa akakia haeai haeai ebabainakia hanona Tirama ia aonai eaka, hoahoakia wai baiatamiai ua tewaira tina aiho haukia aba to'obi harainakia. <sup>23</sup> Iesu neiana Tirama ena nuatae abomo ena 'obi ua'i baha aba eba'oruna taearana wai ebenimi. Wai tohore maearima ki'a obokia imakiai toutana weiana matiu ibiri ropo 'ubinai tokoko 'auna toahu 'arina. <sup>24</sup> 'A Tirama ehore ebamikiri muena 'ari ena haiara ikoinali ebapuanakia, pokina 'ari ia kea'i 'inina ua'a wapura 'ekanai hanona a'i etaina. <sup>25</sup> Davida abomo ia pouna ehinana etibaha, 'Obiapaka hanona rani ikoinali wairau'uai aihana.

Pokina ia hanona au itipa'u tainai, a'i kaibiu 'apua.

<sup>26</sup> Ua buonai ao'u ena aonamo hanona eapa'ua ki'a baha. Maea'u hanona aonamo

'abikia ehinanakia,  
hau'u hanona buabenai aonai  
kemiaho.

<sup>27</sup> Pokina auba'u hanona 'ari  
haukia  
ekia 'ekai a'i kohabona,  
abomo emu Robe hauna ua'a a'i  
kohabona a'i kepari.

<sup>28</sup> Oi ohore mauri taearana  
obaihana'u,  
emu waira tina hanona e'u  
aonamo kebapa'uana.'

Sal 16.8-11  
<sup>29</sup> "Uaho'aba'u e! 'Aba'abaka  
Davida ena pou mahina haraina.  
Tomo'ioquina ia hanona aba 'ari  
tehorena, ena 'ariahana hanona  
bariu neia aika hereherekai.  
<sup>30</sup> 'A Davida hanona mahabanai  
hauna e'ioquina Tirama ena 'abi'uai  
pahihina ebena, ia 'aba'abana ha  
hanona ia ena imia'u 'ekanai ua'a  
kemia'u. <sup>31</sup> Davida ehore Tirama  
taba kebabaina hauna eiha 'uaina  
Keriso\* ena mikiri mue 'abina  
ehinana etibaha,  
Ia hauna hanona 'ariahana aonai  
ua'a a'i kehabona,  
ia hauna a'i kepari.'

Sal 16.10

<sup>32</sup> Iesu neiana hauna Tirama ehore  
'ariai ebamikiri muena. Ai ikoimai  
taihana abomo ta'ioquina. <sup>33</sup> Ia  
hana Tirama ehore ea'i taeana  
imana itipanai nemiaho. Auba  
Robe weiana Hamana e'abi 'uai  
aina hauna ea'ina. Weiana hana  
aba euhu ririna, bariu ena hiabu  
mahamiai aba toihana, haiamiai  
aba tuona. <sup>34</sup> Pokina Davida  
hanona kupai a'i ekara'au aonai  
e'abi etibaha,  
'Obiapaka hanona e'u Obia  
ehina bena etibaha,  
Au itipa'u tainai momiati,  
<sup>35</sup> keaomo oi emu 'ou haukia  
kaehe rabu tainakia aemu ba'anai  
kahorotinakia.'

Sal 110.1

<sup>36</sup> "Ua buonai, Isaraela haumi  
ikoimiai kato'ioibi haraina, Iesu  
wai matiu ibiri ropo 'ubinai  
tokoko 'auna hauna Tirama  
ehore aba Obiapaka mai Kerisoai  
ebaona."

*Maearima Bo'ona Teraona kabe  
Ba'uere Robe Hoana Tea'ina.*

<sup>37</sup> Weiana 'abi neiakia teo'o  
raninai nuakia tetae, ia Petero mai  
iuhubeau haukia tebakainakia  
tetibaha, "Uaho'abamai e! Ai aea  
katababai aiho?" <sup>38</sup> Petero ia ehina  
benakia etibaha, "Katoraona  
kabe, ha ha Iesu Keriso atanai  
kato'uere robe emi ki'a ihina hao  
hoana. Weiana Auba Robe ena  
beruberu aba katoa'ina. <sup>39</sup> Pokina  
'abi'uai neiana hanona wai 'eumi,  
nahumi 'eukia, abomo atau'ai  
temiaho haukia weiakia Obiapaka  
eka Tirama keaparinakia haukia  
ikoikiai 'eukia."

<sup>40</sup> Petero 'abi bo'okia maearima  
ehinabe harainakia abomo eba  
taburanakia etibaha, "Uru ki'a  
obona neiana aonai katokaobo  
hanona katomauri." <sup>41</sup> Petero ena  
'abi tea'i taeana haukia ikoikiai  
'uere robe hoana tea'ina, rani  
weianai maearima hanona ikoinai  
taha aihau (3,000) a'ikakauma  
haukia ekia to'u aonai tetoto.

*A'ikakauma Haukia Ikoikiai  
Aokia Hamonai Eka Hamonai  
Temiaho.*

<sup>42</sup> Ia hanona rani ikoinai  
iuhubeau haukia herekiai 'obi  
tetabuna, ekia miato'u mai 'abi'abi  
aokiai ia abokia mo weia, kipokia  
teaniani haeamo, 'eka hamonai  
tebahuba'ari. <sup>43</sup> Iuhubeau  
haukia hoa haeaihaeai mai babai  
haeaihaeai tebabainakia hanona  
maearima ikoikiai Tirama teta'u  
aina.

<sup>44</sup> Weiana a'ikakauma  
haukia ikoikiai 'eka hamonai  
teto'u, ekia taba ikoikiai 'eka ha-  
monai tewate harainakia. <sup>45</sup> Ekia  
kepu mai hano tekawakawa  
ainakia monikia hanona tewate  
wate nuatae ihobonai ha ha  
tebenakia. <sup>46</sup> Rani ikoinai wapu  
ha ha mai aokia hamonai marea  
robe aonai teto'u, abonamo ekia  
ituai mai aonamokia mai aokia ha-  
monai teaniani haeamo, <sup>47</sup> Tirama  
teba namona, maearima ikoikiai  
ia teaonamo ainakia. Obiapaka  
ehore ebamaurinakia haukia  
rani ikoikiai a'ikakauma haukia  
kipokia eba hamomonakia.

\* 2:31: (31) 'ao Mesia

**3***Petero 'Ome Hauna Ha Ebana-mona.*

<sup>1</sup> Rani ha rabirabi beraura hoana aihau 'abana bahuba'ari ranina, Petero mai Ioane ohi Marea robe teao. <sup>2</sup> Weia 'ome hauna ha rani ikoinai temaiaina ua'a marea robe pa'abina atana 'Nuabi pa'abina' 'akonai tebamiatina. Ia hinana nuanai uahomanai erama. Maearima marea robe teao haukia ikoikiae herekia moni enoi. <sup>3</sup> Petero mai Ioane ohi marea robe ai katekatoto raninai eihanakia ba enoinakia taba ha katebena. <sup>4</sup> 'A Petero mai Ioane ohi teiha 'ini'inina, weiana Petero ehinabena etibaha, "Ai tararua moihanamai!" <sup>5</sup> Ua buonai 'ome hauna ia eihanakia ena raona hanona taba ha katebena. <sup>6</sup> Petero ia ehina bema etibaha, "Au hanona moni here'uai aha'i. Ia here'uai nemiaho hauna neiana. Iesu Keriso Nasareta hauna atanai momikiri moka'a!" <sup>7</sup> Ba Petero ia imana itipanai ea'i ebaraina eberi taeana, beronai aena mai aena 'eku'ekukia tetabura. <sup>8</sup> Ia erobo tae ekoroti, eka'a hobo. Ia kipokia marea robe aonai tekatoto, eka'a abomo erobo taea erobo taea Tirama ebanamona. <sup>9</sup> To'u haukia ikoikiae wairakiae eka'a Tirama ebanamona teihana. <sup>10</sup> Weiana te'iobina ia hanona rani ikoinai marea robe pa'abina atana 'Nuabi pa'abina' 'akonai emiati enoi ba'ame hauna, teta'uta'u huri hoa haeai tohana herenai erama paunai.

*Petero Marea Robe Aona Solomona Ena Itarai Eiroro.*

<sup>11</sup> Aena enamo hauna ehore Petero mai Ioane e'aberenkia aonai, maearima bo'ona 'akina tebeau teao itara ha atana Solomona ena itarai weia teihana teta'u ki'a. <sup>12</sup> Petero ia eihanakia etibaha, "Is-raela haumi e, taba buonai taba neiana nibata'u ta'u hurinimi? Abomo taba buonai ai tuarurumai? Turaonana ai kipomai emai hiabuui 'ao emai auba hiabukiae hau neiana tabamikirina nika'a, u?" <sup>13</sup> Aberahamo, Isako mai

Iakobo ekia Tirama abomo aika 'aba'abaka ekia Tirama ena banamo nuabina ena ta'ara'i hauna Iesu ebena. 'A wai tohore Pilato tobena, abomo Pilato enuatae kerubuna raonana ebabaina hanona wai a'i tonuatae. <sup>14</sup> Robe mai aka bero hauna a'i tonuatae aina, 'a tonoina ahuahu hauna erubuna wai 'eumi. <sup>15</sup> Wai tohore mauri pokina hauna toahu 'arina, ia Tirama ehore 'ari ai ebamikiri muena, ai taihana haumai neiamai. <sup>16</sup> Iesu atana hiabunai 'ome hauna neiana etabura mue, hau neiana aba toihana abomo to'iobina. 'Abi tohana Iesu ta'ikakaumana buonai hau neiana ebanamona wai ikoimiai wairamiai.

<sup>17</sup> "Uaho'aba'u e, a'iobina wai emi obia kipokia Iesu herenai ua tobabai aiho hanona a'i to'iobina buonai. <sup>18</sup> 'A Tirama hanona mahabanai haukia ikoikiae pinakiae Keriso ena haiara pouna aba tehina-nana. Taeara weianai 'abi weiana aba etohana.

<sup>19</sup> "Ua buonai tomoraona kabe, Tirama herena katomai, weiana emi ki'a kea'i obo. Obiapaka mauri mahamahana kebenimi. <sup>20</sup> Tirama kehore Iesu haeamona keuhuna kemai wai heremi, 'uainai etina'ana Keriso wai 'eumi. <sup>21</sup> Iesu kupa 'ubinal kemiaho keaomo Tirama taba ikoinai kebamaha mahanyakia. Aba wa'i baha ia ena mahabanai haukia robekia pinakiae aba te'abi ihobona.

<sup>22</sup> "Mose e'abi etibaha, 'Obiapaka emi Tirama hanona mahabanai hauna ha kea'i taeana au ihobo'u wai hatia'ami kipokia baiatamiae, ia kehina 'abikiae ikoikiae hanona aiana katona. <sup>23</sup> 'A mahabanai hauna weiana aiana a'i kateona haukia ikoikiae hanona Tirama ena maearima baiatakia kate'ari ore." <sup>24</sup> 'Abi tohana, mahabanai haukia ikoikiae weiakia Samuela ena rani ai emai mo bariu aba te'abi 'uai aina berauranha hanona neiana.

<sup>25</sup> "Wai hanona mahabanai haukia 'aba'abakiae. Tirama ena 'abi'uai ia herekiae hanona wai

'eumi, Tirama 'aba'abami banamo ebenakia hauna wai katoa'ina. Ia Aberahamo ehina bena etibaha, 'Oi 'aba'abamu paukiae hanopaka maearima ikoinai katenamo.'<sup>26</sup> Tirama ehore ena Ta'ara'i hauna etina'ana euhuna emai 'uai wai heremi, wai ikoimiai kebanamonimi mauri ki'a obokia taearakia katohabonakia paunai."

## 4

*Petero Mai Ioane Hau  
Apa'uakia Ekia To'u Wairanai  
Tekoroti.*

<sup>1</sup> Petero mai Ioane maearima tehina benakia aonai, robe haukia mai marea robe i'mana hauna abomo Sadukea haukia hanona terarua herekiai temai. <sup>2</sup> Iesu ena mikiri mue paunai 'ari haukia katemikiri mue pouna maearima wairakiai teba'iobi aina buonai ia terarua teopuere ainakia. <sup>3</sup> Weiana ia terarua tea'inakia tebirinakia wapura itunai tekaiabunakia keaomo mara, pokina aberabirabi buonai. <sup>4</sup> 'A ekia 'abi weiana teona mai tea'i taeana haukia hanona ikoinai taha ima (5,000) 'abana.

<sup>5</sup> Erani hanona aiara obiakia mai aiara hau apa'uakia mai rauhubu poki haukia ikoikiai Ierusalemai teto'una. <sup>6</sup> Robe haukia 'arakiai hauna Ana weia, Kaifa mai Ioane mai Alessanda abomo weia, robe haukia 'arakiai hauna ena itubu haukia ikoikiai abomo weia. <sup>7</sup> Weiana wairakiai terarua teba korotinakia tebakainakia tetibaha. "Hiabu tabanai mai tai atanai aka neiakia tubabai?"

<sup>8</sup> Petero hanona Auba Robe ai ebonu 'auna, weiana ekia 'abi eba muena etibaha, "Aiara toiha 'inina mai to'uai aina haumi e. <sup>9</sup> Wai ai tubakainamai 'ome hauna aea enamo aiho hanona robana katahuna wairamiai raninai, <sup>10</sup> wai kato'obina abomo Isaraela haukia ikoikiai kate'obina, Iesu Keriso Nasareta hauna, wai toahu 'arina ba Tirama ehore 'ariai ebamikiri muena hauna atanai 'ome hauna neiana abenamo

wairamiai ekoroti toihana. <sup>11</sup> Iesu hanona 'itu ibabaina haumi tobaki'ana piharana, itu kupuana piharanai eao.'

<sup>12</sup> Sal 118.22 Bamauri hanona ia kipona mo aonai nemiaho, pokina hanopaka ikoinai aonai Tirama ata haeai ha a'i ebaibenai aika kebamaurinaka."

<sup>13</sup> Iuda obiakia teraonana Petero mai Ioane ohi marere 'ekana apa'uana ha a'i teao 'apua ekia 'iobi aha'i haukia, iamo a'i teta'u 'abi tehina haraina teihanakia hanona teta'uta'u huri. Abomo te'obina terarua hanona Iesu te'abana. <sup>14</sup> Ia terarua mai 'ome hauna abenamo hauna kipokia wairakiai tekoroti haeamo buonai katebakai muenakia taearana ha aha'i.

<sup>15</sup> Ia Petero Ioane mai 'ome hauna tehina benakia bakai 'ekanai katekarahi, ba tekarahi murinai weiakia ikupaiakia te'abi'abi. <sup>16</sup> Tetibaha, "Ia terarua herekiai taba kahababaina? Pokina Ierusalemai temiaho haukia ikoikiai aba te'obina ia hanona bata'uta'u huri akakia tebabai, aika kahabuni ainakia 'ekana aha'i. <sup>17</sup> Pou neiana a'i memata maearima ikoikiai a'i teme'obina marikina, terarua kahaba ta'unakia abomo kaharauhubu ainakia Iesu atana hanona a'i katehinana hau ha herenai." <sup>18</sup> Epua terarua teapari muenakia tetoto, terauhubunakia Iesu atana a'i kateiroro aina abomo a'i kateba'iobi aina aha'i 'akina.

<sup>19</sup> 'A Petero mai Ioane ohi ekia 'abi tebamuena tetibaha, "Wai kipomi tomobabataina. Wai aiами kata'i taeana 'ao Tirama aiana kata'i taeana. Tirama wairanai aeana hanona ebero?" <sup>20</sup> Ai taiha mai tao'o tabakia katabuninakia hanona a'i ketaina."

<sup>21</sup> Ia terarua tehinabe pahihi-nakia ba teba karahinakia, kateba wapurankia hanona taearana ha a'i tetabu ahina pokina maearima ikoikiai Tirama tebanamona hoa weiakia terama buokiai. <sup>22</sup> Hau neiana herenai hoa apa'uana

erama enamo hauna ihauna  
hanona bariabui mai reana.

### *A'ikakauma Haukia Ekia Bahuba'ari.*

<sup>23</sup> Teba karahinakia murinai,  
terarua teao 'abakia herekiai,  
robe haukia apa'uakia mai  
obia apa'uakia taba na tehoma  
'abikia ikoinai tehinabenakia.  
<sup>24</sup> Aiakia teona murinai, ikoikia  
aiakia tebahamomona Tirama  
tebahuba'ari bena tetibaha, "Ubi  
tohana Obiana e, kupa hanopaka  
'akupaka mai aokiae temiaho  
tabakia hanona oi mo oba-  
bainakia. <sup>25</sup> Emu 'abi Auba Robe  
ena hiabuai emu ta'ara'i hauna  
'aba'abamai Davida pinanai e'abi  
etibaha,

'Rama haeai haukia  
taba buonai tiopuere,  
abomo taba buonai maearima  
taba tohakia aha'i haukia  
tiraona apa'uankia?

<sup>26</sup> Hanopaka obiakia temikiri  
abomo aiara obiakia kipokia  
tibahamomo Obiapaka ena Keriso  
ohi ti'oatanakia.'

Sal 2.1, 2

<sup>27</sup> "Abi tohana, Heroda mai Pontio  
Pilato hanona rama haeai haukia  
mai Isaraela haukia kipokia aiara  
neiana aonai aba teto'una. Emu  
ta'ara'i hauna robena Iesu oi  
tehoroai 'aranai oheina\* Kerisoai  
eo hauna kate'oatana. <sup>28</sup> Ia  
hanona Oi emu hiabu mai nuatae  
aba oba'oruna akana kerama  
hauna tebabaina. <sup>29</sup> Ua buonai,  
Obiapaka e, ekia bata'u 'abikia  
moraonanakia, ai emu ta'ara'i  
haumai tabura mobenamai, a'i  
katata'u ainakia emu 'abi katahi-  
nana. <sup>30</sup> Imamu motiu ahina emu  
hiabu mobawaira tinana inawa  
haukia mobamaurinakia, haea-  
mona hoa akakia mai bata'uta'u  
huri hoakia kobabai oi emu ta'ara'i  
hauna robena Iesu atanai."

<sup>31</sup> Ia tebahuba'ari murinai temia  
to'u ituna eibiubiu, ia hanona  
Auba robe ai tebonu, mai nu-  
ako'okia Tirama ena 'abi tehinana.

### *A'ikakauma Haukia Kipokia Tebaraibarai.*

<sup>32</sup> A'ikakauma haukia ikoikiai  
hanona ao'aokoikia mai aokia  
hamona, ha kipona ena taba  
a'i euhore aina 'a ekia taba  
ikoikiai hanona tebina'anakia  
ha ha baiatakiai. <sup>33</sup> Iuhubeau  
haukia mai hiabukia rarina  
Obiapaka Iesu ena mikirimue  
mahakiai teihana hauna pouna  
teiroro aina. Ba Tirama ena ba-  
namo hanona ia ikoikiai ahakiai.  
<sup>34</sup> Ia baiatakiai hanona tai ha'i  
ekapu, pokina weikia mai ekia  
hano 'ao itu haukia hanona  
tekawakawa ainakia monikia  
weiakia teaoainakia, <sup>35</sup> iuhubeau  
haukia imakiai teutanakia,  
weiana tewate harainakia ha ha  
ena uraru ihobonai.

<sup>36</sup> Hau ha atana Iosepa, Lebi  
itubuna hauna Kupuro ai erama,  
iuhubea haukia hanona ia atana  
teaparina Banaba (anina hanona  
'Batabura hauna'). <sup>37</sup> Ena hano  
ekawakawaina monina ikoinai  
eaoaina iuhubeau haukia imakiai  
eutana.

## 5

### *Anania Mai Sapira Ekia Bai'oi.*

<sup>1</sup> Weiana hau ha atana Anania  
atawana Sapira ohi ekia hano ha  
tekawakawaina. <sup>2</sup> Ia hano weiana  
monina abirana ea'i 'inina hanona  
atawana ohi te'ioina, abirana mo  
eaoaina iuhubeau haukia imakiai  
eutana. <sup>3</sup> Weiana Petero ia ehina  
bena etibaha, "Anania e! Aehoma  
buonai Satani aomu eana, Auba  
Robe o'oina hano monina abirana  
oa'i 'inina? <sup>4</sup> A'i okawakawaina  
raninai hano hanona oi 'eumu,  
okawakawaina raninai monina  
abomo oi 'eumu. Bariu rani  
neianai hanona aea oraona aiho?  
Pinamuai moni maikoina na  
nuhoma, oi hanona maeearima  
a'i o'inakia, ia Tirama o'oina."

<sup>5</sup> Anania aia weiana eona raninai  
e'eho e'ari baihana, uru weiana  
teona haukia ikoikiai teta'u ki'a.  
<sup>6</sup> Hau 'aru'arukia baika temikiri

\* **4:27:** (27) 'Uainai maeearima tea'itaeano hoa apa'uakia tebena hanona tehoroai 'arana  
teheina.

temai habuniai hauanina teapania  
tea'i ahina teaoaina tehorena.

<sup>7</sup> Beraura hoana aihaus murinai  
babie ekatoto, atawana herenai  
taba erama hauna a'i e'io bina.  
<sup>8</sup> Petero babi'e ebakaina etibaha,  
"Mohina bena'u, torarua emi hano  
tokawa kawaina hanona 'arana  
mo weiana, u?" Ia e'abi etibaha,  
"E, 'arana mo naiana." <sup>9</sup> Weiana  
Petero ia ehina bena etibaha,  
"Taba buonai atawamu ohi aomi  
tobahamona Obiapaka Aubana  
tuhobona? Aia'u nuona, atawamu  
tehorena miorikia pa'abi 'akonai  
tekoroti, oi abomo katebuani'o  
kateaoaini'o." <sup>10</sup> Ia beronai e'eho  
Petero aena pokinai e'ari baihana.  
Hau 'aru'arukia tetoto temai  
teihana abe'ari toha, ba tebuana  
atawana herenai tehorena. <sup>11</sup> Rani  
weianai a'ikakauma haukia  
ikoikiai mai pouna teona haukia  
ikoikiai teta'u wairai.

#### *Iuhubeau Haukia Hoa Haeai Haeai Tebabainakia.*

<sup>12</sup> Hoa mai babai haeai haeai  
iuhubueau haukia maearima  
wairakiai tebabainakia, ikoikiai  
mai aokia hamonai Solomona ena  
itarai teto'u. <sup>13</sup> A maearima baika  
hanona teta'u ainakia herekia a'i  
teao, ia aokiai hanona ia temariki  
ainakia. <sup>14</sup> Iamo hau mai babi'e  
bo'okia Obiapaka tea'ikakaumana  
haukia teao hanona ia haukia  
tebabo'o hao bo'o haona.

<sup>15</sup> Inawa haukia teaoainakia  
airabuanai tehorotinakia mai  
ieno'aukia mai irekia tebaenotinakia  
taearai. Weiana Petero  
herekiai kekabanai raninai aia-  
iana keao ahakiai. <sup>16</sup> Ierusalem  
herena aiarakia haukia bo'okia  
abomo temai teto'u, inawa haukia  
mai auba ki'a obokia aokiai tetoto  
haukia temaiaiakia weia, ba  
ikoikiai temauri.

#### *Iuhubeau Haukia Te'oatanakia.*

<sup>17</sup> Robe haukia arakiai hauna  
mai 'abana weiakia Sadukea  
itubuna haukia kipokia hanona  
iuhubueau haukia tewamuru  
ainakia. <sup>18</sup> Ba iuhubeau haukia  
tebirinakia teaoainakia wapura  
ituna aonai tekaiabunakia. <sup>19</sup> A  
rabi weianai Obiapaka ena aneru

ha ehore wapura ituna pa'abina  
ekikauna eba karahinakia,  
<sup>20</sup> etibaha, "Tomoao, Marea Robe  
aonai mauri maha mahana pouna  
neiana maikoina katohinana  
maearima wairakiai." <sup>21</sup> Aia  
weiana teona ihobona tebabaina,  
raurani amarinai Marea Robeai  
tekatoto maearima teba 'obi-  
nakia.

Rani weianai robe haukia  
arakiai hauna mai 'abana kipokia  
teao bakai apa'uana haukia  
abomo Isaraela hau apa'uakia  
kipokia teto'u, 'abi teuhuna eao  
iuhubueau haukia wapura itunai  
katemaiaiakia. <sup>22</sup> Teuhunakia  
teao wapura itunai hanona  
wairakia aha'i, haeamona temue  
teao bakai apa'uana haukia  
haiakiai te'abi tetibaha, <sup>23</sup> "Taeao  
raninai pa'abi hanona ikaabu,  
pa'abi i'imana haukia abomo weia  
tekoroti, ia pa'abi takaikauna  
takatoto hanona tai ua'a aha'i  
'akina."

<sup>24</sup> 'Abi weiana teona raninai,  
Marea Robe poki hauna mai  
robe haukia apa'uakia teraona  
raona 'ari ki'a baha, hoa weiana  
anina hanona taba. <sup>25</sup> Weiana  
hau ha eao herekia ehina be-  
nakia etibaha, "Wapura itunai  
tokaiabunakia haukia hanona  
aba Marea Robe aonai tekro-  
oti maearima tiba'ibinakia." <sup>26</sup>  
Marea Robe poki hauna mai  
ena miori kipokia teao iuhubeau  
haukia tebaka'anakia, ia a'i  
teaiahu benakia pokina maearima  
katehore piharai a'i temeahunakia  
marikina.

#### *Iuhubeau Haukia Hau Apa'uakia A'i Teta'u ainakia.*

<sup>27</sup> Teaoainakia bakai apa'uana  
wairanai teba korotinakia, ba  
robe haukia arakiai hauna ehore  
ebakainakia. <sup>28</sup> Etibaha, "Ai wai  
taharabunimi, hau neiana atanai  
a'i katoba'obi. Ia bariu emi  
ba'obi 'abikiai Ierusalemai pou  
neiana hanona abeapa'ua, abomo  
ena 'ari hanona ai tukaiahina-  
mai."

<sup>29</sup> Petero mai iuhubeau haukia te'abi tetibaha, "Tirama aiana kahaona hanona enamo, 'a maearima aiana kahaona hanona a'i enamo." <sup>30</sup> Iesu wai tohore matiu 'ubinai tokokona toahu 'arina hauna, aika 'aba'abaka ekia Tirama ehore 'ariai aba ebamikiri muena. <sup>31</sup> Tirama ia ea'i taeana imana itipana tainai eba miatina i'uiaiaika mai ibamaurika haunai ebaona Isaraela haukia ibaraona kabekia mai ekia ki'a ihina haokia paunai. <sup>32</sup> Ai hanona taba neiakia taihanakia haumai, Auba Robe weiana Tirama aiana tiona haukia ebenakia hauna abomo ihobona."

### *Gamaliel Eiroro Iuhubeau Haukia Katehabonakia.*

<sup>33</sup> 'Abi weiana teona raninai, teopuere wairai ekia nuatae hanona iuhubeau haukia pateahu 'arinakia. <sup>34</sup> 'A Parisea hauna ha atana Gamaliel, rauhubu poki hauna ia bakai apa'uana hauna ha maearima ikoikiai abomo timariki aina hauna, emikiri iuhubeau haukia ehina benakia katekarahi atapakai katebai'ima rani papana. <sup>35</sup> Weiana ia ehina benakia etibaha, "Isaraela haumi e, katoiha haraina hau neiakia aea katohomanakia. <sup>36</sup> 'Uaina raninai Teuda emikiri e'abi ia abomo hau mo ha, weiana maearima ikoinai hinabu bani 'abana murinai teka'a. Ia teahu 'arina raninai ena maearima ikoikiai tebeau otaraina, ha a'i emiaho 'apua. <sup>37</sup> Ia murinai Galilea hauna ha atana Iuda, maearima atakia irerena raninai emikiri, maearima bo'okia aokia eana ia murinai teka'a, 'a ia abomo teahu 'arina, weiana murninai teka'a haukia ikoinai terama otaraina. <sup>38</sup> Ua buonai nahina benimi, hau neiakia hanona katohabonakia kateao, pokina 'abi hoahoa mai aka neiakia hanona maearima 'eukiai katemai raninai anikia a'i katerama. <sup>39</sup> Ia Tirama 'eunai kemai raninai, wai hanona a'i katoba'oro 'apuana.

Kato'ima 'ima harainimi, Tirama a'i tomohuarina." <sup>40</sup> Ia

Gamaliel aiana tea'i taeana, weiana iuhubeau haukia teaparinakia tetoto, te'atinakia murinai terauhubunakia Iesu atanai a'i kateba'obi muena, teba karahinakia. <sup>41</sup> Iuhubeau haukia bakai 'ekana tehabona mai aonamokia, pokina Tirama ena banamo aonai ia hanona Iesu atanai tehaiara. <sup>42</sup> Rani ikoinai Marea Robe aonai mai itu aokiai, pou namona teba'obi aina mai teiroro aina Iesu hanona Keriso.\*

## 6

### *Hau 'Abaihau Hamomo Tea'itaeanakia Katebaraibarai.*

<sup>1</sup> Rani baika teao murikiai a'ikakauma haukia ekia bo'o hanona ekara'au raninai Iuda maearimakia Helene maeanai ti'abi haukia mai Heberu maeanai ti'abi haukia baiatakiai atetua erama, pokina aniani iwatekia raninai ekia wapuwapu hanona a'i tiraonanakia. <sup>2</sup> Weiana iuhubeau harauhaea rua tehore Iesu tia'ikakaumana haukia ikoikiai tebato'unakia tetibaha, "A'i enamo Tirama ena 'abi iroro akana kaha habona aniani 'ao kohu iwatekia paunai. <sup>3</sup> Ua buonai uaho'abamai e, wai baiatamiae hau 'abaihau hamomo poukia tenamo haukia Auba Robe mai aotipai tebonu haukia kato'i taeanakia aka neiana katobenakia kate'uai aina. <sup>4</sup> 'A ai hanona rani ikoinai bahuba'ari mai iroro akakia mo katababainakia."

<sup>5</sup> Iuhubeau ekia raona 'abina tebatohana, ba hau neiakia tea'i taeanakia, Stefano a'ikakauma mai Auba Robeai ebonu hauna, Pilipo, Porokoro, Nikanoro, Timona, Pamena, mai Nikolao ia hanona rama haeai hauna Antiokai emai Iuda haunai tebaona hauna. <sup>6</sup> Haukia 'abaihau hamomo teaoainakia iuhubeau haukia wairakiai teba korotinakia, ba iuhubeau haukia tehore imakia 'arakiai tehao'au tebahuba'ari tebanamonakia.

<sup>7</sup> Weiana Tirama ena 'abi hanona tehina otaraina, Iesu

\* 5:42: (42) 'ao Mesia

tia'ikakaumana haukia tebo'o hao bo'o hao Ierusalema aonai, robe haukia bo'okia abomo Iesu tea'ikakaumana.

### *Stefano Tea'ina Tebakaina.*

<sup>8</sup> Stefano hanona Tirama ena aoko'o hoana mai hiabunai ebonu, ia ehore hoa mai bata'uta'u huri akakia maearima wairakiai ebabainakia. <sup>9</sup> 'A hau baika hanona ia te'oatana, maearima weiakia hanona 'Karahi 'abaea Mareana' haukia, ia hanona Iuda maearimakia Kurene, Alessandereai temai, abomo Kilikia, Asiai temai haukia, baika tehore Stefano kipokia te'abi baitaeai. <sup>10</sup> Ia Stefano a'i te'abi haona pokina aotipai mai Auba Robe hiabunai ehina benakia. <sup>11</sup> Ua buonai ia tehore baika aokia teani kate'abi katetibaha, "Ai hanona ia ena 'abi ki'a obokia ehina Mose mai Tirama ohi ahakiai hauna taona." <sup>12</sup> Uahomanai aiara haukia mai aiara haukia apa'uakia abomo rauhubu poki haukia teba opuerenakia, ia temikiri teao Stefano tea'ina teaoaina bakai apa'uana haukia herekia. <sup>13</sup> Ba ia temaiaainakia hinai bai'oi haukia baika tehore tehina benakia tetibaha, "Hau neiana hanona Robe 'ekana mai Mose ena rauhubu ia'iki'akia 'abina a'i nibapua 'apuana. <sup>14</sup> Ai aiana taona etibaha, Iesu Nasareta hauna kehore Marea Robe neiana kerubuna abomo Mose ena rauhubu ebenaka haukia ikoinai kebahaeainakia." <sup>15</sup> Bakai 'ekanai temiati haukia ikoikiai Stefano teiha 'ini'inina wairana ihana hanona matoha aneru ha wairana 'abana.

## 7

### *Stefano Eiroro Bakai Apa'uana Wairanai.*

<sup>1</sup> Robe haukia arakiai hauna Stefano ebakaina etibaha, "Ekia 'abi hanona tohana, u?" <sup>2</sup> Stefano ena 'abi ebamuena etibaha, "Uaho'aba'u mai hamau' ikoimiai, aia'u tomona. Aika 'aba'abaka Aberahamo Harana a'i eao baha Mesopotamiai emiaho raninai,

nuabi Tiramana ia herenai ewaira tina, <sup>3</sup> ehina bena etibaha, 'Emu hano mai hatia'amu kohabonakia, au ka'uhina hanona aeana hanomo weiana koao.' <sup>4</sup> "Ua buonai Aberahamo ehore Kaldea haukia ekia hano ehabona, emikiri eao Haranai emiaho. Weia emiaho eaomo hamana e'ari, ba Tirama ehore ebaka'anai emaiaina bariu tomiaho aina hano neianai ebakarahina. <sup>5</sup> Tirama Aberahamo ena hano tohana ha a'i ebena, 'apuna ihobona abomo ha a'i e'uhina. 'A Tirama hanona e'abi'uai hano weiana ia kipona mai 'aba'abana kebenakia. Rani weianai hanona Aberahamo nahuna aha'i. <sup>6</sup> Tirama haeamonai ehina bena etibaha, 'Oi kupumu 'aba'abamu hanona hano neiana katehabona hano haeai haukia ekia hanoai katemiaho, hano weiana haukia ta'arakia katea'i ihau hinabu bani aonai ia hanona katehau haiara.' <sup>7</sup> Tirama e'abi mue etibaha, 'Ekia ta'ara ia'inai katebaonakia haukia au kahore kabakainakia, murinai ia hanona katekarahi neia au katekuti aina'u.' <sup>8</sup> Ba Tirama Aberahamo ehina bena itare katebabaina weiana hanona Tirama ena 'abi'uai apa'uana ibatohana hoana. Ua buonai Isako erama wapuna 'ababani aonai itare hoana ebabaina. Isako nahuna Iakobo ebaramana, abomo Iakobo nahuna harauhaea rua Isaraela itibu arakia terama.

<sup>9</sup> "Itubu arana haukia tehore hatikia Iosepa tewamuru aina, Aigupito haukia herekiai tekawa kawaina ta'ara'i haunai eao. 'A Tirama hanona Iosepa e'abana, <sup>10</sup> abomo ena hau haiara ikoikiai aokiai ebamaurina. Hoahoah namona mai aotipa ebena Parao Aigupito obia 'arana wairanai, weiana Parao ehore Iosepa hiabu ebena Aigupito hanopakana mai ena itu haukia ikoikiai kepoki ainakiai.

<sup>11</sup> "A arobo rarina erama Aigupito mai Kanana hanokia maikoinai haiara rarina 'akina. Aika 'aba'abaka aniani ae'e

katea'ina 'ekana aha'i. <sup>12</sup> Iakobo 'uru eona Aigupito hanonai mai ekia aniani, ba nahuna aika 'aba'abaka euhunakia ekia rani kori'uaina. <sup>13</sup> Ekia rani ibaruuanai Iosepa kipona ebawaira tinana uaho'abana wairakiai, Parao abomo e'io bina Iosepa hatia'ana. <sup>14</sup> Ba Iosepa 'abi euhuna hamana Iakobo mai hatia'ana ikoikiai katemai Aigupito, haukia imabui haraurua ima. <sup>15</sup> Ua buonai Iakobo emikiri eao Aigupito, weia e'ari murinai aika 'aba'abaka abomo weia te'ari. <sup>16</sup> A ekia 'ari haukia hanona teaoainakia Sekem 'ariahanai tehorenakia. 'Ariahana weiana hanona Aberahamo ehore Hamoro nahuna imakiai moniai ekawana.

<sup>17</sup> "Tirama ena 'abi'uai Aberahamo herenai ibatohana ranina ekaibari aonai, aika 'aba'abaka Aigupitoai terama ahi rama ahi abomo tebo'o ki'a baha. <sup>18</sup> Eaomo puanai obia haeai ha Aigupito eobia aina, ia hanona Iosepa a'i e'io bina. <sup>19</sup> Obia weiana 'aba'abaka ebapo'onakia, ebahiaaranakia abomo ebahi ahinakia kipokia nahukia 'oru'orukia katene'enakia kate'ari. <sup>20</sup> Rani weianai Mose erama, miori papana namona Tirama wairanai, hamana ena ituai te'imana nawa aihau. <sup>21</sup> Weiana atapakai tehabona murinai Parao nahuna uahona ea'ina ebapa'uana nahunai eao. <sup>22</sup> Ua buonai Aigupito haukia ekia 'obi ikoinai Mose teba'io bina, ba Mose ena 'abi abomo ena aka hanona mai hiabukia.

<sup>23</sup> "Mose ihauna bariabui ea'ina aonai eraonana hatia'ana Isaraela haukia keihanakia. <sup>24</sup> Ia 'abana ha eihana Aigupito hauna ehore nia'i ki'ana, buonai eao hau weiana ebaraina Aigupito hauna eahu 'arina. <sup>25</sup> Mose ena raona hanona hatia'ana kate'obi haraina Tirama kehore Mose imanai ia arakia kebamaurinakia, ia a'i te'obi 'apuana. <sup>26</sup> Erani Isaraela haukia rua te'au, Mose eao herekia ebairarao etibaha,

'Wai torarua hanona hatia'a, taba buonai kipomi tuba haiaranimi?' <sup>27</sup> Etabura hauna ehore Mose etori parena ebakaina etibaha, 'Tai oi ea'i taeani'o, ai kopoki ainamai abomo kobakainamai? <sup>28</sup> Nonuatae au koahu 'arina'u, warani Aigupito hauna oahu 'arina 'abana?' <sup>29</sup> Mose 'abi weiana eona raninai, beronai e'uru eao Midian hanonai emiaho hano haeai hauna 'abana, weia nahuna hau rua terama.

<sup>30</sup> "Ihau bariabui teore murnai, hano'akunai Sinai oeo herenai matiu 'ini'ininai iruba eupa aonai aneru ha ewaira tina Mose wairanai. <sup>31</sup> Mose eihana raninai eta'uta'u huri, eka'a haha eao herena keiha haraina aonai, Obiapaka aiana eona. <sup>32</sup> Etibaha, 'Au hanona 'aba'abamu Aberahamo, Isako mai Iakobo ekia Tirama.' Mose eta'u ki'a e'ururu 'ururu, a'i enuatae keihana. <sup>33</sup> Obiapaka ehore ehina bena etibaha, 'Emu tamaka moa'i obonakia, pokina okoroti 'ekana hanona Tirama nemiaho hanona erobe. <sup>34</sup> Au e'u maearima Aigupitoai tihau haiara aihanakia abomo ti'arara aiakia aona, ua buonai ariri amai kabamaurinakia, bariu 'omikiri kauhuni'o koao Aigupito.'

<sup>35</sup> "Mose mo neiana tebaki'ana te'abi, 'Tai oi ea'i taeani'o ai kopoki ainamai abomo kobakainamai?' hauna Tirama ehore euhuna ekia pokia abomo ibamaurikia haunai keao, matiu 'ini'inina e'ara aonai ewaira tina aneruna ena baraibarai ai. <sup>36</sup> Mose weiana hauna Isaraela haukia Aigupitoai ebakarahinakia, bata'uta'u huri akakia abomo hoa akakia haeanihaeai ebabainakia Aigupitoai, 'Aku Bironai abomo ihau bariabui hano'akunai. <sup>37</sup> Mose mo weiana ehore Isaraela haukia ehina benakia etibaha, 'Tirama kehore mahabanai hauna ha kebamikirina wai baiatamiai, matoha au 'abana.' <sup>38</sup> Hau weiana hanona Isaraela haukia hano'akunai temia to'u raninai Sinai Oeo 'ubinai e'abi aneruna

mai 'aba'abaka baiatakiai, mauri 'abina ea'ina ebakabanaina aika 'euka.

<sup>39</sup> "Ia aika 'aba'abaka hanona Mose aiana iona 'arina a'i te'ari teubo, ekia nuatae patemue Aigupito. <sup>40</sup> Weiana ia tehore Arona tehina bera, 'Tirama baika mobabainakia aika 'euka kate'uai ainaka, pokina a'i ta'iobina Mose Aigupitoai ebaka'anaka hamai hauna bariu aehoma?" <sup>41</sup> Rani weianai ia tehore poromakau nahu aubaubana ha tebabaina, banamo tabakia temaiaiakia kaiba'uku weiana wairanai tehorotinakia, imakiai tebabaina tabana wairanai teaonamo. <sup>42</sup> Weiana Tirama ia herekiai ekaobo ehabonakia kipokia kupa tabakia katekuti ainakia. Mahabanai hauna ena pukai tererena 'abana etibaha,  
'Isaraela haumi e,  
ihau bariabui hano'akunai  
beruberu mai banamo mahikia  
hanona au a'i tobanamo aina'u.  
<sup>43</sup> Wai hanona tirama atana Molok  
ena ro'e ituna abomo emi bihiu  
tiramana atana Refan aubaubana  
tobuanakia, weiakia tobabainakia  
katokuti ainakia.

Ua buonai Au kahore  
wai kabaibiunimi Babulono  
puana  
'akinai.'

Amo 5.25-27

<sup>44</sup> "Aika 'aba'abaka herekiai Tirama ibawaira tinana ro'e ituna\* ha hano'akunai, ro'e weiana hanona Mose ebabaina Tirama ebaihana ihobonai. <sup>45</sup> Muriai 'aba'abaka hamakia imakiai ro'e ituna weiana tea'ina tebuana Iosua kipokia teao rama haeai haukia ekia hanoai tekara'au, Tirama ehore wairakiai hano haukia eu'u parenakia, ia temiaho aina emai mo Davida ena raniai. <sup>46</sup> Tirama ena banamo hanona Davida ebena, ba ia Tirama enoina Iakobo ena Tirama ena itu ha kebabaina. <sup>47</sup> Ia itu hanona Solomona ehore ebakorina.

\* 7:44: (44) Itu robena weiana habuniai tebabaina.

<sup>48</sup> "A 'ubi toha tohanai Tirama hanona maearima imakiai tebabaina ituna aonai a'i nemiaho. Mahabanai hauna ena 'abi ihobona etibaha,

<sup>49</sup> 'Obiapaka na e'abi aiho,  
Kupa hanona e'u mia'au 'ekana,  
hanopaka hanona ae'u ihorotina  
'ekana.  
Itu aehomana katobabaina Au  
eu'u?

E'u arai 'ekana hanona aeana?

<sup>50</sup> Taba neiakia ikoikiai hanona  
Au ima'uai a'i ababai, u?"

Isa 66.1, 2

<sup>51</sup> "Ara pahihi haumi, aomi  
mai haiami tokaiabu harai  
matoha Tirama a'i te'iobina  
haukia 'abakia. Rani ikoinai wai  
tuohore Auba Robe tuhao abuna.  
Aba'abami ekia aka a'i torea  
'apuana toa'i 'ini baihana. <sup>52</sup> Wai  
'aba'abami mahabanai hauna ha  
a'i te'oatana, u? Aka bero hauna  
kemai 'abina tehinana haukia  
teahu 'arinakia, bariu wai tohore  
tohina hinaina bero hauna toahu  
'arina. <sup>53</sup> Wai rauhubu weiana  
Tirama ena aneru ebaiben'i hauna  
aba toa'ina iamo kipomi a'i toa'i  
taeana."

*Piharai Stefano Teahu 'arina.*

<sup>54</sup> Iuda ekia obia haukia Stefano  
aiana teona raninai teopuere  
wairai 'aki'akikia teara 'ini'ini.

<sup>55</sup> Ia Stefano hanona Auba Robeai  
ebonu, weiana ea'a taea kupa  
eihana, Tirama nuabina abomo  
Iesu Tirama itipana tainai ekoroti  
eihana. <sup>56</sup> Ia etibaha, "Tomoihana!  
Kupa aba ekaikau naihana abomo  
Maearima Nahuna Iesu Tirama  
itipana tainai ekoroti."

<sup>57</sup> Weiana ia teio aota imakiai  
haiakia tekaibunakia ikoikiai  
tebeau teao Stefano herena,

<sup>58</sup> tea'ina aiara aonai teberi  
ahina atapakai ba piharai teahu  
ramana, hinau bai'oi haukia  
weiakia hanona ekia habuni  
tero'a ahinakia haukia tebakuri  
ahinakia hau 'aru'aruna ha atana  
Saulo aena pokinai tehoroti.

<sup>59</sup> Piharai teahuna aonai Stefano  
ebahuba'ari etibaha, "Obiapaka

Iesu e, au auba'u moa'i taeana."<sup>60</sup> Weiana ekaipahu eio etibaha, "Obiapaka e! Ki'a neiana 'arana a'i kabenakia." Ua e'abi aiho murinai e'ari.

## 8

<sup>1</sup> Saulo ehore Stefano teahu 'arina hanona ebatohana.

*Saulo Tirama Ena Marea  
Haukia E'oata Ramanakia.*

Rani weianai bai'oata ranina erama, a'ikakauma haukia Ierusalemai temiaho haukia ikoikiai tebeau otaraina teao ludea, Samaria hanokiae temiaho, 'a iuhubeau haukia kipokia mo Ierusalemai temiaho.<sup>2</sup> Tirama timariki aina haukia baika Stefano tea'ina tehaiaina ba teaoaina 'ariahanai tehorena.<sup>3</sup> 'A Saulo enuatae a'ikakauma haukia kea'i ki'anakia, itu ha ha aokiae etoto, hau mai babi'e eberi beri ahinakia, eaoainakia wapura ituna aonai ekaibunakia.

*Pou Namona Samariai Teiroro aina.*

<sup>4</sup> A'ikakauma haukia tebeau otaraina haukia hanona pou namona teiroro aina eka ha ha aokiae. <sup>5</sup> Pilipo eao Samaria aiara apa'uana ekarahi, weia Keriso pouna eiroro aina maearima herekiae.<sup>6</sup> Maearima ikoikiae Pilipo aiana teona abomo hoa haeaihaeai akakia ebabai haukia teihana raninai mai aokiae ikoinai tea'i taeana.<sup>7</sup> Maearima aokiae auba ki'a obokia temiaho haukia eu'u ahinakia tekarahi mai ioikiae, abomo mero mai 'ome haukia ebamaurinakia.<sup>8</sup> Ua buonai aonamo rarina 'akina erama aiara weiana aonai.

<sup>9</sup> 'Eka weianai hau ha atana Simona 'uaina raninai nepu akakia ebabai Samaria haukia ebata'unakia. Ia kipona ebapa'uana,<sup>10</sup> abomo maearima ikoikiae apa'uana eao mo papanai epua iamo aiana teona tetibaha, "Hau neiana hanona Tirama ena hiabuai niaka."<sup>11</sup> Rani homa'ana ena mea hoakia terama buonai aiana teona.<sup>12</sup> 'A Pilipo Tirama

ena obia aiarana pouna namona mai Iesu Keriso atana eiroro aina, weiana maearima hanona ia aiana tea'i taeana, ba hau mai babi'e eba'uere robenakia.<sup>13</sup> Simona abomo ea'ikakauma 'uere robe ea'ina murinai, Pilipo e'abana tekaoao aonai hoa haeai-haeai mai babai haeaihaeai akakia ebabainakia eihanakia hanona nuuna etae.

<sup>14</sup> Iuhubeau Ierusalemai temiaho haukia pou teona Samaria haukia abomo Tirama ena 'abi tia'i taeana, ua buonai Petero mai Ioane teuhunakia teao Samaria.<sup>15</sup> Terarua Samariai tekatoto raninai, a'ikakauma haukia ahakiae tebahuba'ari Auba Robe katea'ina paunai,<sup>16</sup> pokina rani weianai Auba Robe hanona ia ahakiae a'i eriri baha, ia 'uere robe 'abaeana mo tea'ina Obiapaka Iesu atanai.<sup>17</sup> Ua buonai Petero mai Ioane ohi imakia ia ahakiae tehao'au tebahuba'ari raninai Auba Robe tea'ina.

<sup>18</sup> Ba Simona Iuhubeau haukia eihanakia imakia a'ikakauma haukia ahakiae tehao'au tebahuba'ari Auba Robe tea'ina raninai, ia ehore moni baika emaiainakia iuhubeau haukia nibenakia netiba,<sup>19</sup> "Hiabu naiana au abo'umo patobena'u, ba weikia ikoikiae ima'u ahakiae pahao'au pabahuba'ari raninai ia abokiamo Auba Robe patea'ina."

<sup>20</sup> 'A Petero ia ehina bena etibaha, "Oi emu moni ohi kato'ari haeamo pokina oraonana Tirama ena beruberu tabana hanona moniae kokawana.<sup>21</sup> Aka neiana aonai oi 'ekamu 'ao itaumu hanona aha'i pokina aomu a'i ebero Tirama wairanai.<sup>22</sup> Emu ki'ai moraona kabe, Obiapaka monoina, pa'e emu raona ki'a obona kehina haona.<sup>23</sup> Pokina naihani'o, oi aomuai hanona wamuru ebonu 'auna abomo aka ki'a aba ebiri haraini'o."<sup>24</sup> Simona nepu hauna iuhubeau haukia enoinakia etibaha, "Obiapaka tomobahuba'ari bena au pau'uai taba tohinana hauna here'uai

a'i merama." <sup>25</sup> Petero mai Ioane Obiapaka ena 'abi tehina waira tinana abomo teiroro aina murinai, haeamona temue Ierusalema. Ekia mueai hanona Samaria aiarakia bo'okia aokiae pou namona teiroro aina.

*Pilipo Etiopia Hauna Apa'uana Ha Eba'uere Robena.*

<sup>26</sup> Obiapaka ena aneru ha Pilipo ehina bena etibaha, "Omikiri ahi taina moao, taeara weiana Ierusalemai eao Gasa taeara weiana hanona hano'akuna."

<sup>27</sup> Pilipo emikiri taearei eao aonai Etiopia hauna ha eihana. Ia hanona hau apa'uana ha Etiopia obia 'arana babil'ena Kandake ena kohu i'imana hauna. Aba eao Ierusalemai ebahuba'ari,

<sup>28</sup> ba ena mueai ena rerueai emia'au Isaia mahabanai hauna ena puka ekaikauna netuabina.

<sup>29</sup> Weiana Auba Robe ehore Pilipo ehina bena etibaha, "Moao rerue weiana hauna herenai."

<sup>30</sup> Pilipo ebeau eao aonai Isaia mahabanai hauna ena puka netuabina aiana eona.

Ba ebakaina etibaha, "Notuabina hauna anina nubabataina, u?"

<sup>31</sup> Hau apa'uana weiana etibaha, "Aaea ka'lobi aihona? Iba'lobi'u hauna aha'i."

Ba ia ehore Pilipo enoina kekara'au herenai kemiasi.

<sup>32</sup> Puka Robena etuabina aonai 'abina hanona na terere aihona.

"Ia hanona matoha mamoe 'abana katebaka'ana kateaoaina kateahu 'arina pinana a'i ekaikauna, 'ao matoha mamoe nahu buirana katekabena hauna 'uru'uruna aha'i 'abana, pinana a'i ekaikauna 'abi ha a'i ehina 'apuana.

<sup>33</sup> Ena 'aiaunu buonai bakai aonai ena bero tea'i obona. Tai ha ena itubu robana a'i keahuna pokina ena mauri hanona huunai epua hanopakai aba ea'i obona."

Isa 53.7, 8

<sup>34</sup> Hau apa'uana weiana Pilipo ebakaina etibaha, "Moba'lobina'u, mahabanai hauna hanona tai

robana eahuna? Ia kipona pouna ehinana 'ao hau ha pouna chinana?" <sup>35</sup> Weiana Pilipo ehore puka etuabina hauna 'ekanai ea'i ramana, Iesu pouna namona eba'lobina.

<sup>36</sup> Terarua taearei teao aonai bei 'ekanai ha tekara'au, ba hau apa'uana weiana etibaha, "Moihana, bei weiana, au ka'uere robe a'i ketaina pokina hana taba?"

<sup>37</sup> (Pilipo etibaha, "Koa'ikakauma mai aomu ikoinai raninai, 'uere robe koa'ina hanona enamo.") Ba hau apa'uana weiana etibaha, "Mai ao'u ikoinai na'ikakauma Iesu Keriso hanona Tirama Nahuna.)

<sup>38</sup> Ba ehina bena rerue ebakorotina, Pilipo mai hau apa'uana terarua teriri teao bei aonai, Pilipo ehore hau weiana eba'uere robena.

<sup>39</sup> Terarua beiai tekara'au raninai, Obiapaka Aubana ehore Pilipo ea'i parena.

Ba hau apa'uana weiana Pilipo a'i eiha muena, ia taearei eao mai aonamona.

<sup>40</sup> 'A Pilipo hanona Asoto aiaranai ewaira tina, ba ekatoto aiarakia ikoikiae aokiae pou namona eiroro aina eaomo Kaisarea aiaranai ekara'au.

## 9

*Saulo Eraona Kabe.  
(Jh 22.6-16; 26.12-18)*

<sup>1</sup> Rani weianai weia Ierusalema aonai Saulo ena ao haiara ikoinai hanona Obiapaka te'abana haukia kebata'unakia 'ao keahu 'arinaukia, buonai eao robe haukia 'arakiae hauna herena.

<sup>2</sup> Enoina marere ha kererena kebena keao Damaseko marea herekiae. Weia Iesu tia'ikakauma taearanai neianai teka'aina haukia hau mai babi'e kebirinakia keaoainakia Ierusalema wapura 'ekana.

<sup>3</sup> Saulo taearei eao Damaseko aiara aba ebarina aonai mawa'eai mo ea ha kupai eriri ia ebarara ahina.

<sup>4</sup> Saulo e'eho 'anoai, aia ha eona etibaha, "Saulo e! Saulo e! Taba buonai au nu'oatana'u?"

<sup>5</sup> Saulo ebakai bakai etibaha, "Obiapaka e, oi tai?"

Ena 'abi ebamuena etibaha, "Au Iesu nu'oatana'u hau'u. <sup>6</sup> Bariu momikiri koao aiara aonai, weia hau ha kehore oi kobabainakia haukia akakia keba'iobin'i'o."

<sup>7</sup> Te'abana haukia ikoikiae tekoroti a'i 'uri'urikia, pokina aia mo teona ia tai ha a'i teihana. <sup>8</sup> Saulo 'anoai emikiri mahana ebano'anakia, ia taba ha a'i eihia 'apuana. Ua buonai imanai te'ebe tebaka'ana teaogaina Damaseko. <sup>9</sup> Weia wapu aihau emiaho taba ha a'i eihana, aniani ha a'i eana, bei abomo a'i einu.

<sup>10</sup> Ba a'ikakauma hauna ha Damasekoai atana Anania, ena mahabanaiai Obiapaka ia eaparina etibaha, "Anania e!" Anania eo'o e'abi etibaha, "E! Obiapaka. Au neia'u." <sup>11</sup> Ba Obiapaka Anania ehina bena etibaha, "Momikiri koao airabuana atana 'Bero' weia Iuda ena ituai Taso hauna atana Saulo kobakai bakai aina. Pokina ia hanona nibahuba'ari nemiaho. <sup>12</sup> Ia emahabanai hanona hau ha atana Anania eihana nimai ia ahnai kehao'au kebahuba'ari hanona mahana katenamo."

<sup>13</sup> Ia Anania Obiapaka ena 'abi ebamuena etibaha, "Hau neiana pouna rani bo'ona aona, Ierusalemai emu maearima robekia bo'okia ebahaiara ki'anakia. <sup>14</sup> Ba bariu robe haukia apa'uakia hiabu tebena, kemai neia abomo oi atamu tiaparina haukia ikoikiae kebirinakia." <sup>15</sup> Obiapaka ia ehina bena etibaha, "Moao. Pokina au aba ia atina'ana ta'ara'u ia'inai keao, rama haeaihaeai haukia, aiara obiakia abomo Isaraela haukia wairakiai au ata'u keiroro aina. <sup>16</sup> Haeamona au kahore kabaihana ia kehiaira ki'a baha au ata'u paunai."

<sup>17</sup> Ua buonai Anania emikiri eao, itu ai etoto, imana rua Saulo ahnai ehao'au etibaha, "Uaho'aba'u Saulo e! Obiapaka Iesu taeearai omai heremuai ewaira tina hauna euhuna'u amai, oi mahamu kateno'a koiha mue abomo Auba Robeai kebabonuni'o paunai." <sup>18</sup> Beronai matoha maia

unakia 'abana Saulo mahana te'eho, ba mahana tenamo, ena ihaiha enamo mue. Emikiri eao teba'uere robena. <sup>19</sup> Ba eanianian murinai hanona hauanina etabura mue.

#### *Saulo Damaseko ai Eiroro.*

Wapu baika Damaseko ai emi-aho a'ikakauma haukia herekiai. <sup>20</sup> Rani a'i ehoma'a aonai, Saulo emikiri Iuda haukia ekia marea ha ha aokiae eiroro ramana Iesu hanona Tirama Nahuna. <sup>21</sup> Aiana teona haukia ikoikiae tet'a'u ta'u huri tetibaha, "Neiana hanona Ierusalemai Iesu tekuti aina haukia ea'i ki'a ki'a bahanakia hauna. Ba emai neia baika abomo kebirinakia keaoainakia robe haukia apa'uakia herekia, 'u?"

<sup>22</sup> 'A Saulo ena iroro hanona ehiabu e'ariai 'ariai, ia ebato-hana Iesu hanona Keriso.\* Ua buonai Iuda haukia Damasekoai temiaho haukia ena 'abi kateba-muena taearana aha'i.

#### *Saulo Epihi.*

<sup>23</sup> Wapu baika teao murinai, Iuda haukia tet'o'u Saulo iahu 'arina robana teahuna, <sup>24</sup> ia Saulo hanona ekia robahu aba e'ioina. Ia hanona aiara parabuna pa'abina te'ima rabina te'ima ranina Saulo kateahu 'arina paunai. <sup>25</sup> Ia murinai tika'a haukia rabi aonai Saulo areha aonai teutana parabu 'ubinai waroai tebaririna.

#### *Saulo Eao Ierusalemai*

<sup>26</sup> Ba Saulo eao Ierusalemai ekara'au raninai ena nuatae hanona a'ikakauma haukia kipokia kateto'u, ia ikoikiae tet'a'u aina pokina a'i te'ioina ia hanona aba Iesu nia'ikakaumana.

<sup>27</sup> Ia Banaba ehore ebaraina ebaka'ana eaoaina iuhubeau haukia herekia. Saulo taearai Obiapaka aea eiha aihona, mai Obiapaka ehore ia ehina bena hauna, haeamona Damaseko ai Iesu pouna aea eiroroai aihona mai taburana hauna poukia ehinanakia. <sup>28</sup> Weiana buonai

\* 9:22: (22) 'ao Mesia

Saulo weia kipokia Ierusalemai temiaho, ena kaoaoai Iesu atana eiroro aina mai taburana.<sup>29</sup> Iuda maearamakia Helene maeana tehinana haukia Saulo kipokia te'abi'abi hanona tebaiara, buonai taearana tetabu kateahu 'arina.<sup>30</sup> Uaho'abana baika pou weiana te'io bina aonai, Saulo tebaka'ana teaoaina Kaisarea weia teuhuna eo Taso.

<sup>31</sup> Weiana Iudea, Galilea mai Samaria hanokia ikoikiai Tirama ena marea haukia aokiae baibua erama Obiapaka temariki aina mai Aubia Robe barai barai ebenakia ihobonai ekia tabura eapa'ua haeamona Tirama ena marea haukia ekia bo'o hanona ekara'au.

#### *Petero Mero Hauna Aenea Ebanamona.*

<sup>32</sup> Petero hanona aiara ha ha aokiae ekabanai eaomo Rudai Tirama ena maearima herekiae ekara'au.<sup>33</sup> Eka weianai mero hauna ha etabu ahina atana Aenea. Ia hanona uahomana enoti ihau aba 'ababani.<sup>34</sup> Ba Petero e'abi etibaha, "Aenea e! Iesu Keriso bariu oi nibamauri maurini'o. Momikiri, emu taba moa'i a'i harainakia." Beronai mo Aenea emikiri.<sup>35</sup> Ruda mai Saronai temiaho haukia ikoikiae hoa weiana teihana raninai, teraona kabe Obiapaka herena teao.

#### *Petero Tabita Ebamauri Maurina.*

<sup>36</sup> Iopa aiaranai a'ikakauma babi'ena ha emiaho, atana hanona Tabita. (Helene maeakiae hanona Doreka.)<sup>†</sup> Rani ikoikiae aka namokia ebabai uraru haukia ebarainakia.<sup>37</sup> Rani weianai ia hanona einawa ba e'ari. Epua teba'uere haraina ba itu aonai ikaihuri ha 'ubiai hauna aonai tebaenotina.<sup>38</sup> Ruda mai Iopa baiatakia hanona a'i ehoma'a. Ua buonai Iopa ai a'ikakauma haukia baika te'io bina Petero hanona weia Ruda ai, ba temikiri hau rua teuhunakia

teao Petero herena, tenoina keao biai herekia.<sup>39</sup> Ua buonai Petero emikiri kipokia teao, ba tekara'au raninai teaoaina itu aonai ikaihuri ha 'ubiai hauna aonai tebakara'auna. Wapu baika abomo weia tekoroti tihai, Doreka maurinai habuni ibatoto mai iro'abu etainakia haukia Petero tebakhana.<sup>40</sup> Petero ehore euhunakia tekarahi ba ekaipahu ebahuba'ari. Murinai 'ari babi'ena ewairana e'abi etibaha, "Tabita e! 'Omkiri." Weiana ia mahana eba no'anakia Petero eihana ba emikiri emiati.<sup>41</sup> Petero ehore imanai ea'i ebaraina, emikiri ekoroti. A'ikakauma haukia mai wapu eaparinakia temai herena, babi'e ebamauri maurina hauna ebaikanakia.<sup>42</sup> Pou neiana hanona Iopa aiaranai ikoinali tehina otaraina, ba maearima bo'ona Obiapaka tea'ikakaumana.<sup>43</sup> Petero weia Iopai Simona poromakau paruakia nitainakia hauna herenai rani homa'ana emiaho.

## 10

#### *Aneru Korenelio Herenai Ewaira Tina.*

<sup>1</sup> Kaisarea aiaranai Roma huari hauna ha atana Korenelio, Italia huari haukia ikoinali hinabu hamomo ekia poki hauna.<sup>2</sup> Ia mai ena itu haukia kipokia hanona Tirama timariki aina mai ena nuatae tika'i haraina, ia ena taba bo'okia Iuda haukia uraru haukia eberuberu benakia, abomo rani ikoinali ebahuba'ari Tirama herenai.<sup>3</sup> Rani ha atiha abiranai beraura hoana aihau 'abana, ia emahabanai hanona Tirama ena aneru ha eiha haraina emai ia ena ituai etoto ehina sera etibaha, "Korenlio e."<sup>4</sup> Ia mai ta'uina aneru eiha 'ini'inina e'abi etibaha, "Obiapaka e, omai hanona taba?"

Aneru ia ehina sera etibaha, "Emu bahuba'ari mai emu beruberu uraru obarainakia haukia Tirama aba ea'i taeanakia ba ja hanona oi a'i nireani'o.<sup>5</sup> Bariu

<sup>†</sup> 9:36: (36) Tabita mai Doreka hanona mahi atana Dia.

emu miori baika mouhunakia temeo Iopa, hau ha atana Simona atana ibaruana Petero katehina bena kipokia katemai.<sup>6</sup> Ia hanona Simona ha poromakau paruakiae taba haeaihaeai nitainakia hauna ena 'ekai nemiaho, ena itu hanona poe haianai."

<sup>7</sup> Aneru 'abi weiana ebaiben'i ba eka'a, murinai Korenelio ehore ena ituai ta'ara'i miorikia rua mai huari hauna ha Obiapaka ena natae nika'aina hauna kipokia eparinakia. <sup>8</sup> Weiana Korenelio herenai terama haukia maikoinai hau weiakia teaihau ehina benakia, epua eu hunakia Iopa teao.

#### *Petero Mahabanai Tabana Ha Eihana.*

<sup>9</sup> Wapu ibaruana atiahinanai maearima weiakia Iopa aba tebarina hana Petero ekara'au eao itu kapena arai 'ekanai ua'a kebahuba'ari. <sup>10</sup> Mare'a e'ari, enuatae taba ha pehaea peana, aniani tiba'oru ohonamo aonai ia taba ha eihana matoha nenibi 'abana. <sup>11</sup> Kupa ikaikau eihana mai taba ha habuni panabana rarina 'abana puana bani banikiai ia'i to'o ibariri nimai hanopaka. <sup>12</sup> Habuni weiana aonai mahi aekia bani bani haukia ikoikiai, hanopakai tikara haukia ikoikiai mai 'ubiai tirobo roborobokia ikoikiai weia aonai iuta'au. <sup>13</sup> Ba aia ha ia ehina bena etibaha, "Petero e, omikiri moahu moani." <sup>14</sup> A Petero aia weiana ena 'abi ebamuena etibaha, "Obiapaka e, aha'i 'akina, au mahi Tirama wairanai te'opu haukia 'ao a'i terobe haukia ha a'i nani 'apuana." <sup>15</sup> Aia weiana haeamona Petero ehina bena etibaha, "Tirama aba ebamaha mahananakia haukia oi 'opukia a'i kohinana." <sup>16</sup> Hoa neiana rani aihae ewaira tina ba beronai habuni weiana hanona iberi'au emue eao kupa.

<sup>17</sup> Petero mahabanai weiana anina niraonana aonai, Korenelio eu hunakia haukia Simona ena itu tetabu ahina ba temai ena ara pa'abina 'akonai tekoroti.

<sup>18</sup> Weiana teapari tebakai bakai Simona atana ha Petero hanona weia nemiaho 'ao. <sup>19</sup> Petero mahabanai weiana niraona ohona aonai Auba Robe ehore ia ehina bena etibaha, "Petero e, maearima aihae hanona oi titabuni'o. <sup>20</sup> Momikiri, moriri moao herekia, aomu a'i kearo'ari kipokia katoao, pokina ia haukia au auhunakia."

<sup>21</sup> Petero eriri eao hau weiakia ehina benakia etibaha, "tutabuna hauna hanona au neia'u. Emiraona ha buonai tomai, 'u?" <sup>22</sup> Ba ia ena 'abi tebamuenetibaha, "Ai hanona Korenelio huari haukia hinabu hamomo nipokinakia hauna eu hunamai tamai. Ia hanona bero hauna mai Tirama nimariki aina hauna Iuda haukia ikoikiai hanona ia timariki aina. Tirama ena aneru ha ia ehina bena kebaiuhu koao ena itu, weiana oi taba ko'uhina hanona aiamu keona." <sup>23</sup> Petero ehore hau weiakia ebatotonakia ituai kipokia teparua. Erani rauraninai Petero eba'oru ba temikiri teka'a, a'ikakauma haukia baika Iopai temiaho haukia abomo ia te'abanakia kipokia teao.

#### *Petero Eao Korenelio Ena Itu.*

<sup>24</sup> Erani ba rani haeai hanona ia Kaisarea aiaranai tekara'au. Korenelio hanona hatia'ana mai ena hau tohakia baika ebeaunakia ia kipokia Petero kate'imana. <sup>25</sup> Petero ituai ekara'au ba Korenelio ohi tebaitabu ahi aonai Petero aena pokinai e'umuti ekuti aina. <sup>26</sup> Ia Petero Korenelio eberi taeana ehina bena etibaha, "Omkiri, au hanona maearima 'abaea'u oi 'abana." <sup>27</sup> Weiana terarua mai 'abi'abikia ituai tekatoto aonai maearima bo'ona teto'una eihankakia.

<sup>28</sup> Ba Petero ehina benakia etibaha, "Wai to'obi ki'a bahana Iuda hauna hanona rama haeai hauna ohi a'i katemiaho haeamo, abomo a'i keao herena mai rauhubuna. Ia Tirama eba'hana'u hau ha 'opuna 'ao a'i erobe hauna a'i kahina 'apuana." <sup>29</sup> Weiana buonai emi beaubeau eao hanona beronai amai a'i aubo. E'u bakai

bakai hanona neiana, taba buonai tobaiuhu au amai?"

<sup>30</sup> Korenelio ia ena 'abi ebamuena etibaha, "Wapu bani aba teao aonai, atiaha abiranai beraura hoana aihau 'abana bariu ihobona nahomanai e'u ituai abahuba'ari aonai beronai mo hau ha ena habuni 'imare'i'marena waira'uai ekoroti. <sup>31</sup> Ba ehina bena'u etibaha, 'Korenlio e, Tirama hanona emu bahuba'ari aiana abeona abomo emu beruberu akakia uraru herekiai haukia niraona 'ini'ininakia. <sup>32</sup> Ua buonai 'abi kouhuna keao Iopa, Simona atana ha Petero kemai, ia hanona hau ha poromakau paruakia nitai hauna atana Simona ena ituai nemiaho weia poe haianai." <sup>33</sup> Weiana buonai 'abi auhu noanoana ewahi, ba omai hanona enamo. Ai ikoimaiai neia Tirama wairanai aba tato'una, Obiapaka oi ebahi ahin'i'o 'abikia ikoikiai kohinanakia aiamu kataona."

### Petero Korenelio Ena Ituai Eiroro.

<sup>34</sup> Petero ena 'abi ea'i ramana etibaha, "Abi tohana, bariu a'iobi haraina Tirama hanona maearima ha a'i nitaina ia ikoikiai ihoboi niba ka'anakia. <sup>35</sup> Abina aha'i itubu tabana hauna ia Tirama nimariki aina abomo bero akakia nibabai hauna Tirama nihore nia'i taeana. <sup>36</sup> Tirama 'abi euhuna eao Isaraela maearimakia herekiai hanona neiana, baibua pouna namona hana Iesu Keriso aonai nimai, ia hanona maearima ikoikiai ekia Obiapaka. <sup>37</sup> Wai aba to'ioquina hoa neiana hanona Galilea ai ea'i ramana, Ioane maearima wairakiai ba'uere robe eiroro aina murinai Isaraela hanona maikoina aonai erama. <sup>38</sup> Wai Iesu Nasareta hauna to'ioquina, Tirama ehore Auba Robe mai hiabu ia ahana ebakikina, Iesu eao 'ekakia ikoikiai namo ebabai, mai Satani ea'i ki'anakia haukia ikoikiai ebamaurinakia, pokina Tirama hanona ia e'abana. <sup>39</sup> Iuda aiarakia maikoina aonai mai Ierusalemai ebabai tabakia ikoikiai mahamaiai taihanakia.

Iuda haukia tehore matiu ibiro ropo 'arunai tekoko 'auna e'ari.

<sup>40</sup> Ia wapu ibaihaunai Tirama ehore Iesu 'ariai ebamikirina mai ebawaira tinana, <sup>41</sup> maearima ikoikiai wairakiai aha'i, ai Tirama aba etina'anamai haumai wairamaiai mo. Ia 'ariai emikiri murinai kipokia taniani haeamo abomo bei tainu haumai neiamai hanona ia pouna tahinana. <sup>42</sup> Ia ai ehina benamai maearima herekiai pou namona katairoro aina haeamona katahina pou haraina weiana Tirama ehore ia ea'i taeana mauri haukia mai 'ari haukia kebabakainakia haunai ebaona. <sup>43</sup> Mahabanai haukia ikoikiai ia pouna aba tehina haraina, weiakia ikoikiai Iesu kate a'ikakaumana haukia hanona ia atanai ekia ki'a kehina hao."

### Rama Haeai Haukia Auba Robe Tea'ina.

<sup>44</sup> Petero 'abi neiakia nehina ohonakia aonai, weiakia tibahu haukia ikoikiai ahakiai Auba Robe eriri. <sup>45</sup> Iuda haukia weiakia Iesu tia'ikakaumana mai Petero ti'abana haukia tetu'uta'u huri, pokina Auba Robe ena beruberu hanona rama haeai haukia ahakiai abomo eba ririna, <sup>46</sup> haeamona ia aiaakia teona maea haeaihaeai ti'abi'abi mai Tirama tibananoma. Weiana Petero e'abi etibaha, <sup>47</sup> "Maearima neiakia hanona Auba Robe aba tea'ina aika ha'ina ihobonai. Ba tai ia kebamuenakia beiai a'i kate'uere robe?" <sup>48</sup> Weiana Petero ia ehina benakia Iesu Keriso atanai kate'uere robe. Ba te'uere robe murinai Petero tenoina wapu baika weia herekiai kemiaho.

## 11

### Petero Taba Erama Hauna Ehina Haraina Ierusalemai.

<sup>1</sup> Iuhubeau haukia mai uaho'aba Iudeai temiaho haukia hanona rama haeai haukia abomo Tirama ena 'abi aba tea'i taeana hauna pouna teona. <sup>2</sup> Weiana Petero emue Ierusalemai ekara'au raninai, Iuda haukia weiakia Iesu tia'ikakauma haukia ia herenai

te'abi pahihi,<sup>3</sup> tetibaha, "Oi a'i tetarenakia haukia herekia oao ekia ituai kipokia toaniani haeamo, 'u?"

<sup>4</sup> Weiana Petero ehore taba terama haukia ikoikiae ia wairakiae ehina harainakia. <sup>5</sup> Ia e'abi etibaha, "Topai ua'a rani ha e'u bahuba'ari aonai amahabanai, ba taba ha kupai eriri aihana ihana matoha habuni rarina 'akina 'abana, puana bani banikiae ia'i to'o ibariri here'u. <sup>6</sup> Aihaiha haraina aona tabakia ikoikiae hanona mahi aekia banibani tika'a haukia, hanopakai tikara tabakia mai 'ubiae tirobo roborobokia ahanakia. <sup>7</sup> Ba aia ha aona ehina bena'u etibaha, 'Petero e, omikiri moahu 'ari moani.' <sup>8</sup> Ia au a'abi atibaha, 'Obiapaka e, aha'i 'akina, au 'opu tabakia 'ao a'i terobe tabakia ha pina'uai a'i nani 'apuana.' <sup>9</sup> Iamo aia ibaruana haeamona kupai emai etibaha, 'Tirama ebamaha mahanakia tabakia hanona oi 'opukia a'i kohinanakia.' <sup>10</sup> Hoa neiana rani ibaihauna ewaira tina. Ba taba weiakia ikoikiae mai habunina haeamona iberi'au mue kupa eao.

<sup>11</sup> Rani weianai hau aihau Kaisareai teuhunakia temai here'u haukia beronai amiaho itunai tekara'au. <sup>12</sup> Aonai Auba Robe ehina bena'u a'i kabaoao ia kipokia kataeao. Uaho'abaka neiakia 'abaihau kipokia taeao Kaisareai hau weiana atana Korenelio ena ituai takatoto. <sup>13</sup> Ia ehina benamai, aneru ha ena ituai ewaira tina ba ia ehina bena etibaha, 'Hau harua kouhunakia kateao Iopa ai ua'a Simona atana ha Petero katehina bena kemai. <sup>14</sup> Ia kehore 'abi kemaiaina, weiana oi mai emu itu maearimakia kipokia ibamaurimi.' <sup>15</sup> E'u 'abi a'iramana aonai Auba Robe ia ahakiae eriri ihobona 'uainai aika ahakai eriri 'abana. <sup>16</sup> Weiana aonai Obiapaka ena 'abi araona tinana, 'Ioane beiai eba'uere robe 'a wai hanona

Auba Robeai kato'uere robe.<sup>17</sup> Weiana aika Obiapaka Iesu Keriso ha'ikakauma aonai Tirama ena beruberu ebenaka ihibonai beruberuna hamona ia abomo ebenakia. Ba au maearima aea homa'u Tirama ena aka weiana kakaiabuna?"

<sup>18</sup> Iuda a'ikakauma haukia 'abi neiana teona raninai ekia baoao baoao tebapuanakia iamo Tirama tebanamona tetibaha, "Tirama ehore rama haeai haukia abomo aba bero ebenakia weiana ekia ki'ai kateraona kabe raninai mauri kebenakia."

#### *Antioka Haukia Keriso Ena Maearima Teao.*

<sup>19</sup> Stefano ena 'ari murinai a'ikakauma haukia terama otaraina, baika atau'a tohana teao Foenikia, Kupuro hanokia mai Antioka, Iuda haukia kipokia mo baiatakiae pou namona teba'obi aina. <sup>20</sup> Ia a'ikakauma haukia baika hanona Kupuro mai Kurene haukia. Ia teao Antioka ai tekara'au raninai rama haeai haukia abomo tehina benakia. Obiapaka Iesu pouna namona teiroro aina. <sup>21</sup> Obiapaka ena hiabu hanona ia herekiae paunai maearima bo'ona 'akina tea'ikakauma Obiapaka herena teao.

<sup>22</sup> Pou neiana eao Ierusalemai a'ikakauma haukia teona, weiana Banaba teuhuna Antioka keao.

<sup>23</sup> Ia Antiokai ekara'au Tirama maearima ua ebanamo harai aihonakia eihana raninai ia aona hanona enamo, haeamona ikoikiae ebataburanakia Obiapaka aiana kateka'aina mai aokia ikoinai. <sup>24</sup> Banaba hanona hau namona Auba Robeai ebonu mai ena a'ikakauma etabura. Ua buonai maearima bo'ona temai Obiapaka herena.

<sup>25</sup> Weiana murinai Banaba emikiri Taso eao Saulo ketabuna.

<sup>26</sup> Etabu ahina raninai eaoaina Antioka. Ihau hamona terarua ua'a, a'ikakauma haukia kipokia teto'u abomo maearima bo'ona teba'iobinakia. Weia Antiokai Iesu

\* 11:26: (26) Nao maeana 'Christian'.

tia'ikakaumaŋa haukia weiakia atakia teapari ramana Keriso ena maearima.\*

<sup>27</sup> Rani weianai mahabanai haukia baika Ierusalemai teriri temai Antioka. <sup>28</sup> Ha atana hanona Agabo emikiri Auba Robe ena hiabuai arobo rarina 'akina hanopaka maikoinai kerama hauna pouna ehinana. (Arobo weiana hanona Klaudio ena obia raninal erama toha.) <sup>29</sup> Weiana a'ikakauma haukia weia Antiokai hanona aokia tebahamona tenuatae ia ha ha ekia tabura ihibonai baraibarai katetiu ahina uaho'abakia Keriso aonai weia Iudea ai temiaho haukia 'eukia. <sup>30</sup> Ba ua tebabai aiho. Ekia beruberu hanona Banaba mai Saulo imakiae teutana ba ia terarua tehore beruberu weiana teaoaina Iudeai a'ikakauma haukia te'uai ainakia haukia katebenakia.

## 12

### *Heroda Iakobo Eahu 'arina Ba Petero Tebewapurana.*

<sup>1</sup> Ua raninai Heroda Obia hauna ehore Tirama ena marea haukia baika ea'inakia enuatae kea'i ki'anakia paunai. <sup>2</sup> Ia ehore Ioane a'ana Iakobo akiua ai ehara 'arina, <sup>3</sup> Heroda Iuda haukia eihanakia babai weiana hauna teaonamo aina, ua buonai ia ehore Petero abomo ea'ina. Rani weiana hanona Iuda haukia ekia tatu ha Parawa ibakupu aha'i tatuna ranina. <sup>4</sup> Ea'ina wapura itunai ekaibuna, huari haukia harau haea 'abaihau imakiae eutana, bani bani kate'imana. Heroda ena raona hanona tatu murinai kebakarahina mako wairakiae kebabakaina. <sup>5</sup> Ua buonai Petero wapura itunai te'imana, ia a'ikakauma haukia hanona Tirama tenoi tabura taburana Petero paunai.

### *Aneru Petero Ebaraina Wapura Itunai Ebakarahina.*

<sup>6</sup> Heroda eraonana kebakarahina na ehoma rani weiana a'i nimai baha rabinai, Petero hanona huari haukia rua ba-iatakiae enoti eparua mai ibirikia

rua. Ba huari haukia rua pa'abi 'akonai tebai'ima. <sup>7</sup> Aonai biai mo Obiapaka ena aneru ia herenai ekoroti eana ikaihuri ebaeana, aneru ehore Petero robuna eati 'apuana, ebaona etibaha, "Omkiri biai," raninai imana rua tabiri te'eho. <sup>8</sup> Aneru ehore Petero ehina bena etibaha, "Emu habuni mobatotona, emu tamaka moaba'au." Petero ua ebabai aiho, aneru e'abi mue, "Emu iro'abu moa'ina moro'abuni'o, muri'uai koka'a." <sup>9</sup> Petero wapura ituna ikaihurina ekarahi aneru murinai eka'a, ia a'i ebabataina aneru ena aka weiana hanona tohana 'ao nimahabanai. <sup>10</sup> Ima haukia kori 'uaina mai ibaruana tekaboinakia teao auri pa'abina weiana katekarahi aiarai katetoto hauna kipona ekaikauna, ba terarua tekarahi aiara taearana teka'a teao aonai beronai aneru Petero herenai ekaobo.

<sup>11</sup> Weiana Petero aona ea e'abi etibaha, "Bariu au a'iobi haraina Obiapaka ehore ena aneru eu-huna, Heroda ena hiabu ba'anai mai Iuda haukia ekia raona weiana here'uai katebabai aokiae ebamaurina'u." <sup>12</sup> Kipona aonai eraona raona haraina, ba beronai Maria ena itu eao, Maria weiana hanona Ioane Mareko hinana, a'ikakauma haukia bo'ona weia tetou'una tibahuba'ari. <sup>13</sup> Petero itu weiana pa'abinai ehara hara, ba ta'ara'i uahona ha atana Roda eao pa'abi kekaikauna. <sup>14</sup> Uaho Petero aiana e'lobina raninai, aona enamo ki'a baha, pa'abi a'i ekaikauna ia ebeau emue eao ehina benakia etibaha, "Petero hanona pa'abi 'akonai ekoroti." <sup>15</sup> Ia uaho tehina bena tetibaha, "Oi nuao 'abaea!" 'A uaho e'abi tabura weiana hanona tohana. Ua buonai ia te'abi tetibaha, "Na pa'e Petero ne'imana aneruna."

<sup>16</sup> 'A Petero ehara hara oho paunai, ia pa'abi tekaikauna ba teihana raninai teta'u ta'u huri. <sup>17</sup> Petero imanai ehara abunakia urukia keaha'i, ba Obiapaka wapura itunai aea ebakarahi

aihona hauna pouna ehinana, abomo ehina benakia Iakobo mai uaho'abakia herekiae pouna katehinana. Ba ekaobo 'eka ha eao.

<sup>18</sup> Raurani 'amarinai atetua raria erama huaru haukia kipokia baiatakiae tebakai bakai Petero herenai taba erama. <sup>19</sup> Heroda e'abi katetabuna, ia a'i tetabu ahina, ua buonai i'mana haukia ebakainakia ba ena 'abiai teahu 'arinakia. Neiana murinai Heroda Iudea ehabona eao Kaisarea ua'a emiaho.

### *Heroda E'ari.*

<sup>20</sup> Heroda hanona Turo mai Sidono maearimakia eopuerai ki'anakia, ua buonai ikoikiae aokia tebahamona herena kateao. Kori'uaina Heroda ena itu nipoki aina hauna atana Blasto herena teao teba'amena temaiaina ia taikiae, ba teao Heroda herena baibua tenoi aina. Pokina ekia aniani hanona obia hauna weiana ena hanoai nimai.

<sup>21</sup> Heroda etina'ana wapunai, ia ehore ena obia habunina ebattona ena obia imia'aunai emia'au maearima eironorakia. <sup>22</sup> Ba aiara maearimakia ia teioaina tetibaha, "Neiana hanona Tirama ha aiana, ia maearima ha aiana aha'i." <sup>23</sup> Weiana aonai Obiapaka ena aneru beronai Heroda eahu obona pokina ia Tirama a'i ebanamona paunai, 'erau'erau ia hauanina teana ba e'ari.

<sup>24</sup> Ia Tirama ena 'abi hanona etabura haeamona erama otaraina, a'ikakauma maearimakia hanona ebo'o hao bo'o hao.

<sup>25</sup> Banaba mai Saulo ekia aka weiana moni tebenakia hauna tebaorena raninai Ierusalema tehabona, Ioane atana ha Mareko abomo tebaka'ana kipokia Antioka teao.

## 13

### *Banaba Mai Saulo Teuhu Ahinakia.*

<sup>1</sup> Antioka mareana aonai mahabanai mai bamarere haukia baika atakia neiakia, Banaba, Simeona (hau umuna), Lukio

(Kurene hauna), Manaen (Heroda ohi tekiro haeamo) mai Saulo.

<sup>2</sup> Ia tehore Obiapaka tekuti aina mai teani robe aonai, Auba Robe ehina benakia etibaha, "Banaba mai Saulo ohi katoa'i taeananakia au pau'uai, au anuatae aina akana katebabaina." <sup>3</sup> Weiana teani robe mai tebahuba'ari murinai, imakia ia terarua ahakiae tehao 'au ba teuhu ahinakia.

### *Kupuro ai Teiroro.*

<sup>4</sup> Auba Robe ehore Banaba mai Saulo ohi euhunakia teriri teao Seleukia ai, weia haeamona aunohiae tebeau ahi teao Kupuro kereibuunai. <sup>5</sup> Salami ai tekara'au weia Tirama ena 'abi Iuda haukia ekia marea aokiae teiroro aina Ioane Mareko abomo weia herekiae ia ebarainakia.

<sup>6</sup> Kereibua maikoinai tekabanai teao Pafo ai hanona hau ha tetabu ahina, Iuda haukia ekia mea hauna mai mahabanai bai'oina hauna ha atana Bariesu. <sup>7</sup> Ia hanona kereibua weiana ena Kabana hauna Seregio Paulo aobero hauna ena hau. Kabana hauna ehore Banaba mai Saulo eaparinakia wairanai, pokina ena nuatae Tirama ena 'abi aiana keona. <sup>8</sup> A Bariesu atana ibaruana Eluma (Helene maeanai anina hanona mea hauna) ia terarua ekaibunakia Kabana hauna ekia 'abi paunai a'i mea'ikakauma. <sup>9</sup> A Saulo, atana ibaruana hanona Paulo, Auba Robe ai ebonu 'auna, mea hau weiana eiha 'ini'inina, <sup>10</sup> ehina bena etibaha, "Oi Tiapor nahuna! Oi hanona taba namokia ikoikiae nu'oatanakia aomu bai'oi mai ki'a akakiae ebonu. Obiapaka ena 'abi tohakia ikoinai nua'i banai bai'oi ai nubaonakia. <sup>11</sup> Bariu Obiapaka imana hanona oi ahamuai kehore 'auna aonai mahamu kateki'a, rani papana beraura eana a'i koihana." Beronai Eluma eonobaina 'abu mai wapura mahana tekaibuna, maearima enoinakia ibaka'ana hauna ha pehaea imanai pe'ebe pebaka'ana.

<sup>12</sup> Kabana hauna hoa weiana erama eihana raninai

ea'ikakauma, pokina Obiapaka  
ena ba'iobi 'abikiae eta'uta'u huri.

*Paulo Mai Banaba Teao Pisidia  
Hanona Antiokai Teiroro.*

<sup>13</sup> Paulo mai te'abana haukia kipokia Pafo ai tebeau ahi teao Perega, Pamfulia hanonai tekara'au, weia Ioane Mareko ia ehabonakia emue Ierusalem eao. <sup>14</sup> Paulo mai Banaba ohi Perega ai temikiri teao Pisidia hanona Antioka ai tekara'au. Weia beraura robe aonai teao Iuda haukia ekia marea tekatoto temiati. <sup>15</sup> Mose ena rauhubu pukana mai mahabanai haukia tererenakia pukakia tetuabinakia murinai marea pokia haukia tebaiuhu eao herekiae tetibaha, "Uaho'abamai e, emai nuatae emi batabura 'abina ha re'a maearima neiakia herekiae patohinanakia."

<sup>16</sup> Paulo emikiri imanai etori abunakia etibaha, "Isaraela haumi mai rama haeai Tirama tokuti aina haumi e, aia'u tomona. <sup>17</sup> Isaraela hauka eka Tirama ehore kupuka 'aba'abaka etina'anakia abomo haukia ebabo'onakia ekia miao Aigupito aonai, haeamona ia ena hiabu apa'uana Aigupito ai ebakarahanakia. <sup>18</sup> Ihau bariabui 'abana hano'akunai herekiae ebapahihi. <sup>19</sup> Ia ehore Kanana hanopakakia 'abaihau hamomo ebapururunakia. Hanokia ewatenakia Isaraela hanokiae teao ihau hinabu bani reana imabui 'abana aonai. <sup>20</sup> Taba neiakia murikiae bakai haukia ebamikirinakia kate'uainakia emaimo mahabanai hauna Samuela ena rani ai.

<sup>21</sup> "A ia tehore obia 'arana ha tenuatae aina hanona Tirama ehore Beniamina itubuna hauna ha, Kisa nahuna Saulo ebenakia, ihau bariabui aonai eobia. <sup>22</sup> Tirama Saulo ea'i obona murinai Davida ea'i taeana ekia obia 'aranai eao. Ia pouna ehinana etibaha, 'Tese nahuna Davida abatabu ahina anuatae aina, ia hanona e'u nuatae akakia ikoikiae kebabainakia.' <sup>23</sup> Tirama ena 'abi'uai ihobonai Davida ena rama

haunai Isaraela maearimakia kebamaurinakia hauna ebamikirina, weiana hanona Iesu.

<sup>24</sup> "Iesu ena aka a'i ea'i rama bahana aonai Ioane hanona aba eiroro 'uai Isaraela maearimakia ikoikiae ekia ki'ai kateraona kabe mai kate'uere robe. <sup>25</sup> Ioane ena aka aba kepuia aonai maearima ehina benakia etibaha, 'Wai turao-nana au hanona tai? Au hanona Keriso aha'i. Ia hanona muri'uai nimai, au hana a'i anamo ena tamaka warokia a'i karubunakia.'

<sup>26</sup> "Uaho'aba'u Aberahamo ramana haukia nahukia abomo wai rama haeai Tirama tokuti aina haumi e, Tirama ehore bamauri 'abina neiana aba euhuna emai aika herekai. <sup>27</sup> Ierusalemai ai temiatio haukia mai te'uai ainakia haukia a'i te'iorina Iesu hanona bamauri hauna. Abomo beraura robe ai rani ikoikiae tetuabina 'abina weiana mahabanai haukia tererena hauna obona a'i teobo, Iesu aka ki'a haunai tebaona, weiana hanona mahabanai haukia ekia 'abi aba etohana.

<sup>28</sup> Iesu kateahu 'arina ena pokina ha a'i tetabu ahina, weiana Pilato tenoina 'ari 'ekanai kehorotina. <sup>29</sup> Ia 'abina puka robenai terere 'uainakia ihobonai akakia ikoikiae tebaorenakia murinai, ia e'ari hauanina matiu ibiri ropo 'ubinai tea'i obona 'ariahanai tehorena. <sup>30</sup> Ia Tirama ehore Iesu 'ariai ebamikiri muena. <sup>31</sup> Weiana murinai, Iesu hanona rani bo'ona kipokia teka'a Galilea ai eaomo Ierusalemai haukia herekiae ewaira tina. Bariu maearima weikiae hanona ia mahakiae teihana hauna pouna tehinana Isaraela haukia wairakiae.

<sup>32</sup> "Ua buonai ai abomo pou na-mona weiana Tirama 'aba'abaka herekiae e'abi'uai aina hauna tamaiaina wai heremi. <sup>33</sup> Tirama hanona Iesu 'ariai ebamikirina weianai ena 'abi'uai 'aba'abakia herekiae ebatohana. Salamo ibaruania aonai abomo Iesu pouna ehinana etibaha, 'Oi hanona au Naha'u. Bariu rani neianai

\* 13:33: (33) 'ao abaramani'o.

au hanona oi Hamamu.\*

Sal 2.17

<sup>34</sup> Tirama Iesu 'ariai ebamikirina, ba 'ariahana aonai a'i keburu buru. Weiana hanona ena 'abi puka robenai hauna ebatohana, 'Au kahore Davida herenai a'abi'uai aina weiana erobe mai etohana hauna wai kabenimi.'

Isa 55.3

<sup>35</sup> Salamo haeai aonai abomo na e'abi aiho, 'Emu robe hauna hanona a'i kohabo 'abaeana a'i keburu buru.'

Sal 16.10

<sup>36</sup> Davida ena mauriai hanona Tirama ena nuatae akakia ebabai, murinai e'ari kupuna 'aba'abana herekiae tehorena, haeamona hauanina 'uriai eburu buru. <sup>37</sup> Ia Tirama 'ariai ebamikiri muena hauna hanona 'uriai a'i eburu buru. <sup>38</sup> Ua buonai uaho'aba'u e, tanuatae kato'ibina Iesu paunai ki'a ihina haona pouha hanona wai heremiae tairoro aina. <sup>39</sup> Tirama ehore Iesu tia'ikakaumana haukia hanona bero ebenakia, pokina Mose ena rauhubuai 'ekakia ikoikiae wai bero a'i katotabu ahina. <sup>40</sup> Ua buonai kato'ima 'ima harainimi mahabanai haukia 'abi tabana tehinana hauna heremiae a'i merama. Na te'abi aiho,

<sup>41</sup> "Uahi'uahi haumi, tomota'uta'u huri ba tomo'ari baihana.

Au emi raniai taba ha kababaina, hau ha pekipa haraina iamo a'i kato a'ikakaumana.'"

Hab 1.5

<sup>42</sup> Paulo mai Banaba marea ai tikarahi aonai, maearima ia tenoinakia pou neiakia waira rani robenai katehina mue herekiae. <sup>43</sup> To'u epua murinai, Iuda maearimakia mai rama haeai maearimakia Tirama tekuti aina ba Iuda haukia baiatakiae tetoto haukia bo'okia Paulo mai Banaba murikiae te'au. Ia terarua maearima weiakia tebahi ahinakia Tirama ena aoko'o hoana aonai katemiaho.

<sup>44</sup> Rani robenai ibaruuanai aiarai temiaho haukia ikoinai temai

tebararona Tirama ena 'abi aiana kateona. <sup>45</sup> 'A Iuda haukia hanona to'u haukia teihanakia raninai tewamuru ki'a, Paulo 'abi ehinanakia haukia tea'i ki'anakia haeamona 'abi ki'a obokia tehina ia herenai. <sup>46</sup> Ia Paulo mai Banaba te'abi tabura tetibaha, "Tirama ena 'abi hanona wai pato'iobi 'uaina, ia wai hanona tubaki'ana haeamona kipomi ki'a 'ekanai tuhorotinimi mauri banaibana a'i tonuatae aina, ua buonai ai aba rama haeai haukia herekiae taeao. <sup>47</sup> Obiapaka na ehinabe aihonamai,

'Au oi nahorotini'o rama haeai haukia ibaeakia ai koao, abomo bamauri koaoaina hanopaka puana.'"

Isa 49.6

<sup>48</sup> Rama haeai haukia aia weiana teona raninai aokia enamo ba Obiapaka ena 'abi tebanamona. Weiakia Tirama etina'anakia mauri banaibana katea'ina haukia hanona tea'ikakauma. <sup>49</sup> Ba Obiapaka ena 'abi hanona hano weiana maikoina aonai teuhu otaraina. <sup>50</sup> Ia Iuda haukia tehore obia babi'ekia weiakia Tirama tekuti aina haukia mai aiera haukia apa'uakia aokia teani tekai ta'a ta'anakia, Paulo mai Banaba ohi te'oatanakia haeamona hano weiana aonai te'u ahinakia. <sup>51</sup> Paulo mai Banaba hanona baki'a aiarana weiana herenai aekia apurorokia teahuahu obonakia ba teao Ikonio. <sup>52</sup> A'ikakauma haukia weiakia Antioka ai temiaho haukia aokiae enamo mai Auba Robe ai tebonu.

## 14

*Paulo Mai Banaba Ikonio ai.*

<sup>1</sup> Antiokai tebabaina ihobonai Ikonio ai abomo Paulo mai Banaba ohi Iuda haukia ekia marea aonai tekatoto teiroro, Auba Robe ena baraiharai ai weiana ekia iroro harai buonai Iuda haukia mai rama haeai haukia bo'ona 'akina tea'ikakauma. <sup>2</sup> 'A Iuda haukia baika a'i tea'ikakauma haukia tehore rama haeai haukia haiakia tekui tea'ikakauma haukia

kate'oatanakia.<sup>3</sup> Terarua rani homa'ana weia temiaho mai taburakia Obiapaka pouna tehinana abomo hoa mai bata'uta'u huri akakia tebabainakia, weianai Obiapaka hanona ena aoko'o hoana 'abina teiroro aina hauna ebatohana.<sup>4</sup> Weiana aiara apa'uana aonai maearima kipokia tewatenakia, baika teao Iuda haukia herekia harua teao iuhubeau haukia herekia.<sup>5</sup> 'A rama haeai haukia mai Iuda haukia ekia aiara te'uai aina haukia kipokia teroba ahu, iuhubeau haukia rua katebatae ainakia abomo piharai kateahu 'arinakia.<sup>6</sup> Terarua pou teona raninai te'uru Lukaonia hanona aonai Lustera mai Derebe aiarakia herekia teao.<sup>7</sup> Weia pou namona teiroro aina.

*Paulo Mai Banaba Lustera ai.*

<sup>8</sup> Lustera aiaranai 'ome hauna ha, ia erama hanona a'i eka'a ua-homana mo emiaho.<sup>9</sup> Hau weiana Paulo e'abi'abi aiana ebahuaina. Paulo hanona hau weiana eiha 'ini'inina ba ebabataina hau weiana ena a'ikakauma Tirama herenai hauna kehore aba kebamaurina.<sup>10</sup> E'abi aota etibaha, "Momikiri mokoroti!" Hau weiana beronai erobo taea ekoroti haeamona ekaaoao kaoao.

<sup>11</sup> Mako hoa weiana Paulo ebabaina hauna teihana raninai Lukaonia maeannai teio tetibaha, "Tirama hanona aba maearimai teao teriri temai herekai."<sup>12</sup> Temikiri Banaba teaparina Deo, weiana ekia tirama ha atana, Paulo teaparina Hereme, weiana abomo ekia tirama ha atana teaparina pokina ia hanona 'abi ihinana hauna.<sup>13</sup> Deo ena marea hanona aiara apa'uana pa'abina 'akona wairanai, ena robe haukia poromakau koa baika mai taitaikia teaoainakia pa'abi 'akonai, weia maearima kipokia kuti akakia katebabainakia iuhubeau haukia herekiai.

<sup>14</sup> Paulo Banaba ohi pou weiana teona raninai ekia habuni tetapanakia tebeau toto to'u haukia baiatakiai teio tetibaha,

<sup>15</sup> "Emai hau e, taba buonai hoa neiana tubabainakia? Ai hanona maearima 'abaeamai wai ihobomi. Ai tamai neia pou namona tahinana hanona wai kuti akakia ki'a obokia neiakia herekiai katokapare, mauri Tirama weiana kupa hanopaka mai akupaka ebabainakia abomo aokia tabakia ikoikiai ebabainakia hauna kato a'ikakaumana.<sup>16</sup> Tirama hanona 'uaina raninai hanopaka haeai haeai haukia ehabonakia kipokia ekia nuatae taearakiai katemauri.<sup>17</sup> Iamo kipona ibawaira tinana, aka namokia ia ebabai abara kupai nibatibona heremai, hano anikia ekia rani tohakiai nibenimi, numi niba kironakia mai aomi niba aonamona."<sup>18</sup> Terarua ua te'abi aiho iamo mai aro'ariki to'u haukia kuti akana katebabaina haukia tebamuenakia.

<sup>19</sup> Ia Iuda haukia baika ua'a Pisidia Antioka mai Ikonioai temai haukia tehore to'u haukia aokia teani epua temikiri Paulo piharai teahuna teberina teaoaina aiara apa'uana parabuna kape-nai, teraonana ia hanona aba e'ari.<sup>20</sup> Ia a'ikakauma haukia tehore herena tekori kaiaronia raninai, Paulo emikiri ba eao aiara apa'uana aonai ekatoto mue. Erani hanona Banaba ohi temikiri teao Derebe.

*Paulo Mai Banaba Temue Teao Suria Hanona Antioka.*

<sup>21</sup> Paulo mai Banaba weia Derebeai pou namona teiroro aina ba maearima bo'ona temaiainakia Iesu i'abana haukiai teao. Weiana murinai temue teao Lustera Ikonio mai Pisidia Antioka.<sup>22</sup> 'Eka weiakiai ia tehore Iesu i'abana haukia teba taburanakia abomo aokia tebakironakia a'ikakauma tohanai katemiaho, tehina benakia tetibaha, "Aika hanona atetua bo'okia nahomakia aokiai kahatoto 'uai ba Tirama ena obia aiaranai kahakatoto."<sup>23</sup> Tirama ena marea ha ha aokiai Paulo mai Banaba hanona 'uai haukia tea'i taeanakia mai anirobekiai

tebahuba'ari ba tia'ikakaumana Obiapakana imanai teutanakia.

<sup>24</sup> Murinai terarua temikiri Pisidia hanonai tekabanai temai Pamfulia hanonai tekara'au.

<sup>25</sup> Ba weia Peregai pou namona teiroro aina murinai teriri teao Atalia aiaranai. <sup>26</sup> Weia terarua aunohiae tehe'au tebeau temue Antioka, 'uainai Antioka neianai tea'i taeanakia Tirama ena aoko'o hoana aonai kateaka, ba aka neiana hauna bariu aba tebaorena. <sup>27</sup> Antiokai tekara'au raninai terarua tehore a'ikakauma haukia teba to'unakia, Tirama taba ebabaina ia imakiai hauna mai rama haeai haukia ekia a'ikakauma taearanakia ekaikauna hauna wairakiai pouna tehinana.

<sup>28</sup> Terarua rani homa'ana weia a'ikakauma haukia kipokia temi-aho.

## 15

### *Ierusalemai Tirama Ena Marea Haukia Teto'una.*

<sup>1</sup> Iuda haukia tia'ikakauma haukia baika Iudeai temai Antiokai a'ikakauma haukia teba'ibinakia tetibaha, "Mose ena rauhubu ihobonai a'i katetarenimi raninai wai hanona bamauri a'i katoa'ina." <sup>2</sup> Abi weiana paunai Paulo mai Banaba ohi maearima weiakia kipokia tebaihara tae eaomo tebaira ki'a, ua buonai Tirama ena marea haukia tehore Paulo mai Banaba ohi tea'i taeanakia a'ikakauma haukia baika kipokia kateao Ierusalema, weia iuhubeau haukia mai 'uai haukia herekiai 'abi weiana katebakai bakaiaina.

<sup>3</sup> Tirama ena marea haukia tehore ia teuhunakia, weiana Foenikia mai Samaria hanokiai tekabanai aonai, rama haeai haukia ekia mauri aea tebaibenai aiho hauna pouna tekikipana. Pou neiana teona hanona a'ikakauma haukia ikoikiai teaonamo ki'a.

<sup>4</sup> Ia Ierusalemai tekara'au raninai Tirama ena marea haukia, iuhubeau haukia, mai 'uai haukia tehore ia tea'i taeanakia, ba Paulo mai Banaba ohi Tirama

taba ebabaina ia imakiai hauna ikoikiai wairakiai pouna tehinana. <sup>5</sup> A'ikakauma haukia baika weiakia Parisea itubunai tekarahi haukia temikiri te'abi tetibaha, "Rama haeai haukia kahatarenakia abomo kahahina benakia Mose ena rauhubu hanona kate'ima haraina hanona mauri banaibanoi katea'ina."

<sup>6</sup> Weiana iuhubeau haukia mai 'uai haukia kipokia teto'u atetua 'abina weiana teroba ahuaina. <sup>7</sup> Rani homa'ana tebaihara tae murinai Pereto emikiri e'abi etibaha, "Uaho'aba'u e, aba to'iohina Tirama ehore wai baiatamiai au etina'ana'u pina'uai pou namona kahinana rama haeai haukia kateona katea'ikakauma. <sup>8</sup> Maearima aokia e'ibinakia Tiramana ehore aika herekai ebabaina ihobonai rama haeai haukia abomo Auba Robe ebenakia, hoa weianai Tirama ia ea'i taeanakia hauna ebatohana. <sup>9</sup> Ia mai aika kipokia baiataka a'i ebahaeaina, Tirama ehore ekia a'ikakauma paunai aokia ebamaha mahanakia ia wairanai. <sup>10</sup> Ia aehoma buonai Tirama tuhobona 'aba'abaka 'ao aika Mose ena rauhubu ika'aina pumana habuana a'i etainaka hauna a'ikakauma haukia ahakiai tuhore 'auna? <sup>11</sup> Aika naha'ikakauma, ia bamauri tia'ina ihobonai, Obiapaka Iesu ena aoko'o hoana paunai bamauri kaha'ina."

<sup>12</sup> To'u haukia ikoikiai 'uru'urukia aha'i, ia Banaba mai Paulo ohi imakiai Tirama hoa mai bata'uta'u huri akakia rama haeai haukia herekiai ebabainakia haukia poukia tehinanakia hanona aiakia tiona.

### *Iakobo Ena Iroro.*

<sup>13</sup> Ia ekia 'abi eore murinai Obiapaka hatina Iakobo emikiri e'abi etibaha, "Uaho'aba'u e, aia'u tomona. <sup>14</sup> Simona\* aba ehinabe harainaka Tirama ehore rama haeai haukia eraonananakia, kori'uaina ia baiatakiai maearima aea ea'i taea aihonakia ia 'euna.

\* 15:14: (14) Petero

<sup>15</sup> Babai neiana hanona maha-banai haukia ekia 'abi kipokia teihobo, <sup>na</sup> terere aihona,

<sup>16</sup> 'Neiana murinai au kamue ka-mai,

Davida ena obia aiarana e'eho hauna kabakori muena.

Te'iti'i haukia kabamahamaha muenakia.

<sup>17</sup> Weiana maearima harina temauri haukia ikoinai mai rama haeai haukia weiakia ata'uai aparinakia au 'eu'u ai kateao haukia ikoikiai hanona au Obiapaka katetabuna'u.

<sup>18</sup> Obiapaka ua e'abi aiho, 'abi neiana hanona aba ua'i baha eba'iobi aina.'

Amo 9.11, 12

<sup>19</sup> Ua buonai e'u raona hanona rama haeai haukia weiakia Tirama herena timai haukia ekia taeara a'i kahabapahihi ki'a bahana. <sup>20</sup> Namona hanona marereai kahahina benakia, kaiba'uku teberuberu benakia tabakia Tirama wairanai te'opu haukia a'i kateani, a'i katenabau ki'a, mai mahi 'akokia tebato'o 'arinakia haukia a'i kateani, abomo aruarukia a'i kateinu.

<sup>21</sup> Pokina 'uaina raninai emai mo bariu Mose ena rauhubu weiakia hanona beraura robe ikoikiai aokiai tetuabina marea ha ha aokiai abomo pouna teiroro aina aiara ikoikiai aokiai."

*To'u Haukia Rama Haeai  
Haukia Herekiai Marere Tetiu ahina.*

<sup>22</sup> Ba iuhubeau haukia mai 'uai haukia Tirama ena marea haukia ikoikiai kipokia teraonana weia baiatakiai maearima baika katea'i taeanakia Paulo mai Banaba kate 'abanakia Antioka kateao, ba tea'i taeanakia haukia neiakia, Iuda atana teaparina Barasaba mai Sila, terarua hanona maearima i'uaiaikia haukia uaho'abakia baiatakiai. <sup>23</sup> Marere <sup>na</sup> terere aihona ka'a haukia tebenakia,

"Ai iuhubeau mai 'uai haumai, ai uaho'abami, emai banamo 'abina niwahi

wai uaho'abamai rama haeai ai torama Antiokai Suriai mai Kili-kiai tomiaho haumi heremi.

<sup>24</sup> Ai poumi aba taona 'abamai baika neia tewahi, ekia 'abiai aomi tiba haiaranakia abomo aomi tibaro'arinakia, ia ai hanona 'abi uahomana a'i tabenakia. <sup>25</sup> Ua buonai ai tato'una emai raona tabahamona hau baika kata'i taeanakia katauhunakia eka raona'au haukia Banaba mai Paulo kipokia katewahi. <sup>26</sup> Neiakia Banaba mai Paulo terarua hanona ekia mauri a'i tirananakia aika eka Obiapaka lesu Keriso atanai. <sup>27</sup> Iuda mai Sila tauhunakia marere tarerena hauna ia pinakiai katehinana abomo katebatohana. <sup>28</sup> Auba Robe mai ai kipokia <sup>na</sup> taraona aihona, ai puma haeai a'i katabenimi rauhubu neiakia ahakiai. <sup>29</sup> Kaiba'uku wairanai tehoroti anianikia a'i katoani, mahi mai aruarukia a'i katoani, mahi 'akokia tebato'o 'arinakia haukia a'i katoani, abomo nabau akakia a'i katobabai. Wai taba neiakia a'i katobabai hanona emi aka kebero. Tarere nonoa. Haparua."

<sup>30</sup> Marea haukia tehore hau naiakia teuhunakia, ia teriri teao Antiokai, a'ikakauma haukia tebato'unakia ba marere tebenakia. <sup>31</sup> Marere tetuabi aonai batubura 'abikia aiakia teo'o hanona aokia enamo wairai.

<sup>32</sup> Iuda mai Sila hanona maha-banai haukia terarua 'abi namokia tehina a'ikakauma haukia aokia tebakironakia mai teba taburanakia. <sup>33</sup> Ia rani baika weia temiaho murinai, a'ikakauma haukia ia tebaparuuanakia temue teao Jerusalema ia teuhunakia haukia herekia. <sup>34</sup> (Ia Sila enuatae buonai emiaho.) <sup>35</sup> Paulo mai Banaba hanona Antiokai temiaho, ia mai maearima bo'okia kipokia Obiapaka ena 'abi teba'iobi aina abomo pou namona teiroro aina.

*Paulo Mai Banaba Baiatakia Epa'a.*

<sup>36</sup> Wapu baika teore murikiae Paulo Banaba ehina bena etibaha, "Aika hamamue hamaeaq aiara weia kia Obiapaka pouna hairoro aina haukia aokiae uaho'abaka weia aea tibabai aiho hanona kahaihanakia." <sup>37</sup> Ba Banaba ena nuatae hanona Ioane weiana tiaparina Mareko hauna kipokia kateao haeamo. <sup>38</sup> Ia Paulo ena raona, ia kipokia kateao hanona a'i enamo pokina ia Pamfuliai weia hanona eubo ekia akai a'i e'abanakia. <sup>39</sup> Weiana buonai terarua tebairai baiatakia epa'a. Banaba ehore Mareko ea'ina aunohiai tehe'au Kupuro teao. <sup>40</sup> Ia Paulo ehore Sila enuatae aina kateka'a aonai uaho'abakia tehore Obiapaka ena aoko'o hoanai tebanamonakia. <sup>41</sup> Ia terarua teao Suria mai Kilikia hanokiae tekabani, Tirama ena marea maearimakia weia haukia teba taburanakia.

## 16

*Timoteo, Paulo Mai Sila Ohi E'abanakia.*

<sup>1</sup> Paulo eao Derebe ba haeamona eao Lustera ai ekara'au, a'ikakauma hauna ha weia nemiaho ia atana hanona Timoteo, hinana hanona Iuda babi'ena Iesu nia'ikakaumana, ia hamana hanona Helene hauna. <sup>2</sup> A'ikakauma haukia weia Lustera mai Ikonio ai temiaho haukia Timoteo ena namo pouna tehinana. <sup>3</sup> Paulo enuatae Timoteo ia kebaka'ana kipokia kateao, ba etarena pokina Iuda haukia weia temiaho haeamona te'ioina ia hamana hanona Helene hauna. <sup>4</sup> Aiara ha ha aokiae tekabani aonai iuhubeau haukia mai 'uai haukia Ierusalemai temiaho haukia rauhubu weia kia tebatohanakia haukia ia terarua tehore tehinanakia maearima kateka'aina. <sup>5</sup> Ua buonai Tirama ena marea haukia ekia a'ikakauma hanona etabura abomo maearima ekia bo'o eapa'ua hao apa'ua hao beraura ha ha aokiae.

*Paulo Mahabanaiai Makedonia Hauna Eihana.*

<sup>6</sup> Paulo mai 'abana kipokia teao Furugia mai Galatia hanokia aokiae tekabani pokina Auba Robe ehore ekaibunakia Asia hanonai Tirama ena 'abi a'i kateiroro aina. <sup>7</sup> Teao Musia hano noanai tekara'au aonai teraonana Batunia hanona kateao, ia Iesu Aubana ebamuenakia. <sup>8</sup> Weiana buonai Musia aiaranai tekabani teriri teao Toroai aiaranai. <sup>9</sup> Rabi weianai Paulo emahabani, ena mahabani aonai Makedonia hauna ha eihana ia wairanai ekoroti enoina etibaha, "Komai Makedoniai ai kobarainamai." <sup>10</sup> Paulo ena mahabani weiana murinai ai tanoanoa taeara tatabu kataeo Makedonia, pokina ai ta'ioina Tirama hanona eaparinamai pou namona weia katairoro aina.

*Ludia Keriso Ena Maearimai Eao.*

<sup>11</sup> Weia Toroai hanona aunohiai taehe'au tabeau berona taeao Samotrake. Haeamona erani hanona tabeau taeao Neapoliai takara'au. <sup>12</sup> Eka weiana tahabona taka'a taeao aiara apa'uana Pilipo, weiana hanona aiara kori'uaina Makedonia hanona aonai Roma ena iha'ini ba'anai emiaho. Ba wapu baika weia tamiaho. <sup>13</sup> Beraura Robenai aiara pa'abinai takarahi taeao ate haianai taraonana bahuba'ari 'ekana ha weia. 'Eka weianai tamiatu babi'e baika weia tetu'u haukia kipokia ta'abi'abi. <sup>14</sup> Weiakia aiamai teona babi'ekia baiatakiai ha atana Ludia ena aiara hanona Tuatira. Ia hanona habuni birokia nikawa kawainakia. Ia abomo Tirama nekuti aina babi'ena ha. Obiapaka ehore aona ebaeana ba Paulo ena 'abi ea'i taeana. <sup>15</sup> Weia ia mai ena itu haukia ikoikiae taba'uere robenakia murinai enoinamai kataeo ena itu ba e'abi etibaha, "Aomiai tua'i taeana'u au Obiapaka ia'ikakaumana babi'e'u ha raninai patomai e'u ituai weia

patomiaho." Ena bahiahia 'abina eaoainamai ena itu.

*Pilipoai Paulo Mai Sila Tebawapurakanakia.*

<sup>16</sup> Rani ha bahuba'ari 'ekana taeao aonai ta'ara'i uahona ha aonai auba ki'a obona nemiaho uahona kipokia tabaitabu ahi. Uaho weiana hanona taba wairai katerama haukia ihina poukiai ena poki hauna ena kepu bo'okia ebabainakia. <sup>17</sup> Uaho neiana Paulo mai ai murimaiiai eka'a eio etibaha. "Hau neiakia hanona 'ubi 'aki'akinai nemiaho Tirama na ena iuhubeau haukia, bamauri taearana teiroro aina heremai." <sup>18</sup> Rani bo'okia aokiai ia ua ebabai aih. Ba Paulo haiana ebapo'ona buonai ekori kabe auba ki'a obona ebatana etibaha, "Iesu Keriso atanai nahina beni'o, uaho naiana aonai mokarahi!" Beronai auba ki'a obona uaho ehabona ekarahi.

<sup>19</sup> Uaho ena poki hauna e'ibina ena kepu tabu ahi taearana aba epua, weiana Paulo mai Sila tea'inakia teberinakia teaoainakia maearima ekia to'u 'ekana Roma haukia apa'uakia herekiai. <sup>20</sup> Hau apa'uakia wairakiai teba korotinakia ba te'abi tetibaha, "Maearima rua neiakia hanona Iuda haukia, eka aiara aonai ripuripu tibabaina. <sup>21</sup> Abomo hoa-hoa tiba'ibinaka haukia hanona aika Roma hauka eka rauhubu tainai a'i kaha'i taeanakia mai a'i kahaka'a ainakia haukia." <sup>22</sup> To'u haukia temikiri Paulo mai Sila herekiai 'abi ki'a obokia tehinanakia, ba bakai te'uai aina haukia 'abi tebaiben terarua ekia habuni ketatapanakia mai kate'atinakia. <sup>23</sup> Te'ati ki'anakia epua murinai teaoainakia wapura itunai tetori totonakia, wapura ne'imanaikia hauna tehina bena kekaabu 'ini harainakia. <sup>24</sup> Ua tehinabe aihona buonai wapura 'ima hauna terarua eaoainakia ikaihuri aona 'akinai hauna aonai ehorotinakia, aekia matiu baiatakiai ebahutanakia ebiri 'ini harainakia.

<sup>25</sup> Rabi wapuka'a ore'akuai Paulo mai Sila tebahuba'ari mai ekia huiai Tirama tebamanona, wapura haukia hanona ia aiakia tebahuaina. <sup>26</sup> Beronai kanokau rarina eka'a wapura ituna maikoina ebaibiuna, pa'abi ikoikiai tekaikau mai wapura haukia imakia aekia tabirikia ikoinai teta'i. <sup>27</sup> Wapura ituna ne'imana hauna paruana eno'a, pa'abi ikoikiai tekaikau eihanakia raninai emikiri ena kareba eberi 'auna kipona keahu 'arina pokina ia eraonana wapura haukia hanona aba tebeau 'akauma. <sup>28</sup> A Paulo eio aota etibaha, "Kipomu a'i moahu 'arini'o, ai ikoimaiai neiamai tamiaho." <sup>29</sup> Wapura ituna ne'imana hauna eapari ramepa katemaiaina, ebeau toto eao eta'u buonai mai 'ururu 'ururuna Paulo mai Sila wairakiai ekaipehu. <sup>30</sup> Ba eba karahinakia eaoainakia mahanai ebakainakia etibaha, "Hau apa'uami e, taba kababaina hanona bamauri katabu ahina?"

<sup>31</sup> Terarua tehina bena tetibaha, "Obiapaka Iesu Keriso koa'ikakaumana hanona bamauri koa'ina oi mai emu itu haukia ikoikiai." <sup>32</sup> Ba terarua Obiapaka ena 'abi teiroro aina ia mai ena itu haukia ikoikiai wairakiai. <sup>33</sup> Rabi weiana aonai terarua eaoainakia, haukia tebamani'anakia 'ekakia eututu harainakia, ba beronai Paulo mai Sila tehore ia mai ena itu haukia ikoikiai teba'uere robenakia. <sup>34</sup> Wapura i'ima hauna terarua eaoainakia ena ituai ero'onakia, ba ia mai ena itu haukia ikoikiai teaonamo pokina Tirama tia'ikakaumana paunai.

<sup>35</sup> Erani raurani aonai bakai te'uai aina haukia ekia 'abi tebaiben habuni haukia teuhunakia teao wapura 'ima hauna herena tetibaha, "Hau neiakia kobakarahinakia kateka'a." <sup>36</sup> Wapura i'ima hauna Paulo ehina bena etibaha, "Bakai te'uai aina haukia 'abi tebaiben, oi mai Sila ohi kaba karahinimi

katoka'a, ua buonai tomokarahi mai baibuami tomoao." <sup>37</sup> Ia Paulo bakai te'uai aina haukia ekia habuni haukia ehina benakia etibaha, "Ai hanona Roma maearimamai, emai beho aha'i bakai 'ekanai a'i teba korotinamai ia maearima wairakiai teahunamai haeanmona wapura itunai tekaiabu 'abaeanamai. Ba bariu hanona bunianai kateba karahinamai, u? A'i ketai 'apuana, ia kipokia katemai kateba karahinamai."

<sup>38</sup> Habuni haukia temue teao bakai te'uai aina haukia haiakiai te'abi ia terarua hanona Roma maearimakia, 'abi neiana teona raninai bakai te'uai aina haukia tetau wairai. <sup>39</sup> Bakai te'uai aina haukia temikiri teao terarua haiakiai te'abi 'abi harai a'i teme'opuere, ba teba karahinakia, tenoinakia aiara weiana katehabona. <sup>40</sup> Paulo mai Sila wapura itunai tekarahi teao Ludia ena itu weia a'ikakauma haukia baika kipokia tebaitabu ahi, batabura 'abikiai tehina benakia ba teka'a.

## 17

### Tesalonikai Iripu Rarina Erama.

<sup>1</sup> Paulo mai Sila ohi teao Amfipoli mai Apolonia hanokiae tekabanai teao Tesalonika weia hanona Iuda haukia ekia marea ha. <sup>2</sup> Paulo ena hoa hoa tainai eao marea aonai etoto. Weia beraura robe aihau aokiae maearima kipokia teroba ahu Puka Robenai terere 'abikia tohakiae e'abi'abi, <sup>3</sup> ehina hina harainakia, 'abikia ebawaira tina harainakia Keriso hanona kehau haiara mai 'ariai kemikiri mue, etibaha, "Iesu neiana au pouna nahinana wai heremiae hauna hanona Keriso."<sup>\*</sup> <sup>4</sup> Iuda haukia baika aokia teba kabanainakia Paulo mai Sila kipokia tebahamomo, Helene maearimakia Tirama timariki aina haukia bo'okia abomo kipokia tebahamomo baiatakiae hanona obia babi'ekia bo'okia.

<sup>5</sup> Ia Iuda haukia baika tewamuru buonai aru 'abaea haukia ekia hoa teki'a haukia kawakawa 'ekanai tebararonakia tebato'unakia iripu rarina aiara apa'uana aonai teba ramana. Hau ha atana Iason ena itu teao Paulo mai Sila katetabunakia kateba karahinakia maearima wairakiai. <sup>6</sup> Ia a'i tetabu ahinakia buonai Iason mai a'ikakauma haukia baika itu weianai teberi ahinakia temaiainakia aiara apa'uana tipoki aina haukia wairakia teio tetibaha, "Hau baika hanopaka maikoinai ripuripu tibabai haukia bariu temai eka aiara apa'uana aonai." <sup>7</sup> Ba Iason hanona ea'i taeanakia ena ituai ebatotonakia. Hau weiakia hanona Kaisa ena rauhubu tikabenakia, te'abi tetibaha, Obia 'arana haeai ha nemiaho. Ia atana hanona Iesu." <sup>8</sup> 'Abi neiana teona raninai maearima to'una mai aiara apa'uana tipoki aina haukia kipokia 'uru rarina tebabuana. <sup>9</sup> Aiara apa'uana tipoki aina haukia tehore Iason mai 'abana kipokia tehina benakia moniae bakai arana tehorena ba tehabonakia kateka'a.

### Iuhubeau Haukia Teao Berea.

<sup>10</sup> Rabi weiana aonai a'ikakauma haukia tehore Paulo mai Sila teuhunakia Berea teao. Weia tekara'au raninai berokiae Iuda haukia ekia marea teao. <sup>11</sup> Iuda haukia weiakia Bereai temiaho haukia hanona mai ekia aia o'o ba Tesalonika maearimakia, aokia tohanai pou namona teona ba rani ikoinai Puka Robena 'abikia temarere ainakia kate'iorina Paulo ehina haukia hanona tohakia. <sup>12</sup> Ua buonai bo'okia tea'ikakauma, Helene obia babi'ekia bo'okia mai Helene haukia bo'okia abomo tea'ikakauma.

<sup>13</sup> Ia Iuda haukia Tesalonikai temiaho haukia Paulo Tirama ena 'abi Berea aonai neiroro aina pouna teona raninai temai weia mako tebahi ahinakia tebaripu rипу. <sup>14</sup> Beronai mo

\* 17:3: (3) 'ao Mesia

a'ikakauma haukia tehore Paulo teuhuna poe taina eao. Ia Sila mai Timoteo ohi hanona Bereai temiaho.<sup>15</sup> Maearima baika Paulo tebaka'ana haukia Paulo kipokia teaomo Atene, ba ia hanona temue teao Berea, Paulo ena 'abi teaoaina Sila mai Timoteo herekia kateao biai Paulo herena.

*Paulo Ateneai Eiroro.*

<sup>16</sup> Paulo Ateneai Sila mai Timoteo ne'imanaakia aonai aiara apa'uana aonai kaiba'uku ebo'o ki'a eihanakia hanona aona ehaiara ki'a.<sup>17</sup> Ua buonai Paulo hanona marea aonai Iuda haukia mai Helene haukia Tirama tekuti aina haukia kipokia teroba ahu, haeamona rani ikoikiai hanona kawakawa 'ekanai tikaaoao kaoao maearimakia mo 'akina kipokia terobahu.<sup>18</sup> Epikuro haukia mai Stoiko 'iobi haukia baika Paulo kipokia te'abi baitaeai. Baika tebakai bakai tetibaha, "Abi 'abaea 'abi 'abaea hauna neiana taba ne'uhina?" Baika te'abi, "Ia hanona hanopaka haeai tiramakia robakia niahuna." 'Abi neiana tehinana pokina Paulo hanona Iesu mai ena mikiri mue pouna namona eiroro aina.<sup>19</sup> Ua buonai Paulo tea'ina teaoaina to'u 'ekana ha atana Areopago ai weia tehina bena tetibaha, "Ai tanuatae kata'iorina oi ba'iobi mahamahana tabana neiana robana nuahuna?"<sup>20</sup> Taba baika nohina 'urukia tao'o hanona heremaiai tehaeai ki'a baha, ua buonai ai tanuatae anikia taba hanona kata 'iobinakia."<sup>21</sup> (Atene haukia mai atau'ai temai haukia 'eka weianai temiaho haukia hanona taba haeai haeai robakia a'i tiahu, ia rani ikoinal taba mahamahakia poukia tio'o mai robakia tiahu.)

<sup>22</sup> Paulo 'eka weiana Areopago to'u haukia wairakiai ekoroti e'abi etibaha, "Wai Atene haumi e, au naihanimi hanona wai taeara ikoinal kuti akakiai tutabura.<sup>23</sup> E'u kaoao kaoao emi aiara apa'uana aonai emi kuti 'ekakia aihankia aonai emi itara robena

ha ahana na terere aihona 'A'i ha'iorina Tirama herena' hauna atabu ahina. Weiana wai a'i to'iorina hauna tokuti aina, iamo bariu wai heremai kairoro aina.

<sup>24</sup> "Tirama weiana hauna hanopaka mai aona tabakia ikoikia ebabainakia, ia hanona kupa mai hanopaka Obiapakanba maearima imakiai tebabai mareaikia aokiai a'i nemiaho.

<sup>25</sup> Abomo ia taba ha a'i nikapu aika taba imakai pahabena hauna a'i niraonana, pokina ikupaina maura maeabu mai taba haeai haeai ikoinal maearima nibenakia.<sup>26</sup> Hau hamona herenai itubu haeai haeai maearimakia ikoikiai ebabainakia hanopaka maikoina aonai katemai aho.

Ia kipona ehore ekia miao ranikia tohakia mai ekia hano hoakia eba'oru 'uainakia.<sup>27</sup> Tirama aka neiakia ebabainakia hanona maearima ikoinal katemai herena ia katetabu ahina, 'abi tohana Tirama hanona ata'uai aha'i ia aika herekai.<sup>28</sup> Maearima baika na ti'abi aihoh, 'Ia aonai nahamaauri nahaibiu ibiu mai nahamiaho.'

Matoha emi ori kikipa haukia te'abi 'abana,  
'Aika hanona ia nahuna.'

<sup>29</sup> Ba aika Tirama nahuna raninai Tirama hanona weiakia gold 'ao silba 'ao pihara maearima aotipakia imakiai tebabainakia 'abakiai a'i kahabaona.

<sup>30</sup> "Tirama hanona maearima ia a'i te'iorina raninai ekia po'o aba eiha haonakia, ia bariu hanona 'eka ikoinal maearima ikoikiai nehinabe pahihihakia kateraona kabe.<sup>31</sup> Weiana ia bakai ranina ha aba eba'oruna, ena maearima ha ea'i taeana, hauna kehore hanopaka maikoina taeara beronai kebabakaina. Tirama ehore hau weiana 'ariai ebamikiri muena hanona maearima ikoikiai wairakiai aka neiana ebatohana."

<sup>32</sup> 'Ariai emikiri mue 'abina Paulo ehnana aiana teona raninai, baika ia teiriri aina, ia baika hanona te'abi, "Ai tanuatae 'abi'abi neiana kohina muena

aiamu kataona.”<sup>33</sup> Weiana muri-nai Paulo 'eka weianai ekapare.<sup>34</sup> Maearima baika Paulo kipokia tebahaeamo abomo tea'ikakauma. Baiatakiai hanona bakai hauna ha atana Dionusio, ia bakai 'ekana Areopago tipoki aina haukia ha, haeamona babi'e ha atana Damari mai maearima haeai baika abomo tea'ikakauma.

## 18

### *Paulo Korintoai Eiroro.*

<sup>1</sup> Weiana murinai Paulo Atene aiarana ehabona eao Korinto aiarana. <sup>2</sup> Weia Iuda hauna ha atana Akula ohi tebaitabu ahi, ia hanona Pontoai erama, bariu tainai mo atawana Priskila ohi Italiai temai, pokina rani weianai obia 'arana hauna atana Klaudio 'abi ebaibeni Iuda haukia ikoikiai Roma katehabona. Paulo eao ia keihanakia,<sup>3</sup> weia kipokia temiaho mai teaka, pokina ia hanona parae itukia etai hauna ia terarua 'abakia.<sup>4</sup> Paulo hanona beraura robe ikoikiai Iuda haukia ekia marea aonai pou namona 'abina terobahu aina pokina ena nuatae hana Iuda mai Helene haukia aokia keba kabanainakia katea'ikakauma.

<sup>5</sup> Sila mai Timoteo Makedoniai temai murinai, Paulo hanona rani ikoinai 'abi weiakia eiroro ainakia Iuda haukia wairakiai ehina pouna weiana Iesu hanona bamauri hauna Keriso. <sup>6</sup> Weiana ena 'abi teahu taeanakia mai here-nai 'abi ki'a obokia tehina raninai eopuere ena habuni apurorokia eahu ahunakia, ehina benakia etibaha, “Wai kato'ari raninai weiana hanona wai kipomi emi beho, 'a au hanona behona a'i ka'arana. Bariu rani neianai keaoaina aonai au hanona rama haeai haukia herekia kaeao.”<sup>7</sup> Ba marea ehabona eao rama haeai hauna ha atana Tito Iusto ena ituai ua'a kemiaho, ia hana Tirama nekuti aina hauna, mai ena itu hana marea herenai.<sup>8</sup> Marea poki hauna Kerisopo mai ena itu haukia kipokia Obiapaka

tea'ikakaumana haeamona Kor-into haukia bo'okia abomo Paulo ena iroro aiana teona raninai tea'ikakauma mai teba'uere robe-nakia.<sup>9</sup> Rabi ha aonai Obiapaka mahabananai ai Paulo ehina bena etibaha, “A'i kota'u, ia ko'abi to'o baihana a'i kounu.<sup>10</sup> Pokina Au hana oi heremuai. Tai ha oi a'i kea'i ki'an'i'o. Aiara apa'uana neiana aonai au e'u maearima hanona ebo'o.”<sup>11</sup> Weiana buonai Paulo ihau hamona mai nawa 'abaihau weia emiaho Tirama ena 'abi maearima eba'ibinakia.

<sup>12</sup> Kabana hauna Galio Akaia hanona eiha 'inina aonai, Iuda haukia temikiri haeamо Paulo tea'ina teaoaina bakai 'ekanai tehorotina.<sup>13</sup> Te'abi tetibaha, “Hau neiana hana maearima aokia niani taeara haeaiai Tirama katekuti aina Iuda haumai emai rauhubu kate'oatana.”<sup>14</sup> Paulo aba ke'abi aonai Galio ehore Iuda haukia ehina benakia etibaha, “Wai Iuda haumi, hau neiana beho ebabainakia 'ao hoahoa ki'a obokia ebabainakia raninai wai aiami ka'i taeana ketaina.<sup>15</sup> Ia neiana hana 'abi mai ata mai wai kipomi emi rauhubu atetuakia raninai, wai kipomi tomoba berona. Taba nahomakia hana au robakia a'i kahu.”<sup>16</sup> Weiana ia ena 'abiai Iuda haukia bakai 'ekanai teu'u ahinakia.<sup>17</sup> Ia ikoinai temikiri marea poki hauna Sostene tea'i 'inina bakai 'ekana wairanai teahuahu banaina. Iamo Galio hanona aka weiana robana a'i eahuna.

### *Paulo Emue Eao Suria Hanona Antioka.*

<sup>18</sup> Paulo wapu baika Korintoai emiaho murinai, uaho'abana ehabonakia Priskila mai Akula hanona ia te'abana kipokia aunohiai tebeau banai Suria teao. Aunohiai a'i tebeau ahi aonai Kenkrea aiaranai buina maikoina terehe obona pokina 'abi'uai ha Tirama wairanai ebabaina hauna ebaorena paunai.<sup>19</sup> Epesoai tekara'au aonai Paulo ehore Priskila mai Akula weia ehaobonakia. Ia ikupaiana eao Iuda haukia ekia mareai ekatoto

weia Iuda haukia kipokia teroba ahu.<sup>20</sup> Weiana Iuda haukia Paulo tenoina herekiae rani homa'ana kemiaho, ia eubo.<sup>21</sup> Ia aba keka'a aonai ehina benakia etibaha, "Tirama kenuatae raninai kamue kamai heremi." Epua aunohiai ehe'au Epeso ehabona.<sup>22</sup> Paulo Kaisareai ekara'au ba eao Ierusalemai ua'a Tirama ena marea haukia etoanakia epua eriri Antioka eao.

<sup>23</sup> Weia Antiokai rani baika emiaho murinai eao Galatia mai Furugia hanokia maikoina aonai eka'a 'eka ha aokiae a'ikakauma haukia ikoinai ebataburanakia.

### *Apolo, Epesoai Eiroro.*

<sup>24</sup> Weiana Iuda hauna ha atana Apolo ia hanona Alesandereai erama hauna emai Epeso. Ia hanona 'abi'abi harai hauna abomo Puka robena 'abikia e'iobi harainakia hauna.<sup>25</sup> Ia hana Obiapaka ena ba'iobi taearanai 'obi ea'ina mai Iesu pouna namokia berokia eba'iobiai mai aona tohanai eiroroai, iamo ia ena 'obi hana Ioane ena ba'uere robeaimo epua.<sup>26</sup> Ia hanona

mai nuako'ona Iuda haukia ekia marea aonai eiroro, Priskila mai Akula ia aiana teona raninai tebaka'ana teaoaina ekia ituai Tirama ena 'abi taearana tohana ia herenai tehinahina haraina.<sup>27</sup>

<sup>27</sup> Apolo enuatae keao Akaia aiarana raninai Epesoai temiaho a'ikakauma haukia temikiri ia tebataburana, epua marere ha tererena eao Akaiai temiaho a'ikakauma haukia herekiae, weiana ia keao weia raninai aonamoai katea'i taeana. Ia weia ekara'au raninai Tirama ena aoko'o hoanai tea'ikakauma haukia herekiae barai barai hauna tohanai eao.<sup>28</sup> Ia ena 'abi taburai hanona Iuda haukia mako wairakiae 'abi baihara taeai eba'ehonakia, ia Puka robena 'abinai ebatoha tohana Iesu hanona bamauri hauna Keriso.

<sup>1</sup> Apolo Korintoai emiaho oho aonai, Paulo hanona Asia hanona oeokia ibuakiae ekabanai eao Epeso. Weia a'ikakauma haukia baika kipokia tebaitabu ahi.

<sup>2</sup> Paulo ebakainakia etibaha, "Toa'ikakauma aonai Auba Robe emai heremi, 'ao?" Ia te'abi, "Aha'i. Ai hanona Auba Robe 'abina uruna ha a'i tao 'apuana."

<sup>3</sup> Ba ia ebakai muenakia etibaha, "Ba'uere robe tabanai teba'uere robenimi?" Ia te'abi tetibaha, "Ba'uere robe weiana Ioane e'uhina haunai teba'uere robenamai."

<sup>4</sup> Paulo e'abi etibaha, "Ioane ena ba'uere robe hanona raona kabe hoana. Ioane maearima ehina benakia ia murinai nimai hauna kate a'ikakaumana, weiana hanona Iesu."<sup>5</sup> 'Abi weiana teona raninai Obiapaka Iesu atanai teba'uere robenakia.<sup>6</sup> Paulo imana ahakiae eha'o'au aonai Auba Robe eriri ahakiae, ba temikiri maea haeai haeai te'abi'abi haeamona temahabanai Tirama pouna tehinana.<sup>7</sup> Mearima weia haukia ikoinai hanona harau haea rua 'abana.

<sup>8</sup> Nawa aihau aonai Paulo eao Iuda haukia ekia marea maearima herekiae mai taburana e'abi 'abi Tirama ena obia aiarana pouna eba'iobinakia aokiae kebakabanaina paunai.<sup>9</sup> Ia maearima baika hanona aokiae teba pahihinakia a'i tea'ikakauma haeamona to'u wairakiae 'abi ki'a obokia tehina ba'iobi neiana Iesu katea'ikakauma taearana herenai. Ua buonai Paulo maearima weiakia ehabonakia, ia a'ikakauma haukia mo ebaka'anakia teao Turano ena marere ituna aonai ua'a rani ikoinai eba marerenakia.<sup>10</sup> Ihau rua hanona weia ebamarere, weiana Iuda haukia mai Helene haukia Asia hanonai temiaho haukia maikoinai Obiapaka ena 'abi pouna teona.

*Skeba Nahuna Auba Ki'a Obona Tebahobona.*

<sup>11</sup> Tirama ehore Paulo hiabu ebena hoa haeai 'akikia ebabai.

<sup>12</sup> Maearima Paulo ena muko mai ena habuni ihai hauaninai temi-aho haukia teaoainakia inawa haukia ahakiai tehore 'au hanona ekia inawa tenamo abomo aokiai auba ki'a obokia tekarahi.

<sup>13</sup> Iuda haukia baika ekia aka hanona mea, ia aiara aokiai tekabani kabanai Obiapaka Iesu atana tehinana tebabobona auba ki'a obokia kateba karahinakia. Na tehinabe aihonakia, "Iesu weiana pouna Paulo neiroro aina hauna atanai nahinabe pahihini'o. Mokarahi!" <sup>14</sup> Iuda haukia ekia robe hauna apa'uana Skeba nahuna 'abaihau hamomo hanona aka neiana tebabaina. <sup>15</sup> Rani ha auba ki'a obona ekia 'abi ebamuena etibaha, "Au Iesu a'lobina, Paulo abomo a'lobina. Ia wai hanona tai?" <sup>16</sup> Ba hau weiana aonai auba ki'a obona nemiaho hauna erobo taea hau weiakia eba'ehonakia, ia etabura ki'a baha buonai, eahu ki'anakia, ena ituai tebeau ahi mai haukia abomo mai mani'akia. <sup>17</sup> Iuda mai Helene maearimakia Epesoai temiaho haukia pou neiana teona raninai ikoinai teta'u ki'a, ba Iesu Obiapaka atana tebanamona 'ubi tohanai. <sup>18</sup> Tirama tea'ikakaumana haukia bo'ona temai ekia ki'a tebabai haukia tehina pounakia. <sup>19</sup> Weia nepu haukia bo'ona ekia mea pukakia temaiaianakia, maearima wairakiai tehuuhunakia. Puka weiakia 'arakia tebahuna hanona taha imabui (50,000) Kina\* 'abana. <sup>20</sup> Taeara neianai hanona Obiapaka ena 'abi erama otaraina haeamona etabura hao tabura hao.

### *Paulo Aona Ea'ia'i Haraina Keao Ierusalem.*

<sup>21</sup> Taba neiakia ikoikiai terama murinai Paulo aona ea'ia'i haraina enuatae Makedonia mai Akaia hanokiai kekabani keao Ierusalem. Ia kipona e'abi etibaha, "Kaeao 'uai weia, ba muriai hanona kaeao Roma abomo kaihana." <sup>22</sup> Paulo ena baraibarai haukia rua Timoteo

mai Erasto euhunakia te'uai teao Makedonia, ia Paulo hanona rani papana weia Asiai emiaho 'apua.

### *Epesoai Atetua Rarina Erama.*

<sup>23</sup> Rani weianai Obiapaka ena taeara paunai atetua rarina Epesoai erama. <sup>24</sup> Hau ha weia atana Demeterio ia hanona silba akana ebabaina, ena aka haukia tehore tirama babi'ena Atemi ena itu silbai temakanakia, aka weianai moni bo'ona tea'inakia. <sup>25</sup> Rani ha Demeterio ehore ena aka haukia mai maearima baika aka ihobona tibabaina haukia eaparinakia temai ia herena, ba ehina benakia etibaha, "E'u hau e, wai to'lobina aika hanona aka neianai eka moni namokia nahatabu ahi. <sup>26</sup> A hau neiana Paulo hanona neia Epesoai mai Asia hanona maikoina aonai maearima bo'ona aokia nibakabanaina mai niba kaparenakia hanona aba toihana mai uruna tonu, ia ni'abi tirama weiakia maearima imakia tibabainakia haukia hanona tirama tohakia aha'i. <sup>27</sup> Wairai ki'a ha kerama eka aka neiana atana namona hauna kea'i ki'ana, ia tirama babi'ena apa'uana Atemi ena marea mai ia kipona atana abomo kea'i ki'anakia. Ia hanona Asia hanona maikoina aonai mai hanopaka maikoina aonai tekuti aina hauna ena apa'ua aba ke'akauma 'abaea."

<sup>28</sup> Maearima to'una 'abi weiana teona raninai teopuere ki'a teio tetibaha, "Epeso haumai emai tirama babi'ena Atemi e, oi hanona oapa'ua ki'a baha!" <sup>29</sup> Aiara apa'uana aonai maearima maikoina teio raina temikiri Gaio mai Aristako tea'inakia. Maearima neiakia terarua hanona Makedonia haukia Paulo kipokia tekaoao kaoao haukia, maearima ikoinai ia teberinakia teaoainakia to'u ituna aonai. <sup>30</sup> Paulo ena nuatae kekarahi keao to'u haukia wairakiai, ia a'ikakauma haukia ia tekaiabuna. <sup>31</sup> Abonamo eka weianai poki haukia baika

\* <sup>19:19:</sup> (19) Drakoma taha imabui. Drakoma hamona hanona silba koini hamona aka hauna wapu hamona 'arana.

hanona Paulo ena 'iobi haukia, ia 'abi teuhuna eao Paulo herena teba'amenā to'u ituna weiana aonai a'i kekatoto.

<sup>32</sup> 'A to'u haukia taba katebabaina hanona a'i te'ioquina, maearima baika taba ha teioaina, baika hanona taba haeai mo ha teioaina. Iamo maearima bo'ona hanona a'i te'ioquina taba buonai teao weia. <sup>33</sup> Iuda haukia baika hau atana Alesanda teaoaina maearima wairakiai tebakorotina. Alesanda imana ea'i taeana to'u haukia ekia io tebapuana, ba ia Iuda haukia beho a'i patehoaina maearima wairakiai kehinana. <sup>34</sup> Ia te'ioquina Alesanda hanona Iuda hauna raninai, teio mue 'abi hamonomato tehina to'ona beraura hoana rua 'abana teio tetibaha, "Epeso haumai emai Tirama babi'ena Atemi e, oi hanona oapa'ua ki'a baha!"

<sup>35</sup> Murinai aiara ena 'abi irerena hauna to'u haukia ehina benakia 'uri'uri katebapuana ba e'abi etibaha, "Epeso haumi e, hanopakai maearima ikoinai aba te'ioquina Epeso hauka hanona tirama babi'ena Atemi ena Marea mai ia aubaubana weiana kupa'i emai hauna naha'imana. <sup>36</sup> Taba neiana hanona a'i kahabuniai aina hauna, ua buonai 'uri'urimi mepua. Haeamona noanoai taba ha a'i katobabai ki'ana. <sup>37</sup> Maearima neiakia tomaiainkia haukia hanona marea tabakia ha a'i tebainaoaina, haeamona eka tirama babi'ena herenai 'abi ki'a obona ha a'i tehinana. <sup>38</sup> A Demeterio mai ena aka haukia kipokia tenuatae maearima ha beho 'ekanai kate horotina re'a, bakai ranikia hanona temiaho mai bakai pokia haukia abomo temiaho, ia katehore beho weiana katetabuna. <sup>39</sup> Taba ha nemiaho robana katoahuna raninai, ua'a aiara haukia ekia to'u taearana tohanai katebaberona. <sup>40</sup> Poki haukia 'uri'uri neiana bariu nirama hauna paunai aika a'i temeba atetuana. Ua kehoma raninai ekia 'abi kahaba muena taearana aha'i, pokina to'u neiana

hanona ena bero aha'i." <sup>41</sup> Ia 'abi neiana ehinana murinai, to'u haukia maikoina euhunakia terama otaraina.

## 20

### *Paulo Eao Makedonia Mai Helene.*

<sup>1</sup> Atetua eore murinai, Paulo ebaiuhu a'ikakauma haukia temai herena, aokia ebataburanakia ba haparua ehinana ehabonakia eao Makedonia. <sup>2</sup> 'Eka weiakia haeai haeai aokiai 'abi bo'okiai a'ikakauma haukia ebataburanakia ba Helene ai ekara'au. <sup>3</sup> Nawa aihau weia Helene ai emiaho, eba'oru aunohiai kehe'au Suria keao aonai Iuda haukia baika terobahu kateahu 'arina poua eona, buonai Paulo haeamona eraonana Makedonia kekabanai keao Suria.

<sup>4</sup> Maearima kate'abana haukia hanona neiakia. Puro nahuna Sopatere ia hanona Berea hauna, Aristako mai Sekundo ia hanona Tesalonika haukia, Gaio Derebe hauna, Tukiko mai Trofimo ia hanona Asia haukia, mai Timoteo. <sup>5</sup> Maearima neiakia te'uai teao Toroa ai tebai'ima. <sup>6</sup> Parawa 'abaeana tatuna murinai Pilipo ai aunohiai tabeau ahi wapu ima murinai weia Toroa ai tabaitabu ahi. Weia hui hamona tamiaho.

### *Toroai Paulo Eutuko Ebamauri maurina.*

<sup>7</sup> Hui weianai wapu kori'uaina aonai ikoimaiai tamiato'u parawa robena katana. Paulo to'u haukia eba'abi 'abinakia eaomo wapuka'a, pokina kerani hanona ia kehabonakia. <sup>8</sup> Ai ikoimaiai hanona ikaihuri ha 'ubiai hauna aonai ta'abi'abi, ikaihuri weiana aonai hanona lamepa bo'ona te'ara. <sup>9</sup> Hau 'aru'aruna ha atana Eutuko hanona weia riba ahi 'ekanai emiai. Paulo e'abi'abi homa'ana aonai, Eutuko hanona eparua rea itu weiana itarana ibaihauna 'ubiai haunai e'eho eao 'ano. Tea'itaeanana hanona aba e'ari. <sup>10</sup> Paulo eriri eao Eutuko ahnai eno'au imana huanae era'u huri, e'abi etibaha, "Aomi

a'i kearo'ari ia hanona mauri maurina nemiaho." <sup>11</sup> Ba Paulo ekara'au mue eao itu 'ubinai Parawa ehobina teani. E'abi'abi homa'a herekiae eaomo raurani 'amari'amarinai, ba eka'a. <sup>12</sup> Hau 'aru'aruna mai mauri maurina teaoaina aiara buonai aokia etabura ki'a.

*Toroa Tehabona Tebeau Ahi Teao Mileto.*

<sup>13</sup> Paulo e'abi ia hanona aenai keao Aso paunai, ena 'abi ta'i taeana ai aunohi ai taehe'au tabeau ta'uai taeao, weia ta'imana kehe'au. <sup>14</sup> Ba Aso ai tabaitabu ahi aonai kipokia aunohiae taehe'au taeao Mitulene. <sup>15</sup> Erani tabeau taeao Kioso kereibua haianai takara'au ba wapu ibaruuanai takabanai taeao Samo ba wapu ibaihaunai hanona Mileto ai takara'au. <sup>16</sup> Paulo ena raona hanona Epeso katabeau banai, a'i enuatae weia Asia hanonai a'i tamamiaho 'abaea, pokina kenoanoa Pentekoste berauranai hanona Ierusalemai kekara'au biai.

*Paulo Baparua Irorona Ehinana Epeso Ena Marea Kiro Haukia Herekiae.*

<sup>17</sup> Weia Mileto ai Paulo ebaihuu Epeso marea ena kiro haukia herekiae katemai herena. <sup>18</sup> Ia tekara'au aonai ehina benakia etibaha, "Au wapu koriuaina Asia hanonai akara'au emai mo bariu beraura maikoina wai baiatamiae aea amiaho aiho hanona to'ioibi haraina. <sup>19</sup> Iuda haukia baika ekia aibara tehabonakia here'uai ranikiae, mai 'aiaunu'u maha'u mai beina Obiapaka ena aka ababaina. <sup>20</sup> Wai aba to'ioibina ibaraimi 'ekakiae hanona e'u iroro ai mai e'u ba'iobi ai to'u wairakiae mai itu ha ha aokiae, ha a'i ahore bunina. <sup>21</sup> Au Iuda haukia mai Helene haukia herekiae ahina karahi haraina ia kateraona kabe kateao Tirama herena eka Obiapaka Iesu kate a'ikakaumana. <sup>22</sup> Bariu hanona Auba Robe aiana ika'ainai kaeao Ierusalemai, ia a'i na'ioibina weia taba here'uai kerama. <sup>23</sup> Au a'ioibina hana

aiara ha ha aokiae Auba Robe ehina bena'u atetua pahihina mai wapura hanona waira'uai nimai.

<sup>24</sup> Iamo kipo'u e'u mauri ena namo a'i natabuna, ia au nuuatae e'u mauri orenai hanona Obiapaka Iesu aka ebena'u hauna kabaore haraina, aka weiana hanona Tirama ena aoko'o hoana pouna namona kahina karahina.

<sup>25</sup> "Ikoimiae baiatamiae akabanai kabanai Tirama ena obia aiarana airoro aina, bariu a'ioibina wai hanona au a'i katoihua muena'u. <sup>26</sup> Ua buonai bariu wairamiae nahina karahina hau ha ke'ari ki'a 'ekana keao hanona behona a'i ka'arana. <sup>27</sup> Pokina Tirama ena nuatae maikoina aba airoro aina heremi taba ha a'i abunina. <sup>28</sup> Kipomi katoihua ini harainimi mai a'ikakauma haukia kato'ima harainakia matoha mamoe i'imana hauna mamoe ne'ima harainakia 'abana. Auba Robe aka weiana ebenimi Tirama ena marea haukia ibaka'a haraikia haumiae ebaonimi, weiakia hanona Tirama Nahuna ena 'ariai aba ekawanakia.

<sup>29</sup> A'ioibina kahabonimi murinai, ba'iobi haukia bai'oikia baika waeha 'aki aiahukia 'abakia katemai baiatamiae a'ikakauma haukia weiakia mamoe 'abakia katea'i ki'anakia. <sup>30</sup> Abomo maearima baika kipokia tuaka haeamo haukia katemikiri bai'oi 'abikiae a'ikakauma haukia baika katebahureanakia kateba kaparenakiae ia murikiae kateka'a. <sup>31</sup> Ua buonai kato'ima harainimi, rani ikoinai katoraona 'inina ihau aihau aonai maha'u mai beina rabi mai mararani wai ikoimiae ha ha aba'iobinimi a'i a'oro 'apua.

<sup>32</sup> "Bariu wai Tirama imanai mai ena aoko'o hoana 'abinai nahorotinimi, 'abi weiana hanona ikoimiae kebakori 'ininihi mai hiabuna Tirama ena banamo kebenimi ena maearima robekia ikoikiae ha ha 'eukia kebenakia ihobonai.

<sup>33</sup> Au baiatamiae aonai hau ha ena moni 'ao habuni ha a'i anuataeai 'abaeana. <sup>34</sup> Wai kipomi aba to'ioibina au i'aba'u haukia mai au e'u nuatae tabakia

ikoikiai hanona ima'u neiakiai mo ababainakia.<sup>35</sup> Au taba maikoina aba abaihanimi taeara neianai wai abomo katoaka tabura haukia te'abe'abe haukia katobarainakia, Obiapaka Iesu 'abi ehinana hauna katoraona 'inina na e'abi aiho, 'Baiben'i hanona ena namo eapa'ua ba ia'ina hanona ena namo eko'iko'i.'

<sup>36</sup> Paulo 'abi neiana ehinana murinai, kipokia tekaipehu haeamo tebahuba'ari. <sup>37</sup> Ikoikiai mai haihaikia huana'i tera'u huri tepauna baparua hoana. <sup>38</sup> Ia teaoko'oai ki'ana pokina ia e'abi wairana a'i kateiha muena. Wei'ana te'abana kipokia teao weia aunohi ai kehe'au.

## 21

*Paulo Ebeau Ahi Keao  
Ierusalema.*

<sup>1</sup> Ia herekiai hapanua tahanana murinai, aunohi ai tabeau ahi beromaiai taeao Koso, rani ibaru-nai takabanai taeao Rodo ba taeao Patara ai takara'au. <sup>2</sup> Weia aunohi ha Foenikia keao hauna tatabu ahina ba taehe'au tabeau ahi. <sup>3</sup> Ba Kupuro kereibuana ahitainai tabeau banai kataeo Suria aonai, Turo ai tabahaha'au weia aunohi kohuna katetaranakia. <sup>4</sup> A'ikakauma haukia baika weia tatabu ahinakia kipokia hui hamona tamiaho. Ia Auba Robe ena hiabuai Paulo tehina bena Ierusalema a'i keao. <sup>5</sup> Ia emai miahō beraurana eore aonai, tahabonakia taka'a. A'ikakauma haukia ikoinali atawakia mai nahukia kipokia te'abanamai takarahi aiara murinai, weia poeai takaipehu tabahuba'ari. <sup>6</sup> Ha ha kipokia hapanua tahanana murinai takara'au aunohiai taehe'au, ba ia temue ekia aiara teao.

*Mahabanai Hauna Agabo Ema-habanai Paulo 'Euna.*

<sup>7</sup> Turo ai beromaiai tabeau taeao Tolemaia ai takara'au, a'ikakauma haukia kipokia tabaitabu ahi ba wapu hamona weia kipokia tamiaho. <sup>8</sup> Erani weia tahabona taeao

Kaisarea ai takara'au. Ebaneria hauna Pilipo ena itu ai tamiaho, ia hanona diakono haukia 'abaihau hamomo 'abakia ha.<sup>9</sup> Ia nahuna uahokia bani hanona mahabanai uahokia.

<sup>10</sup> Weia tamiaho wapu baika teore murinai mahabanai hauna ha atana Agabo Iudea ai emai.

<sup>11</sup> Ia emai heremaiai hanona Paulo huana ihaina ea'ina kipona imana mai aena ebirinakia e'abi etibaha, "Auba Robe e'abi, Ierusalemai Iuda haukia katehore ihai neiana pokina hauna na katebiri aihona rama haeai haukia katebenakia."

<sup>12</sup> 'Uru neiana taona raninai, ai mai maearima weia haukia kipokia Paulo tanoina a'i keao Ierusalema. <sup>13</sup> Ba Paulo ai emai 'abi ebamuena etibaha, "Taba buonai tuhai ao'u tuba'abe'abena? Au hana aba aba'oru, ia Ierusalemai katebirina'u 'ao kateahu 'arina'u re'a Obiapaka Iesu atanai." <sup>14</sup> Ia aiamai a'i ea'i taeana paunai tahabona ba tatibaha, "Obiapaka ena nuatae hanona merama."

*Paulo Ekara'au Ierusalema.*

<sup>15</sup> Neiana murinai, wapu baika teore ba taba'oru ba takarahi kataeo Ierusalema.

<sup>16</sup> A'ikakauma haukia baika Kaisareai te'abanamai taeao Nasona ena itu ai weia katamiaho. Ia hanona Kupuro hauna abomo a'ikakauma hauna ha 'ai'aina. <sup>17</sup> Ierusalemai takara'au raninai, uaho'abaka teba katotonamai mai aonamokia.

<sup>18</sup> Erani hanona Paulo kipokia taeao Iesu hatina Iakobo katai-hana, weia marea ena kiro haukia ikoinali abomo tewaira tina. <sup>19</sup> Paulo ia imakia ea'inakia murinai, ia ena aka aonai Tirama taba ebabai rama haeai haukia herekiai haukia ikoikiai poukia ehinanakia.

*Hau Apa'uakia Paulo Tehina bena Keao Marea Robe.*

<sup>20</sup> 'Abi neiana teona raninai Tirama tebanamona. Wei'ana ia Paulo haianai te'abi tetibaha, "Uaho'abamai e, aba o'lobina

Iuda haukia bo'okia tia'ikakauma, ia haukia ikoikiai Mose ena rauhubu ia'itaeanan hanona tiraona apa'uana.<sup>21</sup> Ia Iuda haukia neiakia hanona pou bai'oina nahomana teona, Iuda haukia rama haeai haukia ba-iatakiai temiaho haukia ohina benakia Mose ena rauhubu herenai katekapare, miorikia a'i katetarenakia, haeamona Iuda haukia ekia hoa hoa a'i kateka'aina.<sup>22</sup> Ia aba poumu kateona oi hanona omai. Bariu aea kahababai aiho!<sup>23</sup> Ua buonai katahina beni'o akana kobabaina. Emai maearima bani hanona Tirama wairanai ekia 'abi'uai aba tehorotina.<sup>24</sup> Maearima neiakia koaoainakia ekia 'opu ia'ibona to'una aonai, ekia to'u 'arakia kohorenakia buikia katekabe obonakia. Weiana maearima ikoinai kate'ibina 'abi weiakia oi ahamuai tehina haukia hanona to-hakia aha'i, ia oi hanona Mose ena rauhubu tainai nomiaho.<sup>25</sup> Rama haeai haukia weiakia bariu tia'ikakauma haukia herekiai hanona emai raona taraonana hauna marere ai aba tarerena tatiu ahina taba 'ibinakia, weiana aniani tibaibenii tirama bai'oikia herekiai haukia a'i kateani, haeamona mahi tiaruaru haukia a'i kateani, mahi 'akokiai tet'o 'ari haukia a'i kateani, mai a'i katenabau 'abaea nabau 'abaea."<sup>26</sup> Erani Paulo maearima neiakia bani ebaka'anakia kipokia teao 'opu ia'ibona to'una aonai tetoto, ba eao marea robe aonai etoto eba'ibinakia ranai tabanai hanona 'opu ia'ibona akana ranina keore, haeamona wapu ha ha kipokia ekia baibeni katebabai.

### *Iuda Haukia Marea Robeai Paulo Tea'i Inina.*

<sup>27</sup> Wapu 'abaihau hamomo aka weiana aba keore aonai, Iuda haukia baika Asia hanonai temai haukia Paulo marea robe aonai teihana raninai, ia mako tebahi ahinakia Paulo tea'ina,<sup>28</sup> teio tetibaha, "Isaraela haumi e, tomobarainamai! Hau neiana hanona 'eka ikoikiai aokiae ena

ba'iobi maearima ikoinai herekiai eka maearima mai Mose ena rauhubu mai marea robe neiana ni'oatanakia, abomo bariu hanona rama haeai haukia nimaiaiakia marea robe ai 'eka robena neiana tiba'opuna."<sup>29</sup> Ua te'abi aiho pokina 'uainai Paulo Trofimo Epeso hauna ohi Ierusalema aiarana aonai temiaho teihanakia, ba teraonana ebaka'ana eaoaina marea robe aonai.  
<sup>30</sup> 'Abi neianai aiara maikoina 'uri'uri rarina ebaramana maearima taeara haeai haeai tebeau temai Paulo tea'ina teberi karakarana marea robe ai tekarahiaina, murinai marea robe pa'abina tekaabuna.

### *Roma Huari Haukia Paulo Tea'ina.*

<sup>31</sup> Paulo iahu'arina akana tibabaina aonai pouna eao Roma ekia huari poki hauna eona Ierusalema maearimakia atetua rarina tibabaina.<sup>32</sup> Beronai huari te'uai aina haukia mai huari haukia eaoainakia tebeau to'u tekokina. Maearima weiakia huari poki hauna mai ena huari haukia teihanakia raninai Paulo iahunai te'oro 'abaea.<sup>33</sup> Huari poki hauna eka'a eao Paulo ea'ina, ba ena 'abiai tabiri rua ai tebirina. Weiana ebakainakia ia hanona tai haeamona taba ebabaina.<sup>34</sup> To'u ranina aonai maearima baika teio 'abi haeai tehina haeamona baika 'abi haeai mo tehina, weiana 'uri'uri rarina 'akina tebabuana buonai, huari poki hauna 'abi tohana ha'i eona hanona e'abi Paulo katebaka'ana kateaoaina huari haukia ekia miaho 'ekana.<sup>35</sup> Paulo tebaka'ana itataea ai ehe'au raninai to'u haukia teaibara ki'a baha buonai, huari haukia tehore Paulo tebuana teao.<sup>36</sup> Mako ia murinai teao haukia mai ioiokia te'abi tetibaha, "Tomoahu 'arina!"

### *Paulo To'u Wairanai Ena Pou Ehinana.*

<sup>37</sup> Huari haukia Paulo aba ekia parabuai katebakatotona aonai Paulo huari poki hauna enoina etibaha, "Penamo haiamuai e'u 'abi ha pahinana." Ba huari

poki hauna ebakai bakai etibaha, "Oi Helene maeana ona, u?"  
<sup>38</sup> Oi Aigupito haumu weiamu atetua obaramana ahuahu haukia ikoinai taha bani (4,000) obato'unakia obaka'anakia toao hano'akunai, 'u?"  
<sup>39</sup> Paulo ia ena 'abi ebamuena etibaha, "Aha'i. Au hanona Iuda hau'u, Kilikia hanona Taso ai arama, aiara apa'uana weiana maearima'u. Nanoini'o, maearima neiakia pahina benakia."  
<sup>40</sup> Huarí poki hauna Paulo bero ebena ke'abi, ba Paulo itataeai ehe'au imana ea'i taea maearima kateunu. To'u 'uri'uri tebapuana raninai, Paulo Heberu maeanai ehina benakia.

## 22

<sup>1</sup> "Uaho'aba'u mai hama'u ikoimiai, tomobahu e'u pou mahinana aia'u tomona."  
<sup>2</sup> Heberu maeanai ehina benakia hanona ikoikiai tebahu harai ia e'abi hanona aiana teona.  
<sup>3</sup> E'abi mue etibaha, "Au hanona Paulo, Iuda hau'u e'u rama aiarana hanona Taso Kilikiae, ia aiara neiana Ierusalemai tebapa'uana'u. Au hanona Gamaliel ebamarerena'u, 'aba'abaka ekia rauhubu aea homakia ikoikiae eba'ioquina'u abomo Tirama ena aka ataburaina matoha bariu wai tutabura 'abana.  
<sup>4</sup> Au Iesu tea'ikakaumana haukia mai babi'ekia a'oatanakia, taeara neiana teka'aina haukia baika kateahu 'arinakia, baika abirinakia wapura itunai akapo totonakia.  
<sup>5</sup> E'u 'abi hanona robe haukia arakiae hauna mai bakai apa'uana haukia katebatohana. Ia tehore marere tebena'u aeao uaho'abaka Damaseko ai haukia herekie, weia a'ikakauma haukia kamaianakia Ierusalemai katewapura.

*Paulo Eraona kabe Pouna Ehina.*

(Ih 9.1-19; 26.12-18)

<sup>6</sup> "Atiaha 'abana taearai aeao Damaseko aba here'uai hanona ea rarina 'akina ha kupai eriri

ebarara kakaiaronau. <sup>7</sup> Beronai a'eho 'anoai, aia ha aona etibaha, 'Saulo e, Saulo e, taba buonai au nu'oatana'u?' <sup>8</sup> Au abakai bakai atibaha, 'Obiapaka e, oi tai?' Ia etibaha, 'Au Iesu, Nasareta hau'u, nu'oatana'u.' <sup>9</sup> Te'abana'u haukia ea weiana teihana, ia aia weiana au ehina bena'u hauna a'i teona.

<sup>10</sup> "Au abakaina, 'Obiapaka e, au taba kababaina?' Ia etibaha, 'Momikiri, koao Damaseko, weia hau ha ua'a taba ke'uhina hanona akakia ikoikiae koba-bainakia.' <sup>11</sup> Te'abau haukia ima'uai te'ebe tebaka'ana'u taeao Damaseko, pokina ea weiana 'imare 'abana maha'u eba'iaunakia.

<sup>12</sup> "Hau ha atana Anania emai eihana'u. Ia hanona rauhubu 'abikia ne'ima harainakia hauna, Iuda haukia weia temiaho haukia ikoikiae hanona ia timariki aina.  
<sup>13</sup> Ia emai here'uai ekoroti ehina bena'u etibaha, 'Uaho'aba'u Saulo e, emu ihaiha moa'i muena.' Rani weianai beronai maha'u enamo au ia aihana.  
<sup>14</sup> Ba ia etibaha, 'Aika 'aba'abaka ekia Tirama etina'ani'o ena nuatae ko'ioquina abomo aka bero hauna Iesu koihana, ia pinanai ke'abi hanona aiana kona.  
<sup>15</sup> Weiana oi hanona ia pouna ihinanai koao, taba ona 'ao oihana hauna maearima ikoikiae kohina benakia.  
<sup>16</sup> Bariu taba naha'imana? Momikiri Obiapaka koaparina atanai ko'uere robe, emu ki'a keuhu obonakia.'

*Obiapaka Paulo Euhuna Rama Haeai Haukia Herekie.*

<sup>17</sup> "Muriae au amue aeao Ierusalemai, marea robe aonai abahuba'ari hanona amahabanai.

<sup>18</sup> Obiapaka aihana ba ehina bena'u etibaha, 'Monoanoa. Bariu bariu mo Ierusalema kohabona, pokina e'u pou kohinana hanona maearima neiakia emu 'abi a'i katea'i taeana.'  
<sup>19</sup> Au atibaha, 'Obiapaka e, ia aia'u kateona, pokina maearima neiakia hanona te'ioquina'u au aeao marea ha ha aokiae tia'ikakauman'i'o haukia ahunakia, abirinakia wapura

itunai ane'etinakia. <sup>20</sup> Oi poumu ihinana hauna Štefano aruaruna ekiki oioi raninai au abomo weia kipokia takoroti haeamo teahu 'arina haukia abatohanakia abomo ekia habuni aiha 'ininakia.' <sup>21</sup> Weiana Obiapaka ehina bena'u etibaha, 'Aha'i, oi hana moao, au oi nauhuni'o rama haeai haukia atau'ai temiaho haukia herekia.'

*Paulo Hanona Roma Hauna Erama.*

<sup>22</sup> Maearima hanona Paulo aiana tebahu aina eaomo 'abi neiana ehinana raninai aiakia tebakara 'aunakia teio tetibaha, "Hau neiana kahahu 'arina! Neia hanopakai kemiaho hanona ena namo aha'i." <sup>23</sup> Ia tebakoko ekia habuni tekapo abomo 'ano te'i'i tekapo 'ubi teao. <sup>24</sup> Weiana huari poki hauna ena huari haukia ehina benakia Paulo teaoaina aka 'ekana, weia kate'atina ba katebakaina taba buonai teioaina. <sup>25</sup> Temikiri tebirina kate'atina aonai, Paulo huari haukia hinabu nipoki aina hauna ia herenai ekoroti hauna ehina bena etibaha, "Roma hauna bakai a'i nia'i bahana, ia kate'atina hanona mai ena bero, 'u?"

<sup>26</sup> Huari hauna weiana aia eona raninai eao ia ena poki hauna ehina bena etibaha, "Hau weiana hanona Roma hauna na niho. Aea kobabai aiho?" <sup>27</sup> Weiana huari poki hauna eao Paulo ebakaina etibaha, "Oi Roma haumu?" Paulo e'abi, "E." <sup>28</sup> Huari poki hauna e'abi etibaha, "Au Roma hau'uai aeao hanona moni rarina 'akina 'ara ahore." Ia Paulo e'abi etibaha, "Au hanona Roma hau'u arama." <sup>29</sup> Weia tekoroti katebakaina haukia beronai tehe mue, huari poki hauna e'lobina hanona eta'u, pokina Paulo hanona Roma hauna, iamo tabiriai ebirina pau-nai.

*Paulo Bakai Apa'uana Wairanai Ekoroti.*

<sup>30</sup> Erani huari poki hauna ena nuatae ke'iobi haraina Iuda

haukia taba buonai Paulo tekahina. Weiana robe haukia apa'uakia mai bakai apa'uana haukia ebato'unakia, ba Paulo erubuna eaoaina wairakiai ebakorotina.

## 23

<sup>1</sup> Paulo bakai apa'uana haukia eiha 'ini'ininakia e'abi etibaha, "Uaho'aba'u e, ao'u tohana beho ha a'i ababaina Tirama wairanai amiaho emai mo bariu." <sup>2</sup> Weiana Anania robe haukia 'arakiai hauna 'abi neiana eona hanona Paulo herenai tekoroti haukia ehina benakia pinana kateahu iti'itina. <sup>3</sup> Ba Paulo ia ehina bena etibaha, "Kaita'ata'a haumu, Tirama keahuni'o, rauhubuai naia omiati, au kobabakaina'u, ia oi haeamomu mo rauhubu obakai hurina, o'abi kateahuna'u."

<sup>4</sup> Paulo herenai tekoroti haukia tehore tehina bena tetibaha, "Oi hama Tirama ena robe haukia 'arakiai hauna herenai nu'abi ki'a?" <sup>5</sup> Paulo etibaha, "Uaho'aba'u, a'i a'lobina ia hanona robe haukia 'arakiai hauna. Weiana puka robenai na erere aiho, 'Emu obia hauna herenai a'i ko'abi ki'a.'

<sup>6</sup> Paulo bakai apa'uana haukia eiha 'obi ainakia baika Parisea haukia baika Sadukea haukia hanona wairakia eio 'aota etibaha, "Uaho'aba'u e! Au hanona Parisea hau'u, Parisea nahukia, e'u raona raona 'ari haukia katemikiri mue paunai bariu bakai 'ekanai nakoroti."

<sup>7</sup> 'Abi neiana ehinana raninai baiara rarina 'akina erama, ia tehe boana Parisea haukia 'abaeana mo mai Sadukea haukia 'abaeana mo. <sup>8</sup> Pokina Sadukea haukia hanona 'ari haukia ekia mikiri mue a'i tibatohana, aneru 'ao auba abomo aha'i, ia Parisea haukia hanona ikoikiai tibatohanakia. <sup>9</sup> Atetua rarina erama, Parisea haukia aokiai rauhubu poki haukia baika temikiri teio 'aota tetibaha, "Hau neiana ena beho ha a'i tatabu ahina. Pa'e aneru 'ao auba mo hau neiana ehina bena." <sup>10</sup> Baiara erarina

'akina. Huari poki hauna Paulo a'i temetapa 'iti'itina ta'una, huari haukia euhunakia teriri teao Paulo herekiae tepuhu boinakia, teaoaina huari haukia ekia 'eka.

<sup>11</sup> Rabi weiana Obiapaka Paulo herenai ekoroti e'abi etibaha, "Kotabura! Ierusalemai pou'u ohinana 'abana Roma ai abomo pou'u kohinana."

*Iuda Haukia Paulo Kateahu 'arina.*

<sup>12</sup> Erani raurani Iuda haukia teto'u terobahu te'abi'uai Tirama wairanai, aniani ha a'i kateana abomo bei ha a'i kateinu keao mo Paulo kateahu 'arina. <sup>13</sup> Haukia ikoinai bariabui reana hanona ua te'abi aiho. <sup>14</sup> Teao robe haukia apa'uakia mai aiara maearima apa'uakia herekiae te'abi tetibaha, "Ai aba ta'abi'uai Tirama wairanai, aniani ha a'i katana keao mo Paulo katahu 'arina. <sup>15</sup> Bariu wai mai bakai apa'uana haukia 'abi tomouhuna meao huari poki hauna herena katobai'oi kato'abi, Paulo kemai na'a heremi 'abi berona katoa'ina na katoahoma. Ia na kemai a'i kekarahi baha aonai ai aba ta'oru katahu 'arina."

<sup>16</sup> 'A Paulo uana Paulo hinahina tehinahina 'uruna eona, ua buonai eao huari haukia ekia 'ekai, Paulo haianai e'abi. <sup>17</sup> Ba Paulo huari haukia hinabu nipoki ainakia hauna ha eaparina ehina bena etibaha, "Hau 'aru'aruna neiana kobaka'ana koaoaina huari poki hauna herena, ia mai ena 'abi ha ua'a kehinana herenai." <sup>18</sup> Ua buonai huari hauna weiana Paulo uana eaoaina huari poki hauna herena e'abi etibaha, "Paulo wapura hauna ebaiuhu aeao herena, enoina'u hau 'aru'aruna neiana kamaiaina heremu ia mai ena 'abi ha haiamuai kehinana."

<sup>19</sup> Huari poki hauna Paulo uana imanai e'ebe teao haiahaiai ba ebakaina, "Emu nuatae 'abina taba haia'uai kohinana?" <sup>20</sup> Ia e'abi etibaha, "Iuda haukia aba tehina haeamona katenoini'o,

'Mara Paulo koaoaina bakai apa'uana haukia herekia, katebakai haraina herenai 'abi berona katea'ina.' na katehoma. <sup>21</sup> Ia aiakia a'i kona pokina maearima haukia ikoinai bariabui reana hanona katebai'ima Paulo katehe abuna. Te'abi'uai Tirama wairanai a'i kateani 'ao bei a'i kateinu keao mo Paulo kateahu 'arina. Bariu maearima weiakia hanona aba te'oru kate babaina, ekia noi mo koa'i taeana hanona tibahubahu aina." <sup>22</sup> Huari poki hauna hau 'aru'aruna weiana eharabuna etibaha, "Ohina bena'u 'abina neiana pouna hanona hau ha haianai a'i kohinana." Ba euhuna eka'a.

*Paulo Teaoaina Kaisarea Kabana Hauna Feliki Herenai.*

<sup>23</sup> Weiana huari poki hauna ehore huari haukia hinabu tipoki ainakia haukia rua eaparinakia ehina benakia etibaha, "Huari haukia hinabu rua, hoti ai tehuari haukia ikoinai imabui harau rua mai 'arawai haukia ikoinai hinabu rua katoba'orunakia. Bariu rabi beraura hoana 'ababani hamomo hanona katoao Kaisarea. <sup>24</sup> Hoti baika abomo katoba'orunakia Paulo kemia'au, kato'iima haraina katoaoaina Kabana hauna Feliki herena." <sup>25</sup> Ba huari poki hauna marere ha ererena keao Kabana hauna herena, na erere aihona.

<sup>26</sup> "Au Klaudio Lusia, ao'u namonai oi Feliki Kabana haumu namomu banamo nabeni'o.

<sup>27</sup> Iuda haukia hau neiana tea'ina teahuna aba kateahu 'arina aonai, e'u huari haukia kipokia taeao 'arana tabamaurina. Pokina a'lobina ia hanona Roma hauna. <sup>28</sup> Au anuatae ka'lobina taba buonai tikai ahina buonai aeaoaina Iuda haukia ekia bakai apa'uana aonai. <sup>29</sup> Weia a'lobina hau neiana taba ua'a ha a'i ebabaina weiana ke'ari 'ao kewapupaina, ia kipokia ekia rauhubu aonai bakaibakai baika buokiae tea'ina. <sup>30</sup> Haeamona Iuda haukia baika terobahu kateahu

'arina na teho, pouna aona raninai beronai mo auhuna heremu. Tehinau aina haukia abomo ahina benakia ekia hinau 'abikia katewahi ainakia heremu."

<sup>31</sup> Ua buonai huari haukia ekia poki hauna aiana teka'aina ihobonai rabi weiana aonai Paulo teaoaina Antipatri ai tekarahi. <sup>32</sup> Erani hanona aekiae teka'a haukia temue ekia aka 'ekana teao, ia hotiai haukia Paulo teaoaina. <sup>33</sup> Hotiai teao haukia Kaisareai tekara'au raninai, marere weiana Kabana hauna atana Feliki tebena, ba Paulo abonomo Feliki ena iha'inu ba'anai tehabona. <sup>34</sup> Kabana hauna marere weiana etuabina murinai, ia Paulo ebakaina ia hanona 'eka tabana hauna. Ia e'io bina Paulo hanona Kilikia hauna raninai, <sup>35</sup> e'abi etibaha, "Oi beho 'ekanai tihorotini'o haukia katemai raninai, oi emu pou kohina aiamu kaona." Epua ia ena huari haukia ehina benakia Paulo weia Heroda obia hauna ena itu aonai kateiha 'inina.

## 24

### *Paulo Tehinau aina.*

<sup>1</sup> Wapu ima teore murinai Anania robe haukia arakiae hauna, aiara haukia apa'uakia mai Roma ekia rauhubu e'iohi haraina hauna atana Teretulo kipokia teriri teao Kaisarea, Kabana hauna Feliki wairanai Paulo katehinau aina. <sup>2</sup> Ba Feliki 'abi euhuna eao Paulo temaiaina, weiana Teretulo emikiri ena hinau 'abina ea'i ramana etibaha, "Feliki, Kabana haumu namomu e, ihau rarinu o'uaiai harainamai baibua aonai tamiaho. Emu aotipai emai hano neiana aonai taba namokia bo'okia terama. <sup>3</sup> Ua buonai 'eka maikoinai mai taearea ikoikiae ai hanona oi ta'i taeani'o. Feliki Kabana haumu namomu, ai mai aomai ikoikiae oi tabanamoni'o.

<sup>4</sup> Bariu a'i kabaro'arin'i'o, ia nanoini'o koaoko'o ainamai, emai 'abi papana uruna kona. <sup>5</sup> 'Abina hanona neiana. Hau neiana

tatabu ahina ia hanona ripuripu hauna. Hanopaka maikoina aonai Iuda maearimakia ikoikiae herekiae atetua nibarama barama bena hauna, abomo Nasareta maearimakia ki'a obokia ne'uai ainakia ekia a'i to'u aokiae. <sup>6</sup> Ia ninore Marea Robe niba'opuna buonai ta'ina. (Emai rauhubu tainai katababakaina. <sup>7</sup> Ia Lusia huari poki hauna apa'uana emai ebatabura ki'a heremai aepuhi boina. <sup>8</sup> Ba tehinau aina haukia ehina benakia katewahi heremu.) Ba oi kipomu hau naiana kobakaina, ai ia tahinau aina hauna aiana kona hanona ko'io bina." <sup>9</sup> Weiana Iuda haukia abomo Teretulo tebaruana te'abi ena 'abi ikoikiae hanona tohakia.

*Paulo Feliki Kabana Hauna  
Wairanai Kipona Poune Ehinana.*

<sup>10</sup> Kabana hauna 'ekuna ekaina Paulo ke'abi, ba Paulo e'abi etibaha, "Ihau rarina eka hanopaka aonai bakai bo'ona obabainakia buonai au ao'u namonai kipo'u pou'u kahinana oi wairamuai. <sup>11</sup> Oi kipomu 'uri'uri neiana pokina kotabuna raninai aba ko'io bina, weiana wapu harau haea rua aba teao aonai au akara'au Ierusalem aeo kabahuba'ari. <sup>12</sup> Aonai Iuda haukia here'uai beho ha a'i tetabu ahina, marea robe aonai hau ha ohi a'i tabaiara 'ao marea aokiae 'ao aiara weiana aonai a'i abatetua. <sup>13</sup> Hau neiakiae bariu tehinau aina'u 'abikia hanona a'i mo kateba tohanakia oi wairamuai.

<sup>14</sup> "Iamo au wairamuai kahina poune hanona neiana, hau neiakiae ti'abi kuti bai'oina taearanai au hanona 'aba'abamai ekia Tirama nakuti aina, taba ikoikiae Mose ena rauhubuai mai mahabani haukia ekia pukai tererenakiae ikoikiae na'i taeananakia. <sup>15</sup> E'u buabenai Tirama herenai hanona ihobonamo maearima neiakiae. Emai buabenai hanona bero haukia mai ki'a haukia ikoikiae 'ariai katemikiri mue. <sup>16</sup> Ua buonai rani ikoikiae nabatabura ao'u beronai

kamiaho Tirama mai maearima wairakiai.

<sup>17</sup> "Ihau baika atau'ai amiaho murinai amue aeao Ierusalema e'u maearima herekia beruberu kaeao ainakia uraru haukia kabenakia haeamona ki'a ihina haona banamona kababaina paunai.

<sup>18</sup> Au hanona robe hoahoana ababaina abamaha mahana'u aonai marea robe ai teihana'u, mako ua'a aha'i, abomo 'uri'uri ua'a ha a'i ababaina. <sup>19</sup> Ia Iuda haukia baika Asiai temai haukia abomo weia, e'u beho ha teihana raninai bariu wairamuai patewaira tina patehina pouna. <sup>20</sup> Aha'i raninai Iuda haukia neiakia aba temai haukia teme'abi, bakai apa'uana haukia wairakiai tebabaina'u aonai e'u beho tabana tetabu ahina. <sup>21</sup> Ia wairakiai akoroti raninai aio 'abi ha neiana ahinana atibaha, "Ari haukia katemikiri mue mo paunai bariu toa'ina'u bakai 'ekanai tohorotina'u."

<sup>22</sup> Ba Feliki a'ikakauma taearana e'obi haraina paunai bakai ekaiabuna ba e'abi etibaha, "Huari poki hauna Lusia kemai raninai emi bakai karaonana." <sup>23</sup> Ia ehore huari haukia hinabu nipoki ainakia hauna ehina bena Paulo keiha 'ini haraina, ia a'i kekaiabu ki'a bahana, ena hau katemai katetoana haeamona ena nuatae tabakia re'a katebabai.

### *Paulo Wapura Itunai Tekiabuna Ihau Rua.*

<sup>24</sup> Rani baika teao murinai Feliki atawana Drusila ohi temai, Drusila hanona Iuda babi'ena Feliki ebaiuhu eao Paulo emai, ba Paulo a'ikakauma Keriso Jesu aonai hauna pouna ehinana aiana teona. <sup>25</sup> Ia Paulo ehore aka bero, bakiro mai bakaibakai rarina kemai hauna robakia eahuna, weiana Feliki hanona eta'u e'abi etibaha, "Abetaina naia, bariu hanona komue koao, rani ha namona kehaea 'eu'uai raninai kapari mueni'o." <sup>26</sup> Rani weianai Feliki eraonana Paulo moni baika ia kebena ba keba karahina, weiana buonai rani

bo'ona ebaiuhu Paulo eao terarua te'abi'abi.

<sup>27</sup> Weiana ihau rua teao murinai Porokio Festo ehore Feliki 'ekana ea'ina. Ia Feliki Iuda haukia aokia keana paunai Paulo wapura itunai ehabona.

## 25

### *Paulo Enuatae Kaisa Wairanai Kekoroti Kebakai.*

<sup>1</sup> Festo ke'imana hanonai ekara'au ena aka ea'i ramana wapu aihau murinai Kaisareai eao Ierusalema. <sup>2</sup> Robe haukia apa'uakia mai Iuda haukia apa'uakia teao herenai ua'a Paulo tehinau aina. <sup>3</sup> Festo teba'amena tenuatae bariu Paulo keuhuna kemai Ierusalema. Pokina Paulo kekara'au hanona kateba'oru, taearai katehe abuna kateahu 'arina teraonana. <sup>4</sup> Ia Festo e'abi etibaha, "Paulo hanona Kaisarea wapura itunai tekai abuna, rani papana haeamona aba kamue kaeao. <sup>5</sup> Namona hanona teuai ainimi haukia katemai kipokia kataeo Kaisareai hau weiana mai ena beho re'a katehinau aina."

<sup>6</sup> Wapu 'ababani 'ao harau haea 'abana kipokia temiaho murinai Festo eao Kaisarea. Erani eao bakai 'ekanai emiati 'abi euhuna eao Paulo kate maiaina. <sup>7</sup> Ba Paulo emai raninai, Iuda haukia Ierusalemai temai haukia teao Paulo tekori kaiarona 'abi bo'okia pumakia 'akikia tehina herenai, ikoikiai a'i mo katebatoha 'abikia 'abaeana. <sup>8</sup> Paulo ekia 'abi arana ebamuena etibaha, "Au taba ha a'i ababaina, Iuda haukia ekia rauhubu a'i mo abakai hurina, marea robe abomo a'i a'iki'ana, 'ao Roma ekia obia 'arana Kaisa herenai beho mo ha a'i ababaina."

<sup>9</sup> Ia Festo Iuda haukia ketaianakia aokia kebanamona na ehoma Paulo ebakaina, "Nonuatae kokara'au koao Ierusalema hinau 'abikia neiakia paukiai ua'a waira'uai kobakai?" <sup>10</sup> Paulo e'abi etibaha, "Au bariu Kaisa ena bakai 'ekanai nakoroti, au bariu mo neianai mebakaina'u. Pokina oi o'obi ki'a bahana,

Iuda haukia herekiae taba ha a'i a'iki'ana.<sup>11</sup> Ia pabeho mo ba beho 'arana 'ari pate'uhina, a'i naubo pa'ari. Ia Iuda haukia ekia hinau 'abikia aha'uai tene'eti ikoikiae a'i tetoha, hau ha ena bero aha'i kea'ina'u ia imakiae keutana. Nanoi Kaisa wairanai kakoroti kabakai."<sup>12</sup> Festo bakai haukia kipokia terobahu epua hanona Paulo ehina bena etibaha, "Oi onoi Kaisa herenai buonai koao Kaisa herena kobakai."

*Festo Paulo Eaoaina Agripa Wairanai.*

<sup>13</sup> Wapu baika teao murinai obia 'arana hauna Agripa habuna Berenike ohi Festo itoana ibanamona paunai teao Kaisarea. <sup>14</sup> Rani homa'ana temiaho aonai Festo eholore Paulo robana eahuna obia 'arana Agripa herenai, "Feliki wapura hauna ha ɳa'a ehabona wapura itunai.<sup>15</sup> Aeao Ierusalem raninai, robe haukia apa'uakia mai Iuda haukia apa'uakia kipokia temai here'u tehinau tenoina'u kabawapurana.<sup>16</sup> Ahina benakia atibaha, 'Roma haukia ekia hoahoa hanona nahomana aha'i, maearima hanona a'i takaiabu 'abaeana keao mo ehinai aina hauna ohi bakai 'ekanai katekoroti ia mai ena bero kipona pouna kehinana.'

<sup>17</sup> Kipokia tamai neia raninai, a'i abahoma'ana erani aeao bakai 'ekanai, abaiuhu eao hau weiana kemai, ba emai. <sup>18</sup> Tehinau haukia temikiri te'abi raninai beho araonanakia haukia a'i tehina.<sup>19</sup> Ia ae'emo ekia bahuba'ari taearana te'uri'uri aina mai 'ari hauna ha atana Iesu e'ari weiana Paulo e'abi emauri hauna buonai kipokia tebaiara hauna robana teahuna. <sup>20</sup> Taba neiana itabuna ababataina here'uai a'i etaina buonai, Paulo abakaina, kenuatae re'a keao Ierusalem ua'a kebakai.<sup>21</sup> A enoi ena bakai Kaisa keihana, ua buonai a'abi katekaiabuna wapura itunai kemiaho keaomo kauhuna keao Kaisa herena."<sup>22</sup> Ba Agripa eholore Festo ehina bena etibaha, "Au abomo nanuatae

hau weiana aiana kipo'u haia'uai kaona." Festo ia ena 'abi eba-muena etibaha, "Mara ia aiana aba kona."

<sup>23</sup> Erani Agripa mai Berenike ekia habuni namokia mai nu-abikia ekia apa'ua hoana ibawaira tinana haukia tebatotonakia, huari poki haukia mai aiara haukia apa'uakia kipokia tetoto teao to'u ituna. Festo ena abiai Paulo temaiaina. <sup>24</sup> Festo emikiri e'abi, "Obia arana haumu Agripa mai towaira tina haumi ikoimiai! Hau neiana toihana. Iuda haukia Ierusalem ua'a mai neia Kaisareai temiaho haukia maikoina hau neiana here'uai tehinau aina teioaina tetibaha, 'Ia kemiaho hanona ena namo aha'i, ia ke'ari.' <sup>25</sup> Ia beho tabai ke'ari hanona au a'i atabu ahina, haeamona kipona enoina'u ena bakai Kaisa keihana buonai, naraonana kauhuna keao Roma.<sup>26</sup> Ia a'i na'iohina ahana 'abi tabana mo karere keao Kaisa herena. Ua buonai amaiaina ikoimiai wairamiai, tohana hana obia 'arana hauna Agripa wairamuai, kahabakai haraina ia 'abina namona kahatabu ahina karerena.<sup>27</sup> Naraonana a'i ebero wapura hauna kauhu 'abaeana ia ena beho a'i karere pouna."

## 26

*Paulo Agripa Wairanai Kipona Pouna Ehinana.*

<sup>1</sup> Agripa eholore Paulo ehina bena etibaha, "Aba bero nabeni'o kipomu poumu mohinana." Ba Paulo imana ea'i taeanakia e'abi etibaha,<sup>2</sup> "Obia 'arana hauna Agripa e, au kipo'u nababataina bariu rani neianai oi wairamuai akoroti hanona enamo, pokina Iuda haukia ekia hinau 'abikia here'uai hauna kipo'u pouna kauhuna.<sup>3</sup> Neiana hanona taba tohana, oi o'iohina Iuda haukia ekia hoahoa mai ekia atetua, ua buonai nanoini'o kobai'ima au ka'abi.

<sup>4</sup> "Iuda haukia ikoikiae te'iobina'u ko'iko'i uai a'iramana emai mo bariu, e'u miahō maurina kipo'u e'u aiarai abomo Ierusalema ai. <sup>5</sup> Aba wa'i baha te'iobina'u abomo au hanona Parisea haunai tebaona'u, ekia kuti rauhubukia pahihikia katebabai aokiae au abomo baiatakiae, ia katenuatae hanona katehina pouna. <sup>6</sup> Bariu bakai 'ekanai akoroti, pokina Tirama e'abi 'uai 'aba'abaka herekiae hauna nabuabena paunai. <sup>7</sup> Itubu harauhaea rua rabi mai mararani Tirama nahakuti aina mai 'abi'uai neiana nahabuabena kerama. Hau apa'uana e, buabeni weiana paunai Iuda haukia au tehinau aina'u. <sup>8</sup> Taba buonai wai tu'abi Tirama nihore maearima 'ariai nibamikiri muenakia a'i katoa'i taeana na tuho?

<sup>9</sup> "Au abomo ao'uai araonana Iesu Nasareta hauna atana a'oatana ia'i ki'ana akakia bo'ona papabai hanona penamo. <sup>10</sup> Au Ierusalemai ua ababai aihō, robe haukia apa'uakia hiabu tebena'u, aeao Tirama ena maearima a'inakia abawapurakanakia, abomo kateahu 'arinakia 'abina tehinana au ima'u a'itaeana. <sup>11</sup> Rani bo'ona aeao marea ha ha aokiae ahunakia abahaiaranakia, abahobona ahina benakia ekia a'ikakauma katebuniaina, au aopuereai ki'a bahanakia, weiana hanopaka haeai abomo aeao ahunakia.

#### *Paulo Eraona kabe Pouna Ehina.*

(Ih 9.1-19; 22.6-16)

<sup>12</sup> "Raona neiana paunai au rani ha robe haukia apa'uakia hiabu tebena'u teuhuna'u kaeao Damaseko. <sup>13</sup> Obiamu, taearai atiaha tohanai ea ha aihana kupa 'ubinai, ea ki'a baha ba beraura, te'abana'u haukia kipokia ebaea obonamai. <sup>14</sup> Ikoimaiiai ta'eho 'anoai aia ha aona Heberu maeakia ehina bena'u etibaha, 'Saulo e, Saulo e, taba buonai au nu'oatana'u? Au nubaki'ana'u hanona kipomu kobahaiaran'i'o akana nubabaina.' <sup>15</sup> Abakaina

atibaha, 'Obiapaka e, oi tai?' Obiapaka e'abi, 'Au Iesu oi nu'oatana'u hau'u. <sup>16</sup> Momikiri aemu tohanai mokoroti, au heremuai awaira tina hanona ka'itaeaini'o e'u ta'ara'i haunai koao, bariu oi aea oihā aihona'u abomo wairai kabaihani'o haukia poukia maearima kohina benakia. <sup>17</sup> Au Iuda mai rama haeani haukia imakiae oi kabamaurini'o, haeaniona kauhuni'o rama haeani haukia herekiae. <sup>18</sup> Mahakia koban'anakia wapurai koba kabananakia katemai ea, ba Satani ena hiabuai katekabanai katemai Tirama herena, weiana kate a'ikakaumana'u ekia ki'a ihina hao mai ekia 'eka katea'ina Tirama ena maearima robekia baiatakiae.

#### *Paulo Ena Aka Robana Eahuna.*

<sup>19</sup> "Obia 'arana haumu Agripa e, kupai aia weiana aona hauna aka'ai tohana. <sup>20</sup> Kori'uaina hanona weia Damasekoai, haeaniona Ierusalemai mai Iudea aiarakia ikoinai eaomo rama haeani haukia herekiae airoro aina kateraona kabe katemue Tirama herenai, aka namokia katebabainakia weiana ia aba teraona kabe haukia katebathanakia. <sup>21</sup> Weiana buonai Iudea haukia marea robe aonai tea'ina'u, ekia nuatae hanona kateahu 'arina'u. <sup>22</sup> Au hanona Tirama ebarai to'ona'u emai mo bariu au wairamiai akoroti nabatohana, maearima papakia 'ao apa'uakia ikoikiae herekiae teihobo. Au nahinana hauna hanona taba hamona mo mahabanai haukia mai Mose ia robana teahuna kerama hauna. <sup>23</sup> Keriso hanona kehaiara ba 'ariai kemikiri 'uai, Israela haukia mai rama haeani haukia ikoikiae herekiae ena bamauri eana kemaiaina."

#### *Paulo Agripa Ehina bena Ke'a'ikakauma.*

<sup>24</sup> Paulo kipona pouna nehinana aonai Festo eio etibaha, "Paulo e, oi hanona aba nubeau 'ari, emu aotipa apa'uana ehore aba ebabeau 'arini'o." Paulo ia ehina bena etibaha, <sup>25</sup> "Festo Apa'uamu

e, au hanona a'i nabeau'ari, au nahina haukia hanona 'abi tohakia abomo mai anikia.<sup>26</sup> Au ahina 'abikia hanona obia 'arana hauna abomo neiakia e'iobi buonai au mai ao'u ikoinai na'abi. Au a'io bina ia neiakia ikoikiai aba ea'i harainakia, pokina taba neiakia hanona eua'a haiahiai a'i terama.<sup>27</sup> Agripa Obia haumu e, oi mahabanai haukia nubatohanakia? Au a'io bina oi ia nubatohanakia."

<sup>28</sup> Agripa Paulo ehina bena etibaha, "Rani papana neiana aonai oi nuraonana au Keriso ena maearima ai aba kobaona'u, 'u?"<sup>29</sup> Paulo e'abi etibaha, "Rani eko'o ko'o 'ao rani ehoma'a, ia au Tirama nanoina, oi ikupaiamu aha'i, ia aia'u tuona haumi ikoimiai bariu beraura neianai hanona patomai au 'abanai patoao, iamo heremai tabiri hamona nahomana a'i nanuatae aina."

<sup>30</sup> Ba Obia 'arana hauna, Kabanha hauna, Berenike mai weia temiati haukia ikoikiai temikiri,<sup>31</sup> ikaihuri weiana tehabona tekarahi, ha ha te'abi'abi tetibaha, "Hau neiana taba ha a'i ebabai ki'ana weiana ia ke'ari 'ao ke-wapura hauna a'i ebabaina."<sup>32</sup> Agripa ehore Festo ehina bena etibaha, "Hau neiana hanona pahabakarahina, ia Kaisa mo atana ehinana ua'a kebakai."

## 27

### *Paulo Aunohiai Tebaehe'auna Kateao Roma.*

<sup>1</sup> Weiakia ekia raona tebatohana ai hanona aunohi ai kataeo Italia, ba Paulo mai wapura haukia baika hanona huari haukia hinabu ha ne'imanaikia hauna ha atana Julio imanai teutanakia, ia hanona obia 'arana Augusto ena huari hauna ha.<sup>2</sup> Ai Adramutio aunohina ha ai taehe'au ba Asia 'abirakia poekia katabeauta tabeau ahi, Aristako Makedonia hauna weia Tesalonika ai emai hauna abomo ai baiatamai ai.<sup>3</sup> Erani hanona Sidono ai tabeau'au, ba weia hanona Julio ena namo hoana

Paulo herenai ebabaina ehabona keao ena hau herekia keihanakia ena nuatae tabakia re'a katebena.<sup>4</sup> Eka weiana tahabona tabeau ahi mue 'akupakanai taeao Kupuro kereibua murinai tabeauta pokina baura wairamaiai emai paunai.<sup>5</sup> 'Akupaka 'abaeanai tabeauta Kilikia mai Pamfulia poekia tahabonakia taeao Lukia hanonai 'eka atana Mura ai tabeau 'au.

<sup>6</sup> Weia hanona huari pokih auna weiana Alesanderea aunohina ha Italia niao hauna etabu ahina, ba weia ebaehe banainamai.<sup>7</sup> Wapu bo'ona maharimahari tabeau ba mai aro'arimai taeao Kenido ai tabeau 'au. Emal nuatae ekana tabeau bena aonai baura wairamaiai emai paunai Salmone pauna tabeau banai tabeau taeao Krete kereibua bunianai.<sup>8</sup> Mai aro'arimai poe haiana tabeauta tamai 'eka ha atana 'Thoahoa Namoabuna', 'eka weiana mai Lasea aiarana baiatakia hanona a'i ehoma'a.

<sup>9</sup> Wapu bo'ona hanona ua'a eore ba rani ena ki'ai 'akuai beau hanona aba keki'a ki'a baha pokina bariu Iuda haukia ekia ani robe ranina hanona aba ekabanai. Ua buonai Paulo eba'io bi baihanakia etibaha,<sup>10</sup> "Hau ikoimiai e, au eka harima naihana bariu neia keao hanona aba keki'a ki'a baha eka taba rarina hanona kate 'akauma aunohi ke'iti'iti mai eka mauri abomo kahane'enakia."<sup>11</sup> Iamo huari pokih auna Paulo e'abi hanona aiana a'i ebatohana ia aunohi pokina hauna mai aunohi kapena hauna mo aiakia eka'aina.<sup>12</sup> 'Amari rarina 'akina aunohi weia ketai'au hanona emai miah a'i kenamo, ua buonai hau bo'okia hanona tenuatae patabeau ahi mue ba petaina raninai Foenikia ai patabeau 'au ba 'amari rarina ranina hanona weia mo patamiaho. Krete aonai ihoahoa weiana mo enamo pokina ahitaina titotaina ohi baiatakia mai tototaina titotaina ohi baiatakia taina ewairana.

*Kou Eabu'au Emai.*

<sup>13</sup> Tibo baurana namona eabu raninai, ia teraonana ekia nuatae baurana aba eabu 'au, buonai to'o teberi 'auna ba Krete poena hahaihana tabeauna taeao. <sup>14</sup> Iamo tabeau ahi homa'ana aha'i hanona baura taburana 'akina atana Kou hanona kereibua tainai eabu 'au emai. <sup>15</sup> Kou weiana aunohi etabu ahina raninai, aunohi Kou ketarina hanona a'i etai 'apuana, ua buonai ta'i 'ororo ia baura mo eabunamai taeao. <sup>16</sup> Kereibua papana ha atana Kauda abirana ahitainai taru banai raninai, tai'oro papana tatabu ahina, emai 'epi tabiri 'auna aonai aro'ari takaihai haraina. <sup>17</sup> Ba ia weiakia 'epi teberi 'auna raninai 'anaua baika aunohi ba'anai teberi banainakia tebiri 'ininakia, weiana Libia poenai bauru ai a'i metoto ta'una parae teba ririnakia mai to'o tane'ena, ba aunohi earu eao. <sup>18</sup> Kou ki'a obona hanona ekai 'inina eao wapu ibaruuanai hanona maearima ekia taba baika tekapo uhunakia. <sup>19</sup> Haeamona eao wapu ibaihaunai hanona aunohi tabana tohakia tekapokapo uhunakia. <sup>20</sup> Wapu bo'ona aokiai beraura mai bihiu ha a'i taihana mai Kou pahihina eabu a'i epua 'apua, emai raona eore taraonana a'i katamauri.

<sup>21</sup> Hau ikoikiai a'i teanianai 'apua rani ehoma'a ki'a murinai Paulo wairakiai ekoroti e'abi etibaha, "Hau ikoimiai e, wai au aia'u patona Krete ai a'i pahabeau ahi raninai, ki'a neiana a'i pahatabu ahina taba ha a'i peki'a mai taba ha a'i pahaba 'akaumana. <sup>22</sup> Ia bariu au wai nanoinimi, aomi katoba taburanakia, pokina neia hau ha ena mauri a'i ke'akauma, ia aunohi kiponamo ke'akauma. <sup>23</sup> Pokina warani rabi e'u Tirama nakuti aina hauna ena aneru eu-huna emai here'uai ekoroti, <sup>24</sup> ba e'abi etibaha, 'Paulo e, a'i kota'u. Oi hanona Kaisa wairanai kokoroti kobakai, Tirama ena banamo oi heremuai paunai maearima na-

iakia aunohiai toehe'au haukia ikoikiai katemauri." <sup>25</sup> Ua buonai hau ikoimiai aomi katoba taburanakia, au hanona Tirama naba-tohana ia ehina bena'u ihobonai kebabaina. <sup>26</sup> Iamo aika hanona kaharu kahaaeo kereibua ha ai kahabure 'au."

<sup>27</sup> Wapu ibaharau haea banya rabinai ai hanona Adria 'akupakai tabure ohomo. Wapuka'a ibuanai aunohi haukia weiana tebabataina hanopaka aba tabarina. <sup>28</sup> Buonai 'anaua tebaririna roio ena 'oura tehobona hanona roba harau rua, tamiaho 'apua homa'ana aha'i haeamona 'oura tehobo muena hanona aba emue roba harau haea ima. <sup>29</sup> Weia aunohi haukia teta'u emai aunohi piharai a'i meahu 'auna paunai to'o bani tebaririnakia, ba tenuatae perani biai. <sup>30</sup> Aunohi ai tiaka haukia tenuatae katebeau 'akauma, 'epi ha tebaririna ba tebai'oi matoha aunohi pau-nai to'o baika katebaririnakia. <sup>31</sup> Aonai Paulo huari haukia mai ekia poki hauna ehina benakia etibaha, "Hau neiakia aunohi ahnai a'i katemiaho raninai wai hanona a'i katomauri." <sup>32</sup> Ua buonai huari haukia 'epi warona tekabe hurina ba tehabona e'eho roioai earu ahina.

<sup>33</sup> Aba kerani aonai, Paulo ikoikiai enoinakia aniani ha kateana ba e'abi etibaha, "Bariu wapu harau haea bani aba teao wai hanona tobai'ima tomiaho mo taba ha a'i toana." <sup>34</sup> Bariu hana nanoinimi aniani baika katoani, katoaniani hanona mauri katoa'ina. "Aramiai bui ha hamona a'i ke'akauma." <sup>35</sup> Neiana ehinana murinai, Paulo parawa baika ea'inakia ia ikoikiai wairakiai banamo 'abina Tirama herenai ehinana murinai ehobina eani ramana. <sup>36</sup> Ikoikiai aokia ebataburanakia kipokia abomo aniani teani. <sup>37</sup> Aunohiai taehe'au haumai ikoinai hanona hinabu rua imabui harau rua 'abaihau (276). <sup>38</sup> Ikoikiai teanianai eao teani 'ari harai raninai aunohi kateba'ama 'amana hanona aniani

tekapo kapo uhunakia 'akuai.

### *Aunohi Epa'a.*

<sup>39</sup> Rani ererena aonai, hano teihana ia 'eka tabana a'i te'iobina, iamo aopaka ha poe namona teihana, ba aokia tea'ia'i haraina aunohi hanona poe weianai patebahahaha 'auna. <sup>40</sup> To'o warokia tekabe hurinakia, to'o tehabonakia 'akuai hari warona tebatataenakia ba parae teberi taeana baura kehao uta kateao poeai katebahahaha 'au. <sup>41</sup> Ia aunohi hanona rema ai ebamia'auna wairana hanona eahu to'ona a'i eibiubiu 'apua, aonai roio apa'uakia tehore aunohi murina teahu 'iti'itina. <sup>42</sup> Huari haukia ekia raona hanona wapura haukia kateahu 'arinakia pokina a'i temena'u 'au a'i temebeau 'akau-mana paunai. <sup>43</sup> Ia huari haukia ekia poki hauna enuatae Paulo kebamaurina paunai huari haukia ekia raona akana katebabaina hauna ekaibuna. Ba ehina benakia na'u te'iobina haukia katerobo uhu 'uai katena'u kateao poe. <sup>44</sup> Ia harina maikoina hanona aunohi bahana puapuakia tea'i baika aunohi tabana papakia tea'i tena'u. Ena tebabai aiho hanona ikoikiae poeai tekara'au mai namokia.

## 28

### *Paulo Melita Kereibuuanai Ekara'au.*

<sup>1</sup> Ikoimaiai namomai poeai takoroti raninai ta'iobina kereibua weiana atana hanona Melita. <sup>2</sup> Kereibua weiana haukia terabo harai heremaiai. Abara etibo mai 'ama rarina buonai ia iruba teba'arana ikoimai haumai ehiabu tea'i taeanamai. <sup>3</sup> Paulo matiu mai i'akena ea'ina iruba ahanai eholi 'auna, 'erau iruba hiabuna eonobaina hanona erobo ahi Paulo imanai e'uri to'o ekapa oreore. <sup>4</sup> Kereibua weiana haukia 'erau Paulo imanai teihana raninai ha ha te'abi tetibaha, "Pa'e hau neiana hanona ahuhu hauna, 'akuai a'i e'ari maurinai

ekara'au, bariu neiana erama hanona ena beho 'arana." <sup>5</sup> 'A Paulo eholi imanai 'erau weiana ebaure obona eao iruba aonai e'eho, ia haiara ha a'i eonobaina. <sup>6</sup> Maearima weia haukia teraonana imana kebua 'ao kebata'u ke'eho ke'ari, ia tebal'ima rani ehoma'a ia herenai taba ha a'i erama, ba aokia tebaha'eaina tetibaha, "Ia tirama mo ha."

<sup>7</sup> Ia temiaho herena tainai ua'a hanona kereibua obiana hauna atana Pubilio ena 'eka, mai aonamona ebakara'aunamai ena ituai, ba wapu aihau ai hanona ia ena baki haumai e'ima harainamai. <sup>8</sup> Weiana Pubilio hamana hanona enoti itu aonai, ena inawa hanona hau hiabu mai me'ime'i, Paulo eao ena ikaihuri aonai etoto ahanai ebahuba'ari, imana ia ahanai ehao 'au ena inawa enamo. <sup>9</sup> Hoa weiana erama murinai inawa maearimakia kereibua weiana aonai haukia ikoikiae temai ba eba namonakia. <sup>10</sup> Temariki ainamai taeara haeaihaeai ai tebanamonamai, abomo katabeau ahi raninai taearai tanuatae ainakia tabakia ikoikiae hanona teuta 'aunakia.

### *Paulo Romai Ekara'au.*

<sup>11</sup> Nawa aihau murikiae ai hanona Alesanderea aunohinai taehe 'au tabeau ahi 'akupakai. Aunohi atana hanona 'Bai'apaea', weiana hanona 'ama rarina kereibua weia etai'au emiaho. <sup>12</sup> Surakuse ai takara'au, weia tamiaho wapu aihau. <sup>13</sup> Weia emai parae takaina tabeau ahi taeao Regio ai tabahahaha 'au, erani hanona baruru eabu, ba tabeau ahi wapu ibaruuanai hanona ai Puteoli ai tabeau 'au. <sup>14</sup> Weia uaho'abaka baika tatabu ahinakia, tebaka'anamai taeao herekiae tamiaho hui hamomo, weia tamikiri hanona taeao Roma. <sup>15</sup> Uaho'abaka baika weia poumai teona hanona temai mo aiara baika wairai atakia 'Apio kawakawa 'ekana' mai 'Pariki aihau' hanona weia kipokia tabaitabu ahi. Paulo hau

neiakia eihanakia raninai Tirama  
ebanamona abomo aona ekiro.

<sup>16</sup> Roma ai takara'au raninai  
Paulo hanona ikupaiana ena 'eka  
teba haeaina, huari hauna ha ia  
ke'imana.

*Paulo Romai Pou Namona  
Eiroro aina.*

<sup>17</sup> Wapu aihau teore murikiae  
Paulo ehore Iuda te'uai aina  
haukia eaparinakia teto'u aonai,  
Paulo emikiri e'abi etibaha,  
"Uaho'aba'u ikoimiai, au eka  
maearima a'i mo abareana 'ao  
'aba'abaka ekia hoahoa a'i mo  
abakai hurina, ia au hanona  
weia Ierusalem a ia tebirina'u  
Roma haukia imakiae teutana'u.  
<sup>18</sup> Roma haukia tebakaina'u ekia  
nuatae kateba karahina'u pokina  
ki'a ha a'i tetabu ahina weia au  
ka'ari. <sup>19</sup> Ia Iuda haukia bakai  
ena 'abi tebaki'a, au hanona tebahi  
ahina'u mo Kaisa atana ahinana,  
wairanai kakoroti kabakai naho.  
'A au e'u maearima kahinahina  
ainakia hanona aha'i. <sup>20</sup> Neiana  
paunai au aparinimi kaihanimi  
mai kipokia kaha'abi'abi. Isaraela  
maearimakia ia tebuabena hauna  
buonai tabiri neiana au aha'uai."

<sup>21</sup> Ia ena 'abi tebamuenia  
tetibaha, "Oi 'abimu marerena  
weia Iudea ai ha a'i emai a'i tatabu  
ahina, 'ao uaho'abaka abomo  
ua'a ha 'abi a'i emaiaina 'ao oi  
emu babai ki'a obona ha pouna  
a'i ehinana. <sup>22</sup> Bariu ai hanona  
tanuatae oi emu raona 'abina  
kohinana aiamu kataona, pokina  
ai ta'ioina oi a'ito'u naiana  
nubabaina hauna eka maikoina  
maearima a'i tenuatae aina."

<sup>23</sup> Ba Paulo mai to'u haukia  
kipokia wapu ha teba'oruna, wapu  
weiana etaina hanona maearima  
bo'ona tera'a temai Paulo nemiaho  
'ekanai teto'u mo raurani  
eaomo erabi. Paulo ehore Tirama  
ena obia aiarana hauna robana  
eahuna maearima herekiae mai  
Iesu pouna Puka robenai tererenia  
hauna eba'iobi aina Mose  
ena rauhubu pukakia aokiae mai  
mahabanai haukia ekia pukakiae.  
<sup>24</sup> Maearima baika ena 'abi teona  
hanona aokiae eaoaina, 'a baika

hanona ena 'abi a'i tea'i taeana.  
<sup>25</sup> Aokia a'i ehamona katera'a, ekia  
ra'ai Paulo 'abi hamona neiana  
ehinana e'abi etibaha, "Auba Robe  
Isaia mahabanai hauna pinana  
hama ehina harai ki'a bahana  
'aba'abami herekiae etibaha,

<sup>26</sup> Moao maearima neiakiae  
herekiae kotibaha,  
Aia neiana kato'o o'o bena  
ia obona a'i katobo,  
katoihaiha bena  
ia a'i katoihaiha tinana.

<sup>27</sup> Pokina uru neiana haukiae aokiae  
hanona tetubu abu haiakiae  
hanona tepo'o, mahakiae te'iau.  
Ua a'i katehma raninai,  
mahakiae kateihana,  
haiakiae kateona,  
aokiae kate'iobi,  
kateraona kabe  
katekabe katemai here'u  
au mauri kabenakiae.'

Isa 6.9, 10

<sup>28</sup> Ua buonai kato'iobi haraina,  
Tirama ena bamauri 'abina  
hanona aba euhuna rama haeai  
haukiae herekiae, ia kateona."

<sup>29</sup> (Paulo ua e'abi aiho murinai  
Iuda haukiae terama otaraina,  
'a ikoikiae 'abi weiana kipokiae  
tebajira aina.) <sup>30</sup> Paulo ihau  
maikoikiae rua weia emiaho, itu  
emiaho aina hauna kipona 'arana  
ehorenia, herena temai kateihana  
haukiae ea'i taeanaakiae. <sup>31</sup> Ia Tirama  
ena obia aiarana 'abina eiroro  
aina mai Obiapaka Iesu Keriso  
pouna eba'iobi aina mai taburana,  
hau ha a'i ekaibuna.

## **Paulo Ena Marere ROMA Haukia Herekiae**

### *Puka Aona Irerena 'Abina*

Paulo ehore puka neiana ererena pokina ena nuatae hanona keao a'ikakauma haukia to'ukia baika Roma aiara apa'uana haukia keihanakia. Ena nuatae hanona keao kipokia katemiahō 'apua ba keao Speini (15.23, 24). Puka neiana aonai Paulo ehore Keriso pouna namona ehina pou haraina, mai weiakia Iesu murinai ti'au haukia ekia mauri aea katehoma.

Kori'uainai hanona banamo 'abina a'ikakauma haukia to'ukia Romai temiahō herekiae ehinana. Epuia puka 'abina anina tohana na ehina harai aihona, "pou namona aonai bero Tirama herenai emai hauna ewaira tina, kaha'i ramana a'ikakaumai keaomo puana." (1.17) Haeamona Paulo e'abi, maearima weiakia Iuda haukia 'ao rama haeai haukia ikoikiae hanona ki'a haukia. Weiana Tirama ehore ia eaoko'oai ki'anakia, eapari muenakia Iesu Keriso katea'ikakaumana haukia hanona Tirama kehore ia kebamaurinakia.

Puka iro'ana 5—8 aonai Paulo ehore Tirama ena rauhubu anina mai Auba Robe a'ikakauma haukia ekia mauri aonai hauna robakia eahunakia. Iro'ana 9—11 hanona Paulo kipona ena puma apa'uana ha robana eahuna, weiana Iuda haukia weiakia Tirama etina'anakia ia ena maearimai kateao haukia bo'ona Iesu tekamuri aina. Haeamona rama haeai haukia hanona temai Iesu i'abana haukiae teao, iamo Iuda haukia hanona aha'i. 'A Paulo ena a'ikakauma hanona muriai Iuda haukia katemai Iesu ena maearimai kateao. Puka neiana a'enai hanona Paulo ehore hoahoa mai babai weiana a'ikakauma haukia kateka'ai haukia robakia eahuna.

### *Puka Paipana Apa'uakia*

- a. Roba ahu mai 'abi'abi apa'uana. (1.1-17)
- b. Maearima bamauri katea'ina hanona taba apa'uana. (1.18 —3.20)
- c. Tirama ena bamauri taearana. (3.21—4.25)
- d. Mauri mahamahana Keriso aonai. (5.1—8.39)
- e. Isaraela haukia Tirama ena raona aonai. (9.1—11.36)
- f. A'ikakauma maurina. (12.1—15.13)
- g. 'Abi orekia mai banamo 'abikia. (15.14—16.27)

### *Paulo Ena Iuhubeau Akana Pouna Ehinana.*

<sup>1</sup> Au Paulo e'u marere neiana. Iesu Keriso ena ta'ara ia'ina hau'u, ena iuhubeau haunai kaeao pau-nai Tirama etina'ana'u eaparina'u ena pou namona kairoro aina.

<sup>2</sup> Pou namona neiana hanona Tirama ehore aba wa'i baha e'abi'uai aina ena mahabanai haukia pinakiae tehinana Puka Robena aonai tererena, <sup>3</sup> ia Nahuna pouna, eka Obiapaka weiana Iesu Keriso, hauaniae hanona Davida nininai erama, <sup>4</sup> ia aubana robenai hanona 'ariai ebamikirina raninai ebatohana mai hiabuna ia hanona Tirama Nahuna. <sup>5</sup> Iesu Keriso paunai mai ia atanai baraibarai apa'uana abomo iuhubeau hoana aba ta'ina, weiana rama haeai haukia baiatakiae maearima ikoikiae kataparinakia a'ikakaumai aia kateka'ai. <sup>6</sup> Wai abomimo weia Iesu Keriso 'eunai Tirama ehore eaparinakia haukia baiatakiae.

<sup>7</sup> Roma ai tomiahō Tirama eraona'au ainīmi eaparinimi ena maearimai ebaonimi haumi ikoimiae, Hamaka Tirama mai Obiapaka Iesu Keriso herekiae aoko'o hoana abomo baibua katoa'ina.

### *Paulo Enuatae Keao Roma.*

<sup>8</sup> E'u 'abi kori 'uaina neiana: Iesu Keriso atanai e'u Tirama nabanamona wai ikoimiae pau-miae, pokina wai emi a'ikakauma

pouna hanopaka ikoinai aba teona. <sup>9</sup> Tirama weiana Nahuna pouna namona nairoro aina aonai ta'arana na'i mai ao'u ikoinai hauna e'ioquina e'u bahuba'ari ai au wai naraonanimi, <sup>10</sup> rani ikoinai e'u bahuba'ari ai Tirama nanoina ena nuataeai taeara'u pekaikauna rani ha pawahi paianimi. <sup>11</sup> Pokina au nanuatae ki'a baha kaihanimi, auba ena beruberu kabaibenit katotabura. <sup>12</sup> Weiana hanona au mai wai kipoka kahabarainaka, eka a'ikakaumai ha ha kahataburana.

<sup>13</sup> Uaho'aba'u e, au nanuatae wai kato'ioquina, rani bo'ona anuatae kawahih heremi, buabua katabu ahi ihobona rama haeai haukia baika ekia mauri tebaibenit ahanakia 'abana, ia taba baika tehore tekaibuna'u emaimo bariu. <sup>14</sup> Au hanona pou namona ihinanai 'ara kahore maearima ikoikiai herekiai, Helene haukia mai ea aha'i haukia abomo aq 'abaea haukia mai aotipa haukia herekiai. <sup>15</sup> Weiana buonai au nanuatae ki'a baha wai Roma ai tomiaho haumi wairamiai abomo pou namona kairoro aina.

<sup>16</sup> Au pou namona a'i nahau-maea aina, pokina ia hanona Tirama ena hiabu, a'ikakauma haukia ikoikiai kebamaurinakia kori'uaina hanona Iuda haukia, muriai hanona rama haeai haukia. <sup>17</sup> Pokina pou namona aonai bero Tirama herenai emai hauna ewaira tina, kaha'i ramana a'ikakaumai keaomo puana, puka robenai tererena 'abana, "Aka bero hauna hanona a'ikakaumai kemauri."

### *Tirama Ena Opure Maearima Herekiai.*

<sup>18</sup> Maearima ekia kamuri mai babai ki'a paukiai Tirama ena opure kupai emai ewaira tina, weiakia ekia babai ki'ai 'abi tohana tihao parena haukia herekiai. <sup>19</sup> Tirama i'ioquina hanona aba emahanai harai herekiai, pokina Tirama ehore

ebaihanakia. <sup>20</sup> Hanopaka erama popounai emaimo bariu Tirama 'eunai a'i nahaihanakia tabakia ena hiabu banai banai mai ena auba maurina hanona ia ebabai tabakia aokiai tewairatina harai tehanakia te'iobinakia, weiana paunai maearima kebuniai hanona taearana aha'i.

<sup>21</sup> Tirama te'ioquina iamo a'i tea'i taeana abomo a'i tebanamonina ia hanona Tirama, ia ekia ao 'abaea mai ekia ao po'oai wapura ehore aokia ekaibuna. <sup>22</sup> Ia kipokia teraonana teaotipa, iamo po'o haukiai teao. <sup>23</sup> Miao banai banai Tiramana ikuti aina tehabona, ia maearima aubaubakia a'i katemimaho banai banai haukia, roborobo, mahi, mai tikara tabakia haukia, aubaubakia imakiai tebabai tabakia tekuti ainakia.

### *Maearima Aka Ki'a Obokia Haeai Haeai Tibabai.*

<sup>24</sup> Weiana buonai Tirama ehore aokiai ki'a tenuatae ainakia 'ekanai ehabonakia, weiana kipokia ekia babai ki'a obokia parikia akakia katebabai ha ha herekiai. <sup>25</sup> Tirama ena 'abi tohana hanona ia tehore bai'oi tabanai tebaona, iamo 'ekanai hanona taba ebarama tabakia tekutai ainakia ta'arakia tea'i. Iamo ebabainakia hauna ia ikupaina kahabanamonina keaomo banai banai. Amen.

<sup>26</sup> Tirama ehore ehabonakia teao ekia babai ki'a obokia aonai. Ekia babi'e tehore babi'e tenabau ainakia weiana ua a'i pehoma hauna tebabaina. <sup>27</sup> Taeara ihobonai hau abomo babi'e kipokia hawainibena tehabona, ia hau tehore hau tenuatae ai ki'anakia. Hau kipokia 'abakia herekiai babai ki'a obokia tebabai. Weiana hanona ekia babai ki'a 'arana kipokia pumana tehoa aina.

<sup>28</sup> Ia tehore aokiai Tirama iraona 'ininai a'i tenuatae aina, weiana Tirama ehore ekia ao 'abaea ehabonakia, a'i patebabai akakia tebabai. <sup>29</sup> Aka ki'a obokia haeai haeai aokia tebonu, babai ki'a obokia, uhore mai raona

ki'a obokia, wamuru, ahuahu, 'au, bai'oi mai ao bahaiara akakiai tebonu. <sup>30</sup> Teuahuiahi, mai 'abi'abiai ha ha atakia tia'i ki'anakia, Tirama ti'oatana, tiaiahu 'abaea, tiapa, abomo tibaro'e, raona ki'a obokia 'eka baikai tiraonanakia katebabai. Hamakia mai hinakia aiakia a'i tio'o. <sup>31</sup> Ia hanona ekia raonaraona aha'i, ekia 'abi'uai a'i tibatohanakia, mai maearima herekiai namo 'ao aoko'o a'i tiba ihanakia. <sup>32</sup> Tirama ena rauhubu aba te'iorina maearima 'eka ua homanai temiaho haukia hanona kate'ari. Ia ki'a weiakia tibabai to'o baihanakia abomo maearima baika tibabai raninai tiaonamo ainakia.

## 2

### *Tirama Ena Bakai Berona.*

<sup>1</sup> Weiana buonai 'abiai hau ha behoai nuhorotina haumu, emu bero 'abina ha aha'i. Oi 'abiai hau ha behoai nuhorotina hanona kipomu puma nubeni'o. Pokina ia behoai ohorotina akana ihobonai oi abomo nubabaina. <sup>2</sup> Aika ha'iorina Tirama hanona mai ena bero ua tibabai aiko haukia behoai kehorotinakia. <sup>3</sup> Weiana oi 'abiai hau ha behoai nuhorotina ia akana ihobona nubabaina haumu, oi nuraonana Tirama behoai kehorotini'o 'ekanai aba kokapare, u? <sup>4</sup> 'Ao aehoma a'i o'iorina Tirama ena namo apa'uana weiana ehore e'uai aini'o raona kabe taearanai ena namo apa'uana, ena baiha hao mai ena bakiro oihā ta'erainakia? <sup>5</sup> Ia aomu etubu, emu raona kabe aha'i paunai oi kipomu emu puma nubararona, Tirama ena opuere mai ena bero bakai beraurana kekara'au raninai emu puma weia kewairā tina. <sup>6</sup> Tirama kehore maearima ha ha ekia babai ihobohobokiai arakia kebenakia. <sup>7</sup> Maearima baika aka namokiai tibapahihi haukia abomo nuabi mai mariki abomo a'i kepua maurina titabuna haukia hanona Tirama kehore mauri banaibanai kebenakia. <sup>8</sup> Ia maearima baika

tiani ki'a mai 'abi tohana tibaoaq aina, aka behokia tia'i taeanakia haukia hanona Tirama ena opuere mai ena puma ahakiai kebaririna.

<sup>9</sup> Aka ki'a obona tibabaina haukia ikoikiai hanona atetua mai haiara katehoaina Iuda haukia mo aha'i rama haeai haukia abokia mo. <sup>10</sup> Ia aka namona tibabaina haukia ikoikiai hanona Tirama kehore nuabi, mariki mai baibua kebenakia, kori'uaina hanona Iuda haukia, muriai hanona rama haeai haukia. <sup>11</sup> Pokina Tirama hanona maearima ha a'i nitaina.

<sup>12</sup> Mose ena rauhubu kape-nai temiaho haukia tiaka ki'a hanona weianai aka ki'a ha-iarana katea'ina, 'a rauhubu aonai temiaho haukia tiaka ki'a hanona rauhubu kebabakainakia.

<sup>13</sup> Rauhubu uruna tio 'abaeana haukia hanona Tirama wairanai bero a'i katea'ina, ia rauhubu akana tibabaina haukia hanona berokia kehinana. <sup>14</sup> Rama haeai haukia herekiai Mose ena rauhubu aha'i, ia aokiai rauhubu hoana ihobona tebabaina raninai, rauhubu herekiai aha'i re'a, ia kipokia rauhubuai teao.

<sup>15</sup> Ia aokiai rauhubu 'abina tererena hauna ekia hoahoai niwairā tina aokia abomo weiana nibatohana, ekia raonaraona weiana nihore behokia nehinana 'ao berokia nehinana. <sup>16</sup> Pou namona airoro aina ihobonai, beraurana kekara'au raninai Tirama kehore maearima ekia raona bunikia kebakainakia Iesu Keriso paunai.

### *Iuda Haukia Teraonana Rauhubu Kebarinakia.*

<sup>17</sup> Ia wai kipomi tu'abi Iuda haumi, rauhubuai tukori 'ini abomo Tirama tuapaina, <sup>18</sup> abomo Tirama taba nenuatae aina hauna to'iorina mai bero nimai 'ekana to'iorina pokina wai rauhubu tomare aina. <sup>19</sup> Turaonana wai hanona maha'iau haukia ibaka'a haraikia mai wapurai temiaho haukia ekia ea <sup>20</sup> abomo po'o haukia irobekia mai a'i temarere haukia iba'iohikia haumi, pokina rauhubu aonai aotipa mai 'abi

tohana maikoinai totabu ahinakia.<sup>21</sup> 'Abami tuba'ibinakia ia ae-homa wai kipomi a'i tubatohana? Toiroro a'i katebainao, ia wai tubainao?<sup>22</sup> Tu'abi a'i katenabau, ia wai tunabau? Kaiba'uku 'arikia a'i tu'ari, ia wai ro'e\* aona tabakia tubainao ainakia?<sup>23</sup> Wai rauhubu nemiaho paunai tuapa, ia rauhubu tukabena hanona Tirama atana tua'i ki'ana.<sup>24</sup> Puka robena aonai e'abi, "Wai Iuda haumi paumiai rama haeai haukia Tirama atana tia'i ki'ana."

<sup>25</sup> Rauhubu koka'ai haraina raninai emu itare hanona namo kebeni'o, ia rauhubu kokabena raninai oi hanona ihobona itare a'i oa'ina 'abana. <sup>26</sup> Rama haeai hauna ha a'i tetarena ia Tirama ena rauhubu 'abina keka'ai haraina raninai Tirama kehore itare ea'ina haunai kebaona. <sup>27</sup> Weiana hauanai a'i etarena ia rauhubu eka'ai haraina hauna kehore oi Iuda haumu behoai kehorotini'o, pokina rauhubu tererena hauna heremuai abomo itare oa'ina ia rauhubu nukabena. <sup>28</sup> Maearima hauanai ihaihana Iuda hauna ia Iuda hauna tohana aha'i abomo hauanai itare tea'ina hanona itare tohana aha'i. <sup>29</sup> A aona nibamaha mahana hauna ia hanona Iuda hauna tohana, abomo itare hanona aoai kebabaina Auba Robeai, ia rauhubuai aha'i. Maearima uahomana hanona banamo Tirama herenai kea'ina, ia maearima herekiae aha'i.

### 3

#### *Tirama Ikupaiana Keibatoha.*

<sup>1</sup> Uahomana raninai Iuda haukia ekia namo hanona taba? Itare ena namo hanona taba? <sup>2</sup> Taeara bo'okiai. Kori 'uaina hanona Tirama ena 'abi Iuda haukia herekiae ehorotina kate'imana. <sup>3</sup> Weiana baika ekia a'ikakauma peaha'i raninai aehoma? Ekia a'ikakauma aha'i buonai Tirama kipona ena 'abi'uai a'i kebatohana, u?<sup>4</sup> Ua a'i kehoma. Maearima ikoikiae katebai'oi,

ia Tirama ikupaiana keibatoha. Puka robenai tererena ihobona, "Emu 'abiai kobatohani'o obero. Weiana kateba bakaini'o raninai kotara haonakia."

Sal 51.4

<sup>5</sup> A aika eka ki'a kehore Tirama ena babai berona kebawaira tinana raninai, taba na kahahoma? Weiana Tirama puma 'ekanai nihorotinaka hanona nibeho, u? Aha'i. Ua a'i kehoma. (Neiana hanona maeearima ekia raonaraona nahinana.) <sup>6</sup> Ua homana aha'i. Tirama a'i kebero raninai, hanopaka aea kebabakai aihona? <sup>7</sup> Baika te'abi, "Au e'u bai'oi pehore Tirama ena 'abi tohana pebawaira tinana abomo ena nuabi pebapa'uana raninai, taba buonai au aka ki'a pumana kahoaina ki'a hauna 'abana?" <sup>8</sup> Baika ai tekai ahi 'abaaeanamai te'abi ai hanona na ta'abi aiho, "Namo ibaramana paunai ki'a akakia kahababai." Ekia bai'oi pumana katehoaina hanona kenamo.

#### *Hau Ha A'i Ebero Ki'a Baha.*

<sup>9</sup> Uahomana raninai taba na kahahoma? Aika Iuda hauka hanona hanamo ba rama haeai haukia? Aha'i 'akina. Pokina Iuda mai rama haeai haukia hanona ki'a aonai nahamiaho 'abina aba hahinana. <sup>10</sup> Puka Robenai tererena ihobonai,

"Maearima ha a'i ebero ki'a baha Tirama wairanai, tai ha aha'i 'akina.

<sup>11</sup> Abomo ao bero hauna ha aha'i, Tirama itabuna hauna ha aha'i.

<sup>12</sup> Ikoikiae aba tekaobo aba ki'a aonai tetoto haeamo aka namo hauna ha aha'i, tai ha aha'i.

Sal 14.1-3

<sup>13</sup> Ekia 'abi timikia hanona teki'a matoha 'ariahana ikaikau, maeakia bai'oi 'abikia tehinanakia.

Pinakia 'abinai hanona 'abakia tibahaiarakia matoha 'erau ekia ba'ari muramurana 'abana.

Sal 5.9

<sup>14</sup> Pinakia hanona ururu mai aomabi

\* 2:22: (22) marea robe

'abikia tebonu.

Sal 10.7

15 Ia tinoanoa maearima kateba haiaranakia mai kateahu 'ari-nakia.

16 'Eka tabana kateao hanona maearima kateba 'oatanakia mai kateba atetuanakia.

17 Abomo baibua taearana hanona a'i te'io bina.

Isa 59.7, 8

18 Tirama a'i titauai 'apuana."

Sal 36.1

19 Aika ha'io bina rauhubu taba ne'uahina hanona weia kia rauhubu ba'anai temiaho haukia nehina benakia, weianai maearima ekia ba'amé 'abikia aha'i, hanopaka maikoinai Tirama ena bakai aonai katetoto.

20 Tirama wairanai hau ha a'i ebero rauhubu ika'ai haraina paunai, ba rauhubu hanona keba'io binaka aika ki'a hauka.

*Maearima Kea'ikakauma Hauna Berona Kateginana.*

21 Bariu Tirama maearima bero kebenakia taearana aba ebawaira tinana, rauhubuai aha'i, weianai hanona rauhubu mai mahabanai haukia tebatohana. 22 Bero Tirama herenai nimai hanona Iesu Keriso tia'ikakaumana haukia ikoikiai katetabu ahina maearima ikoinal herekiai ha a'i ehaeai. 23 Pokina ikoikiai aba teaka ki'a, buonai Tirama ena nuabiai tetara kapu. 24 Iamo Tirama ena aoko'o hoana ebaiben'i abaea, ikoinal bero tea'ina Keriso Iesu paunai, pokina ia ehore ekawa muenakia. 25 Tirama ehore Iesu eu huna emai hanopakai e'ari baibua hoanai eao, Iesu e'ari eka ki'a paunai hauna kaha'ikakaumana hauka eka ki'a kehina hao. Neiana ebabaina hanona ena bero ebaixa baiha aina. Aona ea'i 'inina, 'uainai maearima teaka ki'a haukia eiha haonakia puma a'i ebenakia.

26 Bariu rani neianai Tirama hoa weianai ebabaina kipona ena bero ebaixa baiha aina, taeara weianai Iesu tia'ikakaumana haukia abomo bero kebenakia.

27 Uahomana raninai taba hauna kahapaina? Ba taeara

tabanai? Rauhubu ika'ainai? Aha'i. Taba ha ai aha'i. Ia a'ikakauma taearanai. 28 'Abi tohana aika ha'io bina Tirama maearima a'ikakaumai bero nibenakia, ia rauhubu ika'ainai aha'i.

29 Tirama hanona Iuda haukia mo ikupaiakia ekia Tirama, u? Ia rama haeai haukia ekia Tiramai a'i keao, u? Aha'i. Ia rama haeai haukia abokia mo ekia Tirama.

30 Weiana Tirama hanona hamona itare haukia a'ikakaumai bero kebenakia mai itare aha'i haukia abomo a'ikakauma ihobonai bero kebenakia. 31 Ua homana raninai aika hanona a'ikakauma neianai rauhubu nahaba 'akaumana, u? Aha'i 'akina. Aika hanona rauhubu nahabakori 'inina.

## 4

*A'ikakauma ai Aberahamo Bero Hauna.*

1 Uahomana raninai taba kaha'uhina 'aba'abaka Aberahamo 'eunai? A'ikakauma hoana hanona aea etabu ahi aihona? 2 Aberahamo ena aka paukiai bero haunai peao raninai, taba weia kia paukiai peapa, ia Tirama wairanai aha'i. 3 Puka robena taba na ehoma?

"Aberahamo hanona Tirama ea'ikakaumana paunai Tirama ehore ia bero haunai ebaona."

Gen 15.6

4 Aka hauna mai 'arana weianai hanona beruberu tabana aha'i, ia ena hau haiara 'arana.

5 Hau ha aka namona a'i nibabaina, ia Tirama nihore ki'a hauna bero nibaiben'i Tiramana nia'ikakaumana hauna hanona ena a'ikakauma paunai bero haunai kebaona. 6 Maearima aka paunai bero a'i tea'ina ia Tirama herenai bero tea'ina haukia ekia namo 'abina neiana Davida ehinana.

7 "Weia kia ekia aka ki'a obokia ehina hao mai ekia ki'a ea'i obo haukia hanona tenamo.

8 Obiapaka kehore ekia ki'a a'i ketuabi haukia hanona tenamo."

## Sal 32.1, 2

<sup>9</sup> Banamo neiana hanona tetarenakia haukia mo katea'ina 'ao a'i tetarenakia haukia abokiamo katea'ina? Aika aba ha'abi, "Aberahamo ena a'ikakauma paunai Tirama ehore berona ehinana." <sup>10</sup> Rani tabanai bero haunai ebaona? Itare wairanai 'ao murinai? Tirama Aberahamo ena bero ehina 'uaina ba tetarena. <sup>11</sup> Aberahamo hanona a'i tetare bahana aonai ena a'ikakaumai bero ea'ina, muriai tetarena, weiana hanona a'ikakauma hoana ibatohana. Ua buonai Aberahamo hanona mai ekia a'ikakauma haukia weiakia Tirama bero haukiai ebaonakia haukia ikoikiae hamakia. <sup>12</sup> Ba tetarenakia haukia abomo hamakia hanona Aberahamo. Ia tetarenakia haukia maikoikiae aha'i, baika hamaka Aberahamo a'i tetare bahana aonai ea'ikakauma, taearana weiana ihobonai kateka'a haukia hamakia.

*Kaha'ikakauma Hanona  
Tirama Ena 'Abi'uai Kaha'ina.*

<sup>13</sup> 'Abi'uai hanona ebaibeni Aberahamo mai 'aba'abana kipokia hanopaka maikoinai katea'ina ia 'eukia, weiana hanona rauhubu paunai a'i ebena, ia bero weiana a'ikakaumai nimai hauna paunai ebena. <sup>14</sup> Pokina rauhubu tia'i taeana haukia 'abi'uai patea'ina ia 'eukiae peao raninai a'ikakauma hanona ena namo aha'i, 'abi'uai abomo anina aha'i. <sup>15</sup> Rauhubu nikabena hanona Tirama ena opuere nibaramana, ia rauhubu peaha'i raninai beho atetuakia abomo pateaha'i.

<sup>16</sup> Weiana buonai 'abi'uai hanona a'ikakaumai nimai baraibarai apa'uana ihobona, Aberahamo 'aba'abana ikoikiae katea'ina, rauhubu tika'ai haraina haukia mo aha'i, ia Aberahamo ea'ikakauma ihobonai tia'ikakauma haukia ikoikiae herekiae. Pokina Aberahamo hanona aika ikoikai hamaka. <sup>17</sup> Puka robenai na terere ai-hona, "Au oi hanopaka bo'ona

hamakiae nabaoni'o." Ua buonai Aberahamo hanona aika hamaka Tirama wairanai. Aberahamo ehore Tirama weiana 'ari haukia ebamaurinakia abomo a'i terama tabakia ebaramanakia hauna ea'ikakaumana.

<sup>18</sup> Tirama Aberahamo miori kebena weiana raona ikoinai anikia aha'i 'ekanai Aberahamo hanona ea'ikakauma ena raona ikoinai, ua buonai ia hanona hanopaka bo'ona hamakiae eao, Puka robenai e'abi ihobona, "Aba'abamu hanona bihiu 'abana ua kebo'o aaho." <sup>19</sup> Aberahamo ihauna hanona hinabu hamomo buonai eonobaina matoha 'ari hauna 'abana mai Sara abomo miori kebaramana 'ekana aha'i, ia Aberahamo ena a'ikakauma hanona a'i eba'abe'abena.

<sup>20</sup> Weiana Aberahamo Tirama ena 'abi'uai aona a'i ebakai'au kai'auna ena a'ikakaumai ekori 'ini weianai etabura Tirama ebanamona. <sup>21</sup> Haeamona e'lobi haraina Tirama hanona mai hiabuna ena 'abi'uai kebabaina. <sup>22</sup> Neiana buonai, "Tirama Aberahamo ena a'ikakaumai eba tohana, bero haunai ebaona."

<sup>23</sup> Ia ebatohana bero haunai ebaona 'abina tererena hanona Aberahamo ikupaiana paunai aha'i. <sup>24</sup> Ia aika abomo bero haukai kebaonaka pokina Iesu eka Obiapaka, 'ariai ebamikiri muena Tiramana naha'ikakaumana paunai. <sup>25</sup> Tirama Iesu ebaibeni aina e'ari aika eka ki'a paunai, haeamona ebamikiri muena emauri aika bero kebenaka paunai.

## 5

*Beroka Ehinana Paunai Ka-haonamo.*

<sup>1</sup> Weiana eka a'ikakaumai bero ha'ina buonai Tirama kipokia baibuai kahamiaho Iesu Keriso eka Obiapaka paunai. <sup>2</sup> Aika naha'iohina a'ikakauma taearana weianai hatoto ia paunai aoko'o hoana neiana aonai aba nahamiaho, raona apa'uana weiana Tirama ena nuabi aonai kahatoto hauna nahaonamo aina. <sup>3</sup> Weiana mo aha'i, ia haiara ranikiae abomo

nahaonamo, pokina na ha 'iobina haiara nihore bakiro nibaramana,<sup>4</sup> Bakiro nihore rabo harai nibaramana, abomo rabo harai nihore raona apa'uana nibaramana.<sup>5</sup> Raona apa'uana neiana hanona abiabika a'i kea'i ki'ana, pokina Tirama ena raona'au Auba Robeai eheina aika aokai, Auba Robe weiana hanona Tirama ebaibenai aika 'euka.

<sup>6</sup> Aika kipoka bero kahatabuna a'i etaina aonai Tirama enuatae ranina tohanai Keriso e'ari aka ki'a hauka paukai. <sup>7</sup> Hau ha bero hauna paunai ke'ari hanona kepahihi. Pa'e baika katenuatae re'a namo hauna paunai kate'ari. <sup>8</sup> Ia ki'ai hamiaho oho aonai Keriso e'ari aika paukai, Tirama ena raona'au ua ebaiha aihonaka. <sup>9</sup> Ua buonai Keriso e'ari aruarunai Tirama bero ebenaka. Aika naha'iobi haraina ia paunai Tirama ena opuere aonai kebamaurinaka. <sup>10</sup> Aika hanona Tirama ena 'ou haukai haeao aonai Nahuna e'ari paunai kipokia habaibua, aba habaibua hauka naha'iobi haraina Keriso ena mauriai kebamaurinaka. <sup>11</sup> Weiana mo aha'i, aika abomo Tirama aonai nahaonamo eka Obiapaka Iesu Keriso paunai bariu aika Tirama kipokia aba habaibua.

#### *Adamu 'Eunai 'Ari Emai Ia Keriso 'Eunai Mauri Emai.*

<sup>12</sup> Hau hamona paunai ki'a hanopakai etoto, ki'a ehore 'ari etoto aina, ua buonai 'ari emai maearima ikoikiai herekia, taeara weianai ikoikiai teaka ki'a. <sup>13</sup> Ki'a hanona aba erama 'uai hanopakai, ba rauhubu tebaibenai. Rauhubu aha'i paunai ki'a hanona ki'ai a'i tebaona. <sup>14</sup> Ia 'ari hanona epoki Adamu ena raniai emai mo Mose ena raniai, maearima ikoinal Adamu ena aka ki'a ihobonai a'i tebabai ki'a haukia abomo te'ari.

Ua buonai Adamu hanona muriai kemai hauna ibabataina. <sup>15</sup> Ia Tirama ena beruberu hanona Adamu ena ki'a 'abana aha'i. Pokina hau hamona ena ki'a

paunai maearima bo'ona te'ari, ia Tirama ena aoko'o hoana hanona eapa'ua ki'a baha, Adamu ena ki'a etara haona weiana hanona ena aoko'o hoana beruberuna hau hamona Iesu Keriso paunai bo'ona katemauri. <sup>16</sup> Haeamona Tirama ena beruberu apa'uana mai hau hamona ena babai ki'a terarua hanona a'i teihobo, hau hamona ena babai ki'ai beho bakaina emai, ia beruberu apa'uana emai bero ebaramana. <sup>17</sup> Hau hamona ena aka ki'a paunai 'ari ehore epoki ainakia, aika naha'iobi haraina weiakia Tirama ena aoko'o hoana apa'uana eba'oruna hauna mai bero beruberuna katea'ina haukia mauri banaibana aonai katepoki hau hamona Iesu Keriso paunai.

<sup>18</sup> Weiana buonai hau hamona ena aka ki'ai maearima ikoikiai puma tea'ina, abomo hau hamona ena aka beroai bero emaiaina maearima ikoikiai mauri banaibana ebenakia. <sup>19</sup> Hau hamona ena aia o'o aha'i paunai maearima bo'ona ki'a haukiai teao, abomo hau hamona ena aia o'oai maearima bo'ona bero haukiai kateao.

<sup>20</sup> Rauhubu ekori hanona maearima ekia ki'a katejha haraina ia ekia ki'a eapa'ua hao apa'ua hao. Ia ki'a eapa'ua 'ekanai Tirama ena aoko'o hoana hanona eapa'ua haonakia. <sup>21</sup> Weiana buonai ki'a epoki 'ari taearanai abomo Tirama ena aoko'o hoana bero taearanai kepoki keaoainaka mauri banaibana 'ekana Iesu Keriso eka Obiapaka paunai.

## 6

#### *Ki'a 'Eunai Kaha'ari Ia Keriso 'Eunai Kahamauri.*

<sup>1</sup> Uahomana raninai aika 'abi tabana kaha'uhina? Tirama ena aoko'o hoana keapa'ua paunai ki'a kahababai to'o baihana, u? <sup>2</sup> Ua a'i kehoma. Aika ki'a herenai aba ha'ari ki'a hiabunai hakaobo ba aehoma buonai ki'a aonai kahamiaho mue? <sup>3</sup> Aika Keriso Iesu kipokia aba eba'uere robennaka hauka hanona ena 'ariai

abomo kipokia aba eba'uere robe haeamonaka, weiana a'i to'io bina, u? <sup>4</sup> Ua buonai 'uere robeai aika hanona ia kipokia ha'ari abomo ia kipokia tehorenaka, weiana Keriso Hamana nuabina hiabunai 'ariai ebamikiri muena. Ua buonai aika abomo mauri mahamahanai kahamiaho.

<sup>5</sup> Aika ia kipokia ha'ari haeamo raninai ia 'ariai emikiri mue ihobonai aika abomo 'ariai kahamikiri mue. <sup>6</sup> Aba ha'io bina aika hauka 'ai'aina \*Keriso kipokia matiu ibiri ropo 'ubinai aba te'ari hanona hauka ena ki'a hiabuna aba weia ia'i obo, ba aika hanona ki'a ta'arana a'i kaha'i mue. <sup>7</sup> Pokina e'ari hauna hanona ki'a hiabunai aba irubu.

<sup>8</sup> Bariu aika Keriso kipokia ha'ari raninai, na ha'iobi tohana aika hanona ia kipokia kahamiaho oioi. <sup>9</sup> Pokina na ha'iobi bina Keriso hanona 'ariai emikiri mue ba a'i ke'ari mue, 'ari hanona ia a'i kepoki ai muena. <sup>10</sup> 'Ari ia e'ari aina hauna hanona ki'a ikoikiai kebaorenakia paukiai rani hamonai e'ari, ia mauri nimauri aina hauna hanona Tirama nuabina paunai nimauri. <sup>11</sup> Taeara ihobonai wai abomimo kipomi kato'i obinimi, ki'a herenai aba to'ari, ia Tirama 'eunai aba tomauri Keriso Iesu aonai.

<sup>12</sup> Weiana buonai ki'a kehore hauanimi ke'ari hauna a'i kepoki aina ena nuatae akakia ki'a obokia a'i katoa'i taea. <sup>13</sup> Abomo hauanimi papana ha ki'a aonai a'i katohorotina, ki'a akakia tabanai a'i keao, ia kipomi katobaibenai ainimi Tirama herenai ihobona weiakia 'ariai temauri mue haukia 'abana, hauanimi maikoina katabena, ia kehore bero akakia tabanai kebaonimi. <sup>14</sup> Ki'a hanona wai emi poki haunai a'i keao, pokina wai hanona rauhubu ba'anai a'i tomiaho, ia Tirama ena aoko'o hoana ba'anai tomiaho.

### Bero Tohana Ta'arana Kaha'i.

\* **6:6:** (6) 'ao eka mauri 'ai'aina † **6:23:** (23) 'ao aonai

<sup>15</sup> Ba aea kahahoma? Rauhubu ba'anai a'i nahamiaho ia Tirama ena aoko'o hoana ba'anai nahamiaho buonai ki'a kahababai, u? Aha'i 'akina. <sup>16</sup> Wai aba to'io bina weiana kipomi tubaibenai ainimi hau ha herenai aiana tuona raninai ena ta'ara ia'inai tuao 'abana. Ua buonai ki'a ena ta'ara ia'inai niao ainimi 'ari 'ekana 'ao Tirama aiana ionai niao ainimi bero 'ekana. <sup>17</sup> Tirama kahabanamona. Pokina 'uainai wai hanona ki'a ena ta'ara ia'inai toao, ia bariu wai aomi maikoina teba'obinimi 'abina weiana toa'i taeana. <sup>18</sup> Wai ki'a herenai aba eirubunimi, bariu bero ena ta'ara ia'inai tuao. <sup>19</sup> Maearima 'abi'abinai na'abi pokina aomi a'i niea paunai. 'Uainai hauanimi tobabenai qina aka ki'a obokia mai ripuripi ta'arakia ia'inai toao ihobonai, bariu hanona hauanimi bero ena ta'ara ia'inai tomobaibenai, wai katorobe.

<sup>20</sup> Wai ki'a ena ta'ara ia'inai toao aonai wai hanona bero tohabo 'abaeana. <sup>21</sup> Rani weiakiai aka ki'a obokia buabuakia hanona taba totabu ahina? Bariu tuhau-maeai tabakia mo. Taba weiakia puakiai hanona 'ari. <sup>22</sup> Ia wai bariu hanona ki'ai aba irubu obo, ba Tirama ena ta'ara ia'ina hau-miaeai tuao. Ua buonai buabuami hanona robe taearana tohanai, puanai hanona mauri banaibana. <sup>23</sup> Pokina ki'a 'arana hanona 'ari, ia Tirama ena beruberu apa'uana hanona mauri banaibana Keriso Iesu aika eka Obiapaka kipokia.†

## 7

### Keriso Rauhubu ai Erubunaka.

<sup>1</sup> Uaho'aba'u e, au hanona wai rauhubu to'io bina haumi nahina benimi, wai aba to'io bina rauhubu hanona maearima nipoki aina maurina nemiaho aonai mo. <sup>2</sup> Rauhubu paunai babi'e ha atawana herenai kemiaho hau ena mauri beraurakia ikoikiai, ia hau ke'ari raninai ia hanona hawainibe rauhubuna herenai

aba irubu ta'i. <sup>3</sup> Weiana buonai hau nemiaho oho aonai babi'e kemikiri hau haeai ha keatawana raninai ia hanona nabau babi'ena kahahinana. Ia hau ke'ari raninai ia hanona rauhubu herenai aba irubu ta'i. Hau haeai ha keatawana re'a ia nabauna a'i kahahinana.

<sup>4</sup> Weiana buonai uaho'aba'u e, wai abomo Keriso ena 'ari paunai rauhubu 'eunai to'ari, ba Keriso 'ariai emikiri hauna herena tuao, buabuaka katerama Tirama 'eunai. <sup>5</sup> Aika hauani ena nuataeai hamiaho aonai, raona ki'a obokia terama rauhubu 'eunai teaka hauanikai ba buabuakia habaramanakia puana hanona 'ari. <sup>6</sup> Ia aika ebiri 'ininaka tabana herenai aba ha'ari buonai bariu rauhubu herenai aba terubu ta'inaka, weiana buonai aika hanona taeara mahamahana Auba Robe 'eunai ta'ara kaha'i, ia rere rere 'ai'ainai aha'i.

### *Ki'a Ehore Eba'arinaka.*

<sup>7</sup> Ua buonai taba kaha'uahina? Rauhubu hanona eki'a? Aha'i 'akina. Rauhubu ehore au eba'iochina'u ki'a hanona taba. Rauhubu a'i kehina bena'u, "Oi taba ha a'i konuataeai 'abaeaana." raninai, au a'i ka'iochina nuatae 'abaea hanona taba. <sup>8</sup> Ia ki'a ehore taeara'u etabu rauhubu 'abinai weia nuatae 'abaea haeai haeai ao'uai ebaramanakia, ia rauhubu keaha'i raninai, ki'a hanona e'ari 'abana ena hiabu aha'i. <sup>9</sup> Uainai au hanona rauhubu a'i a'iochina aonai araonana namo'u ai amauri amiaho, iamo rauhubu 'abinai a'iochina aonai ki'a hanona aiha tinana emauri mauri, au hanona a'ari 'abana. <sup>10</sup> Rauhubu neiana hanona mauri ebaianaka tabana, ia au 'eu'uai ia hanona 'ari tabanai eao. <sup>11</sup> Pokina ki'a ehore taeara'u etabu rauhubuai e'oina'u ba 'ari hau'u ai ebaona'u.

<sup>12</sup> Ia rauhubu kipona hanona erobe, rauhubu 'abinai kipona abomo erobe, weiakia hanona tebero mai tenamo. <sup>13</sup> Uahomana raninai taba namona weiana hauna ehore au e'u 'ari tabanai eao, u? Aha'i 'akina. Rauhubu

'abinai namonai ki'a ehore au here'uai 'ari ebaramana buonai, ki'a hanona i'obi haraiai keao, rauhubu 'abinai paunai ki'a hanona ki'a tohanai eao.

### *Ki'a Eka Mauri Nipoki aina.*

<sup>14</sup> Ha'iohina rauhubu hanona Tirama 'eunai emai, ia au hanona hauani 'eunai aeao, ki'a ehore ekawana'u ena ta'ara ia'ainai naeao. <sup>15</sup> Au taba nababaina hauna obona a'i naobo, pokina nanuatae aina kababaina hauna a'i nababaina, ia taba 'arina a'i na'ari hauna nababaina. <sup>16</sup> Rauhubu ehore namo mai ki'a ebaianaka. Ba taba a'i nanuatae aina hauna nababaina raninai, au nabatohana rauhubu hanona enamo. <sup>17</sup> Ua buonai nababaina hanona au kipo'u toha'u aha'i, ia ki'a ao'uai nemiaho hauna. <sup>18</sup> Au na'iohina taba ha namona ao'u ai a'i nemiaho, weiana hauani'u ena nuataeai a'i nemiaho, pokina au taba namona nanuatae aina kababaina ia ibabainai hanona a'i nitaina. <sup>19</sup> Aka namona nanuatae aina kababaina hauna a'i nababaina, haemona aka ki'a obokia ibabaikia a'i nanuataeai haukia nababai to'o baihana. <sup>20</sup> Ia taba a'i nanuatae aina hauna nababaina raninai, nibabaina hauna hanona au toha'u aha'i, ia ki'a ao'uai nemiaho hauna niaka.

<sup>21</sup> Weiana au aka taearanha atabu ahina, au e'u nuatae aka namona kababaina, ia aka ki'a obokia mo tiwaira tina. <sup>22</sup> Ao'u tohana Tirama ena rauhubu niaonamo aina. <sup>23</sup> Ia hauani'u ai rauhubu haeai niaka aihana, rauhubu weiana rauhubu ao'uai nemiaho hauna nehuarina, weiana hanona hauani'u ai niaka ki'a ena rauhubu ba'anai nebirina'u nibawapurana'u. <sup>24</sup> Au ki'a'u, aoko'o'u! Tai kehore au hauani'u neiana niaoaina'u 'ari 'ekanai hauna herenai kebamaurina'u?

<sup>25</sup> Ia Tirama napaina Iesu Keriso eka Obiapaka eba maurina'u paunai. Ua buonai e'u mauri hanona nahomana, au ao'u tohana hanona Tirama ena rauhubu ta'arana ia'ainai niao, ia

hauani'u hanona ki'a ena rauhubu  
ta'arana ia'inai niao.

## 8

### *Keriso Eka Ki'a Ea'i Obo Ia Auba Robe Ebenaka.*

<sup>1</sup> Weiana buonai bariu Keriso Iesu aonai temiaho haukia hanona puma ha a'i katehoaina.

<sup>2</sup> Pokina Keriso Iesu paunai Auba Robe rauhubuna mauri nimaaina hauna ehore ki'a mai 'ari rauhubuna 'eukiae aba erubu obona'u. <sup>3</sup> Hauani ena 'abe'abe paunai rauhubuai a'i ketaina 'ekanai Tirama ehore ebabaina. Ia ehore Nahuna hamomona euhuna, ki'a hauna 'abana ki'a 'aranai eao, maearima ekia puma ikoinai ehoaina. <sup>4</sup> Weiana hanona aika hauani ena aka ki'a obokia a'i nahababai, Auba Robe ena nuataeai nahamiaho hauka aokai rauhubu ena nuatae bero akana kebaore haraina.

<sup>5</sup> Hauani ena nuataeai temiaho haukia hanona hauani tabakia mo tiraonanakia, ia Auba Robe ena nuataeai temiaho haukia hanona Auba Robe ena aka tabakia tiraonanakia. <sup>6</sup> Hauani ena raona ke'uai aina puana hanona 'ari, ia Auba Robe ena raona ke'uai aina puana hanona mauri banaibainai mai baibua. <sup>7</sup> Hauani ena raona ne'uai aina hanona Tirama ni'oatana, pokina weiana hanona Tirama ena rauhubu a'i nik'a'aina abomo kebabaina a'i ketaina. <sup>8</sup> Weiakia hauani ena raonai temiaho haukia hanona Tirama ibaonamonai hanona a'i ketaina.

<sup>9</sup> Ia wai Tirama ena Auba Robe aomiai nemiaho raninai, wai hanona hauanimi a'i nibaka'animi, ia Auba Robe nibaka'animi. Ia hau ha aonai Keriso ena Auba aha'i hauna hanona Keriso ena maearima aha'i. <sup>10</sup> Aomiai Keriso nemiaho raninai hauanimi hanona abe'ari ki'a paunai, ia aubami hanona emauri bero paunai. <sup>11</sup> Ia Tirama Aubana weiana Iesu 'ariai ebamikirina hauna aomiai nemiaho raninai Keriso Iesu 'ariai

ebamikirina Tirama kehore wai hauanimi kate'ari haukia abomo keba maurinakia ena Auba Robe aomiai nemiaho paunai.

### *Auba Robe Eaoainaka Tirama Nahunai Haeao.*

<sup>12</sup> Weiana paunai uaho'aba'u e, aika hanona kahaka, ia hauani 'euna 'ara horeai aha'i, abomo hauani ena nuataeai a'i kahamauri. <sup>13</sup> Pokina hauani ena nuatae 'ekakiai komiaho raninai oi hanona ko'ari Tirama wairanai, ia Auba Robe ena nuataeai hauani ena aka ki'a obokia koba 'arinakia raninai oi hanona komauri banaibainai. <sup>14</sup> Pokina weiakia Tirama ena Auba Robe ne'uai ainakia haukia hanona Tirama nahuna.

<sup>15</sup> Wai hanona ta'ara'i mai ta'u aubana a'i toa'ina ia Auba Robe toa'ina, weiana hanona niaoinimi Tirama nahunai\* tuao, Auba Robe weiana hiabunai Tirama nahaparina, "Hama'u,† au Hama'u." <sup>16</sup> Auba Robe weiana aika aubaka ohi tibatohana aika hanona Tirama nahuna. <sup>17</sup> Bariu aika Ia nahuna raninai aika hanona barina kaha'ina hauka. Tirama barina kaha'ina hanona Keriso kipokia Ia nahunai kahaeao Tirama barina kaha'ina. Weiana Keriso kipokia ena haiara kahahaiara aina raninai ia nuabina abomo kaha'ina.

### *Wairai Kupa Aiaranai Nuabi Aonai Kahamiaho.*

<sup>18</sup> Au naraonana bariu rani neiana aika nahahau haiara aina hanona taba papakia, ia nuabi weiana muriai aika 'eukai kewaira tina hauna keapa'ua ki'a baha. <sup>19</sup> Tirama ebabai tabakia ikoikiai hanona tibai'imai ekia nuatae apa'uana Tirama nahuna katewaira tina. <sup>20</sup> Pokina terama tabakia ikoikiai hanona taba anikia aha'i ba'anai temiaho, 'a ekia nuataeai aha'i, ia Tirama ena nuataeai. <sup>21</sup> Terama tabakia hanona hauani parina ena ibiri 'iniae kateirubu, Ba Tirama nahuna ekia nuabi irubuna aonai katemiaho haeamo.

\* 8:15: (15) 'ao bakiro nahunai † 8:15: (15) 'ao "Papa"

<sup>22</sup> Weiana aika ha'io bina terama tabakia maikoinai hanona mai ao pumakia matoha babi'e miori keba ramana hαιarana 'abana emai mo bariu rani neiana. <sup>23</sup> Iamo ikupaiakia aha'i, Tirama ena buabua kori'uaina Auba Robe ha'ina hauka abomo aoka niao puma mai nahabai'ima Tirama nahunai kebaonaka mai hauanika maikoina kebamaurinakia. <sup>24</sup> Aika nuatae apa'uana neianai mauri ha'ina. Ia nuatae apa'uana weiana aba haihana raninai a'i kahanuatae aina. Tai hanona taba aba ea'ina hauna nuatae apa'uana kebaona? <sup>25</sup> Ia taba a'i naha'i bahana hauna nahanuataeai apa'uana raninai, aika hanona mai bakiroka kababai'ima.

<sup>26</sup> Taeara ihobonai Auba Robe hanona nibarainaka eka 'abe'abe aokiai, aika aea kahabahuba'ari aiho hanona a'i naha'io bina, ia Auba Robe kipona nihore nibahuba'ari mai ao pumana maearima ke'abi a'i ketaina haunai ninoinoi aika paukai. <sup>27</sup> Abomo maearima aokia nei-hanakia Tiramana hanona Auba Robe ena raona tabana e'io bina, pokina Auba Robe hanona Tirama ena maearima paukai ninoinoi Tirama ena nuatae ihobonai.

<sup>28</sup> Aika naha'io bina Tirama ebabainakia tabakia ikoikiai hanona tiaka haeamo Tirama tiraona'au aina hauka mai ena nuataeai eaparinakia hauka ibanamokiae. <sup>29</sup> Pokina Tirama weiakia e'obi 'uainakia hauka eba'orunakia Nahuna ihobonai kateao, ba Keriso hanona hau pakanai keao uaho'abana ikoikiae baiatakiae. <sup>30</sup> Eba'orunakia hauka ia ehore eaparinakia, eaparinakia hauka ia ehore beroai ebaonakia, beroai ebaonakia hauka ia ehore ena nuabi ebenakia.

*Taba Ha Tirama Ena Raona'au Herenai A'i Ke'a'iparenaka.*

<sup>31</sup> Uahomana raninai taba neiakia aea kaharoba ahuai

aihonakia? Tirama aika nitainaka raninai tai hanona aika ke'oatanaka? Tai ha aha'i. <sup>32</sup> Ia nahuna hamomona a'i eubo aina, aika ikoikai paukai ebaibeni ai 'abaeana. Nahuna ebenaka buonai taba ikoikiai abomo kebeni 'abaeanaka.

<sup>33</sup> Tai kehore Tirama ena a'itaea hauka atetua 'ekanai kehorotinakia? Tai ha aha'i. Tirama hanona ia niba tohanakia a'i tebeho. <sup>34</sup> Ba tai hanona puma kebenakia? Tai ha aha'i. Pokina Keriso Iesu e'ari, haeamona emikiri mue, ia hanona Tirama itipana tainai nemiaho, aika paukai ninoinoi. <sup>35</sup> Tai kehore Keriso ena raona'au ai kea'i parenaka? Atetua kehore 'ao bahaiara kehore 'ao bai'oata kehore 'ao arobo kehore 'ao uraru kehore 'ao ta'u kehore 'ao kareba kehore 'ao? Tai ha aha'i. <sup>36</sup> Atetua weiakia hanona Puka Robenai tererena ihobona etibaha, "Ai hanona oi paumuai rani ikoikiai 'ari tawairana, ai hanona mamoe ai tibaonamai kateahu 'arinamai."

Sal 44.22

<sup>37</sup> Ia taba neiakia ikoikiai aokiai aika hanona hatarahi, niraona'au ainaka hauna paunai. <sup>38</sup> Pokina au aba a'io bi tohana, weiana 'ari 'ao mauri, anerukia 'ao hiabu aubakia,‡ bariu temiaho tabakia 'ao wairai katemai tabakia, hiabu haeai haeai, <sup>39</sup> hano 'ubinai 'ao hano ba'anai, terama tabakia ikoinkai ha kehore Tirama ena raona'au herenai a'i kea'i parenaka, pokina aika eka Obiapaka Iesu Keriso aonai nahamiaho paunai.

## 9

*Tirama Isaraela Hauka Etina'anakia.*

<sup>1</sup> 'Abi tohana nahinana Keriso aonai, au hanona a'i nabai'oi Auba Robe abomo ao'u e'io bina.

<sup>2</sup> E'u ao ko'o hanona eapa'ua, ao aro'ari ao'uai hauna ena pua aha'i.

‡ 8:38: (38) auba ki'a obokia taburakia

<sup>3</sup> Au kipo'u nanuatae hanona peururu aina'u Keriso 'eunai pa'eho 'ekanai uaho'aba'u weiaikia e'u itubu haukia patemauri paunai.

<sup>4</sup> Ia hanona Isaraela haukia, Tirama nahunai teao mai ena nuabi ebawaira tinana herekiae, herekiae 'abi'uai robena ebabaina rauhubu ebenakia, marea robe tohanai tekuti mai 'abi'uai tea'ina.

<sup>5</sup> Ia 'aba'abakia hanona maearima apa'uakia, ia ekia kupuai hanona Keriso hauaniai erama, ia hanona taba ikoikiae nipoki ainakia Tiramana, kahabanamona ba-naibani. Amen.

<sup>6</sup> Au a'i natibaha Tirama ena 'abi'uai hanona e'eho, pokina Isaraela kupunai terama haukia re'a ikoikiae Isaraela haukia tohakia aha'i. <sup>7</sup> Aberahamo 'aba'abanai mo ia ikoikiae hanona nahuna tohakia aha'i. Pokina Tirama Aberahamo ehina bena "Isako herenai katerama haukia mo 'aba'abamu ai kateao." <sup>8</sup> Anina hanona miori hauaniai terama haukia hanona Tirama nahuna aha'i. Ia Tirama ena 'abi'uai katerama miorikia hanona Aberahamo nahuna tohakiae kateao. <sup>9</sup> 'Abi'uai hanona na ehina aihona, "Ihau wairai rani nahomanai au kamue hanona Sara miori ha keba ramana."

<sup>10</sup> Weianai mo aha'i, ia Rebeka nahuna bai'apaea terama hamakia hamona Isako aika 'aba'abaka ena raniai abomo ihobo. <sup>11</sup> Ia miori a'i terama baha mai taba ha namona 'ao ki'a obona a'i tebabai bahana aonai, Tirama ena a'itaea hanona aba ena nuataeai ebabaina. <sup>12</sup> Ekia babai paunai aha'i ia ena apariai ebabaina, Tirama Rebeka ehina bena etibaha, "Hau pakana kehore hau i'irina ta'arana kea'i." <sup>13</sup> Puka robenai tererena ihobona etibaha, "Au Iakobo araona'au aina ia Esau 'arina a'i a'ari."

<sup>14</sup> Uahomana raninai taba kaha'uahina? Tirama hanona ena babai a'i tebero, u? Aha'i 'akina.

<sup>15</sup> Tirama ehore Mose ehina bena etibaha,

"Au pabarainakia haukia hanona kabarainakia mai paoko'o ainakia

haukia hanona kaoko'o ainakia."

Eso 33.19

<sup>16</sup> Ua buonai Tirama maearima etina'ana hanona hau ha ena nuataeai 'ao aro'ariai aha'i, ia Tirama ena aoko'oai. <sup>17</sup> Puka robenai Tirama Parao ehina bena etibaha, "Au oi obia aranai ahorotini'o ena pokи hanona neiana. E'u hi-abu heremuai kabaiha bahraina, weianai hanopaka maikoinai au atau' katehinana." <sup>18</sup> Weiana buonai Tirama mo ena nuatae ihobonai keaoko'o ainakia haukia niaoko'o ainakia, aokia keba pahi-hinakia haukia aokia niba pahihi-nakia.

### *Tirama Ena Opure Mai Aoko'o.*

<sup>19</sup> Uahomana raninai wai ha au kohina bena'u kotibaha, "Ua nihoma raninai, aehoma buonai Tirama eka beho nitabunakia? Tai kehore Tirama ena nuatae kekaabuna?" <sup>20</sup> E'u hau e, oi hau aea homamu, Tirama ena 'abi' nubamuena? Uro a'i kehore ebabaina hauna a'i kehina bena, "Taba buonai na obabai aihona'u?" <sup>21</sup> Uro babai hauna hanona mai ena bero ia kehore tipu hamonai uro kebabainakia, ha hanona uro namona aka apa'uakiae keaka, ha hanona uro 'abaeana aka papakiae keaka.

<sup>22</sup> Tirama hanona matoha uro babai hauna 'abana ena nuatae hanona ena opure mai ena hiabu kebaila baiha aina, iamo aona nia'i 'inina niopuere ainakia haukia herekiae keaomo 'ari ranina eba'oruna hauna kemai. <sup>23</sup> Abomo enuatae ena nuabi apa'uana kebawaira tinana niaoko'o ainakia haukia herekiae hanona mai ena bero, weiaikia aba eba'orunakia haukia hanona ena nuabi katea'ina. <sup>24</sup> Uro hanona aika eaparinaka hauka, Iuda haukia mo aha'i, 'a rama haeai haukia baiatakiae abomo. <sup>25</sup> Mahabanai hauna Hosea ena pukai ehinana ihobona etibaha, "E'u maearima tohakia aha'i haukia kaparinakia 'e'u maearima.' Itubu weiana a'i naraona'au aina

hauna kaparina  
'e'u raona'au.'

Hos 2.23

<sup>26</sup> Ehina benakia,  
wai hanona au e'u maearima aha'i  
'ekanai haeamona keaparinakia  
ia hanona Mauri Tiramana  
nahuna."

Hos 1.10

<sup>27</sup> Mahabanai hauna Isaia  
Isaraela haukia poukia ehinana  
etibaha,  
"Isaraela maearimakia patebo'o  
ki'a poe 'anona 'abana,  
ia harina bita 'akimo bamauri  
katea'ina.  
<sup>28</sup> Obiapaka kehore noanoai bakai  
'abina hanopakai kehore hore  
haraina."

Isa 10.22, 23

<sup>29</sup> Ihobonai mo Isaia ehina 'uaina  
'abana,  
"Tabura Obiapakan 'aba'abamai  
baika a'i pehabonakia raninai  
ai hanona Sodoma mai Gomora  
ihobokiae pataeao."

Isa 1.9

*Rama Haeai Haukia Tea'ikakauma  
Ia Isaraela Haukia A'i Tea'ikakauma.*  
<sup>30</sup> Ua buonai taba na kahahoma? Rama haeai haukia bero  
a'i titabuna ia aba tea'ina, weiana  
hanona a'ikakaumai tea'ina. <sup>31</sup> Ia  
Isaraela haukia rauhubu taearanai  
bero tetabuna, ia a'i tetabu  
ahina. <sup>32</sup> Taba buonai a'i tea'ina?  
Pokina a'ikakaumai a'i tetabuna ia  
teraponana akai katetabu ahina. Ia  
haukia kaikai rea piharanai weia  
tekai. <sup>33</sup> Puka Robenai tererena  
ihobona etibaha,  
"Moihana Siona oeo aonai  
pihara ha ahorotina  
weianai maearima kebakai kai  
reanakia, haeamona wairo  
piharana weiana kehore  
keba'ehonakia.  
Ia tai nia'ikakauma hauna  
hanona a'i kehaumaea."

Isa 8.14; 28.16

**10**

*Isaraela Tirama Ena Aka A'i  
Teiha Tinana.*

<sup>1</sup> Uaho'aba'u e, mai ao'u ikoinai  
e'u nuatae abomo e'u bahuba'ari

niao Tirama herena, Isaraela  
haukia hanona patemauri. <sup>2</sup> Au  
a'iohina ia hanona aokia tohanai  
Tirama tenuatae aina, ia 'abi  
tohana herenai ekia 'iohi aha'i.  
<sup>3</sup> Ia a'i te'iohina bero hanona  
Tirama herenai nimai, ia kipokia  
mo ekia bero tebakori haukia tia'i  
ini. Weiana buonai Tirama ena  
bero a'i tea'i taeana. <sup>4</sup> Ia Keriso  
hanona rauhubu ebaorena, ba  
katea'ikakauma haukia ikoikiai  
hanona bero katea'ina.

<sup>5</sup> Mose ehore rauhubu ai bero  
kea'ina robana eahuna etibaha,  
"Hau ha rauhubu taina ketai  
hanona ia aba kemauri." <sup>6</sup> Ia  
bero a'ikakaumai nimai hauna na  
e'abi aiho, "Aomiai a'i kato'abi,  
Tai kekara'au keao kupa?" (Weia  
Keriso kebaririna.) <sup>7</sup> 'Ao, "Tai  
keriri keao 'uri aonai?" (Weia  
Keriso 'ari haukia baiatakiai  
kebakara'auna.) <sup>8</sup> Taba e'uhina  
hauna hanona neiana, "Tirama  
ena 'abi hanona wai heremai,  
pinamiai mai aomiai." Weiana  
hanona a'ikakauma 'abinai, ai  
tahore tairoro aina. <sup>9</sup> Pou  
hanona nahomana, oi pinamuai  
kohina pouna 'Iesu hanona  
Obiapaka, abomo Tirama hanona  
ia 'ariai ebamikirina hauna  
aomuai koa'ikakauma raninai  
oi hanona komauri. <sup>10</sup> Pokina  
aomuai oa'ikakauma hanona aba  
obero Tirama wairanai, abomo  
pinamuai kohina pouna hanona  
komauri.

<sup>11</sup> Weiana Puka Robenai e'abi  
etibaha, "Ia katea'ikakaumana  
haukia ikoikiai hanona a'i kate-  
haumaea." <sup>12</sup> Iuda mai rama  
haeai haukia baiatakia ekia haeai  
hanona aha'i. Pokina Tirama  
hanona hamona ikoikiai ekia  
Obiapaka abomo atanai tekuti  
haukia ikoikiai hanona banamo  
nibenakia. <sup>13</sup> Puka Robenai e'abi  
ihobonai,  
"Obiapaka atanai tiapari  
haukia ikoikiai hanona  
katemauri."

Iol 2.32

<sup>14</sup> Ba weiakia herenai a'i  
tia'ikakauma haukia hanona aea  
kateapari aihona? Haeamona

pouna a'i teona haukia hanona  
aea katea'ikakauma aihona?  
Abomo hau ha herekiae a'i keiroro  
raninai pou aea kateo'o aihona?

<sup>15</sup> Mai pou ihinana haukia a'i  
kateuhunakia raninai pou hanona  
aea kateiroro ai aihona? Puka  
Robenai tererena ihobonai, "Pou  
namona timaiaina haukia hanona  
aekia hama ua tenamo aiho!"

*Isaraela Haukia Pou Namona  
A'i Tea'itaeana.*

<sup>16</sup> Ia Isaraela haukia bo'ona  
hanona pou namona a'i tea'i  
taeana. Isaia e'abi ihobona,  
"Obiapaka e. Tai hanona emai  
pou tea'ikakaumana? Tai aha'i."

<sup>17</sup> Weiana buonai a'ikakauma  
hanona pou ionai nimai, mai  
aia o'o hanona Keriso ena 'abiai  
nimai.

<sup>18</sup> Ia au nabakai bakai, pou a'i  
teona, u? Aha'i. Pou hanona aba  
teona. Puka Robenai e'abi,  
"Aiakia hanona aba ekarahi eao  
hanopaka ikoikiai aokiai,  
abomo ekia 'abi hanona hanopaka  
puana abira abira etabu  
ahinakia."

<sup>19</sup> Sal 19.4  
Haeamona nabakai bakai, Is-  
araela haukia obo a'i teobo, u?  
Aha'i, obo teobo. Kori 'uaina  
Tirama ena 'abi Mose ehinana,  
"Wai kabawamurunimi  
hanopaka haeai maearimakia  
atakia aha'i haukia herekiae,  
mai wai kabaopuerenimi  
hanopaka

weiakia ekia aotipa Tirama  
herenai aha'i haukia herekiae."  
<sup>Deu 32.21</sup>

<sup>20</sup> Abomo Isaia aona ebataburana  
e'abi etibaha,  
"Weiakia a'i tetabuna'u haukia  
hanona tetabu ahina'u.  
Abomo a'i tenoina'u haukia  
herekiae kipo'u abawaira  
tinana'u."

<sup>21</sup> Isa 65.1  
Ia Isaraela 'abikia ehinana  
etibaha,  
"Beraura hamona maikoina  
ima'u atiu ahina weiakia  
aia a'i tio'o mai tikamuri

haukia na'imana katemue."  
<sup>Isa 65.2</sup>

## 11

*Tirama Isaraela Eaoko'o  
ainakia.*

<sup>1</sup> Ua buonai au haeamona  
nabakai bakai, Tirama ena  
maearima ebaki'anakia, u? Aha'i  
'akina. Au abomo Isaraela hau'u,  
Aberahamo 'aba'abana, Beni-  
amina ena itubu hau'u. <sup>2</sup> Tirama  
ena maearima etina'a 'uainakia  
haukia hanona a'i ebaki'anakia.  
Puka Robenai mahabanai hauna  
Elia robana eahuna 'abina wai  
aba to'lobina. Elia ehore Tirama  
wairanai Isaraela haukia ehinai  
ainakia etibaha, <sup>3</sup> "Obiapaka e,  
ia emu mahabanai haukia aba  
teahu 'arinakia, mai emu itara  
robekia aba terubu 'iti 'itinakia,  
au mo ikupaia'u namiaho, abomo  
titabuna'u kateahu 'arina'u." <sup>4</sup> A  
Tirama Elia ena 'abi ebamuena  
taba na ehoma? Ia etibaha, "Au  
hanona kipo'u e'u maearima aba  
taha 'abaihau hamomo (7,000)  
bai'oi tiramana Baala a'i tekuk  
aina haukia abahu ahinakia."

<sup>5</sup> Weiana bariu abomo taeara  
ihobonai maearima harina  
Tirama ena aoko'o hoanai  
ea'i taeananakia haukia temiaho.  
<sup>6</sup> Tirama ena a'itaea hanona ena  
aoko'o hoana paunai, ia maearima  
ekia aka paukiai aha'i. Ekia aka  
paukiai ea'i taeananakia raninai  
Tirama ena aoko'o hoana hanona  
anina aha'i.\*

<sup>7</sup> Uahomana raninai taba na ka-  
hahoma? Isaraela haukia taba  
titabuna hauna hanona a'i tetabu  
ahina, ia Tirama ea'i taeananakia  
haukia tebabita mo weiana tetabu  
ahina. Ia harina bo'ona hanona  
aokia teba pahihina. <sup>8</sup> Puka Robe-  
nai tererena ihobona etibaha,  
"Tirama ehore aokia eba  
paruanakia, mahakiae a'i  
teihaiha mai haiakiae aia  
a'i teona emaimo bariu."

<sup>Deu 29.4; Isa 29.10</sup>  
<sup>9</sup> Abomo Davida Tirama ehina  
bena etibaha,  
"Ekia tatu 'itarana hanona rio

\* <sup>11:6:</sup> (6) 'ao a'i keaka.

mai ba'ai kate'aeana  
ba katebato'onakia kate'eho  
puma katea'ina.

<sup>10</sup> Mahakia kobaparua 'arinakia  
a'i kateiha, mai kapekia  
kobabeho baihanakia  
rani ikoinai."

Sal 69.22, 23

*Tirama Ena Bamauri Rama  
Haeai Haukia Tea'ina.*

<sup>11</sup> Uahomana raninai haeamona nabakai bakai, ia hanona rioai teto'o te'eho aba tepua baihana, u? Aha'i 'akina. Ia ekia 'eho paunai rama haeai haukia bamauri aba tetabu ahina, ba Isaraela haukia ia katewamuru ainakia. <sup>12</sup> Isaraela haukia ekia behoai hanopaka maearimakia banamo rarina tetabu ahina, abomo Tirama ena bamauri aonai te'eho hanona rama haeai haukia banamo rarina tetabu ahina. 'A Isaraela haukia ikoikiai Tirama ena bamauri aonai katetoto raninai, banamo hanona keapa'ua ki'a baha.

<sup>13</sup> Au hanona wai rama haeai haumi nahina benimi. Au Tirama ena iuhubeau hau'u rama haeai haukia 'eukiae paunai, aka nababaina hauna kapaina.

<sup>14</sup> Weiana kababaina aonai e'u nuatae apa'uana e'u rama haukia kaba wamurunakia Keriso kate a'ikakaumana, ba Tirama kehore baika kebamaurinakia. <sup>15</sup> Tirama Isaraela haukia ebaki'anakia paunai hanopaka maearimakia ehaunakia. Ba Tirama Isaraela haukia kea'i totonakia raninai taba kerama? Weiana hanona 'ari haukia katemauri.

<sup>16</sup> Parawa puapuana Tirama nahabena hauna erobe raninai parawa maikoina abomo erobe, ramu erobe raninai rena abomo terobe. <sup>17</sup> Olibe ibato rena baika aba ikabe obo 'ekakia Olibe 'aki rena patea'ina Olibe ibato huanai pate'apa to'ona, ramu hamonai hoho katea'ina, ba oi hanona Olibe 'aki rena. <sup>18</sup> Re weiakia tekabe obonakia haukia herekiae a'i koapa. Koapa re'a neiana koraonana, oi hanona ramu a'i

nubaraina, ia ramu hanona oi nibaraini'o.

<sup>19</sup> Ua buonai oi hanona ko'abi, "Re weiakia tekabe hurinakia 'ekakiae au pa'e kate'apa to'ona'u."

<sup>20</sup> 'Abi tohana, ekia a'ikakauma aha'i paunai Tirama ebamohu hurinakia, ia oi hanona emu a'ikakauma buonai 'ekanai okoroti. Ua buonai a'i koapa, ia kota'u.

<sup>21</sup> Pokina Tirama re tohakia a'i eaoko'o ainakia raninai, oi abomumo a'i keaoko'o aini'o.

<sup>22</sup> Weiana buonai Tirama ena namo mai ena pahihi koraonana, weiakia te'eho haukia hanona Tirama herekiae nipahihi, ia ena namo aonai komiaho hanona oi heremuai kenamo. Ua a'i kobabai aiho raninai, oi abomo ikabe huri. <sup>23</sup> Ia ekia kamuri kamuri patehabonakia raninai Tirama kehore ke'apa to'o muenakia, pokina ua kebabai aiho hanona ketaina. <sup>24</sup> Wai rama haeai haumi hanona matoha 'aki matiuna rena 'abana, ua buonai i'apa to'o matiu ibato hauna huanai hanona ke'ama'ama. Ba Tirama kehore Olibe ibato rekia ikabe huri haukia matiukia tohakiae ke'apa to'o muenakia hanona ke'ama'ama ki'a baha.

*Tirama Ena Aoko'o Maearima  
Ikoikiae Ahakiae.*

<sup>25</sup> Uaho'aba'u e, au nanuatae wai 'abi bunina neiana kato'ibina, kipomi emi aotipa a'i katoapaina.

'Abi bunina weiana hanona Isaraela haukia bariu baika aokia tibapahihi keaomo Tirama etina'anakia rama haeai haukia ikoinai katekatoto 'uai.

<sup>26</sup> Ba Isaraela haukia ikoikiae katemauri. Puka Robenai ererena ihobonai etibaha,

"Siona ai bamauri hauna ha kemai.

Ia kehore Iakobo 'aba'abana herekiae Tirama ia'i ki'ana tabakia kebairu parenakia.

<sup>27</sup> Rani weianai ekia ki'a ka'i parenakia Au e'u 'abi'uai ihobonai."

Isa 59.20, 21; 27.9

<sup>28</sup> Iuda haukia pou namona tibaki'ana ihobona Tirama ena 'ou haukiai tiao hanona wai rama haeai haumi emi namo tabanai eao, ia 'aba'abakia ea'i taeanakia paunai ia Tirama ena raona'au aonai temiaho. <sup>29</sup> Pokina Tirama ena apari mai ena beruberu hanona a'i kebahaeaina.

<sup>30</sup> Uainai wai rama haeai haumi Tirama ena 'abi a'i toa'i taeanakia, ia bariu hanona wai Tirama ena aoko'o aba toa'ina, pokina Iuda haukia Tirama ena 'abi a'i tea'i taeana paunai. <sup>31</sup> Taeara ihobonai bariu Iuda haukia hanona Tirama ena 'abi a'i tia'i taeana, 'a aoko'o weiana toa'ina ihobonai ia abokiamo Tirama ena aoko'o weiana katea'ina.

<sup>32</sup> Tirama ehore maearima ikoikiai 'abi a'i tia'i taeanakia 'ekanai ekaibunakia, pokina weianai ena aoko'o kebaihanakia.

#### *Tirama Atana Kahabanamona.*

<sup>33</sup> Tirama hanona eaobero mai eaotipa ki'a baha ihobona 'aku 'ourana 'abana. Ena raona harai 'abina hanona tai kehore kehini haraina? Ena hoahoa taearana hanona tai kehore ke'iobi haraina? Tai aha'i.

<sup>34</sup> Puka robenai e'abi, "Tai hanona Obiapaka aona e'io'bina? 'ao, Tai hanona ia ena bairobe haunai eao?"

Isa 40.13

<sup>35</sup> Tai kehore taba ha Tirama kebeni 'uaina ba Tirama taba weiana 'arana kehorena?"

Job 41.11

<sup>36</sup> Taba ikoikiai ibaramakia hanona Tirama, taba ikoikiai ia paunai tekarahi, abomo taba ikoikiai ia 'eunal kateao. Nuabi hanona Tirama herenai keaomo banaibanal. Amen.

## 12

### *Eka Kuti Hoana Tohana.*

<sup>1</sup> Ua buonai uaho'aba'u e, Tirama ena aoko'o rarina 'akina

paunai nanoinimi, huanimi mai aomi maikoina Tirama katobena, baiben'i tabakia mauri maurikiai kateao, katerobe Tirama aona katebanamona. Emi kuti hoana tohana\* hanona weiana. <sup>2</sup> Hanopaka neiana ena hoahoa a'i katohobo hobo aina, 'a aomi katobamaha mahanakia emi mauri katobahaeaina, weianai Tirama ena nuatae hanona taba, ia niaonamo aina hanona taba mai namona tohana hanona taba kato'iobi haraina.

#### *Tirama Ena Ibeni Ebeni'o Hauna Akana Kobabaina.*

<sup>3</sup> Barai barai apa'uana ebena'u paunai, au wai ikoimiai nahina benimi. Kipomi a'i katoraona apa'uanimi, ia kipomi katoraona raona, aomi katebero, Tirama ehore ha ha emi a'ikakauma aea homakia ebenimi ihobokiai. <sup>4</sup> Aika huanika hanona hamona ia puana hanona ebo'o, ia ekia aka hanona haeai haeai. <sup>5</sup> Taeara ihobonai aika hanona habo'o, ia Keriso aonai hanona huanini hamona, puakia haeai haeai nahabahamomo.

<sup>6</sup> Tirama ena aoko'o hoanai beruberu tabakia haeai haeai aba ebenaka, hau ha ena beruberu hanona mahabanai re'a ia kemahabanai ena a'ikakauma ihobonai.

<sup>7</sup> Hau ha ena beruberu ta'ara a'i re'a ta'ara kea'i, hau ha ena beruberu ba'iobi re'a keba'iobi. <sup>8</sup> Batabura hauna kebatabura, baiben'i hauna kebaiben'i mai aona ikoinai, 'uai hauna ke'uai mai bakirona, aoko'o hauna keaoko'o mai aonamona.

#### *Aoka Tohanai Uaho'abaka Kahahaona'au aina.*

<sup>9</sup> Emi raona'au hanona kato-batohana. Ki'a tabakia 'arikia a'i kato'ari, namo tabakia kato babainakia. <sup>10</sup> Ha ha katoraona'au ainimi uaho'abami 'abana, abomo ha ha katomariki ainimi. <sup>11</sup> Katoaka tabura a'i kato'aboro. Auba hiabunai Obiapaka ena ta'ara katoa'ina mai aomi ikoinai.

<sup>12</sup> Nuatae

\* 12:1: (1) 'ao Aubami kuti hoana

apa'uana aonai katoaonamo. Aro'ari ranikiai katotabura. Rani ikoikiai katobahuba'ari.

<sup>13</sup> Tirama ena maearima teuraru haukia katobarainakia. Baki haukia katoa'i taeanakia emi ituai.

<sup>14</sup> Ti'oatanimi haukia Tirama katonoina kebanamonakia, a'i katoururu ainakia, ia katoba namonakia. <sup>15</sup> Tiaonamo haukia kipokia katoaonamo, weiakia tihaihai haukia kipokia kato-hai. <sup>16</sup> Ikoimiai emi miahaoi aomi katehamomo. A'i katoapa, 'aiaunu haukia kipokia katomiaho haeamo. Kipomi emi aotipa a'i katoapainakia.

<sup>17</sup> Hau ha ena aka ki'a heremiai hauna 'arana ki'ai a'i katobamuena, ia maearima ikoikiai wairakiai aka namokia katobainakia.

<sup>18</sup> Ketainimi taearanai, maearima ikoikiai kipokia baibuai katomiaho. <sup>19</sup> E'u hau e, ki'a 'arana kipomi a'i katobamuena, katohabona Tirama ena opuere kebabaina. Pokina Puka robenai aba tererena, "Obiapaka e'abi, 'Ara hore hanona au ima'u ai, au kahore 'arana kabamuena."

<sup>20</sup> Haeamona tererena, "Emu 'ou hauna mare'a ni'ari raninai aniani kobena, abomo 'akona ni'ororo raninai bei kobena. Babai neiana kobabaina hanona ia kobahaumaeana ihobona matoha 'aranai iruba nuhore 'auna."

Her 25.21, 22

<sup>21</sup> Aka ki'a kehore wai a'i kehaoti boanimi, ia emi aka namokiai aka ki'a katohaoti boana.

## 13

*Aika Kabamani Ena Hiabu Ba'anai Kahamiaho.*

<sup>1</sup> Maearima ikoikiai hanona tipoki ainakiai haukia aiakia katea'i taeanakia. Pokina poki hanona kipona a'i erama ia Tirama herenai emai, poki haukia ikoikiai hanona Tirama ehore ebakorinakia. <sup>2</sup> Weiana hau ha

poki hauna ni'oatana hanona ihobona mo Tirama ebakorina hauna ni'oatana, bai'oata akana nibabaina hauna hanona kipona ena puma ketabu ahina. <sup>3</sup> Pokina aka namona tibabaina haukia hanona poki haukia a'i titau ainakia, ia beho babai haukia mo. Oi nonuatae poki hauna a'i kota'u aina? Ua homana re'a aka namokia kobabai, ba ia kehore oi kebanamoni'o. <sup>4</sup> Ia hanona Tirama ena ta'ara a'i hauna emu namo akana nibabaina. 'A pobabai ki'a hanona ia pota'u aina. Pokina ia hanona tare a'i ea'i 'abaeana. Ia hanona Tirama ena ta'ara a'i hauna babai ki'a haukia 'arakia kebenakia. <sup>5</sup> Ua buonai poki haukia aiakia kahaona, puma herenai kahakapare paunai mo aha'i, ia raona bero paunai abomo.

<sup>6</sup> Ua buonai wai abomo takiti monina tubaiben, pokina ia hanona Tirama ena ta'ara a'i haukia, rani ikoinal barai barai akana neiana tibabaina. <sup>7</sup> Taba katobaiben Kabamani herekiai haukia kato benakia. Moni bararo haeai haeai haukia katobaiben, titau aina hauna katota'u aina, timariki aina hauna katomariki aina.

*'Abami 'Arikia Kato'ari Toha.*

<sup>8</sup> Hau ha herenai taba ha a'i koa'i 'abaea 'uaina, ia taba kahababai to'o baihana hauna hanona ha ha kaharaona'au ainaka. Herena hauna niraona'au aina hauna hanona rauhubu aba nika'ai haraina. <sup>9</sup> Rauhubu neiakia, 'Ai konabau ki'a, a'i koahuahu, a'i kobainao, abomo hau ha ena taba a'i konuataeai 'abaeana' mai rauhubu baika kipokia teba hamomonakia hanona 'abina apa'uana hamona neiana, 'Heremu hauna koraona'au aina ihobona kipomu nuraona'au aini'o 'abana.' <sup>10</sup> Hau ha mai ena raona'au hauna nihore herena hauna a'i nia'i ki'ana. Ua buonai katoraona'au hanona rauhubu maikoinai aba tubatohana.

*Ea Taearanai Kahaka'a.*

<sup>11</sup> Rani neiana tabana hanona to'ibina paruai katono'a raona'au akana katobabaina ranina aba ekara'au. Pokina popounai ha'ikakauma raninai ibamaurika beraurana hanona atau'ai 'a bariu hanona aba herekai. <sup>12</sup> Rabi aba niore mararani Iesu ena mai ranina hanona aba herekai. Ua buonai wapura akakia hamahabonakia, ia ea ena huari hoakia hama'inakia. <sup>13</sup> Eka hoahoa patenamo ihobona mararani nahababai 'abana. A'i kaharipu ripu, a'i kahainu 'ari, a'i kahanabau, a'i kaharea, a'i kaha'au, a'i kahawamuru. <sup>14</sup> Obiapaka Iesu Keriso hanona emi huari habuninai katobaona, ia hauanimi ekia nuatae akakia ki'a obokia a'i katoa'i taeanakia.

## 14

*Uaho'abami Puma A'i Katobena.*

<sup>1</sup> Hau ha ena a'ikakauma e'abe'abe hauna katoa'i taeana, ia ena raonaraona weiana hauna a'i kato'abi baitaeai aina. <sup>2</sup> Hau ha mai ena a'ikakauma taba ikoikiai niani, ia ha ena a'ikakauma e'abe'abe hauna uma tabakia mo niani. <sup>3</sup> Taba ikoikiai niani hauna a'i niani hauna herenai a'i kea'i ki'anu abomo uma anianikia mo niani hauna taba ikoikiai niani hauna a'i ke'uhina, pokina Tirama ehore ia tererua aba ea'i taeanakia. <sup>4</sup> Oi hanona tai, hau ha ena ta'ara a'i hauna no'uahina? Ia kekori 'ini 'ao ke'eho re'a weiana hanona poki hauna ena hiabu. Ia hanona kekori 'ini pokina Obiapaka hanona mai hiabuna kebakori 'inina.

<sup>5</sup> Hau ha niraonana beraura ha hanona etara ahi ba beraura baika, mai hau ha niraonana beraura ikoikiai hanona ihobo. Ha ha kipokia ekia raona raona katebakori harainakia. <sup>6</sup> Hau neiana niraonana beraura ha eapa'ua Obiapaka paunai, hau weiana taba ikoikiai niani Obiapaka paunai, pokina kateaniani raninai Tirama tibanamo 'uaina. Mai hau ha Obiapaka paunai

aniani baika nibaki'anakia, ia abomo Tirama nabanamona.

<sup>7</sup> Pokina aika baiatakai hau ha a'i nimauri ia kipona paunai, abomo hau ha a'i ni'ari ia kipona paunai. <sup>8</sup> Nahamauri hanona Obiapaka paunai nahamauri abomo kaha'ari hanona Obiapaka paunai kaha'ari. Ua buonai kahamauri 'ao kaha'ari re'a aika hanona Obiapaka 'euna. <sup>9</sup> Neiana buonai Keriso e'ari abomo emauri mue, 'ari mai mauri haukia ekia Obiapakai keao.

<sup>10</sup> 'A oi aehoma buonai uaho'abamu behoai nuhorotina? Aehoma buonai nua'i ki'anu? Aika ikoikai hanona Tirama wairanai ena bakai 'ekanai kahakoroti. <sup>11</sup> Puka robenai tererena ihobona, "Obiapaka ni'abi;

Au namauri toha buonai, maeearima ikoikiai au waira'u ai katekaipahu, abomo maeearima ikoikiai pinakiai katehina pouna'u Au hanona Tirama."

Isa 45.23

<sup>12</sup> Ua buonai aika ikoikai ha ha Tirama wairanai kipoka pouka kahahina.

*Uaho'abami A'i Katoba'ehona.*

<sup>13</sup> Ua buonai aika ha ha kipoka behoai a'i kahahorotinaka. Abomo uaho'abaka ia'i ki'anu 'ao iba'ehona ki'a aonai raonana a'i kaharaonana. <sup>14</sup> Au Obiapaka Iesu aonai a'ibina abomo nabatohana aniani tabakia ha kipona a'i eki'a Tirama wairanai, 'a hau ha niraonana aniani tabana ha eki'a raninai aniani weiana hanona eki'a ia kipona herenai. <sup>15</sup> Ia emu aniani tabana buonai uaho'abamu aona nubahiarana raninai, oi hanona raona'au taearanai a'i nuka'a. Uaho'abamu weiana paunai Keriso e'ari hauna emu aniani koana hauna buonai a'i moa'i ki'anu. <sup>16</sup> Ua buonai niraonana hoahoa oi heremuai enamo hauna ko'ima haraina ki'a obona a'i temehinana. <sup>17</sup> Pokina Tirama ena obia aiarana hanona aniani mai inuinu tabana aha'i, ia bero, baibua mai aonamo, weiakia hanona Auba Robe

nimaiainakia.<sup>18</sup> Hau ha taeara neiakiai Keriso ta'arana nia'i hauna hanona Tirama ia niaonamo aina maearima abomo ena namo tibatohana.

<sup>19</sup> Ua buonai rani ikoinai mai taburaka baibua taearakia kahatabu, abomo ha ha kahaba taburanaka. <sup>20</sup> Aniani paunai Tirama ena aka a'i koa'i ki'ana. Aniani ikoikiai hanona tenamo, iamo oi aniani tabana ha nuana paunai 'abamu ki'a aonai ketoto raninai ki'a hanona oi heremuai. <sup>21</sup> Uaho'abamu aona ibaro'arina akana a'i kobabaina hanona enamo, mahi weikakia a'i koani a'i koinu 'ari. <sup>22</sup> Ua buonai raona neiakia emu a'ikakaumai ko'ima harainakia Tirama mai oi toraruā baiatamiai. Hau ha taba ha kipona niraonana ebero hauna nibabaina aonai, aka weiana paunai aona a'i kearo'ari hauna hanona enamo. <sup>23</sup> A aona mai kai'au kai'auna nianiani hauna hanona Tirama ia puma nibena, pokina aniani weiana aonai ia a'i nia'ikakauma paunai. A'ikakaumai a'i tibabainakia tabakia ikoikiai hanona teki'a.

## 15

*Kipoka A'i Kahabaonamona  
'Abaka Kahabarainakia.*

<sup>1</sup> Aika a'ikakaumai hatabura hauka hanona a'ikakaumai te'abe'abe haukia ekia puma kahabuana. Aika kipoka eka aonamo mo a'i kahatabu. <sup>2</sup> Ha ha hereka haukia kahaba aonamonakia kipokia ekia namo paunai, weiana kehore ekia a'ikakauma kebataburana. <sup>3</sup> Pokina Keriso abomo kipona ena aonamo mo a'i etabuna. Puka Robenai tererena ihobona etibaha, "Bapo'o po'o 'abikia oi tebapo'o aini'o haukia au abomo tebapo'o aina'u."

Sal 69.9

<sup>4</sup> 'Uainai terere tabakia hanona aika ibamarereka paunai tererenakia, weiana Puka robena kahatuabina hanona aika bakiro

mai tabura kebenaka keaomo nuatae apa'uana kahatabu ahina.

<sup>5</sup> Au nabahuba'ari bakiro mai batabura nibaibenai Tiramana kehore Keriso Iesu murinai katoka'a raninai aomi keba hamomonakia. <sup>6</sup> Ba ikoimiai mai aomi hamona abomo aia hamonai Tirama aika eka Obiapaka Iesu Keriso Hamana katobanamona.

*Pouna Namona Rama Haeai Haukia Herekiai Abomo Teihobo.*

<sup>7</sup> Ua buonai 'abami katoa'i taeanakia ihobona Keriso ea'i taeanimi 'abana, babai weianai Tirama kahabanamona. <sup>8</sup> Au wai nahina benimi, Keriso hanona Tirama ena 'abi tohana paunai Juda haukia\* ekia ta'ara ia'ina haunai eao, Tirama ena 'abi 'uai 'aba'abakia herekiai haukia ibatohakia paunai,<sup>9</sup> abomo rama haeai haukia Tirama katebanamona ena aoko'o paunai. Puka robenai tererena Davida e'abi ihobona, "Ua buonai rama haeai haukia baiatakiai kabanamoni'o, abomo Oi atamu kahui aina."

Sal 18.49

<sup>10</sup> Haeamona Mose e'abi etibaha, "Rama haeai haumi e, Tirama ena maearima kipokia katoaonamo haeamo."

Deu 32.43

<sup>11</sup> Haeamona Davida e'abi etibaha, "Rama haeai haumi ikoimiai, Obiapaka katobanamona. Abomo maearima ikoimiai, ia katohui aina."

Sal 117.1

<sup>12</sup> Haeamona Isaia e'abi, "Iese ena rama nininai hau ha kewaira tina, rama haeai haukia kepoki ainakia. Rama haeai haukia katehore ia ikupaiana katenuataeai apa'uana."

Isa 11.10

<sup>13</sup> Au nabahuba'ari, nuatae apa'uana nibaibenai Tiramana kehore emi a'ikakaumai aonamo mai baibua ikoinai kebabonunimi. Weiana Auba Robe hiabunai emi nuatae keba apa'uana rani ikoinai.

\* 15:8: (8) 'ao itare tea'ina haukia

*Paulo Rama Haeai Haukia Ekia  
Aka Haunai Eao.*

<sup>14</sup> Uaho'aba'u e, au a'iobi haraina wai hanona emi hoa namokia tebo'o, mai ikoimiai hanona a'i kakauma taearana to'iobi haraina buonai, kipomi ha ha katoba'iobinimi hanona ketaina.<sup>15</sup> Ia marere neiana aonai taba baika mai tabura'u arere benimi hanona wai ibaraonami, neiana hanona Tirama ena aoko'o hoana ebena'u paunal.<sup>16</sup> Au hanona Keriso Iesu ena ta'ara a'i hau'u ai aeao rama haeai haukia 'eukiae, kaka matoha robe hau'u Tirama ena pou namona kairoro aina, weiana Auba Robe ena barobe hiabunai rama haeai haukia hanona baiben'i tabakiai kateao Tirama kea'i taeanakia.

<sup>17</sup> Ua buonai Tirama ena aka nababaina hanona napa Keriso Iesu aonai.<sup>18</sup> Au 'abi haeai haeai a'i kahinanakia, ia 'abi hamonamo kahinana, Keriso au ebaraina'u kairoro mai kaka rama haeai haukia herekiae kamaiaiakia Tirama herena aiana kateka'aina hauna mo,<sup>19</sup> au e'u aka weiana aonai Auba robe hiabunai hoa mai babai hiabukia tewaira tina. Weiana Ierusalemai akakaiaro aeao mo Iluriko 'eka maikoina Keriso pouna namona airoroi orena.<sup>20</sup> Rani ikoinai e'u raona apa'uana hanona neiana, pou namona kairoro aina Keriso atana a'i te'obina 'ekakiae. Weiana hanona hau ha ena hoboro ebakorina hauna ahnai e'u itu a'i mabakorina paunal.<sup>21</sup> Puka robenai tererena ihibona etibaha, "Pouna a'i teona haukia hanona kateihana, abomo aiana a'i teona haukia hanona kate'obina."

Isa 52.15

*Paulo Eraonana Keao Roma.*

<sup>22</sup> Aka weiana ehore rani bo'okia eba'orona'u buonai, a'i awahi heremi.<sup>23</sup> 'A bariu 'eka neianai e'u aka aba abaorenakia, abomo ihau bo'ona anuatae kawahi kaihanimi.<sup>24</sup> Ua buonai au nanuatae kakabanai Speini kaaeo

raninai kaihanimi, mai aonamo'u wai kipokia kahamiaho rani papana, murinai katobaraina'u kaeao weia.

<sup>25</sup> Ia au bariu Ierusalema naeao Tirama ena maearima weia temiaho haukia ibaraikia paunal.

<sup>26</sup> Pokina Tirama ena marea maearimakia weiakia Makedonia mai Akaia hanokia haukia kipokia ekia nuataeai beruberu tabakia tebararo Tirama ena robe maearimakia Ierusalemai teuraru haukia 'eukiae.<sup>27</sup> Ia aka weiana tebabaina mai aonamokia. Ia ua tebabai aiho hanona ebero. Pokina Iuda haukia aubakia ena banamo rama haeai haukia kipokia tewatena buonai rama haeai haukia hauani ena banamo tabakia baika Iuda haukia Keriso tia'ikakaumana haukia katebenakia hanona ebero.

<sup>28</sup> Aka neiana kabaorena, moni tebararona hauna kipo'u kaeaoaina Ierusalemai haukia kabenakia murinai, kawahi kaihanimi ba Speini kaaeo.<sup>29</sup> Au na'obina, kawahi heremi raninai Keriso ena banamo maikoinai kawahi aina.

<sup>30</sup> Uaho'aba'u e, eka Obiapa ka Iesu Keriso paunal abomo raona'au weiana Auba robe ebenaka hauna paunal nanoinimi, emi bahuba'ari ai kipokia kahabhamomo Tirama katonoina au pau'u ai.<sup>31</sup> Emi bahuba'ari ai

Tirama katonoina Judea aonai Iesu Keriso a'i tia'ikakaumana haukia imakiae kebamaurina'u, abomo Tirama ena maearima weia Ierusalemai temiaho haukia e'u aka neiana kate'a'i taeana mai aonamokia.<sup>32</sup> Uahomana raninai Tirama ena nuataeai kawahi heremi mai aonamo'u, abomo kipokia kahabatabura haeamonaka.

<sup>33</sup> Baibua nibaiben'i Tiramana ikoimiai heremai kemiah. Amen.

## 16

*Paulo Ena Banamo 'Abikia.*

<sup>1</sup> Au wai naba'obinimi haibuka Foibe niwahi, ia hanona Kenkrea

\* 16:1: (1) Diakono

aiara apa'uana Tirama ena marea ena aka\* babi'ena ha.<sup>2</sup> Nano'inimi Obiapaka atanai katoa'i taeana, ihobona Tirama ena robe maearimakia tua'i taeanakia 'abana, abomo ena nuatae akanai hanona katobaraina, pokina ia ehore maearima bo'ona ebarainakia, au abomo ebaraina'u.

<sup>3</sup> E'u banamo Priskila mai Akula katobenakia,

ia hanona au kipokia Keriso Iesu ena aka tababaina haukia.

<sup>4</sup> Terarua au pau'uai ekia mauri a'i teraonana. Banamo 'abina nabenakia, aumo ikupaia'u aha'i, ia rama haeai haukia ekia Tirama ena marea haukia ikoikiae abomo banamo 'abina tebaiben.

<sup>5</sup> E'u banamo terarua ekia ituai titou haukia weiakia Tirama ena marea haukia abomo katobenakia.

E'u banamo e'u raona'au hauna Epaineto katobena,

ia hanona Asia aonai hau kori'uaina ena mauri ebaibeni Keriso 'euna.

<sup>6</sup> E'u banamo Maria katobena, ia hanona wai paumiae aka apa'uana ebabaina.

<sup>7</sup> E'u banamo hatia'a'u Androniko mai Iunia katobenakia, ia terarua mai au kipokia wapura itunai tamiaho. Iuhubeau haukia ia terarua te'iobi harainakia, ia hanona Keriso tea'ikakauma 'uaina ba au hanona muriae.

<sup>8</sup> E'u banamo Ampilia katobena, Obiapaka aonai naraona'au aina.

<sup>9</sup> Abomo e'u banamo Urebano katobena, tako haeamo Keriso aonai, e'u raona'au hauna Staku abomo e'u banamo katobena.

<sup>10</sup> Abomo e'u banamo Apele katobena,

ia hana atetua terama ranikiae ena a'ikakaumai ekori 'ini Keriso aonai.

E'u banamo Aristobulo ena itu haukia katobenakia.

<sup>11</sup> E'u banamo hatia'a'u Herodiona katobena,

e'u banamo Nakiso ena itu haukia katobenakia, ia hanona Obiapaka aonai haukia.

<sup>12</sup> E'u banamo Trupena mai Truposa katobenakia, ia hanona Obiapaka paunai aka tebabai harai babi'ekia.

E'u banamo e'u raona'au babi'ena Peresi katobena, ia hanona Obiapaka aonai aka raria 'akina ebabaina.

<sup>13</sup> E'u banamo Obiapaka etina'ana hauna Rufo mai hinana ohi katobenakia,

ia hinana hanona au hina'u ai eao.

<sup>14</sup> E'u banamo Asunukrito, Pilegon, Hereme, Patroba, Herema mai kipokia temiaho haeamo haukia katobenakia.

<sup>15</sup> E'u banamo Pilologo, Iulia, Nerea haibuna ohi abomo Olumupa mai Tirama ena robe maearimakia ikoikiae ia kipokia temiaho haeamo haukia katobenakia.

<sup>16</sup> Ha ha baipau robenai kipomi katobanamonimi. Keriso ena marea maearimakia ikoikiae ekia banamo tetiu ahina heremi.

### *Baraona 'Ini 'Abina Orena Ebekanakia.*

<sup>17</sup> Uaho'aba'u e, nabahi ahinimi, hoa hore abomo emi a'ikakauma tia'i ki'ana haukia mai 'iobi weiiana toa'ina hauna ti'oatana haukia katoiha 'ininakia, abomo herekiae katokapare. <sup>18</sup> Pokina maearima uahomakia haukia hanona Keriso aika eka Obiapaka ena aka a'i tibabaina, 'a kipokia ekia nuatae akakia tibabai, ekia 'abi namokiae abomo bahao rea 'abi'abikiae maearima weiakia ki'a herenai ekia 'iobi aha'i haukia tibahao reanakia. <sup>19</sup> Wai pou namona aiana tuka'aina hanona maearima ikoikiae pouna aba teona, weiiana buonai au hanona wai naonamo ainimi. Au nanuatae wai hanona taba namokiae herekiae katoao tipa, ia taba ki'a obokia ibabaikiae a'i katoraonana. <sup>20</sup> Baibua Tiramana kehore rani a'i kehoma'a Satani aba kehe amataina wai 'apumi ba'akiae. Au nabahuba'ari, aika eka Obiapaka Iesu ena aoko'o hoana heremiae kemiaho.

*A'ikakauma Haukia Baika Ekia  
Banamo 'Abikia.*

- <sup>21</sup> Timoteo, au tararua taka haeamo hauna mai hattia'a'u Luka, Iason, Sosipatros ekia banamo tetiu ahina heremi ai.
- <sup>22</sup> Au, Teretio, Paulo ehina 'abikia marere neianai arerenakia hau'u abo'umo Obiapaka atanai nabanamonimi.
- <sup>23</sup> Gaio ia herenai namiaho, neia ena ituai Tirama ena marea maearimamai tato'u haumai nibarainamai mai aonamomai tamiaho, ena banamo netiu ahina heremi, aiara apa'uana monina ne'imana hauna Erasto mai uaho'abaka Koato terarua ekia banamo abomo tetiu ahinakia heremi.
- <sup>24</sup> Au nabahuba'ari, eka Obiapaka Iesu Keriso ena aoko'o hoana hanona ikoimiai heremiai kemiaho. Amen.

*Tirama Kahabanamona.*

- <sup>25</sup> Tirama kahabanamona, ia hanona mai taburana kebakori 'ininimi emi a'ikakaumai, Iesu Keriso pouna namona nairoro aina hauna taearanai, mai 'abi tohana bunina 'uainai rani homa'ana tebunina hauna ebawaira tinana taearanai. <sup>26</sup> A bariu 'abi tohana weiana hanona miahao banai banai Tiramana ena 'abiai mahabana'i haukia ekia rere rere aonai ewaira tina, maearima ikoikiai 'abi tohana weiana teba'ibinakia, ua buonai hanopaka ikoikiai Tirama kate a'ikakaumana abomo aiana kateka'aina. <sup>27</sup> Aobero Tiramana hamo hamona kahabanamona Iesu Keriso paunai ja nuabina kemiaho banai banai! Amen.

## Paulo Ena Marere Kori'uaina KORINTO Haukia Herekiae

*Puka Aona Irerena 'Abina*

Paulo ena raniai, Korinto hanona aiara apa'uana Akaia hanona aonai Helene 'ekana. Paulo kipona hanona maearima kori'uaina Iesu pouna namona Korintoai eiroro, iamo ekaobo eao 'eka baika ena aka kebabaina aonai a'ikakauma haukia baiatakiae atetua apa'uakia baika terama.

Ua buonai marere neiana ererena, herekiae kehina pou haraina mai ekia atetua abomo kebaberonakia. Ena ta'u apa'uana hanona ekia a'ikakaumai a'i teme'eho marikina, haeamona ekia hoahoa namokia hanona ki'a obokiae a'i temeo. Taeara namona weiana tehawainibe haukia katemauri aina hauna ehina pou haraina, haeamona weiana hanona taba apa'uana ba katebabaina hanona kenamo. Abomo Paulo ni'abi, atetua neiakia maearima herekiae tirama pokina Auba Robe ekia mauri ke'uai aina hanona a'i tenuatae paunai. Paulo ni'abi, taeara namonai kahamiaho haeamo mai Auba Robe ena beruberu a'ikakauma haukia herekiae hauna robakia eahu. Weiakia 'ari haukia ekia mikiri mue robakia eahuna. Neiakia ikoinai hanona Korinto haukia ekia atetua tabakia. Paulo ehore 'abi namokia bo'okia ebenakia weiana Tirama ena nuatae kate'ibina.

Puka neiana iro'ana 13 aonai hanona Paulo ehore taearana namona weiana maearima iraona'auaikia robana eahuna, weiana hanona Auba Robe ena ibeni tabana namona ibeni tabakia ikoikiae 'arakiae, ba Tirama kipona nihore ena maearima nibenakia.

*Puka Paipana Apa'uakia*  
a. Roba iahu. (1.1-9)

- b. Hoa horekia Tirama ena marea aonai. (1.10—4.21)
- c. Nabau hoahoakia ki'a obokia mai itu maurina. (5.1—7.40)
- d. A'ikakauma haukia mai ki'a haukia. (8.1—11.1)
- e. Marea maurina mai kuti taearana. (11.2—14.40)
- f. Keriso mai a'ikakauma haukia ekia mikiri mue. (15.1-58)
- g. A'ikakauma haukia ekia beruberu Iudea'eukia. (16.1-4)
- h. Paulo ena nuatae 'abina mai 'abi orekia. (16.5-24)

*Banamo 'Abina.*

<sup>1</sup> Au Paulo, Keriso Iesu ena iuhubeau hau'u Tirama ena nuataeai eaparina'u, mai a'ikakaumai uaho'abaka Sostene ohi, <sup>2</sup> marere neiana tarerena niwahi Tirama ena marea maearimami Korinto aiaranai haumi heremiae, wai Keriso Iesu aonai etina'animi eaparinimi Tirama ena robe haumiai katoao, mai weiakia 'eka ikoikiae eka Obiapaka Iesu Keriso atana tiaparina tekuti haukia ikoikiae herekiae. Iesu Keriso hanona ia mai aika eka Obiapaka. <sup>3</sup> Tabahuba'ari Tirama aika Hamaka mai Obiapaka Iesu Keriso ekia aoko'o hoana mai baibua katebenimi.

*Paulo Namo 'Abina Tirama Ebena.*

<sup>4</sup> Au rani ikoinai Tirama namo 'abina nabena wai paumiae pokina Keriso Iesu aonai Tirama ena aoko'o hoana ebaihanimi.

<sup>5</sup> Pokina Keriso aonai wai hanona taeara ikoikiae aokiae, emi 'abi 'abi ikoikiae mai emi 'iobi ikoikiae aba ebaobianakia. <sup>6</sup> Keriso pouna tahinana hauna aomiae aba etabura. <sup>7</sup> Ua buonai bariu wai hanona Auba Robe ena beruberu ha a'i tokapu aina ia tubai'ima keaomo eka Obiapaka Iesu Keriso kemai mue. <sup>8</sup> Iesu kehore kebakori 'inini keaomo puanai, ba ia ena mai wapunai wai hanona beho aha'i haumiae katoao. <sup>9</sup> Tirama hanona aia ibabua 'auna hauna, ia ehore wai eaparinimi katoao

Nahuna Iesu Keriso aika eka Obiapaka ohi katobahaeamo.

*Tirama Ena Marea Haukia Ba-iatakia Hoa Tihore.*

<sup>10</sup> Uaho'aba'u e, eka Obiapaka Iesu Keriso atanai nanoinimi, ikoimiai emi 'abi 'abi kehamomo weiana baiatami a'i kepa'a, ia katobahamomo harai aomiai abomo emi raonaraonai. <sup>11</sup> Uaho'aba'u e, Koloe ena itu haukia baika tehina bena'u wai baiatamiai hanona baiara baiara tirama. <sup>12</sup> Au taba na'uahina hauna anina neiana, ha nu'abi notibaha, "Au hanona Paulo 'euna," ha nu'abi, "Au hanona Apolo 'euna," ha nu'abi, "Au hanona Petero\* 'euna," ha nu'abi "Au hanona Keriso 'euna." <sup>13</sup> Ba Keriso hanona tehobina, 'u? Paulo wai paumiai matiu ibiri ropo ubinai teahu 'arina, 'u? 'Ao Paulo atanai wai 'uere robe toa'ina, 'u? <sup>14</sup> Tirama namo 'abina nabena pokina au wai ha a'i aba'uere robenimi, ia Krispo mai Gaio mo aba'uere robenakia. <sup>15</sup> Weiana buonai hau ha a'i ko'abi oi hanona au ata'uai o'uere robe. <sup>16</sup> E, Stefano ena itu haukia abomo aba'uere robenakia, ia murinai a'i na'iolina hau ha aba'uere robena 'ao aha'i. <sup>17</sup> Keriso euhuna'u hanona ba'uere robe paunai aha'i ia pou namona kairoro aina, ba maearima ena aobero 'abinai a'i kairoro, pokina Keriso ena 'ari matiu ibiri ropo ubinai hauna hiabuna a'i meaha'i marikina.

*Keriso Hanona Tirama Ena Hi-abu Mai Ena Aobero.*

<sup>18</sup> Keriso ena 'ari matiu ibiri ropo ubinai pouna hanona aubai te'ari haukia herekiai hanona po'o 'abinai niao, ia aika niba-maurinaka hauka herekai weiana hanona Tirama ena hiabu. <sup>19</sup> Puka robenai aba tererena, "Aobero haukia ekia aobero kabapururuna, mai aotipa haukia ekia aotipa hanona taba aha'i ai kabaona."

Isa 29.14

<sup>20</sup> Ba aobero hauna hanona ae'e? Marere harai hauna hanona ae'e? Rani neianai 'abi eaotipaina hauna hanona ae'e? Tirama ehore hanopaka haukia ekia aotipa hanona po'oai ebaona.

<sup>21</sup> Weiana Tirama ena aobero hanona nahomana, hanopaka haukia ekia aobero ai hanona Tirama a'i kate'ioquina, ia Tirama ena aonamo hanona iroro weiana po'o 'abinai tibaona haunai katea'ikakauma haukia kebamaurinakia. <sup>22</sup> Iuda haukia ekia nuatae hanona hoa apa'uakia katehanakia ba Tirama katebatohana, 'a Helene haukia hanona aobero titabuna. <sup>23</sup> Ia ai hanona Keriso matiu ibiri ropo ubinai e'ari hauna tairoro aina, weiana hanona Iuda haukia nibakaikai reanakia mai rama haeai haukia herekiai hanona po'oai tibaona. <sup>24</sup> Ia weiakia Iuda haukia mai Iuda haukia aha'i haukia balatakiai Tirama eaparinakia haukia herekiai Keriso hanona Tirama ena hiabu abomo Tirama ena aobero. <sup>25</sup> Tirama ena taba weiana po'oai tibaona hauna ehore maearima ekia aobero ekahaona, abomo Tirama 'eunai 'abe'abe tabanai tibaona hauna ehore maearima ena tabura ekahaona.

<sup>26</sup> Uaho'aba'u e, wai maearima aea homamiai Tirama eaparinimi hauna katoraonana, maearima ekia ihaihai hanona bo'omi a'i toaobero, bo'omi a'i totabura, abomo bo'omi obiai a'i torama. <sup>27</sup> Ia Tirama ehore hanopaka haukia wai po'o haumiai tibaonimi haumi etina'animi aobero haukia keba haumaeankia, haemona wai 'abe'abe haumiai tibaonimi haumi etina'animi tabura haukia keba haumaeankia. <sup>28</sup> Hanopaka haukia maearima weiakia tiba'abaea 'abaeankia haukia teiha ta'ereainakia taba aha'i ai tibaonakia haukia Tirama ehore etina'anakia, maearima weiakia hanopaka haukia ti-hore tibapa'uanakia haukia kea'i

\* 1:12: (12) 'ao Geba

ki'anakia. <sup>29</sup> Weiana paunai maearima ha Tirama wairanai keapa 'ekana aha'i. <sup>30</sup> Ia wai hanona Tirama emaiainimi Keriso Iesu ohi ebahamomonimi. Keriso hanona Tirama herenai emai eka aoberoai eao, ba ia haunai hanona habero harobe mai ki'a 'ekanai ebamaurinaka. <sup>31</sup> Weiana paunai Puka robenai aba ererena, "Niapa hauna hanona Obiapaka meapaina."

Ier 9.24

**2***Paulo Keriso Matiu Ibiriropoai Hauna Robana Eahuna.*

<sup>1</sup> Uaho'aba'u e, au awahi heremi Tirama ena 'abi bunikia airoro ainakia raninai, 'abi aotipakiai mai maearima ekia aobero ai a'i airoro. <sup>2</sup> Pokina wai kipokia hamiaho aonai au ao'u a'ia'i haraina taba ha a'i ka'ibina ia Iesu Keriso mai ena 'ari matiu ibiri ropo ai hauna mo ka'ibina. <sup>3</sup> Au awahi naia hamiaho aonai mai 'abe'abe'u mai ta'u ta'u'u mai 'ururu 'ururu'u. <sup>4</sup> E'u 'abi mai e'u iroro hanona maearima ena aobero mai bahiah'i 'abikiai aha'i, ia Auba Robe ena hiabu ai abawaira tinanakia. <sup>5</sup> Pokina wai emi a'ikakauma hanona maearima ekia aobero ai a'i kekor'i au, ia Tirama ena hiabu ai kekor'i au.

*Tirama Ena Aobero.*

<sup>6</sup> Ia a'ikakaumai tetabura haukia herekiai aobero 'abikia tairoro ainakia. Aobero weiana hanona hanopaka neiana 'euna aha'i 'ao hanopaka tipoki aina haukia 'eukia aha'i, poki haukia neiakia hanona ekia hiabu katepua. <sup>7</sup> Ia ai hanona Tirama ena aobero weiana maearima herekiai ebuni hauna tahinana, weiana hanopaka a'i erama baha aonai Tirama hanona aobero weiana aba eba'oruna aika eka nuabiai keao. <sup>8</sup> Aobero weiana hanona hanopaka tipoki aina haukia a'i te'ibina, pate'ibina raninai Tirama ena nuabiai nemiaho Obiapakana matiu ibiri ropo

ubinai a'i pateahu 'arina. <sup>9</sup> Puka robenai tererena 'abana, "Taba weiana kerama hauna hau ha a'i eihana, 'ao 'uruna a'i eona, 'ao hau ha a'i eraonana hauna Tirama aba eba'oruna weiakia ia tiraona'au aina haukia 'eukia."

Isa 64.4

<sup>10</sup> Ia Tirama hanona ena Auba Robe ai taba bunina weiana aika herekai ebawaira tinana. Auba Robe hanona taba ikoikiai nitabunakia buonai Tirama ena raona bunikia abomo ketabu ahinakia. <sup>11</sup> Tai ha maearima ha ena raona a'i ne'ibina, ia kipona aubana nihore ena raona ikoinai ne'ibinakia. Ihobona mo Tirama ena Auba hanona Tirama ena raona ikoinai e'ibinakia. <sup>12</sup> Aika hanona hanopaka ena raonaraona a'i ha'ina, ia Auba Robe weiana Tirama herenai emai hauna ha'ina, ua buonai Tirama ena aoko'o hoana ebenaka tabakia ikoikiai kaha'ibinakia. <sup>13</sup> Taba neiakia ai tahina haukia hanona maearima ena aobero ai teba 'ibinamai 'abikiai a'i ta'abi, ia 'abi weiakia Auba Robe eba'ibinamai haukiai ta'abi. Auba tabakia hanona Auba Robe tea'ina haukia herekiai tahinanakia.

<sup>14</sup> Maearima aonai Auba Robe aha'i hauna Tirama ena Auba Robe herenai timai tabakia ikoikiai a'i nia'i taeanakia, taba weiakia ia herenai hanona po'o tabakiai nibaonakia, abomo obokia a'i niobo, pokina weiakia hanona Aubai mo kaha 'ibinakia. <sup>15</sup> Maearima aonai Auba Robe nemiaho hauna taba ikoikiai anikia ke'obi, ia hau ha aonai Auba Robe aha'i hauna hanona maearima weiana aonai Auba Robe nemiaho hauna ena mauri obona a'i keobo. <sup>16</sup> Puka robenai tererena 'abana,

"Tai Obiapaka ena raona e'iboi ba ia kehore Obiapaka bairobe kebena?"

Isa 40.13

Iamo aika hanona Keriso ena raona aba ha'ina.

## 3

*Hoa Hore Tirama Ena Marea Aonai.*

<sup>1</sup> Uaho'aba'u e, maearima weiakia Auba Robe ai tebonu haukia herekiae a'abi 'abana hanona wai heremiae a'i kahinanakia, ia wai hanona hanopaka neiana haumi 'abanai nahina benimi, matoha miori 'oru'oruna Keriso aonai 'abana. <sup>2</sup> Wai ba'iobi abenimi hanona ihobona 'ae 'abana weianai abanianinimi ia pohama pahihikiae aha'i, pokina wai hanona pohama weiana ianinai a'i tutabura baha, bariu abomo katoana hanona a'i ketaina. <sup>3</sup> Pokina wai haumi hanona hanopaka haukia ekia miahao ai tomiaho ohomo, wai baiatamiae wamuru mai baiara baiara temiaho, ba babai neiakiae hanona wai hanopaka 'eunai tuao, ena miahao paipanai tomiaho. <sup>4</sup> Wai baiatamiae ha notibaha, "Au hanona Paulo murinai naka'a," ha nu'abi "Au hanona Apolo murinai naka'a." Weiana wai hanona hanopaka haukia ekia babai tubabaina.

<sup>5</sup> Ba Apolo hanona tai, mai Paulo abomo tai? Ai hanona Tirama ta'arana tai' haumai, ai emai aka haunai hanona wai tohore Tirama tua'ikakauma, ai ha ha hanona Obiapaka aka ebenamai hauna mo tababaina. <sup>6</sup> Au hanona uho abatona, Apolo hanona beiae eheina, ia Tirama ehore uho eba'omuna. <sup>7</sup> Ba batobato hauna mai hei hei hauna hanona a'i kahaba apa'uanakia, ia Tirama mo kaha'i taeana pokina ia nihore taba weiakia niba'omunakia. <sup>8</sup> Batobato hauna mai hei hei hauna ekia aka hanona a'i tehaeai, Tirama kehore ha ha ekia aka ihobonai 'arakia kebenakia. <sup>9</sup> Ai tararua hanona Tirama ena aka haumai, wai hanona Tirama ena uma haeamona ena itu.

<sup>10</sup> Tirama ibeni ebena'u ihobonai au hanona itu bakori harai haunai aeao itu kupuana aba aba'oruna, ba baika hanona weiana ahnai itu tirobena, iamo

itu katerobena hanona aea katerobe aihona hauna kateraona harai 'uaina. <sup>11</sup> Pokina Tirama hanona aba Iesu Keriso weiana ebakorotina itu kupuanai eao, ua buonai hau ha itu kupuana haeai ha a'i kebakorotina. <sup>12</sup> Itu kupuana ahnai hanona maearima baika gold, silba 'ao pihara 'imarekiae itu tirobena, ia baika hanona matiu ai 'ao tubu ai 'ao aho ai itu tirobena. <sup>13</sup> Ia maearima ha ha ekia aka hoana hanona bakai wapuna weiana kehore kebawaira tinanakia, wapu weiana hanona mai irubana kemai maearima ikoinal ekia aka keakabi ahinakia mai irubai kehobonakia ekia aka ena namo hauna kewaira tina. <sup>14</sup> Itu kupuana weiana ahnai maearima ha ha taba tebabai haukia irubai a'i kate'ara 'akauma raninai ia ekia aka hanona 'arakia katea'i. <sup>15</sup> Ia hau ha ena aka weiana iruba keba'ara 'akaumana raninai ia hanona kekapu, iamo ia kipona hanona kemauri ihobona ia hanona iruba aonai ebeau ahi.

<sup>16</sup> To'iohina wai hanona Tirama ena marea robe abomo Tirama Aubana weiana hanona wai aomiae nemiaho. <sup>17</sup> Hau ha Tirama ena marea robe kea'i ki'ana raninai Tirama kehore hau weiana kea'i ki'ana, pokina Tirama ena marea robe hanona eroibe ba wai naiami hanona marea robe weiana.

<sup>18</sup> Kipomi a'i tomo'oиним. Baiatamiae hau ha niraonana ia hanona eaotipa ki'a baha hanopaka neiana maurina aonai raninai, ia hanona kipona po'o haunai kebaona, weiana ia hanona aotipa hauna tohanai keao. <sup>19</sup> Pokina hanopaka neiana aotipana hanona po'o tabana Tirama wairanai. Puka robenai na terere aihona, "Tirama ehore kipokia tiraonana teaotipa haukia ekia aotipai ebato'onakia."

Iob 5.13

<sup>20</sup> Haeamona etibaha, "Obiapaka hanona e'iohina aotipa haukia ekia raona hanona

anikia aha'i."

Sal 94.11

<sup>21</sup> Weiana paunai maearima ha a'i kahapaina. Taba ikoikia hanona wai 'eumi. <sup>22</sup> Paulo 'ao Apolo 'ao Petero,\* mai hanopaka neiana 'ao mauri 'ao 'ari, mai bariu tirama tabakia 'ao wairai katerama tabakia, ikoikia hanona wai 'eumi,<sup>23</sup> ba wai hanona Keriso aonai tomiaho, Keriso hanona Tirama aonai nemiaho.

## 4

### *Keriso Ena Juhubeau Haukia.*

<sup>1</sup> Ua buonai maearima hanona ai Keriso ena aka haumai abomo Tirama ena raona 'abikia bunikia i'imakia haumaiai katebaonamai. <sup>2</sup> Aka uahomana i'imana hauna hanona poki hauna kebatohana ena aka kebabai haraina mai aona ikoinai. <sup>3</sup> Ia bariu wai 'ao maearima ha bakai ai pehorotina'u hanona a'i naraona apa'uana, haeamona au kipo'u abomo bakai ai a'i nahorotina'u. <sup>4</sup> Au kipo'u behoai a'i nahorotina'u, ia hoahoa weiana hauna hanona au a'i niba berona'u, Obiapaka mo kipona au kebabakaina'u. <sup>5</sup> Weiana paunai bakai ranina a'i nimai baha aonai hau ha bakai ai a'i katohoroti bahana katobai'ima keaomo Obiapaka kemai, ba ia kehore weiakia wapurai tebuni tabakia eai kebakarahinakia, abomo maearima aokiae tebuninakia haukia kebawaira tinanakia. Ba rani weianai maearima ha ha Tirama herenai banamo 'abina katea'ina.

<sup>6</sup> Uaho'aba'u e, wai paumiai au mai Apolo ohi ibabataimai 'abi neiakia ahinanakia, pokina ai heremai ai "Puka robenai tererena hauna a'i katokahaona" 'abina anina kato'obi haraina, hau ha a'i katoapaina mai hau ha a'i katobaki'ana. <sup>7</sup> Tai ehore baika baiatakiai wai ebapa'uanimi? Abomo taba naiana heremai hauna Tirama a'i ebenimi tabana ha, u? Taba weiana toa'ina hauna

Tirama ebenimi raninai aehoma buonai tuapa?

<sup>8</sup> Wai turaonana nuatae tabakia ikoinai aba toa'i. Turaonana wai aba taba heremai tebo'o haumi. Wai turaonana wai hanona aba obia haumiai toao ia ai hanona aha'i. Au naraonana wai patobia toha hanona penamo, ba ai wai kipokia pahaobia oioi. <sup>9</sup> Ia au naraonana Tirama ehore ena juhubeau haumai hanona muri 'akinai ehorotinamai, ihobona ki'a haukia weiakia to'u wairakiai kateahu 'arinakia. Ai hanona baiha baiha tabakiai kataeo hanopaka maikoina aonai maearima mai aneru ikoikiai katearurunamai. <sup>10</sup> Wai turaonana Keriso paunai ai hanona po'o ai taeao, ia wai Keriso aonai hanona tuaotipa. Wai turaonana ai hanona ta'abe'abe, ia wai hanona tutabura, wai hanona timariki ainimi, ia ai hanona te'uhinamai. <sup>11</sup> Rani ikoinai emai mo bariu ai hanona mare'a ta'ari, 'akomai ti'ororo, emai habuni aha'i, tiahunamai, emai miao 'ekana aha'i tarua aruao. <sup>12</sup> Ai hanona kipomai taburamai tohanai tamiaho. Maearima teururu ainamai raninai tabanamonakia, ti'oatanamai raninai tabakiro, <sup>13</sup> atamai tia'i ki'anakia raninai ai hanona ta'abi'abi harai ia herekiae. Ai hanona ihobona hanopaka haena mai taba ikoikiai hamarakia ai tibaonamai emai mo bariu.

<sup>14</sup> Au 'abi neiakia narerenakia hanona wai kaba haumaeanimi paunai aha'i, ia wai e'u raona'au miorimi paunai narabenimi katoraona 'inina a'i katoapa.

<sup>15</sup> Heremai iba'ibomi haukia pebo'o ki'a Keriso aonai, ia hamami hanona a'i kebo'o. Ia pou namona airoro aina mauri toa'ina paunai au hanona hamami ai aeao Keriso Iesu aonai. <sup>16</sup> Weiana buonai nanoinimi, au e'u babai ihobokia katobabai. <sup>17</sup> Neiana paunai Timoteo nauhuna niwahi heremi, ia hanona au e'u raona'au

\* 3:22: (22) 'ao Geba

miorina mai ena a'ikakauma Obiapaka aonai. Ia kehore e'u mauri taearana Keriso Jesu aonai amiaho aina hauna weiana 'eka ikoinai aeao Tirama ena marea aokiai aba'iobi hauna wai kebaraona ininimi.

<sup>18</sup> Baiatamiae baika hanona tiapa pokina tiraonana au a'i kawahi mue heremi. <sup>19</sup> Ia Obiapaka kenuatae raninai, au hanona aba kawahi heremi, ba au kipo'u naiakia tiapa haukia ekia hiabu taba katebabai hauna ka'lobina, ia taba taba te'uahi haukia robakia a'i kahunakia. <sup>20</sup> Pokina Tirama ena obia aiarana hoahoana hanona 'abi'abi 'abaeakiai aha'i, ia mai hiabuna nemiaho. <sup>21</sup> Wai taba tonuatae? Ima'u mai matiuna kawahi kababeronimi, 'ao raona'au mai 'aiaunu hoahoanai kawahi heremi?

## 5

### *Nabau Ki'a Tirama Ena Marea Haukia Baiatamiae Erama.*

<sup>1</sup> Bariu emi babai hanona pouna aba aona wai baiatamiae nabau ki'a hoana erama hau ha hinana i'irina ohi tinabau, ba babai weiana hanona babai ki'a obona maearima atapakai haukia abomo ua a'i tibabai aiho. <sup>2</sup> Ia wai hanona tuapamo, ia a'i tuhai, hau neiana baiatamiae ua ebabai aiho hauna ibakarahina robana patoahuna penamo.

<sup>3</sup> Au wai baiatamiae aha'i, iamo raonaraonai hanona au aba wai heremiae, ba hoa weiana ebabaina hauna hanona aba puma abena 'abana ihobona matoha au aba naia heremiae. <sup>4</sup> Eka Obiapaka Iesu atanai katoto'u raninai au abomo raona raonai aba naia wai kipokia, eka Obiapaka Iesu ena hiabu kewaira tina herekai, <sup>5</sup> ba maearima naiana hauna Satani kahabena, ia hauanina ki'a obona kea'i ki'anai ia aubana hanona keauri Obiapaka ena mai raninai.

<sup>6</sup> Wai tuapa hanona a'i ebero, wai aba to'lobina bakupu muramurana papana 'aki kehore parawa maikoina kebakupuna

ihobona ki'a papana kehore mauri maikoina kea'i ki'anai. <sup>7</sup> Wai bakupu muramurana 'ai'aina weiana ki'a 'abana katone'ena raninai wai hanona parawa mahamahana weiana aonai bakupu muramurana aha'i haunai katoao. Pokina aika eka Kabanai tatuna mamoea Keriso weiana hauna aba teahu 'arina eka ki'a ia'lobokia paukiae, weiana buonai wai hanona aomiae bakupu muramurana aha'i haumiae toao. <sup>8</sup> Weiana paunai aika eka Kabanai tatuna kahababaina parawa aonai bakupu muramurana aha'i haunai, pokina bakupu muramurana 'ai'aina hanona ki'a mai babai ki'a obokia ebenaka, ia parawa weiana aonai bakupu muramurana aha'i hauna hanona raona bero mai 'abi tohana parawana.

<sup>9</sup> E'u marere weiana arerena hauna aonai aba ahina benimi, nabau haukia kipokia hanona a'i katobahaeamo. <sup>10</sup> Au a'i natibaha hanopaka maearimakia neiakia tinabau, tianikia, tibainao, mai kaiba'uku tekuti ainakia haukia kipokia a'i katobahaeamo. Herekiae katopih raninai wai hanona hanopaka neiana katohabona kato'ari. <sup>11</sup> Au wai narere benimi natibaha, wai baiatamiae hau ha kipona netibaha, ia hanona a'ikakauma hauna iamo ninabau, niani ki'a, kaiba'uku nekutiai, ni'abi ki'a, neinu 'ari, mai nibainao, maearima uahomana hauna kipokia a'i katoaniani haeamo 'apua. <sup>12</sup> Atapakai temiaho haukia a'i kababakinakia pokina weiana hanona au e'u aka aha'i. Ia wai emi aka hanona Tirama ena marea aonai temiaho haukia katoba bakainakia. <sup>13</sup> Tirama kehore atapakai temiaho haukia kebabakinakia. Puka robenai e'abi etibaha, "Aka ki'a hauna hanona baiatamiae katobakarahina."

## 6

### *'Abaka A'i Kahaba bakainakia*

*Atapaka Haukia Wairakiai.*

<sup>1</sup> Wai a'ikakauma haumi baiatamiae hau ha uaho'abana ohi tiatetua raninai, aehoma buonai niaoaina atapaka haukia wairakiai tibabakaina? Ia taba buonai a'i niaoaina a'ikakauma haukia herekiae a'i tibaberona? <sup>2</sup> Wai aba to'io bina Tirama ena maearima hanona hanopaka maearimakia kateba bakainakia, ba wai hanopaka maearimakia katoba bakainakia haumi ae-homa buonai atetua papakia baika baiatamiae hanona a'i tuba beronakia? <sup>3</sup> Wai aba to'io bina wairai aika hanona aneru kahaba bakainakia. Ua buonai 'abi tohana mauri neiana tabakia kahaba beronakia hanona ketaina. <sup>4</sup> Atetua uahomakia heremiae tirama raninai taba buonai tuaoainakia bakai haukia weiakia Tirama ena mareai atakia aha'i haukia herekiae? <sup>5</sup> Au na na'abi aiho hanona wai haumaea hoahoakia tobabai, naia wai baiatamiae aobero hauna ha nemiaho raninai, ia pehore a'ikakauma haukia naiakia pebaberonakia. <sup>6</sup> Ia a'ikakauma hauna ha nihore 'abana ni'oatana ba bakai 'ekana niaoaina, wai tuhore atapaka haukia wairakiai ua tubabai aiho.

<sup>7</sup> Weiana paunai wai a'ikakauma haumi baiatamiae atetua uahomana tubabaina raninai ikoimiae hanona aba to'eho. 'Abina aha'i, tibabehonimi 'ao ti'o nimi re'a patobapahihi hanona penamo. <sup>8</sup> Iamo uaho'abami herekiae tubebo abomo tu'oinakia, herekiae tubabai ki'a hanona a'i enamo.

<sup>9</sup> Wai aba to'io bina aka ki'a haukia hanona Tirama ena obia aiaranai a'i katetoto. Ia a'i teme'o nimi, weiakia nabau haukia, kaiba'uku tekuti aina haukia, maearima atawakia tinabauai haukia, mai hau rua tinabau, babi'e rua tinabau haukia, <sup>10</sup> bainao haukia, ani ki'a haukia, inu 'ari haukia, 'abi ki'a haukia, kakikaki haukia, weiakia hanona ha Tirama ena obia aiaranai a'i ketoto 'apua. <sup>11</sup> Wai

baika abomo 'uainai uahomami, ia bariu hanona Obiapaka Iesu Keriso atanai mai eka Tirama ena Aubai emi ki'a aba eutu obonakia, aba ebarobenimi, abomo aba bero ebenimi.

*Huanimi Hanona Tirama Ibanuabina Akana Katobabaina.*

<sup>12</sup> Hau ha ke'abi ketibaha, "Au taba ikoikiae kababai hanona ketaina," 'abi tohana, iamo ikoikiae hanona a'i tenamo heremiae. "Taba ikoikiae kababai hanona ketaina," ia weiakia ha hanona au e'u mauri a'i kepoki aina.

<sup>13</sup> Pohama hanona mo'oru 'euna, mai mo'uru hanona pohama kea'ina. Weiana hanona 'abi tohana, iamo Tirama kehore terarua kebapururunakia. Huanika hanona nabau tabanai a'i keao, pokina huanika hanona Obiapaka 'euna, mai Obiapaka hanona huanika ke'imana hauna. <sup>14</sup> Tirama ehore ena hiabuai Obiapaka Iesu 'ariai ebamikiri muena, ihobonai aika abomo hiabu weianai kebamikirinaka.

<sup>15</sup> 'Abi tohana to'io bina wai ha ha huanimi hanona Keriso huanina 'ete'etekia tubahamona hauani hamonai tuao. Ba au a'i kahore Keriso hauna 'ete'etena ha a'i kaeaoaina nabau babi'ena ohi a'i kabahaeamona. Aha'i 'akina.

<sup>16</sup> Wai to'io bina hau ha nabau babi'ena ohi tibahaeamo hanona terarua hauani hamona, pokina Puka robena aonai na terere aihona, "Rua tibahamomo hanona hauani hamona." <sup>17</sup> Ia hau ha Obiapaka ohi tibahaeamo hauna hanona terarua aubai hanona hamona.

<sup>18</sup> Nabau herenai kato'uru, pokina hau ha ki'a haeai haeai nibabai ikoikiae hanona ia kipona huanina a'i nia'i ki'ana, ia nabauai hanona kipona huanina nia'i ki'ana. <sup>19</sup> Wai aba to'io bina huanimi hanona Auba Robe ena marea robe, ia hanona wai aomiai nemiaho, Tirama ehore Auba Robe ebenimi. Ua buonai wai kipomi a'i katopoki ainimi.

<sup>20</sup> Pokina Tirama hanona aba ekawanimi mai 'arami. Ua buonai

hauanimiai katobabai tabakia ikoikiai aokiai hanona Tirama nuabina katobawaira tinana.

## 7

### *Hawainibe 'Abi'abina.*

<sup>1</sup> Bariu taba weiakia emi marereai tobakai bakai ainakia haukia 'arakia nabamuenakia. Hau a'i patehawainibe hanona penamo. <sup>2</sup> Ia nabau 'abaea nibo'o ki'a paunai hau hanona kipona atawana tohana herenai kemiaho, abomo babi'e hanona kipona atawana tohana herenai kemiaho. <sup>3</sup> Hau kehore atawana herenai ena hawainibe hoana kebabaina, ihobona mo babi'e abomo kehore atawana herenai ena hawainibe hoana kebabaina. <sup>4</sup> Babi'e hanona kipona hauanina a'i kepoki aina ia atawana abomo kepoki, ihobona mo hau kipona hauanina a'i kepoki aina, ia atawana abomo kepoki. <sup>5</sup> Atawami herenai hauanimi a'i katoubo aina ia torarua aomi etaina hanona katomiaho 'abaea rani papana, hauanimi katerobe bahuba'ari paunai, ba murinai katobahamomo mue, weiana Satani 'ekana a'i katoherence a'i mehobonimi, pokina hauanimi kato'ima haraina a'i ketaina paunai. <sup>6</sup> Au 'abi neiana nahinana heremai hanona rauhubu 'abina aha'i ia baraiharai 'abina. <sup>7</sup> Au e'u nuatae maearima ikoinal au ihobo'uai pateao a'i patehawainibe. Ia Tirama hanona ibeni ha ha ebenaka, ha hanona ena ibeni neiana ebena a'i kehawainibe, ha hanona ena ibeni weiana ebena kehawainibe.

<sup>8</sup> Bariu hanona maearima weiakia a'i tihawainibe haukia mai babi'ekia, wapukia mai hau koaekia nahina benakia. A'i katehawainibe katemiaho 'abaea au 'abana hanona enamo. <sup>9</sup> Iamo ia kipokia hauanikia kate'ima haraina a'i ketainakia raninai, katehawainibe. Katehawainibe hanona enamo ba nabau raona raonana weiana ekia mauri a'i mea'i ki'ana.

<sup>10</sup> Tohawainibe haumi nahina benimi, 'abi neiana hanona au

aia'u aha'i ia Obiapaka aiana. Babi'e hanona atawakia herekiai a'i katekaobo 'abaea. <sup>11</sup> Ekaobo babi'ena hanona ibaubo kemiaho, 'ao aha'i raninai haeamona kemue keao atawana herena. Hau abomo atawana a'i kebakarahina.

<sup>12</sup> Harina ikoimiai e, neiana Obiapaka ena 'abi aha'i ia au wai haiamiai nahinana. A'ikakauma hauna ha hanona a'i nia'ikakauma babi'ena eatawana, ba babi'e weiana nenuatae atawana ohi katemiaho raninai, hau weiana atawana a'i kebakarahina.

<sup>13</sup> A'ikakauma babi'ena ha a'i nia'ikakauma hauna eatawana, ba hau weiana nenuatae atawana ohi a'ikakauma babi'ena ohi tebahamomo paunai hau weiana aba erobe, mai a'i nia'ikakauma babi'ena atawana a'ikakauma hauna ohi tebahamomo paunai ia aba erobe. Ia ua a'i pehoma raninai, nahumi hanona pate'opu Tirama wairanai, ia hoa weiana paunai nahumi hanona aba terobe. <sup>14</sup> Ia a'i nia'ikakauma hauna 'ao babi'ena nenuatae atawana a'ikakauma babi'ena 'ao hauna kehabona raninai a'i katokaibuna, hoa na homakia aokiai a'ikakauma hauna 'ao babi'ena buona a'i kehoaina. Tirama hanona aika eaparinaka baibuai kahamiaho. <sup>15</sup> A'ikakauma babi'emu e, oi a'i o'io bina atawamu pa'e oi paumuai mauri kea'ina, abomo a'ikakauma haumu e, oi a'i o'io bina atawamu pa'e oi paumuai mauri kea'ina.

*Oi Aea Homamuai Tirama Eaparin'i'o Hanona Uahomamu Komiaho.*

<sup>16</sup> Maearima ha ha Obiapaka ia ebena maurina ihobonai, abomo ha ha Tirama eaparinakia maurina ihobonai katemiaho. Rauhubu 'abina neiana hanona Tirama ena marea haukia ikoikiai herekiai naba'obi aina. <sup>18</sup> Aba tetarena hauna Tirama ena apari ea'i taeana raninai ena itare a'i

kebunina, ia a'i tetarena hauna Tirama ena apari ea'i taeana raninai katetarena raonana a'i keraonana.<sup>19</sup> Tetarena 'ao a'i tetarena hanona taba apa'uana aha'i. Ia taba apa'uana hanona Tirama ena rauhubu mo kahaka'ai harainakia.<sup>20</sup> Maearima ha ha mauri weiana temiaho aina aonai Tirama eaparinakia ihobonai katemiaho.<sup>21</sup> Oi ta'ara'i haumu aonai Tirama eaparini'o raninai, weiana aomu a'i kearo'ari, ia irubumu ranina ha kehaea raninai weiana koa'i taeana.<sup>22</sup> Ta'ara'i hauna weiana Obiapaka ehore eaparina hauna hanona ta'ara'i hauna aha'i Obiapaka aonai. Ihobona mo, maearima ta'ara a'i nia'i hauna weiana Keriso ehore eaparina hauna hanona Keriso ena ta'ara ia'ina hauna.<sup>23</sup> Wai hanona Tirama aba ekawanimi mai 'arami rarina, paunai maearima 'eukiai a'i katoao.<sup>24</sup> Uaho'aba'u e, ha ha mauri weiana tomiaho aina aonai eaparinimi ihobonai uahomami Tirama kipokia katomiaho.

### *A'i Tehawainibe Haukia Ekia 'Abi.*

<sup>25</sup> Bariu a'i tihawainibe maearimakia 'abi'abina hanona neiana. Obiapaka ena 'abi aha'i ia au e'u 'abi wai heremai nahinana. Ia Obiapaka ena aoko'oai aobero ebena'u paunai wai katobatohana'u.<sup>26</sup> Bariu hanona atetua ranikia, ua buonai au naroonana wai aea tomiaho aiho uahomanai mo katomiaho hanona kenamo.<sup>27</sup> Ohawainibe haumu atawamu a'i kobakarahina, ia a'i ohawainibe haumu hawainibe a'i koraonana.<sup>28</sup> Ia kohawainibe raninai oi ki'a a'i nubabaina, abomo uaho rari kehawainibe raninai ia ki'a a'i nibabaina. Ia hawainibe haukia hanona aro'ari bo'ona katea'inakia ekia mauriai, weiana paunai nabaraonanimi.

<sup>29</sup> Uaho'aba'u e, na na'abi aiho, rani puana hanona aba kemai, ba bariu keaomo waira ranikiai

tehawainibe haukia katemiaho matoha a'i tehawainibe 'abana Tirama ena aka katebabaina.<sup>30</sup> Taeara ihobonai, weiakia tihai haukia katemiaho matoha aokia a'i tiaoko'o 'abana. Tiaonamo haukia katemiaho matoha a'i tiaonamo. Tikawakawa haukia taba weiakia tekawanakia hanona robakia a'i kateahu matoha 'eukia aha'i.<sup>31</sup> Mai maearima weiakia bariu hanopaka tabakia bo'okia tiakaina haukia hanona kateraonana matoha aka weiakia hanona herekiai taba aha'i 'abana. Pokina hanopaka neiana mai bariu nahamiaho aina maurina hanona aba kepua.

<sup>32</sup> Au e'u nuatae hanona wai aomi a'i katearo'ari. A'i ehawainibe hauna hanona Obiapaka mo ena aka nibabaina, ena raona ikoinai Obiapaka aona kebanamona.<sup>33</sup> Ia ehawainibe hauna hanona hanopaka mo tabakia niraonanakia, pokina ena nuatae hanona atawana aona kebanamona.<sup>34</sup> Abomo ena raona hanona nibaruanu atawana aona kebanamona mai Obiapaka aona kebanamona. Ia a'i ehawainibe babi'ena 'ao uahona hanona Obiapaka ena aka mo niraonana, pokina hauanai mai aubai kerobe. Ia ehawainibe babi'ena hanona hanopaka tabakia niraonanakia, pokina ena nuatae hanona atawana aona kebanamona.<sup>35</sup> Au na na'abi aiho ena poki hanona wai emi namo paunai, ia a'i narauhubunimi. Au nanuatae wai hanona mauri beronai katomiaho, Obiapaka ena aka tubabaina raninai aomi a'i kerua.

<sup>36</sup> Hau ha aonai niraonana nahuna uahona\* herenai a'i nibabai harai aba emiaho ki'a baha, ia hau ena nuatae nahuna weiana pehawainibe raninai taeara ketabu kebahawainibena, weiana hanona ki'a a'i nibabaina.<sup>37</sup> Ia hau weiana kipona aona ea'ia'i haraina abomo aona eba-pahihina nahuna uahona a'i ke-

\* 7:36: (36-38) 'ao ena mahoheni babi'ena

hawainibe, ba a'i ebahawainibena abomo ebero. <sup>38</sup> Ba hau weiana nahuna uahona ebahawainibena hanona ebabai harai, iamo hau weiana nahuna uahona a'i ebahawainibena hanona ebabai harai ki'a baha.

<sup>39</sup> Babi'e hanona atawana taina ketai kemiaho rani ikoinai. Ia atawana ke'ari raninai, ia hanona aba ebabi'e 'abaea, ba kenuatae kehawainibe re'a a'ikakauma hauna keatawana Obiapaka aonai. <sup>40</sup> Ia e'u raonaraona hanona nahomana, wapu weiana a'i kehawainibe hanona keaonamo ki'a baha. Au naraonana Obiapaka Aubana hanona au ao'uai, buonai neiana nahinana.

## 8

### Kaiba'uku      Ekia      Aniani Abi'abina.

<sup>1</sup> Bariu neiana hanona baiben anianikia kaiba'uku tebena hauna 'abina. 'Abi tohana aika ha'ibina, "Ikoikai hanona mai eka aotipa." Ba aotipa nihore apa nibabua taeana, 'a raona'au nihore a'ikakauma haukia niba taburanakia. <sup>2</sup> Hau ha kipona niraonana ia hanona mai ena 'obi taba baika e'ibinakia, iamo pe'obi tohanakia hauna a'i e'ibinakia. <sup>3</sup> A hau ha Tirama niraona'au aina hauna hanona Tirama abomo hau weiana e'obi aina.

<sup>4</sup> Ua buonai baiben anianina kaiba'uku tebena ba nahani hauna 'abina neiana. Aika ha'ibina kaiba'uku hanona tirama tohana aha'i hanopaka neiana aonai, ha'ibina Tirama tohana hanona hamona mo. <sup>5</sup> Maeearima tihore tiramai tibaonakia haukia baika kupai mai hanopakai, (weiana 'tiramakia' mai 'aubu obiakia' nahomakia hanona tebo'o.) <sup>6</sup> Iamo aika hanona mai eka Tirama hamona, Hamaka. Ia hanona taba ikoikiai ebabainakia, ba ia paunai nahamiaho. Abomo Obiapaka hanona hamona Iesu Keriso. Ia paunai

taba ikoikiai terama, ba ia paunai aika nahamiaho.

<sup>7</sup> Ia a'ikakauma haukia baika 'abi tohana neiana a'i te'ibina. Bariu rani neianai baika hanona kaiba'uku ena aka aba temamatia haraina buonai aniani uahomakia tiani raninai ia tiraonana weiana hanona kaiba'uku 'euna, ekia raonaraonai aokia a'i nibero, tiraonana aniani weiana teani hauna aba eba'opunkia Tirama wairanai. <sup>8</sup> Aniani hanona a'i keaoainaka Tirama herena, a'i kahaniani re'a Tirama wairanai ena ki'a aha'i 'ao kahaniani re'a Tirama wairanai ena namo aha'i. <sup>9</sup> Iamo kato'ima 'ima harainimi, pokina emi 'iobiai tuaniani weiana kehore ekia a'ikakauma te'abe'abe haukia a'i meba'ehonakia ki'a aonai.

<sup>10</sup> Pokina hau ha ena a'ikakauma e'abe'abe hauna oi aotipa haumu kaiba'uku ena itarai nuaniani keihani'o raninai, ia aona nuba taburana niraonana kebeho mo kaiba'uku ekia aniani keani. <sup>11</sup> Ba uaho'abamu ena a'ikakauma e'abe'abe hauna weiana ia paunai Keriso e'ari hauna hanona oi emu aotipa weiana kehore ia aubana kea'i ki'ana. <sup>12</sup> Oi emu babau weianai uaho'abamu aona nua'i ki'ana ia niraonana eki'a hauna kebabaina, weianai oi uaho'abamu herenai nubeho abomo Keriso herenai nubeho. <sup>13</sup> Weiana paunai aniani weiana ehore uaho'aba'u eba'ehona raninai, au aniani weiana a'i kani mue pokina a'i maba'ehona.

## 9

### Paulo Pou Namona Paunai Arana A'i Nitabuna.

<sup>1</sup> Au hanona ta'ara ia'ina hau'u aha'i. Au hanona iuhubeau hau'u. Au eka Obiapaka Iesu aihana. Wai hanona Obiapaka ena aka nababaina hauna buabuana haumi. <sup>2</sup> Maeearima baika herekiai au hanona iuhubeau hau'u aha'i, ia wai heremai au hanona iuhubeau hau'u, pokina wai Obiapaka tua'ikakaumana hauna

nihore nibatohana au hanona iuhubeau hau'u.

<sup>3</sup> Te'uhina'u haukia ekia 'abi na kabamue aihona. <sup>4</sup> Au mai e'u bero e'u aka 'arana aniani mai bei pa'i. <sup>5</sup> Iuhubeau haukia baika mai Obiapaka hatina mai Petero tibabai ihobokia pababai, atawa'u a'ikakauma babi'ena pabaka'ana e'u kaoao aokiae hanona mai e'u bero. <sup>6</sup> 'Abamai baika a'i kateaka iamo au Banaba ohi ikupaiamai hanona kipomai emai aniani akana kataka, 'u? <sup>7</sup> Huari hauna tabana kipona ena aka 'arana kehoren? Biraura hauna tabana kipona ena uma anianina a'i keani? Mamoe bakori hauna tabana ena mamoe 'aena a'i keinu?

<sup>8</sup> Au ibabatai rani ikoikiae nahiha haukiae mo a'i na'abi'abi, Tirama ena rauhubu abomo 'abi ihobona ehinana. <sup>9</sup> Mose ena rauhubu pukanai na erere aihona, "Poromakau witi iba'iti'itina akana nibabaina aonai pinana a'i kobiri abuna ia kohabona keaniani."

Deu 25.4  
'Abi weiana hanona Tirama poromakau niraona ki'a bahananakia paunai, 'u? Aha'i. <sup>10</sup> Weiana ehinana hanona aika e'uhinaka. 'Abi tohana 'abi weiana hanona aika paukai ua terere aihona. Ni'ani hauna mai nieueu hauna terarua ekia aka tibabaina hauna buabuana tebuabena hana katea'ina. <sup>11</sup> Ai hanona auba ena ube tabatona wai heremiae, ba hauani ibanamona tabakia heremiae kata a'inakia hanona a'i ebero, 'u? <sup>12</sup> Ia baika baraibarai tobenakia hanona mai ekia bero raninai, ai abomo emai beroai barai barai apa'uana heremiae katea'ina.

'A ai uahomana a'i tababaina. 'A ai hanona taba ikoikiae herekiae tabapahihi pokina Keriso ena pou namona a'i tamakaabuna marikina. <sup>13</sup> Wai aba to'ioquina marea robeai tiaka haukia ekia aniani weia marea robeai tia'ina, abomo itara robenai tibarai barai haukia baibenai anianina weia hauna

tiwetena. <sup>14</sup> Ba taeara ihobonai mo Obiapaka e'abi weiakia pou namona teiroro aina haukia ekia mauri ibanamona tabakia hanona ua'a pou namona tia'i taeana haukia herekiae katea'ina.

<sup>15</sup> Ia au e'u bero weiana panoinimi hauna akana a'i ababaina. Mai bariu narere benimi hanona e'u bero weiakia ka'inakia paunai aha'i. Au pa'ari hanona penamo ba hau ha ke'abi au e'u apa neiana anina aha'i. <sup>16</sup> Pou namona nairoro aina paunai kapa hanona a'i ebero. Pokina au nairoro aina hanona Obiapaka ehina bena'u kababaina akana nababaina. Ba pou namona a'i kairoro aina raninai here'uai hanona keki'a ki'a baha. <sup>17</sup> Au kipo'u e'u nuataeai aka neiana pababaina raninai 'ara'u patabuna, ia weiana Obiapaka ena aka ebena'u raninai, aka neiana hanona Tirama au ebapokina'u kababaina mo. <sup>18</sup> Ba 'ara'u hanona taba? Pou namona airoroi 'abaeana 'ara'u robana a'i nahuna mai pou namona akana nababaina aonai e'u bero a'i natabunakia. Au 'ara'u hanona aonamo neiakia.

<sup>19</sup> Au hanona hau ha ta'arana a'i na'i, 'a au kipo'u e'u nuataeai maearima ikoikiae ekia ta'ara'i hau'uai naeao, weiana maearima bo'okia kamaainakia Iesu kate a'ikakaumana. <sup>20</sup> Iuda haukia kipokia tamiaho aonai au hanona Iuda haukia ihobokiae naeao, weiana ia kamaainakia Iesu kate a'ikakaumana. (Abomo au hanona Mose ena rauhubu ba'anai a'i namiaho,) iamo weiakia rauhubu ba'anai temiaho haukia kipokia tamiaho aonai au rauhubu ba'anai temiaho haukia ihobokiae naeao, weiana ia kamaainakia Iesu kate a'ikakaumana. <sup>21</sup> Taeara ihobonai Mose ena rauhubu a'i te'ioquina haukia kipokia tamiaho aonai au rauhubu a'i te'ioquina haukia ihobokiae naeao, weiana rauhubu a'i te'ioquina haukia kamaainakia Iesu kate a'ikakaumana. (Iamo 'abi tohana au Tirama ena

rauhubu a'i ahabona, au hanona Keriso ena rauhubu naka'aina.)<sup>22</sup> Ekia a'ikakauma te'abe'abe haukia herekiae namiaho aonai au abomo na'abe'abe ia ihobokiae naeao, weiana baika kamaiaianakia Iesu kate a'ikakaumana. Ua buonai au hanona taba ikoikiae ihobokiae naeao maearima ikoikiae herekiae, ba taeara tabana ketaina haunai baika kamaiaianakia bamauri katea'ina Keriso herenai.<sup>23</sup> Au taba neiakia ikoikiae nababainakia hanona pou namona paunai, ba au abomo ia kipokia banamona weiana kata'i haeamo.

<sup>24</sup> Wai to'obi haraina beau baitaeai aonai beau haukia bo'ona tibeau, ia hamona mo 'uai 'arana nia'ina. Ua buonai katobeau hanona 'uai beauna katobeau.<sup>25</sup> Beau baitaeai aokiae titoto haukia ikoikiae beau baitaeai weiana ena bairobe pahihina tia'ina. Weiana tibabaina hanona 'uai 'arana weiana a'i kemiahomaha'a hauna katea'ina paunai, 'a aika aka nahababaina hanona 'uai 'arana weiana kemiahomaha'aibana hauna kaha'ina paunai.<sup>26</sup> Ua buonai au nabeau bero baihana naeao mo beau pua irerentia kakara'au, abomo au hanona 'au hauna weiana a'i nikapo 'abaea kapo 'abaea hauna 'abana.<sup>27</sup> Au kipo'u hau'u nabataburana nabapahihina mai ao'u keka'ai haraina, pokina baika herekiae pou namona kairoro aina murinai au a'i temebaki'ana'u 'ara a'i ma'ubo aina ta'una.

## 10

### Kaiba'uku A'i Kahakuti ainakia.

<sup>1</sup> Uaho'aba'u e, au nanuatae 'aba'abaka Mose murinai te'au haukia herekiae taba erama hauna a'i katoreana. Tirama ehore ikoikiae 'auhao ba'anai ebaka'anakia ba 'Aku Birona aonai tekabani.<sup>2</sup> Ia ikoikiae 'auhao aonai mai 'aku aonai te'uere robe Mose i'abana haukiae teao.<sup>3</sup> Ikoikiae hanona anianina weiana Tirama ebenakia hauna ihobona mo teani.<sup>4</sup> Abomo

ikoikiae bei weiana Tirama ebenakia hauna ihobona mo teinu. Tirama ena pihara weiana kipokia teka'a haeamo, piharana weiana haunai bei eharu ahi teinu, ba pihara weiana hanona Keriso.<sup>5</sup> Babai namokia weiakia ebabai, iamo bo'ona 'akina hanona Tirama aona a'i tebanamona, ua buonai hano'akunai te'ari ore hauanikia hanona 'eka haeaihaeai teno uraru.

<sup>6</sup> Taba neiakia ikoikiae hanona ibabatai aika 'euka, kateba raonanaka taba ki'a obokia a'i kahanuataeai 'abaea ia tebabaina 'abana.

<sup>7</sup> Kaiba'uku hanona a'i katokuti ainakia baika tebabaina 'abana, pokina Puka robenai aba ererena, "Maearima hanona temiati teaniani teinuinu ba temikiri hau mai babi'e kipokia ewa ki'a obokia tebabai."<sup>8</sup> Aika hanona a'i kahanabau ki'a baika weia tebabaina 'abana, ba rani hamona aonai ikoikiae taha harau rua aihau (23,000) te'ari.

<sup>9</sup> Aika hanona Obiapaka a'i kahabona baika weia ia tehobona 'abana, weiana 'erau tehore teara 'arinakia.

<sup>10</sup> Abomo aika a'i kaha'arara 'arara ia te'arara 'arara 'abana, weiana ahuahu aneruna ehore eahu 'arinakia.

<sup>11</sup> Taba neiakia terama ia herekiae hanona ibabatai aika 'euka, 'abikia tererenakia hanona aika ibaraonaka hanopaka ena pua nimai aonai.

<sup>12</sup> Ba oi nuraonana aba okori 'ini harai raninai, ko'ima haraini'o a'i mo'eho.

<sup>13</sup> Baihobo weiakia wai heremiae tirama haukia hanona maearima herekiae tirama haukia ihobokia. 'A Tirama hanona aia ibabua 'auna hauna. Ia a'i kehabo 'abaeanimi baihobo weiana emi tabura nitara haona haunai a'i tomo'eho marikina.

Ba baihobo tua'ina raninai, ia taeara ha kebenimi katokapare, weianai katokori 'ini.

<sup>14</sup> Ua buonai, e'u raona'au haumi e, kaiba'uku ikuti aikia hanona katohabonakia.

<sup>15</sup> Wai hanona aobero haumi nahina benimi, e'u 'abi kipomi abomo

katobabataina au taba na'uhina. <sup>16</sup> 'Ere weiana Obiapaka ena anito'u aonai nahaina ba Tirama namo 'abina nahabena hauna nahainu raninai, aika ikoikai Keriso aruaruna nahainu haeamo. Abomo Parawa nahahobina ha ha nahani raninai, aika ikoikai Keriso hauanina nahani haeamona. <sup>17</sup> Parawa hanona hamona Keriso hauanina, aika hanona habo'o ia hauani hanona hamona, pokina aika ikoikai parawa weiana hamona nahani haeamona. <sup>18</sup> Isaraela haukia ekia hoahoa kaharaonana, itara robenai tekine mahikia tiani haukia ikoikiai hanona itara robena akana tibabai haeamo.

<sup>19</sup> Au taba na'uhina, baibenitabana weiana kaiba'uku tibena hauna hanona mai anina, 'u? Abomo kaiba'uku hanona tirama tohana, 'u? <sup>20</sup> Aha'i 'akina. Rama haeai haukia ekia baibenitabana auba ki'a obokia 'eukia, ia Tirama 'euna aha'i. Au nanuatae wai auba ki'a obokia kipokia a'i katobahaeamo. <sup>21</sup> Wai Obiapaka ena 'ereai toinu haumi auba ki'a obokia ekia 'ereai a'i katoinu. Wai Obiapaka ena itarai tuaniani haumi auba ki'a obokia ekia itarai a'i katoaniani. <sup>22</sup> Aika Obiapaka aona kahabahaiarana hanona a'i kenamo, pokina ena puma kebawaira tinana aonai kahakaobo taearana aha'i.

<sup>23</sup> Wai tu'abi "taba ikoikiai kahababai hanona ketaina," ia au na'abi ikoikiai hanona a'i mo katebanamonaka, wai tu'abi "taba ikoikiai kahababai hanona ketaina," ia na'abi ikoikiai hanona a'i mo katebarai harainaka eka a'ikakauma aonai. <sup>24</sup> Wai ha kipona ena namo mo a'i ketabuna, ia 'abana baika ekia namo abomo ketabuna. <sup>25</sup> Mahi kawa 'ekanai tikawa kawainakia mahikia hanona katoani, ia a'i katobakai bakai weiana hanona kaiba'uku herenai tebaibeni hauna 'ao aha'i, aomi a'i temearo'ari. <sup>26</sup> Pokina Puka robena tererena 'abana, "Hanopaka mai aonai temiaho tabakia ikoikiai hanona

Obiapaka 'euna."

Sal 24.1

<sup>27</sup> A'i nia'ikakauma hauna ha kebeauni'o torarua katoaniani ba oi nonuatae koao raninai, wairamuai taba ehoroti haukia ikoikiai hanona koani, a'i kobakai bakai aomu a'i mearo'ari. <sup>28</sup> Ia hau ha kehina beni'o, "Aniani neiana hanona kaiba'uku tebena hauna" raninai, aniani weiana hauna a'i koani, weiana ehina beni'o hauna paunai mai aona a'i mearo'ari paunai. <sup>29</sup> Au a'i na'abi oi haumu nubeho, ia ehina beni'o hauna keraonana oi nubeho.

Weiana hau ha kipona kebakai bakai, aehoma buonai maeearima ha ena raonaraonai au e'u bero kebakai bakai aina? <sup>30</sup> E'u aniani Tirama abanamona ba ɣani raninai, aehoma buonai hau ha au aniani abanamona ɣani hau'u ne'uhina'u?

<sup>31</sup> Ia taba taba tuani toinu 'ao tubabai, weiakia ikoikiai hanona Tirama ena nuabi ibawaira tinana paunai katobabaina. <sup>32</sup> Emi miao aokiai weiakia Iuda haukia, rama haeai haukia 'ao Tirama ena marea maearimakia iba'ehokia akakia a'i katobabai. <sup>33</sup> Wai au nababaina 'abana katobabaina au maearima ikoikiai aokiai kabanamona taeara ikoikiai aokiai. Kipo'u e'u namo a'i natabuna, ia ikoikiai ekia namo natabuna, weiana hanona ia bamauri katea'ina paunai.

## 11

<sup>1</sup> Au Keriso ebabaina ihobona nababaina, wai abomo au nababaina ihobona katobabaina.

*Babi'e 'Arakia Katebahu Abuna Hoana Bahuba'ari Aonai 'Abina.*

<sup>2</sup> Au wai nabanamonimi, pokina taba ikoikiai aokiai turaona 'ini to'o baihana'u abomo ba'iobi abenimi haukia tua'i 'ininkia.

<sup>3</sup> Bariu au nanuatae wai kato'iohi haraina, hau ikoikiai 'arakiai hauna hanona Keriso, babi'e 'aranai hauna hanona ia atawana, Keriso 'aranai hauna hanona Tirama. <sup>4</sup> Ua buonai hau ikoikiai 'arakia mai ibahu abukia

tibahuba'ari 'ao Tirama ena 'abi tehinana hanona 'arakiai hauna Keriso a'i timariki aina.<sup>5</sup> Abomo babi'e 'arana ibahu abu aha'i nibahuba'ari 'ao Tirama ena 'abi nehinana babi'ena hanona atawana ia 'aranai hauna a'i nimariki aina, matoha ia buina terehe obona 'abana.<sup>6</sup> 'A babi'e ha 'arana a'i nibahu abuna raninai, ia hanona buina mekabena. Babi'e buina kerehe obona 'ao buina kecabena hanona mai haumaeana buonai babi'e 'arana hanona kebahu abuna.<sup>7</sup> Hau hanona bahuba'ari aonai 'arana a'i kebahu abuna, pokina ia hanona Tirama ihaihana abomo ena nuabi nibawaira tinana, 'a babi'e hanona hau ena nuabi nibawaira tinana.

<sup>8</sup> Tirama hanona babi'e hauaninai hau a'i ebabaina, ia hau hauaninai babi'e ebabaina.<sup>9</sup> Haeamona Tirama hanona babi'e paunai hau a'i ebabaina, ia hau paunai babi'e ebabaina.<sup>10</sup> Ua buonai babi'e hanona 'arana kebahu abuna, ba hoa weianai aneru kate'jobina ia hanona atawana ena hiabu ba'anai nemiaho.

<sup>11</sup> Eka mauri Obiapaka aonai haunai, babi'e hanona hau herena a'i kehe ahi ikupaiana a'i kemiaho abomo hau hanona babi'e herenai a'i kehe ahi ikupaiana a'i kemiaho.<sup>12</sup> Babi'e hanona hau hauaninai emai, abomo hau hanona babi'e hauaninai nirama. Ia taba ikoikiai hanona Tirama herenai timai.

<sup>13</sup> Kipomi aba tusuraonana, babi'e 'arana a'i ebahu abuna ba maearima wairakiai nibahuba'ari hanona a'i ebero.<sup>14</sup> Hanopaka maurina aonai aika aba ha'jobina bui homa'ana hau herekiai hanona haumaea tabana,<sup>15</sup> ia bui homa'ana hanona babi'e ena nuabi tabana. Tirama ehore babi'e ebena 'arana ibahu abunai keao.<sup>16</sup> Ia hau ha nenuatae hoahoan neiana kebailaha taeaina re'a, au na'abi natibaha, ai mai Tirama ena marea maearima ikoikiai kipokia heremai hanona kuti hoahoana haeai ha aha'i.

*Obiapaka Ena Anito'u Robena Abina.*

(Mt 26.26-29; Mk 14.22-25; Lk 22.14-20)

<sup>17</sup> Bariu e'u ba'iobi 'abina neiana nahina benimi aonai au hanona wai a'i nabananamonimi, pokina emi marea to'ukia tua'i haukia hanona babai ki'a bo'ona tibabai ia ekia baraibarai aha'i maearima herekiai.<sup>18</sup> Kori'uaina hanona wai poumi aona emi marea to'ukia tua'i aokiai hanona hoa tuhore, 'abi neiana papana nabatoha 'apuana.<sup>19</sup> (Hoa hore hanona kat-erera a'i keaha'i ba weianai 'abi tohana tehinana haukia hanona kahaiha tinanakia.)<sup>20</sup> Weiana paunai 'eka hamonai tusuto'u ani robe tua'ina, iamo weiana hanona Obiapaka ena aniani robena a'i tuani.<sup>21</sup> Pokina tuaniani raninai, ha ha emi aniani mo tuani 'abami a'i to'imanaakia, weiana buonai baika hanona mare'a ti'ari 'a baika teinu 'ari.<sup>22</sup> Emi ituai patoaniani mai patoinu. Tirama ena marea haukia tubataeainakia mai herekia taba aha'i haukia tuba haumaeanaakia. Aea kahinabe aihonimi? Turaonana aka neiana tubabaina hanona kabanamonimi, 'u? Aha'i 'akina.

<sup>23</sup> Ba'iobi neiana wai abenimi hauna hanona Obiapaka herenai a'ina hauna ihobona. Hinahinana ehina rabinal Obiapaka Iesu parawa ea'ina,<sup>24</sup> namo 'abina Tirama herenai ehinana. Epua hanona parawa ehobina ba e'abi etibaha, "Neiana hanona au hauan'i u nabaiben'i wai 'eumi. Na katobabai aiho au iraona 'ini'u."<sup>25</sup> Teaniani murinai taeana ihobonai mo 'ere ea'i taeana ba e'abi etibaha, "Ere neiana hanona Tirama ena 'abi'uai apa'uana mahamahana, au e'u 'ari aruarunai nabatohana. Neiana katobabaina katoiu au iraona 'ini'u ranikia ikoikiai aokiai."<sup>26</sup> Parawa neiana tuana mai 'ere neianai toinu ranikia ikoikiai, wai hanona Obiapaka ena 'ari pouna tohinana keaomo ia kemai.

<sup>27</sup> Ua buonai, hau ha ena raona

a'i ebero aonai parawa keana 'ao 'ereai keinu raninai, ia hanona aba ebeho Obiapaka huanina mai aruaruna herekiai.<sup>28</sup> Weiana paunai hau ha kipona aona ketabu harai 'uaina ba parawa keana mai 'ereai keinu.<sup>29</sup> Pokina ia parawa niana mai 'ereai neinu iamo Obiapaka huanina a'i nibabataina raninai ia hanona Tirama ena bakai anianina niana mai inuinuna neinu.<sup>30</sup> Weiana buonai, wai bo'omi hanona toinawa, tu'abe'abe abomo bo'okia aba te'ari.<sup>31</sup> Ia aika kipoka aoka kahatabu harai 'uaina raninai, Tirama ena bakai aonai a'i kahatoto.<sup>32</sup> Ia Obiapaka aika nibabakainaka mai puma nibenaka hanona nirobenaka, weiana hanopaka maearimakia kipokia puma a'i kahahoai haeamona paunai.

<sup>33</sup> Ua buonai, uaho'aba'u e, tuto'u Obiapaka ena aniani robena katoani raninai 'abami kato'imanaika.<sup>34</sup> Hau ha mare'a ke'ari raninai, ia hanona ena ituai keaniani ba kemai, weiana katoto'u raninai wai Tirama ena bakai aonai a'i katototo.

'Abi baika hanona muriai au kawahi aonai kahina benimi.

## 12

### Ibeni Tabakia Auba Robe Hernai Timai.

<sup>1</sup> Uaho'aba'u e, bariu au e'u nuatae wai Auba Robe ena ibeni tabakia hanona kato'obi harainakia.<sup>2</sup> Wai to'ibina, a'i to'a'ikakauma baha aonai, kaiba'uku weiakia a'i timauri mauri haukia tehore te'uai ainimi abomo tebaka'a parenimi.<sup>3</sup> Ua buonai au wai nahina benimi, Tirama ena Auba ena baraibarai ai ni'abi'abi hauna hanona Jesu a'i neururu aina a'i netibaha, "Jesu hanona eki'a," abomo Auba Robe ena baraibarai ea'ina hauna pinanai ni'abi netibaha, "Jesu hanona Obiapaka."

<sup>4</sup> Auba Robe ena ibeni tabakia hanona haeai haeai, iamo Auba

Robe hamona mo weiana nihore nibaiben. <sup>5</sup> Obiapaka ena aka ibabaikia taearakia hanona haeai haeai, iamo Obiapaka hamona mo ta'arana naha'i.<sup>6</sup> Maearima eka mauri aonai Tirama ena aka taearakia hanona haeai haeai, iamo Tirama hamona mo nihore ena maearima ikoikai iriara nibenaka ia ena aka kahababai.<sup>7</sup> Auba Robe nihore a'ikakauma maearimakia ha ha hiabu nibenakia hanona Tirama ena marea maearimakia ikoikiai ibaraikia ekia namo paunai.<sup>8</sup> Auba Robe nihore hau ha aobero 'abikia nibena kehina, Auba Robe ihobona mo weiana nihore ha aotipa 'abikia nibena kehina.<sup>9</sup> Auba Robe ihobona mo weiana nihore hau ha a'ikakauma nibena, Auba Robe hamona mo weiana nihore ha inawa ibanamokia hiabuna nibena inawa 'ao haiara kebanamonakia.<sup>10</sup> Auba Robe weiana nihore hau ha hiabu nibena bata'uta'u huri hoakia kebabai, ha hanona mahabanai 'abikia kehina, haeamona ha hiabu nibena auba haeai haeai ekia haeai kehina pouna, ha hiabu nibena maea haeai haeai ke'abi, ha hanona hiabu nibena maea haeai haeai fehinana anikia kea'i banainakia.<sup>11</sup> Taba neiakia ikoikiai hanona Auba Robe hamona ia ikupaiana nibabainakia, ia nihore maearima ikoikai ha ha ibeni haeai haeai nibenakia ia kipona ena nuatae ihobonai.

### Aika Ikoikai Hanona Hauani Hamona Puapuana.

<sup>12</sup> Maearima huanina hanona hamona, iamo 'ete'etena hanona ebo'o, ba 'ete'etekia weiakiai hanona hauani hamonai teara 'au. Ba Keriso abomo uamo homana.<sup>13</sup> Ihobonaimo aika ikoikai Iuda haukia 'ao Helene haukia, ta'ara'i haukia 'ao ta'ara a'i tia'i haukia Auba Robe hamona ehore hauani hamonai eba'uere robenaka, aika ikoikai hanona Auba Robe hamona ha'ina aokai nemiaho.

<sup>14</sup> Maearima huanina hanona 'etena hamona aha'i ia 'etena ebo'o.<sup>15</sup> Ba ae pe'abi petibaha,

"Au hanona ima aha'i buonai au hanona hauani 'etena ha aha'i," ba 'abi weiana pehinana re'a ae hanona hauani 'etena ha ai a'i keibao taearana aha'i.<sup>16</sup> Mai haia petibaha, "Au hanona maha aha'i buonai, au hanona hauani 'etena ha aha'i," ba 'abi weiana pehinana re'a haia hanona hauani 'etena ha ai a'i keibao taearana aha'i.<sup>17</sup> Ba hauani maikoinai maha ai peao raninai, aia aea peo'o aihona? 'Ao hauani maikoinai haia ai peao raninai, timi aea peo aihona?<sup>18</sup> Ua homana aha'i. Tirama ena nuatae ihobonai hauani 'etena ikoinal 'ekakia tohakiai ehorotinakia ba ha ha ekia aka tohakia katebabai.<sup>19</sup> Ba 'ete ikoikiai hanona 'ete hamonai pateao raninai, hauani hanona ae'e?<sup>20</sup> Hauani hanona ua homana aha'i. Hauani hanona hamona ia 'etena hanona ebo'o.

<sup>21</sup> Ua buonai maha hanona ima a'i kehina benakia a'i ketibaha, "Au wai a'i nanuatae ainimi," Ara abomo ae a'i kehina benakia a'i ketibaha, "Au wai a'i nanuatae ainimi."<sup>22</sup> Aha'i. 'Ete weiakia hauanai ti'abe'abe haukia pateaha'i raninai hauani hanona a'i keaka harai.<sup>23</sup> Abomo hauani 'etena baika naharaonana ekia aka a'i teapa'ua haukia naha'ima harainakia, 'a 'ete weiakia nahahahaumaeai haukia hanona habuniai nahabahu abu harainakia.<sup>24</sup> 'A 'etekia ihakia tenamo haukia hanona robakia a'i naha ahunakia. Tirama hauani na ebabai aihona hanona 'ete ikoikiai ebahamonakia hauani hamonai, te'abe'abe haukia abomo ne'ima harainakia.<sup>25</sup> Ua buonai hauani aonai hanona hoa hore aha'i, ia 'ete ikoikiai hanona kateba-haeamo ha ha katebarai barai.<sup>26</sup> Ba 'ete ha kehaiara raninai 'ete ikoikiai hanona ia kipokia katehaiara haeamo, ba 'ete ha atana katebanamona raninai ikoikiai ia kipokia kateaonamo haeamo.

<sup>27</sup> Bariu wai ikoimiai hanona Keriso hauanina, ba wai ha ha hanona ia hauanina 'etena

ha.<sup>28</sup> Tirama ehore ena marea aonai maearima ea'i taeanaxia, kori'uaina hanona iuhubeau haukia, ibaruana hanona mahabanai haukia, ibaihauna hanona ba'iobi haukia, ba hiabu hoakia haeai haeai katebabai haukia, ia murikiai hanona inawa katebanamo haukia, baika barai barai haukia, baika 'uai haukia, ba weiakia maea haeai haeai kate'abi haukia.<sup>29</sup> Ia ikoikiai hanona iuhubeau haukia mo aha'i, ikoikiai hanona mahabanai haukia mo aha'i. Ikoikiai hanona ba'iobi haukia mo aha'i. Ikoikiai hanona hiabu hoakia katebabai haukia mo aha'i.<sup>30</sup> Ikoikiai hanona inawa katebanamo haukia mo aha'i. Ikoikiai maea haeai haeai kate'abi haukia mo aha'i. Ikoikiai maea haeai haeai anikia katea'i banai haukia mo aha'i.<sup>31</sup> Auba Robe ena ibeni apa'uakia haukia katonuatae ainakia.\*

Bariu au kahore taearea namona tohana hauna kabaihanimi.

## 13

### Raona'au.

<sup>1</sup> Au maea haeai haeai mai aneru maeakiai pa'abi re'a, iamo here'uai raona'au aha'i raninai, au hanona matoha kapa 'ao irarabu weiakia tiahu 'urukiamo tebua haukia 'abakia.<sup>2</sup> Au mahabanai ibenina pa'ina 'ao Tirama ena 'abi bunikia mai aotipa ikoinal pa'ibinakia, abomo e'u a'ikakauma petabura ki'a baha kobio paba ibiunakia re'a, iamo here'uai raona'au aha'i raninai, au hanona taba aha'i.<sup>3</sup> E'u taba ikoikiai uraruhaukia pabenakia, abomo hauani'u pabaiben'i abaea irubai patehuhuna pe'ara obo re'a, iamo here'uai raona'au aha'i raninai, weiakia ikoikiai ekia namo aha'i au here'uai.

<sup>4</sup> Raona'au hoana hanona bakiro mai rabo harai, raona'au hoana hanona a'i niwamuru 'ao a'i nibaro'e 'ao a'i niapa.<sup>5</sup> Raona'au hoana hanona a'i nibapairi pairi,

\* 12:31: (31) 'ao tonuatae ainakia.

a'i eani ki'a, a'i niopuere noanoa mai maearima ekia beho a'i ni-raona 'ini. <sup>6</sup> Raona'au hoana hanona aka ki'a a'i niaonamo aina, 'a ia hanona bero akana niaonamo aina. <sup>7</sup> Raona'au hoana hanona taba ikoikiai aokiai a'i nihaba'au, ena a'ikakauma a'i ni'abe'abe, rani ikoinai buabeniai nemiaho mai ni-bapahihi taba ikoikiai aokiai.

<sup>8</sup> Raona'au hanona kemiaho banaibana. Mahabanai 'abikia katehina iamo aba katepua, maea haeai haeai kate'abi iamo aba katepua, aotipa 'abikia katehina ia abomo aba katepua. <sup>9</sup> Pokina eka aotipa hanona teko'iko'i mai eka mahabanai 'abikia teko'iko'i mo a'i tebero 'au harai, <sup>10</sup> ia ebero 'auna tohana kemai raninai, weiakia a'i tebero 'au harai haukia hanona kate'akauma. <sup>11</sup> Au miori'uai raninai e'u 'abi'abi, e'u raonaraona, e'u 'iobi ikoikiai hanona temiori, 'a bariu au aba ahau aonai miori ekia hoahoa weiakia ikoikiai aba ahabonakia. <sup>12</sup> Taba bariu nahaiha hanona matoha oreore 'abu'abunai oreoreka nahaihana 'abana, muriai hanona katewaira tina harai kahaiha harainakia. Taba ikoikiai bariu hanona papakia mo na'iobinakia, 'a muriai hanona ka'iobi 'au-nakia, matoha Tirama au e'iobi 'auna'u 'abana. <sup>13</sup> Bariu taba aihau neiakia hanona katemiaho banaibana, a'ikakauma, buabenai, mai raona'au. Ia neiakia aihau baiatakiai apa'uana 'akina hanona raona'au.

## 14

*Mahabanai Ibenina Mai Maea Haeai Ni'abi Ibenina.*

<sup>1</sup> Raona'au taearanai katoka'a, Auba Robe ena ibeni tabakia hanona katonua ki'ainakia, iamo mahabanai ibenina katonuataeai apa'uana weianai Tirama pouna katohinana. <sup>2</sup> Pokina hau ha maea haeai ai ni'abi hanona maearima a'i nehina benakia ia Tirama nehina bena, 'abi tohana ena 'abi obokia a'i kateobo, ia hanona taba bunikia nehinanakia Auba Robe ena hiabuai. <sup>3</sup> Ia nimahabanai

hauna hanona Tirama ena 'abi nehinana maearima herekiai, nibarainakia, aokia nibataburana, abomo aokia nibakirona. <sup>4</sup> Hau weiana maea haeai kate'abi hauna ia kipona mo nibaraina, ia nimahabanai hauna hanona Tirama ena marea maearimakia ikoikiai nibarainakia. <sup>5</sup> Au nanuatae ikoimiai maea haeai haeai kate'abi iamo e'u nuatae tohana hanona katomahabanai, nimahabanai hauna hanona eapa'ua ba maea haeai haeai ni'abi hauna, pokina maea haeai weiana kea'i banai hauna aha'i raninai Tirama ena marea maearimakia ikoikiai ibaraikia taearana aha'i. <sup>6</sup> Uaho'aba'u e, au pawahi heremai maea haeai haeai pa'abi, iamo 'abi weiakia Tirama ebawaira tina haukia, aotipa 'abikia, mahabanai 'abikia, 'ao ba'iobi 'abikia baika a'i pawahi ainakia raninai, maea haeai ai ka'abi ena namo hanona taba wai heremai? Ena namo aha'i tohana.

<sup>7</sup> Ihobona taba baika a'i timauri mauri ia 'uru nahababuana tabakia weiakia, remoremo 'ao kita, 'urukia a'i katebero harai raninai maearima aea kate'iobi aihona hui tabana 'uruna tibabuana. <sup>8</sup> Ihobona huari pihina neubaina hauna pihi a'i keubai haraina raninai tai keba'oru huari kekoru abuna? <sup>9</sup> Heremai abomo uamo homana, wai maeamiai 'abi a'i katohina harai raninai hau ha aea ke'iobi aihona wai taba to'uhina? Weiana hanona wai aba tu'abi 'abaea 'abi 'abaea mo. <sup>10</sup> 'Abi tohana hanopaka neiana maikoina aonai maea haeai haeai hanona tebo'o, ba ikoikiai mo hanona mai anikia. <sup>11</sup> Hau ha maea weiana nehinana ba au a'i na'iobina raninai, ni'abi hauna hanona au here'uai hanopaka haeai hauna, au abomo hanopaka haeai hau'u ia herenai. <sup>12</sup> Heremai abomo uamo homana. Wai tonuatae ki'a baha Auba Robe ena ibeni tabakia katoa'inakia buonai, ibeni weiakia Tirama ena marea maearimakia katebarainakia

mai kateba taburanakia haukia katonoiai taburanakia Tirama herenai.

<sup>13</sup> Maea haeai ni'abi hauna hanona mebahuba'ari Tirama menoia 'abi ia'i banaikia me'ibina ba 'abi nehinanakia haukia kea'i banainakia. <sup>14</sup> Pokina au maea haeai nabahuba'ari raninai, auba'u hanona nibahuba'ari ia au ao'u hanona nemiaho 'abaea. <sup>15</sup> Ba au taba kababaina? Au auba'u ai kabahuba'ari hanona ao'u ai abomo kabahuba'ari. Au auba'uai kahui hanona ao'u ai abomo kahui. <sup>16</sup> Ba oi aubamuai Tirama namo 'abina nubena raninai, mearima 'abaeana ha emu namo 'abina bahuba'arina weiana obona a'i keobo hauna "Amen" aea kehina aihona. <sup>17</sup> Emu namo 'abina bahuba'arina Tirama herenai hauna enamo ki'a baha, ia mearima baika hanona a'i nibarainakia. <sup>18</sup> Au namo 'abina Tirama herenai nahinana, pokina au rani bo'okia maea haeai haeai nahina ba wai ikoimai. <sup>19</sup> Au nanuatae Tirama ena marea to'una aonai maea haeai haeai 'abi taha harau haea (10,000) a'i kahinana, ia 'abi ima obokia kateobo haukia kahinanakia katebarainakia ekia 'obi kerama.

<sup>20</sup> Uaho'aba'u e, taba neiakia herekiae miori ekia raonaraonai a'i katoraonaraona ainakia, 'a ki'a ibabaikiae wai hanona miori 'oru'orukia 'abakiae katoao, ia emi raonaraonai wai hanona hau apa'uakia 'abakiae katoao. <sup>21</sup> Puka robenai na erere aihona, "Obiapaka ni'abi netibaha, maea haeai haeai haukia mai hanopaka haeai haukia pinakiae au kahore mearima neiakia herekiae e'u 'abi kahinana. Iamo Iuda haukia neiakia hanona au aia'u a'i kateona."

Isa 28.11, 12

<sup>22</sup> Ua buonai maea haeai 'abi hanona a'i tia'ikakauma haukia kate'ibina hoa weiana hanona Tirama herenai nimai, ia tia'ikakauma haukia paukiae aha'i, iamo mahabanai hanona a'ikakauma haukia hoa weianai ekia a'ikakauma katetabura, ia a'i tia'ikakauma haukia paukiae aha'i.

<sup>23</sup> Weiana Tirama ena marea mearimami ikoimiae katoto'u aonai, maea haeai haeai kato'abi ba mearima taba neiakia obokia a'i tiobo haukia mai a'i tia'ikakauma haukia to'u weiana aonai a'ikakauma haumi maea haeai haeai tu'abi aiamai kateona raninai, ia kate'abi wai hanona tubeau 'ari. <sup>24</sup> Ia ikoimiae mahabanai 'abikia katohina aonai, mearima taba neiakia obokia a'i tiobo haukia 'ao a'i tia'ikakauma haukia aiamai kateona raninai kate'ibina ia hanona ki'a haukia. Ba 'abi teona hauna kehore ia keba bakainakia, <sup>25</sup> ia ekia raona bunikia ikoikiae katekere, ba katekuti Tirama katebanamona kate'abi katetibaha, "Abi tohana Tirama hanona neia wai batatamiae."

*Tirama Ena Marea Ena Aka Paipana.*

<sup>26</sup> Ua buonai, uaho'aba'u e, taba na kahahoma? Wai tuto'u tubahuba'ari hanona hui ha tua'ina, ha ba'obi nibaibenai, ha hanona Tirama taba ha herenai ebawaira tinana hauna pouna nehinana, ha maea haeai ni'abi, abomo ha hanona maea haeai 'abina weiana nia'i banaina. Taba neiakia ikoikiae tubabai hanona Tirama ena marea mearimakia ibarikiae mai, ibataburakiae. <sup>27</sup> Maea haeai 'abi raninai, mearima hamona, rua 'ao aihau mo kato'abi, ia rani hamonai a'i kato'abi, ha ke'abi 'uai ba ha murinai ko'abi, abomo hau ha kehore 'abi tohinana hauna kea'i banaina. <sup>28</sup> Ia maea haeai 'abikiae ia'i banaikiae hauna aha'i raninai, maea haeai ai ni'abi hauna a'i ke'abi aota marea to'una weiana aonai, ia kiponamo herenai mai Tirama herenai ke'abi. <sup>29</sup> Mahabanai hamona, rua 'ao aihau mo kateiroro ba 'abakiae baika hanona 'abi weikiae tehina haukia kateraonaraona ainakiae. <sup>30</sup> Tirama ena 'abi ha kemai temiati tibahu haukia ha herenai kewaira tina raninai, weiana eiroro 'uai hauna ke'oro ba Tirama ena 'abi emai hauna aiana kateona.

<sup>31</sup> Taeara neianai

mahabanai haumi ikoimiai hamo hamo Tirama ena 'abi katohinana, weiana maearima ikoikiai kate'lobina abomo katetabura.<sup>32</sup> Mahabanai 'abikia katehinanakia haukia ia kipokia pinakia kate'imananakia keaomo ekia rani ketaina ba kate'abi.<sup>33</sup> Pokina Tirama hanona bahuahurea Tiramana aha'i, 'a ia hanona baibua Tiramana. Tirama ena maearima ekia marea to'ukia ikoikiai aokiai tibabaina 'abana,<sup>34</sup> babi'e hanona a'i kate'abi marea to'ukia aokiai. Ia hanona ekia bero aha'i a'i kate'abi, Mose ena rauhubu e'abi ihobona ia hanona a'i katepoki.<sup>35</sup> Babi'e tenuatae taba ha kate'lobina raninai ekia ituai ua'a atawakia katebabainakia, pokina babi'e ha Tirama ena marea to'unai ke'abi hanona mai haumaeana.<sup>36</sup> Turaonana Tirama ena 'abi hanona wai Korinto haumi heremiai ekarahi? Ao waimo ikupaiami paumiai emai? Aha'i 'akina.<sup>37</sup> Hau ha niraonana ia hanona mahabanai hauna 'ao Auba Robe ena ibeni ha ea'ina hauna, ia ke'lobi haraina au taba narere benimi haukia hanona Obiapaka ena rauhubu 'abina.<sup>38</sup> 'A ia rauhubu neiakia a'i kea'i taeanakia raninai wai abomo ia aiana a'i katoa'i taeana.<sup>39</sup> Ua buonai, uaho'aba'u e, mahabanaiai Tirama ena 'abi ihinana hanona katohau aroaina, ia maea haeajai kate'abi haukia a'i katoba'oronomia.<sup>40</sup> Taba ikoikiai hanona taeara beronai haeamona paipakia tohakiai katobabainakia.

## 15

### *Keriso Ena Mikiri Mue.*

<sup>1</sup> Uaho'aba'u e, bariu au nanuatae pou namona airoro aina heremiai hauna toa'ina weiana ahanai emi a'ikakaumai tikori 'ini hauna kabaraonanimi. <sup>2</sup> Pou namona weiana heremiai airoro aina hauna katoa'i 'inina hanona bamauri katoa'ina, weiana hanona wai a'i tua'ikakauma 'abaea. <sup>3</sup> Au pou namona a'ina hauna wai abenimi, neiana

hanona taba apa'uana 'akina.\* Weiana Keriso hanona aika eka ki'a paukiai e'ari Puka robenai tererena ihobona,<sup>4</sup> weiana ia tehorena, ba wapu ibaihaunai emikiri mue emauri Puka robenai tererena ihobona.<sup>5</sup> Ia hanona Petero† herenai ewaira tina 'uai muriai iuhubeau haukia harau haea rua herekiai ewaira tina.<sup>6</sup> Weiana murinai ia hanona a'ikakauma haukia hinabu ima abihana ikoikiai rani hamonai herekiai ewaira tina, maearima weiakia bo'ona hanona bariu timauri ohomo, 'a baika hanona aba te'ari.<sup>7</sup> Ba ia ewaira tina Iakobo herenai, muriai iuhubeau haukia ikoikiai herekiai ewaira tina.

<sup>8</sup> Orena 'akinai hanona here'uai abomo ewaira tina, au hanona rama taearana tohanai a'i arama hau'u.<sup>9</sup> Iuhubeau haukia ikoikiai baiatakiai au hanona ako'iko'i aki, ba au e'u bero aha'i kateaparin'a'u iuhubeau hau'u, pokina au Tirama ena marea maearimakia a'oatanakia.<sup>10</sup> Ia Tirama ena aoko'o hoana paunai au hanona iuhubeau hau'uai naeao, mai ena aoko'o hoana ebena'u hauna buona a'i eaha'i. Au hanona aka ki'a baha ba iuhubeau haukia ikoikia, iamo weiana hanona au kipo'u a'i aka, 'a Tirama ena aoko'o hoana au here'uai hauna ebatabarana'u aka.<sup>11</sup> Weiana buonai au airoro aina 'ao iuhubeau haukia baika teiroro aina re'a, ia Iesu e'ari haeamona emikiri mue pouna ai tairoro aina hauna wai toa'ikakaumana.

### *Aika Eka Mikiri Mue.*

<sup>12</sup> Bariu ai hanona Keriso 'ariai emikiri mue hauna pouna tairoro aina, ba aehoma buonai wai baika tu'abi 'ariai a'i katemikiri mue na tuhoma?<sup>13</sup> Ba 'ariai mikiri mue aha'i raninai Keriso abomo 'ariai a'i pemikiri.<sup>14</sup> Keriso 'ariai a'i pemikiri raninai, ai emai iroro hanona anina aha'i, ba wai emi a'ikakauma abomo anina aha'i.

\* 15:3: (3) 'ao kori'uaina. † 15:5: (5) 'ao Geba

<sup>15</sup> Weiana ahana'i, ai hanona aba bai'oi haumaiai pataeo pokina Tirama pouna tahnana ia hanona Keriso 'ariai ebamikiri muena. Ia 'ariai mikiri mue aha'i raninai, Tirama abomo Keriso 'ariai a'i pebamikiri muena. <sup>16</sup> Pokina 'ariai mikiri mue aha'i raninai, Keriso abomo a'i pemikiri mue.

<sup>17</sup> Ba Keriso a'i pemikiri mue raninai, wai emi a'ikakauma hanona anina aha'i, wai hanona ki'a aonai patomiaho ohomo.

<sup>18</sup> Ba neiana anina hanona Keriso tea'ikakaumana te'ari haukia hanona aba pate'akauma. <sup>19</sup> Bariu hanopaka maurina neiana iku-paiana mo paunai eka buabeni Keriso herenai hahorotina raninai, aika hanona pateaoko'oai ki'a bahanaka ba hanopaka maearimakia ikoikiai.

<sup>20</sup> Iamo 'abi tohana Keriso hanona 'ariai emikiri mue. Weiana hanona 'ari haukia ekia mikiri mue hoana kori'uaina. <sup>21</sup> 'Ari hanona maearima hamona ena babai paunai emai, ihobonai 'ariai mikiri mue abomo maearima hamona ena babai paunai nimai. <sup>22</sup> Adamu ena babai ki'a paunai maearima ikoinai ti'ari, ihobonai Keriso ena babai harai paunai maearima ikoikiai katemauri. <sup>23</sup> 'A mikiri mue paipana tohanai Tirama kehore ha ha kebamikiri muenakia. Kori'uaina hanona Keriso, muriai hanona ia ena mai mue raninai weiakia Keriso tia'ikakumana haukia.

<sup>24</sup> Weiana murinai hanopaka puana kemai. Rani weianai Keriso kehore auba ki'a obokia ekia poki haukia ikoikiai, obia haukia ikoikiai, mai hiabu haukia ikoikiai keba pururunakia, ba ia ena obia aiarana kebamuena Hamana Tirama imanai keutana.

<sup>25</sup> Keriso hanona keobiai kemiaho keaomo Tirama kehore 'ou haukia ikoikiai Keriso 'apuna ba'anai kehorotinakia. <sup>26</sup> 'Ou hauna orena Iesu kehore keba pururuna hauna hanona 'ari. <sup>27</sup> Puka robenai na

e'abi aiho, "Tirama taba ikoikiai ia 'apuna ba'anai ehorotinakia." Taba ikoikiai' na niho hanona aika naha'iohi haraina Tirama kipona hanona Keriso 'apuna ba'anai aha'i, Tirama ehor taba ikoikiai Keriso 'apuna ba'anai ehorotinakia. <sup>28</sup> Taba ikoikiai Nahuna ena iha'ini ba'anai teao ore murinai, Nahuna kipona kehore keaoaina Hamana ena iha'ini ba'anai kemiaho. Ba taba ikoikiai hanona Tirama kepokiae ore haraina.

<sup>29</sup> Mikiri mue peaha'i raninai, maearima weiakia tiba'uere robenakia aba te'ari haukia iraonakiai hanona taba tebuabena paunai ua tihoma? 'Ari haukia a'i katemikiri mue toha raninai, aeahoma buonai weiakia tiba'uere robenakia 'ari haukia paukiai? <sup>30</sup> Aehoma buonai ai rani ikoinai 'arimo wairamaiai nemiaho hauna a'i tata'u aina?

<sup>31</sup> Uaho'aba'u e, weiana emi mauri Keriso Iesu aonai hauna au napaina paunai 'abi tohana nahina benimi. Au hanona 'ari mo waira'uai nemiaho rani ikoinai.

<sup>32</sup> Au Epesoai maearima weiakia matoha mahi aibarakia 'abana haukia kipokia maearima ekia raona paunai ta'au raninai, ena namo hanona taba au here'uai? 'A 'ari haukia a'i katemikiri mue raninai, 'abi neiana rani ikoinai tehinana hauna hamababaina, "Aika hamanian mo, hamainuinu mo, pokina mara hanona kaha'ari."

<sup>33</sup> Ua ti'abi aiho haukia a'i teme'oinimi. "Maearima ki'a obokia kipokia bahaeamona hanona emi hoahoa namokia kea'i ki'anakia." <sup>34</sup> Tomoraona raona harai ki'a akakia tomohabonakia, pokina neiana nahinana hanona keba haumaeanimi, wai baika hanona Tirama a'i to'iochina.

### Mikiri Mue Hauanina Hanona Haeai.

<sup>35</sup> 'A hau ha kebakai bakai ketibaha, "Ari haukia aea katemikiri mue aiho?" Hauani tabanai kateao?" <sup>36</sup> Neiana

hanona po'o bakai bakaina. Uho tubatona hauna a'i ke'ari 'uai raninai, ia hanona a'i kemauri.<sup>37</sup> Taba nubatona hauna hanona uho 'abaeana, pa'e witi uhona 'ao uho haeai ha, ia matiu weiana ke'omu hauna maikoina a'i nubatona.<sup>38</sup> 'A Tirama nihore uho weiana hauanina ha nibena ia ena nuatae ihobonai, ia nihore uho ha ha hauanikia tohakia mo nibenakia.<sup>39</sup> Mauri tabakia hauanikia ikoikiae hanona ihobo aha'i. Maearima hauanikia haeai, mahi hauanikia haeai, roborobo hauanikia haeai, maia hauanikia abomo haeai.<sup>40</sup> Kupa tabakia hauanikia ikoikia, mai hanopaka tabakia hauanikia abomo ikoikia. Ia kupa tabakia hauanikia ekia nuabi hanona haeai, hanopaka tabakia hauanikia ekia nuabi abomo haeai mo.<sup>41</sup> Beraura ena nuabi hanona ehaeai, nawa abomo ena nuabi haeai mo, bihiu ekia nuabi abomo ha mo. Ba bihiu ha ha ekia nuabi abomo haeai haeai mo.

<sup>42</sup> Ba 'ari haukia katemikiri mue abomo uamo homana, hauani nahahorena aonai ia hanona nipari ni'akauma, 'a kemikiri mue hanona kemauri banaibanoi a'i keki'a.<sup>43</sup> Nahahorena aonai, ihana eki'a abomo e'abe'abe, 'a kemikiri mue aonai ihana hanona kenuabi abomo ketabura.<sup>44</sup> Hanopaka hauaninai nahahorena, nemikiri mue hanona auba hauaninai.

Hanopaka hauanina ha ikoina, mai auba hauanina abomo ha ikoina.<sup>45</sup> Puka robenai aba tererena 'abana, "Hau kori 'uaina Adamu hanona ibabai maearima maurimaurina." 'A Adamu murihaina hauna Keriso hanona auba mauri nibaibenai hauna.<sup>46</sup> Auba hauanina a'i emai 'uai, ia hanopaka hauanina e'uai ba murinai hanona auba hauanina emai.<sup>47</sup> Hau kori'uaina Adamu hanona hanopaka apuronai ebabaina, 'a hau ibaruna Keriso hanona kupai emai.<sup>48</sup> Hanopaka haukia hanona hanopakai emai hauna ihobona,

kupa haukia hanona kupai emai hauna ihobona.<sup>49</sup> Hanopakai emai hauna ihaihanai nahaeao ihobona, aika abomo kupai emai hauna ihaihanai kahaeao.<sup>50</sup> Uaho'aba'u e, au taba na'uhina hauna neiana, hauani weiana bitio mai aruaruai erama hauna Tirama ena obia aiaranai a'i kekatoto, abomo hauani ke'ari hauna hanona a'i kemauri banaibanoi.<sup>51</sup> Tomobahu, au taba bunina ha naba'iobinimi, aika ikoikai hanona a'i kaha'ari ore, ia aika ikoikai Tirama kehore kebahaeainaka,<sup>52</sup> kenoanoa ki'a baha matoha maha nahahaba 'ununa 'abana pih i orena ke'arara aonai. Pihi 'uruna kebua raninai Tirama kehore 'ari haukia kebamikiri muenakia a'i kate'ari haukiae kateao, ba aika ikoikai kebahaeainaka.<sup>53</sup> Pokina hauani kepari hauna kebahaeaina a'i kepari haunai keao, abomo hauani ke'ari hauna kebahaeaina a'i ke'ari haunai keao.<sup>54</sup> Ba hauani kepari hauna kehaeai hauani a'i kepari haunai keao abomo hauani ke'ari hauna kehaeai hauani a'i ke'ari haunai keao raninai, Puka robenai tererena 'abina hanona ketohana, "Tirama ehore 'ari ena hiabu ebapururuna 'ari ebapua baihana."

Isa 25.8

55 "Ari e, oi koba'ari hiabuna hauna ae'e?  
'Ari e, oi kobahaiara hiabuna hauna ae'e?"

Hos 13.14

56 'Ari ena bahaiara hiabuna hanona ki'a herenai nia'ina, 'a ki'a ena hiabu hanona rauhubu herenai nia'ina.<sup>57</sup> Namo 'abikia Tirama kahabena! Ia ehore aika herekai 'ari ena hiabu ebapururuna eka Obiapaka Iesu Keriso haunai.

58 Ua buonai, uaho'aba'u ki'ami e, katokori 'ini, tai ha a'i kebaibinimi, rani ikoinai Obiapaka ena aka katobabai to'o baihana, pokina wai to'ioquina Obiapaka ena aka tubabaina hanona a'i tuaka 'abaea.

**16**

*Tirama Ena Maearima  
Ibaraikia Monina.*

<sup>1</sup> Bariu wai Tirama ena maearima Iudeai temiaho haukia ibaraikia paunai moni katobararo 'abina hanona neiana, Tirama ena marea maearimakia Galatia hanonai temiaho haukia ahina benakia moni tebararo taearana ihobona katobabaina. <sup>2</sup> Hui ha ha wapukia kori'uaikia ikoikiae aokiae wai ha ha emi itabu ahi ihobonai moni papakia baika katovore parenakia katobararona keapa'ua, ba au kawahi raninai moni bararo ha a'i kahababaina. <sup>3</sup> Au heremiae kakara'au raninai toa'i taeanakia haukia poukia ihinana marerena karerena kabenaikia ba kahauhunakia, emi beruberu monikia kateaoainakia Ierusalema. <sup>4</sup> Ba au ia kipokia kataeo hanona kenamo raninai, ia au kate'abana'u kipokia kataeo.

*Paulo Ena Raona Eba'orunakia Haukia.*

<sup>5</sup> Au naraonana Makedonia hanona kakabanai 'uai ia kaihanakia murinai kawahih heremi. <sup>6</sup> Au rani papana wai heremiae kamiaho 'ao kahamiaho keaomo 'ama ranina keore, ba e'u kaoao 'ekakia ha ha kaeao aokiae wai katobraina'u. <sup>7</sup> Au a'i nanuatae bariu e'u kabani aonai noanoai wai kaihanimi. E'u buabenai hanona Obiapaka kenuatae raninai rani homa'ana kipokia pahamiaho. <sup>8</sup> Ia au hanona neiamon Epeso aiaranai kamiaho keaomo Pentekoste ranina kea'ina. <sup>9</sup> Pokina Tirama ena aka taeearana pa'abina aba ekaikauna ena aka rarina neia kababaina. Iamo i'oata'u haukia abomo ebo'o.

<sup>10</sup> Timoteo kewahi heremi raninai katoa'i taeana, aona katobakirona kipokia katomiaho a'i meta'u, ia hanona Obiapaka ena aka nibabaina hauna au ihobo'u. <sup>11</sup> Hau ha ia ia'itaean a'i kebaao aina, ia katobraina katouhuna

mai baibuana kemai, ba ia kemue kemai here'u, au hanona ia nabahubahu aina uaho'abaka baika kipokia katemue katemai.

<sup>12</sup> Uaho'abaka Apolo ena pou hanona nahomana, abahi ahi taburana uaho'abaka baika kipokia katewahi, ia bariu hanona a'i enuatae, muriai rani namona ha aona ketaina hanona aba kewahi.

*Banamo 'Abina Orena.*

<sup>13</sup> Kato'ima 'ima harainimi, emi a'ikakaumai katokori 'ini, aomi katobanua ko'onakia, abomo katotabura. <sup>14</sup> Tirama mai maearima katoraona'au ainakia, hoaho neianai emi aka ikoikiae katobabai.

<sup>15</sup> Wai to'iochina Akaia hanona aonai Stefano mai ena itu haukia kipokia hanona teraonakabe 'uai Tirama ena maearimai teao ba ia kipokia ekia mauri tebaibenai Tirama ena marea maearimakia tebarainakia. Uaho'aba'u e, au hanona wai nabahi ahinimi, <sup>16</sup> a'ikakaumä haukia uahomakia mai baika ia kipokia tiaka haeamo tibarainakia haukia aiakia katona.

<sup>17</sup> Stefano, Forotunato mai Akaiko temai hanona ao'u enamo, pokina wai tokapare aonai ia hanona wai 'ekami tea'ina. <sup>18</sup> Ia tehore e'u ao aro'ari teba'orona, wai emi ao aro'ari abomo teba'orona. Maearima uahomakia hanona kaha'itaea harainakia.

<sup>19</sup> Tirama ena marea maearimakia Asia hanona aonai haukia ekia banamo 'abikia teuhunakia heremi, Akula mai Priskila ekia banamo 'abina abomo Obiapaka atanai teuhuna, mai Tirama ena marea maearimakia ia ekia itu aonai tito'u haukia ekia banamo 'abina abomo teuhuna.

<sup>20</sup> Uaho'abaka neia temiaho haukia ikoikiae ekia banamo 'abikia teuhunakia. Wai ha ha kipomi baipau robenai\* katobanamonimi.

<sup>21</sup> Au Paulo kipo'u ima'uai e'u banamo 'abina neiana narerena.

\* **16:20:** (20) 'ao Obiapaka aonai

22 Hau ha Obiapaka a'i ni-  
raona'au aina hauna ia hanona  
ururu aonai kemiaho.

*Obiapaka e, 'Omai!*†

23 Nabahuba'ari Obiapaka Iesu  
ena aoko'o hoana heremai kem-  
aho. 24 E'u raona'au hanona  
wai ikoimiai heremai Keriso Iesu  
aonai. Amen.

---

† 16:22: (22) *Marana Ta!*

## Paulo Ena Marere Ibaruana KORINTO Haukia Herekiae

### *Puka Aona Irerena 'Abina*

Korinto aiaranai ba'iobi haukia bai'oikia ekia 'abi ki'a obokia Paulo herenai tehina hanona a'ikakauma haukia ekia a'ikakauma tea'i ki'ana. Hoahoao neianai hanona Paulo ena raona raona ia ahakiae hanona eapa'ua ki'a baha. Ena nuatae hanona 'abi 'ao ba'iobi bai'oina neiana Korinto haukia herekiae kebaberonia, weiana paunai marere neiana ererena, ia kipokia kateonamo haeamo mue.

Puka neiana paipana kori'uaina aonai Paulo ehore 'abi pahihikia tohakia baika ehina pounakia 'abi weiakia Korinto maearimakia ebeni 'uainakia haukia. Paulo enuatae ia hanona ua a'i ke'abi aiho, iamo ekia apa, baro'e ai mai ia teiha 'ama'amana paunai 'abi pahihikia tohakiae ehina benakia. Korinto haukia 'abi neiakia aiana kateo'o ba katebatohanakia mai ekia hoahoai kateraona kabe hanona aonamo kerama.

Rani weianai abomo a'ikakauma haukia Iudeai hanona ekia mauri teki'a. Ua buonai Paulo baraibarai monikia baika ebararonakia, keaoainakia kebenakia. Weiana buonai Korinto haukia aokia niba taburanakia, aka neiana paunai moni baika katebaiben (8—9).

Puka orenai hanona Paulo e'abi, ba'iobi haukia bai'oikia baika teao tibaki'ana. Ena nuatae apa'uana hanona Korinto haukia ba'iobi bai'oikia weiakia aiakia a'i kateo'o.

### *Puka Paipana Apa'uakia*

- a. Roba iahu. (1.1-11)
- b. Paulo mai Tirama ena marea haukia Korintoai. (1.12—7.16)
- c. Beruberu tabakia a'ikakauma haukia Iudeai 'eukia. (8.1—9.15)
- d. Paulo iuhubeau hauna ena hiabu. (10.1—13.10)
- e. 'Abi orekia. (13.11-14)

### *Banamo 'Abina.*

<sup>1</sup> Au Paulo Keriso Iesu ena iuhubeau hau'u Tirama ena nuatae paunai, mai a'ikakaumai uaho'abaka Timoteo ohi marere neiana tarerena niwahi Tirama ena marea haumi Korinto aiaranai tomiaho abomo Tirama ena maearima ikoimiae Akia hanona maikoina aonai tomiaho haumi heremiae. <sup>2</sup> Tabahuba'ari Tirama aika Hamaka mai Obiapaka Iesu Keriso ekia aoko'o hoana mai baibua hanona ahamiae kemiaho.

### *Tirama Hanona Ao Bakiro Ikoinai Pokina.*

<sup>3</sup> Tirama kahabanamona aika eka Obiapaka Iesu Keriso hamana. Ia hanona aoko'o mai ao bakiro ikoinai pokina Tiramana. <sup>4</sup> Emai aro'ari ikoikiae ia ehore aomai ebakironakia, weiana buonai Tirama aomai ebakironakia ihobonai bariu tiaro'ari haukia aokia katabakirona abomo ketaina. <sup>5</sup> Pokina Keriso ehau haiara ihobonai ai abomo rani bo'ona tahau haiara, ba rani bo'ona ao bakiro 'eumai niapa'ua Keriso paunai. <sup>6</sup> Ai katahau haiara hanona wai aomi ibakirona mai ibamaurimi paunai, ai aomai kebakirona wai aomi abomo kebakirona, pokina ao bakiro weianai tabura katoa'ina haiara weiakia herekiae katokori 'ini ai hau haiara aokiae takori 'ini 'abana. <sup>7</sup> Emai buaben'i heremiae hauna ekori 'ini, pokina ai ta'iobina kipokia nahahau haiara ihobonai ai mai wai kipokia aoka kebakironakia.

<sup>8</sup> Uaho'abamai e, ai tanuatae Asia hanonai taro'ari haukia kato 'iobinakia. Ai hau haiara tahoainakia hanona teapa'ua ki'a baha abomo tepuma ki'a baha, ai katamauri hauna a'i tabuaben'i 'apuana. <sup>9</sup> Ai kipomai aomai aikakauma hanona aba kata'ari. Ia neiana erama hanona ai kipomai haumai a'i kata'ikakauma paunai, 'a 'ariai nibamikiri muenakia Tiramana ikupaianamo kata a'ikakaumana paunai. <sup>10</sup> Ia ehore 'ari ki'a

obona herenai ebamaurinamai abomo kebamaurinamai. Haea-mona ia tabuabena kebamauri muenamai.<sup>11</sup> Wai abomo kato-barainamai emi bahuba'ari ai. Ba bahuba'ari bo'okia weiakia paukiai Tirama keba namonamai, weiana maearima bo'okia katehore namo 'abikia Tirama katebena ai paumaiai.

*Paulo Ena Raona Eba'oruna Hauna Ebahaeaina.*

<sup>12</sup> Emai apa hanona neiana aomai tohanai tabatohana, emai mauri hanopakai abomo emai baihatia'a wai kipokia hanona mai robena mai berona Tirama 'eunai. Ai neiana tababaina hanona hanopaka ena aobero ai aha'i, ia Tirama ena aoko'o hoana hiabunai. <sup>13</sup> Ai wai katotuabina mai obona katobo hauna mo tarere benimi, nanuatae maikoina kato'obi haraina. <sup>14</sup> Wai bariu obomai a'i tuobo harai re'a au nanuatae wai ai kato'obi harainamai, weiana eka Obiapaka Iesu Keriso ena mai raninai ai wai tapainimi ihobonai wai ai katoapainamai.

<sup>15</sup> Au neiana a'obi haraina paunai, weiana e'u raona abakorina kawahi 'uai heremi banamo ibaruan katoa'ina. <sup>16</sup> E'u raona aba'oruna hanona kawahi heremi ba kaeao Makedonia, haeamona Makedoniai kamue hanona kamai heremi, ba wai kato-hore katobaraina'u kaeao Iudea. <sup>17</sup> Wai turaonana e'u raona weiana aba'oruna raninai 'ama'amai abakorina, u? 'Ao hanopaka raonaraonanai ababaina ba rani hamonai 'e mai aha'i ahinana, u? Aha'i 'akina. <sup>18</sup> Tirama hanona aia ibabua 'auna hauna, ihobonai emai 'abi ewahi heremi hauna hanona rani hamonai "e" mai 'aha'i' a'i tahinana. <sup>19</sup> Sila,\* Timoteo mai au wai baiatamiai tairoro aina hauna Tirama Nahuna Iesu Keriso hanona rani hamonai "e" mai 'aha'i' a'i ehinana, ia aonai hanona rani ikoinai 'abi tohana "e" mo

nemiaho.<sup>20</sup> Pokina Keriso hanona Tirama ena 'abi'uai ikoikiai eba tohanakia. Weiana buonai Iesu Keriso paunai 'Amen' nahahinana Tirama atana kahabanamona. <sup>21</sup> Wai mai ai kipokia Keriso aonai ebakori 'ininaka hauna hanona Tirama. Ia ehore ebahiabunaka.<sup>22</sup> Ia ena hoa haukai ehore 'auna aika hanona ia 'euna abomo ena Auba Robe aokai ehorotina weiana hanona keba maurinaka hoana.

<sup>23</sup> Au Tirama atanai na'abi abomo ia ao'u e'io-bina, a'i marobenimi aomi a'i mabahiarana buonai a'i awahi Korinto. <sup>24</sup> Ai wai emi a'ikakauma a'i katapoki aina pokina emi a'ikakauma etabura, ia ai hanona wai kipokia nahaka haeamo aomi ibanamona paunai.

## 2

<sup>1</sup> E'u raona abakorina hanona a'i kawahi heremi aomi a'i mehaiara taearanal. <sup>2</sup> Pokina au wai aomi kabahaiarana hanona tai kehore au kebaonamona'u? Ia wai mo naiami aomi aba abahaiarana haumi. <sup>3</sup> Weiana paunai marere naiana arerena, au kawahi raninai wai au katobaonamona'u haumi aomi a'i mabahaiarana marikina. Pokina au a'obi haraina au kaonamo hanona wai ikoimiai abomo katoaonamo. <sup>4</sup> Arere benimi raninai ao'u ehaiara abomo epuma maha'u mai beina, weiana hanona aomi kabahaiarana paunai aha'i ia kaba'obinimi au wai naraona'au ainimi.

*Heremai Beho Tebabai Haukia Ekia Beho Katohina Hao.*

<sup>5</sup> Hau ha ehore 'abana aona eba-haiarana hanona au ao'u mo a'i eba-haiarana ia wai ikoimiai aomi eba-haiara 'apuana. Au a'i ka'abi pahihi ki'a baha ia herenai. <sup>6</sup> Hau weiana ena ki'a 'arana wai bo'omi tohore puma tobena hanona aba etaina. <sup>7</sup> Bariu hanona ena ki'a katohina hao abomo aona katabataburana, aona a'i mebahaiara ki'a bahana ta'unna. <sup>8</sup> Ua

\* 1:19: (19) 'ao Siluano

buonai au wai nanoinimi, wai ia turaona'auai tohana hoana katabaihana. <sup>9</sup> Marere weiana arere benimi ena poki tohana hanona au ka'iorina aia'u tuka'ai tohana rani ikoinai, 'ao aha'i. <sup>10</sup> Wai hau ha ena ki'a katohina hao hanona au abomo ena ki'a kahina hao. Au —ia kahina hao paunai—ena ki'a ahina hao weiana hanona Keriso wairanai ababaina wai paumiai. <sup>11</sup> Weiana hanona Satani kehore a'i me'oinaka marikina, pokina aika hanona ena baihobo akakia aba ha'ibinakia.

*Paulo Ena Nuatae Tito Keihana.*

<sup>12</sup> Au aeao Toroa aiarana Keriso ena pou namona kairoro aina aonai taeara ikaikau au weia Obiapaka ena aka kababaina. <sup>13</sup> Ia ao'u hanona a'i enamo pokina uaho'abaka Tito weia a'i atabu ahina, haparua ahinana maearima weia haukia herekiae ba aeao Makedonia.

*Aika Hanona Timi Namona Keriso Herenai Nimai.*

<sup>14</sup> Iamo Tirama namo 'abina nabena pokina Keriso nihore rani ikoinai ne'uai ainamai ena mauri taburana aonai katamiaho, ai Keriso pouna namona katairoro aina kate'ibina 'eka maikoinai matoha timi namona nirama otaraina 'abana. <sup>15</sup> Ai hanona timi ha 'abana Tirama wairanai Keriso herenai nimai weiakia timauri mai ti'akauma haukia baiatakiae. <sup>16</sup> Weiakia ti'akauma haukia herekiae ai hanona timi ki'a obona 'ari kemaiaina, weiakia timauri haukia herekiae ai hanona timi namona mauri kemaiaina. Tai etaina aka neiana kebabaina? <sup>17</sup> Ai hanona bo'okia 'abakia aha'i, ia hanona Tirama ena 'abi kawakawa tabanai tibaona, 'a ai hanona 'abi tohana tairoro aina mai aomai tohanai Tirama wairanai mai Keriso aonai ihobona Tirama euhunakia haukia 'abana.

### 3

*'Abi'uai Mahamahana Ena Aka Haukia.*

<sup>1</sup> Turaonana ai kipomai tapai muenamai, u? 'Ao baika tibabaina 'abana, baika herekiae ai ibanamomai marerekiae katanuatae ainakia kata'i katawahi heremi, 'ao wai heremiae ibanamomai marerekiae kata'i kataeo baika herekiae? Aha'i 'akina. <sup>2</sup> Wai hanona ai emai marere, aomaiai tererena maearima ikoikiae te'ibina abomo tetuabina. <sup>3</sup> Ewaira tina harai wai hanona Keriso ena marere, ai tamaiaina, umu ai a'i ererena ia mauri Tiramana ena Auba Robeai ererena, pihara ahanai a'i ererena ia maearima aonai ererena.

<sup>4</sup> Ai na tapa aiho pokina Tirama wairanai weiana tabatohana Keriso paunai. <sup>5</sup> Ai hanona a'i ta'abi kipomai emai taburai aka neiana tababaina, 'a tabura weiana hanona Tirama herenai nimai. <sup>6</sup> Tirama ehore 'abi'uai apa'uana mahamahana akana katababaina haukiae ebaonamai, 'abi'uai mahamahana neiana hanona rauhubu pukanai tererena hauna aha'i ia Auba Robe'euna. Rauhubu irere hauna hanona 'ari kemaiaina ia Auba Robe hanona mauri kebenaka.

<sup>7</sup> Rauhubu pihara ahanai ererenakia ba Mose ebena raninai Tirama ena nuabi ewairatina Mose wairanai ea, ea ki'a baha buonai Israela haukiae a'i teiha 'ariai 'ariaina, ba rani a'i ehoma'a ea weiana mahari mahari e'akauma. Rauhubu weiana 'ari nimaiaina hauna nuabi uahomana aonai emai raninai, <sup>8</sup> Auba Robe ena aka weiana mauri nimaiaina hauna nuabina hanona aea keapa'ua aiho! <sup>9</sup> Maearima beho 'ekakiae kehorotina akana enuabi raninai maearima bero kebenakiae akana nuabina hanona aea keapa'ua aiho! <sup>10</sup> Nuabi 'uaina hauna enuabi, iamo nuabi apa'uana mahamahana emai hauna paunai nuabi weiana hanona matoha a'i enuabi. <sup>11</sup> Taba emiaho 'apua hauna mai nuabina raninai, kemiaho banaibanai tabana nuabina hanona aea keapa'ua aiho!

<sup>12</sup> Emai buabenai neiana paunai ta'abi tabura. <sup>13</sup> Mose hanona mukoai wairana e'aiana pokina Isaraela haukia ea weiana ni'akauma hauna a'i temeihana paunai. Ai hanona aka uahomana a'i tababaina. <sup>14</sup> Aokia hanona tekaibau, toha abomo bariu rani neianai rauhubu 'ai'aina pukana tetuabina aonai ia aokia hanona muko hamona weianai tekaibunakia. Hau ha Keriso ena mauri aonai ketoto hanona muko weiana kekapare. <sup>15</sup> Bariu rani neianai abomo Mose ena rauhubu katetuabina raninai, muko hanona aokia nikaiabu ohona mo. <sup>16</sup> Ia hau ha keao Obiapaka herena raninai, muko ia herenai hauna aba ia'i obo. <sup>17</sup> Obiapaka hanona Auba, ba Obiapaka Aubana ae'eai hanona aika rauhubu herenai ha'abaea. <sup>18</sup> Aika ikoikai wairakai muko keirubu Obiapaka ena nuabi kahabawaira tinana matoha oreore 'abana, ba aokai Obiapaka Aubana niaka hanona aika ia ihobo ihobonai nahaeao nuabi niapa'ua hao apa'ua hao hauna aonai. Obiapaka hanona Auba, ia nihore aka neiana nibabaina.

## 4

### Kepu Namona Puou Aonai Abana.

<sup>1</sup> Tirama ena aoko'o ai aka neiana ebenamai tababaina, ua buonai ai aomai a'i ni'abe'abe. <sup>2</sup> Ai bunianai haumaea akakia tababai haukia aba tane'e, ai bai'oi akakia a'i tababai abomo Tirama ena 'abi a'i tahina haeaina. Ia 'abi tohana tahina karahi haraina, weianai maearima aokia tohanai kate'ionina ai maearima aea homamai Tirama wairanai. <sup>3</sup> Ia pou namona tairoro aina hauna maearima herekiai ebuni raninai, pa'e weiakia mo kate'ari haukia herekiai ebuni. <sup>4</sup> Satani hanopaka neiana tiramana nihore a'i tia'ikakauma haukia aokia nikaiabunakia paunai, pou namona eana weiana Keriso ena nuabaii nibawaira tinana hauna

a'i teiha tinana. Keriso hanona Tirama ihobo ihobona hauna.

<sup>5</sup> Ai kipomai poumai a'i tairoro aina, ia ai tairoro ta'abi Iesu Keriso hanona Obiapaka, abomo ai hanona emi ta'ara'i haumai Iesu paunai. <sup>6</sup> Tirama e'abi etibaha, "Wapura aonai ea merama." Ba Tirama weiana ehore ena eai ai aomai ebaeana, Tirama ena nuabi Keriso wairanai ewaira tina hauna obona taobo mai taihana.

<sup>7</sup> Ai hanona puou 'abana, aomai kepu namona neiana nemiaho, weiana nihore nibaihanakia hiabu apa'uana hanona Tirama herenai nimai, ia ai heremai ai a'i nimai. <sup>8</sup> Taeara bo'okia haeai haeai ai tibatetuanamai iamo a'i ta'eho, taba bo'okia aomai tibaro'arinakia iamo aomai a'i ni'abe'abe. <sup>9</sup> Bo'okia ti'oatanamai iamo Tirama ai a'i ehabonamai, rani bo'okia tiahunamai tiba'ehonamai iamo a'i taki'a. <sup>10</sup> Nahomanai rani ikoinai hauanimaiai Iesu ena 'ari fabuana, weiana hanona Iesu ena mauri ai hauanimaiai nemiaho hauna kewaira tina paunai. <sup>11</sup> Ai tamiaho emai mauri aonai rani ikoinai Iesu paunai 'ari tawairana, weiana hanona ai hauanima neiana ke'ari hauna aonai Iesu ena mauri kewaira tina. <sup>12</sup> Weiana paunai 'ari hanona ai aomaiai niaka, ia mauri hanona wai aomiai niaka.

<sup>13</sup> Puka robenai na erere ai hona, "Au a'ikakauma paunai, a'abi." A'ikakauma hoana hamona weianai, ai abomo ta'ikakauma paunai, ta'abi. <sup>14</sup> Ai ta'ioquina Tirama, eka Obiapaka Iesu 'ari ai ebamikirina hauna, kehore ai abomo Iesu kipokia kebamikiri haeamonamai, ba wai mai ai kipokia keaoainaka ia herenai kakakoroti. <sup>15</sup> Taba neiakia ikoikiai hanona wai emi namo paunai tababainakia, weiana Tirama ena aoko'o hoana maearima bo'ona bo'ona ketabu ahinakia, ba namo 'abikia bo'ona Tirama katebena, atana katea'i taeana.

*A'ikakauma Taearanai Nahamauri.*

<sup>16</sup> Ua buonai aomai a'i nira'ora'o. Hauanimai hanona ni'abe'abe, iamo aomai hanona rani ha ha nimaha maha. <sup>17</sup> Hau haiara papana neiana bariu rani papana tahoaina hauna kehore nuabi rarina 'akina mai banaibanaina hauna kemaiaina, nuabi weiana hanona eapa'ua ki'a baha ba hau haiara neiana. <sup>18</sup> Ua buonai mahaka hanona taba nahaihanakia haukia herekiae a'i kemiahao ia a'i na ha ihanakia tabakia haukia kahaiha, pokina nahaihanakia tabakia hanona a'i katemiahao homa'a ia a'i nahaihanakia tabakia hanona katemiahao banaibana.

## 5

<sup>1</sup> Hauanika hanona itu 'abana, aika ha'iorina eka itu neia hanopakai nahamiahao aina hauna katekakina kupa ai itu ha Tirama kehore kebenaka, weiana hanona maearima imakiae a'i tebabaina ia Tirama kipona ebabaina ituna kemiahao banaibana. <sup>2</sup> Aika bariu hauanika ituna neianai nahamiahao aina na ha'arara 'arara, eka nuatae apa'uana hanona eka itu kupai hauna weiana mauri hauanina pahabatotona habuni 'abana. <sup>3</sup> Aika habuni weiakia kahaba totonakia raninai, mai hauka a'i katetabu ahinaka. <sup>4</sup> Hanopaka ituna hauanika neianai nahamiahao oho aonai nahapuma hoai na ha'arara 'arara hanona hanopakai hauanika habunina pahabakuri ahina paunai aha'i, ia mauri hauanina habunina kupai hauna pahabatotona paunai, weiana mauri hauanina kehore 'ari hauanina 'ekana kea'ina mauri banaibana hauaninai keao. <sup>5</sup> Tirama hanona aka neiana aika eukai eba'oruna, ia ehore Auba Robe ebenaka aka neiana wairai kerama hauna ibatohana.

<sup>6</sup> Ua buonai aika rani ikoinai aoka nitabura. Aika ha'iorina hauanika neianai nahamiahao aonai Obiapaka nemiaho 'ekana

herekai hanona atau'ai. <sup>7</sup> Aika hanona a'ikakauma taearanai nahamauri, ia taba nahaiha paukiae aha'i. <sup>8</sup> Aika aoka nitabura abomo eka nuatae tohana hauanika ituna neiana kahahabona kahaeao Obiapaka kipokia kahamiahao. <sup>9</sup> Hauanika ituna neianai kahamiahao 'ao kahahabona, 'abi na aha'i, eka nuatae apa'uana tohana hanona Obiapaka aona kahabaonamona. <sup>10</sup> Pokina aika ikoikai Keriso ena bakai apa'uana wairanai kahakoroti kebabakainaka, ha ha namo 'ao ki'a hauani maurinai hababai ihobonai 'arana kaha'ina.

*Baibua Akana Kahababaina.*

<sup>11</sup> Ai ta'iorina Obiapaka aea kahata'uai aihona paunai maearima tabahi ahinakia. Tirama e'iobi harainamai, ba au nabuabenimi wai abomo aomi tohanai ua pato'iobi aihonamai. <sup>12</sup> Ai hanona heremiae kipomai ibanamomai a'i tahina muena, ia ai hanona wai bero namona tabenimi katoapainamai, ba weiakia maearima ihaihana mo tiapaina ia aokia a'i tiraona harai haukia ekia 'abi katobamuena. <sup>13</sup> Emai babai mai emai 'abi'abi matoha po'o haukia 'abana raninai weiana hanona Tirama atana paunai, ia ai taotipa raninai weiana hanona wai paumiai. <sup>14</sup> Weiana hanona Keriso ena raona'au ehore ai ebahi ahinamai. Ai ta'iobi haraina hau hamona aika ikoikai paukai e'ari, weiana anina aika ikoikai ia kipokia ha'ari. <sup>15</sup> Keriso maearima ikoikiae paukiae e'ari weiana hanona bariu temiaho haukia ia kipokia ekia miahoai a'i katemauri, 'a Keriso ia paukiae e'ari haeamona emikiri hauna paunai katemauri.

<sup>16</sup> Ua buonai bariu rani neianai niaoaina ai hau ha hanopaka ena raonaraona taearanai a'i kata'uahina, 'uainai Keriso hanona ua ta'uahi aihona ia bariu hanona ua homana a'i taraonana. <sup>17</sup> Hau ha Keriso aonai nemiaho

raninai, ia hanona aba maearima mahamahana, mauri 'ai'aina aba ekapare ia aba maearima mahamahanai eao.<sup>18</sup> Taba neiakia ikoinai hanona Tirama ebabainakia. Tirama ehore ia mai aika baiataka ebabaibuana Keriso paunai, ba baibua akana ebenaka maearima kahamai ainakia ia ena hauai kateao.<sup>19</sup> Tirama ehore Keriso aonai ia mai hanopaka maearimakia baiatakia ebabaibuana, maearima ekia ki'a a'i etuabinakia. Ba baibua 'abina neiana ebenamai katahinana.<sup>20</sup> Ua buonai ai hanona Keriso pinanai taeao, Tirama hanona ai pinamaiai nehina benimi. Ai Keriso atanai wai tahina benimi. Wai Tirama kipokia katobaibua.<sup>21</sup> Keriso hanona ki'a hauna aha'i, 'a aika paukai Tirama ehore ki'a haunai\* ebaona, weiana aika hanona Keriso aonai bero haukai kahaeao Tirama wairanai.

## 6

### *Tirama Ena Aka Haukia Hanona Atetua Aokiai Katebahapahihi.*

<sup>1</sup> Ai Tirama kipokia taka haeamo haumai tabahi ahinimi, Tirama ena aoko'o hoana toa'ina hauna a'i katobaki'ana. <sup>2</sup> Pokina Tirama e'abi etibaha, "E'u nuatae ranina tohanai aiami aona, abomo bamauri beraurana tohanai abarainimi."

<sup>3</sup> Isa 49.8 Au wai nahina benimi Tirama ena nuatae ranina weiana hanona bariu, bamauri beraurana weiana abomo bariu.

<sup>4</sup> Hau ha aona a'i tamabakai'au kai'auna, weiana maearima emai aka beho a'i katetabu ahina paunai. <sup>5</sup> Ia wairakiai ai kipomai tabatohanamai ai Tirama ena aka haumai taeara haeai haeai ikoiakiai aokiai, weikia ao aro'ari, hau hauria, mai atetua aokiai tabapahihi, te'atinamai, teba wapuramai

abomo to'ukiai tehari abunamai, taka 'ari, a'i taparuua harai abomo mare'a ta'ari,<sup>6</sup> emai robeai, aotipai, bapahihihai abomo hoahoa namokiai, Auba Robe taburanai mai maearima iraqna'auaikiai maearima tabaihanakia ai Tirama ena ta'ara'i haumai.<sup>7</sup> 'Abi tohana tahina karahina, mai Tirama ena hiabuui taka. Bero akakia hanona emai huari tabakia imamai abira abirai ta'inakia.

<sup>8</sup> Baika atamai tea'i taeana baika atamai tea'i ki'ana, tebapo'onamai abomo temariki ainamai, iamo ai Tirama ena aka haumaiai taeao. Maearima bai'oi haumaiai tibaonamai, iamo ai hanona 'abi tohana tahinana.<sup>9</sup> Maearima a'i te'iobinamai, ia Tirama ne'iobinamai. Maearima tiraonana aba ta'ari, ia maurimaiai tamiaho. Puma rarina tibahoainamai, ia a'i ta'ari baihana.<sup>10</sup> Aomai tibahihaina ia rani ikoinai taonamo. Uraru haumai 'abana ia maearima bo'okia tabaobianakia. Heremai taba aha'i moiointa, 'a taba ikoikiai hanona ai eumaiiai temiaho.

<sup>11</sup> Emai hau Korinto ai haumi e, taba ikoikiai wairamai tahina pounakia, aomai ikoinai heremai tabawaira tinana.<sup>12</sup> Ai hanona wai taoko'o ainimi ia wai hanona ai a'i tuaoko'o ainamai.<sup>13</sup> Au wai nahina benimi matoha naha'u 'abana, ai tababai heremai ihobona pato babaina heremai, aomi ikoinai heremai katabwaira tinana.

### *Aika Hanona Mauri Tiramana Ena Marea Robena.*

<sup>14</sup> A'i tia'ikakauma haukia kipokia a'i katobahaeamo. Bero mai ki'a aea katebahamomo aiho? Ea mai wapura hanona a'i katemiaho hamomo.<sup>15</sup> Keriso mai Tiaporu aokia aea katebahamomo aiho? A'ikakauma hauna mai a'i nia'ikakauma hauna ohi ekia raona hanona hamonai a'i kemaiho.<sup>16</sup> Tirama ena marea robe mai kaiba'uku terarua hanona aea katebahamomo aiho? Aika

\* 5:21: (21) 'ao ki'a ia'i obo tabanai

hanona mauri Tiramana ena marea robena. Tiramana kipona na e'abi aiho,  
"Au hanona ia kipokia katamiahō oioi, abomo a'i kahabonakia.  
Au hanona ia ekia Tiramai kaeao, ia hanona au e'u maearimai kateao."

Lev 26.12

<sup>17</sup> Ua buonai Tiramana e'abi etibaha,  
"Wai hanona ia tomohabonakia herekiai tomokapare.

Opu akakia a'i katobabai.  
Ba au wai ka'i taeanimi.

Isa 52.11; Esk 20.34, 41

<sup>18</sup> Au hanona wai Hamamiai kaeao,  
wai hanona au naha'u haukia mai babi'ekia ai katoao.  
Tabura ikoinai Obiapakana,  
e'u 'abi neiana."

2Sam 7.14

## 7

<sup>1</sup> Ua buonai, e'u raona'au haumi ikoimiai e, 'abi'ua neiana herekai ebabaina paunai, huanika mai Aubaka tibaopunakia tabakia ikoikiai herekiai kahakapare eka mauri kahabamaha mahanakia, 'a Tiramana kahamariki aina eka mauri maikoina ia kahabena kaharobe.

*Paulo Ena Aonamo Korinto A'ikakauma Haukia Paukiai.*

<sup>2</sup> Ekamai katoholena aomiai. Ai hau ha herenai beho a'i tababaina, hau ha ena a'ikakauma a'i ta'i ki'ana, abomo hau ha a'i ta'oina ena taba a'i ta'i. <sup>3</sup> Abi neiana nahinana hanona puma kabenimi paunai aha'i. Ia 'uainai ahina benimi 'abana, ai katamauri 'ao kata'ari re'a wai hanona rani ikoinai aomaiai katomiahō. <sup>4</sup> Au hanona wai na'i taeanimi mai napai ki'a bahanimi, ua buonai emai hauhaliara aokiai ao'u nitabura abomo naonamo ki'a baha.

<sup>5</sup> Ai Makedonia ai takara'au raninai abomo a'i tarai 'apua, atetua haeai haeai aokiai tamiaho, baika kipokia tabaiara, aomai mai ta'umai tamiaho. <sup>6</sup> A ao

'abe'abe haukia aokia niba taburanakia Tiramana ehore Tito eu-huna heremaiāi ba aomai eba taburanakia. <sup>7</sup> Weiana ena mai mo aha'i, ia wai aona aea tobatabura aihona pouna taona hanona aomai etabura, abomo tonuatae katoihana'u, here'uai tobabai ki'a haunai turaona kabe mai emi aka tabura au pau'uai hauna pouna ehina benamai hanona e'u aonamo eapa'ua ki'a baha.

<sup>8</sup> E'u marere weiana atiu ahina heremaiāi hauna aomi ebaro'arina re'a, bariu au weiana a'i na'arara aina.

'Uainai, rani papana a'arara aina pokina araonana marere weiana aomi ebaro'arina. <sup>9</sup> Ia bariu hanona ao'u ninamo. Weiana aomi tearo'ari paunai aha'i, ia emi ao aro'ari ehore ebaraona kabeni paunai naonamo.

Wai aomi tearo'ari hanona Tiramana ena nuataeai erama, ua buonai ai paumaiai ki'a ha a'i totabu ahina. <sup>10</sup> Ao aro'ari weiana Tiramana ena nuataeai nirama hauna hanona maearima aona nibahaeaina nibaraona kabena bamauri ketabu ahina, weiana hauna a'i kaha'arara aina. Ia ao aro'ari hanopaka ena nuatae paunai nirama hauna hanona 'ari kebaramana. <sup>11</sup> Ao aro'ari neiana Tiramana ena nuataeai erama hauna paunai heremaiāi ebaramanakia tabakia katoraona harainakia. Toaka harai, emi beho aha'i hauna tobatoha haraina, beho topuere aina, Tiramana tota'u aina, raona'au nuataenai toaka, beho tobaberonaikia. Wai 'eka ikoikiai emi beho aha'i hauna tobawaira tinina.

<sup>12</sup> Au arere benimi hanona beho ebabaina hauna 'ao herenai beho erama hauna paunai aha'i, 'a Tiramana wairanai wai aea turaona'auai ki'a bahanamai hauna kewaira tina paunai arere benimi. <sup>13</sup> Weiana ehore aomai ebatabura haraina.

Weiana mo aha'i, Tito ena aonamo paunai aomai abomo enamo ki'a baha pokina wai tobaraina aona toba namona pau-

nai. <sup>14</sup> 'Uainai au Tito wairanai apainimi, ba wai au a'i toba-haumaeana'u. Tahina benimi tabakia ikoikiae hanona 'abi tohakia, ihobonai mo tobatohana ai Tito wairanai tapainimi hauna hanona 'abi tohana. <sup>15</sup> Tito ena raona'au heremai hauna niapa'ua ki'a baha, pokina ia niraona 'inina wai ikoimiae aiana toka'aina abomo toa'i taeana mai ta'umi mai marikimi. <sup>16</sup> E'u aonamo eapa'ua pokina a'iobi harai ki'a bahanimi wai emi hoahoa tenamo.

## 8

### *Makedonia A'ikakauma Haukia Mai Aonamokia Beruberu Tebaiben'i.*

<sup>1</sup> Uaho'abamai e, ai taba'iobinimi Tirama hanona ena aoko'o hoana ia ena marea maearimakia Makedoniai haukia ebenaakia. <sup>2</sup> Ia hau haiara rarina aonai temiaho abomo teuraru ki'a baha, iamo mai aonamokia beruberu bo'ona tebaiben'i. <sup>3</sup> Au wai heremai ia nabatohanakia, taba herekiae hauna bo'ona tebaibeniaina, abomo kipokia ekia nuataeai tebaiben'i banaina. <sup>4</sup> Ia rani bo'ona tenoinamai, ia abokiamo Tirama ena maearima Ierusalemai haukia ibaraikia akana katebabaina. <sup>5</sup> Ekia baibeni weiana hanona eapa'ua ki'a baha ba ai taraonana hauna. Kori'uaina hanona kipokia tebaiben'i ainakia Obiapaka 'eunai kateao, haeamona Tirama ena nuataeai kipokia tebaiben'i ainakia ai 'eumaiakai kateao.

<sup>6</sup> Weiana buonai Tito tanoina, ia aba beruberu akana neiana baiatamiae ea'i ramana paunai, kebarainimi keaomo aka neiana katobaorenai. <sup>7</sup> Taba ikoikiae hana tubabai harainakia, emi a'ikakaumai, emi 'abiai, emi 'iohai, emi nuataeai, abomo emi raona'au heremai haunai. Ua buonai ai tanuatae beruberu akana neiana abomo katobabai haraina.

<sup>8</sup> Au rauhubu ha'i nahorotina. Ia e'u nuatae hanona baika ekia baraibarai aea homana hauna kabawaira tinana heremai

ba ka'iobina wai emi raona'au hanona tohana. <sup>9</sup> Wai aba to'iobina eka Obiapaka Iesu Keriso ena aoko'o hoana aea eapa'ua aiho. Ia hanona obia hauna, ia wai paumiae uraru haunai eao, pokina ena uraruai wai kebaobianimi.

<sup>10</sup> Au e'u raona baraibarai akana neiana herenai hana nahomana, wai taba ihau murikai toa'i ramana hauna patobaorenai hana mai emi namo. Aka neiana hanona wai toa'i rama 'uaina abomo tobabaina mai aomi ikoinai. <sup>11</sup> Ua buonai bariu aka neiana katobabaina keaomo katobaorenai. Ia'iramana tonuatae aina paunai heremai temiaho tabakia katoba orena. <sup>12</sup> Wai katobaiben'i mai nuataemi ranai, Tirama kehore wai heremai temiaho tabakia katobena haukia kea'i taeananakia, 'a taba heremai aha'i hauna robana a'i keahuna.

<sup>13</sup> Wai heremai kepuma ba baika herekiae ke'ama'ama, weiana hanona e'u nuatae aha'i. Ia nanuatae ha ha ikoikai kahihobo. <sup>14</sup> Bariu rani neianai heremai taba tebo'o haumi tekapu haukia katobarainakia, ba wai emi kapu raninai ia ekia taba katebo'o aonai wai katebarainimi. Weiana ikoikiae baraibarai ihobona kaha'ina. <sup>15</sup> Puka robenai aba ererena 'abana, "Bo'ona ebararo hauna 'euna a'i ebo'o ki'a baha, bita mo ebararo hauna 'euna a'i ebita 'aki."

*Paulo Aka Haukia Tito Mai  
Abana Ohi Euhunakia Teao Kor-  
into.*

<sup>16</sup> Tirama namo 'abina nabena, pokina emai nuatae katabarainimi hauna ihobonai Tito abomo nenuatae. <sup>17</sup> Emai noi ia kewahi heremai hauna ea'i taeana. Weiana emai noi paunai mo aha'i, ia kipona enuatae ki'a baha kewahi heremai. <sup>18</sup> Uaho'abaka ha tauhuna Tito ohi tiwahi, ia hanona pou namona neiroro aina paunai Tirama ena marea maearima ikoikiae tibanamona hauna. <sup>19</sup> Weiana mo aha'i, ia hanona Tirama ena marea haukia tehore tea'i taeana ai ke'abanamai

kebarainamai, kipokia eka raona'au baibeni monina neiana kataeoaina Ierusalema. Weiana hanona eka nuatae baraibarai akana kewaira tina Obiapaka ena nuabi paunai.<sup>20</sup> Ai ta'ima harainamai pokina ai raona'au baibeni monina rarina neiana kata'imana aonai hau ha beho ha a'i metabu ahina a'i me'abi ki'a paunai.<sup>21</sup> Ai tanuatae aka namona mai berona katababaina Obiapaka mo wairanai aha'i ia maearima wairakiae abomo.

<sup>22</sup> Ba uaho'abaka haeai ha abomo tauhuna kipokia tiwhi, rani bo'okia tahobona ba tainhana ia hanona ena nuataeai ebaraibarai. Bariu ia aba e'iohi harainimi aonai nenuatae ki'a baha kebaraibarai.

<sup>23</sup> Tito hanona au 'aba'u taka haeamo wai ibaraimi. Mai uaho'abaka weiakia ia kipokia tiwhi haukia hanona Tirama ena marea haukia tea'i taeanakia haukia Keriso ena nuabi katebawaira tinana paunai.<sup>24</sup> Ua buonai emi raona'au hoana katoba ihanakia, weiana Tirama ena marea haukia ikoikiae katebatohana abomo kate'iohina wai tapainimi hanona ebero.

## 9

### Baiben Akana Katobabaina Tirama Ena Maearima Ibaraikia.

<sup>1</sup> Tirama ena marea maearima robekia Iudeai haukia ibaraikia akana pouna karere benimi hanona a'i nanuatae. <sup>2</sup> Pokina au a'iohina wai tonuatae katabaraibarai, ba a'ikakauma haukia Makedoniai haukia wairakiae apainimi, a'abi atibaha, "Akia haukia hanona aba ihau murikai teba'oru katebaibeni." Emi baiben taburana weiana ehore ebahi ahinakia katebaibeni.<sup>3</sup> Bariu uaho'abaka neiakia nauhunakia tiwhi ena pokia hanona emai apa wai ahamiai hauna anna a'i meaha'i paunai. 'A au ahina benimi ihobonai wai emi baiben tabana hanona katoba'oruna.<sup>4</sup> Weiana Makedonia haukia baika kipokia patawhi ba pateihanimi

a'i toba'oru raninai, wai patohau-maea mo aha'i, tapainimi hauna paunai ai patahaumaea ki'a.<sup>5</sup> Ua buonai au araonana kenamo uaho'abaka neiakia kanoinakia kate'uai katewahi heremi emi beruberu tabana to'uahi 'uaina hauna katoba'oruna. Weiana ai katakara'au aonai baraibarai tabana hanona aba e'oru, weiana kehore kebawaira tinana wai tobabenai hanona mai aomi ikoinai, ia bahi ahi paunai aha'i.

<sup>6</sup> Katoraona haraina, ube bita 'aki kebatonakia hauna aniani bita 'aki mo keu'aunakia, 'a ube bo'ona kebato hauna aniani bo'ona keu'aunakia.<sup>7</sup> Wai ha ha kipomi emi nuatae ihobonai katobaibeni, ia mai 'arara 'ararami 'ao bahiahi paunai a'i katobaibeni. Pokina Tirama hanona maearima aona namonai nibaibenai hauna niraona'au aina.<sup>8</sup> Tirama hanona herenai etaina ena aoko'o hoana kebenimi hanona kebeni banainimi, ba rani ikoinai taba namokia heremai kebo'o, weianai wai emi barabariakia namokia bo'ona katobabainakia.<sup>9</sup> Puka robenai tererena 'abana etibaha,  
"Ia nihore taba namokia bo'okia uraru haukia nibenakia aona mai beruberunai,  
ena aka bero hanona kemiah banaibanai."

<sup>10</sup> Tirama weiana nihore biraura hauna ube nibena mai aniani nibena hauna kehore ube bo'ona kebenimi katobato, keba'omunakia, emi aka namokia buabuakia bo'okia kebara-manakia.<sup>11</sup> Ia wai heremai taba ikoikiae kebabonakia ba katobaibeni rani ikoinai. Weiana emi beruberu tabakia kataeoainakia herekiae hanona maearima bo'ona namo 'abina katehinana Tirama herenai.<sup>12</sup> Baiben akana neiana tubabaina hanona Tirama ena maearima robekia ibaraikia akana mo a'i nibabaina, 'a aka neiana kehore maearima bo'ona abomo namo 'abina Tirama katebena.<sup>13</sup> Emi baiben akana neiana nihore Keriso ena pou namona tohina pouna mai akana

Sal 112,9

tubabaina hauna nibatohana, abomo emi beruberu akana ia herekiai mai maearima ikoikiae herekiae hauna nibatohana, weiana paunai maearima Tirama katebanamona.<sup>14</sup> Kate bahuba'ari wai ahamiai raninai, kateraona ki'a bahanimi pokina Tirama ena aoko'o hoana apa'uana wai heremiai paunai.<sup>15</sup> Namo 'abina Tirama kahabena ena beruberu apa'uana herekai hauna paunai, beruberu weiana pouna 'abiai kahahina hina haraina hanona a'i ketaina.

## 10

*Paulo Ena Aka Neuhoreaina.*

<sup>1</sup> Maearima baika ti'abi au wai heremiai namiaho hanona na'amari'amari, 'a naeao atau'ai hanona natabura. Au Paulo kipo'u nahore Keriso ena ao 'amari'amari mai ena rabo harai ai nanoinimi,<sup>2</sup> weiakia te'uahinamai ti'abi hanopaka ena taearai tamauri na tihoma haukia herekiae ka'abi pahihi, ia au wai nanoinimi emi babaiai katobero, kawahi heremiai raninai a'i pa'abi pahihi.<sup>3</sup> Hanopaka neiana aonai nahamiaho iamo aika hanona hanopaka haukia tehuari taearanai a'i nahahuari.<sup>4</sup> Eka huari tabakia hanona hanopaka ena huari tabakia 'abakia aha'i, ia Tirama ena huari tabakia taburakia. Weiakia tiaporu ekia miao 'ekakia pahihikia abomo kateahu 'iti'itinakia.<sup>5</sup> Aika maearima ekia raonaraona bai'oikia mai apa tabakia weiakia Tirama i'iorina taearana tikaibuna haukia nahahu 'iti'itinakia, maearima aokia maikoinai nahaeaoainakia Keriso aiana kateka'aina.<sup>6</sup> Wai ikoimiai Keriso aiana aba tuka'ai ore haraina aonai, ai kataba'oru weiakia aiana a'i tika'aina haukia puma katabahoa ainakia.

<sup>7</sup> Wai hanona taba kapekia mo toihanakia. Hau ha niraonana ia Keriso ena maearima raninai, ia kipona keraona harai 'uaina, pokina ai abomo Keriso ena

maearima ia 'abana.<sup>8</sup> Obiapaka hiabu ebenamai hanona emi mauri kataba taburanakia, ia a'i kata'i ki'anakia, ua buonai hiabu weiana napai ki'a bahana re'a, weiana a'i nahaumaea aina.<sup>9</sup> Au a'i nanuatae wai katoraonana kabata'unimi buonai marere neiakia narerenakia.<sup>10</sup> Hau baika te'abi tetibaha, "Paulo ena marere 'abikia hanona tepuma abomo tetabura, 'a ia kipona tohana nimai herekai hanona ia e'abe'abe ena 'abi abomo te'amari 'amari taba aha'i."<sup>11</sup> Maearima na ti'abi aiho haukia kate'iobi haraina, marere aokiai taba tarerenakia haukia mai ai tohamai katalawahi heremiai taba kata babainakia haukia hanona ihobomo a'i tehaeai.

<sup>12</sup> Ai a'i tanuatae maearima weiakia kipokia tiba apa'uanakia haukia kipokia a'i kataba ihobonamai. Ia hanona ekia aotipa aha'i. Ia kipokia baiatakiai ekia babaiai kipokia tibaihobo aina.<sup>13</sup> Ia ai emai apa hanona a'i kekabanai ki'a baha, ia Tirama aka ebenamai katababaina hauna 'ekana aonai mo kemiaho, wai abomo aka weiana aonai totabura.<sup>14</sup> Ai emai apa hanona a'i eao ki'a baha, Keriso ena pou namona tawahiai 'uaina heremiai paunai, emai apa 'ekana a'i takahaboaina.<sup>15</sup> Ua buonai Tirama emai aka 'ekana e'uahina hauna abihanai maearima baika aka ihobona tibabaina hauna a'i tapaina. 'A ai emai buabenai hanona wai emi a'ikakauma keapa'ua ba ai emai aka Tirama e'uahina heremiai hauna abomo keapa'ua.<sup>16</sup> Weiana paunai ai hanona pou namona katairoro aina hanopaka baika weia wai abihamiai maearimakia weiakia tai ha a'i eiroro 'apua 'ekakia haukia herekiae. Pokina nau ha ena aka 'ekanai aka aba tebabaina hauna a'i katapaina.

<sup>17</sup> Puka robenai tererena 'abana, "Tai nenuatae keapa hanona Obiapaka taba ebabaina hauna meapaina."

Ier 9.24

<sup>18</sup> Pokina maearima ha kipona namona nehinana hauna Obiapaka ia a'i nia'i taeana, ia Obiapaka kipona nihore maearima nibatohana enamo hauna nia'i taeana.

## 11

*Paulo Mai Iuhubeau Haukia  
Bai'oikia.*

<sup>1</sup> Au nanuatae hanona katoiha haona'u, napo'o 'apua re'a, ia tomoiha haona'u. <sup>2</sup> Au hanona wai nauhore ainimi, matoha Tirama neuhore ainimi 'abana. Wai hanona uaho rari namona 'abana, a'abi'uai ainimi hau hamona katoatawana, weiana hanona Keriso. <sup>3</sup> Ia au ao'u niaro'ari, pokina 'erau ehore Eba e'oina ebahureana ihobonai wai abomimo raona ki'a obokia katehore aomi katebahureanakia Keriso ikutiaina taearana tohana a'i tomohabona. <sup>4</sup> Pokina hau hanima ijesu ai tairoro aina hauna aha'i ia Iesu haeai ha neiroro aina hauna a'i tukaiabuna ia tua'i taeana mai aonamomi, abomo Auba Robe mai pou namona heremaihai to'o haukia a'i tua'i taeanakia ia auba haeai mai pou haeaimo neiroro ainakia haukia tua'i taeanakia.

<sup>5</sup> Au naraonana iuhubeau haukia apa'uakia na tiho haukia tiwhi heremaihanona a'i tenamo ki'a baha ba au. <sup>6</sup> Iamo taina, pa'e 'abi'abiai hanona a'i etaina'u, ia aotipai hanona etaina'u, neiana hanona rani ikoikiai mai taeara ikoikiai aokiai tabawaira tina haraina heremai.

<sup>7</sup> Tirama ena pou namona heremai airoro aina hanona 'ara'u a'i atabuna, hoa weianai kipo'u aba'aera 'aerana'u wai ka'i taeanimi paunai. Ba weiana hanona ababai ki'a, 'u? <sup>8</sup> Au wai baiatamiai aka aonai, Tirama ena marea haukia baika aiara haeai haukia tebaraina'u, au hanona herekiai moni a'i 'abaeana, weianai wai kabarainimi paunai. <sup>9</sup> Au heremai amiaho aonai moniai patobaraina'u paunai a'i

abaro'arinimi, uaho'abaka Makedoniai temai hanona taba anuataeai haukia ikoikiai tebena'u. Rani 'uainai ihobona mai rani wairakai, abomo au hanona aro'ari a'i kabeni 'apuanimi.

<sup>10</sup> Keriso ena 'abi tohana ao'uai nemiaho haunai, na'abi au e'u apa neiana hauna Akaia hanona maikoina aonai hau ha a'i keba'rona. <sup>11</sup> A'i naraona'au ainimi paunai na na'abi aihoh, 'u? Aha'i. Tirama e'ioquina naraona'au ainimi.

<sup>12</sup> Au bariu 'ara a'i natabuna hauna kababai to'ona weiana iuhubeau haukia na tiho haukia baika ekia apa 'abina tehinana tetibaha, "Ia hanona aika kipokia taeara hamonai nahaka," hauna kaba'rona paunai. <sup>13</sup> Pokina hau weiakia hanona iuhubeau haukia tohakia aha'i, ia hanona iuhubeau haukia bai'oikia, ekia akai hanona tibai'oi, abomo ihakia tibahaeainakia matoha Keriso ena iuhubeau haukia 'abana. <sup>14</sup> A'i kahamaharea, pokina Satani abomo kipona ihana ebahaeaina matoha ea aneruna 'abana. <sup>15</sup> Ua buonai ena iuhubeau haukia ihakia kateba haeaina matoha bero akana tibabaina haukia 'abana hanona herekiai a'i epahihi. Muriai hanona ekia babai ki'a obokia ihobokiai 'arakia katea'i.

*Paulo Ena Hauhaiara Iuhubeau  
Akana Aonai.*

<sup>16</sup> Na'abi mue mo, hau ha a'i meraonana au hana po'o hau'u. Ia ua turaona aihona'u raninai, tomoa'i taeana'u matoha po'o hau'u 'abana ba au papana kapa 'apua. <sup>17</sup> Au taba na'uhahina hauna Obiapaka herenai a'i emai, apa 'abi'abinai na'abi hanona matoha po'o hauna ha 'abana.

<sup>18</sup> Ia maearima bo'ona hanona hanopakai taba taba tebabai haukia tiapainakia, ba au abomo uamo kahoma.

<sup>19</sup> Wai kipomi turaonana toaobero ki'a baha, ua buonai po'o haukia hanona tua'i taeana. <sup>20</sup> Wai

hau ha neuhuaao uhuaonimi, ni'oi'oinimi, 'ao nibapo'o po'onimi, heremiai nibaro'e, 'ao wairami nibo'anakia hanona tua'i taeana. <sup>21</sup> Au hanona ua a'i nababai aiho. Wai turaonana au na'abe'abe paunai ua a'i nababaina, 'ao ua a'i nababaina hauna kahaumaeana, 'u?

Ia hau ha taba ha keapaina raninai, (au na'abi matoha po'o hauna 'abana) au abomo kapa ia 'abana. <sup>22</sup> Ia Heberu haukia, au abomo Heberu hau'u. Ia Isaraela haukia, au abomo Isaraela hau'u. Ia Aberahamo 'aba'abana, au abomo Aberahamo 'aba'abana. <sup>23</sup> Ia Keriso ena ta'ara'i haukia, u? (Au na'abi'abi matoha beau'ari hauna ha,) ia au hanona ta'ara'i hau'u namo'u ba ia. Au hanona aka tabura ki'a baha, rani bo'okia awapura, te'ati ki'a bahana'u, abomo rani bo'okia hereka 'akinai mo pateba'arina'u. <sup>24</sup> Rani ima Iuda haukia i'ati pumakia ikoinai harau aihau 'ababani hamomo (39) tebena'u. <sup>25</sup> Rani aihau Roma haukia matiuai te'atina'u, abomo rani hamona piharai teahuna'u. Rani baihau ahi aehe'au haukia tehuu, ba baiatakiai ha hanona wapu hamona maikoina 'aku aonai abure. <sup>26</sup> E'u kaoao bo'okia aokiae au hanona ki'a bo'okia 'eka neiakiae atabu ahi, tou atekia herekiae, bainao haukia herekiae, kipo'u e'u rama haukia mai rama haeai haukia herekiae, ki'a baika hanona aiara apa'uakia aokiae, hano'akukiae mai 'akupakai atabu ahi, haeamona tihatia'a bai'oina'u haukia herekiae ki'a atabu ahi. <sup>27</sup> Au hanona aka mai aro'ari, rani bo'okia a'i aparua, mare'a a'ari abomo 'ako'u e'ororo, rani bo'ona aniani here'u eaha'i, e'u parua 'ekana eaha'i abomo habuni'u eaha'i. <sup>28</sup> Weiakia mo ikupaiakia aha'i, ia rani bo'ona Tirama ena marea haukia 'eka haeai haeai temiaho haukia i'imakia paunai ao'u niaro'ari. <sup>29</sup> Hau ha ni'abe'abe raninai au abomo na'abe'abe, hau ha ki'a aonai tibakatotona raninai

au ao'u nihaiara.

<sup>30</sup> Au kapa raninai, taba weiakia au e'u 'abe'abe tibawaira tinana haukia kapainakia. <sup>31</sup> Tirama e'lobina au a'i nabai'oi. Ia hanona Tirama eka Obiapaka Iesu Keriso Hamana, Ia atana kahabanamona banaibana. <sup>32</sup> Au Damaseko ai amiaho raninai obia 'arana atana Areta ena Kabana hauna ehore 'ima haukia aiara apa'uana pa'abina 'akonai ehorotinakia katebirina'u. <sup>33</sup> Ia uaho'abaka baika tehore areha ha aonai teutana'u pihia 'ererenai tebaririna'u, ia herenai abeau 'akaumana.

## 12

*Paulo Ena Mahabanai.*

<sup>1</sup> Apa hana taba namona ha a'i nibaramana, ia au hanona napa mo. Bariu Obiapaka taba baika mahabanaiai mai ibawaira tina taearanai ebaohana'u haukia robakia kahunakia. <sup>2</sup> Ihau harau haea bani teao aonai au Keriso ena maearima ha a'lobina hauna tea'i taeana teaoaina kupa ibaihauna hauna aonai. (Au a'i a'lobina, neiana hanona hauaninai eao 'ao aubanai eao, Tirama kipona mo e'lobina.) <sup>3</sup> Na'abi mue mo, hau neiana hanona tea'i taeana teaoaina Paradiso aonai. (Au a'i a'lobina, neiana hanona hauaninai eao 'ao aubanai eao, Tirama kiponamo e'lobina.) <sup>4</sup> Abomo weia 'abi baika maearima pinakiae patehina a'i petainakia, mai taba weiakia poukia maearima a'i katehina haukia aiakia eo'o. <sup>5</sup> Au hau neiana hauna kapaina, ia au kipo'u a'i kapaina'u, haeamona taba weiakia e'u 'abe'abe tibawaira tinana tabakia haukiamo kapainakia.

<sup>6</sup> Au panuatae papa raninai, au hanona po'oai a'i paeao pokina au hanona 'abi tohana pahi-nana. Ia a'i kapa, pokina au a'i nanuatae wai ha au taba ababai toihana'u mai ahina urukia to'o haukia paukiae a'i tomotibaha au hanona apa'ua ki'a baha.

*Paulo Hauaninai Haiara Ha  
Emiaho A'i Keapa.*

<sup>7</sup> Taba namoabukia aihanakia paukiai a'i mapa ki'a baha hanona Tirama hauani'uai haiara rarina ha ehorotina keba'orona'u, Satani hanona haiara neiana aonai niaka keba'ehona'u abomo keba'orona'u a'i mapa. <sup>8</sup> Rani aihau abahuba'ari Obiapaka anoina haiara neiana here'uai hauna kea'i obona. <sup>9</sup> Ia Obiapaka ehina bena'u etibaha, "E'u aoko'o hoana ikupaiana mo kabeni'o, pokina oi nu'abe'abe aonai e'u hiabu hanona niapa'ua ki'a baha." Ua buonai e'u 'abe'abe 'ekakiai napa hanona ao'u ninamo ki'a baha, pokina Keriso ena hiabuai ke'aeana'u paunai. <sup>10</sup> Keriso paunai au na'abe'abe, 'abi ki'a obokia tehina here'uai, tibahau hαιarana'u, ti'oatana'u abomo tibatetuana'u aokiai ao'u ninamo. Pokina au na'abe'abe aonai au hanona natabura toha.

*Paulo Ena Aoaro'ari Korinto  
Haukia Herekiai.*

<sup>11</sup> Wai tobahi ahina'u paunai au nababai matoha po'o 'abana. Wai hanona pou'u namona patohinana haumi. Iamo taina e'u namo aha'i re'a, ia emi iuhubeau haukia apa'uakia na tiho haukia weiakia au a'i tetara haona'u. <sup>12</sup> Au baiatamiai amiaho aonai ao'u abapahihina, hoa haeai haeai mai bata'u ta'u huri akakia mai hiabu hoakia ababai haukia tehore tebatohana'u au hanona Keriso ena iuhubeau hau'u ha. <sup>13</sup> Tirama ena marea haukia 'eka haeai haeai temiaho haukia herekiai aka ababainakia haukia ihobokia mo wai heremiai ababai. Ia wai heremiai hanona 'ara'u a'i atabuna. Weiana hanona ababai ki'a raninai, e'u ki'a tomohina haona.

<sup>14</sup> Bariu neiana hanona rani ibaihauna au aba'oru kabaki bakinimi, abomo au hanona a'i kabaro'arinimi. Pokina au hana wai mo nanuatae ainimi, ia emi kepu a'i nanuataeai. Haeamona miori hana hama hina ekia taba a'i kateba'oru, iamo hama hina

haukia katehore miori ekia taba kateba'oru. <sup>15</sup> Ua buonai au hanona mai aonamo'u e'u taba ikoikiai kabeni mi mai au kipo'u abomo kabaiben iaina'u wai ibaraimi paunai. E'u raona'au niapa'ua heremiai hanona emi raona'au keko'iko'i here'uai, u? Aha'i, ua a'i kehoma.

<sup>16</sup> Wai ikoimiai to'io bina, weiana au hanona puma a'i abenimi, iamo hau baika ti'abi au hanona aba haoreanimi bai'oi ai abarewanimi. <sup>17</sup> Aea a'oi aihonimi? Auhunakia haukia herekiai a'oinimi emi taba a'inakia, u? Aha'i, to'io bina au weiana a'i ababaina. <sup>18</sup> Au Tito auhuna ewahi heremiai aonai uaho'abaka ha abomo auhuna terarua tewahi, ba Tito e'oinimi emi taba ea'inakia, u? Aha'i, Tito mai au tararua hanona aomai hamonai taka abomo taeara hamonai taka'a.

<sup>19</sup> Wai pa'e turaonana rani ikoinai ai hanona kipomai emai bero taearana heremiai tatabuna, u? Aha'i. Tirama wairanai ai hanona Keriso ena aka haumai 'abi neiakiai tahananakia, abomo taba tababai haukia ikoikiai hanona wai emai hau ki'ami ibaraimi paunai. <sup>20</sup> Au hanona ao'u niaro'ari, pokina kawahi raninai, katabu ahinimi au naroonanimi ihobonai 'ao aha'i, wai abomo au katotabu ahina'u wai turaonana'u ihobonai 'ao aha'i. Au ao'u niaro'ari taba neiakiai heremiai a'i matabu ahinakia paunai, baiara mai wamuru, opuere mai ani ki'a, 'abi ki'a mai uahuahi, apa mai baripuripu. <sup>21</sup> Au hanona ao'u niaro'ari, pokina kawahi mue raninai e'u Tirama kehore kebahau ma eana'u wairamiai, bo'okia 'uainai tebabai ki'a hoahoa 'opukiai, ekia nabau ki'ai mai ekia maha poreporeai a'i teraona kabe haukia paukiai kahai.

## 13

*Paulo Ehina benakia A'ikakauma  
Aonai Katemiaho.*

<sup>1</sup> Neiana hanona rani ibaihauna au kawahi heremi. Puka robenai tererena 'abana, "Beho ha hanona maha iha\* maearimakia rua 'ao aihau ekia 'abiai kahabatohana." <sup>2</sup> Au e'u bakibaki ibaruana heremai aonai 'uainai tobeho haumi abaraonanimi. 'A bariu atau'ai namiaho aonai harina maikoina haumi nabaraona muenimi. Au kawahi mue heremi hanona beho haumi ikoimiai puma katoa'ina. <sup>3</sup> Wai tonuatae katobatohana Keriso hana au pina'uai ni'abi. Weiana to'ibina Keriso hanona ena aka wai heremai a'i ni'abe'abe, ia ena hiabu heremai hanona nitabura. <sup>4</sup> 'Abi tohana Keriso hanona 'abe'abe paunai matiu ibiri ropo 'ubinai teahu 'arina, iamo bariu nimauri nemiaho Tirama ena hiabuai. 'Abi tohana Keriso ena mauri aonai ai abomo ta'abe'abe, ia emai baihatia'a heremai hauna aonai Tirama ena hiabuai Keriso ena mauri aonai katamiaho katabarainimi.

<sup>5</sup> Kipomi emi mauri tomoiha harainakia, abomo kipomi tomo'iobi harainimi wai hanona a'ikakauma aonai tomiaho 'ao aha'i. Wai to'ibina Keriso Iesu hanona emi mauri aonai nemiaho. Aha'i raninai wai hanona a'i tua'ikakaumai tohana. <sup>6</sup> Au nantuatae wai kato'ibina ai hanona Keriso ena iuhubeau haumai tohamai. <sup>7</sup> Ai Tirama herenai tabahuba'ari wai beho ha a'i katobabaina paunai. Ai Keriso ena iuhubeau haumai 'ao iuhubeau haumai aha'i re'a weiana hauna aomi a'i kebaro'arina, ia emai nuatae apa'uana hanona wai aka berokia katbabai. <sup>8</sup> Ai hanona 'abi tohana ia'iki'ana akana ha a'i katababaina, ia ibaraina akana mo katababaina. <sup>9</sup> Ai ta'abe'abe iamo wai tutabura hanona aomai ninamo. Ba ai tabahuba'ari wai katobero 'unimi. <sup>10</sup> Weiana buonai atau'ai namiaho aonai 'abi nejakia narerenakia tiwahi heremi, weiana kawahi aonai Tirama hiabu ebena'u haunai a'i mahinabe pahihinimi. Hiabu

neiana hauna emi a'ikakauma kebapa'uana ia a'i kea'i ki'ana.

### 'Abi Orena.

<sup>11</sup> 'Abi orenai, uaho'aba'u e, bariu hanona ikoimiai haparua. Katoaka tabura emi a'ikakaumai katobero 'unimi. E'u noinoi 'abikia katoa'i taeankia, ha ha aomi katehamomo abomo baibuai katomiaho. Ba raona'au mai baibua Tiramana hanona heremai kemiaho.

<sup>12</sup> Tirama ena banamoai ha ha katobanamonimi.

<sup>13</sup> Tirama ena robe maearimakia ikoikiai ekia banamo abikia teuhunakia heremai.

\* 13:1: (1) mahakiai teihana haukia

## Paulo Ena Marere GALATIA Haukia Herekiae

### *Puka Aona Irerena 'Abina*

Rani weianai maearima kori'uakia tohakia Iesu murinai te'au haukia hanona Iuda haukia. Iamo Iesu ehore Paulo iuhubeau haunai ebaona ba euhuna eao rama haeai haukia herekiae pou namona keiroro aina. Maearima bo'ona a'ikakauma haukia kipokia tebahaemo. Iamo atetua apa'uana ha erama. 'Uaina maearima weiakia hanona Mose ena rauhubu a'i teka'a ainakia haukia, matoha Iuda haukia Mose ena rauhubu tika'aina 'abana, ba a'ikakauma haukiae teao aonai rauhubu weiakia kateka'a ainakia 'ao aha'i? Maearima baika hanona ia tibahi ahinakia itare katea'ina Iuda haukia ekia hoahoa ihobonai, ba ia katehore Mose ena rauhubu kateka'a ainakia.

'A Paulo ni'abi weiana hanona taba apa'uana aha'i, aika Iesu Keriso kaha a'ikakaumana hanona Tirama wairanai kahabero. Iuda haukia baika hanona teao weia Galatiae, ba tenuatae a'ikakauma haukia weia katebahi ahinakia Mose ena rauhubu kateka'a ainakia. Aka neiana hanona Galatiae nirama ba Paulo pouna eona. Ua buonai puka neiana ererena, weiana ekia a'ikakauma mai ekia hoahoa kebabera.

Kori'uainai hanona Paulo e'abi Tirama ehore ia etina'ana iuhubeau akana kebabaina. Haeamona e'abi maearima weiakia Iesu Keriso aonai tia'ikakauma haukia hanona Tirama wairanai tebero. Ba puka puonai hanona e'abi Keriso aika ki'a herenai eba'abaeanaka hanona Auba Robe kehore aika ke'uai ainaka, weiana aika hanona rani ikoinai hoahoa namokia maearima herekiae kahababai.

*Puka Paipana Apa'uakia*  
a. Roba iahu. (1.1-10)

- b. Paulo iuhubeau hauna mai ena hiabu. (1.11—2.21)
- c. Tirama ena aoko'o hoana pouna namona. (3.1—4.31)
- d. A'ikakauma haukia ekia bero mai ekia aka katebabai haukia. (5.1—6.10)
- e. 'Abi orekia. (6.11-18)

### *Banamo 'Abina.*

<sup>1</sup> Au Paulo, Iuhubeau hau'u, aka neiana maearima a'i tebena'u 'ao a'i teuhuna'u, ia Iesu Keriso mai Hamana 'ariai ebamikiri muena Tiramana ohi teuhuna'u. <sup>2</sup> Au uaho'abaka neia tamiaho ikoikiae atakiae a'ikakauma haumi Galatia hanona aonai marea ha ha aokiae tamiaho haumi narere benimi.

<sup>3</sup> Tabahuba'ari Tirama aika Hamaka mai Obiapaka Iesu Keriso ekia aoko'o hoana mai baibua hanona ahamiai kemiaho. <sup>4</sup> Keriso kipona ena mauri ebaibeni aika eka ki'a paunai, ia hanona hanopaka ki'a obona neiana aonai kebamaurinaka, aika Hamaka Tirama enuatae ihobonai. <sup>5</sup> Ua buonai Tirama ena nuabi kemiaho banaibanai. Amen.

### *Keriso Pouna Namona Ikupianamo.*

<sup>6</sup> Au ata'u ta'u huri heremiae hanona Keriso ena aoko'o hoanai eaparinimi Tiramana abamo tohabo 'abaeana ia tuao pou haeai tehinana haukia herekiae.

<sup>7</sup> Weiana hanona pou namona tohana aha'i. Eka neianai maearima baika tibabaoonimi pokina tenuatae Keriso pouna namona katebahaeaina. <sup>8</sup> Ai 'ao kupa aneruna ha pemai re'a, ia pou haeai ha peiroro aina ba pou namona 'uainai heremiae tairoro aina hauna terarua a'i teihobo raninai puma banaibanai kehoaina. <sup>9</sup> 'Uainai tahinana hauna bariu haeamona nahina muena. Tai ha pou namona toa'ina hauna aha'i ia pou haeai ha keiroro aina raninai puma banaibanai kehoaina. <sup>10</sup> Bariu au maearima ekia nuatae naka'aina? Aha'i 'akina. Tirama ena nuatae naka'aina. 'Ao maearima aokia kabaonamona

taearana natabuna? Maearima aokia ibaonamona manuatae aina raninai, au hanona Keriso ena ta'ara ia'ina hau'uai a'i paeao.

*Iuhubeau Hauna Paulo Kipona  
Kikipana.*

<sup>11</sup> Uaho'aba'u e, au nanuatae kato'ioquina pou namona airoro aina hauna hanona maearima ena 'iobiai a'i emai. <sup>12</sup> Maearima ha herenai a'i a'ina 'ao tai ha a'i eba'ioquina'u, ia Iesu Keriso here'uai ebawaira tinana hauna a'ina.

<sup>13</sup> E'u mauri 'uainai Iuda haukia ekia a'ikakauma taearanai amiaho raninai ababaina hauna 'uruna aba to'ona, Tirama ena marea haukia a'oata ki'a bahanakia anuatae kabapururunakia. <sup>14</sup> Au ihaburi'u haukia Iudai bo'okia baiatakiai Iuda ekia a'ikakaumai au hanona aotipa ki'a baha, mai 'aba'abamai ekia hoahoa hanona anuataeai ki'a bahanakia.

<sup>15</sup> Ia hina'u nuanai a'i arama baha aonai Tirama aba etina'ana'u, ena aoko'o hoanai eaparina'u, ia ena nuatae ai <sup>16</sup> nahuna ebawaira tinana here'uai, pouna rama haeai haukia herekiai kairoro aina, weiana hau ha ohi a'i tarobahu aina. <sup>17</sup> 'Ao a'i mo aeao Ierusalema, iuhubeau haukia 'uaikia a'i aihana, ia beronai mo aeao Arabia, muriai haeamona aeao Damaseko. <sup>18</sup> Ihau aihau teore murinai, au akara'au aeao Ierusalema Petero herena ta'abi'abi, weia tamiaho wapu harau haea ima. <sup>19</sup> Weia Iuhubeau haukia haeai ha a'i aihana, Obiapaka hatina Iakobo mo ikupaiana aihana. <sup>20</sup> Tirama wairanai 'abi neiana arerena hanona tohana ia a'i nabai'oi.

<sup>21</sup> Murinai amikiri hanona Suria mai Kilikia hanokia aeao. <sup>22</sup> Ia Iudeai weia Tirama ena marea haukia hanona au waira'u a'i te'ioquina, <sup>23</sup> pou'u mo teona tetibaha, "Uainai e'oatanaka hauna nihore a'ikakauma weiana

kebapururuna hauna bariu aba neiroro aina." <sup>24</sup> Ua buonai Tirama tebanamona au pau'uai.

## 2

*Paulo Mai 'Abana Kipokia Ekia  
Aka Haeamo.*

<sup>1</sup> Ihau harau haea bani teao murinai haeamona au Banaba ohi Tito tabaka'ana kipokia takara'au taeao Ierusalema. <sup>2</sup> Tirama ena 'abi ao'uai ewaira tina buonai aeao Ierusalema, pou namona weiana rama haeai haukia herekiai airoro aina hauna robana ahuna. <sup>3</sup> A'ikakauma haukia tipoki ainakia haukia kipokia hanona haia haiai ta'abi'abi aina kateraonaraona, pokina 'uainai airoro aina hauna mai bariu nairoro aina hauna e'u aka maikoina anina a'i meaha'i ta'una. <sup>4</sup> I'abamai hauna Tito hanona Helene hauna ia a'i tebahi ahina itare kea'ina. <sup>5</sup> Eka to'u aonai uaho'aba bai'oikia baika bunianai tetoto, te'itimanaka Keriso Iesu aonai mauri ha'ina hauna kate'ioquina, ekia nuatae hanona rauhubu ena ta'ara ia'inai patehoroti muenaka. <sup>6</sup> Ekia raona a'i tabatohana, pokina pou namona 'abina tohana heremiasi a'i mehaeai.

<sup>7</sup> Ia weia haukia apa'ua haukia tibaonakia haukia (au here'uai hanona ekia haeai aha'i. Tirama hanona maearima hauani ena namo a'i nibatohana,) ba maearima weia haukia pou namona au airoro aina hauna ahana taba ha a'i tehore 'auna. <sup>8</sup> Ia teihana Tirama aka ebena'u pou namona rama haeai haukia\* herekiai airoro aina ihobonamo Petero Iuda haukia† herekiai eiroro aina. <sup>9</sup> Tirama ena hiabuai Petero hanona iuhubeau haunai eao Iuda haukia herekiai, ihobonai mo Tirama ena hiabuai au hanona iuhubeau hau'uai aeao rama haeai haukia herekiai. <sup>10</sup> To'u weiana kupuana haukia Iakobo, Petero mai Ioane Tirama aoko'o hoana neiana ebena'u hauna teiha

\* 2:7: (7) 'ao itare a'i tea'ina haukia † 2:7: (7) 'ao itare tea'ina haukia

tinana raninai, au mai Banaba ohi imamai tea'inakia uaho'aba hoana. Weiana tebatohana ai haumai hanona rama haeai haukia herekia kataeao, ia hanona Iuda haukia herekia kateao.<sup>10</sup> Abi hamona tehinana heremaiai hanona uraru haukia kataraona apa'uanakia, 'abi weiana ta'i taeana ba aka neiana hanona au aba wa'i baha nababai to'ona.

*Paulo Antioka ai Petero Ebatana.*

<sup>11</sup> Ia Petero emai Antioka raninai maearima wairakiai abatana pokina ena babai hanona a'i ebero.

<sup>12</sup> Petero rama haeai haukia kipokia teaniani haeamo aonai Iuda haukia baika weiakia Iakobo euhunakia haukia tekara'au, ba Petero hanona emikiri herekiai ekapare, pokina ia weiakia itare tiba'iobi ainakia haukia eta'u ainakia. <sup>13</sup> Iuda haukia baika abomo ia ena 'ubo weiana ihobonai bai'oi hoana tebabaina, ba ekia 'uboai Banaba abomo eahurea. <sup>14</sup> Au babai weiana aiha pouna pou namona 'abina tohanai a'i teka'aina, ua buonai ikoikiai wairakiai Petero abatana atibaha, "Oi hanona Iuda haumu, ia emu babai hanona matoha rama haeai haukia ihobonai nomiaho, ia Iuda haukia 'abana aha'i. Aea homanai rama haeai haukia kobahi ahinakia Iuda haukia ekia hoahoai katemiaho?"

*Bamauri Hanona A'ikakaumai Nimai.*

<sup>15</sup> Aika hanona Iuda ai harama toha hauka, ia 'ki'a hauka' aha'i, rama haeai haukia 'abakia aha'i. <sup>16</sup> 'A naha'ioquina weiana maearima hanona rauhubu ia'i taeanai a'i kebero, ia Iesu Keriso kea'ikakaumana hanona kebero. Ua buonai aika abomo Keriso Iesu naha'ikakaumana, weianai kahabero Keriso ia'ikakaumanai ia rauhubu ia'i taeanai aha'i, pokina rauhubu ia'i taeanai hanona maearima ha a'i kebero. <sup>17</sup> "Ia aika Keriso herenai eka bero nahatabuna, ia mo ki'a haukai kahawaira tina matoha rama

haeai haukia ihobokiai raninai, weiana anina hanona Keriso ki'a haukai nibabainaka hauna, u? Ia weiana hanona aha'i 'akina. <sup>18</sup> Kipo'u a'i ki'ana rauhubuna kabakori muena raninai, au kipo'u kabatohana'u au rauhubu nakabena hau'u mai ki'a hau'u. <sup>19</sup> Au hanona rauhubu paunai a'ari rauhubu herenai, weiana buonai Tirama 'eunaj kamauri. <sup>20</sup> Au hanona Keriso ohi matiu ibiri ropo 'ubinai aba teba'arinamai, ba au a'i namauri, ia Keriso au ao'uai namauri. 'A mauri neiana bariu hauani'uai namiaho aina hauna hanona Tirama Nahuna eraona'au aina'u kipona ena mauri ebena'u hauna na'ikakaumana buonai namauri. <sup>21</sup> Tirama ena aoko'o hoana hanona a'i na'i ki'ana. Rauhubuai bero paha'ina raninai, Keriso hanona aba e'ari 'abaea."

### 3

*Bamauri Hanona Rauhubu ai A'i Nimai.*

<sup>1</sup> Galatia haumi e, wai hanona po'o haumi. Tai meai ebahureanimi? Wairami tohanai Iesu Keriso pouna aba ikikipa haraina matiu ibiri ropoai teahu 'arina. <sup>2</sup> Au nanuatae taba hamona mo kato-hina bena'u, Auba Robe toa'ina hanona rauhubu toka'ai haraina paunai 'ao pou namona tona toa'ikakauma paunai? <sup>3</sup> Wai hama na tupo'o aiho? Popounai mauri neiana Auba Robeai toa'i ramana, ia bariu hauani taburanai katoba-puana? <sup>4</sup> Wai pou namona paunai tohau haiara 'ari hanona anina keaha'i? Ua kehoma raninai, aba tohau haiara 'ari 'abaea. <sup>5</sup> Taba buonai Tirama ena Auba ebenimi, bata'u ta'u huri akakia ebabai baiatamiai? Ia rauhubu toka'ai haraina paunai 'ao pou namona tona toa'ikakaumana paunai?

<sup>6</sup> Aberahamo tomoraonana. Puka robenai na terere aihona, "Aberahamo Tirama ea'ikakaumana, ena a'ikakauma paunai Tirama ehore bero haunai ebaona."

7 Ua buonai kato'io bina weiakia Tirama tia'ikakaumana haukia ikoikiai hanona Aberahamo nahuna. 8 Puka Robena aba eiha 'uaina rama haeai haukia katea'ikakauma hanona Tirama kehore berokia kehinana, ua buonai pou namona eiroroai 'uaina Aberahamo herenai, "Oi paumuai hanopaka maearimakia ikoikiai Tirama kebanamonakia." 9 Ua buonai weiakia mai ekia a'ikakauma haukia hanona Tirama nibanamonakia a'ikakauma hauna Aberahamo kipokia. 10 Rauhubuui temiaho haukia ikoinai hanona Tirama ena ururu ba'anai temiaho, pokina Puka robenai na erere aihona, "Rauhubu pukanai terere 'abikia ikoikia a'i ke'ima haraina hauna hanona Tirama ena ururu ba'anai nemiaho." 11 Aba ewaira tina harai rauhubuui hanona hau ha a'i ebero Tirama wairanai, pokina Puka robenai e'abi,  
"Bero hauna hanona a'ikakaumai kemauri."

## Hab 2.4

12 Ia rauhubu hanona a'ikakaumai a'i emai, terarua a'i teihobo, Puka robenai e'abi, "Maearima ha rauhubu 'abikia ikoikiai keka'ai orena hauna hanona weiakiai kemauri."

13 Keriso aika eka ururu pumana ehoaina, rauhubu ena ururu aonai eba karahinaka, pokina Puka robenai aba ererena etibaha, "Matiu 'ubinai ti'ari haukia hanona Tirama ena ururu aonai."

14 Keriso ebakarahinaka pokina hanona banamo Aberahamo etauna hauna rama haeai haeai haukia katetabu ahina Keriso Iesu paunai, ua buonai aika eka a'ikakaumai hanona Auba Robe weiana e'abi'uaina hauna kaha'ina.

*Rauhubu Mai 'Abi'uai.*

15 Uaho'aba'u e, eka miao maurina aonai ihaiha ha ma'ina hamaihana, maearima rua ekia 'abi'uai tebabaina teba'oruna murinai tai taba ha a'i kea'i parena 'ao ahana ha a'i keahu'auna, ihobona mo kemiaho. 16 Tirama

ena 'abi'uai Aberahamo ena rama herenai ebabaina. Puka Robenai a'i e'abi 'ena rama herekiai' anina maearima bo'ona, ia e'abi 'ena rama herenai' anina maearima hamona, Keriso Iesu e'uhina. 17 Na'uhina hanona neiana, Tirama 'abi'uai ebabai 'uaina ba ihau 430 teao murinai rauhubu ebaibenai hauna kehore 'abi'uai weiana a'i kea'i parena 'ao a'i keba'akaumana. 18 Rauhubuui itau kerama raninai, 'abi'uaiai hanona itau a'i kerama. Ia 'abi'uaiai Tirama ena aoko'o hoanai itau Aberahamo ebena. 19 Ba rauhubu ena aka hanona taba? Rauhubu erama ena poki hanona beho 'ekakia kebakarahinakia. Ia hanona aneru temaiaina bairarao hauna imanai teutana akana erama, keao mo rama weiana e'uhai 'uaina hauna kemai. 20 Tirama ena 'abi'uai aonai hanona abira hamona mo nemiaho, weiana bairarao hauna ena aka aha'i, ia Tirama mo keikupai.

*Rauhubu Eaoainaka Keriso Her-ena.*

21 Rauhubu hanona Tirama ena 'abi'uai kea'i ki'ana? Aha'i, aha'i 'akina. Rauhubu weiana mauri ebaibenai raninai, bero hanona aba rauhubuui pemai. 22 Ia Puka Robenai e'abi hanopaka neiana maearimakia maikoinai hanona ki'a ekaabunakia aonai temiaho. Weiana buonai tia'ikakauma Iesu Keriso herenai haukia a'ikakaumai 'abi'uai weiana katea'ina.

23 A'ikakauma neiana a'i emai baha raninai, aika hanona rauhubu ekaabunaka wapura hauka 'abana keao mo a'ikakauma kewaira tina. 24 Weianai rauhubu hanona eka iha 'ini hauna 'abana kebaka'anaka Keriso herenai weia a'ikakaumai bero kebenaka.

25 Bariu a'ikakauma hanona aba emai, rauhubu ena iha 'ini hiabuna herekai hanona aba eore.

*A'ikakauma Keaoainaka Tirama Nahunai Kahaeao.*

26 Keriso Iesu tua'ikakaumana buonai wai ikoimiai hanona Tirama nahuna. 27 Keriso kipokia

toba hamomo 'uere robe toa'ina haumi ikoimiai hanona Keriso ena mauri habunina ihobona aba tobatotona. <sup>28</sup> Ua buonai wai hanona ha a'i ehaeai, Iuda hauna 'ao Helene hauna, ta'ara a'i hauna 'ao ta'ara a'i hauna aha'i, hau 'ao babi'e, pokina ikoimiai hanona hamona Keriso Iesu aonai. <sup>29</sup> Ba wai Keriso 'euna raninai, wai abomimo Aberahamo ena rama haumi, Tirama ena 'abi'uai barina hanona aba katotauna.

## 4

### *Aika Tirama Nahuna.*

<sup>1</sup> Au na'uhina hauna neiana, miori hanona hamana barina maikoinai ke'aranakia, iamo miori papana raninai, ia hanona ta'ara a'i hauna 'abana. <sup>2</sup> Eko'iko'i aonai, i'mana hauna mai iha'ini hauna ekia iha'ini ba'anai nemiaho keao mo hamana ebatohana ranina ketaina. <sup>3</sup> Ihobona aika abomo miori papaka raninai hanopaka aubakia haeai haeai ta'arakia ia'ikiai haeai. <sup>4</sup> Ia ranina tohana etaina aonai, Tirama nahuna euhuna, babi'e nuanai erama abomo Iuda ekia rauhubu ba'anai erama, <sup>5</sup> weiakia rauhubu ba'anai haukia kebamaurinakia, weiana kea'inaka Tirama nahuna tohanai kebaonaka.

<sup>6</sup> Bariu nahunai toao buonai, Tirama hanona Nahuna Aubana euhuna emai aokai nemiaho, Aubana weianai aika Tirama nahaparina, "Hama'u."\* <sup>7</sup> Ua buonai wai hanona ta'ara'i haumi aha'i, ia Tirama nahuna. Tirama nahuna tohami buonai barina ikoinai Aberahamo herenai e'abi'uai aina hauna wai 'eumi.

*Paulo Aona Earo'ari Galatia Haukia Herekiai.*

<sup>8</sup> 'Uainai Tirama a'i to'ibina raninai, wai hanona tirama tohakia aha'i haukia ekia ta'ara a'i haumiai toao. <sup>9</sup> Ia bariu Tirama aba to'ibina, au na ma'abi aiho, Tirama abomo wai e'obi harainimi, aehoma buonai katomue auba haeai haeai 'abe'abekia ekia namo aha'i haukia herekiai ekia

ta'ara a'i haumiai katoao mue? <sup>10</sup> Wai hanona wapu, nawa, ihau hamona to'una mai ihau ikoikiai tatushia mo emi beraura apa'uakiai tubaonakia. <sup>11</sup> Au hanona wai paumiai ao'u niaro'ari, pokina e'u aka ikoinai heremiai hanona anina a'i meaha'i.

<sup>12</sup> Uaho'aba'u haumi e, au wai nanoinimi, au wai 'abamiai aba aeao 'uai ihobonai wai abomo rauhubuai tomokarahi 'aba'uai tomoao. Here'uai hoa ha a'i tubarea. <sup>13</sup> Wai to'ibina e'u inawa paunai heremiai amiaho pou namona airoroai 'uaina heremiai. <sup>14</sup> E'u inawa ena pumai abaro'arinimi, ia a'i toihā haona'u, a'i toa'i ki'ana'u, aonai toa'ia'i haraina'u, Tirama ena aneru patobanamona 'abana 'ao Iesu Keriso patobanamona 'abana. <sup>15</sup> Ua raninai mai aonamomi tomiaho, ia bariu emi aonamo aeana eao? Au a'ibina rani weianai mahami patoipa ahinakia au patobena'u na tohoma. <sup>16</sup> Ia bariu au 'abi tohana nahinana heremiai buonai aba emi 'ou hau'uai naeao, u?

<sup>17</sup> Maearima weiakia ekia nuatae aomi kateana, ia ekia raona mai ekia nuatae hanona a'i tebero, ekia nuatae heremaii katonuatae ainakia.

<sup>18</sup> Maearima aona keiani maearima weiana kebanamona pauhai, weiana hanona rani ikoinai enamo au heremiai pamiaho 'ao aha'i. <sup>19</sup> Naha'u e, wai buomiai naro'ari, miori nirama haiarana 'abana, ua nahaiara aiho keao mo wai Keriso ihaihana ihobonai katoao. <sup>20</sup> Au ao'u niaro'ari pokina heremiai kamiaho aia'u kabahaeaina kabarinimi, wai paumiai naraona raona 'ari.

*'Abi Ibabatai Ihobona Hagara Mai Sara 'Abakia.*

<sup>21</sup> Wai tai tonuatae rauhubu ba'anai katomiaho haumi tohohina bena'u. Wai rauhubu taba na ehoma hauna to'ibina, 'u? <sup>22</sup> Puka Robenai na erere

\* 4:6: (6) "Papa, Hama'u."

aihona, Aberahamo nahuna hanona rua, ha hanona atawana weiana ta'ara a'i babi'ena herenai ebaramana, ha hanona ia atawana tohana herenai ebaramana.<sup>23</sup> Ia atawana ta'ara a'i babi'ena nahuna hanona harama ihobonai erama, a' atawana tohana nahuna hanona Tirama ena 'abi 'uai miorina.<sup>24</sup> Ori neiana hanona 'abi ibabatai 'abana. Babi'ea ha hanona 'abi'uai apa'uakia rua. Ha hanona Sinai oeonai emai ta'ara'i haukia ebaramanakia, ia hanona Hagara.<sup>25</sup> Hagara, ne'uhina hanona Sinai oeona Arabia aonai, ia hanona bariu rani neiana Ierusalema aiarana 'abana ia mai nahuna kipokia ikoikiai rauhubu ena ta'ara'i haukiai tiao.<sup>26</sup> Ia Ierusalema welana kupai hauna hanona ta'ara a'i nia'i babi'ena Sara, ia hanona aika hinaka.<sup>27</sup> Puka Robenai aba ererena, "One'one babi'emu e, koaonamo! Beni hαιarana a'i nuonobaina babi'emu, koabe koio mai aonamomu. Pokina babi'e 'abaea nahuna hanona kebo'o, ia babi'e weiana mai atawana hauna nahuna a'i kebo'o."

Isa 54.1

<sup>28</sup> Uaho'aba'u e, bariu wai hanona Isako 'abana Tirama nahuna, ia ena 'abi'uai ihobonai.<sup>29</sup> Rani weianai harama ihobonai erama miorina ehore miori weiana Auba Robe hiabunai erama hauna e'oatana, bariu abomo ua mo homana.<sup>30</sup> 'A Puka Robenai aea terere aihona? Na e'abi aiho, "Ta'ara'i babi'ena nahuna ohi mou'u ahinakia, pokina eatawa tohana nahuna barina hanona ta'ara a'i babi'ena nahuna ohi bari hamona a'i katewetena."<sup>31</sup> Ua buonai uaho'aba'u e, aika hanona ta'ara a'i nia'i babi'ena nahuna, ia ta'ara'i babi'ena nahuna aha'i.

## 5

### Keriso Erubunaka.

<sup>1</sup> Keriso ehore aika aba erubunaka rauhubu aonai a'i kahamiaho. Ua buonai tomokori

'ini, a'i temebiri muenimi rauhubu ena ta'ara'i haumiai a'i tomoao marikina.

<sup>2</sup> Tomobahu, au Paulo wai naba'ibinimi, itare patoa'ina raninai Keriso ena aka hanona anina aha'i heremiai.<sup>3</sup> Haeamona nahinabe pahihi muenimi natibaha, itare kea'ina hauna hanona rauhubu ikoikiai ke'ima harainakia kenamo.<sup>4</sup> Wai rauhubuai bero tutabuna haumi hanona Keriso 'eunai kipomi tokabe obonimi, Tirama ena aoko'o hoanai hanona aba tokapu.<sup>5</sup> Ia aika hanona eka a'ikakaumai mai Auba Robe hiabunai nahabuabena Tirama bero kebenaka.<sup>6</sup> Aika Iesu Keriso aonai kahahamomo raminai, itare 'ao itare aha'i ena haeai hanona aha'i, ia taba apa'uana hanona a'ikakauma, raona'auai niwaira tina.

<sup>7</sup> Wai 'uainai hanona a'ikakaumai tok'a harai ki'a baha, ia tai eharabunimi 'abi tohana ia'i taeanai?<sup>8</sup> Aoani 'abikia weiakia hanona eaparinimi Tirama herenai a'i timai.<sup>9</sup> Katoraonana, "Bakupu muramurana papana nihore parawa maikoinai nibakupuna."<sup>10</sup> Au hanona Obiapaka na'ikakaumana kebarainimi wai raona haeai ha a'i katoa'ina. Baoao baoao nibenimi hauna hau aea homana ia Tirama kehore 'arana kebena.

<sup>11</sup> Uaho'aba'u e, itare nairoro aina raninai aehoma buonai ti'oatana'u? Weiana petohana raninai Keriso ena matiu ibiri ropo kairoro aina hanona atetuan aha'i.<sup>12</sup> Au nanuatae weiakia itareai titbatetuanimi haukia hanona patekatu'a pateao atetua tabana patekabe obona.

<sup>13</sup> Uaho'aba'u e, Tirama eaparinimi hanona kerubunimi. Erubunimi haumi hanona hauani akakia ki'a obokia a'i katababai, ia raona'auai ha ha kipomi katobarai barai haeamo.<sup>14</sup> Rauhubu ikoinai aba eba-hamomonakia 'abi neianai, "Here-muai hauna koraona'au aina oi

kipomu nuraona'au aimi'o 'abana."  
<sup>15</sup> Kato'ima 'ima harainimi wai kipomi emi baiarai mai emi 'au bo'o 'au bo'oai kipomi a'i tomobaorenimi ta'una.

### *Auba Robe Buabuana Mai Hauani Ena Hoahoakia.*

<sup>16</sup> Ua buonai na'abi, Auba Robe emi mauri ke'uai aina raninai hauani ena nuatae akakia ki'a obokia a'i katobabai. <sup>17</sup> Pokina hauani ena nuatae akakia hanona Auba Robe nihao abuna, Auba Robe ena nuatae akakia abomo hauani nihao abuna, ia terarua tibaitaeai, ua buonai wai patobabai haukia a'i tubabai. <sup>18</sup> Auba Robe wai ke'uai ainimi raninai, wai hanona rauhubu ba'anai a'i katomiaho.

<sup>19</sup> Hauani ena hoa hanona emahanai ki'a baha. Taba neiakiai, nabau, raona 'opukia, maha porepore, <sup>20</sup> kaiba'uku ikuatiaina, mea, bai'oata, 'au, wamuru, opuere, 'ao'aea, baihabapa'a, ba'iobi bai'oikia, <sup>21</sup> raona ki'a, inu 'ari, ripuripu, ba babai uahomakia ikoikiai. 'Uainai abahinabe pahi-hinimi, bariu haeamona nahinabe pahihi muenimi, aka uahomakia tibabai haukia hanona Tirama ena obia aiarana a'i katetabu ahina.

<sup>22</sup> Ia Auba Robe eka mauri ke'uai aina buabuana hanona raona'au, aonamo, baibua, bapahihi, aoko'o, rabo harai, aia o'o, <sup>23</sup> 'aiaunu mai aokiro. Neiakia ikoikiai hanona rauhubu a'i ni'oatanakia. <sup>24</sup> Keriso Iesu ena maearima hanona hauanikia mai ekia hoa ki'a obokia mai ekia nuatae ki'a obokia aba ikoko'au matiu ibiri ropo 'ubinai.

<sup>25</sup> Auba Robe mauri aba ebennaka buonai, ia mehore eka mauri me'uai aina. <sup>26</sup> Aika a'i kahapa, 'abaka kipokia a'i kahaba opuere-nakia 'ao a'i kahawamuru ainakia.

## 6

### *Emi Puma Katobua Haehaee.*

<sup>1</sup> Uaho'aba'u e, hau ha beho aonai etoto raninai, aomiai Auba Robe niaka haumi ha kohore

aomu namonai kobaberona. Ia oi abomo kipomu ko'ima haraini'o, baihobo a'i mea'ini'o marikina. <sup>2</sup> Emi puma katobua haea haea, taeara neianai hanona Keriso ena rauhubu katoa'i taeana. <sup>3</sup> Taba aha'i hauna mo niraonana ia hanona maearima apa'uana ha raninai, ia kipona ni'oina. <sup>4</sup> Ha ha kipomi emi babai kato hobonakia, taba obabai haraina hauna hanona kipomu koapaini'o, ia a'i koaoaina maearima wairakiai. <sup>5</sup> Maearima ikoikiai kipokia ekia puma katebuuanakia.

<sup>6</sup> Tirama ena 'abi emarereaina hauna hanona ena taba namokia ikoinai ena ba'iobi hauna ohi katebina'anakia.

<sup>7</sup> Kipomi a'i katohaore, maearima ha Tirama a'i kebapo'ona. Maearima ube ebatona ihobonai mo anina kea'ina. <sup>8</sup> Ba hauani ena nuataeai ebato bato hauna hanona hauani herenai 'ari ketabu ahina, ia Auba Robe 'eunai ebato bato hauna hanona Auba Robe herenai mauri banai banai ketabu ahina. <sup>9</sup> Aka namona ibabainai a'i kahahau hororo, aika a'i kaha 'abe'abe raninai, eueu ranina kemai aonai buabua namona kaha'ina. <sup>10</sup> Ua buonai namo nahatabu ahi ranikiai maearima ikoikiai herekiai namo kahababainakia, ia a'ikakauma haukia herekiai hanona namo kahababai harainakia.

### *Banamo Abina Orena Mai Bahuba'ari.*

<sup>11</sup> Rererere rarikia neiakia katoihananakia au ima'uai arerenakia tiwahi heremi. <sup>12</sup> Weiakia tenuatae atakia keapa'ua haukia tibahi ahinimi itare katoa'ina, ekia pokи tohana hanona Keriso ena matiu ibiri ropo paunai maearima a'i teme 'oatanakia. <sup>13</sup> Weiakia aba tetarenakia haukia mo, rauhubu a'i tika'aina, ia wai tenuatae ainimi itare katoa'ina, hauanimi paunai katebaro'e. <sup>14</sup> Au taba ha a'i kapai 'abaeana, ia eka Obiapaka Iesu Keriso ena matiu ibiri ropo ikupaiana mo kapaina, Keriso paunai hanopaka e'ari

au here'uai, au abomo aba'ari hanopaka herenai. <sup>15</sup> Itare 'ao itare aha'i terarua aniki'a aha'i, ia taba apa'uana hanona rama mahamahana. <sup>16</sup> Tirama ena baibua mai aoko'o hanona raona neiana tia'i taeana haukia ikoikiai herekia, abomo Tirama ena maearima weiakia aubai Isaraela haukiai tiao haukia herekia.

<sup>17</sup> E'u 'abi puawai hau ha a'i mebaro'arina'u, pokina au hau'uai mani'a temiaho tibaihana au Iesu ena ta'ara'i hau'u.

<sup>18</sup> Uaho'aba'u ikoimiai e, nabahuba'ari eka Obiapaka Iesu Keriso ena aoko'o hoana ahamiai kemiahoh. Amen.

d. 'Abi orekia. (6.21-24)

## **Paulo Ena Marere EPESO Haukia Herekiae**

### *Puka Aona Irerena 'Abina*

Puka neiana ena poki hanona ɣahomana. Tirama ena nuatae hanona taba ikoikiae kupai mai hanopakai Keriso aonai katebahaeamo. Weiana Keriso hanona taba ikoikiae 'arakia haunai keao (1.10). Haeamona Tirama ena nuatae hanona kipona ena maearima keberi no'anakia, ba ekia mauri maikoina hanona Keriso kipokia katebahaeamo, weiana aokia hanona kehamona.

Puka neiana iro'ana kori'uainai hanona Paulo ehore ao namonai e'abi tabura, maearima keba'iobi harainakia Iesu katea'ikakaumana, ba katebahaeamo ihobona a'ikakauma haukia to'una hamona. Pokina Iesu ena aka namona ahana hanona Tirama maearima eba-maurinakia, ba Auba Robe kebenakia, weiana hanona ia ikupaiana kehore ena maearima ekia aka namokia kebabainakia ena 'abi ihobokiae (1.4). Iro'ana ibaruuanai hanona Paulo ni'abi, maearima Keriso kipokia tebahaeamo hanona aokia kehamona haeamona Tirama ena taeara tainai katetai.

Puka neiana aonai hanona Paulo 'abi ibabatai bo'ona ebaibenai maearima keba'iobi harainakia, weiana ekia bahaeamo Keriso kipokia hanona maearima to'una hamonai tiao, matoha hauani hamona 'abana (4.16), 'ao matoha itu 'abana (2.19-21). Puka neiana kahatubai haraina hanona Tirama ena nuatae ena maearima ekia taba namokia kebabainakia hanona kaha'iobi harainakia.

### *Puka Paipana Apa'uakia*

- a. Roba iahu (1.1-2)
- b. Keriso mai Tirama ena marea haukia. (1.3—3.21)
- c. Mauri mahamahana Keriso aonai. (4.1—6.20)

### *Banamo 'Abina.*

<sup>1</sup> Au Paulo, Tirama ena nuatae paunai Keriso Iesu ena Iuhubeau hau'u ai naeao, wai robe haumi Epeso ai Keriso Iesu tua'ikakaumana haumi narere benimi. <sup>2</sup> Nabahuba'ari Tirama aika Hamaka mai eka Obiapaka Iesu Keriso ekia aoko'o hoana mai baibua hanona ahamiai kemiah.

### *Keriso Paunai Tirama Taba Namokia Kebenaka.*

<sup>3</sup> Tirama eka Obiapaka Iesu Keriso Hamana kahabanamona! Tirama hanona aika Keriso aonai ebanamonaka, auba ena banamo ikoinai kupa ai hauna aba ebanamo ainaka. <sup>4</sup> Hanopaka a'i ebabai bahana raninai, Tirama ehore Keriso aonai aba etina'anaka ia 'euna, weiana ia wairanai kaharobe mai ki'a ha a'i kahababaina. <sup>5</sup> Ena raona'au ai Tirama hanona aba eraona 'uaina aika ena bakiro miorikiae kahaeao Iesu Keriso paunai, ena raona weiana hanona ia ena nuatae mai ena aonamo. <sup>6</sup> Tirama kahabanamona ia hanona ena aoko'o hoana ebenaka ena nuabi aonai, aoko'o weiana hanona Nuhuna niraona'au aina paunai aika ebeni 'abaeanaka.

<sup>7</sup> Keriso e'ari aruarunai eka ki'a aba ehina hao mai bamauri aba ha'ina. Tirama ena aoko'o hoana hama ua eobia aiho, <sup>8</sup> ia ebenaka hauna eapa'ua ki'a baha. Ena 'iobi mai ena aobero maikoinai, <sup>9</sup> Tirama ena raona bunikia 'uainai eraonana hauna ebawaira tinana aika herekai mai aonamona, raona weiana hanona aba eba'oruna Keriso paunai kebabaina. <sup>10</sup> Weiana Tirama ena raona eraonana wapuna ketaina raninai, ebabai tabakia ikoikiae keba hamomonakia kupa mai hanopaka tabakia ikoikiae 'arakiae hanona Keriso mo ikupaiana kepoki.

<sup>11</sup> Tirama hanona ena nuatae ihobonai taba ikoikiae ebabainakia, ena raona aba

eba'oruna hauna paunai aika ea'i taeanaka ia ena maearima tohakai kahaeao Keriso aonai.<sup>12</sup> Weiana paunai ai Keriso herenai emai buabeni nemiaho 'uai haumai hanona etina'anamai, Tirama ena nuabi katabanamo haraina.

<sup>13</sup> Wai abomo 'abi tohana 'uruna tona raninai Tirama ena maearima mai toao, pouna namona weiana hanona wai ibamaurimi. Haeamona Keriso to'a'ikakauma ba Tirama ena 'abi'uai Auba Robena ebenimi, weiana hanona ibatoha hoana wai ia 'eunai toao.<sup>14</sup> Auba Robe hanona ibatohana hoana kori'uaina Tirama kehore e'abi'uai tabakia aika kebenaka abomo ia kehore ena maearima kebamaurinkakia. Tirama ena nuabi hamabanamona.

### *Paulo Ebahuba'ari Epeso Haukia Paukiai.*

<sup>15</sup> Weiana paunai, au abomo emi a'ikakauma Obiapaka Iesu herenai hauna mai emi raona'au Tirama ena robe haukia ikoikiai herekiai hauna 'uruna aba aona,<sup>16</sup> wai paumiai banamo 'abina Tirama nabeni to'ona. E'u bahuba'ari aokiai wai atami nahinana,<sup>17</sup> Tirama nanoina, eka Obiapaka Iesu Keriso Hamana nuabina kehore Auba Robe kebenimi kebaotipanimi abomo Tirama heremiae kebawaira tinana, weiana wai hanona Tirama kato'iobi haraina.<sup>18</sup> Haeamona Tirama nanoina, aomi mahakia kebano'anakia ena ea katoihana ba kato'iobina, weiana ia eaparinimi haumi emi buabeni hanona taba, mai banamo namoabukia e'abi'uai ainakia Tirama ena robe haumi katoa'ina hauna hanona aea keapa'ua aiho.<sup>19</sup> Ba kato'iobina Tirama ena hiabu rarina 'akina weiana aika a'ikakauma hauka herekai niaka hauna eapa'ua ki'a baha ena pua aha'i.<sup>20</sup> Tirama ena hiabu weiana hanona Keriso aonai eaka ba 'ari haukia baiatakiai ebamikirina eaoaina kupai weia Tirama itipana tainai ebamiatina.<sup>21</sup> Keriso hanona aba 'ubi 'akinai kupa tabakia apa'uakia ikoikiai 'ubikiai,

poki haukia, hiabu haukia, tabura haukia, obia haukia ikoikiai 'ubikiai, mai ia atanahonana aba ubi 'akinai ata ikoikiai 'ubikiai, hanopaka neiana maurina aonai abomo mauri weiana wairai kemai hauna ikoikiai 'ubikiai.<sup>22</sup> Tirama ehore taba ikoikiai Keriso 'apuna panabana ba'anai ehorotinakia abomo Tirama ena marea haukia ikoikiai arakiai ebaona ba taba ikoikiai kepoki ainakia.<sup>23</sup> Tirama ena marea haukia hanona Keriso huanina, 'eka maikoinai aonai taba ikoikiai ua nibabonu aihonakia.

## 2

### *Keriso Kipokia Mauri Ebenaka.*

<sup>1</sup> 'Uainai wai hanona to'ari emi beho mai emi ki'a paukiai.

<sup>2</sup> Weia tomiaho aonai hanopaka neiana ena hoahoa taina totai abomo Tiaporu weiana kupa mai hanopaka baiatakia nipoki aina hauna aiana tok'a aina, aubana hanona bariu Tirama aiana a'i tika'aina haukia aokiai niaka.<sup>3</sup> 'Uainai aika ikoikai abomo ia ihobokia huanika ekia nuataetakia hatai, ekia hoahoa mai ekia raona ki'a obokia hababai, maearima ikoinai ihobona ramai aika hanona Tirama ena opuere ihoainga hauka.

<sup>4</sup> 'A Tirama ena aoko'o eapa'ua, ena raona'au rarina herekai paunai,<sup>5</sup> weia eka beho paukiai aba ha'ari hauka Keriso kipokia mauri mahamahana ebeni haeamonaka, (Tirama ena aoko'o hoanai wai bamauri toa'ina.)<sup>6</sup> Keriso Iesu aonai Tirama ehore ia kipokia ebamikiri haeamonaka, kupai ia kipokia ebamiatu haeamonaka.

<sup>7</sup> Weiana hanona ena rabo harai ebaihanaka Keriso Iesu aonai, ena aoko'o hoana aea eapa'ua aiho kebawaira tinana bariu mai waira ranikiai maearima kate'iobina paunai.<sup>8</sup> Pokina Tirama ena aoko'o hoana paunai wai Keriso to'a'ikakauma hanona eba maurinimi. Neiana hanona wai kipomi emi taburai aha'i, ia

Tirama ena beruberu.<sup>9</sup> Aka harai paunai aha'i, ua buonai tai ha kipona a'i keapa.<sup>10</sup> Aika hanona Tirama ebabainaka, Keriso Iesu aonai ebaramanaka aka namokia ibabaikia paunai, weiana Tirama aba eba'oru baihana hanona aika ua kahamauri aiho.

### *Aika Kahabahamomo Keriso Aonai.*

<sup>11</sup> Ua buonai tomoraonana, 'uainai ramai hanona wai rama haeai haumi, weiakia itare haukia na tehoma haukia hanona wai teaparinimi 'itare aha'i haumi'. (Weiana hanona hauani ahnai mai maearima imakiae tebabaina.)<sup>12</sup> Tomoraonana, rani weianai wai hanona Keriso a'i to'iorina, Tirama etina'anakia haukia Isaraela haukia baiatakiae wai hanona aha'i, wai 'eka haeai haumi. Haeamona 'abi'uai rauhubuna herenai wai maearima 'etemi, hanopakai emi buabeni aha'i, mai heremai Tirama aha'i aonai tomiaho.<sup>13</sup> Wai 'uainai atau'ai tomiaho haumi, bariu hanona Keriso Iesu aonai ia aruarunai emaiainimi Tirama herena.<sup>14</sup> Keriso hanona aika eka baibua, ia hauaninai Iuda haukia mai rama haeai haukia baiatakiae ikaiabu i'aeana tabana etapana, terarua eba-hamomonakia,<sup>15</sup> ia Iuda ekia rauhubu weiana mai rauhubu 'abikia tererenakia tabakia ikoikia ebaorenakia. Pokina Iuda haukia mai rama haeai haukia terarua hanona ia kipona aonai rama mahamahanai kebaramana, taearea neianai baibua ebabaina.<sup>16</sup> Haeamona matiu ibiri ropo ahnai Keriso ehore rama rua neiakia eba-hamomonakia ebairarao ainakia Tirama herenai. Neianai hanona ekia bai'oata ebapuana.<sup>17</sup> Keriso emai wai rama haeai haumi atau'ai haumi heremai baibua pouna namona eiroro aina haeamona herenai Iuda haukia abomo herekiae baibua pouna namona eiroro aina.<sup>18</sup> Keriso paunai aika ikoikai Iuda mai rama haeai haukia Auba

Robe hamonai kahaeao Hamaka herena.

<sup>19</sup> Ua buonai wai bariu hanona maearima 'etemi aha'i 'ao aru haumi aha'i, wai hanona Tirama ena maearima robekia kipokia itubu hamomona mai Tirama ena itu maearimami.<sup>20</sup> Wai hanona itu 'abana, iuhubeau haukia mai mahabanai haukia tebakorina hauna ahnai wai tokori 'au, Keriso Iesu ia kipona itu kupuan piharanai eao.<sup>21</sup> Keriso aonai itu tabakia maikoina niara'au nikori niapa'ua marea robeai niao Obiapaka aonai.<sup>22</sup> Ia aonai wai rama haeai haumi abomo Iuda haukia kipokia itu hamonai nibakori haeamonimi Tirama ena miahō 'ekanai keao ena Auba Robe aonai.

## 3

### *Paulo Rama Haeai Haukia Ekia Iroro Hauna.*

<sup>1</sup> Eka neiana buonai, au Paulo nahina benimi au hanona Keriso Iesu ena aka paunai nawapura wai rama haeai haumi emi namo itabuna paunai.<sup>2</sup> Pa'e wai 'uru aba tona Tirama ena aoko'o hoanai aka neiana ebena'u wai ibaraimi taearanai.<sup>3</sup> Tirama ena raona bunina hanona here'uai ebawaira tinana, ba au ahore arere 'uai 'abi bita 'aki aokiae.<sup>4</sup> Weiana katotuabina raninai, e'u 'obi Keriso ena raona ebuni tabana a'ina hauna aba kato'ioibina.

<sup>5</sup> Rani 'uaikia aokiae hanona Tirama raona bunina neiana maearima a'i eba'iobinakia, ia bariu hanona Tirama ehore ena Auba Robeai ena iuhubeau haukia robekia mai ena mahabanai haukia robekia herekiae ebawaira tinana.<sup>6</sup> Ebuni tabana hanona neiana, pou namona paunai rama haeai haukia Keriso Iesu aonai Iuda haukia kipokia Tirama ena banamo hamona katea'i haeamona, hauani hamonai keba haeamonakia, ba 'abi'uai weiana Tirama ebenakia Keriso Iesu paunai hauna katea'i haeamo.

<sup>7</sup> Tirama ena aoko'o hoana paunai ena hiabu ao'uai eaka taearanai

pou namona ihinana hau'uai aeao. <sup>8</sup> Tirama ena maearima ikoinai baiatakiai au hanona taba aha'i 'abana, iamo Tirama aoko'o hoana neiana ebena'u hanona rama haeai haukia herekiai Keriso ena obia eapa'ua ki'a baha mai a'i kepuia hauna pouna kairoro aina. <sup>9</sup> Taba ikoinai ebabainakia Tirama ena raona bunikia 'uaina raninai emai mo bariu ihau bo'okia aba teao aonai ehore bunina hauna aea kebakarahi aihona hanona au kahore kahina pounakia maearima ikoikiai herekiai. <sup>10</sup> Weiana buonai bariu Tirama ena marea maearimakia paukiai poki anerukia mai hiabu aubakia weiakia kupai temiaho haukia abomo Tirama ena aotipa haeaihaeai kate'iorina. <sup>11</sup> Neiana hanona aba wa'i baha Tirama eraonana eka Obiapaka Keriso Iesu aonai kebabaina hauna ebabaina. <sup>12</sup> Aika Keriso aonai ia naha a'ikakaumana paunai kahatabura mai nuako'oka kahaeao Tirama wairanai. <sup>13</sup> Ua buonai nanoinimi, au wai paumiai nahau haiara hauna aomi a'i kebaao, pokina weianai wai emi nuabi katotabu ahina paunai.

#### *Keriso Ena Raona'au Kato'ioquina.*

<sup>14</sup> Weiana paunai Hamaka wairanai nakaipehu nabahuba'ari, <sup>15</sup> rama ikoinai kupai mai hanopakai hanona ia herenai terama mai atakia ebaibenai, <sup>16</sup> Tirama nanoina, ia ena obia tabakia nuabikia aokiai Auba Robe hiabunai aubami keba taburanakia, <sup>17</sup> ba emi a'ikakauma paunai Keriso wai aomiai kemiaho. Au nabahuba'ari wai raona'au aonai katoramu mai katokori 'ini harai. <sup>18</sup> Weiana wai Tirama ena robe haukia ikoikiai kipokia tabura katoa'i haeamona, Keriso ena raona'au ena mata mai ena homa'a, ena ro'e mai ena 'oura aea homana hauna kato'iobi haraina. <sup>19</sup> Ba kato'ioquina, Keriso ena raona'au hanona ekabanai ki'a baha ba aika eka 'obi, weiana Tirama ena taba ikoikiai kebabonunimi.

<sup>20</sup> Aika aokai niaka Tirama ena hiabu hanona pahanoina 'ao paharaona tabakia ikoikiai kebenaka ketaina. <sup>21</sup> Tirama ena nuabi hanona Tirama ena marea haukia aokiai mai Keriso Iesu aonai rani ikoinai kemiaho keaomo banaibana! Amen.

## 4

### *Kahabahamomo                            Keriso Huanina Aonai.*

<sup>1</sup> Au Paulo Obiapaka ena aka ababaina buonai wapura itunai tekaabuna'u, ba wai Tirama eparinimi haumi nabahi ahinimi ia ena nuatae maurinai katomiaho. <sup>2</sup> Rani ikoinai kato'aiaunu, katomamata, kato-bakiro, raona'au ha ha emi puma 'ekakiai katobarai barai.

<sup>3</sup> Auba Robe bahamomo weiana ebenimi baibua ai ebahamomonimi hauna kato'ini bena. <sup>4</sup> Weiana Keriso huanina hanona hamona, Auba Robe abomo hamona, ihobonai mo Tirama eparinimi ebahamomonimi buabenai hamona weiana aonai katomiaho.

<sup>5</sup> Obiapaka abomo hamona, a'ikakauma abomo hamona, 'uere robe abomo hamona. <sup>6</sup> Tirama abomo hamona, ia hanona maearima ikoikai Hamaka, ia hanona maearima ikoikiai arakiai, mai maearima ikoikiai aokiai niaka, abomo maearima ikoikiai aokiai nemiaho.

<sup>7</sup> Ia Keriso aika ha ha ena ibeni haeai tohakia ebenaka, aoko'o hoana weiana hanona kipona ena nuatae ihobonai ewatenakia maearima ha ha ebenakia. <sup>8</sup> Puka robenai na erere aihona, "Ia ekara'au eao 'ubi 'akina rani-nai,

wapura haukia eaoainakia mai maearima beruberu ebenakia."

Sal 68.18

<sup>9</sup> 'Abi neiana 'Ia ekara'au eao 'ubi' anina hanona taba? Weiana anina hanona ia aba eriri 'uai eao hano benunai. <sup>10</sup> Eao hano benunai hauna haeamona ekara'au emue eao kupa 'ubina 'akinai hanona ena obiai 'eka maikoinai mai

taba ikoikiai kebahu abunakia paunai.<sup>11</sup> Ia hauna kipona ibeni ena robe haukia ebenaenia hanona baika iuhubeau haukiai kateao, baika mahabanai haukia kateao, baika ebaneria haukiai kateao, baika hanona iroro haukiai mai baika bamarere haukiai kateao.<sup>12</sup> Keriso ibeni weiakia ebaibenai hanona Tirama ena robe maearimakia ikoikiai keba'orunakia marea akakia ibabaikiai, marea ketabura kekorī 'ini weiana hanona Keriso huanina.<sup>13</sup> Taeara neianai aika ikoikai kahamai kahabahamomo Tirama Nahuna kaha'ikakaumana mai kaha'ibina keao mo Obiapaka aonai kahakiro harai, Keriso ena hoahoa namona maikoina ihobonai kahaeao.<sup>14</sup> Ba aika hanona miori papakia 'abakiai a'i kahaeao, maearima weiakia ekia bai'oi 'abikiai mai ekia iriara ai a'i kate'oinaka matoha baura 'abana keabuao abuaonaka.<sup>15</sup> Ia aika raona'au ai 'abi tohana kahahinana hanona taba ikoikiai aokiai aika kahapa'ua Keriso 'abana kahaeao, ia hanona aika eka ara hauna.<sup>16</sup> Keriso aonai hanona huanai maikoina eara'au haeamo abomo huanai maikoina hanona ibakai nihore nia'i 'inina ba huanai puapuakia ha ha ikau ena aka ai tibarai barai tiaka, weiana hanona huanai maikoina raona'auai kipona nibapa'uana nibakori 'inina.

### *Mauri Mahamahana Keriso Aonai.*

<sup>17</sup> Ua buonai Obiapaka atanai au wai nahi'a benimi abomo naba raonanimi, bariu wai emi miaho maurina hanona a'i keao rama haeai haukia ekia mauri 'abana, ia ekia raona hanona anikia aha'i.<sup>18</sup> Ia aokia hanona tewapura abunakia. Tirama ebaibenai maurina hanona ia herekiai aha'i, pokina ekia raonaraona aha'i mai ekia ao tubu paunai.<sup>19</sup> Ia taba tibabaina hauna a'i tihauaiae aina hoahoa ki'a obokia tibabai, abomo hoahoa 'opukia tenuataeai ki'a bahanakia.

<sup>20</sup> Ia wai Keriso pouna hanona ua a'i tomarerai ai-hona.<sup>21</sup> Abaiobina wai Keriso pouna tona abomo 'abi tohana weiana Iesu aonai nemiaho hauna taearana teba'ibinimi.<sup>22</sup> Ua buonai huanimi 'ai'aina weiana mauri ki'a obona taearanai eba miahonimi hauna katobakuri ahina, weiana huanai ena nuatae bai'oikia tihore kipona nia'i ki'ana.<sup>23</sup> Aomi mai emi raonaraona hanona katobamaha mahanakia.<sup>24</sup> Huanai mahamahana katobatona, weiana hanona Tirama ihaihanai erama hauna 'abi tohanai ebero mai erobe.

<sup>25</sup> Ua buonai wai ikoimiai bai'oi katohabona, heremi haukia herekiai 'abi tohakia katohina, pokina aika ikoikai hanona huanai puapuakia ha ha Keriso huanina hamona aonai.<sup>26</sup> Aomi tiopuere raninai kato'ima 'ima harainimi ki'a a'i katobabaina, beraura maikoina aomi mai opuerekia katomiaho hanona a'i kenamo.<sup>27</sup> Satani 'ekana a'i katohorena.<sup>28</sup> Nibainao hauna bainao mehabona meaka kipona taburanai aka namona mebabaina, ba weianai uraru haukia kebarainakia.<sup>29</sup> Pinamiai 'abi ki'a obokia ha a'i katohina 'apuana, ia 'abi namokia katohina, aiami tiona haukia kebarainakia katetabura, ba emi 'abi tohinana hauna kehore namo kebenakia.<sup>30</sup> Tirama ena Auba Robe aona a'i katobaoko'ona, ia hanona Tirama ena batohā hoana wai heremai keao rani weiana kemai hanona kebamaurinimi.<sup>31</sup> Baibata nuaki'a opuere baiara mai 'uahi'uhai neiakia katohabonakia, haeamonā baki'a raonaraonakia haeai haeai katohabonakia.<sup>32</sup> Ia 'abami ha ha herekiai katorabo harai mai aomi keberuberu, ba ha ha 'abami ekia ki'a katohina hao, ihobona Tirama ehore Keriso paunai emi ki'a ehina haonakia 'abana.

wai hanona Tirama nahuna mai ena raona'au.<sup>2</sup> Ba kipomi ha ha katoraona'au ainimi Keriso aika eraona'au ainaka 'abana. Aika paukai ia kipona ena mauri ebaiben'i beruberu tabana timina 'orimona mai ki'a ia'i obokia tabanai eao Tirama wairanai.

<sup>3</sup> Wai baiatamiai nabau, raona ki'a obokia mai uhore 'abi'abikia ha pinamiai a'i kato-hina 'apuana a'i katobabainakia, pokina neiakia hanona a'i tebero Tirama ena maearima robekia herekiai.<sup>4</sup> Abomo 'ori ki'a obokia, bapo'opo'o 'abikia, mai 'abi 'ai'ai 'abikia, weiakia hanona a'i tebero wai heremiai, ia Tirama herenai banamo 'abikia katohina hanona enamo.<sup>5</sup> Wai pato'ibina hanona penamo, nabau, raona ki'a 'ao uhore hauna hanona kaiba'uku nekuti aina hauna, ba maearima uahomana hanona ena itau aha'i Keriso mai Tirama ekia obia aiarana aonai.

<sup>6</sup> Hau ha ena po'o 'abikiai a'i ke'o'animi, pokina taba neiakia paukiai Tirama ena aohaiara kemai weiakia aia a'i tiona haukia herekiai.<sup>7</sup> Weiana paunai wai hanona maearima uahomakia kipokia a'i katobaihau.<sup>8</sup> 'Uainai wai hanona wapura aonai tomiaho, ia bariu wai hanona Obiapaka ena ea aonai tomiaho, ua buonai wai hanona ea maearimamiai katoao.<sup>9</sup> Ea buabuana hanona raona namokia, aka berokia, mai 'abi tohakia maikoina nibawaira tinana.<sup>10</sup> Ua buonai tomobahobo Obiapaka aona ibaonamona akana taba hauna kato'obi haraina.<sup>11</sup> Maearima wapura akakia weiakia anikia aha'i tibabainakia haukia kipokia a'i katobaihau, ia katoba karahinakia aka weiakia hanona beho akakia.<sup>12</sup> Weiana taba bunianai tibabai haukia ihinakia hanona mai haumaeakia buonai a'i kahinana.<sup>13</sup> Ba taba ikoinai kahamai ainakia ea aonai hanona katekere harai.<sup>14</sup> Pokina taba ikoinai tiwaira tina harai haukia hanona eai tiao. Neiana

paunai na ti'abi aiho,  
"Parua haumu e,  
mono'a, 'ariai momikiri,  
ba Keriso oi kebaeani'o."

<sup>15</sup> Weiana paunai emi mihaho maurina hanona kato'ima haraina, po'opo'o haukia 'abakiai a'i katoao ia aobero haukia 'abakiai katoao.<sup>16</sup> Bariu aka ranikia ebenimi haukia a'i kato-baore 'abaeanakia, pokina rani neiakia hanona rani ki'a obokia.<sup>17</sup> Weiana buonai po'opo'o ai a'i katoao, ia Obiapaka ena nuatae aea homana hauna kato'obi haraina.

<sup>18</sup> Waini beinai a'i katoiu 'ari, weiana hauna kehore wai kea'i ki'animi, ia 'ekanai Auba Robe mehore mebabonunimi.<sup>19</sup> 'Abami kipokia tubahamomo aonai Salamoai, hui'ai, mai auba huikiai kato'abi'abi, aomiai Obiapaka katohui aina mai katobanamona.<sup>20</sup> Rani ikoinai eka Obiapaka Jesu Keriso atanai banamo 'abina Hamaka Tirama kahabena taba ikoikiai paukiai.

### Hawainibe Mai Marea.

<sup>21</sup> Ha ha kipomi 'abami aiakia katoka'ainakia ihobona Keriso tumariki aina 'abana.

<sup>22</sup> Babi'e e, atawami aiakia katoka'ai ihobona Obiapaka aiana patoka'aina 'abana.<sup>23</sup> Pokina hau hanona babi'e kepoki aina ihobonai mo Keriso marea nipoki aina 'abana. Tirama ena marea haukia to'una hanona ia huanina, ba ia kipona hauani weiana nibamaurina.<sup>24</sup> Bariu hanona Tirama ena marea haukia Keriso aiana nika'aina ihobonai babi'e abomo taba ikoikiai aokiai atawakia aiakia kateka'ainakia.

<sup>25</sup> Hau e, atawami katoraona'au ainakia ihobona matoha Keriso marea haukia eraona'au ainakia, weiana ia kipona ena mauri ebaiben'i ia herekiai 'abana.<sup>26</sup> Neiana ebabaina hanona Tirama ena marea haukia beiai eba'uerenakia mai Tirama ena 'abiai ebamaha mahanakia haeamona ebarobenakia Tirama euna.<sup>27</sup> Pokina Tirama ena

marea haukia ikoinai weiana hanona kenamo harai abomo keiroro harai mai behona keaha'i, ia a'i kemani'a mani'a 'ao a'i kemaruru ki'a baika uahomakia herenai kateaha'i, weiana hauna ia kea'ina 'eunai keao.<sup>28</sup> Taeara neiana ihobonai hau atawakia kateraona'au ainakia, matoha kipokia hauanikia tiraona'au aina 'abana, hau atawana niraona'au aina hauna hanona kipona abomo niraona'au aina.<sup>29</sup> Weiana hau ha kipona hauanina a'i ni'oatana, ia nibanianina nia'ia'i haraina, ihobona mo Keriso ena marea haukia nibanianinakia ne'imana kia 'abana.<sup>30</sup> Pokina aika a'ikakauma hauka hanona Keriso hauanina puapuakia.<sup>31</sup> Puka robenai na terere aihona, 'Neiana paunai hau hanona hamana hinana kehobonakia, atawana ohi katebahamomo, ba terarua hauani hamonai kateao.'<sup>32</sup> Neiana hanona 'abi bunina apa'uana, ia au hanona Keriso mai ena marea haukia robakia nahuna katebahamomo.<sup>33</sup> Neiana buonai wai hau ikoimiai atawami katoraona'au ainakia ihobona kipomi turaona'au ainimi 'abana. Haeamona babi'e abomo atawana kemariki aina.

## 6

### *Miori Uaho Mai Hama Hina.*

<sup>1</sup> Miori mai uaho e, hinami hamami aiakia katoka'ainakia, pokina neiana katobabaina hanona ebero Obiapaka wairanai.<sup>2</sup> Hinami mai hamami katomariki ainakia. Weiana hanona Puka robena ena rauhubu 'abina kori'uaina haeamona mai 'abi'uaina.<sup>3</sup> 'Abi'uai hanona neiana, emi mauri kenamo mai hanopakai emi miaho maurina hanona kehoma'a.

<sup>4</sup> Hama hina e, nahumi a'i katoba opuerenakia, ia Obiapaka ena bairobe ai mai ena ba'iobi 'abikiai katoba apa'uana kia.

*Ta'ara'i Hauna Mai Poki Hauna.*

<sup>5</sup> Ta'ara'i haumi e, hanopakai tipoki ainimi haukia aiakia katoka'aina mai marikimi abomo aomi tohakiai mai ta'umi, ihobona Keriso aiana tuka'aina 'abana.<sup>6</sup> Katehanimi aokia katoba aonamonakia paunai a'i katoaka, ia Tirama ena nuatae akana katobabaina mai aomi ikoinai, ihobona Keriso ena ta'ara tua'ina haumi 'abana.<sup>7</sup> Aomi namonai katoaka, ihobona Obiapaka ena aka tubabaina 'abana, ia maearima ekia aka 'abana aha'i.<sup>8</sup> Pokina wai aba to'ibina Obiapaka hanona ta'ara'i haukia 'ao ta'ara a'i tia'i haukia re'a maearima ha ha aka namokia tibabai haukia 'arakia kebenakia.

<sup>9</sup> Poki haumi e, taeara ihobonai katobabai harai emi ta'ara'i haukia herekiai, ia a'i katabata'unakia, kato'ibina ia mai wai emi poki hauna hanona hamona kupai nemiaho, ia hanona maearima ikoinai ekia babai ihobokiai mo neihanakia ia tai ha'i nitaina.

### *Tirama Ena Huari Tabakia Khabatotonakia.*

<sup>10</sup> E'u 'abi orena hanona neiana, Obiapaka kipokia katobahamomo ena hiabuai kebahiabunimi, ena taburai katotabura.<sup>11</sup> Tirama ena huari tabakia ikoinai haumiai katoba totonakia, ba tiaporu ena aotipa akakia katokaiabu harainakia.<sup>12</sup> Pokina aika hanona maearima a'i nahahuarinakia, ia auba ki'a obokia weiakia auba ekia poki haukia, hiabu aubakia, hanopaka wapurana neiana tipoki aina aubakia, mai huari aubakia ki'a obokia kupa mai hanopaka baiatanai temiaho haukia kipokia nahahuari.<sup>13</sup> Weiana buonai bariu Tirama ena huari tabakia ikoikiai katoa'i taeananakia haumiai katohole 'aunakia, pokina rani ki'a obona kemai raninai wai hanona aba katokori 'ini, ba huari weiakia katobaore harainakia murinai hanona 'ekamiai katokoroti mai taburami.

<sup>14</sup> Ua buonai katokori 'ini, 'abi tohana katohinana hanona

huami ihaina huamiai katohai 'inina, mai aka bero hanona haharami i'aeana haharamiai katohole 'auna.<sup>15</sup> Mai katoba'oru harai pou namona weiana baibua nibaramana hauna katoiroro aina aomi ikoinai hanona emi tamaka 'abana katoaba'auna.<sup>16</sup> Weiakia ahakiai rani ikoinai a'ikakauma ketina katoa'i taeana, weiana hau ki'a obona ena paki mai irubakiai nibakokinimi hanona katoba'ronakia.<sup>17</sup> Tirama ena bamauri hanona katoa'i taeana emi huari baurabauranai keao, mai Tirama ena 'abi weiana Auba Robe nibenimi hauna katoa'ina emi karebai keao.<sup>18</sup> Rani ikoinai Auba Robe ena hiabuai katobahuba'ari, taba haeai haeai ahakiai mai emi nuatae ikoikiai bahuba'ari ai Tirama katonoina. Aomiai neiana kemiaho katomaha no'a rani ikoinai Tirama ena robe maearimakia ahakiai katobahuba'ari.<sup>19</sup> Au abomo aha'uai katobahuba'ari, weiana rani tabakiai au kairoro ranikiai Tirama 'abi kebena'u weianai hanona kanuako'o pou namona aonai tebuni 'abikia kabawaira tinanakia.<sup>20</sup> Au hanona Tirama kipona euhuna'u pou namona neiana kairoro aina ba weiana paunai au wapura itunai namiaho mai tabiri'u, katobahuba'ari weianai panuako'o pou namona pairoro aina Tirama ena nuatae ihobonai.

<sup>21</sup>Tukiko, uaho'abaka raona'auna mai Obiapaka ena ta'ara ia'ina hauna namona, taba ikoinai aba kehina benimi weianai wai aba kato'iorina au hanona aea homa'u haeamona taba nababaina.<sup>22</sup> Nauhuna niwahi heremi ena pokī hanona neiana, wai kato 'iorina ai hanona aea homamai, weianai aomi peba taburanakia.

<sup>23</sup> Nabahuba'ari Hamaka Tirama mai Obiapaka Iesu Keriso katehore ekia baibua, raona'au mai a'ikakauma uaho'abamai ikoimiai katebenimi.<sup>24</sup> Tirama ena aoko'o hoana hanona ikoimiai weiami eka Obiapaka Iesu Keriso turaona'auai to'ona haumi heremiai kemiaho.

## Paulo Ena Marere PILIPOLIPO Haukia Herekiae

### *Puka Aona Irerena 'Abina*

Pilipo hanona aiara apa'uana ha Makedonia ai (Iuhubeau 16), Paulo ehore pou namona eiroro aina 'ekana. Weiana murinai, eao 'eka ha hanona wapura ituai tekapo totona, ba pou eona hanona maearima baika tehore Pilipo haukia ekia a'ikakauma tibahaeaina. Iamo puka neiana aonai hanona atetua weiakia a'i kahatabu ahinakia. Paulo ena a'ikakauma hanona Iesu aonai ehoroti tohana, ua buonai ia hanona aona namonai. Paulo ena mauri aonai hanona ehai haiara, euraru mai hauani tabakia enuatae ainakia.

Ua buonai puka neiana irerenai hanona Paulo enuatae namo 'abina apa'uana kebaibenit pokina Pilipo haukia ekia barai barai ia herenai hanona eapa'ua ki'a baha paunai. Mai taba ha hanona, Paulo ena nuatae apa'uana hanona ekia a'ikakauma kebatabura muenakia katekorini, pokina a'i temeraona Paulo hanona bariu aba wapura itu aonai ba a'i temeaoko'o mue. Paulo ia nehina benakia, beruberu weiana Tirama herenai tetabu ahina hanona mauri mahamahana ba weiana hanona Keriso aonai tetabu ahina. Paulo ena nuatae apa'uana hanona Pilipo haukia Keriso ena hoahoa mai ena babai kateainakia katemauri ainakia. Weiana Keriso kipona aona eba'aiaununa, ba aka weiana Tirama ehore ia ebena hauna katebaore haraina.

### *Puka Paipana Apa'uakia*

- a. Roba iahu. (1.1-11)
- b. Paulo kipona ena mauri pahi-hikia. (1.12-26)
- c. Mauri Keriso aonai hauna. (1.27—2.18)

- d. Timoteo mai Epaproditohi ekia 'abi. (2.19-30)
- e. 'Ou haukia mai ki'a 'abi'abikia. (3.1—4.9)
- f. Paulo mai ena hau Pilipo haukia. (4.10-20)
- g. 'Abi orekia. (4.21-23)

### *Banamo 'Abina.*

<sup>1</sup> Paulo mai Timoteo, ai Keriso Iesu ena ta'ara ia'ina haumai, marere neiana tarerena ni-wahi wai robe haumi ikoimiai Pilipo ai tomiaho Keriso Iesu tua'ikakaumana haumi mai iha'ini haukia mai tibarainakia haukia kipokia heremi. <sup>2</sup> Tabahuba'ari Tirama aika hamaka mai Obiapaka Keriso Iesu ekia aoko'o hoana mai baibua hanona ahamiai kemiaho.

### *Paulo Ena Bahuba'ari Pilipo Haukia Paukiae.*

<sup>3</sup> Rani ikoikiae naraonanimi aonai e'u Tirama nabananomona. <sup>4</sup> E'u bahuba'ari ai hanona mai aonamo'u nabahuba'ari wai ikoimiai paumiai, <sup>5</sup> pokina emi a'i turi pou namona akana herenai ia'i ramana raninai emai mo bariu. <sup>6</sup> Weiana buonai aba a'iobina Tirama aka namona weiana aomiai ebaramana hauna aka weiana nibabaina keao mo Keriso Iesu ena mai mue raninai kebaore haraina. <sup>7</sup> Taeara neianai e'u raonaraona ikoimiai heremiai hanona ebero, au hanona wai naraona to'o baihanimi, pokina bariu au nawapura aonai abomo pou namona auhore aina abakori haraina ranikiae ikoikiae toa'i turina'u Tirama ena aoko'o hoana aonai. <sup>8</sup> Au Keriso Iesu aonai ikoimiai aea naraona'au aihonimi hanona Tirama ne'ioquina.

<sup>9</sup> E'u bahuba'ari hanona neiana. Emi raona'au hanona pekupu to'ona 'iobiai mai aoberoai, <sup>10</sup> weiana paunai wai hanona taba namokia tohakia katotina'anakia, aomi kemahamaha mai beho a'i katoa'ina keao mo Keriso ena mai mue raniai, <sup>11</sup> aka bero buabuakia Iesu Keriso 'eunai temai haukiae katobonu, weianai

Tirama ena nuabi ibawaira tinana mai ibanamona.

*Paulo Wapura Itunai Emiaho Pou Namona Ibarainai eao.*

<sup>12</sup> Uaho'aba'u ikoimiai e, au nanuatae kato'ibina taba weiana here'uai erama hauna hanona pou namona ibarainai eao. <sup>13</sup> Pokina obia 'arana Kaisa ena itu i'imana haukia ikoinai mai maearima ikoinai te'ibina au hanona Keriso paunai wapura itunai namiaho. <sup>14</sup> Au nawapura paunai, uaho'abaka bo'ona Obiapaka niba nuako'onakia, a'i titau Tirama ena 'abi tehinana mai taburakia.

<sup>15</sup> 'Abi tohana Keriso pouna teiroro aina aonai baika hanona mai wamurukiai mai baiarakiai, ia baika hanona aokia namokiai. <sup>16</sup> Baika neiakia hanona raona'auai teiroro aina pokina te'ibina aka neiana Tirama ebena'u hanona pou namona kauhore aina. <sup>17</sup> Baika weiakia hanona Keriso pouna aokia namokiai a'i teiroro aina, ia ekia nuatae hanona atakia patebapa'ua, mai ekia raona hanona wapurai namiaho aonai e'u haiara patebapa'uana. <sup>18</sup> 'Abina aha'i. Bai'oiuai 'ao tohakiai teibiu ibiu, ia taba apa'uana hanona Keriso pouna aba teiroro aina, neiana paunai au naonamo. 'E, au hanona kaonamo to'ona.

<sup>19</sup> Au a'ioibina weiana emi bahuba'ari ai abomo Iesu Keriso Aubana ena baraibrai ai, taba here'u ai erama hauna kehore ibamauri'u ai keao. <sup>20</sup> E'u nuatae apa'uana mai e'u buaben'i hanona neiana e'u aka aokiai a'i kahaumaea, ia 'uaina raninai ihobonai bariu abomo panuako'o harai, mauriai 'ao 'ariai re'a rani ikoikiai hauani'u ai Keriso atana kabapa'uana. <sup>21</sup> Pokina e'u mauri aonai hanona Keriso, e'u 'ari ai abomo namo katabu ahina. <sup>22</sup> Ia hauani maurinai kamiaho aka namokia kababai mo raninai, ia a'i na'ioibina aeana hauna katina'ana. <sup>23</sup> Au hanona 'eka rua baiatanai namiaho, nanuatae mauri neiana

kahabona kaeao Keriso herena, weiana hanona kenamo here'u ai. <sup>24</sup> A mauri'u ai namiaho hanona taba apa'uana tohana pokina kabarainimi paunai. <sup>25</sup> Aba a'iobi haraina hanona neiana, au hanona 'eka'u ai kamiaho, mai wai ikoimiai kipokia kahabahaeamo emi a'ikakauma ibapa'uana mai aonamomi paunai. <sup>26</sup> Weiana buonai au kamue kamai heremai raninai, wai hanona Keriso Iesu aonai emi aonamo keapa'ua au pau'uai.

<sup>27</sup> Taba apa'uana hanona neiana, Keriso ena pou namonai kipomi hoahoa namonai tomobaka'a harainimi. Weiana kawahi kaihanimi 'ao a'i kawahire'a poumi mo paona, wai hanona raona hamonai tukori 'ini tohuari pou namona ia'ikakaumanai. <sup>28</sup> Taba ikoinai ti'oatanimi haukia a'i katota'u ainakia katotabura. Weiana hanona ia ekia 'ari hoana, ia wai heremai hanona mauri hoana Tirama herenai nimai. <sup>29</sup> Keriso paunai eberuberu benimi hanona ia ia'ikakaumanai mo kipona aha'i, ia paunai katohau haiara. <sup>30</sup> Wai abomo tua'i turina'u huari neiana aonai, weiana hanona 'uainai toihana'u ihobona, bariu abomo pou tuona au nahuari oho mo.

## 2

*Keriso Aona Ihobonai Ha Ha Aiaunuai 'Abami Kipokia Kato-bapa'uanimi.*

<sup>1</sup> Na'ioibina emi bahamomo Keriso herenai nibataburanimi, mai ena raona'au ai nibarainimi. Wai Auba Robe ai tubahamomo, emi aoko'o mai rabo harai 'abami herekiai. <sup>2</sup> Weiana paunai nabahi ahinimi, raona hamonai e'u aonamo katobapa'uana, raona'au hamonai katomiaho haeamo, auba hamonai mai nuatae hamonai. <sup>3</sup> Kipomi taba ha a'i katobabaina bai'oata ai 'ao apa ai, ia ha ha 'aiaunu ai 'abami katoberu apa'uanaakia. <sup>4</sup> Ha ha kipomi emi

namo a'i katotabuna, ia 'abami ekia namo katotabuna.

<sup>5</sup> Keriso Iesu aona ihobonai wai abomo katoa'ina.

<sup>6</sup> Keriso hanona taba ikoinai Tirama ihobonai nemiaho, iamo Tirama ohi peihobo hauna a'i eraonana.

<sup>7</sup> Kipona taba aha'i 'abanai ebaona,

ta'ara'i haunai eao, maearima ihobokiae erama.

<sup>8</sup> Maearima ihobo hobonai eao aonai, kipona e'aiaunu aina,

Tirama aiana eona eao mo e'ari, weia matiu ibiri ropo 'ubinai e'ari.

<sup>9</sup> Weiana buonai Tirama ehore ea'i taeana 'ubi 'akinal, ata ebena ata ikoikiae 'ubikiae.

<sup>10</sup> Kupa ai, hanopaka ai mai hanopaka ba'anai haukia ikoikiae Iesu atanai katekai pehu.

<sup>11</sup> Maearima ikoinai pinakiae katehina pouna Iesu Keriso hanona Obiapaka, Hamaka Tirama ibanuabina.

#### *Maearima Herekiae Katoea Bihiu 'Abakia.*

<sup>12</sup> Ua buonai, e'u raona'au haumi e, kipokia hamiaho aonai aia'u toka'aina, ia bariu heremiae a'i namiaho ia rani ikoinai aia'u katoka'ainakia emi mauri akana katobaore haraina mai ta'umi mai 'ururu 'ururumi weiana hanona taba apa'uana. <sup>13</sup> Pokina Tirama hanona wai aomiae niaka ena nuatae taearanai kipomi katobabaina mai hiabuna.

<sup>14</sup> Taba ikoinai atetuai 'ao baihara taeai a'i katobabainakia.

<sup>15</sup> Weiana buonai wai a'i katobeho a'i katoki'a, Tirama nahuna namomiae katoao, wai hanona beho mai po'o hanopakana aonai tomiaho, ia herekiae katoea matoha bihiu kupai 'abakia, <sup>16</sup> weianai mauri 'abina katobawaira tina haraina.\* Keriso ena mai mue raninai au kapa, a'i abeau 'abaea mai a'i aro'ari 'abaea.

<sup>17</sup> Emi a'ikakauma akakia robekia katobaibenai Tirama herenai hauna ahana au aruaru'u pekiki oioi pa'ari matoha robe ibaibenai 'abana. Au kaonamo mai au wai kipokia kahaonamo haeamo. <sup>18</sup> Taeara ihobonai wai abomo katoaonamo mai wai au kipokia hamaonamo haeamo.

#### *Timoteo Mai Epaproditu.*

<sup>19</sup> Obiapaka Iesu nenuatae raninai nabuabena, Timoteo aba kauhuna kewahi heremi, weiana au abomo poumi kaona raninai katabura. <sup>20</sup> Pokina hau ha ia ihobona here'u ai aha'i, ia kipona mo hanona au ao'u ea'ina wai keiha 'ini harainimi. <sup>21</sup> Maearima ikoinai kipokia ekia nuatae tabakia titabu ia Iesu Keriso 'eunai aha'i. <sup>22</sup> Ia wai to'ioquina Timoteo hanona maearima aea homana, ia kipona ebatohana matoha miori ha hamana ebaraina 'abana ebaraina'u, tararua tabahamomo pou namona akana tababaina.

<sup>23</sup> Weiana buonai e'u buabenai hanona taba here'u ai aea perama aihu paihana, ba ia kauhu biaina kewahi heremi. <sup>24</sup> Obiapaka aonai naraonana ketaina au kipo'u abomo aba kawahih heremi.

<sup>25</sup> Ia au naraonana ena namo hanona uaho'abaka Epaproditu kauhu muena kewahi heremi, tararua takaa haeamo mai tahuari haeamo, ia hanona wai emi iuhubeau hauna wai touhuna e'u nuatae akakia kebabai. <sup>26</sup> Ia hanona ikoiimiae niraona ki'a bahanimi aona niaro'ari pokina pouna tona ia hanona neinawa.

<sup>27</sup> 'Abi tohana ia einawa ki'a herekiae mo pe'ari. Ia Tirama ehore eaoko'o aina ia herenai mo aha'i au abomo eaoko'o aina'u, e'u ao haiara a'i meapa'ua marikina. <sup>28</sup> Weiana buonai e'u nuatae apa'uana hanona nauhuna kewahi heremi, weiana ia katoihia muena raninai aomi kenamo, mai au e'u ao aro'ari hanona ke'aera.

<sup>29</sup> Obiapaka atanai ia katoa'i taeana mai aonamomi, maearima

\* 2:16: (16) 'ao katoa'i 'inina.

ua homakia hanona katomariki ainakia.<sup>30</sup> Pokina Keriso ena aka paunai herekai mo pe'ari, ia ena mauri ereana hanona emi barai barai akana here'u ai epua hauna ia ebaorenai.

### 3

#### *Keriso Ia'ikakaumana Paunai Bero Kebenaka.*

<sup>1</sup> 'Abi orenai, Uaho'aba'u e, Obiapaka aonai katoaonamo! 'Abi hamona neiana narere mue rere muena, ia a'i nabaoao, pokina wai kebarainimi.

<sup>2</sup> Aka ki'a haukia waeha 'abakia weiakia kato'ima 'ima harainakia titare 'abaeananakia haukia herekiai kato'ima harainimi. <sup>3</sup> Ia aika hanona itare hauka tohaka, aika Tirama nahakuti aina ena Auba Robeai, Keriso Iesu nahapaina, hauani ena hoaoho a'i naha a'ikakaumanakia. <sup>4</sup> Au abomo hauani hoaohana ia'ikakaumana a'iobina. <sup>5</sup> Au arama 'oru'oru'u ai wapu 'ababani aonai tetarena'u. Isaraela maearima'u, Beniamina ena itubu hau'u, Heberu hau'u toha'u. Iuda ekia rauhubu i'imana au hanona Parisea hau'u. <sup>6</sup> E'u tabura maikoina abakarahina Tirama ena marea haukia a'oatanakia. Rauhubu aka bero i'imana au hanona a'i abeho 'apua. <sup>7</sup> Iamo 'uainai namo tebena'u tabakia bariu Keriso paunai ki'a obokia nahinanakia. <sup>8</sup> Neiakia mo aha'i. Taba ikoikiae au naraonanakia anikia aha'i, Keriso Iesu e'u Obiapaka kaha'iohi haraina hanona taba apa'uana. Au taba ikoinai ane'enakia hamrai abaonakia pokina Keriso ka'ina paunai, <sup>9</sup> ia aonai ketabu ahina'u. Au kipo'u rauhubu ia'inai bero ha a'i atabu ahina, ia Keriso ia'ikakaumanai. Tirama kehore bero kebenaka ia'ikakaumana paunai. <sup>10</sup> Au nuuatae Keriso kipona mai ena mikiri mue hiabuna ka'iohina, mai ia eha-ia aina ihobona au abomo kaonobaina, ena 'ari taearanai au abomo ka'ari. <sup>11</sup> Weianai au

nabuabena 'ari ai mikiri mue maurina ka'ina.

#### *Paulo Puana Ebeaubena.*

<sup>12</sup> Au a'i na'abi taba ikoinai aba a'ina 'ao aba abaore haraina. Au nau'u ohona mo ka'ina hauna naraonana, weiana hanona Keriso Iesu kipona aba ea'ina'u hauna. <sup>13</sup> Uaho'aba'u e, au a'i naraonana 'uai tabana aba a'ina. Ia taba hamomona naro'ari aina, e'u aka muri'u ai hauna nareana, waira'u ai hauna mo natabura aina, <sup>14</sup> puana nabeau bena 'ara'u ka'ina. 'Ara weiana hanona Tirama eparina'u Keriso Iesu aonai kupai mauri ka'ina.

<sup>15</sup> Ikoikai aba a'ikakaumai hatabura hauka hanona ua paharaona alho. Ia wai baika taba haeani turaonana raninai, Tirama kehore neiakiae abomo aomi kebaeanakia. <sup>16</sup> Aika taba aba ha'iohina hauna mo taearanai kahaka'a.

<sup>17</sup> Uaho'aba'u e, e'u babai ihobonai katoka'a, emai aka mai 'abi tia'i taeanakia haukia katoiha harainakia. <sup>18</sup> 'Uainai rani bo'okia ahina benimi bariu abomo mai haihai'u nahina benimi, bo'ona 'akina hanona ekia mauriae Keriso ena 'ari matiu ibiri ropo ai hauna herenai 'ou haukiae tiao. <sup>19</sup> Ekia mauri puana hanona 'ari, pokina ekia tirama hanona hauani ena nuatae tabakia. Ia ekia apa hanona haumaea tabakia, aokia hanona hanopaka tabakia mo tiraonanakia. <sup>20</sup> Ia aika hanona kupa maearimaka eka aiara tohana hanona weia, aika ibamaurika hauna Obiapaka Iesu Keriso naha 'imana kupa ai kemai mue. <sup>21</sup> Ia kehore taba ikoinai kemaiaianakia kepoki ainakia, hiabuna weianai hauanika ki'a obona kebahaeaina ia hauanina mai nuabina ihobonai.

### 4

#### *Rani Ikoinai Katoaonamo Obiapaka Aonai.*

<sup>1</sup> Weiana buonai, uaho'aba'u e, wai naraona'au ainimi haumi

mai naraona ki'a bahanimi haumi hanona e'u aonamo mai e'u apa. Wai hanona ua katokori 'ini aiho Obiapaka aonai au a'abi ihobonai.

<sup>2</sup> Euodia nanoina mai Sunutuke nanoina, terarua aokia katebahamomona Obiapaka aonai. <sup>3</sup> Oi iebebe hamona habuana haumu, e'u nuatae babi'e neiakia rua kobarainakia, pokina ia hanona au kipokia taka haeamo pou namona paunai, abomo Klemento mai au 'aba'u kipokia taka haeamo haukia, ia atakia hanona Tirama ena mauri pukana aonai nemiaho.

<sup>4</sup> Rani ikoinai katoaonamo Obiapaka aonai. Haeamona nahinabe muenimi. Katoaonamo!

<sup>5</sup> Emi rabo harai maearima ikoinai wairakiai katobawaira tinana. Obiapaka hanona aba kemai. <sup>6</sup> Aomi a'i kearo 'ari taba ha herenai, ia taba ikoikiai aokiai bahuba'ari mai nuatae ai Tirama katonoina mai aomi namonai. <sup>7</sup> Tirama ena baibua hanona maearima ena 'obi etara haona, weianai aomi mai emi raona raona keiha 'inina Keriso Iesu aonai.

<sup>8</sup> Uaho'aba'u e, 'abi orena neiana. Aka nahomakia katoraona 'ini, aka namokia mai maearima atakia tibanamona akakia ikoikiai, toha tabakia, mariki tabakia, bero tabakia, aokia namo tabakia, raona'au tabakia, ibanamo tabakia. <sup>9</sup> Au here'u ai to'ioquina, toa'ina, 'uruna tonu hauna, 'ao here'u ai toihana hauna katobahobona. Weiana baibua Tiramana heremiai kemiaho.

*Paulo Pilipo Haukia Ekia Baibeni Ea'ina Namo 'Abina Ehinana.*

<sup>10</sup> Obiapaka aonai naonamo ki'a baha, pokina wai au toraona muena'u paunai, a'ioquina 'uainai toraonana'u, ia katobaraina'u taearana aha'i. <sup>11</sup> E'u uraru 'abina a'i nahinana, pokina aba amarereina taba ikoikiai aokiai aea kamamata aihona here'u ai nemiaho hauna naonamo aina. <sup>12</sup> Au a'ioquina taba nahantuatae

aonai aea kamauri aiho, abomo au a'ioquina taba ena bo'o aonai aea kamauri aiho, taba bunikia aba amarere ainakia ikoikiai aba amamata ainakia, ani'ari 'ao mare'a, obia 'ao uraru. <sup>13</sup> Keriso nihere hiabu nibena'u, ia aonai taba ikoinai katabura ainakia.

<sup>14</sup> Ia e'u haiara aokiai toa'i turina'u hanona enamo ki'a baha.

<sup>15</sup> Wai Pilipo haumi e, to'iohi haraina pou namona airoro aina popounai weia Makedonia ahabona raninai wai Tirama ena marea haumi Pilipo haumi mo kipokia habarai barai baibenai hoanai. <sup>16</sup> Ia au Tesalonika ai amiaho raninai, rani baika barai barai totiu ahinakia temai here'u. <sup>17</sup> Beruberu a'i natabuna ia buabua natabuna wai ibanamomi buabuana. <sup>18</sup> Au taba ikoinai aba a'inakia, here'u taba aba ebo'o, emi baibenai Epaproditu imanai totiuahi haukia aba a'inakia, weiana hanona timikia namokia mai baibenai tabakia Tirama aba ea'i taeanakia eaonamo ainakia.

<sup>19</sup> E'u Tirama kehore tokapu tabakia kebeni muenimi Keriso Iesu nuabina aonai kohu namokia tohakiai kebabonunimi. <sup>20</sup> Aika Hamaka Tirama herenai nuabina kemiaho banai banai. Amen.

### *Banamo 'Abina Orena.*

<sup>21</sup> Keriso Iesu ena robe haukia ikoikiai herekiai banamo katabenakia. Uaho'abaka here'u ai temiaho haukia ekia banamo tibenimi. <sup>22</sup> Robe haukia ikoikiai neia mai baika obia 'arana Kaisa ena ituai temiaho haukia abomo banamo tibenimi.

<sup>23</sup> Nabahuba'ari Obiapaka Iesu Keriso ena aoko'o hoana hanona aubami ai kemiaho.

## **Paulo Ena Marere KOLOSE Haukia Herekiai**

### *Puka Aona Irerena 'Abina*

Kolose hanona aiara ha Asia hanonai, Epeso haukia herekiai. Paulo hanona a'i eao Kolose, iamo maearima baika euhunakia teao 'eka weianai teiroro, ba temai Koloseai. Paulo pou eona hanona maearima baika tenuatae ekia a'ikakauma katebahaaeaina, ua buonai puka neiana ererena kebakori 'ininakia.

Na ehinabe aihonakia, Keriso hanona taba ikoikiai 'arakiai hauna, mai ia ikupaiana mo kehore aika ikoikai kebamaurinaka. A taeara haeai baika hanona a'i kateba maurinaka, ia Keriso herenai kateberi parenaka. Pokina Keriso aonai hanona Tirama ehore taba ikoikiai ebaramanakia, haeamona Keriso ena aka ai hanona Tirama taba ikoikiai ea'i muenakia. Keriso hanona aika aokai nemiaho, ba aika nahamahamaha, mai nahuanuatae Keriso ena hoahoa mai babai taikia kahatai. Paulo ehore puka neiana ererena, ba maearima rua ebenakia, Tukiko mai Onesimo, ba ia terarua teaoaina Kolose haukia tebenakia.

### *Puka Paipana Apa'uakia*

- a. Roba iahu. (1.1-8)
- b. Keriso ena mauri mai ena aka. (1.9—2.19)
- c. Mauri mahamahana Keriso aonai. (2.20—4.6)
- d. 'Abi orekia. (4.7-18)

### *Banamo 'Abina.*

<sup>1</sup> Au Paulo, Tirama ena nuatae paunai Keriso Iesu ena iuhubeau hau'uai naeao, mai uaho'abaka Timoteo ohi, <sup>2</sup> Tirama ena robe haumi Koloseai tomiaho uaho'abamai Keriso tua'ikakaumana haumi tarere benimi. Tabahuba'ari Tirama aika Hamaka ena aoko'o hoana mai baibua hanona ahamiai kemiah.

### *Paulo Ena Bahuba'ari Kolose Haukia Paukiai.*

<sup>3</sup> Ai wai paumiai tabahuba'ari ranikia ikoikiai, eka Obiapaka Iesu Keriso Hamana Tirama tabanamona. <sup>4</sup> Pokina poumi aba taona, Keriso Iesu tua'ikakaumana abomo Tirama ena robe haukia ikoikiai tu-raona'au ainakia. <sup>5</sup> A'ikakauma mai raona'au neiana hanona emi buabeniai nimai, buabenai weiana hanona wai 'eumi kupai nemiaho, ba neiana hanona 'abi tohana pouna namona aba 'uaina ton aonai toa'i 'irina, <sup>6</sup> pou namona weiana hanona aba emai heremi. Hanopaka maikoinai pou namona neiana aba erama otaraina ni'omu mai nebua'a, ihobona wai Tirama ena aoko'o hoana 'uruna ton mai obona tobo haraina rani weiana kori'uaina emai mo bariu wai baiatamiai erama. <sup>7</sup> Epafra herenai 'iobi weiana toa'ina, ia hanona emai raona'au hauna ai kipokia ta'ara ta'i, Keriso ena aka harai hauna wai heremai ai atamaiai, <sup>8</sup> ba ia ehore ai ehina benamai emi raona'au hanona Auba Robe aonai.

### *Keriso Ena Mauri Mai Ena Aka.*

<sup>9</sup> Ua buonai ai hanona wai paumiai tabahuba'ari to'o baihana rani weiana poumi taona aonai emai mo bariu. Ai Tirama tanoina Auba Robe kehore 'iobi mai aobero maikoina kebenimi, Tirama ena aotipai kebabonunimi ena nuatae kato'ibina. <sup>10</sup> Ba wai hanona Obiapaka ena nuatae maurinai katomiaho, weiana ia aona ibanamona akakia ikoikiai katobabai, aka namokia haeai haeai ikoinai katobabai buabuami katerama ba emi 'iobi Tirama herenai hanona keapa'ua. <sup>11</sup> Ena hiabu ikoinai weiana ena nuabi hiabunai nimai haunai keba taburanimi ba wai katokori 'ini katobakiro ikoikiai aokiai mai aonamomi. <sup>12</sup> Abomo hamaka katobanamona, ia hauna ehore eba'orunimi itau weiana ena robe haukia kipokia katoa'ina ena ea aiarana aonai. <sup>13</sup> Tirama ehore

wapura ena hiabu aonai eba mau-rinaka, haeamona emaiainaka nahuna weiana niraona'au aina hauna ena obia aiarana aonai.<sup>14</sup> Weiana Iesu paunai\* aika ebamaurinaka eka ki'a ehina haonakia.

<sup>15</sup> Keriso hanona a'i nahaihana Tirama ihaihana, ia erama'uai ba terama tabakia ikoikiai 'ubikiai. <sup>16</sup> Pokina Keriso paunai Tirama ehore taba ikoinai kupai mai hanopakai ebaramanakia, nahaihanakia tabakia mai a'i nahaihanakia tabakia, obia haukia, hiabu haukia, poki haukia, mai rauhubu haukia, weiakia kupa tipoki aina haukia Tirama ehore taba ikoikiai ebaramanakia ia paunai mai ia 'euna. <sup>17</sup> Keriso hanona aba emiaho ba taba ikoikiai terama, ba ia paunai taba ikoikiai 'ekakiai temiaho. <sup>18</sup> Keriso hanona 'ara, Tirama ena marea haukia hana hauani, ia hanona mauri pokina 'ari mikirimue hobohobona, ua buonai taba ikoikiai aokiai ia hanona waira 'akinai. <sup>19</sup> Weiana hanona Tirama kipona ena nuataeai, ia kipona ena mauri mai ikoinai nahuna aonai kemiaho. <sup>20</sup> Ba Tirama enuatae nahuna paunai taba ikoinai kupai mai hanopakai keba hamomonakia katemai ia herena. Nahuna matiu ibiri ropo ubinai e'ari hanona baibua ebabaina.

<sup>21</sup> 'Uaina raminai wai mai Tirama hanona baiatami epa'a ena 'ou haumiai toao pokina emi babai mai raona ki'a paukiai. <sup>22</sup> Ia bariu hanona nahuna hauanina ena 'ari paunai bahamomo akana ebabaina ba wai keaoainimi robe haumiai katoao wairanai katomahamaha mai emi beho 'abikia a'i kehinanakia. <sup>23</sup> Ua buonai a'ikakauma hanona wai emi mauri a'enai keao, weianai katokori 'ini harai pou namona aba tona hauna ena buabeniai a'i tomoibiu. Pou namona neiana hanona maearima ikoikiai herekiai teiroro aina hanopaka

aonai, weiana ehore au Paulo eaoaina'u aka hau'uai naeao.

### *Paulo Eaka 'ari Tirama Ena Marea Haukia Paunai.*

<sup>24</sup> Bariu e'u hauhaiara wai paumiai hauna naonamo aina. Au Keriso ena hauhaiara harina ehabona ia hauanina weiana Tirama ena marea haukia paukiai hauna hauani'uai nahoaina. <sup>25</sup> Tirama ehore au ena marea haukia ekia aka hau'uai ebaona'u, hoa neiana ebena'u ena poki hanona wai kabarainimi, Tirama ena 'abi kairoro aina keaomo kabaore haraina 'eka maikoina aonai. <sup>26</sup> Ena 'abi weiana hanona 'uainai emai bariu maearima ikoikiai herekiai ebunina, ia bariu hanona ebawaira tina haraina ena robe haukia herekiai. <sup>27</sup> Tirama enuatae ena raona bunina rama haeai haukia herekiai ebawaira tina hanona aea enuabi aiho hauna ena maearima keba'iobi ainakia, raona bunina weiana hanona Keriso wai aomiai nemiaho hauna, ba wai hanona ena nuabi katobuabena kipokia katowatena. <sup>28</sup> Ai hanona Keriso pouna tairoro aina maearima ikoikiai herekiai, aotipa haeai haeai tarobenakia mai taba'iobinakia weiana maearima ikoinai katenamo harai Keriso aonai ba katabaiben'i Tirama wairanai. <sup>29</sup> Aka neiana paunai au naka'ari mai naro'ari Keriso ninore tabura mai hiabu au ao'uai hauna nibaiben'i.

## 2

### *Kaha'ikakauma Tabura Bai'oi Kahaba'orona.*

<sup>1</sup> Au nanuatae wai kato'iorina au e'u aro'ari hanona aea homana wai paumiai, mai a'ikakauma haukia weiakia Laodikei temiaho haukia paukiai, mai au toha'u a'i teiha 'apuana'u haukia abomo paukiai. <sup>2</sup> E'u raona tohana hanona aokia ketabura mai raona'auai katebahamomo, weiana aokia kea, obo kateobo harai keaomo Tirama ena 'abi

\* 1:14: (14) 'ao ia aruarunai

bunikia kate'iobinakia, weiana hanona Keriso. <sup>3</sup> Keriso aonai hanona aotipa mai aobero kepukia ikoikiai weia ebuninakia.

<sup>4</sup> Au wai nahinabe aihonimi hau ha aoani 'abikiai a'i me'oinimi marikina. <sup>5</sup> Au hau'u hanona wai heremai aha'i, ia auba'u hanona wai heremai, iamo emi aka hanona tebero abomo Keriso tua'ikakaumana mai taburami weiana naihanakia hanona naonamo.

*Keriso Haunai Kotau To'o Hanona Mauri Tohana Koa'ina.*

<sup>6</sup> Ua buonai, wai Keriso Iesu aba toa'ina emi Obiapaka, bariu hanona ia aonai katomiaho. <sup>7</sup> Wai katokori 'ini ia aonai matoha matiu 'anoai niramu 'abana, ia ahana emi mauri katoba kori'auna matoha, itu 'abana, pou namona taba'iobinimi a'ikakaumanai katotabura ba rani ikoinai ia katobanamona.

<sup>8</sup> Kato'ima 'ima harainimi, hau ha kehore maearima ekia aotipa ba'iobikiai mai bai'oikia 'abikiai a'i me'oinimi, ba'obi weiakia hanona maearima ekia aotipa hoahoakiai timai haeamona auba ki'a obokia hanopaka aonai tipoki haukia herekiai timai, ia Keriso 'eunai aha'i.

<sup>9</sup> Pokina Tirama ena mauri hoahoana maikoina hanona Keriso huanina aonai nemiaho. <sup>10</sup> Wai emi bahamomo Keriso aonai hanona mauri namona maikoinai aba toa'ina. Keriso hanona poki aubakia ikoikiai mai hiabu aubakia ikoikiai arakiai nemiaho. <sup>11</sup> Keriso aonai wai hanona aba itare toa'ina, itare weiana hanona maearima imakiai a'i tebabaina, ia itare weiana hanona huanai ena hoahoa ki'a obokiai herekiai katokapare, weiana hanona Keriso ena itare. <sup>12</sup> Wai emi 'uere robeai hanona Keriso kipokia tehorenimi, haeamona emi a'ikakaumai Keriso kipokia Tirama ena hiabuai tomikiri mue, hiabu weiana ehore Keriso 'ariai ebamikiri muena. <sup>13</sup> Wai hanona 'uainai aubai to'ari pokina emi ki'a paukiai mai wai rama haeai

haumi huanimi ki'a obona a'i tetarena, ia bariu Tirama ehore Keriso kipokia ebamaurinimi, eka ki'a ikoikiai ehina haonakia. <sup>14</sup> Eka babai ki'a obokia irere'au haukia buoka pahabua haukia ia ehore ekakinakia, ea'i obonakia matiu ibiri ropo ubinai ekoko 'aunakia. <sup>15</sup> Matiu ibiri ropo weiana 'ubinai Keriso ehore poki aubakia mai hiabu aubakia ekia hiabu ikoikiai ea'i boinakia ehe amatainakia maearima wairakiai eba haumaeanakia.

*Aika Hanona Keriso Kipokia Aba Ha'ari.*

<sup>16</sup> Ua buonai hau ha aniani 'ao inuinu paukiai, marea tatkia, 'ao nawia koriahia aonamona tatuna, 'ao Beraura robena, weiakia paukiai a'i teme'uahinimi. <sup>17</sup> Taba weiakia ikoikiai hanona aiaiana 'abana wairai katerama, 'a tohatohana hanona Keriso. <sup>18</sup> Maeearima weiakia kipokia aokia tiba'aiaunu bai'oina mai aneru tekutu ainakia haukia ekia raonaraona 'abikiai wai a'i temeba'ehonimi, weiakia hanona kipokia ekia mahabanai 'abi'abikiai tiapa, iamo anikia aha'i. <sup>19</sup> Ia hanona Keriso herenai te'eho, Keriso hanona huanai arana, ia ena iha'ini aonai hanona huanai maikoina nitabura, ibakai mai o'eo'e ikoinai nia'i 'ininakia, ba niapa'ua harai Tirama ena nuatae taearanai.

<sup>20</sup> Wai Keriso kipokia auba ki'a obokia hanopaka ena mauri tipoki aina haukia herekiai aba to'ari raninai, taba buonai wai hanopaka ena rauhubu tua'i taeananakia ihobona matoha wai hanopaka 'euna, <sup>21</sup> totibaha, "A'i katokai 'apuana," "A'i katoani hobona," "A'i katoa'i 'apuanakia"? <sup>22</sup> Weiakia ikoikiai hanona anikia kateaha'i abomo katepuia pokina ia hanona maearima tebabai mai tiba'obiai rauhubukia. <sup>23</sup> Rauhubu nahomakia ihai-hakia hanona aotipa 'abikia 'abana, weiana maearima tihere aneru tekutiai taburanakia aokia

tiba'aiaunu bai'olina kipokia hauanikia tiba haiaranakia, iamo aka weiakia hanona ekia baraibarai aha'i pokina raona ki'a obona maearima aonai kekarahi hauna keba'rona hanona a'i ketaina.

### 3

#### *Keriso Kipokia Aba Hamikiri Mue.*

<sup>1</sup> Weiana paunai, wai hanona Keriso kipokia aba tomikiri mue buonai aomiai hanona kupa aona tabakia mo katotabunakia, weia Keriso Tirama itipana tainai emiati. <sup>2</sup> Aomiai hanona 'ubi tabakia weiakia katoraonanakia, ia hanopaka neiana tabakia a'i katoraonanakia. <sup>3</sup> Pokina wai hanona aba to'ari, ba emi mauri hanona Keriso kipokia aba Tirama aonai ebumina. <sup>4</sup> Keriso hanona wai emi mauri pokina tohana, ba kewaira tina raninai wai abomo ia kipokia katowaira tina haeamo ena nuabi weiana aonai.

#### *Aika Hanona Aba Maearima Mahamahaka.*

<sup>5</sup> Ua buonai hanopaka maurina ena nuatae akakia aomiai temiaho haukia katoba'arinakia, hoahoan neiakia maha porepore, raona 'opukia, rea, raona ki'a obokia, uhore. Uhore hanona kaiba'uku ikutiaina hoana. <sup>6</sup> Pokina hoahoan weiakia paukiai Tirama ena opuere nimai maearima weiakia aiana a'i tia'i taeana haukia herekiai. <sup>7</sup> Uainai wai abomo ua tomiaho aiho hauani ena raona taearakiai.

<sup>8</sup> Ia bariu hanona wai hoahoan neiakia ikoikiai katobabonakia, opuere, ao ki'a, raona ki'a, uahuahi, mai baibata 'abikia, weiakia ha pinamiai a'i katohina 'apuana. <sup>9</sup> 'Abami herekiai a'i katobai'oi, pokina emi mauri 'ai'aikia ekia hoahoan hanona aba tobakuri obonakia. <sup>10</sup> Ia bariu wai hanona hauani mahamahana aba tobatotona. Hauani maha mahana neiana hanona barama Tiramana ena aotipai rani ikoinai

kebamaha mahanimi keaomo ia kipona ihaihanai katoao. <sup>11</sup> Mauri mahamahana neiana aonai hanona Iuda hauna aha'i hauna 'ao Iuda hauna, tetarena hauna 'ao a'i tetarena hauna, aona a'i niea hauna 'ao nua ki'a hauna, ta'ara'i hauna 'ao ta'ara a'i nia'i hauna, weiakia ikoikiai ekia haeai aha'i, ikoikiai hanona Keriso 'euna, Keriso hanona ikoikiai aokiai nemiaho.

#### *Abaka Kaha'i Turinakia.*

<sup>12</sup> Wai hanona Tirama etina'animi, ebarobenimi, mai niraona'au ainimi maearimami, ua buonai wai kipomi aoko'o, rabo harai, 'aiaunu, mamata mai bakiro katobatotonakia emi mauriai. <sup>13</sup> 'Abami katoa'i turinakia mai emi 'abi baitaeai a'i nirama baha aonai ekia ki'a katohina hao ihobona Obiapaka emi ki'a ehina hao 'abana, wai abomo ua katobabai aiho. <sup>14</sup> Ba taba neiakia ikoikiai ahakiai hanona raona'au katohore 'auna, pokina raona'au nihore taba ikoinai niba hamomonakia nibabero 'aunakia.

<sup>15</sup> Keriso ena baibua hanona aomi kepoki aina, weiana paunai Tirama ehore eapari haeamonimi hauani hamona aonai. Rani ikoinai banamo 'abina Tirama katobena. <sup>16</sup> Keriso ena 'abi hanona aomiai kemiaho keobia, weiana ha kiromi aobero maikoinai katoba'iohi mai kato bairobe, Salamo ai, hui ai, auba huikiae Tirama katobanamona mai aomi ikoinai banamo raonaraonai. <sup>17</sup> Emi akai 'ao emi 'abial, tabakia ikoikiai hanona Obiapaka Iesu atanai katobabai, abomo Hamaka Tirama banamo 'abina katobena Iesu paunai.

#### *Bairobe Rama Hamona Aonai.*

<sup>18</sup> Babi'e e, atawami aokia katoka'ainakia, pokina weiana hanona ebero Obiapaka wairanai. <sup>19</sup> Hau e, atawami katoraona'au ainakia, aokia a'i katoba haianakanakia.

<sup>20</sup> Miori mai uaho e, taba ikoikiai aokiai hamami hinami aiakia kato

ka'aina, ba weiana hanona Obiapaka aona ibanamona.<sup>21</sup> Hama hina e, nahumi a'i katoba'abi ki'anakia, aokia a'i me'abe'abe marikina.

*Ta'ara'i Hauna Mai Poki Hauna.*  
<sup>22</sup> Ta'ara'i haumi e, hanopakai tipoki ainimi haukia rani ikoinai aikia katoka'ainakia, ia patehanimi patebanamonimi paunai aha'i, ia mai aomi ikoinai katoaka ihobona Obiapaka tumariki aina tuaka 'abana.<sup>23</sup> Aka tabana tubabaina hauna katbabaina mai aomi ikoinai, ihobona matoha Obiapaka ena aka tubabaina 'abana ia maearima 'eukia aha'i.<sup>24</sup> Aba to'ioquina Obiapaka itau aba keba'oruna katoa'ina wai aramiai keao, pokina wai hanona emi pokи hauna tohana Keriso ena aka haumi.<sup>25</sup> Ia aka ki'a haukia ekia aka ki'a weiana 'arana ihobona katea'ina, pokina Tirama hanona maearima ha a'i nitaina.

#### 4

<sup>1</sup> Poki haumi e, emi ta'ara'i haukia bero mai namo taearanai kato'imanaakia, pokina to'ioquina wai abomo emi pokи hauna ha weia kupai nemiaho.

*Aoka Kebero Kahabahuba'ari To'ona.*

<sup>2</sup> Katobahuba'ari to'o baihana, tubahuba'ari aonai mai aomi beronai Tirama katobanamona.<sup>3</sup> Ai abomo ahamaiai katobahuba'ari ba Tirama kehore emai taearea kekaikauna ena 'abi katairoro aina Keriso ena 'abi bunikia katairoroai, aka neiana paunai au wapura itunai namiaho.<sup>4</sup> Katobahuba'ari ba au 'abi neiana kairoroai karahi haraina aka neiana hanona au ebena'u kababaina.

<sup>5</sup> Katoaobero emi hoahoakatenameo a'i tia'ikakauma haukia herekiae emi aka ranina a'i katobaore 'abaeana.<sup>6</sup> Rani ikoinai maearima aona ibanamona 'abi'abinai katoba'abi 'abi harainakia matoha kikimaru aniani abiabina nibanamona

'abana, weiana ia ekia raona abikia katobamue harainakia.

*Paulo Tukiko Mai Onesimo Eu-hunakia.*

<sup>7</sup> Tukiko kehore au pou'u maikoinai kehinana, ia hanona uaho'abaka eka raona'au hauna ha, ia abomo aia ibabua 'auna hauna ha, ia hanona au 'aba'u ha Obiapaka ta'arana ta'i haeamo.<sup>8</sup> Nauhuna niwahi heremi ena pokи hanona ai emai miao neia hauna pouna kehinana, ba wai aomi kebataburana.<sup>9</sup> Onesimo nauhuna Tukiko ohi tiwahi, ia abomo aika uaho'abaka eka raona'au mai aia ibabua 'auna hauna ha, ia hanona wai kipokia tomiaho haeamo. Ia katehore taba neia tirama haukia ikoikiai heremai katehinanakia.

*Banamo 'Abina Orena.*

<sup>10</sup> Aristako au 'aba'u ha wapura ituna aonai ena banamo neuuhuna niwahi, mai Banaba uana Mareko abomo ena banamo netiu ahina wai heremi. (Ba'iobi aba toa'ina Mareko kewahi raninai katoa'i taeana.)<sup>11</sup> Iusto atana ha Iesu abomo ena banamo nibenimi. Iuda haukia neiakia teaihau 'akimo kipokia taka haeamo Tirama ena obia aiarana pouna ihinanai, ia ekia a'ituri here'uai eapa'ua ki'a baha.

<sup>12</sup> Epafra wai hatia'ami ha Keriso Iesu ena ta'ara'i hauna ena banamo nibenimi, ia hanona rani ikoinai nibahuba'ari to'o baihana wai paumiai katokori 'ini aomi kekiro mai aomi ikoinai Tirama ena nuatae akana ibabaina aonai.<sup>13</sup> Au wai nahina benimi Epafra hanona wai paumiai, mai weiakia Laodikea mai Hieropoli haukia paukiai niaka 'ari.<sup>14</sup> Eka raona'au hauna Luka muramura hauna mai Dema, ekia banamo tibenimi.

<sup>15</sup> E'u banamo uaho'abaka Laodikeai temiaho haukia katobenakia, abomo Numufa mai Tirama ena marea maearimakia weiakia ena ituai tito'u haukia katobenakia.<sup>16</sup> Marere neiana katotuabina kepua hanona katotiu

ahina Tirama ena marea maearimakia Laodikeai temiaho haukia kate tuabina, marere weiana Laodikeai nimai hauna wai kato-tuabina. <sup>17</sup> Akipo katohina bena katotibaha, “Oi emu aka Obiapaka ebeni'o hauna akana kobabai haraina keaomo kobaorena.”

<sup>18</sup> Banamo neiana hanona au Paulo kipo'u ima'uai arerena. A'i katoreana au hanona mai tabiri'u namiaho. Nabahuba'ari Tirama ena aoko'o hoana heremiai kemi-aho.

**Paulo Ena Marere  
Kori'uaina  
TESALONIKA  
Haukia Herekiai**

*Puka Aona Irerena 'Abina*

Tesalonika hanona aiara apa'uana ha Makedonia hanona aonai. Paulo Pilipo aiarana ehabona hanona eao Tesalonika, ba weia a'ikakauma haukia to'una ha ebakorina (Iuhubeau 17). Rani baika murikiai hanona Paulo eao Korinto aiaranai, ba Timoteo emai Paulo herenai ba taba a'ikakauma haukia weia Tesalonikai haukia herekiai erama hauna robana eahuna. Paulo hanona Timoteo herenai pou eona aonai, terarua Sila kipokia puka neiana tererenai, Tesalonika haukia ekia a'ikakauma katebataburana.

Puka neiana aonai hanona Paulo niaonamo ekia a'ikakauma paunai mai ekia hoahoa namokia paukiai. Matoha ia hanona Keriso aea kemue aiho hanona a'i te'iobina, abomo tenuatae kate'iobi haraina 'ari haukia hanona aba te'ari baihana 'ao aha'i, mai Keriso hanona aba emue 'ao aha'i, mai ia kipokia teraonananakia weiana ia hanona aba mauri banaibbanai katetabu ahina 'ao aha'i, mai Keriso hanona aita kemai? Bakai bakai neiakia 'abikia ibamuekiai hanona Paulo ehina benakia rani ikoinai hoahoa namokia katebabai, mai kateba'oru Obiapaka ena mue mai wapuna kate'imana.

*Puka Paipana Apa'uakia*

- a. Roba iahu. (1.1)
- b. Ia'itaea mai banamo. (1.2—3.13)
- c. A'ikakauma maurina tohana. (4.1-12)
- d. Keriso ena mue mai ba'iobikia. (4.13—5.11)
- e. 'Abi orekia. (5.12-22)
- f. Banamo orekia. (5.23-28)

*Banamo 'Abina.*

<sup>1</sup> Au Paulo, Sila\* mai Timoteo emai marere tarerena niwahi marea robe haumi Tesalonikai tomiaho haumi heremi, wai hanona Tirama aika Hamaka mai Obiapaka Iesu Keriso 'eukia. Ai tabahuba'ari Tirama ena aoko'o hoana mai baibua ahamiai kemiaho.

*Tesalonika Haukia Ekia Mauri Mai Ekia A'ikakauma.*

<sup>2</sup> Ai rani ikoinai wai paumiai Tirama namo tabena mai atami fahinana emai bahuba'ari aokiai.

<sup>3</sup> Ai Hamaka Tirama wairanai emi a'ikakauma akana tobabaina hauna mai emi raona'au hoana toaro'ari hauna haeamona emi buabenai Obiapaka Iesu Keriso herenai tobakori 'inina hauna faraona 'ininakia. <sup>4</sup> Uaho'abamai e, ai aba ta'iobina Tirama wai eraona'au ainimi abomo etina'animi.

<sup>5</sup> Pokina eka pou namona ekara'au heremiai hanona 'abi 'abaeanai mo aha'i ia mai hiabuna Auba Robe ai wai aomiai ebatohana. Ai wai kipokia aea hamiaho aiho hanona wai aba to'iobina, weiana hanona wai emi namo.

<sup>6</sup> Tohau haiara ki'a baha mo ia 'abi nahai, ia ai 'abamai ai mai Obiapaka 'abanai toao 'abi toa'i taeana mai aonamomi weiana hanona Auba Robe herenai emai. <sup>7</sup> Ua buonai wai hanona a'ikakauma haukia ikoikiai Makedonia ai mai Akaia ai haukia ekia ihaiha tabanai toao. <sup>8</sup> Obiapaka ena pou namona wai heremiai 'uruna ekarahi hauna Makedonia mai Akaia ai mo a'i epua ia eao 'eka maikoina, emi a'ikakauma Tirama herenai hauna abomo 'eka maikoinai ekana. Weiana buonai ai 'abi ha katahinana hanona 'ekana aha'i. <sup>9</sup> Pokina ai aea toa'i taea aihonamai hanona ia kipokia pouna tehinana mai aea toraona kabe aiho kaiba'uku tiramakia tohabonakia 'a Tirama tohana mauri Tiramana ta'arana toa'i,

<sup>10</sup> mai Tirama Nahuna Iesu 'ariai emikiri hauna kupai kemai hauna to'imana pouna abomo tehinana.

Iesu hanona Tirama ena opuere kemai aonai araka kebamaurina.

## 2

### *Paulo Ena Aka Tesalonika ai Hauna.*

<sup>1</sup> Uaho'abamai e, wai kipomi aba to'iorina ai tawahi heremi hanona mai anina. <sup>2</sup> Aba to'iorina ai Pilipo ai pura'a tahoaina mai tebataeainamai ba tawahi wai heremi. Tebatetua ki'anamai mo ia 'abi naha'i, ia eka Tirama ebataburanamai ena pou namona tairoro aina heremai. <sup>3</sup> Emai batabura 'abikia hanona raona ki'ai aha'i 'ao raona opukiai aha'i 'ao bai'oiuai aha'i. <sup>4</sup> Ia ai hanona Tirama ea'i taeanamai ena pou namona ebenamai hauna tahinana, ai maearima kataba aonamonakia paunai aha'i ia aoka e'iorina Tiramana aona kenamo paunai. <sup>5</sup> Wai to'iorina ai aoani 'abikia a'i tabenimi 'ao emai ao'aea harabukia a'i tabenimi. Tirama hanona ai nibatohanamai. <sup>6</sup> Ai mariki a'i tatabuna maearima herekiai mai wai heremai 'ao baika herekiai. <sup>7</sup> Ai Keriso ena iuhubeau haumai paunai taba bo'ona heremai patanuataeai, ia ai wai baiatamiae hanona ta'aiaunu matoha babi'e nahuna ne'imanaakia. <sup>8</sup> Ai tanuatae ainimi Tirama ena pou namona mo ikupaiiana a'i katabenimi ia emai mauri abomo katabenimi, pokina wai taraona'auai ki'a bahanimi.

<sup>9</sup> Uaho'abamai e, aba to'iorina Tirama ena pou namona tairoro aina heremai hanona taro'ari ki'a rabi mai mararani tako aniani itabukiae pokina hau ha puma a'i katabena. <sup>10</sup> Wai mahamiae toihana, abomo Tirama e'iorina ai wai a'ikakauma haumi baiatamiae hanona emai babai erobe, ebero abomo behona aha'i. <sup>11</sup> Wai to'iorina ai ha ha taiha 'ininimi matoha hama ha nahuna tohakia ne'imanaakia. <sup>12</sup> Ai tabataburanimi, aomi tabakirona abomo tabahi ahinimi Tirama ena nuatae maurina aonai katomiaho, Tirama

hanona eaparinimi ena aiara nuabina aonai katomiaho.

<sup>13</sup> Ai rani ikoinai Tirama namo tabena, pokina Tirama ena 'abi heremai tonu hauna toa'ina aonai maearima ekia 'abiai a'i tobaona, 'a toa'i haraina Tirama ena 'abi tohanai tobaona, Tirama ena 'abi weiana hanona tua'ikakauma haumi aomiai niaka. <sup>14</sup> Uaho'abamai e, wai hanona Tirama ena maearima Iudeai 'abanai toao, ia hanona Keriso Iesu tia'ikakaumana, Tirama ena maearima weiakia Iudeai ekia maearima herekiai pura'a tehoaina ihobona mo wai abomo emi maearima herekiai pura'a tohoaina. <sup>15</sup> Iuda haukia hanona Obiapaka Iesu mai mahabanai haukia teahu 'arinakia, ai abomaimo teura ahinamai. Ia Tirama aona tebaopuerena mai maearima ikoikiae ekia 'ou haukiae teao. <sup>16</sup> Ia tehore rama haeai haukia katairoro benakia ia mauri katea'ina taearana weiana tekaiabuna. Neiana tibabaina hanona ekia ki'a tibapa'uanakia, Tirama ena opuere hanona aba ia ahakiae.

### *Paulo Enuatae Keiha Muenakia.*

<sup>17</sup> Uaho'abamai e, rani papana ai tahabonimi aonai hauanai hanona baiataka epa'a ia aubai hanona aha'i, ai taraona ki'animi taeara tatabu pataihanimi. <sup>18</sup> Ai taeara tatabu patawhai heremai, 'abi tohana au Paulo rani baika ahobona taeara atabu, 'a Satani hanona emai taeara ekaibunakia. <sup>19</sup> Eka Obiapaka Iesu Keriso ena muemai raninai, emai buabenai, emai aonamo mai emai apa hoana hanona taba ia wairanai? Weiana hanona wai. <sup>20</sup> 'Abi tohana, emai apa mai emai aonamo pokina hanona wai.

## 3

<sup>1</sup> Weia katabai'ima homa'a taobona a'i etaina buonai tanuatae ikupaiamai Atene ai katamiaho. <sup>2</sup> Uaho'abaka Timoteo tauhuna, ia hanona Tirama ena aka hauna Keriso ena pou namona neiroro

aina hauna ewahi heremi emi a'ikakauma kebataburana mai kebakironimi.<sup>3</sup> Weiana pura'a neiakia paukiai wai naiami ha a'i komue, wai aba to'ibina pura'a hanona aika kahahoainakia haukia.<sup>4</sup> Naia kipokia hamiaho aonai aba tahinabe 'uainimi aika hanona pura'a kahahoainakia, ba aba erama neiana.<sup>5</sup> Ua buonai au weia kabai'ima homa'a aobona a'i etaina buonai abaiuhu emi a'ikakauma ka'ibina, au ata'u hanona taeara baikai baihobo hauna Tiaporor kehobonimi re'a emai aro'ari anina a'i meaha'i.

<sup>6</sup> Timoteo heremai naia bariu abemue emai heremai, emi a'ikakauma mai emi raona'au poukia namokia emaiainakia. Ai haiamaiai e'abi, wai rani ikoinai turaona ki'a bahanamai tonuatae patoihanamai ihobonai ai abomo tanuatae pataihanimi.<sup>7</sup> Ua buonai uaho'abamai e, emai aro'ari emai pura'a aokiae wai emi a'ikakauma ehore ai eba taburanamai.<sup>8</sup> Bariu ai emai miahohana abenamo, pokina wai Obiapaka 'eunai aba tukori'ini.<sup>9</sup> Eka Tirama atanai wai taonamoai ki'a bahanimi weiana banamo 'abina Tirama wairanai aea katahina aihona?<sup>10</sup> Rabi mai mararani ai tabahuba'ari tabura tanuatae wai pataihua muenimi, emi a'ikakauma ena 'abe'abe 'ekakiae pataba taburanimi.

<sup>11</sup> Tanuatae bariu Tirama aika Hamaka mai eka Obiapaka Iesu katehore taeara ha kateba'oruna ai 'eumai katawahi heremi.<sup>12</sup> Eka Obiapaka kehore emi raona'au kebapa'uana kebabonu 'aunimi ha ha katoraona'au ainimi abomo maearima ikoikiae katoraona'au ainakia, ai wai taraoana'au ainimi ihobona.<sup>13</sup> Taeara nahomanai Obiapaka kehore aomi keba taburanakia, eka Obiapaka Iesu ena robe haukia kipokia katemai raninai wai hanona robe haumi mai beho aha'i haumiai katoao Hamaka Tirama wairanai.

### Tirama Aona Ibanamona Maurina.

<sup>1</sup> Uaho'abamai e, puana neiana, ai taba'ibinimi aea katomiaho aiho Tirama keaonamō hauna aba tubabaina emi mauriai. Bariu Obiapaka Iesu atanai tanoinimi haeamona tabahi ahinimi mauri neianai katomiaho to'ona.

<sup>2</sup> Wai aba to'ibina ba'ibobi'abina aeana hauna tabenimi Obiapaka Iesu ena hiabuaj.<sup>3</sup> Tirama ena nūatae hanona neiana, wai ikoimiai hanona katorobe. Wai maha porepore hoakia katohabonakia.

<sup>4</sup> Ba ikoimiai ha ha atawami kipokia hauanimi katerobe mai marikimi katomiaho.<sup>5</sup> Ai katonabau rama haeai haukia 'abakia, ia haukia hanona Tirama a'i te'ibina.<sup>6</sup> Babai neiana aonai hau ha uaho'abana rabona kea'i ki'ana hanona Tirama kehore ena ki'a 'arana kehorena, ai aba tahina benimi haeamona taba'ibinimi.

<sup>7</sup> Tirama eaparinaka hanona maha porepore paunai aha'i, ia mauri robenai kahamiaho paunai.<sup>8</sup> Ua buonai ba'ibobi'abina neiana nibaki'ana hauna hanona maearima a'i nibaki'ana, ia Tirama nibaki'ana, ia hanona Auba Robe ebenimi.

<sup>9</sup> Uaho'abaka aea kaharaona'au aihonakia 'abina hanona a'i katarere benimi, pokina Tirama wai aba eba'ibinimi ha ha katoraona'au ainimi.<sup>10</sup> Wai neiana aba tubabaina ba uaho'abaka Makedoniai ikoikiae turaona'au ainakia. Uaho'abamai e, ai tabahi ahinimi naiana katobabai hao babai haona.<sup>11</sup> Ai tahina benimi ihobonai emi miahohana katobabai haraina katomia 'ororo, kipomi emi roba katoahu mai emi aniani akana kipomi imami tohakiae katobabai.<sup>12</sup> Mauri namona weiana kehore murimuri haukia katemariki ainimi, ba wai hau ha ahanai a'i katoehe 'au a'i katonoinoi.

### Obiapaka Ena Mai Mue.

<sup>13</sup> Uaho'abamai e, ai tanuatae ainimi, weiakia te'ari haukia poukia hanona kato'ibina, weiakia ekia buabenai aha'i haukia

'abakiai a'i katoao aomi a'i keaoko'o.<sup>14</sup> Aika na ha'i kakauma Iesu e'ari haeamona emikiri mue, weiana ha'i obina Tirama Iesu kemaiaina raninai weia kia Iesu tea'i kakaumana te'ari haukia kipokia Tirama ena mauri 'ekanai kebaka'a totonakia.

<sup>15</sup> Obiapaka ena ba'iobi 'abina neiana ai wai tahina benimi, aika miao hauka tai kemiaho keao Obiapaka ena muemai raninai haukia aba te'ari haukia a'i kekahaonakia. <sup>16</sup> Tirama ena pih ke'arara mai aneru apa'uana ba'iobi 'abina keio aina aonai Obiapaka kipona kupai keriri kemai hanona Keriso tea'i kakaumana te'ari haukia katemikiri 'uai. <sup>17</sup> Weiana murinai aika hanopaka ai kahamiaho oho hauka kea'i taeanaka kahaeao 'auhao 'ubinai ia kipokia kebararonaka Obiapaka kipokia kahabaitabu ahi, ba aika weia Obiapaka kipokia kahamiaho banaibanai. <sup>18</sup> Ua buonai 'abi neiakiai ha ha kahaba taburanaka.

## 5

### *Kahaba'oru Obiapaka Ena Mai Paunai.*

<sup>1</sup> Uaho'abamai e, taba neiakia katerama ranikia mai wapukia hanona wai a'i katarere benimi. <sup>2</sup> Pokina wai abomo aba to'iobi haraina Obiapaka ena muemai beraurana hanona bainao hauna rabi nimai 'abana. <sup>3</sup> Weiana maearima kate'abi, "Taba ikoikiai tenamo aba nahamiaho harai" raninai, ki'a rarina 'akina kebata'u kemai ahakiai, matoha babi'e nimauri haiarana 'abana, ekia robo 'au taearana aha'i. <sup>4</sup> Uaho'abamai e, wai hanona wapurai a'i to'miaho paunai beraura neiana wai a'i kebata'uta'u hurinimi bainao hauna 'abana. <sup>5</sup> Wai ikoiniai hanona ea nahuna mai beraura nahuna haumi. Aika ikoikai hanona rabi 'ao wapura 'euna hauka aha'i. <sup>6</sup> Ua buonai aika hanona tiparua haukia 'abakiai a'i kahaeao a'i kahaparua, ia aika hanona kahano'a aoka ketabura.

<sup>7</sup> Pokina parua haukia hanona rabi tiparua, abomo inuinu haukia hanona rabi teinuinu. <sup>8</sup> A aika hanona beraura 'euna hauka buonai aoka ketabura, a'i kakauma mai raona'au aonai kahamiaho haharaka i'aeanai keao abomo bamauri buabena hanona kahabau'una araka ibahu abunai keao. <sup>9</sup> Tirama aika etina'anaka hanona ena opuere kahahoaina paunai aha'i, ia aika bamauri kaha'ina eka Obiapaka Iesu Keriso paunai. <sup>10</sup> Aika paukai Iesu e'ari hana ena mue mai raninai hamauri 'ao ha'ari re'a aika ia kipokia kahamiaho haeamo. <sup>11</sup> Ua buonai aba tubabaina ihobonai ha ha katoba taburanimi mai katobakori 'ininimi.

*'Abi Orekia Mai Banamo 'Abina Orena.*

<sup>12</sup> Uaho'abamai e, bariu tanoinimi naia baiatamiai barai barai akana tibabaina haukia weia kia Obiapaka etina'anakia kate'uai ainimi katerobenimi haukia katomariki ainakia, mai katoraona'au ainakia, mai baibuami ha ha kipokia katomiaho oioi.

<sup>13</sup> Eka aka paunai ia katomariki ainakia mai katoraona'au ainakia, mai baibuami ha ha kipokia katomiaho oioi.

<sup>14</sup> Uaho'abamai e, ai tabahi ahinimi, 'aboro haukia katorobenakia, ao 'ubo haukia katoba taburanakia, 'abe'abe haukia katobrainakia, ikoikiai herekiai katobakiro.

<sup>15</sup> Katoraona 'inina ha ena ki'a 'arana a'i katoehorena, ia rani ikoinai katobabai harai 'abami herekiai mai maearima ikoikiai herekiai.

<sup>16</sup> Rani ikoinai katoaonamo,

<sup>17</sup> katobahuba'ari to'o baihana,

<sup>18</sup> taba ikoikiai aokiai Tirama katobanamona, pokina neiakia hanona Tirama ena nuatae wai Keriso Iesu 'eunai haumi emi mauriai katobabainakia.

<sup>19</sup> Auba Robe ena aka a'i katoba'orona matoha iruba a'i katoba'aona 'abana.

<sup>20</sup> Auba Robe herenai timai 'abikia a'i katobaoao ainakia.

<sup>21</sup> Taba ikoikiai kato-hobonakia, ba namokia haukia hanona kato'ini benakia.

<sup>22</sup> Ia

taba ki'a obokia ikoikiai herekiae  
hanona katokapare.

<sup>23</sup> Baibua nibenaka Tiramana tanoina, ia kehore taeara ikoikiai aokiae kebaberonimi kebarobenimi, ba aubami, aomi mai hauanimi maikoinai ke'ini benakia, eka Obiapaka Iesu Keriso ena mue mai raninai beho ikoikiae herekiae kebakaparenimi. <sup>24</sup> Eaparinimi hauna hanona ena 'abi nibatohanakia, ia kehore neiana kebabaina.

<sup>25</sup> Uaho'abamai e, ai paumaiai katobahuba'ari.

<sup>26</sup> Uaho'abaka ikoikiae baipau robenai banamo katobenakia.

<sup>27</sup> Obiapaka atanai au wai nahina benimi, marere neiana hanona kātotuabina uaho'abaka ikoikiae wairakiae.

<sup>28</sup> Eka Obiapaka Iesu Keriso ena aoko'o hoana ahamiae kemiaho.

**Paulo Ena Marere  
Ibaruana  
TESALONIKA  
Haukia Herekiae**

*Puka Aona Irerena 'Abina*

Tesalonika ai maearima bo'ona rani weianai hanona teraona raona ki'a baha Keriso ena mue mai hanona taba kerama. Maearima baika hanona te'abi Obiapaka ena rani hanona aba emai. Ua buonai Paulo marere neiana ererena maearima ekia a'ikakauma kebaberonia. Ia nehina benakia Obiapaka ena rani hanona a'i nikara'au baha. Ba rani weiana a'i nimai baha hanona maearima bo'ona katehaia po'o, mai babai ki'a haeai haeai ikoikiai kateapa'ua, haeamona rauhubu ikabena hanona kemai Keriso i'otana apa'uanai keao.

Paulo ia nibataburanakia a'ikakaumai katekoru 'ini harai, mai puma wairakiai tiropo haukia katekabanai harai. Ena nuatae hanona katetabura ki'a baha weiana kipokia kate'ima harainakia, ihobona ia kipona ne'ima haraina mai ia kipokia tiaka haeamo haukia 'abakia. Weiana aka herenai a'i kate'abe'abe 'ao a'i kate'aboro, haeamona maearima ibaraikiai a'i kate'aboro.

*Puka Paipana Apa'uakia*

- a. Roba iahu. (1.1-2)
- b. Banamo mai rauhubu 'abikia. (1.3-12)
- c. Keriso ena mue mai ba'ioibikia. (2.1-17)
- d. A'ikakauma maurina tohana. (3.1-15)
- e. 'Abi orekia. (3.16-18)

*Banamo 'Abina.*

<sup>1</sup> Au Paulo, Sila\* mai Timoteo emai marere tarerena niwahi marea robe haumi Tesalonikai tomiaho haumi heremi, wai hanona Tirama Hamaka mai Obiapaka Iesu Keriso 'eukia.

<sup>2</sup> Tabahuba'ari Tirama aika Hamaka mai Obiapaka Iesu Keriso ekia aoko'o hoana mai baibua hanona ahamiai kemiaho.

*Keriso Kemai Bero Akana Kebabaina.*

<sup>3</sup> Uaho'abamai e, ai wai paumiai rani ikoikiai Tirama namo 'abina tabena, weiana hanona ebero pokina wai emi a'ikakauma hanona niapa'ua hao apa'ua hao, mai emi raona'au ha ha heremai mai 'abami herekiae hanona nikara'au niao. <sup>4</sup> Hau haiara ikoikiai mai baihobo ikoikiae aokiae tubapahihi abomo emi a'ikakauma a'i tuhabona, weiakia haukia Tirama ena marea ha ha haukia wairakiae tapainakia.

<sup>5</sup> Taba neiakia ikoikiae tibawaira tinana hanona Tirama ena bakaiai tebero. Wai Tirama ena obia aiarana paunai bariu haiara tuhoaina, ia keao puana hanona wai bero katoa'ina Tirama ena obia aiarana haumi. <sup>6</sup> Tirama hanona mai ena bero. Ia kehore weiakia wai teba haiaranimi haukia 'arakia kebamuenakia keba haiaranakia. <sup>7</sup> Haiara tuhoaina haumi wai ai kipokia 'araka kebenaka kaharai. Obiapaka Iesu kupai kewaira tina ena aneru taburakia kipokia katemai raninai neiana hanona kerama. <sup>8</sup> Ia kemai mai iruba upana, weiakia Tirama a'i te'iorina haukia mai eka Obiapaka Iesu ena pou namona aiana a'i tika'aina haukia hanona puma kebahoinakia. <sup>9</sup> Ia katehaiara banaibana mai puma katehoaina abomo katekatu'a baihana Obiapaka wairanai mai ena hiabu nubina herenai. <sup>10</sup> Obiapaka kemai beraurana weianai ena maearima robekia katekuti aina mai weiakia tea'ikakaumana haukia ikoikiae katebanamona. Weiana aonai wai abomimo baiatakiae weia pokina pou tahinana wai heremai hanona toa'ikakaumana.

<sup>11</sup> Neiana taraonana paunai, ai wai ahamiai tabahuba'ari to'ona, weiana eka Tirama kehore miaho

\* 1:1: (1) 'ao Siluano

banaibananai haumiai kebaonimi ena apari ihobonai, mai ia kehore ena hiabuai emi hoahoa anikia namokia kebaramanakia mai emi a'ikakauma akakia ikoikiai kebatohanakia.<sup>12</sup> Taeara neianai eka Obiapaka Iesu atana wai paumiai katebanamona, ba ia paunai wai katebanamonimi, eka Tirama mai Obiapaka Iesu Keriso ekia aoko'o hoana paunai.

## 2

### *Hau Pairipairi Tiaporo Kewaira Tina.*

<sup>1</sup> Uaho'abamai e, eka Obiapaka Iesu Keriso ena muemai abomo aika ibararoka ia herenai hauna pouna tahinana, ba tanoinimi,<sup>2</sup> aomi a'i katenoanoa, mahabanai 'abikia 'ao 'abi baika 'ao marere heremai ai ewahi na tiho ti'abi Obiapaka ena beraura aba emai hanona wai a'i kebata'unimi 'ao nuami a'i ketae.<sup>3</sup> Hau ha taeara neianai a'i ke'oinimi. Pokina beraura weiana hanona a'i kemai baha keaomo maeearima Tirama katemurina kate'oata 'uaina ba hau pairipairi tiaporo kewaira tina, ia keao 'ekana hanona haiara banaibananai 'ekana.<sup>4</sup> Ia hanona maeearima tekuti ainakia tabakia ikoikiai mai tiaparinakia tirama na tiho haukia ke'oatanakia, ia kipona kehorotina neiakia ikoikiai arakiai abomo keao Tirama ena marea robe aonai kemiati ba ke'abi ia kipona hanona Tirama.

<sup>5</sup> Au wai heremai raninai taba neiakia ikoikiai ahinabe ainimi, weiana wai a'i turaona 'ininakia, u?<sup>6</sup> Abomo bariu wai aba to'ioquina hiabu tabana nihore ia nia'i 'inina weiana keaomo ia ena rani tohanai hau weiana kewaira tina.<sup>7</sup> Pokina hau pairipairi tiaporo ena hiabu aba niaka bunianai, 'a ia weiana bariu nia'i 'inina hauna kea'i 'inina keaomo ia kehe pare.<sup>8</sup> Ba hau pairipairi tiaporo kewaira tina, iamo Obiapaka Iesu kemai raninai pinana maeabunai

tiaporo keahu 'arina mai ena nuabiai kebapuana.<sup>9</sup> Hau pairipairi hanona Satani ena hiabuai kemai hiabu bai'oikia haeai haeai, babai bai'oikia mai hoa apa'uakia bai'oikia kebabai,<sup>10</sup> mai aka ki'a obokia haeai haeai ai ni'oinakia ia hanona kate'ari haukia. Ia kate'ari pokina 'abi tohana weiana mauri kebaiben'i hauna iraona'au aina teubo aina.<sup>11</sup> Pokina neiana buonai Tirama ehore ahurea ranoana hiabuna aokiai ehorotina keaka, ia bai'oi weiana katea'i taeana.<sup>12</sup> Weiana 'abi tohana a'i tea'ikakaumana haukia mai ki'a teaonamo aina haukia ikoikiai hanona puma katehoaina.

### *Tirama Etina'animi Bamauri Katoa'ina.*

<sup>13</sup> Uaho'abamai e, wai Obiapaka niraona'au ainimi haumi, ai wai paumiai rani ikoinai mo Tirama hamo 'abina katabena, pokina popounai Tirama etina'animi,\* ba mauri katoa'ina Auba Robe ena hiabuai, mai emi a'ikakauma weiana 'abi tohana herenai haunai wai Tirama ena maeearima robekiai katoao.<sup>14</sup> Tirama ehore pou namona weiana ai heremai tairoro aina haunai eaparinimi tomai mauri robena neianai, weiana emi itau eka Obiapaka Iesu Keriso ena nuabi aonai katoa'ina.<sup>15</sup> Ua buonai uaho'abamai e, katokori 'ini, mai emai ba'iobi 'abikia tairoroai pinamaiai tahina 'ao marere ai tabenimi haukia kato'ini benakia.

<sup>16</sup> Eka Obiapaka Iesu Keriso mai aika Hamaka Tirama tanoinakia, ia hanona eraona'au ainaka ena aoko'o hoana aonai batabura banaibananai mai buaben'i namona ebenaka,<sup>17</sup> ia kehore aomi kebakirona mai kebataburana rani ikoinai aka namokia, katobabai mai 'abi namokia katohina.

## 3

### *Ai Paumaiai Katobahuba'ari.*

<sup>1</sup> Uaho'abamai e, orenai ai pau-maiai katobahuba'ari, Obiapaka

\* <sup>2:13:</sup> (13) 'ao Tirama etina'animi ena buabua kori'uainai

ena pou kerama otarai biaina ba katea'i taeana mai aonamokia ihobona wai heremai erama 'abana. <sup>2</sup> Abomo katobahuba'ari weiana Tirama kehore po'o haukia mai aka ki'a haukia herekiai keba karahinamai, pokina maearima bo'ona Keriso a'i tia'ikakaumana.

<sup>3</sup> 'A Obiapaka hanona aia ibabua 'au hauna, ia kehore kebatabantumi mai ke'aeanimi aka ki'a haukia herekiai. <sup>4</sup> Ai Obiapaka aonai wai tabatohanimi tabahi ahinimi aka naiakia tubabainakia haukia katababai to'ona.

<sup>5</sup> Obiapaka kehore aomi ke'uai ainakia Tirama ena raona'au anina mai Keriso ena bapahihi hoana kato'obi harainakia.

*Aka Namona Ibabainai A'i Kato-hauhororo.*

<sup>6</sup> Uaho'abamai e, eka Obiapaka Iesu Keriso atanai taharabunimi, uaho'abaka weiakia tiaboro 'ao ba'obi tabenimi ihobokiae a'i temiaho haukia herekiae katokapare. <sup>7</sup> Weiana ai tababaina hauna wai kipomi aba to'iobina aea katoka'a aiho. Ai wai heremai raninai a'i ta'aboro 'apua. <sup>8</sup> Ai maearima ekia aniani a'i tani 'abaea ia 'arakia tahorenakia, ai hanona rabi mararani tako taro'ari pokina wai puma a'i tamabenimi. <sup>9</sup> Ua tababai aiho hanona ai mai emai bero baraihai weiana kata'ina, 'a neiana tababaina hanona ihaiha tabana wai taearanai katoka'a.

<sup>10</sup> Ai wai heremai aonai bairobe neiana abomo tabenimi, "Hau ha a'i keaka raninai, ia a'i keani-ani." <sup>11</sup> Ai 'uru tao'o baiatamiae maearima baika hanona te'aboro, aka ha a'i tibabaina tiaomo maearima baika ekia aka aokiae titoto. <sup>12</sup> Obiapaka Iesu Keriso atanai tahina benakia mai tabahi ahinakia, katemia 'ororo ekia aniani tabu akakia katebabai ekia aniani katerama.

<sup>13</sup> Uaho'abamai e, wai aka namona ibabainai a'i katohau hororo. <sup>14</sup> Hau ha emai ba'obi 'abikia marere neiana aonai a'i nia'i taeanakia hauna hanona

katoiha 'inina, ia kipokia a'i katobahamomo, ba kipona abiabina keonobaina hanona kehaumaea. <sup>15</sup> Ia hau weiana katoihana hanona 'ou haunai a'i katobaona, 'a uaho'abami ai katobaona katorobena.

*Banamo 'Abina Orena.*

<sup>16</sup> Obiapaka hana eka baibua pokina hauna, bariu ai tanoina ia kehore kipona baibua kebenimi. Rani ikoinai mai taearea ikoikiae Obiapaka hana wai ikoimiae heremai.

<sup>17</sup> Au Paulo e'u banamo 'abina neiana ima'u tohanai narerena, e'u marere ikoikiae aokiae hanona na narere aihonakia katobahaha au e'u marere.

<sup>18</sup> Ai tabahuba'ari eka Obiapaka Iesu Keriso ena aoko'o hoana hana wai ikoimiae heremiae kemiah.

**Paulo Ena Marere  
Kori'uaina  
TIMOTEO  
Herenai**

*Puka Aona Irerena 'Abina*

Timoteo hanona a'ikakauma hauna 'aru'aruna ha, ia hanona Paulo pou namona eiroro aina aonai e'abana tekaoao hauna (Iuhubeau 16.1-3). Weiana murinai, Timoteo hanona Tirama ena marea maearimakia Epesoai haukia i'uaiaikia haunai eao, ba Paulo puka neiana ererena herena eao.

Taba kori'uaina robana eahuna hauna neiana. Timoteo hanona ke'ima haraina, weiana maearima baika katehore bai'oiai maearima ekia a'ikakauma a'i temebabehona marikina. Maearima neiakia tiraonana hanopaka neiana tabana ikoikiai hanona teki'a. Ua buonai hau ha nenuataea kemiaho harai raninai, ia hanona aniani baika a'i keani abomo ia hanona a'i kehawainibe. Weiana ia kebaberonia. Ibaruania hanona a'ikakauma haukia i'imakia taearana namona mai ia ekia aka, maearima iha'inikia akana kebabaina hauna mai ena hoahoa aea homakia hanona robana eahuna. 'Abi orena hanona Timoteo hanona kemiaho harai matoha Iesu Keriso ena aka hauna namona 'akina 'abana. Ba a'ikakauma haukia haeai haeai herekiai abomo ua keaka harai aiho.

*Puka Paipana Apa'uakia*

- Roba iahu. (1.1-2)
- Ba'iobi 'abikia Tirama ena marea mai aka haukia eukia. (1.3—3.16)
- Ba'iobi 'abikia Timoteo mai ena aka 'euna. (4.1—6.21)

*Banamo 'Abina.*

<sup>1</sup>Au, Paulo, Tirama aika ibamaurika hauna mai Keriso Iesu aika nahabuabena hauna ekia 'abiai hanona Keriso Iesu ena iuhubeau hau'uai aeao,

<sup>2</sup> Timoteo narerebeni'o, oi hanona au naaha'u tohamu Iesu ia'ikakaumana aonai. Nabahuba'ari Hamaka Tirama mai Keriso Iesu eka Obiapaka ekia baraibarai apa'uana, aoko'o mai baibua ahamuai kemiaho.

*Ba'iobi Haukia Bai'oikia  
Herekiai Kate'ima 'ima Harainakia.*

<sup>3</sup> Au aeao Makedonia hanona raninai, abahi ahini'o ihobonai oi hanona naia Epeso aiaranai komiaho weiana maearima baika naia kohinabe pahihinakia ba'iobi bai'oikia a'i katebabai mue, <sup>4</sup> abomo kipokia hauanikia a'i katebaiben'i hanopaka tiramakia 'orikia mai kuputori 'abi'abikia weiakia ekia pua aha'i haukia herekiai. Neiakia hanona baihara taea rarikia kateba ramankia iamo Tirama ena raona weiana a'ikakaumai nibawaira tinana hauna akana i'iobinai a'i tibaraibarai. <sup>5</sup> E'u bahiahi 'abina neiana ena poki tohana hanona raona'auai katemiaho, weiana hanona aoka berona namonai nia'i ramana mai raona beronai haeaomona a'ikakauma tohanai nimai. <sup>6</sup> Ia maearima baika hanona hoahoa neiakia herekiai tekaobo teao 'abi anikia aha'i haukia ti'abi'abi ainakia. <sup>7</sup> Tenuatae Tirama ena rauhubu iba'iobi aina haukiai kateao, iamo taba robana tiahuna 'ao aokiai taba tehina taburana hanona obona a'i tiobo.

<sup>8</sup> Aika aba ha'iorina weiana maearima ha rauhubu keka'ai haraina raninai rauhubu hanona taba namona. <sup>9</sup> Abomo aba ha'iorina weiana rauhubu hanona bero haukia paukiai a'i erama ia rauhubu hanona rauhubu tikabena haukia paukiai erama, weiakia a'i tika'aina haukia mai Tirama a'i timariki aina haukia mai ki'a haukia, a'i terobe haukia mai Tirama atana tia'i ki'ana haukia, weiakia hamakia 'ao hinakia tiahu 'arinakia haukia mai ahu ahu haukia, <sup>10</sup> nabau haukia, mai hau kipona 'abana ninabauaina haeaomona babi'e kipona 'abana

ninabauaina haukia, ta'ara a'i haukia tikawa kawa ainakia haukia, mai bai'oi haukia, mai bakai aonai tihorehore abu haukia, abomo taba haeai haeai weiakia ba'obi tohana tainai a'i titai haukia.<sup>11</sup> Ba'obi tohana weiana hanona banamo Tiramana ena pou namona nuabina herenai emai, pou namona weiana au e'u iha'ini aonai ehorotina akana kababaina.

*Paulo Namo 'Abina Keriso Ebena.*

<sup>12</sup> Keriso Iesu aika eka Obiapaka namo 'abina nabena, weiana ia hanona au tabura ebena'u pokina ia aia ababua 'auna hau'uai ebaona'u.<sup>13</sup> Iamo 'uainai hanona Keriso atana ihinana a'iki'ana mai a'oatana, haeamona aibara ki'a herenai mo raninai, Tirama au eaoko'o aina'u pokina e'u a'ikakauma aha'i mai taba ababaina hanona a'i a'io'bina.<sup>14</sup> Eka Obiapaka ena aoko'o hoana here'uai ebapa'ua ki'ana, haeamona a'ikakauma mai raona'au Keriso Iesu aonai aika 'euka haukia rani hamonai ebena'u.

<sup>15</sup> Neiana hanona 'abi tohana aoka tohakiai kaha'i taeana mai kaha a'ikakaumana. Keriso Iesu emai hanopaka aonai hanona ki'a haukia kebamaurinakia, baiatakiai au hanona aki'a ki'a baha.<sup>16</sup> Ia Tirama au eaoko'oai ki'a bahana'u, weiana au aki'a ki'a baha, pokina Keriso Iesu ena bapahihi tabura weiana ena ore aha'i hauna au here'uai kebawaira tinana, ba baika ihaiha neiana kateihana hanona Keriso kate a'ikakaumana mauri banaibana'i katetabu ahina.<sup>17</sup> Obia 'arana ni-mauri banaibana'i, ena pua aha'i, mai a'i nahaihana hauna, Tirama mo weiana ikupaihana kahamariki aina mai herenai nuabi kemiaho keaomo banaibana'i. Amen.

*Paulo Timoteo Ebahi ahina Ketaitura.*

<sup>18</sup> Timoteo, naha'u e, 'abi koka'aina hauna neiana nabeni'o, weiana hanona 'uainai mahabanai 'abina ihinanai oi robamu

teahuna, ba mahabanai 'abikia weiakia ihibokia koka'ainakia hanona oi aba huari namona kobabaina.<sup>19</sup> Emu a'ikakauma mai aomu berona namona koa'i 'ini harainakia. Baika aokia berona neiana tebaki'ana hanona ekia a'ikakauma tebuhuna.<sup>20</sup> Ia baiatakiai hanona Humeao mai Alesanda, terarua hanona aba Satani imanai ahabonakia ia ena hiabu ba'anai katemiaho, weiana kehore keba'io'bina kia ekia 'abi ki'a Tirama herenai haukia katebapuanakia.

## 2

*Maearima Ikoikiai Paukiai Kahabahuba'ari.*

<sup>1</sup> E'u bahiahi kori'uaina hanona neiana, maearima ikoikiai paukiai Tirama konoina kebarainakia mai kebanamonakia, ia paukiai Tirama herenai namo 'abina kohinana emu bahuba'ari ai.

<sup>2</sup> Weiana obia 'arana haukia mai hiabu haukia ikoikiai paukiai abomo kobahuba'ari, ba aika mai ia kipokia hanona mai baibuaka haeaomonu mauri namona aonai kahamiaho Tirama imariki aina mai robe maurina ikoinai taearanai.<sup>3</sup> Bahuba'ari nahomana hanona enamo ba Tirama ibamaurika hauna aona ibanamona hoana.<sup>4</sup> Tirama nenuatae maearima ikoikiai bamauri katea'ina mai katemai Tirama ena 'abi tohana kate'io'bina.

<sup>5</sup> Weiana Tirama hanona hamona haeamona Tirama mai maearima baiatakiai bairarao hauna abomo hamonamo Keriso Iesu, ia hanona maearima tohana,<sup>6</sup> ia kipona hauanina ebaiben'i maearima ikoikiai ekawanakia irubu katea'ina. Tirama hanona ena nuatae ebatohana ranina tohanai ebawaira tinana.<sup>7</sup> Weiana paunai au etina'ana'u iroro mai iuhubeau hau'uai naeao Keriso pouna kahinana, rama haeai haukia ibamarerekia hau'uai naeao Tirama ena 'abi tohana mai a'ikakauma kaba'io'bina kia. ('Abi tohana nahinana a'i nabai'oi.)

<sup>8</sup> Ua buonai, nanuatae 'eka maikoinai hau a'i kateopuere

'ao kipokia a'i katebaihara tae, ia ekia mauri katebero aonai katebahuba'ari.

### *Babi'e Ekia Hoahoa Namokia Katebabai.*

<sup>9</sup> Abomo au nanuatae, babi'e ekia habuni batotoai hanona aba tia'ia'i harai, ia buikia a'i katebahaeai haeainakia, 'ao taba 'imare'imarekia weiakia gold 'ao kutu ai tebabainakia haukiai a'i kateba taitainakia, habuni 'arakia rarikia a'i katebatotonakia. <sup>10</sup> Ia ekia hoahoa namokia katebabai weiakia katehore kateba tohanakia ia hanona Tirama tekuti aina babi'ekia. <sup>11</sup> Babi'e hanona ena 'aiaunuai hanona 'iobi kea'ina. <sup>12</sup> Au naharabuna, babi'e hanona hau a'i kateba marerenakia 'ao a'i katepoki ainakia, ia hanona kemiahō 'uru'uruna keaha'i. <sup>13</sup> Pokina Tirama ehore Adamu ebabai 'uaina ba muriae 'Eva ebabaina. <sup>14</sup> Ba Satani hanona Adamu a'i e'oina ia babi'e e'oina, ba ki'a weia ia herenai ea'i ramana. <sup>15</sup> Iamo babi'e ekia 'aiaunu aokiai a'ikakauma, raona'au, mai robe maurikiai katemiahō to'o baihana raninai, nahukia kateba ramanakia, ba bamauri katea'ina.

### **3**

#### *Iha'ini Haukia Ekia Mauri Marea Robe Aonai.*

<sup>1</sup> "Hau ha nenuatae Tirama ena marea iha'ini akana kebabaina raninai ia hanona aka namona nenuatae aina," na ti'abi aihohanona 'abi tohana aoka tohanai kaha'i taeana hauna. <sup>2</sup> Tirama ena marea iha'ini hauna hanona ena babai kenamo herenai beho ha a'i katetabu ahina, atawana kehamona, aona kebakiro, aona kea'i 'inina, katemariki aina, aru 'abaea haukia kea'i taeananakia ena ituai, haeamona bamarere akana kebabai haraina, <sup>3</sup> a'i keinu 'ari, a'i keaiahu ia ke'aiaunu, a'i keaibara, mai moni a'i keraona'au aina. <sup>4</sup> Ia hanona kipona ena itu haukia ke'ima harainakia haeamona nahuna kemaiaianakia aiana

kateka'aina mai katemariki aina. <sup>5</sup> (Hau ha kipona ena itu haukia a'i ke'ima harainakia raninai, Tirama ena marea haukia aea ke'ima harai aihonakia?) <sup>6</sup> Maearima bariumo nia'ikakauma hauna hanona marea iha'ini haunai a'i katea'i taeana, pokina a'i meapa ba Tirama Satani eba'ehona 'abanai a'i me'eho. <sup>7</sup> Ba murimuri haukia abomo ia katemariki aina, weiana a'i kate'uahi aina Satani ena rioai a'i meto'o.

#### *Baraibarai Haukia Ekia Mauri Marea Robe Aonai.*

<sup>8</sup> Taeara ihobonai Tirama ena marea ena aka haukia abomo hoahoa namokia katebaiha baihai, bai'oi akakia a'i katebabai, a'i kateinuinu banaina, mai beho taearanai moni a'i katetabunakia. <sup>9</sup> Ia haukia hanona raonaraona apa'uakia weiakia Tirama aba ebawaira tinanakia a'ikakauma aonai haukia tia'i 'ininakia mai aokia berona namonai. <sup>10</sup> Ia haukia hanona kahabahobo 'uainakia ba herekiai beho ha a'i kahatabu ahina hanona tiakono akana katebabaina. <sup>11</sup> Taeara ihobonai atawakia\* abomo hoahoa namokia katebaiha baihai mai a'i kate'uahi 'uahi, bia a'i kateinu 'ari, mai aka ikoikiai aokiai hanona aia katebabua 'auna. <sup>12</sup> Tirama ena marea ena aka hauna atawana kehamona haeamona nahuna mai ena itu haukia ke'ima harainakia. <sup>13</sup> Weiakia tiakono akana tebabai haraina haukia 'arakia hanona mariki 'ekakia katea'ina, ekia a'ikakauma katetabura ki'a Keriso Iesu pouna katehina haraina.

#### *Eka Kuti Taearana.*

<sup>14</sup> Au nabuabenr rani papana aonai aba kawahi kaihani'o, iamo marere neiana natiu ahina niwahi heremu, <sup>15</sup> pokina papana kamahari re'a marere neiana kebaraonani'o kipoka eka mauri aea kaha'ima harai aihona Tirama ena marea haukia baiatakiai, weiana hanona mauri Tiramana ena marea, Tirama ena 'abi tohana kemiahō aina kebatuburana

\* 3:11: (11) 'ao diakono babi'ekia

'ekana. <sup>16</sup> Aika na ha'iobi haraina eka kuti taearana weiana Tirama herekai ebawaira tinana haukia hanona eapa'ua.

Keriso† hanona hauaniai ewaira tina, aubai ena bero ebatohana, aneru ia teihana, rama haeai haukia herekiai ia pouna teiroro aina, mai hanopaka maearimakia ia tea'ikakaumana, nuabi aonai ea'i taeana eao kupai.

## 4

### *Ba'iobi Haukia Bai'oikia A'i Teme'oinimi.*

<sup>1</sup> Auba Robe nehinabe maha harainaka netibaha, muri ranikiai maearima baika a'ikakauma katehabona ia auba weiakia tibai'oi haukia murikiai kateka'a mai auba ki'a obokia ekia ba'iobi tainai katetai. <sup>2</sup> Ba'iobi nahomakia hanona bai'oi haukia herekiai timai weiakia aokia berokia hanona teki'a ihobona auri habunai teba'aranakia. <sup>3</sup> Maearima tikaiabunakia a'i katehwainibe mai aniani baika hanona a'i kateani. Ia Tirama hanona aniani ebenaka kahani, aniani neiakia hanona ebenakia a'ikakauma haukia mai weiakia Tirama ena 'abi tohana te'lobina haukia namo 'abina katehinana ba kateani. <sup>4</sup> Tirama ebarama tabakia ikoikiai hanona tenamo, ikoikiai hanona ahakiai Tirama namo 'abina kahabena ba kahani ia ha a'i kahabaki'ana. <sup>5</sup> Pokina aniani hanona Tirama ena 'abi mai eka bahuba'ari nihore nibarobenakia.

### *Keriso Iesu Ena Aka Haumu Namomuai Koao.*

<sup>6</sup> Ba'iobi neiakia uaho'abaka koba'iobi harainakia raninai oi hanona Keriso Iesu ena aka haumu namomuai koao, weiana oi kipomu abomo a'ikakauma 'abikiai mai ba'iobi namona weiana tainai otai haunai kotabura. <sup>7</sup> Hanopaka tiramakia bai'oikia 'orikia mai kikipa 'abaeakia herekiai kokapare,

iamo kipomu ibataburamu akana kobabaina Tirama imarikiaina haumuai koao. <sup>8</sup> Hauanika ibataburana akakia nahababai hanona ena namo baika, ia Tirama imarikiaina hoana ena namo hanona taba ikoikiai aokiai, pokina ia hanona mai 'abi'uaina eka mauri bariu hanopaka neiana aonai mai mauri banaibana wairai hauna abomo aonai. <sup>9</sup> Neiana hanona 'abi tohana aoka tohakiai kaha'i taeana mai kaha'ikakaumana. <sup>10</sup> Neiana paunai naharo'ari mai nahauhai ara pokina aika hanona mauri Tiramana nahabuabena, ia hanona maearima ikoikiai ekia Bamauri hauna, weiakia tia'ikakaumana haukia hanona katemauri.

<sup>11</sup> 'Abi neiakia koba'obinakia mai kohinanakia kateka'ainakia.

<sup>12</sup> O'aru'aru buonai maearima oi a'i katehao tiboani'o, iamoi ihaia namokia a'ikakauma maearimakia wairakiai kobawaira tinana emu 'abi'abiai, emu mauriai, emu raona'auai, emu a'ikakaumai, mai beho ha a'i kobabaina aonai. <sup>13</sup> Mako wairakiai aka neiakia kobabai to'ona, Puka robena 'abina kotuabina, koiroro aina, mai kobamarere aina keaomo au kawahi heremu. <sup>14</sup> Auba Robe ena ibeni aomuai nemiaho hauna a'i kobaoaoaina, weiana hanona marea ena kiro haukia imakia ahamuai tehao'au tebahuba'ari raninai mahabanai 'abina aonai ebeni'o. <sup>15</sup> Kohauaro aka neiakia ikoikiai aokiai mai aomu ikoinal kobabainakia, weiana maearima ikoinal oi emu aka aba ninamo hauna kateiha tinana. <sup>16</sup> Emu ba'iobi mai emu mauri ko'ima haraina, taba neiakia kobabai to'o baihana, pokina neiana kobabaina hanona Tirama kehore kebamaurini'o haeamona aiamutiona haukia ikoikiai abomo kebamaurinakia.

## 5

### *Marea Robe Maearimakia Hanona Rama Hamona 'Abana.*

† 3:16: (16) baika tererena 'Tirama'

<sup>1</sup> Hau anepakakia herekiae a'i ko'abi pahihi 'apua, iamo mariki hoahoanai kohinabe hinabe harainakia matoha ia hanona oi hamamu 'abana, ia hau 'aru'arukia hanona uaho'abamuai kobaonakia, <sup>2</sup> babi'e anepakakia hanona hinamu 'abanai kobaonakia, mai babi'e 'aru'arukia hanona haibumuai kobaonakia mai aomu beronai.

*Wapu Babi'ekia Tohakia  
Kateiha Harainakia.*

<sup>3</sup> Wapu babi'ekia weiakia tiwatu toha haukia komariki ainakia. <sup>4</sup> Ia wapu nahuna 'ao kupuna baika raninai, ia koba'iobi 'uainakia ekia kuti hoahoana tainai ekia itu haukia kate'ima harainakia, uahomanai hanona hamakia hinakia mai kupukia ekia 'ima'ima 'arana katebamuena, pokina weiana hanona Tirama aona ibanamona akana.

<sup>5</sup> Wapu babi'ena tohana ikupaiana nemiaho hanona ena buabenai Tirama herenai nihorotina rabi ikoinai mai mararani ikoinai nibahuba'ari Tirama herenai baraibarai ninoiaina. <sup>6</sup> Ia wapu babi'ena weiana hauanina ena aonamo niraona apa'uana hanona hauanai nimauri ia aubai aba e'ari. <sup>7</sup> A'ikakauma haukia herekiae 'abi neiakia kobenakia kateka'ai, weiana herekiae beho ha a'i temetabu ahina marikina. <sup>8</sup> Weiana maearima ha hatia'ana 'ao ena itu haukia tohakia baraibarai ha a'i nibenakia hanona a'ikakauma babaina nebuniaina, maearima uahomanai hauna hanona eki'a ki'a baha ba maearima weiana a'i nia'ikakauma hauna.

<sup>9</sup> Atarere pukanai wapu atakia a'i katererenakia keaomo ekia rama ihaukia imabui harauhaea abiranai, haeamona atawakia hamokia tewapu ainakia babi'ekia mo atakia katererenakia, <sup>10</sup> haeamona babi'e ha'iobi haraina ena mauri enamo, abomo nahuna ne'ima harainakia,

aru 'abaea haukia nia'i taea harainakia ena ituai, a'ikakauma haukia ta'arakia nia'i, baika ekia aro'ariai ebarainakia, mai aka namokia haeaihaeai ikoikiae aokiae nia'ituri babi'ena.

<sup>11</sup> Iamo wapu babi'ekia 'aru'arukia hanona atakia atarere pukanai a'i korerenakia, pokina aokiae hawainibe kateraonana raninai Keriso aba katereana ba katehawainibe. <sup>12</sup> Weiana ia hanona kipokia Tirama ena bakai 'ekanai ketetoto pokina Tirama herenai ekia 'abi'uai kori'uaina weiana a'i katehawainibe mue hauna tekabena. <sup>13</sup> Ia hanona ti'aboro tiao itu ha haeamona itu ha ai tikara'au, ekia 'aboro mo aha'i ia te'uahi 'uahi mai maearima haeai ekia aka aokiae titoto, haeamona 'abi a'i patehina haukia tehinanakia. <sup>14</sup> Ua buonai au nanuatae wapu 'aru'arukia hanona katehawainibe nahukia kateba ramanakia kipokia ekia itu kate'imana. Weiana 'ou haukia kate'abi ki'a herekiae hanona taearana keaha'i. <sup>15</sup> Wapu baika hanona a'ikakauma aba tehabona teao Satani murinai te'au. <sup>16</sup> A'ikakauma babi'ena ha ena ituai wapu baika temiaho raninai ia mehore wapu weiakia mebarainakia, ia Tirama ena marea maearimakia a'i kebaro'arinakia, weianai Tirama ena marea maearimakia katehore wapu tohakia weiakia ikupaiakia temiaho haukia katebarainakia.

*Tirama Ena Aka Tihauaro  
ainakia Haukia Katomariki  
ainakia.*

<sup>17</sup> Tirama ena marea kiro haukia weiakia maearima herekiae 'uai akana namona tibabaina haukia katomariki ainakia. Ba weiakia aka tihauaro aina Tirama ena 'abi teiroro aina mai tibamarere aina haukia hanona katomarikiae apa'uanakia. <sup>18</sup> Puka robenai e'abi,

"Poromakau witi iba'iti'itina akana nibabaina aonai pinana a'i kobiri abuna,"

haeamona

Deu 25.4

"Aka hauna 'arana kea'ina hanona ebero."

Luk 10.7

<sup>19</sup> Weiana hau ha Tirama ena marea poki hauna ena beho 'abina nehina hanona aiana a'i koa'i taeana, keaomo maearima rua 'ao aihau katebatohana hanona aikakia koa'i taeana. <sup>20</sup> Ba marea poki hauna ha ki'a ebabai toha raninai mako wairanai kobatana ba marea poki haukia baika ihaiha neiana kateihana hanona kateta'u.

<sup>21</sup> Tirama mai Keriso Iesu mai aneru robekia wairakiai au oi nahina beni'o, aka neikia ikoikiai robakia ahu haukia koka'ai harainakia, maearima ikoikiai herekiai babai ihobona kobabaina ia tai ha'i kotaina.

*Kipomu Ko'ima'ima Haraini'o.*

<sup>22</sup> Koraona harai 'uaina ba imamu hau ha ahanai kohao'au Obiapaka ena aka kebabaina raninai baika ekia babai ki'a aokiai a'i kototo. Kipomu ko'ima haraini'o emu mauri a'i ke'opu Tirama wairanai.

<sup>23</sup> Bei 'aki mo a'i koinu, ia bine beina papana koinu nuamu kebaraina pokina emu inawa inawa paunai.

<sup>24</sup> Maearima baika ekia ki'a hanona temahanai harai ki'a baha nahaihanakia, ki'a weiana hanona keaoai 'uainakia bakai 'ekanai, iamo baika ekia ki'a hanona muriai aba katewaira tina. <sup>25</sup> Ihobonai mo maearima babai namokia tibabai hanona temahanai harai ki'a baha nahaihanakia, haeamona ekia babai namokia a'i nahaihanakia haukia abomo aba katewaira tina.

## 6

*Ta'ara'i Hauna Ena Poki Kemariki aina.*

<sup>1</sup> A'ikakauma haukia weiakia ta'ara'i akana tibabaina haukia ikoikiai hanona ekia poki haukia katemarikiai ki'a bahanakia, weiana hau ha Tirama atana mai eka ba'iobi 'abikia ahakiai a'i ke'abi ki'a.

<sup>2</sup> Ta'ara'i haukia ekia poki haukia hanona a'ikakauma

haukia raninai ia uaho'abakia paukiai a'i katehao tiboanakia, ia ta'arakia katea'i harai, pokina poki haukia weiakia ta'ara'i haukia herekiai barai barai tia'ina haukia hanona a'ikakauma haukia weiakia ta'ara'i haukia tiraona'au ainakia haukia. Taba neikia hanona kobamarere ainakia mai kobahi ahinakia.

*Moni Kaharaona Ki'a Bahana Hanona Kaha'eho.*

<sup>3</sup> Hau ha ba'iobi haeai ha niba'iobi aina haeamona eka Obiapaka Iesu Keriso ena ba'iobi tohana mai ba'iobi weiana Tirama ikutiaina taearana tohana nibaihana hauna a'i nibatohana raninai, <sup>4</sup> ia herenai hanona apamo ebonu, ia taba ha'i e'lobina. Ia ena raona raona teki'a ki'a baha, weiana 'abi'abi aokiai hanona ke'abi harataea mai ke'abi baitaeai, ba 'abi weiakiai hanona wamuru mai baiara, 'abi ki'a obokia mai tai ha a'i nibatohana. <sup>5</sup> Haeamona maearima weiakia ekia raona raona a'i tibero harai, Tirama ena 'abi tohana a'i te'lobina, mai Tirama ibanamona akakiai kateobia tiraonana haukia kipokia baiatakiai tibaiai to'ona.

<sup>6</sup> Iamo hau ha herenai taba ea'inakia haukiai aona ketaina raninai Tirama ikutiaina maurina hanona kebaobiana. <sup>7</sup> Harama ahi raninai taba ha'i hamaiaina hanopaka, haeamona hanopakai kaha'ari raninai taba ha'i kahaeoaina kupa. <sup>8</sup> Ua buonai herekai aniani mai habuni papakia katehaea re'a weiana hanona abetaina aika 'eukai. <sup>9</sup> Ia weiakia tenuatae pateobia haukia hanona baihobo aokiai katetoto, raona po'okia mai ao ibahaiara raonaraonakia rionai kateto'o, weiana ekia mauri keaoaina ki'a 'ekana tohanai mai kea'i ki'anakia. <sup>10</sup> Pokina moni iraona'au aina hanona aka ki'a haeai haeai ikoikiai keba ramanakia. Maearima baika moni tenuakia'ina hanona a'ikakauma tereana kipokia ao pumai tebonu.

*A'ikakaumai Huari Namona Kobabaina.*

<sup>11</sup> Ia oi Tirama ena maearima, taba neiakia ikoikiai herekiai kokapare. Ia bero tohana kotabuna, Tirama komarikiaina, koa'ikakauma, raona'auai komiaho, kobapahihi, mai rabo haraiai komiaho. <sup>12</sup> A'ikakaumai huarinamona kobabaina, ba mauri banaibanoi koa'i 'inina, pokina mako tebatohani'o wairanai emu a'ikakauma hoana ohina pou haraina raninai Tirama eaparini'o mauri neiana aonai.

<sup>13</sup> Tirama taba ikoikiai mauri nibenakia hauna mai Keriso Iesu ia kipona Pontio Pilato herenai 'abi tohana ehina pounahauna wairakiai au oi nabahi ahini'o. <sup>14</sup> Keriso ena rauhubu 'abikia koka'ai harainakia mai herekiai a'i kobeho, haeamona hau ha a'i kekaiahini'o keaomo eka Obiapaka Iesu Keriso ena mai mue wapuna. <sup>15</sup> Ena mai mue wapuna weiana hanona Tirama kehore ena rani tohanai kebabaina. Tirama hanona banaamo pokina mai ia ikupaiana motaba ikoikiai ekia poki, obia 'arana haukia ikoikiai ekia Obia 'arana, haeamona obiapaka ikoikiai ekia Obiapaka. <sup>16</sup> Ia ikupaiana mo kemiaho banaibanoi a'i ke'ari 'apua, ia hanona ea aonai nemiaho ea weiana hanona ea ki'a baha tai ha keao herena hanona a'i ketaina, maearima 'abaeana ha hanona Tirama a'i eihana 'ao a'i keihana. Mariki mai hiabu hanona Tirama herenai kemiaho banai banai. Amen.

### *Kohu Herekia Tebo'o Haukia Marea Aonai.*

<sup>17</sup> Maearima weiakia bariu hanopaka neiana ena mauri tabakiai tiobia haukia kohinabe taburanakia, a'i kateapa, mai ekia buabenai obia tabakia weiakia aba kate'akauma haukia herekiai a'i kemiaho, ia ekia buabenai hanona Tirama herenai mo kemiaho, pokina taba ikoikiai niberuberu benaka aoka ibanamona. <sup>18</sup> Kohina benakia aka namokiai katebabai, babai namokiai kateobia, haeamona maearima baika

herekiai watewateai kateberuberu benakia. <sup>19</sup> Taeara weianai katebabaina hanona kipokia ekia kepu katebararonia, weiana hauna ia kebamia 'ininakia mauri wairai hauna 'euna, ba mauri weiana katea'ina hanona mauri tohana.

<sup>20</sup> Timoteo e, aka naiana Tirama ebeni'o hauna ko'ima haraina, hanopaka 'abi'abikia mai po'o baihara taeana weiana maearima baika tiapari haoreaina tetibaha 'aotipa' weiakia haukia herekiai kokapare. <sup>21</sup> Pokina maearima baika po'o raonana weiana tea'ina hanona ekia a'ikakauma teba'akaumana.

Nabahuba'ari Tirama ena aoko'o hoana hanona ikoimiai heremiai kemiaho.

## Paulo Ena Marere Ibaruana **TIMOTEO** Herenai

### *Puka Aona Irerena 'Abina*

Timoteo hanona Paulo e'abana pou namona akana tebabaina hauna. Ua buonai Paulo puka neiana ererena eao herena, taeara namokia robakia eahunakia mai ehina bena taeara weiakiai keka'a rani ikoinai. Ia Timoteo ehina bena kea'ikakauma tabura mai Iesu Keriso pouna namona keiroro aina rani ikoinai. Tirama ena 'abi keka'ai harainakia. Maearima katebahaiarana 'ao puma katebena haukia paukiai a'i kekai'au kai'au. Ba ia hanona ketabura, Tirama aka ebena hauna kebabai haraina.

Ia hanona bai'oi 'abikia haeai haeai aiakia a'i kebahu ainakia, mai ekia raona a'i tenamo haukia herekiai kekapare, 'abi uahomakia tihere maeearima tia'i ki'anakia. Ia hanona Paulo ena miao taearanana keraona 'ini haraina ba ia ua kemiaho aiho, pokina a'ikakaumanai tetabura haukia ekia miao taearanana hanona weiana, baibuai katemaihao mai uaho'abakia aokia kateba namonakia abomo ekia puma katebuanaakia.

### *Puka Paipana Apa'uakia*

- a. Roba iahu. (1.1-2)
- b. Banamo 'abina mai bahiahi 'abina. (1.3—2.13)
- c. Bairobe 'abina. (2.14—4.5)
- d. Paulo ena nuatae 'abina. (4.6-18)
- e. 'Abi orekia. (4.19-22)

### *Banamo 'Abina.*

<sup>1</sup> Au Paulo, Tirama ena nuatae paunai Keriso Iesu ena iuhubeau hau'u ai aeao Keriso Iesu aonai mauri te'abi'uai aina hauna pouna kahinana,

<sup>2</sup> Timoteo, naha'u ki'amu, narere beni'o. Nabahuba'ari Tirama Hamaka mai Keriso Iesu

aika eka Obiapaka ekia baraibarai apa'uana, aoko'o, mai baibua heremuai katemiaho.

### *Paulo Timoteo Aona Ebataburana.*

<sup>3</sup> Tirama namo 'abina nabena, haeamona rani ikoinai e'u bahuba'ari ai oi a'i nareani'o rabi mai mararani aokiai. Tirama weiana ao'u berona tohanai ia ta'arana na'i ihobona 'aba'aba'u ia ta'arana tea'i 'abana. <sup>4</sup> E'u ka'a aonai ohai hauna naraonana, e'u nuatae maikoinai hanona paihani'o, ba paihani'o raninai ao'u penamo wairai. <sup>5</sup> Emu a'ikakauma tohana naraona 'inina, a'ikakauma weiana hanona 'uainai oi kupumu babi'ena Loi mai hinamu Eunike temauriaina hauna, bariu nabatohana oi aomuai abomo a'ikakauma weiana nemiaho. <sup>6</sup> Ua buonai au oi nabaraonani'o, ima'u ahamuai ahao'au abahuba'ari aonai auba ena ibeni naiana Tirama ebeni'o hauna kobapa'uana akana kobabai taburana. <sup>7</sup> Pokina Tirama hanona ta'u aubana a'i ebenaka, ia hiabu, raona'au mai bakiro aubana ebenaka.

<sup>8</sup> Ua buonai eka Obiapaka pouna ihinanai a'i kohaumaea mai Keriso paunai au nawapura hauna abomo a'i kohaumaeaina. Tirama tabura ebenaka ihobonai hau haiara aokiai kahamiaho pou namona paunai. <sup>9</sup> Ia ehore aika ebamaurinaka abomo eaparinaka ena robe maearimakai kahaeano. Weiana hanona taba ha hababaina paunai aha'i, ia ena raonaraona mai ena aoko'o hoana paunai. Ena aoko'o hoana neiana hanona aba 'uainai hanopaka a'i erama baha aonai Keriso Iesu paunai ebenaka.

<sup>10</sup> Ia bariu hanona aba ewaira tina harai Keriso Iesu ibamaurika hauna emai aonai. Ia ehore 'ari hiabuna ebapuana, haeamona mauri banaibana a'i kepua hauna taearanana pou namonai ebawaira tinana.

<sup>11</sup> Pou namona neiana paunai Tirama ehore etina'ana'u,

kairoro iuhubeau hau'u ai kaeao abomo ba'obi hau'uai kaeao.<sup>12</sup> Weiana paunai au hanona na nahau haiara aiho, iamo a'i nahaumaea, pokina au a'io bina tai na'ikakaumana hauna abomo a'io bina haraina au ia herenai ahorotina akana ke'ima haraina keao mo ena mai mue wapunai.

<sup>13</sup> Au aba'io bin'i'o 'abikia to-hakiai taearanai koka'a mai a'ikakaumamu haemamona mai raona'aumu Keriso Iesu aonai.<sup>14</sup> Taba namona ebeni'o oi emu iha'ini ba'anai hauna Auba Robe weiana aika aokai nemiaho hauna ena baraibarai ai ko'ima haraina.

<sup>15</sup> Aba o'io bina 'abaka Asia hanonai temai haukia ikoikiai tekamuri aina'u tehabona'u, baiatakiai hanona Fugelo mai Heremogene ohi.

<sup>16</sup> Obiapaka kehore ena aoko'oai Onesiforo mai ena itu haukia ikoikiai kebanamonakia, pokina ia rani bo'ona ao'u ebataburana abomo tebirina'u awapura hauna a'i ehaumaeaina.<sup>17</sup> Ia weia Romai ekara'au raninai, au etabuna'u etabuna'u eaomo etabu ahina'u.<sup>18</sup> Nabahuba'ari Obiapaka ia kebaraina ia hanona Obiapaka ena aoko'o ketabu ahina wapu weianai. Abomo oi aba o'io bina haraina ia aea ebarai aihona'u weia Epesoai.

## 2

### Keriso Iesu Ena Huari Haumu Namomu ai Koao.

<sup>1</sup> Ua buonai, naha'u e, Keriso Iesu aoko'o hoana weiana ebeni'o hauna aonai kotabura. <sup>2</sup> 'Abi naiakia maearima bo'ona wairakiai airoro ainakia 'urukia o'o haukia maearima weiakia nubato-hanakia haukia koba'io binakia, ba ia katehore maearima baika kateba 'io binakia.

<sup>3</sup> Keriso Iesu ena huari haumu namomuai koao, hau haiara aokiai kobatabura ihobona au nababaina 'abana. <sup>4</sup> Huari hauna maearima 'abaeakia ekia mauri hoahoana aonai a'i nitoto. Ia huari akana nibabai haraina pokina ena nuatae poki hauna

aona kebanamona.<sup>5</sup> Abomo beau baitaeai hauna beau rauhubukia ikoinai keka'ai harainakia, aha'i raninai beauai 'uai 'arana a'i kea'ina.<sup>6</sup> Biraura hauna kearo'ari ba aniani kori'uaina hanona ia kea'i uaina.<sup>7</sup> Au taba nahinana hauna koraona haraina, pokina Obiapaka hanona aba aomu kekaikauna taba ikoinai obokia kobo.

<sup>8</sup> Iesu Keriso 'ariai emikiri mue hauna koraona 'inina, ia hanona Davida 'aba'abana, neiana hanona pou namona au nairoro aina.<sup>9</sup> Pou namona airoro aina paunai nahau haiara mai tebirina'u matoha beho hauna ha 'abana, ia Tirama ena 'abi katebirina hanona a'i ketaina.<sup>10</sup> Ua buonai e'u atetua ikoikiai aokiai abatabura ki'a Tirama ena, a'i taea haukia paukiai, weiakia kabarainakia

Keriso Iesu aonai bamauri mai nabi banaibanai hauna katea'ina.<sup>11</sup> Neiana hanona 'abi tohana aoka tohakiai kaha'i taeana mai kaha'ikakaumana.  
"Aika Keriso kipokia  
ha'ari raninai,  
aika ia kipokia kahamauri oioi.

<sup>12</sup> Aika hau haiara aokiai  
kahabatabura raninai,  
aika ia kipokia kahaobia oioi.  
Aika ia kahabuniaina raninai,  
ia abomo aika kebuniai ainaka.

<sup>13</sup> Aika aia a'i nahababua 'auna  
re'a  
ia hanona aia nibabua 'au ohona,  
pokina ia hanona kipona  
a'i kebuniai aina."

### Tirama Kebatohani'o Ena Aka Haumu Tohamu.

<sup>14</sup> 'Abi neiakia maearima kobaraonanakia. Ba Tirama wairanai kohinabe pahihinakia, 'abi'abi 'abaeakia ahakiai a'i katebaiara, 'abi weiakia hanona anikia aha'i, maearima aia weiana tiona hanona ekia mauri nia'i ki'anakia.

<sup>15</sup> Koaka tabura harai, kipomu Tirama wairanai kobatohani'o oi hanona aka haumu weiamu emu aka a'i nuhaumaeaina, ba oi haumu hanona Tirama ena 'abi tohana 'abina taearana beronai

nuba'obi. <sup>16</sup> Hanopaka 'abi'abikia mai po'o 'abi'abikia herekiae kokapare, pokina weiakia hanona maearima Tirama herenai tibaka'a 'akaumanakia. <sup>17</sup> 'Abi ua homakia tiba'obi hanona matoha tua ki'a obona koipe 'abana bitio niani obona, Humeao mai Fileto hanona maearima neiakia baiatakia. <sup>18</sup> Ia terarua hanona 'abi tohana taearana aba tehabona ia ekia bai'oiiai ti'abi, aika aba hamikiri mue muri hanona 'ariai a'i kahamikiri mue, ba 'abi weiana nihore maearima baika ekia a'ikakauma nia'i ki'ana.

<sup>19</sup> Ia Tirama ehorae kori 'ini 'ekana ha aba ehorotina weiana a'i keibiu 'apua, ba ahnai 'abi neiakia tererenakia, "Obiapaka hanona ena maearima ikoikiae e'iobinakia," abomo "Taimo taimo ti'abi ia Obiapaka 'euna hanona babai ki'a ikoikiae katehabonakia."

<sup>20</sup> Itu apa'uana ha aonai hanona uro mai 'ororo haeai haeai weia temiaho, baika hanona gold 'ao silba ai tebabainakia, ia baika hanona matiuai 'ao tipuai tebabainakia, ba baika hanona aka apa'uakiae kateakainakia, ia baika hanona aka 'abaeakiae kateakainakia. <sup>21</sup> Hau ha ena mauri aonai kipona ki'a herenai kekapare raninai, ia hanona aka apa'uakiae aokiae kateakaina, ia hanona tebarobena, haeamona ena aka kebo'o ki'a baha ena poki hauna herenai, abomo aba e'oru aka namokia ikoikiae keakainakia.

<sup>22</sup> Ba'aru'aru raonaonakia ki'a obokia kohabonakia, ia kotabura aka beroai, a'ikakauma, raona'au mai baibuai komiaho, haeamona weiakia aokiae tenamo Obiapaka atanai tiapari haukia kipokia katobahamomo. <sup>23</sup> Po'o mai ao 'abaea baihara taeakiae herekiae kokapare, pokina aba o'lobina weiakia puakia hanona baiara katerama. <sup>24</sup> Ia Obiapaka ena ta'ara'i hauna hanona a'i kebaisa, ia hanona maearima ikoikiae herekiae kerabo harai haeamona ba'obi hauna namonai keao

mai kebapahihi. <sup>25</sup> Weiakia ia ti'oatana haukia hanona baihauai kehinabe harainakia ba taeara weianaimo Tirama mehore mebaraona kabenaakia katemai Tirama ena 'abi tohana kateai taeana. <sup>26</sup> Ba weianai ekia raonaraonakia katebero Satani weiana ea'inakia aiana teka'aina hauna ena rioai katekapare.

### 3

#### *Wapu Orekiae.*

<sup>1</sup> Neiana hanona koraona 'inina, wapu orekiae hanona ki'a rarikia 'akikia katerama.

<sup>2</sup> Maearima hanona kipokiamonakia, moni mo katenua ki'aina, kate'abi ki'a, kateapa, katebaroe, maearima herekiae kate'abi ki'a, nahu hama hina aiakia a'i kateka'ainakia, namo 'abikia a'i katehina, mai robe akakia a'i katebabai, <sup>3</sup> herekiae haukia a'i kateraona'au ainakia, ki'a a'i katehina hao, kate'uhu 'uahi, katebaripu ripu, kateiahu, aka namona kate'oatana, <sup>4</sup> katehinahina, a'i kateraona raona ia katebabai 'abaea, aokiae apa katebonu, aonamo akakia katenuatae ainakia, ia Tirama a'i kateraona'au aina.

<sup>5</sup> Hauanaimo Tirama ikutiaina maurinai temiaho, ia mauri weiana hiabuna tohana hanona tibaki'ana. Maearima uahomakia haukia hanona herekiae kokapare.

<sup>6</sup> Maearima uahomakia baika hanona babi'e ekia raona teko'iko'i haukia ekia itu aokiae titoto, aokiae tiani kipokia nabau akakia ki'a obokia tibabainakia babi'e weiakia hanona aka ki'a aonai temiaho ekia nuatae ki'a obokia ihobonai. <sup>7</sup> Babi'e weiakia rani ikoinai tibahobona tenuatae taba mahamahakia patemarereai haraina, ia Tirama ena 'abi tohana hanona a'i mo te'iobi bahana.

<sup>8</sup> Ihobona Iane mai Iambore Mose te'oatana 'abana, maearima uahomakia hanona Tirama ena 'abi tohana abomo ti'oatana, ekia raona hanona a'i tebero, Tirama ekia a'ikakauma a'i tibatohana.

9 Ia ekia ba'iobi hanona a'i keao homa'ana, pokina maearima ikoinai hanona ia ekia po'o kateiha tinana, ihobona Iane mai Iambore ohi herekiai erama 'abana.

*Tirama Ena 'Abi Tohanai Komiaho.*

<sup>10</sup> Ia oi hanona e'u ba'iobi akakia ikoinai aba o'ibinakia, e'u hoahoa, e'u raonaraona apa'uana, e'u a'ikakauma, e'u bakiro, e'u raona'au, e'u bapahihi aba o'ibinakia. <sup>11</sup> Oi o'ibina au te'oatana'u abomo ahau haiara weia Antioka ai, Ikonio ai mai Lustera ai. Bai'oata pahihikia terama ia abapahihi, ba Obiapaka ehore ki'a weiakia aokiai ea'i maurina'u. <sup>12</sup> 'Abi tohana maearima tenuatae Keriso Iesu aonai Tirama ikutiaina maurinai katemiaho haukia ikoikiai hanona kate'oatanakia. <sup>13</sup> Ba aka ki'a haukia mai ahu 'oi'o haukia ekia aka ki'a tebabai to'o baihana eaomo teki'a ki'a baha, weiana ia tihere maearima baika ti'oinakia haeamona ia kipokia abomo ti'oinakia.

<sup>14</sup> Ia oi hanona Tirama ena 'abi tohanai komiaho, weiana o'ibina omarere aina mai nua'ikakauma aina hauna, abomo o'ibina tai hanona oi emu ba'iobi haukia. <sup>15</sup> Ko'iko'imuai raninai Puka robena aba o'ibina emai mo bariu, ba Puka robena kehore aobero kebenaka, weianai Keriso Iesu oa'ikakaumana bamauri oa'ina. <sup>16</sup> Puka Robena 'abikia ikoikiai hanona Tirama Aubana ena baraibarai ai tererenakia, ba ekia aka hanona teapa'ua ki'a baha, weiakiai 'abi tohana kahabamarere aina, katebaraona beronaka, katebaka'a beronaka, mai mauri berona kateba'iobinaka weianai kahamiaho. <sup>17</sup> Ua buonai Puka robena 'abina kehore maearima Tirama ena aka tibabaina haukia keba'oru harainakia aka namokia ikoikiai katebabainakia.

## 4

<sup>1</sup> Tirama mai Keriso Iesu wairakiai au oi nabahi ahini'o,

Keriso hanona kemai mue mauri haukia mai 'ari haukia kebabakainakia ena obia aiarana ke arana. <sup>2</sup> Tirama ena 'abi koiroro aina, tia'i taeani'o 'ao a'i tia'i taeani'o ranikia ikoikiai aokiai, mai bakironmu maearima kobamarerenakia, kobaberonakia, korobenakia, haeamona koba taburanakia. <sup>3</sup> Pokina maearima ba'iobi berona aiana a'i kateona ranina hanona kemai, weiana ia kipokia ekia nuatae taikiai katetai abomo kipokia ekia ba'iobi haukia bo'ona katetabu ahinakia aokia ibanamona 'abikia katehina aiakia kateo'o. <sup>4</sup> Tirama ena 'abi tohana ionai katebua ke'e, ia kikipa bai'oikia katebahu ainakia. <sup>5</sup> Ia oi hanona rani ikoikiai ko'ima haraini'o, mai bakironmu haiara aokiai kobakiro, pou namona ihinana akana kobabaina, Tirama ena aka ibabaina haumuai koao aka ikoikia kobabai ore harainakia.

<sup>6</sup> Au e'u mauri maikoinai hanona beruberu tabanai keao Tirama herena, ba e'u 'ari ranina weiana hanona aba herekai. <sup>7</sup> 'Au aonai aba a'au harai, mai beau baitaeai aonai beau abaore haraina, abomo e'u a'ikakauma hanona a'ima haraina. <sup>8</sup> Ba bariu hanona e'u bero paunai 'uai hoana eba'oruna 'eu'u, weiana Obiapaka bero hauna bakai ke'uai aina hauna kehore au 'uai hoana kebena'u, au mo ikupaia'u aha'i, ia weiakia ikoikiai mai raona'aukia Obiapaka te'imana kewaira tina ena mai wapunai haukia abomo kebenakia.

*Paulo Ena Nuatae 'Abina.*

<sup>9</sup> Taeara kotabu konoanoa komai biai au here'u. <sup>10</sup> Pokina Dema hanona hanopaka maurina eraona'u aina buonai ehabona'u eao Tesalonika. Kereske hanona eao Galatia, ba Tito hanona eao Dalamatia. <sup>11</sup> Luka mo ikupiana hanona au here'uai nemiaho. Mareko kobaka'ana torarua katomai, pokina ia hanona aka neianai kebaraina'u aba ketaina. <sup>12</sup> Tukiko hanona aba auhuna Epeso eao.

<sup>13</sup> Komai raninai, e'u habuni ibatoto imukina weia Toroai Kapo herenai ahabona hauna komaiaina, mai puka komaiainkia, puka weiakia mamoe paruakiai tererenakia haukia hanona a'i koreanakia koa'inakia komaiainkia.

<sup>14</sup> Alesanda auri akana nibabaina hauna hanona here'uai ebabai ki'a ki'a baha, ia Obiapaka kehore ena babai weiana ihibonai 'arana kebamuena. <sup>15</sup> Ia herenai oi abomo ko'ima 'ima haraini'o, pokina eka ba'iobi 'abikia hanona e'oata ki'a ki'a bahanakia.

<sup>16</sup> Bakai kori'uainai, akoroti e'u pou ahinana aonai tai ha a'i ebarai 'apuana'u, ikoikiai tehabona'u teka'a. Ia Tirama ekia ki'a weiana 'arana a'i pehorena.

<sup>17</sup> Ia Obiapaka hanona au here here'uai emiaho tabura ebena'u, weiana au ahore pou namona maikoina airoroai haraina rama haea haukia ikoikiai kateona, e'u 'ari katebatohana 'ekanai ebarobo maurina'u. <sup>18</sup> Obiapaka kehore au ki'a 'ekakia ikoikiai aokiai kebarobo maurina'u mai keaoai haraina'u ena kupa aiaranai. Nuabi hanona ia herenai kemiaho keao mo banaibana. Amen.

*Banamo 'Abina Orena.*

<sup>19</sup> E'u banamo 'abina Priskila mai Akula ohi kobenakia, abomo Onesiforo ena itu haukia kipokia kobenakia. <sup>20</sup> Erasto hanona Korintoai nemiaho, ba Trofimo hanona einawa buonai Miletuai ahabona weia nemiaho. <sup>21</sup> Taeara kotabu konoanoa, 'ama ranina a'i nikara'au baha hanona komai. Eubulo, Pude, Lino mai haibuka Klaudia, haeamona uaho'abaka ikoikiai ekia banamo 'abina teuhuna heremu.

<sup>22</sup> Nabahuba'ari Obiapaka hanona aubamu herenai kemiaho. Tirama ena aoko'o hoana ikoimiai heremai kemiaho.

## Paulo Ena Marere TITO Herenai

### Puka Aona Irerena 'Abina

Tito hanona Iuda hauna aha'i. 'A ia eraona kabe aonai, Paulo ebaraina ena iuhubeau akana aonai. Paulo ehore Tito hanona Krete kereibuuanai ehabona, ia kehore a'ikakauma haukia iha'inikia akana kebabaina 'eka weianai.

Marere neiana aonai, 'abi kori'uaina hauna neiana. Kreta haukia ekia hoahoahana a'i tenamo harai (1.10-13). Paulo e'abi, a'ikakauma haukia i'uuaiaikia akana nenuatae aina hauna ena hoahoahana katenamo harai. Abomo maearima iba'iobikia taearana Tito ehina bena, ihobona hau mai babi'e maearima 'aru'arukia mai ta'ara'i haukia. Marere puanai hanona Paulo ehore Tito ehina bena hau mai babi'e keba'ibinakia aokia katehamomo. Ia ha ha herekiai aka namokia katebabai mai maearima baika herekiai abomo. Ia hanona opuere 'abikia a'i katehina mai maearima baika kipokia a'i katebaiharatae.

### Puka Paipana Apa'uakia

- a. Roba iahu. (1.1-4)
- b. Tirama ena marea aka haukia. (1.5-16)
- c. A'ikakauma haukia ekia mauri. (2.1-15)
- d. Bahiahi 'abikia. (3.1-11)
- e. 'Abi orekia. (3.12-15)

### Banamo 'Abina.

<sup>1</sup> Au Paulo, Tirama ena ta'ara a'i mai Iesu Keriso ena iuhubeau hau'u. Au hanona teuhuna'u maearima weiakia Tirama etina'anakia haukia ekia a'ikakauma kabarainakia Tirama ena 'abi tohana kate'ibina weianai Tirama katemariki aina. <sup>2</sup> A'ikakauma mai aotipa weianai mauri banai banai katebuabena Tirama hanona aba wa'i baha hanopaka a'i erama baha aonai mauri neiana e'abi'uai aina, ia hanona a'i nibai'oi. <sup>3</sup> Aba eraona

'uaina ba ena rani tohanai ena pou namona ebawaira tinana maearima ikoikiai kate'ibina, weiana hauna nairoro aina, Tirama ibamaurika hauna ebatohana'u ia ena aka neiana ibabainai.

<sup>4</sup> Tito, na ha'a'u tohana eka a'ikakauma hamona aonai, au oi narere beni'o. Tirama aika hamaka mai Keriso Iesu aika ibamaurika hauna aoko'o hoana mai baibua katebeni'o.

### Tito Ena Aka Krete Aonai, Kiro Haukia Ketea'i taeanakia.

<sup>5</sup> Krete ai ahaboni'o ena pokihana aka ikoinai a'i teore haukia koa'ia'i harainakia ba aiara ikoikiai aokiai Tirama ena mareai kiro haukia kotina'anakia 'uai akana katebabaina, 'obi abeni'o haunai koaka. <sup>6</sup> Kiro hauna hanona behoai a'i tikaiahina hauna, atawana babi'ena hamona, nahuna katea'ikakauma abomo aia kateka'aina, a'i kateripuripu.

<sup>7</sup> Pokina Tirama ena aka neiha 'ininakia hauna hanona beho ai a'i tikaiahina, kipona ena nuataeai a'i keka'a, 'ao a'i keopuere noanoa, a'i keinu 'ari, a'i keripuripu, mai moni a'i kenua ki'aina. <sup>8</sup> Baki haukia kea'i taeanakia ena ituai mai taba namona hauna keroana'au aina, aoberoai kemiaho, bero taearanai kemauri, ena mauri kebaibenitirama herenai, mai aona kebairobe.

<sup>9</sup> Tirama ena 'abi tohana weiana teba'obi aina haunai kea'i 'ini. Taeara neianai ba'obi tohana keba'ibinakia maearima aokia keba taburanakia, mai weiakia ba'obi tohana ti'oatana haukia ekia beho kebaberonakia.

### Ba'obi Haukia Bai'oikia Ketea'orionakia.

<sup>10</sup> Pokina bai'oata haukia bo'okia weia ekia 'abi 'abaea 'abi 'abaei maearima ti'oinakia, ba weiakia tetarenakia haukia bo'okia abokiamo weia. <sup>11</sup> Maearima weiakia kato ba'orionakia 'urukia kepua, pokina a'ikakauma haukia ekia itu haukia bo'ona aokia tibaro'arina, a'i pateba'ioibai tabakia tiba'ioibai moni iraonanai

haumaea akakia weiakia tibabai.<sup>12</sup> Kerete haukia kipokia ekia mahabanai hauna ha Kerete haukia ehina benakia etibaha, "Kerete haukia hanona bai'oi haukia, 'aki aiporokia ki'a obokia 'abakia, te'aboro kipokia mo nuakia tiraonanakia."<sup>13</sup> Neiana hanona 'abi tohana ehinana, ua buonai kobata ki'anakia, weianai hanona ekia hoa hoa katebero Tirama katea'ikakauma taburana.<sup>14</sup> Ba Iuda haukia ekia ori 'ao kikipa 'ai'aikia mai weiakia maearima ekia rauhubu 'abikia aiakia a'i kateo'o, weiakia hanona maearima herekiae timai Tirama ena 'abi tohana ti'oatana.

<sup>15</sup> Weiakia aokia tebero harai haukia hanona herekiae taba ikoinkai tebero harai, ia weiakia aokia ki'ai tebonu haukia mai a'i tia'ikakauma haukia hanona herekiae taba ha a'i ebero. Ekia raona mai aokia tohana hanona teki'a.<sup>16</sup> Ia ti'abi Tirama te'iobi haraina, iamo ekia babai ai hanona Tirama a'i tia'i taeana. Ia hanona maearima weiakia 'arikia a'i ni'ari haukia aia a'i tika'aina haukia haeamona taba namona ha katebabaina herekiae hanona a'i ketaina.

## 2

### A'ikakauma Berona Tohana Keba'iobinakia.

<sup>1</sup> Ia oi hanona a'ikakauma berona tohana koba'iobi ainakia taeara weianai katemauri. <sup>2</sup> Hau kirokia koba'iobinakia katebakiro, ekia hoahoai maearima ia katemariki ainakia, aoberoai katemauri mai ekia a'ikakauma ketabura harai, kate raona'au haeamona katebahapihi.

<sup>3</sup> Taeara ihobonaimo babi'e kirokia koba'iobinakia Tirama ena nuatae maurinai ketemario, baika herekiae a'i kate'uahi 'uahi, 'ao a'i kateinu 'ari, ia aka namo taearakia kateba'iobi ainakia. <sup>4</sup> Weiana ia katehore babi'e 'aru'arukia kateba marerenakia kipokia atawakia mai nahukia kateraona'au ainakia, <sup>5</sup> kateaobero mai ekia hoahoai katebero harai, ekia itu akakiamo katea'i rea,

katerabo harai, mai atawakia taikiae katetai, weiana hau ha Tirama ena 'abi a'i kebaki'ana.

<sup>6</sup> Taeara ihobonaimo, hau 'aru'arukia koba taburanakia aoberoai katemauri. <sup>7</sup> Oi hanona taba ikoikia aokiae ihaiha namona kobaihanakia emu babai namokiae. Emu ba'iobi aokiae hanona hoahoah beronai mai aomu tohanai koba'iobi. <sup>8</sup> 'Abi berona tohanai ko'abi'abi weiana tai ha a'i ke'abi ki'a bena. Ba weiakia oi ti'oatani'o haukia katehaumaea pokina herekiae 'abi ki'a obona katehinana 'ekana aha'i.

<sup>9</sup> Ta'ara'i haukia koba'iobinakia taba ikoikiae aokiae ekia poki haukia aiakia kateka'ainakia, aokiae kateba namonakia mai ekia 'abi a'i kateba muenakia.<sup>10</sup> Ekia poki haukia herekiae a'i katebainao iamo taeara ikoikiae aokiae hanona ekia namo mai aia ibabua 'au hoana katebawaira tinana, weianai maearima Tirama aika ibamaurika hauna i'obina katenuataeai taburana.

### Keriso Ena Mue Mai Wapuna Naha'imana Aonai.

<sup>11</sup> Hoahoah uahomakiae kahamiaho, pokina Tirama ena aoko'o hoana weiana maearima ikoikiae keba maurinakia hauna aba ebawaira tinana. <sup>12</sup> Aoko'o hoana weiana aika niba'iobinakia Tirama ibaki'ana maurinai a'i kahamauri mai hanopaka inuatae aina akakia ki'a obokia a'i kahababai, iamo bakiroai mai beroai kahamiaho, haeamona Tirama ena nuatae maurina kahamauri aina hanopaka neiana aonai.<sup>13</sup> Aika hanona ua kahamiaho aihoko eka buabenai apa'uana weiana Tirama apa'uana mai ibamaurika hauna Iesu Keriso ena mue mai wapuna nuabina naha'imana aonai. <sup>14</sup> Keriso kipona ena mauri ebaibenai aika paukai weiana 'araka ehorenakia babai ki'a ikoikiae aokiae erubunaka mai ki'a aha'i haukai ebaonaka ia kipona 'euna tohaka, maearima weiaka aoka tohakiae nahuanatae rani ikoikiae namo akakia mo kahababainakia.

<sup>15</sup> 'Abi neiakia koba'iobiai mai maearima koba taburanaakia, abomo ekia mauriai taba teki'a haukiai mai taburamu maikoinai kobaberonaakia. Hau ha a'i koiha haona oi a'i kebamiori po'oni'o.

### 3

#### *A'ikakauma Haukia Kateba'oru Aka Namokia Ibabaikiai.*

<sup>1</sup> A'ikakauma haukia kobarao-nanakia Kabamaní haukia mai poki haukia ekia hiabu ba'anai katemiaho, aiakia kateka'aina abomo kateba'oru aka namokia ibabaikiai. <sup>2</sup> Kohina benakia hau ha herenai a'i kate'abi ki'a, baibuai katemiaho, kate'amari 'amari, mai katerabo harai maearima ikoikiai herekiai.

<sup>3</sup> 'Uainai aika abomo hapo'o, aia a'i haka'ai, te'oi ahinaka habeho, mai hauani ena nuatae akakia ki'a obokia ta'arakia ha'i abomo haonamo ainakia. Haeamona eka mauri aokiai ki'a akakia hababai mai hawamuru, maearima baika te'oatanaka, mai aika ha ha abomo kipoka habai'oataina.

<sup>4</sup> Iamo Tirama aika ibamaurika hauna ena rabo harai mai ena raona'au tewaira tina raninai, <sup>5</sup> aika ebamaurinaka. Weiana hanona aika eka aka bero paunai aha'i, 'a ia kipona ena aoko'o hoanai ebamaurinaka. Auba Robeai eba'uerenaka harama mue maearima mahamahakai haeao ebamaurinaka. <sup>6</sup> Tirama ehore ena beruberuai Auba Robe ahakai eheina ibamaurika hauna Iesu Keriso paunai. <sup>7</sup> Weiana buonai Tirama ena aoko'o hoanai bero ebenaka ia wairanai, weiana aika mauri banaibanai nahabuabena hauna kaha'ina. <sup>8</sup> Ba'obi neiana hanona 'abi tohana, ba au nanuatae oi ko'abi taburaina maearima hanona taba neiakia obokia kateobo. Ba maearima weiakia Tirama tia'ikakaumana haukia hanona kate'ima 'ima harainakia aka namokia katebabai ekia mauri aokiai. Neiakia hanona taba namokia maearima ikoikiai katebarainakia.

#### *Hoaho Ki'a Obokia Herekiai Kokapare.*

<sup>9</sup> Iamo po'o baihara taekia, mai rama kupu torikia kikipakia, mai Mose ena rauhubu paunai tibaiara 'ao ti'au haukia herekiai kokapare. Taba weiakia hanona anikia aha'i mai hau ha a'i katebaraina. <sup>10</sup> Baiata hore nibaramanakia hauna rani kori'uaina mai ibaruna korobena, ba murinai hanona kohabo 'abaeana kateba karahina. <sup>11</sup> Oi ko'ibina maearima ua-homakia hanona taeara tohana tehabona mai ia hanona ki'a haukia, kipokia ekia ki'a tihere tibatohanakia ia hanona tebeho.

#### *Paulo Ena Nuatae 'Abina Mai Banamo 'Abina Orena.*

<sup>12</sup> Weiana au Aretema 'ao Tukiko kauhuna kewahi heremu ekamu kea'ina raninai, taeara kotabu komai biai here'u weia Nikapoli ai, pokina au ao'u aba a'ia'i haraina weia kamiaho 'ama ranina neiana aonai. <sup>13</sup> Sena rauhubu hauna mai Apolo ohi kobarainakia ekia harima taearana koa'ia'i haraina weiana ia taba ikoikiai tenuatae ainakia haukia katea'inakia.

<sup>14</sup> Eka maearima 'obi katea'ina ekia mauriai aka namokia katebabai ba maearima weiakia taba tenuataeai haukia katebarainakia. Weiana a'i tememiaho 'abaea ekia mauri buabuakia a'i temeaha'i.

<sup>15</sup> Maearima neia here'uai haukia ikoikiai ekia banamo 'abikia teuhunakia heremu. Emai banamo 'abikia eka maearima ikoikiai weiakia a'ikakauma aonai tiraona'au ainamai haukia kabenakia.

Nabahuba'ari Tirama ena aoko'o hoana ikoimiai heremiai kemiahao.

## Paulo Ena Marere PILEMONA Herenai

### *Puka Aona Irerena 'Abina*

Pilemona hanona hau apa'uana ha, ia hanona a'ikakauma haukia Koloseai haukia niraonanakia. Pilemona hanona mai ena ta'ara'i hauna, ia atana hana Onesimo. Onesimo hanona ebeau 'akau-mana ena poki hauna herenai, ba eao aiara haeai ha aonai emiaho. Aiara weianai Paulo ohi tebaitabu ahi ba eraona kabe. Rani weianai Paulo hanona wapura 'ekanai buonai Pilemona kipokia kate'abi'abi hanona epahihi. Ua buonai marere neiana ererena, ba Onesimo ebena, ia kehore kea'ina keaoaina ena poki hauna kebena.

Marere neiana aonai, Paulo ehore Pilemona eba'ameña ena ta'ara'i hauna kea'ina mai aona namonai. Abomo ehina bena Onesimo hanona aba eraona kabe ena mauri Obiapaka ebena. Paulo mai aona ikoinal Pilemona enoina bariu rani neianai keaoaina aonai Onesimo keaparina ia uaho'abana tohana.

### *Puka Paipana Apa'uakia*

- a. Roba iahu. (1-3)
- b. Banamo 'abina. (4-7)
- c. Enoina Onesimo paunai. (8-22)
- d. 'Abi orena. (23-25)

### *Banamo 'Abina.*

<sup>1</sup> Au Paulo, Keriso Iesu paunai nawapura hau'u, mai uaho'abaka Timoteo ohi marere tarerena niwahi Pilemona, emai hau ki'amu kipokia haka haeamo haumu heremu, <sup>2</sup> mai haibuka Apia, Arekipo nahahuar haeamo hauna mai Tirama ena marea haukia naia emu ituai tuto'u haeamo haukia ikoimiai heremi.

<sup>3</sup> Nabahuba'ari Tirama aika Hamaka mai Obiapaka Iesu Keriso ekia aoko'o hoana mai baibua hanona heremiai kemiaho.

### *Pilemona Ena Raona'au Mai A'ikakauma.*

<sup>4</sup> Rani ikoinal e'u bahuba'ari ai oi naraonan'i o haeamona e'u Tirama namo 'abina nabena, <sup>5</sup> pokina emu a'ikakauma Obiapaka Iesu herenai hauna mai emu raona'au Tirama ena maearima robekia ikoikiai herekiai hauna poukia aba ao'o.

<sup>6</sup> Au nabahuba'ari hanona eka bai-hauai oi emu a'ikakauma keaka harai aonai taba namokia weiakia Keriso aonai aba ha'inakia haukia maikoinai obokia kobo harai. <sup>7</sup> Hati'u ki'amu e, emu raona'au weiana ehore e'u aonamo ebapa'ua ki'a bahana mai ao'u ebatabura ki'ana, pokina uaho'abaka Tirama ena robe haukia aokia oba'amarina paunai.

### *Paulo Onesimo Paunai Enoi.*

<sup>8</sup> Ua buonai Keriso aonai au hanona panuako'o pabahi ahini'o aka berona kobabaina. <sup>9</sup> Iamo naraona'au aini'o paunai, ua a'i kahoma ia nanoini'o. Au Paulo bariu aba akiro abomo Keriso Iesu paunai nawapura hau'u, <sup>10</sup> naha'u Onesimo paunai au oi nanoini'o, ia hanona au naha'uai eao weia wapura itunai amiaho aonai. <sup>11</sup> 'Uainai hanona ia ena namo aha'i oi heremuai, ia bariu hanona ena namo aba eapa'ua oi mai au herekai.

<sup>12</sup> Au hanona ia nauhu muena niwahi heremu. Iamo ao'u tohanai naraona'au aina hauna nauhuna. <sup>13</sup> Au neia pou namona paunai nawapura aonai nanuatae pa'i 'inina pemiaho oi 'ekamu pea'ina au pebaraina'u. <sup>14</sup> Ia au taba ha'i kababaina keaomo oi ko'abi harai 'uai, ba oi emu namo ha au here'uai kobabaina, weiana hanona oi emu nuataeai kobabaina ia au e'u bahiahi paunai a'i kobabaina.

<sup>15</sup> Onesimo hanona rani papana ehaboni'o, baiatami epa'a buonai bariu hanona koa'i muena here-muai kemiaho baihana. <sup>16</sup> Ia hanona ta'ara'i hauna 'abaeana aha'i, 'a ia hanona enamo ki'a baha ba ta'ara'i haukia, ia

hanona uaho'abaka raona'auna,  
au ia naraona'au aina, iamo oi  
hanona koraona'auai ki'a bahana,  
ia hanona ta'ara'i hauna mai  
uaho'abaka tohana Obiapaka  
aonai.

<sup>17</sup> Ua buonai, oi nuraonana au  
emu hau toha'u raninai, Onesimo  
koa'i taea haraina matoha au nua'i  
taeana'u 'abana. <sup>18</sup> Ia oi heremuai  
taba ha ea'i ki'ana 'ao heremuai  
ena a'i 'abaea ha re'a, taba weiakia  
ikoikiai hanona au e'u pumai  
kateao. <sup>19</sup> Au Paulo 'abi neiana  
au kipo'u ima'uai narerena. 'Ara  
bita hanona ikoinai 'arakia ka-  
horenakia. (Ia oi abaraini'o ba-  
mauri otabu ahina hauna robana  
a'i nahuna.) <sup>20</sup> Ua buonai, hati'u e,  
au nanoini'o Obiapaka atanai e'u  
nuatae naiana kobabaina, Keriso  
aonai ao'u koba'amarina.

<sup>21</sup> Au marere neiana narerena  
hanona a'iobina e'u noi heremuai  
hauna akana aba kobabaina, ba  
kobabai banaina. <sup>22</sup> Haeamona  
ituai baki ikaihurina ha koa'ia'i  
haraina au 'eu'u, pokina e'u  
buabenai Tirama herenai hanona  
emi bahuba'ari keal'i taeana ba au  
kawahi heremu.

#### *Banamo 'Abina Orena.*

<sup>23</sup> Au 'aba'u ha Epafra, Keriso  
Iesu paunai tararua tawapura  
haeamo hauna ena banamo 'abina  
neuhuna oi heremu. <sup>24</sup> Abomo  
Mareko, Aristako, Dema, mai  
Luka, au kipokia taka haeamo  
haukia ekia banamo 'abikia  
teuhunakia.

<sup>25</sup> Nabahuba'ari eka Obiapaka  
Iesu Keriso ena aoko'o hoana  
hanona wai aubamiai kemiahō.

## Marere HEBERU Haukia Herekiae

### *Puka Aona Irerena 'Abina*

Puka neiana ererena hanona a'ikakauma haukia baika kebarainakia weiakia ekia a'ikakauma tihabona pokina maearima baika ia tebapo'onakia ba atetua aonai temiaho. Weiiana buonai puka neiana ererena ekia a'ikakauma kebataburana. Weiiana Keriso ikupaijanamo herenai etaina Tirama ena taeara tohakia kebainahanaka.

Puka neianai taba apa'uakia aihau robakia niahunakia. Kori'uaina hanona Iesu hanona Tirama nahuna tohana. Iesu hanopakai emiaho aonai, ia hanona puma bo'ona ehoainakia, mai haiara rarikia ea'inakia ba taeara weianai Tirama ehore Iesu hanona maearima ikoikiae ibaraikia hauna apa'uana ebaona (2.10). Weiiana paunai Iesu hanona mahabanai haukia mai aneru mai Mose etara haonakia. Ibaruana hanona Tirama kipona ehore Iesu ea'i taeana robe haunai keao banaibana. Ia hanona robe hauna apa'uana kupai, ia hanona herenai etaina maearima ia tia'ikakauma tohana haukia kebamaurinakia. Mose ena hoahoia mai ena rauhubu robakia eahunakia. Weiiana hanona Iesu taba ebabaina hauna aubaubana 'abana.

Puka neiana aonai Isaraela maearimakia 'uaikia haukia ekia a'ikakauma orikia bo'okia temiaho (11), ba maearima ekia a'ikakauma nibataburana. Orena hanona ia nibataburana haukia weiana atetua taba taba katetabu ahinakia, 'a ia hanona ekia a'ikakaumai katekori 'ini keaomo 'ariai. Ia mahakia hanona Iesu herenai kemiaho, ena taearai kateka'a, weiana puma mai haiara hanona ekia a'ikakauma a'i katea'i parena (12.1-12).

*Puka Paipana Apa'uakia*

- a. Roba iahu: Keriso hanona Tirama ibawaira tinana. (1.1-3)
- b. Keriso hanona aneru etara haonakia. (1.4—2.18)
- c. Keriso hanona Mose mai Iosua etara haonakia. (3.1—4.13)
- d. Keriso ena robe akana ena apa'ua. (4.14—7.28)
- e. Keriso ena 'abi'uai ena apa'ua. (8.1—9.28)
- f. Keriso ena baibeni akana ena apa'ua. (10.1-39)
- g. A'ikakauma hanona taba apa'uana. (11.1—12.29)
- h. Bahiahi 'abina mai 'abi orekia. (13.1-25)

### *Tirama Ena Abi Nahuna Pinanai Ehina benaka.*

<sup>1</sup> Wa'i baha raninai Tirama ehore mahabanai haukia pinakiae rani bo'ona taeara haeaihaeai ai 'aba'abaka herekiae ehina benakia. <sup>2</sup> Ia bariu rani neiakia puakiae hanona Nahuna pinanai aika ehina benaka. Tirama ehore Nahuna imanai kupa mai hanopaka ebabainakia, ia ehore Nahuna etina'ana taba ikoikiae ebena ia 'euna. <sup>3</sup> Nahuna neiana hanona ne'imare Tirama nuabina nibawaira tinana, ia hanona Tirama ihobona tohana, ia ena 'abi hiabunai taba ikoikiae ne'imana. Ia maearima ekia ki'a eutu obonakia murinai kupa 'ubinai hiabu ikoinai Tiramana itipana taina imariki aina 'ekanai emiati nemiaho.

### *Tirama Nahuna Hanona Aneru Etara Haonakia.*

<sup>4</sup> Ia hanona aneru etara haonakia pokina Tirama ia atana ebena hauna hanona aneru atakia etara haonakia. <sup>5</sup> Tirama ehore ia ehina bena,  
“Oi hanona au Naha'u.  
Bariu beraura neianai  
Au oi abaramani'o,”

Sal 2.7  
ia aneru ha herenai ua a'i e'abi aiho. Ia haeamona e'abi,  
“Au hanona ia Hamanai kaeao,  
ia abomo au Naha'u ai keao.”

2 Sam 7.14

6 Haeamona Nahuna apa'uana euhuna hanopakai emai raninai e'abi etibaha,  
“Tirama ena aneru ikoikiae hanona ia temekuti aina.”

Deu 32.43

7 Aneru robakia eahuna etibaha,  
“Tirama ehore ena aneru hanona baurai ebaonakia,  
ena aneru baika ta'ara'ina tia'i haukia hanona iruba upakiae ebaonakia.”

Sal 104.4

8 Ia Nahuna robana eahuna etibaha,  
“Oi hanona Tirama, emu obia imia'auna kemiaho banaibana, oi hanona bero ai emu aiara nupoki aina.

9 Aka bero onuatae aina, babai ki'a hanona o'oataan. Ua buonai Tirama emu Tirama ehore aonamo tehoronai eheini'o emu obia hoana, atamu ebapa'uana 'abamu wairakiae.”

Sal 45.6, 7

10 Haeamona etibaha,  
“Obiapaka e, popouna 'akinai hanopaka hanona oi obabaina, kupa abomo oi imamuai obabaina.

11 Kupa mai hanopaka hanona kate'akauma, iamo oi hanona komiaho banaibana, ia taba ikoikiae kateburuburu habuni 'ai'aina 'abana.

12 Kupa mai hanopaka kounakia habuni iro'abu 'abana, weiakia ihakia katehaeai habuni ni'ai'ai 'abana. Ia oi hanona 'ekamuai mo, emu mauri ihaukia hanona a'i kepua.”

Sal 102.25-27

13 Rani ha Tirama aneru ha na a'i ehinabe aihona a'i etibaha, “Itipa'u tainai momiati keaomo oi i'oatamu haukia 'apumu ba'anai kahorotinakia.”

Sal 110.1

14 Aneru hanona taba? Ia ikoikiae hanona auba, Tirama ta'arana tia'i haukia, euhunakia

bamauri katea'ina haukia katebarainakia.

**2**

*Bamauri Hanona Taba Apa'uana.*

<sup>1</sup> Ua buonai 'abi tohana Nahuna pouna aba haona hauna kaha'ima haraina, weiana herenai a'i hamakapare ta'una. <sup>2</sup> Tirama ena aneru pinakiae 'aba'abami ehina benakia 'abikia abomo hiabu 'abikiae teao, akakia a'i tebabai 'ao a'i tea'i taeananakia haukia hanona puma eba'oruna hauna tehoaina. <sup>3</sup> Bamauri hanona taba apa'uana, weiana kahabaki'ana raninai puma kemai hauna herenai aika aea kahapihi aiho?

Bamauri neiana hanona Obi-apaka kipona aba ehina pou'uaina, weiana teona haukia tehore tebatohanai aika herekai. <sup>4</sup> Tirama kipona abomo hoa apa'uakia, bata'uta'u huri akakia, hiabu akakia haeaihaeai ebawaira tinanakia, mai ia ena nuatae ihobonai Auba Robe ebaibenai ia kipokia tebatohanakia.

*Iesu Ke'uai ainaka Bamauri Aonai.*

<sup>5</sup> Tirama hanona aneru a'i etina'anakia, hanopaka mahamahana nimai hauna a'i katepoki aina, bariu hanopaka weiana pouna nahinana. <sup>6</sup> Puka robena aonai 'eka ha na erere aihona etibaha,

“Tirama e, maearima hanona taba? Ba oi ia nuraona 'inina.

Maearima nahuna hanona taba? Ba oi ia no'ima haraina.

<sup>7</sup> Oi ohore rani papana iaobariri 'apuana aneru benukiae,

ia haeamona oi ohore nuabi mai mariki hoana 'akonai obabainuna.

<sup>8</sup> Oi ohore taba ikoikiae ia ena iha 'ini ba'anai ohorotinakia.”

Sal 8.4-6

Tirama taba ikoikiae ia ena iha 'ini ba'anai ehorotinakia hanona ia kehore taba ikoikiae keiha

'ininakia. Iamo bariu aika nahaihanakia hanona taba ikoikiai ia ena iha'ini ba'anai aha'i 'abana.<sup>9</sup> Ia aika Iesu nahaihana, ia rani papana eriri aneru benukiai, ia 'ari ehau haiara aina paunai Tirama ehore nuabi mai mariki hoana ebabainuaina. Ia 'ari abiabina eonobaina maearima ikoikiai paukiai, weiana hanona Tirama ena aoko'o hoana.

<sup>10</sup> Tirama ena aka hanona ebero, ia hanona taba ikoikiai ebabainakia mai neiha 'ininakia, nahuna bo'okia ena nuabi aonai kebaka totonakia paunai enuatae Iesu kehau haiara ke'oru harai, weianai nahuna bo'okia katemai ena nuabi aonai katemiahao. Iesu ikupaiana mo ke'uai ainakia bamauri aonai. <sup>11</sup> Maearima ekia ki'a neutu obonakia hauna mai ekia ki'a eutu obonakia haukia kipokia hamakia hanona hamona. Ua buonai Iesu a'i nihaua maea ia keaparinakia uaho'abana. <sup>12</sup> Ia ehore Tirama ehina bena etibaha, "Oi atamu kahina pouna uaho'aba'u wairakiai. Ekia to'u aokiai oi atamu kabanamona."

Sal 22.22

<sup>13</sup> Haeamona e'abi etibaha,  
"Au hanona Tirama na'ikakaumana."  
Isa 8.17

E'abi mue etibaha,  
"Au neia'u mai Tirama ehore  
nahunai ebena'u haukia kipokia."  
Isa 8.18

*Iesu Maearima ai Eao Kebarainaka.*

<sup>14</sup> Weiakia nahuna na nihoma haukia hanona maearima mai bitiokia abomo mai aruarukia, Iesu kipona ia ihobokiae emai eka hauani maurinai emiaho, weiana ebabaina pokina hanona ena 'ariai Tiaporor 'ari nipoki aina hauna keba'ehona, <sup>15</sup> abomo ekia mauri beraurakia ikoikiai 'ari teta'u aina ta'arana tea'i haukia kerubu obonakia.

<sup>16</sup> Weiana Iesu hanona aneru a'i nibarainakia, ia Aberahamo 'aba'abana nibarainakia. <sup>17</sup> Ua buonai ia hanona uaho'abana ihobokiae eao taeara ikoikiai

aokiai, ia robe hauna apa'uana keao mai ena aoko'o mai ena aka bero Tirama ena aka nibabaina aonai maearima ekia ki'a kehina haonakia. <sup>18</sup> Ia kipona baihobo aonai emiaho abomo ehau haiara buonai ia baihobo aonai haukia ibaraikia e'io bina.

### 3

*Iesu Hanona Mose Etara Haona.*

<sup>1</sup> Ua buonai uaho'aba'u robemi e, wai kipokia Tirama eapari haea-monaka haumi, Iesu katoraona haraina, ia hanona Tirama ena iuhubeau hauna abomo robe hauna apa'uana eka a'ikakaumai pouna nahahnana hauna. <sup>2</sup> Mose Tirama ena itu aonai eaka harai ihobonai Iesu hanona euhuna Tiramana ena aka ebabai haraina mai aona ikoinai. <sup>3</sup> Itu ebabaina hauna temarikiae apa'uana ba itu kipona, ihobona Iesu hanona nuabi apa'uana kea'ina ba Mose. <sup>4</sup> Itu ikoikiai mai ibabaikia haukia, ba Tirama hanona taba ikoikiai ebabainakia. <sup>5</sup> Mose hanona Tirama ena itu ikoinai aonai ta'ara'i haunai eao eaka harai mai aona ikoinai, ia hanona muriai Tirama taba ke'uhinakia haukia poukia ehinanakia. <sup>6</sup> Iamo Keriso hanona Tirama Nahuna, ia Tirama ena itu nipoki aina mai aona ikoinai. Aika rani ikoinai kaha'ikakauma mai taburaka kahabuabena mai aonamoka raninai aika hanona Tirama ena maearima.

*Tirama Ena Maearima Ekia Arai 'Ekana.*

<sup>7</sup> Ua buonai Auba Robe na e'abi aihoe,  
"Bariu rani neianai  
Tirama aiana katona raninai,  
<sup>8</sup> aomi a'i katoba pahihinakia  
rani weiana hano'akunai  
Tirama tehobona aonai  
tebapairi pairi 'abana.

<sup>9</sup> Weia 'aba'abami ihau bariabui aokiai e'u aka teihananakia iamo tehobona'u mai tebabobona'u.

<sup>10</sup> Ua buonai uru weiana aopuere aina a'abi atibaha,

'Aokia hanona atau'a 'akinai buonai e'u taeara a'i te'io bina.'  
<sup>11</sup> Weiana aopuere a'abi'uai pahihi atibaha,  
 'Ia hanona e'u arai 'ekanai a'i katekatoto.'

Sal 95.7-11

<sup>12</sup> Uaho'aba'u e, kato'ima harainimi ha kipona aona a'i kea'i ki'ana ena a'ikakaumai a'i kekaobo mauri Tirama a'i kekamuriaina.  
<sup>13</sup> A Puka robena nehinana 'bariu rani neiana' hanona aika eka rani, ua buonai rani ikoinai 'abami kipokia aomi katoba taburanakia, ki'a kehore ena bai'oi ai aomi a'i meba pahihinakia marikina.  
<sup>14</sup> Eka a'ikakauma ha'iramana hauna kaha'i 'inina keaomo puani hanona aika Keriso kipokia nahaka haeamo haukai kahaao.

<sup>15</sup> Puka robena na e'abi aiho,  
 "Bariu rani neianai  
 Tirama aiana katona raninai  
 aomi a'i katoba pahihinakia  
 rani weianai 'aba'abami tebapairi  
 pairi 'abana."

Sal 95.7, 8

<sup>16</sup> Maearima tabakia Tirama aiana teona iamo tebapairi pairi? Weiakia Mose Aikupito ai ebakarahnakia haukia ikoikjai.  
<sup>17</sup> Tirama tai eopuere ainakia ihau bariabui aokiai? Maearima weiakia ki'a tebabai mano'akunai te'eho te'ari ore haukia. <sup>18</sup> Tai herekiae Tirama e'abi'uai pahihi benakia ena arai 'ekanai a'i katekatoto na ehoma? Weiiana hanona tai ehina benakia? Weiakia Tirama aiana a'i teka'aina haukia.\* <sup>19</sup> Ua buonai aika ha'io bina ekia a'ikakauma aha'i paunai arai 'ekanai a'i tekatoto.

## 4

### Aika Kahatabura Arai 'Ekana Kahakatoto.

<sup>1</sup> Tirama ena 'abi'uai aika 'euka ena arai 'ekanai kahakatoto hanona 'ekanai, ua buonai aika kaha'ima harainaka, ha a'i ke'eho arai 'ekanai a'i me'ubo aina ta'una. <sup>2</sup> Aika pou namona haona, Isaraela haukia abokiamo 'abi aba

teona. Iamo herekiae 'abi teona hauna ena namo aha'i pokina teona haukia a'i tea'ikakauma.

<sup>3</sup> Weiana hanona Tirama e'abi ihobona etibaha,  
 "Aopuere a'abi'uai pahihi atibaha,  
 'Ia hanona e'u arai 'ekanai a'i katekatoto.' "

Sal 95.11

Ia aika a'ikakauma hauka hanona ena arai 'ekanai kahakatoto. Aka neiana hanona aba ebaorenai hanopaka ebabaina raninai.  
<sup>4</sup> Pokina puka robena aonai wapu iba'abaihau hamomona pouna ehinana etibaha, "Tirama ena aka ikoikiae ebaorenakia ba wapu iba'abaihau hamomonai earai."

<sup>5</sup> Haeamona arai robana eahuna etibaha, "Ia hanona e'u arai 'ekanai a'i katekatoto." <sup>6</sup> Weiakia pou namona teo'uaina haukia ekia aiao'o aha'i paunai Tirama ena arai 'ekana a'i tekatoto. Iamo bariu baika hanona ia ena arai 'ekanai katekatoto. <sup>7</sup> Weiana paunai rani homa'ana eao muri nai Tirama ehore wapu ha ea'i taeana atana eaparina "Bariu rani neiana", haeamona Davida pinanai wapu weiana pouna ehinana etibaha,  
 "Bariu rani neianai,  
 Tirama aiana katona raninai  
 aomi a'i katoba pahihinakia."

Sal 95.7, 8

<sup>8</sup> Iosua arai 'ekana tohana pebenakia raninai Tirama hanona murinai wapu ha a'i pe'uhina.  
<sup>9</sup> Ua buonai ha'io bina Tirama ena maearima katearai ranina hanona nimai ihobona wapu iba'abaihau hamomona 'abana. <sup>10</sup> Tirama ena arai 'ekanai aba tekatoto haukia hanona ekia akai tiarai ihobona Tirama ena aka ebaorenai ba earai 'abana. <sup>11</sup> Ua buonai aika hanona kahatabura arai 'ekana weianai kahakatoto, weiakia aiao'o aha'i haukia 'abakiae a'i kahaao hau ha arai 'ekana a'i me'ubo aina ta'una.

<sup>12</sup> Pokina Tirama ena 'abi hanona nimauri abomo niaka, eara ki'a baha ba kareba weiana mahana abira abira teara hauna

\* **3:18:** (18) 'ao a'i tea'ikakauma haukia.

'abana, ia hanona eara kekomorurunaka keaomo aoka mai aubaka herekia huriaka mai ibakai herekiai, weiana maearima ekia raonaraona mai ekia nuatae kebawaira tinanakia.<sup>13</sup> Hanopaka tabakia ha Tirama wairanai a'i kebuni 'apua, taba ikoikiae katewaira tina mahanai ba ia herenai aika eka mauri maikoinai pouna kahahinana.

*Iesu Hanona Robe Haukia Arakiai Hauna Apa'uana.*

<sup>14</sup> Aika hanona mai eka robe hauna apa'uana ekara'au eao kupu, ia hanona Iesu Tirama Nahuna. Ua buonai aika hanona eka a'ikakauma pouna nahahinana hauna kaha'i 'inina. <sup>15</sup> Eka robe hauna apa'uana Iesu hanona eka 'abe'abe 'ekakiai niaoko'o ainaka, neia hanopakai emiaho raninai tehobona taeara haeanae aika ihoboka, iamo ia herenai hanona ki'a ha aha'i. <sup>16</sup> Ua buonai mai taburaka kahaeao aoko'o Tiramana ena obia imia'auna herenai, weianai aoko'o apa'uana kaha'ina mai aoko'o hoana kahatabu ahina, eka nuatae ranikiae kebarainaka.

## 5

*Iesu Hanona Eka Bamauri Pokinai Eao.*

<sup>1</sup> Robe haukia apa'uakia ikoikiae hanona maearima baiatakiae Tirama ea'i taeanakia ena aka katebabaina maearima paukiae, beruberu tabakia mai ki'a ia'ibokia tabakia katebaiben. <sup>2</sup> Robe hauna apa'uana kehore 'obi aha'i haukia mai beho tibabai haukia keaoko'o ainakia pokina ia kipona abomo taeara bo'onai ni'abe'abe. <sup>3</sup> Ia kipona abomo ni'abe'abe paunai, maearima ekia ki'a paukiae mo aha'i, 'a ia kipona ena ki'a ia'ibokia tabakia abomo kebaiben.

<sup>4</sup> Hau ha kipona robe hauna apa'uana hoana a'i kea'ina ia Tirama kehore keaparina hauna robe hoana kea'ina, ihobona Arona eaparina 'abana.

<sup>5</sup> Taeara ihobonai Keriso abomo kipona robe hauna apa'uana hoana a'i ea'ina, ia hoa ebena Tiramana ehina bena etibaha,

"Oi hanona au Naha'u.

Bariu rani neianai au hanona Hamamuai naeao."

Sal 2.7

<sup>6</sup> Puka robenai 'eka haeai ha e'abi etibaha,

"Oi hanona robe haumuai nomiaho keaomo banaibanan Melkisedek robe akana ebabaina 'abana."

Sal 110.4

<sup>7</sup> Iesu hanopakai emiaho aonai ia 'ariai kebamaurina Tiramana herenai ebahuba'ari enoi eapari aota mahana mai beina, ba Tirama ia aiana eona pokina kipona ebako'iko'inai Tirama emariki aina paunai. <sup>8</sup> Ia hanona Tirama Nahuna, iamo ena hauhaiarai Tirama aiana ika'aina e'ibolina. <sup>9</sup> Weianai e'oru harai, ia aiana tika'aina haukia ikoikiae ekia bamauri banaibanan pokinai eao. <sup>10</sup> Tirama ehole Iesu robe hauna apa'uana ai ebaona Melkisedek robe akana ebabaina 'abana.

*A'i Kahamiaho Oho Miori Papakia 'Abana.*

<sup>11</sup> Melkisedek ena aka robana katahuna 'abikia hanona ebo'o, iamo ihinahina haraikia hanona tepahihi pokina 'uruna katona hanona obona a'i katobo. <sup>12</sup> Rani homa'ana toa'ikakauma aba etaina, wai hanona ba'obi haumi ai patoao, iamo wai bariu hau ha pehore Tirama ena 'abi tohana pokina peba'obi muenimi. Wai hanona matoha 'ae teinu oho miorikia 'abakia, aniani pahihikia ianikiae a'i tutabura baha. <sup>13</sup> Hau ha 'ae neinu oho hauna hanona miori papana, pokina ia bero mai beho a'i e'ibinakia. <sup>14</sup> Aniani pahihikia hanona maearima apa'uakia 'eukia, ia hanona aokia tebero, namo mai ki'a hoakia aba te'ibinakia.

**6**

*Kahabakiro  
Tirama Eunai.*

<sup>1</sup> Ua buonai aika hamatabura waira hamaeo Keriso ena ba'obi taburana hama'ina, ia a'ikakauma ba'ibokia kori'uaikia haukia herekiai a'i kahamiaho. Neiakia hanona 'ari akakiai naharaona kabe mai Tirama naha'ikakaumana, <sup>2</sup> 'uere robe ba'ibolina mai ahakiai ima ti-hao'au, abomo 'ariai mikiri mue ba'ibolina mai miao banaibana bakaina, a'i kahamue ba'obi neiakia pokikiai. <sup>3</sup> Tirama kenuatae raninai aika hanona kahaka'a waira kahaeao ba'obi taburana herena.

<sup>4</sup> Maearima baika ekia a'ikakauma te'akauma haukia aea katemue aiho? Ia 'uainai Tirama aokia ebaeanakia, kupa beruberuna teonobaina, Auba Robe kipokia teaka haeamo, <sup>5</sup> Tirama ena 'abi namona te'ibolina abomo Tirama kepoki aina hiabuna teonobaina, <sup>6</sup> ba Keriso herenai ti'eho ti'akauma raninai kateraona kabe rani ibaruana katemahamaha hanona a'i ketaina, pokina ia aba imakiai Tirama Nahuna matiu ibiri ropo 'ubinai tikoko 'au muena maearima wairakiai tibahaumaeana.

<sup>7</sup> Ihobona matoha hano weiana ahanai rani bo'ona abara etibo, aniani namokia nibaramanakia tebiraura haukia 'eukia, hano weiana hanona Tirama ena banamo kea'ina. <sup>8</sup> Ia hano weiana ahanai 'ini boaboa mai awa 'ini'inikia te'omu raninai ena namo ha aha'i, Tirama ia aba keururu aina irubai kate'ara ore.

<sup>9</sup> E'u raona'au haumi e, ua tahinabe pahihi aihonimi, ia ai ta'iobi haraina wai hanona uahomana aha'i, banamo namona keaoainimi bamauri 'ekana. <sup>10</sup> Tirama hanona tai ha a'i nitaina, emi aka tobabai mai emi raona'au ia atanai aba tobawaira tinana ena robe haukia tobarainakia bariu abomo tubarainakia haukia a'i kereanakia. <sup>11</sup> Ai tanuatae ki'a baha wai ikoimiai aka weianai katotabura keaomo puanai taba

tobuabena hauna katoa'ina. <sup>12</sup> Wai a'i kato'aboro, 'a ekia a'ikakauma mai ekia bapahihi paukiai Tirama e'abi'uai ai tabakia tea'i maearimakia 'abakiai katoao. Ibabataina hanona nahomana.

*Kaha'ikakauma Tirama Ena Abi'uai Paunai.*

<sup>13</sup> Tirama ehore Aberahamo herenai e'abi'uai raninai hau ha Tirama a'i etara haona paunai ia kipona atanai 'abi'uai pahihina ebabaina, <sup>14</sup> etibaha, "Au oi kabanamo tohani'o, ba 'aba'abamu kababo'onakia." <sup>15</sup> Weiana Aberahamo eba'iima mai bapahihina eaomo Tirama e'abi'uai hauna ea'ina.

<sup>16</sup> Maearima ha ia etara haona hauna atanai 'abi'uai pahihina kebabaina, 'abi'uai pahihina weiana kehore ena 'abi kebatohana ekia baiara kebapuana.

<sup>17</sup> Ihobonai, Tirama enuatae kebatohana ena 'abi'uai hanona ketoha weiakia ena 'abi'uai tabakia katea'i haukia herekiai, abomo enuatae kate'ibolina ia ena raona wairai hauna a'i kebahaeaina, weiana buonai ia 'abi'uai pahihina ebabaina.

<sup>18</sup> Tirama hanona a'i kebailoi paunai weiakia rua ena 'abi'uai mai ena 'abi'uai pahihina hanona a'i kebahaeainakia, weiana aika hapihi hamai Tirama herenai hauka hanona batabura rarina 'akinai kahakori 'ini wairakai nimai tabana kahabuabena.

<sup>19</sup> Buabenai neiana ha'ina hauna hanona ihobona to'o 'abana eka mauri ai, etabura ebakori 'ininaka kebakatotonaka kupa marea robenai i'aea huri habuninai kebakabananaka keaomo erobe ki'a baha 'ekana aonai. <sup>20</sup> Aika paukai Jesu e'uai ekatoto weia robe hauna apa'uanai eao banaibana, ihobona Melkisedek robe akana ebabaina 'abana.

**7**

*Melkisedek Obia 'Arana Mai  
Robe Hauna Apa'uana.*

<sup>1</sup> Melkisedek neiana hanona Salema obia 'arana abomo 'ubi toha tohanai Tiramana ena robe hauna. Aberahamo ehuari aiara obiakia eahu 'arinakia emue aonai tebaitabu ahi, Melkisedek ehore Aberahamo ebanamona. <sup>2</sup> Aberahamo ehore huari aonai ea'inakia kohukia ikoinai harau haea harau haea aokiae ha ha Melkisedek ebena. Melkisedek atana anina hanona 'aka bero obiana 'arana', haea-mona atana Salema obiana anina hanona 'baibua obiana 'arana'. <sup>3</sup> Melkisedek hanona hamana aha'i hinana aha'i, ena itubu aha'i, aita erama aita e'ari a'i ha'iobina, ia orina aha'i, ia hanona ihobona Tiramana Nahuna 'abana, robe haunai nemiaho banaibanai.

<sup>4</sup> Melkisedek weiana katorao-nana, ia aea eapa'ua aiho! Aika 'aba'abaka Aberahamo huari ai ea'i kohukia namokia harau haea harau haea aokiae ha ha ia ebena. <sup>5</sup> Weikia Lebi itubuna haukia robe hoana tea'ina paunai, rauhubu e'abi, Aberahamo 'aba'abana Isaraela haukia ekia kohu ikoikiae harau haea harau haea aokiae ha ha uaho'abakia Lebi itubuna katebenakia. <sup>6</sup> Melkisedek hanona Lebi itubuna hauna aha'i, iamo Aberahamo herenai ena kohu ikoikiae harau haea harau haea aokiae ha ha ea'ina ba ia ehore Aberahamo weiana Tiramana ena 'abi'uai ea'ina hauna ebanamona. <sup>7</sup> Aika ha'iobina hoa apa'uana ea'ina hauna kehore hoa papana ea'ina hauna kebanamona.

<sup>8</sup> Robe haukia hanona maearima ekia kohu harau haea harau haea aokiae ha ha tea'inakia, Melkisedek abomo Aberahamo ena kohu harau haea harau haea aokiae ha ha ea'inakia, ia robe haukia hanona kate'ari, ia Melkisedek hanona nemiaho banaibanai Puka robenai e'abi ihobona. <sup>9</sup> Na hama'abi aiho, Lebi haukia maearima ekia kohu harau haea harau haea aokiae ha ha tea'inakia, ia Aberahamo ena kohu harau haea harau haea aokiae ha ha Melkisedek ebena aonai Lebi ena itubu haukia

abokiamo ekia kohu harau haea harau haea aokiae ha ha tebaiben'i 'abana. <sup>10</sup> Pokina Melkisedek Aberahamo ohi tebaitabu ahi aonai Lebi hanona a'i erama baha ia 'aba'abana Aberahamo hauaninai emiaho.

### *Iesu Ihobona Melkisedek.*

<sup>11</sup> Tirama Isaraela haukia rauhubu ebenakia Lebi itubuna haukia robe akana katebabaina. Ia Lebi itubuna robe akana tebabai haraina iamo aka weiana hanona maearima a'i teba beronakia Tiramana wairanai paunai robe hauna haeai ha kewaira tina keaka matoha Melkisedek 'abana, ia Arona 'abana aha'i. <sup>12</sup> Robe haukia kate-haeai hanona rauhubu abomo kehaeai. <sup>13</sup> Weiana robana hahuna hauna hanona itubu haeai hauna, Lebi itubuna hauna aha'i, itubu weiana aonai hanona hau ha itara robena akana a'i ebabai 'apuana. <sup>14</sup> Weiana aba ha'iobi haraina eka Obiapaka hanona Iuda itubunai erama, 'a Mose robe haukia ha itubu weianai a'i ea'i taeana.

<sup>15</sup> Taba nahauahina hauna aba ha'iobi haraina pokina robe hauna haeai ha aba ewaira tina, ia Melkisedek 'abana. <sup>16</sup> Ia robe haunai eao hanona maearima ekia rauhubu 'ao ekia taearai aha'i, ia mauri hiabuna nemiaho banaibanai haunai. <sup>17</sup> Puka robenai na e'abi aiho,

"Oi hanona robe haumuai nomiaho keaomo banaibanai, Melkisedek robe akana ebabaina 'abana."

Sal 110.4

<sup>18</sup> Weiana rauhubu 'ai'aina aba tea'i obona, pokina ia hanona e'abe'abe abomo ena aka aha'i.

<sup>19</sup> Mose ena rauhubu ai maearima a'i ebaberonakia Tiramana wairanai. Ua buonai Tiramana ehore buaben'i namona ha ebenaka weiana hanona rauhubu etara haona, weianai nahaeao Tiramana herena.

<sup>20</sup> Haeamona Tiramana mai ena 'abi'uai pahihinai Iesu robe haunai ebaona. Weikia Lebi itubuna haukia robe haukia teao hanona Tiramana ena 'abi'uai pahihinai aha'i. <sup>21</sup> Ia Iesu robe

haunai eao hanona Tirama ena 'abi'uai pahihinai. Tirama na e'abi aiho,  
“Obiapaka hanona ena 'abi'uai pahihina ebabaina ia ena 'abi a'i kebahaeaina, 'Oi hanona robe haumuai nomi-  
aho keaomo banaibanai.”

Sal 110.4

<sup>22</sup> Na homana Iesu hanona 'abi'uai apa'uana neiana ibatohana hau-  
nai eao, 'abi'uai neiana hanona 'abi'uai apa'uana 'ai'aina etara  
haona.

<sup>23</sup> Robe haukia hanona tebo'o pokina ia te'ari ekia akai a'i temi-  
aho banaibanai. <sup>24</sup> Ia Iesu hanona kemiaho banaibanai, ena robe akana hanona a'i keao hau ha her-  
ena. <sup>25</sup> Ia nemiaho banaibanai abomo aika paukai ia Tirama ni-  
noina paunai, ia atanai Tirama herena kateao haukia kebamauri orenakia.

<sup>26</sup> Iesu neiana hanona robe hauna apa'uana eka nuatae ikoikiai e'iobi. Ia hanona erobe, beho 'ao ki'a ha ia herenai aha'i, ia hanona ki'a haukia baiatakiai aha'i kupa 'ubina tohanai ekara'au. <sup>27</sup> Ia hanona robe haukia weikakia ihobokia aha'i, robe haukia ha ha hanona rani ikoikiai kipona ena ki'a ihina haona akana kebabai 'uaina murinai maearima ekia ki'a ihina haokia akakia kebabai. 'A Iesu hanona ua a'i kehoma, pokina ia kipona ena mauri ebaibenai ki'a ia'i obona tabanai eao, ia rani hamonai aka weiana maikoina ebaorena. <sup>28</sup> Mose ena rauhubu ehore maearima ea'i taeananakia robe haukiai teao, ia te'abe'abe, 'a Tirama ena 'abi'uai pahihina rauhubu murinai emai hauna ehore Tirama Nahuna ea'i taeana ia abe'oru harai robe hauna apa'uuanai eao ia hanona kemiaho banaibanai.

## 8

### *Iesu Hanona Eka Robe Hauna Apa'uana Kupai.*

\* **8:2:** (2) i'aua robena

<sup>1</sup> Au robana ahuna 'abikia pokikia hanona neiana, aika hanona robe hauna apa'uana nahomana hauna nemiaho herekai. Ia kupa 'ubinai hiabu Tirama ena imia'au itipana taina imarikiaina 'ekanai aba emiati. <sup>2</sup> Ia 'eka robena tohanai robe hauna apa'uana ena aka nibabaina, paraboa\* tohana weiana hanona Obiapaka Tirama ehore ebakorina ia maearima a'i tebakorina.

<sup>3</sup> Robe haukia apa'uakia ikoikiai tea'i taeananakia beruberu tabakia katebaibenai mai ki'a ia'iobokia tabakia katebaibenai Tirama herenai, ua buonai eka robe hauna apa'uana neiana abomo taba ha kebaibenai. <sup>4</sup> Iesu hanopakai pemiaho raninai robe haunai a'i peao, pokina robe haukia temiaho ia tehore beruberu tabakia tebaibenai Mose ena rauhubu ihobonai. <sup>5</sup> Robe haukia ekia aka hanona kupa ai tibabaina akana ihobo ihobona mai aubaubana 'abana, aka weiana hanona ihobona Tirama Mose ehinabe pahihina paraboa robena ebakorina 'abana etibaha, “Ko'ima haraina taba ikoikiai kobabai oeo ai abaihani'o tabakia ihaihakia ihobo ihobokia.” <sup>6</sup> Ia bariu Iesu robe akana ea'ina hanona robe haukia ekia aka etara haonakia, pokina ia 'abi'uai apa'uana weianai bairarao haunai eao, 'abi'uai apa'uana neiana hanona ma enamo ba 'abi'uai apa'uana 'ai'aina, pokina weiana hanona 'abi'uai namokia 'akikia ahakiai ebakorina.

### *'Abi'uai Apa'uana Mahamahana Hanona A'i'aina Etara Haona.*

<sup>7</sup> 'Abi'uai apa'uana kori'uaina maikoinai enamo raninai, ibaruna a'i pahanuatae aina. <sup>8</sup> Ia Tirama ena maearima herekiai beho eihana buonai ehinanakia etibaha, “Au, Obiapaka Tirama, na'abi, Beraura aba nimai 'abi'uai apa'uana mahamahana kababaina

Isaraela haukia herekiae  
abomo Iuda itubuna aonai.  
<sup>9</sup> Au, Obiapaka Tirama, na'abi,  
'Abi'uai apa'uana neiana  
hanona 'aba'abakia imakiae  
a'ina Aikupito hanonai  
abakarahnakia raninai  
a'abi'uai hauna 'abana aha'i.  
Ia e'u 'abi'uai apa'uana  
a'i teka'aina buonai  
au abomo aiakia a'i aona."  
<sup>10</sup> Au, Obiapaka Tirama,  
haeamona na'abi,  
Wei ana murinai 'abi'uai apa'uana  
ha kababaina Isaraela haukia  
herekiae hanona neiana.  
Au e'u rauhubu ia aokiae  
kahorotina mai ahekiae karerena.  
Au hanona ekia Tirama ai kaeao,  
ia hanona au e'u maearima ai  
kateao.  
<sup>11</sup> Hau ha uaho'abana 'ao  
herenai hauna a'i kehina bena  
'Obiapaka ko'ibina'.  
Pokina ikoikiae hanona  
aba kate'ibina'u  
papana 'akiae eaomo  
apa'uanai epua.  
<sup>12</sup> Ekia beho akakia aokiae  
kaoko'o ainakiae  
abomo ekia ki'a  
a'i karaona 'ininkakia.'

Ier 31.31-34

<sup>13</sup> Tirama 'abi'uai apa'uana  
mahamahana e'uhina raninai  
wei ana kori'uaina hanona aba  
'ai'ainai ebaona, ba taba ni'ai'ai  
mai nimara hauna hanona aba  
ke'akauma.

## 9

### 'Abi'uai Apa'uana 'Ai'aina.

<sup>1</sup> 'Abi'uai apa'uana kori'uaina  
hanona mai ena kuti rauhubukia  
mai kuti 'ekana, 'eka wei ana  
hanona maearima imakiae  
tebabaina. <sup>2</sup> Paraboa tebakorina  
ba tekaihurina ikaihuri rua,  
atapaka tainai ikaihuri atana  
teparina Robe 'ekana. Robe  
'ekana aonai hanona ramepa  
horoti 'ekana ha mai itara  
papana ha, ahanai baiben  
parawana tehorotina Tirama  
'euna. <sup>3</sup> I'aeahuri habunina ibaru  
ana aona tainai hanona teparina

Erobe ki'a baha 'ekana. <sup>4</sup> Wei ana  
aonai hanona itara robena ha  
tebabaina gold ai tebahu abuna  
ahanai nabunabu timina namona  
tekinena, abomo 'abi'uai apa'uana  
mauana ha hauna maikoinai  
gold ai tebahu abuna, maua  
aonai hanona gold urona ha  
aonai mana teutana hauna mai  
Arona ena ika'iini weiana 'uainai  
ebubuhi rauna tekarahi hauna  
mai pihara panabakia rua ahakiae  
rauhubu tererenakia haukiae.  
<sup>5</sup> Maua ikaibuna ubinai hanona  
teparina Ki'a ihina haona 'ekana,  
Tirama ena nuabi aneru 'abakiae  
ibabataikia rua atakiae Kerubi,  
banikiae 'eka wei ana tehao abuna.  
Bariu hanona taba neiakiae ikoikiae  
a'i kahinahina harainakiae.

<sup>6</sup> Taba weiakiae ua teba'oru  
aihonakiae, wei ana robe haukiae  
hanona rani ikoikiae ikaihuri  
kori'uaina aonai tekatoto ekiae  
aka tebabaina. <sup>7</sup> Ia ikaihuri  
ibaruana hanona robe hauna  
apa'uana ikupaiana mo ihau ha  
aonai rani hamona ekatoto, imana  
'abaaeana a'i ekatoto, ia aruaru  
ea'ina etoto aina ia kipona ena  
ki'a paunai abomo maearima ekiae  
ki'a a'i te'ibina aonai tebabaina  
haukiae paukiae. <sup>8</sup> Taba weiakiae  
Auba Robe aba eba'obi harainakiae,  
robe 'ekana kori'uaina ekoroti  
nemiahia aonai taeara keao erobe  
ki'a baha 'ekana hanona a'i  
nikaihuri bahana. <sup>9</sup> Neikiae  
hanona ibabatai 'abakiae bariu  
rani neiana 'euna. Taeara wei ana  
beruberu tabakiae mai ki'a ihina  
hao tabakiae tibaibeni Tirama  
'euna, iamo weiakiae kuti haukiae  
aokiae tohana a'i katebabero toha  
tohana. <sup>10</sup> Weiakiae hanona aniani  
tabakiae inuinu tabakiae mai 'ure  
hoahoakiae, hauani ena rauhubu  
'abaaekiae, ia kateakiae keaomo  
Tirama taeara kebamahamahia  
muenakiae raninai.

### 'Abi'uai Apa'uana Mahamahana.

<sup>11</sup> Ia bariu Keriso aba emai  
terama tabakiae namokiae ekiae robe  
hauna apa'uanai eao, paraboa  
wei ana eapa'ua mai e'oru harai  
hauna aonai ekatoto, wei ana

hanona maearima imakiai a'i tebabaina abomo hanopaka 'euna aha'i.<sup>12</sup> Keriso paraboa aonai ekatoto raninai, nani 'ao poromakau nahukia aruarukia a'i ea'i ia kipona ena mauri ebaibeniarunai ekatoto, rani hamonai mo erobe ki'a baha 'ekana aonai ekatoto, weianai bamauri banaibananakana ebaorena aika paukai.<sup>13</sup> Maearima te'opu Tirama wairanai raninai, nani poromakau aruarukia mai poromakau irubai teba'ara obonakia rabukia haukiai tekapo otarainakia, ba haukia temahamaha terobe Tirama wairanai.<sup>14</sup> Weiana hanona 'abi tohana iamo Keriso aruaruna hanona weiakia etara haonakia. Keriso hanona ena ki'a 'ao ena beho ha aha'i, ia miao banaibananakia Auba Robena ena baraibarai ai kipona ena mauri baibenai tabanai ebaona Tirama ebena. Keriso aruaruna weiana hanona aoka tohana kebamaha mahana, weiakia anikia aha'i hoakia herekiai kaha kapare kahaeao mauri Tiramana ena aka kahababaina.

*Keriso Aruarunai 'Abi'uai Apa'uana Mahamahana Ebathana.*

<sup>15</sup> Ua buonai Keriso hanona bairarao haunai eao 'abi'uai apa'uana mahamahana kebataburana. Ia maearima ekia ki'a weiakia 'abi'uai apa'uana 'a'ainai temiaho aonai tebabainakia haukiai kerubunakia paunai e'ari, ba Tirama eaparinakia haukia hanona banamo banaibananai Tirama e'abi'uai aina hauna katea'ina.

<sup>16</sup> Ke'ari hauna ena nuatae 'abi'uaina hanona a'i keaka keaomo ena 'ari katebaothana murinai nuatae 'abi'uaina weiana hanona keaka.<sup>17</sup> 'Ari hauna ena nuatae 'abi'uaina hanona e'abi'uai hauna ke'ari ba 'abi'uai hiabuna keaka, ia a'i e'ari nemiaho oho aonai 'abi'uai weiana hanona hiabuna aha'i.<sup>18</sup> Weiana buonai 'abi'uai apa'uana kori'uaina abomo 'ari aruarunai 'abi'uai hiabuna eaka.

<sup>19</sup> Kori'uaina Mose ehore rauhubu 'abina ena maearima ikoikiai eba'ibinakia, weiana murinai poromakau nahukia aruarukia nani aruarukia mai bei kipokia ea'i haeamona, mamoe buirana birona mai wapaea rauna kipokia ea'inakia ekaihuna, rauhubu pukana mai maearima ikoinai ahakiai ekapo otaraina.<sup>20</sup> Ba e'abi etibaha, "Neiana hanona 'abi'uai apa'uana aruaruna, Tirama ehina benimi katoa'i taeana."<sup>21</sup> Taeara ihobonai Mose aruaruai paraboa robena ahanai ekapo otaraina mai robe akana tibabai tabakia ikoikiai abomo ahakiai ekapo otarainakia.<sup>22</sup> Mose ena rauhubu eba'ibinaka taba bo'okia hanona aruaru kehore kebamaha mahanakia, ia aruaru a'i kekiki oioi raninai ki'a ihina haona keaha'i.

<sup>23</sup> Paraboa aona tabakia neiakia kupa tabakia ibabataikia hanona taeara uahomanai patebamaha mahanakia, ia kupa tabakia tohakia hanona baibeni namona 'akinai katebamaha mahanakia.<sup>24</sup> Keriso hanona 'eka robena maearima imakiai tebabaina hauna aonai a'i ekatoto, 'eka weiana hanona 'eka robena tohana ibabataina, 'a ia hanona kebarainaka paunai 'eka robena tohana kupa 'ubinai hauna aonai ekatoto eao Tirama wairanai.

<sup>25</sup> Robe haukia apa'uakia hanona ihau ha ha aokiae mahi aruarukia tea'i erobe ki'a baha 'ekanai tekatoto. Ia Keriso hanona rani bo'ona ua a'i kehoma.<sup>26</sup> Ua pehoma raninai, hanopaka ea'i ramana raninai emai mo bariu Keriso hanona rani bo'ona pehau haiara. Ia Keriso rani hamona mo ewaira tina rani neiakia puakiai, kipona baibeni tabanai eao ki'a ia'ibona.<sup>27</sup> Maearima ha ha hanona rani hamonai kate'ari, murinai Tirama kebabakainakia.<sup>28</sup> Taeara ihobonai Keriso hanona rani hamona mo baibeni tabanai eao mako ekia ki'a ia'i obokia. Ia haeamona kewaira tina mue hanona te'imana haukia kebamaurinakia paunai, ia ki'a ia'i

obokia paunai aha'i.

## 10

### *Keriso Hauanina Rani Hamona Ikoinai Paunai Ebaiben'i.*

1 Mose ena rauhubu hanona taba namona wairai kemai hauna aubaubana, taba tohana aha'i. Rauhubu taearanai maearima ekia ki'a ia'i obokia tabakia ihau ha ha ihobokia tebaiben'i, iamo weiakia hanona Tirama herenai katekuti haukia a'i katebabero harainakia.<sup>2</sup> Baiben'i neiana pehore Tirama tekuti aina haukia ekia ki'a rani hamonai pebamaha mahanakia raninai, ia kipokia pate'io bina ekia ki'a aba teore, weiana ki'a ia'i obokia tabakia a'i patebaiben'i mue.<sup>3</sup> Ia ki'a ia'i obokia tabakia weiakia tebaiben'i hanona ekia ki'a tebaraona muenakia ihau ha ha aokiai.<sup>4</sup> Pokina poromakau mai nani aruarukia hanona ki'a a'i katea'i obo 'apuanakia.

5 Ua buonai Keriso hanopakai emai aonai ia Tirama ehina bena etibaha,

"Rauhubu ena barobe tabakia abomo baiben'i tabakia a'i onuatae ainakia.

'A hauani ha oba'oruna au eu'u.

6 Oi baiben'i tabakia irubai teba'aranakia haukia mai ki'a ia'i obokia tabakia a'i oaonamo ainakia.

7 Ba au a'abi atibaha,

"Tirama e, Au neia'u, aba amai, rauhubu pukanai pou'u tererena ihobonai

oi emu nuatae akana kababaina,"

Sal 40.6-8

8 Keriso kori'uainai e'abi etibaha, "Barobe tabakia, beruberu tabakia, baiben'i tabakia irubai tiba'aranakia haukia, mai ki'a ia'i obokia tabakia oi a'i onuatae ainakia, a'i oaonamo ainakia." (Weiakia hanona Mose ena rauhubu ena nuatae paunai tebaiben'i.)<sup>9</sup> Murinai e'abi etibaha, "Tirama e, Au neia'u, aba amai, oi emu nuatae akana kababaina." Ia hanona barobe

taearana kori'uaina ea'i parena ia ibaruana ebakorina.<sup>10</sup> Iesu Keriso ehore Tirama ena nuatae akana ebabaina, ia kipona hauanina rani hamonai ikoinai paunai ebena baiben'i tabanai eao, weianai eka ki'a ai aba hamahamaha.

11 Robe haukia ikoikiai beraura ikoikiai ekia robe akakia tibabai, barobe tabakia hamokiamo tibaiben'i hao baiben'i hao, ia barobe tabakia weiakia hanona ki'a a'i katea'i obo 'apuanakia.

12 Ia Keriso ehore rani hamonai baiben'i tabanai eao ki'a ia'i obokia paunai, baiben'i weiana hanona niaka keaomo banaibana. Ba ia Tirama itipana taina imarikiaina 'ekanai aba emiasi.<sup>13</sup> Weia ia nibai'ima keaomo Tirama kehore ti'oatana haukia kemaainakia Keriso 'apuna ba'anai.<sup>14</sup> Ia baiben'i tabana hamonai weiakia ekia ki'ai ebamaha mahanakia haukia ebabero harainakia keaomo banaibana.

15 Auba Robe abomo aba kipona pou neiana ehinabe ainaka. Kori'uaina e'abi etibaha,

16 "Obiapaka hanona ni'abi,

Rani weiana murinai

Au e'u 'abi'uai apa'uana

herekiai kababaina hanona

neiana.

E'u rauhubu ia aokiai kahorotina mai ia 'akokiai karerena."

Ier 31.33

17 Haeamona e'abi etibaha,

"Au ekia ki'a mai ekia beho

a'i karaona 'ini 'apuanakia."

Ier 31.34

18 Ia ki'a mai beho weiakia aba ehina haonakia paunai ki'a ia'i obokia tabakia katebaiben'i hanona ena pok'i aba aha'i.

*Aika Kaha'ikakauma Tohana  
Tirama Herenai Kahaeao.*

19 Uaho'aba'u e, ua buonai aika Iesu e'ari aruarunai tabura kaha'ina eroibe ki'a baha 'ekana aonai kahakatoto.<sup>20</sup> Iesu hauanina e'ari hanona i'eahuri habunina\* etapanava ba taeara mahamahana mai mauri ekaikauna aika paukai.

<sup>21</sup> Aika hanona

\* 10:20: (20) marea robe aonai

mai eka robe hauna apa'uana Tirama ena maearima neiha 'ininakia. <sup>22</sup> Aokai ia aruaruna ekapo otaraina paunai aoka tohanai ki'a weiana aba ea'i obona, huanika abomo bei iroronai aba eutu harainakia, ua buonai bariu aika kahaka'a haha Tirama herena kahaeao mai aoka tohanai abomo mai a'ikakaumaka a'i kababaoao baoao. <sup>23</sup> E'abi'uai Tiramana hanona ena 'abi'uai kebatohana paunai, aika eka buabenai ha'uhina hauna kaha'i 'inina. <sup>24</sup> 'Abaka kipokia kaharaona raona haeamo, ha ha kahaba taburanaka, eka raona'au kahaba ihanakia, mai namo akakia kahababai. <sup>25</sup> Baika marea to'una akakia tibaoaoai haukia ekia hoahoai a'i kahaeao, iamo 'abaka kahaba taburanakia to'u akana kahabapa'uana Obiapaka ena rani kemai hereka hauna nahaihana aonai.

### *Tirama Nahuna A'i Kahakamuri aina.*

<sup>26</sup> Tomobahu. Aika Keriso pouna aba ha'iobi tohana murinai eka nuatae ai ki'a kahababai to'ona raninai, ki'a weiakia ia'i obokia baibeni tabakia haeai ha a'i nemiaho. <sup>27</sup> A taba muriae kerama kahata'u aina hauna hanona bakai apa'uana mai iruba ki'a obona Tirama ti'oatana haukia keba pururunakia. <sup>28</sup> Ha'lobina hau ha Mose ena rauhubu ekabena a'i ea'i taeana raninai ihina pouna haukia rua 'ao aihau tebatohana ba hau weiana beho haunai eao teahu 'arina a'i teaoko'o aina. <sup>29</sup> Hau ha nihore Tirama Nahuna a'i nimiriki aina, ia nihore 'abi'uai apa'uana aruaruna ia ebarobena hauna taba 'abaeanai nibaona, mai Tirama ena aoko'o hoana ni-maiainaka Auba Robena herenai ni'abi ki'aina hauna, hau weiana kaharaonana ena puma kehoaina hanona aea keapa'ua aiho! <sup>30</sup> Aika ha'lobina Tirama hanona na e'abi aiho etibaha, "Ara hore hanona e'u aka, au kahore arana kabamuena." Haeamona etibaha, "Obiapaka kehore ena maearima

kebabakainakia." <sup>31</sup> Weiana kaha'eho mauri Tiramana imana aonai kahaenouta hanona taba ki'a obona tohana!

<sup>32</sup> Rani 'uaina aea tohoma hauna katoraona muena. Tirama ena ea totabu ahina murinai haiara bo'ona toa'i ia wai hanona tobatabura. <sup>33</sup> Rani baika maearima wairakiai tebapo'onimi mai te'oatanimi, abomo rani baika haiara uahomakia tea'i haukia tobarainakia. <sup>34</sup> Wapura itunai tekaiabunakia haukia tobarainakia, abomo baika tehore emi kepu tea'i 'akaumanakia raninai tobapahihi mai aonamomi, pokina to'lobina emi kepu namokia 'akikia hanona katemiaho banaibana.

<sup>35</sup> Ua buonai emi raona taburana a'i katohabona. Pokina weianai 'arana apa'uana katoa'ina. <sup>36</sup> Wai hanona katobapahihi pokina Tirama ena nuatae akana katobabaina murinai taba e'abi'uai aina hauna katoa'ina.

<sup>37</sup> Puka robenai Keriso robana eahuna etibaha, "Rani papana mo ia a'i kehoma'a, ia hanona kemai, ia a'i kemahari. <sup>38</sup> E'u aka bero hauna hanona mai a'ikakaumana kemaauri. Ia kekamuri aina'u raninai au ia a'i kaonamo aina."

Hab 2.3, 4

<sup>39</sup> Aika hanona weiakia tikamuri mai ti'akauma haukia 'abakia aha'i, aika hanona mai a'ikakaumaka bamaauri kaha'ina.

## 11

### *A'ikakauma Hanona Taba?*

<sup>1</sup> Eka a'ikakauma nihore nahabuabenai tabakia nimaiainakia taba tohakiai tiao, a'i nahaiha tabakia taba tohakiai nibaonakia. <sup>2</sup> 'Uaina maearimakia abomo a'ikakauma neiana paunai Tirama ehore ebatohanakia.

<sup>3</sup> A'ikakaumai aika ha'lobina kupa mai hanopaka tabakia ikoikiai hanona Tirama ena 'abiai terama, weiana ha'lobina nahaihakia tabakia hanona taba a'i nahaihakia haukia herekiai temai terama.

*Abela, Enoka, Mai Noa Ekia A'ikakauma.*

<sup>4</sup> A'ikakaumai Abela hanona baibeni tabana namona Tirama ebena Kaino ena baibeni tabana etara haona, weiana ena a'ikakauma paunai Tirama ehore Abela ena baibeni tabana ea'i taeana abomo aka bero hau-nai ebaona. Ia e'ari, 'a ena a'ikakaumai ia hanona bariu ni'abi ohomo.

<sup>5</sup> A'ikakaumai Enoka hanopakai ea'i taeana 'ari a'i e'io-bina Tirama herena eao, ua buonai hau ha ia a'i tetabu ahina. Tirama ehore ea'i obona. Puka robenai ebatohana e'abi ia a'i ea'i taea bahana aonai ia hanona Tirama aona ebanamona. <sup>6</sup> Ia ena a'ikakauma aha'i hauna hanona Tirama aona ibanamona a'i e'io-bina. Tirama herena kateao haukia hanona katea'ikakauma tohana Tirama hanona nimauri abomo titabuna haukia arakia namokia kebenakia.

<sup>7</sup> A'ikakaumai Noa hanona Tirama taba wairai kerama hauna eba'ikakaumana aonai ia a'i eiha tabakia Tirama aiana ea'i taeana mai marikina aunohi ha ebabaina ba ena itu haukia ibamaurikiai keao tou aonai. A'ikakauma weianai ia bero haunai eao Tirama wairanai ba hanopaka haukia puma rarina tehoaina.

*Aberahamo Mai Sara Ekia A'ikakauma.*

<sup>8</sup> Aberahamo hanona Tirama ea'ikakaumana. Ia eaparina raninai aiana ea'i taeana ekaobo ena hano ehabona. Tirama e'abi'uai hano ha kebena, ia aeana keao hanona a'i e'io-bina aonai ena hano tohana ehabona. <sup>9</sup> A'ikakaumai Aberahamo eao 'abi'uai hanona, weia aiara haaeai haunai eao, ia Isako mai Iakobo kipokia paraboa aokiae temiaho, ia terarua abomo 'abi'uai hamona tea'ina Tirama herenai. <sup>10</sup> Pokina Aberahamo hanona eba'iima Tirama kehore aiara weiana kebakorina keba'ini haraina miabanai aiaranai keao.

<sup>11</sup> Aberahamo atawana Sara ohi aba tekiro ki'a baha miori a'i patebaramana, ia a'ikakaumai hanona Aberahamo

hama ai eao pokina ia Tirama ea'ikakaumana ena 'abi'uai kebatohana. <sup>12</sup> Aberahamo hanona eanepaka ki'a ihobona aba e'ari 'abana, hau anepakana hamona neianai itubu rarina 'akina ebarama ihobona kupa bihiukia 'abana 'ao poe 'anona 'abana kahatuabina hanona a'i kahatuabi orena.

<sup>13</sup> Maearima neiakia ikoikiai ekia a'ikakaumai temiaho iamo Tirama ena 'abi'uai tabakia a'i tea'i banakia aonai te'ari, ia wairai katerama tabakia te'io-bina-kia haukia teaonamo ainakia, ba murinai ia kipokia tehina pounakia ia hanona baki mai aiara haaeai haukia hanopaka neiana ahana. <sup>14</sup> Maearima ua ti'abi aiho hanona aika ha'io-bina ia hanona ekia hano tohana titabuna. <sup>15</sup> Ia hano weiana 'uaina tehabona hauna pateraonana raninai patemue abomo petaina. Ia ua a'i tehomia. <sup>16</sup> Aiara ia te'imana hauna hanona aiara namona 'akina kupa aiarana. Weiana Tirama hanona a'i nihaumaea kateaparina ekia Tirama, pokina ia aiara ha aba eba'oruna ia 'eukia.

<sup>17</sup> Tirama Aberahamo ehabona aonai Aberahamo a'ikakaumai nahuna Isako barobe tabanai ebaona. Tirama Aberahamo herenai e'abi'uai 'aba'abana katebo'o, iamo Aberahamo nahuna hamo hamona barobe tabanai ebaona ebena. <sup>18</sup> Tirama Aberahamo ehina bena etibaha, "Isako haunai oi itubumu a'abi'uai ainakia haukia katerama." <sup>19</sup> Aberahamo ea'ikakauma Tirama hanona mai hiabuna maearima 'ari ai kebamikiri muena. Weiana hamatibaha Aberahamo hanona nahuna Isako 'ariai ea'i muena 'abana.

*Isako, Iakobo, Mai Iosepa Ekia A'ikakauma.*

<sup>20</sup> A'ikakaumai Isako ehore Iakobo mai Esau 'abi'uai banamona ebenakia wairai katerama tabakia abomo ehina pounakia.

<sup>21</sup> A'ikakaumai Iakobo ena 'ari aba eherekai 'aki aonai ia Iosepa nahuna ha ha ebanamonakia

abomo ena ikai'ini ai ehara 'au Tirama ekuti aina.

<sup>22</sup> A'ikakaumai Iosepa ena mauri aba kepua aonai Isaraela itubuna Aikupitoai katekarahi hauna pouna ehinana abomo ehina benakia huriana Kanana hanonai katehorena.

### *Mose Ena A'ikakauma.*

<sup>23</sup> A'ikakaumai Mose hamana hinana ia erama murinai tehore bunina nawa aihau pokina teihana ia hanona miori namona, ba Aikupito Obia 'arana a'i tetu'u aina ena rauhubu a'i tea'i taeana.

<sup>24</sup> A'ikakaumai Mose eapa'ua aonai a'i enuatae ia hanona Aikupito obia 'arana nahuna babi'ena nahunai a'i keao. <sup>25</sup> Ia hanona enuatae Tirama ena maearima kipokia katehau haiara haeamo, ia a'i enuatae rani papana ki'a akakia a'i keaonamo ainakia. <sup>26</sup> Mose eraonana kehau haiara Tirama etina'ana hauna paunai hanona enamo ki'a baha ba Aikupito kepukia bo'ona a'i kea'inakia, pokina 'ara namona wairai hauna eraonana.

<sup>27</sup> A'ikakaumai Mose hanona Aikupito ehabona obia 'arana ena opuere a'i eta'u aina. Ia ebapahihi to'ona a'i nahaihana Tiramana aba eihana 'abana. <sup>28</sup> A'ikakaumai Mose ehore Kabanai tatuna eba'oruna, ehina benakia aruaru ai pa'abi akokia tetaronakia, ahuahu aneruna Isaraela nahukia hobohobo miorikia pakakia a'i meahu 'arinakia marikina.

### *Isaraela Haukia Bo'ona Tirama Tea'ikakaumana.*

<sup>29</sup> A'ikakaumai Isaraela haukia hanona 'Aku birona tekabani hano 'ororonai tekabani 'abana, ia Aikupito haukia tebahobona katekabani aonai ikoikiai 'akuai tetono 'ari.

<sup>30</sup> A'ikakaumai Isaraela haukia Ieriko aiara parabuna apa'uana tekakaiaronia wapu 'abaihau hamomo hanona epobu.

<sup>31</sup> A'ikakaumai Rahaba maha porepore babi'ena hanona Isaraela ekia ihaihapai haukia rua ebarai harainakia. Ia Tirama a'i tea'i taeana haukia\* te'ari aonai Rahaba hanona emauri.

<sup>32</sup> Ba bita karobahu ainakia? Gideon, Barak, Samson, Idfeta, Davida, Samuela mai mahabanai haukia poukia kakikipanakia ranina hanona aba aha'i. <sup>33</sup> Ia ekia a'ikakaumai tehuari hanopaka bo'ona tea'i ki'anakia, bero akakia tebabai, Tirama ena 'abi'uai tabakia tea'i, ia tehore laiona pinakia tekaibunakia, <sup>34</sup> iruba apa'uakia teba'aonakia, kareba mahanai terobo mauri. Te'abe'abe ia haeamona tetabura mue, huari ai tetabura ki'a atau'a haukia to'una teu'unakia. <sup>35</sup> Babi'e baika hanona hatia'akia te'ari haukia temikiri mue tetabu ahinakia, baika teba wapurankia irubukia a'i tenuatae pokina kateahu 'arinakia aonai mikiri mue namona akinai katemauri paunai.

<sup>36</sup> Baika hanona tebatae ainakia te'atinakia, tebirinakia wapura itunai tekaibunakia. <sup>37</sup> Pihara ai teahu 'arinakia, teiri boanakia rua, kareba ai tehara 'arinakia. Mamoe mai nani paruakia tehainakia tekaoao, teuraru, te'oatanakia, mai tea'i ki'anakia.

<sup>38</sup> Hanopaka hanona ena namo ha aha'i ia herekiai. Ia hanona hano aha'i haukia 'abanai tekaoao, hano'akunai, oeo ai, pihara 'ererekiai mai 'uriai temiaho.

<sup>39</sup> Nejakia ikoikiai hanona mai ekia a'ikakauma Tirama ehore ebatohanakia, iamo Tirama e'abi'uai anikia hanona a'i tea'i. <sup>40</sup> Pokina Tirama hanona ena raona namona 'akina eba'oruna aika 'euka. Ena nuatae hanona uainai tea'ikakauma maearimakia mai aika kipokia maearima aba te'oru haukai kahaeao haeamo.

## 12

*Iesu Kahaihana Mai Kaha'ikakauma.*

\* <sup>11:31:</sup> (31) 'ao a'i tea'ikakauma haukia.

<sup>1</sup> Weiakia a'ikakauma maurinai temiaho haukia bo'okia hanona baiaruru haukia 'abakiai tekori kakaiaronaka paunai, aika taba weiakia tibapumanaka mai ki'a weiakia tia'i 'ininaka haukia ikoikiai hama'i obonakia, ba mauri beauna wairakai nimai haunai hamabeau mai bapahihi-hika. <sup>2</sup> Aika mahaka hanona Iesu mo kahaihana, ia ehore aika eka a'ikakauma ebaramana popounai keaomo puawai, ia hanona wairai nemiaho aonamona paunai eba-pahihi a'i ehaumaea matiu ibiri ropo haiarana ehoaina ubinai e'ari, ba ia bariu hanona weia Tirama ena imia'au itipana taina imarikiaina 'ekanai aba emiati.

### *Tirama Puma Kebenaka Hanona Kahabero.*

<sup>3</sup> Wai ia katoraona haraina, ia aka ki'a haukia te'oatana aonai ebapahihi benakia, ba wai kipomi aomi a'i tomone'e 'abaeana a'i tomohau hororo ta'uua. <sup>4</sup> Wai hanona ki'a kipokia tohuari, iamo a'i to'au tabura a'i teahu 'arinimi. <sup>5</sup> Tirama ehore nahunai ebaonimi aomi ebataburankia 'abina aba toteana, 'u? Etibaha, "Naha'u e, Obiapaka nirobenimi hanona aiana katobahuaina, haeamona nerikenimi hanona aomi a'i katone'e 'abaeana.

<sup>6</sup> Pokina Obiapaka niraona'au ainakia haukia nirobenakia, abomo nahunai nibaonakia haukia ni'atinakia."

Her 3.11, 12

<sup>7</sup> Emi hauhaiara katobapahihi aina, weiana hanona hamami ena bairobe. Pokina Tirama nihore nahunai nibaonimi. Hama tabana nahuna a'i nirobena?

<sup>8</sup> Maearima ikoikiai nahukia tirobenakia. Wai a'i kerobenimi raninai wai hanona tubu miorimi nahuna tohami aha'i. <sup>9</sup> Aika ikoikai mai hamaka hanopaka neiana ahnai tirobenaka ba aiakia na ha'i taeanakia. Aika hanona mai Hamaka kupai hauna aiana kahaka'ai harai hanona kahamauri. <sup>10</sup> Aika hamaka hanopakai neia haukia ekia

bero ai rani papana tirobenaka, ia Tirama nirobenaka hanona aika eka namo paunai, ba ia kipokia ena robe maurina aonai kahamiaho haeamo. <sup>11</sup> Hama nahu tirobenakia raninai mai haiarakia ia aonamona aha'i, ia muriai weiakia tehaiara tepuma hoai haukia hanona baibuua buabuana namona katea'ina aka bero haukiai kateao.

<sup>12</sup> Weiana buonai imami timahe haumi tomoa'i taea mai aemi ti'abe'abe haumi tomobapahihi to-momikiri. <sup>13</sup> Taeara berokiai katoka'a, weiana aekia teki'a haukia taeara weianai aekia katenamo.

<sup>14</sup> Wai tomobahobo maearima kipokia mai baibuami katomiaho mai robemi katomiaho, pokina a'i kerobe hauna hanona Obiapaka a'i keihana. <sup>15</sup> Ha ha kato'ima harainimi, hau ha Tirama ena aoko'o hoanai a'i mekapu marikina, 'ao baiatamiai hau ha ramu mabina 'abana a'i me'omu 'au mako a'i mebaro'arinimi mai a'i meba'opunimi marikina.

<sup>16</sup> Kato'ima harainimi, baiatamiai hau ha a'i kenabau, 'ao auba akana a'i timariki aina haukiai a'i temeo marikina ihobona Esau 'abana, ia hanona aniani 'ororo hamona paunai ena rama'uai hoana banamona maikoinali eba'akaumana. <sup>17</sup> Aba to'iorina, muriai Esau hanona hamana herenai ena rama'uai hoana banamona ia'ina enuatae enoi mai haihaina, iamo hamana ekamuri aina, ia Esau hanona ena rama'uai hoana banamona kea'i muena taearana ha a'i etabu ahina.

### *Aika Aba Hakara'au Kupa Jerusalemana.*

<sup>18</sup> Wai tomai 'ekana hanona 'uainai Isaraela haukia teao Sinai oeona 'abana aha'i. Sinai oeona hanona imakai kaha'i 'apuana ketaina, iruba ni'ara, 'auhao 'umuna mai wapura ekaabuna, abomo kou eabu, <sup>19</sup> pih i 'uruna mai aia rarina teona. Ba maearima weiakia aia teona haukia Mose tenoina Tirama ia herekiai 'abi ha a'i kehina muena. <sup>20</sup> Pokina

maearima weiakia Tirama e'abi benakia hauna tetauai ki'a bahana, ia e'abi etibaha, "Maearima ha keao oeo neiana imanai kea'i 'apuana hanona piharai kateahu 'arina, mahi ha re'a uamo katehomana." <sup>21</sup> Mahakia eao hoa rarikia teihanakia tetau'u ki'a, Mose abomo e'ururu 'ururu e'abi etibaha, "Nata'u ki'a baha."

<sup>22</sup> Ia wai tomai 'eka neiana hanona Siona oeona, mauri Tirama ena aiara, kupa Ierusalemana. 'Eka weiana aonai aneru to'una rarina 'akina mai aonamokia temiaho. <sup>23</sup> Wai tomai nahu pakakia 'abanai katoao atami kupai terere haukia ekia aonamo to'u apa'uana herena, maearima ikoikiai ibabakaikia hauna Tiramana herena, mai aka bero haukia weiakia aubakia aba tebero harai haukia herekia. <sup>24</sup> Wai tomai Iesu 'abi'uai apa'uana mahamahana ebairarao aina hauna herena, mai ia aruaruna ki'a ia'i obokia hauna herena, aruaru ikapo otarai hauna weiana hanona Abela aruaruna 'ara hore enuatae aina hauna etara haona.

### *Kaha'ima 'ima Harainaka.*

<sup>25</sup> Kato'ima harainimi, nehina benimi hauna aiana a'i kato baoaoaina. Weiakia hanopakai Tirama ena 'abi ebena hauna Mose tebaoaoaina haukia hanona puma tehoaina. Aika kupai nirobenaka hauna kahabaki'ana raninai puma kemai hauna herenai aea kahakapare aiho? <sup>26</sup> Rani weianai ia aiana ehore hanopaka ebaibiuna, ba bariu hanona e'abi'uai etibaha, "Au hanopaka haeamona kabaibiuna, hanopaka mo aha'i, ia kupa abomo." <sup>27</sup> 'Abi neiana "haeamona" anina hanona weiakia terama tabakia kateibiu haukia ikoikiai kea'i parenakia, ia taba baika a'i kateibiu haukia hanona 'ekakiai katemiaho.

<sup>28</sup> Tirama niobia aina aiarana a'i neibiu hauna ebenaka kipokia kahaobia aina paunai banamo apa'uana Tirama kahabena, hakutti aina mai marikika abomo

mai ta'uka ia kahabanamona. <sup>29</sup> Pokina aika eka Tirama hanona iruba apa'uana tohana 'abana taba ikoikiai niba'aranakia.

## 13

### *'Abaka Ha Ha Kaharaona'auai To'onaka.*

<sup>1</sup> Wai ha ha kipomi katoraona'auai to'o baihanimi uaho'aba hamona 'abana Keriso aonai. <sup>2</sup> A'i katoreana, baki haukia hanona katoa'i taeanakia emi ituai, pokina baika tehore ekia ituai baki haukia tea'i taeanakia aonai aneru tea'i taeanakia, ia kipokia hanona a'i te'iobina.

<sup>3</sup> Wapura itukiai tekaiabunakia haukia katoraonanakia, ihobona wai abomimo ia kipokia patekaiabunimi 'abana. Maearima tihere tiba haiaranakia haukia abomo kato raonanakia, ihobona wai abomimo tuhaiara 'abana.

<sup>4</sup> Maearima ikoikiai hawainibe katemariki aina hanona kenamo. Hau mai babi'e atawami kipokia emi hawainibe hoana kato'ima haraina hanona kenamo, pokina Tirama kehore maha porepore maearimakia abomo hawainibe aonai tinabau ki'a maearimakia hanona kebabakainakia.

<sup>5</sup> Moni a'i katonuatae ai ki'a bahana ia taba heremai temiaho haukia mo katoa'i aomi kenamo, pokina Tirama e'abi etibaha, "Au hanona a'i kahabonimi abomo a'i kareanimi, aha'i 'akina."

Deu 31.6

<sup>6</sup> Ua buonai mai taburaka kaha'abi kahatibaha,  
"Obiapaka hanona au ibrai'u hauna, au a'i kata'u.  
Maearima taba katebabaina au here'uai?"

Sal 118.6

<sup>7</sup> 'Uainai te'uai ainimi Tirama ena 'abi teba'obi ainimi haukia kato raonanakia. Ekia mauri katoraonana aea temiaho aiho eao mo te'ari, ba ekia a'ikakauma hoana katobahobo hoboaina.

<sup>8</sup> Iesu Keriso hanona warani, bariu abomo mara a'i kehaeai keaomo banaibana. <sup>9</sup> Ba'obi 'abikia haeai haeai a'i katehore

taeara namonai a'i katebaka'a parenimi. Namona hanona Tirama ena aoko'o hoana ke-hore aomi keba taburanakia, aniani rauhubukia a'i katoba apa'uanakia. Pokina weiakia aniani rauhubukia tea'i taeanaxia haukia hanona namo ha a'i tetabu ahina.

<sup>10</sup> Aika hanona mai eka itara robena, weiana hanona matiu ibiri ropo 'ubinai Iesu e'ari hauna, robe haukia weiakia paraboa aonai ekia robe akakia tibabai haukia katemai eka itara robena weianai kateaniani hanona ekia bero aha'i. <sup>11</sup> Pokina mahi aruarukia hanona robe hauna apa'uana eaoainakia eroibe ki'a baha 'ekana aonai eto-toainakia ki'a ia'lobokia paunai, 'a hauanikia hanona eaoainakia aiara parabuna murinai ehuhunakia. <sup>12</sup> Ihobonai Iesu abomo kipona aruarunai maearima ekia ki'ai kebamaha mahanakia paunai aiara parabuna murinai ehau haiara e'ari. <sup>13</sup> Ua buonai aika abomo ia herena kahaea, aiara parabuna murinai ia ehau-maeaina hauna kipokia kaha haumaea haeamo. <sup>14</sup> Hanopaka neiana aonai aika eka miao banaibanaia aiarana ha aha'i, aika hanona aiara weiana wairainimai hauna naha'imana. <sup>15</sup> Ua buonai aika rani ikoinai Iesu atanai Tirama banamo kahabena, aika kahahore pinakai ia atana kahapaina, weiana hanona aika eka baibeni tabana Tirama 'euna. <sup>16</sup> Aka namokia abomo 'abami ibaraikia akakia a'i kato reanakia, pokina aka uahomakia hanona baibeni tabakia Tirama niaonamo ainakia.

<sup>17</sup> Te'uai ainimi haukia aiakia katoka'aina mai tenuataeai akakia katobabainakia. Pokina ia tinore wai te'imanimi Tirama wairanai mai ta'ukia, a'i tioro. Aiakia katoka'aina hanona mai aonamokia ekia aka katebabaina, ia mo aiakia a'i katoka'aina raninai mai raona raonanakia kateaka, ba weiana 'eumiai hanona baraibaraina aha'i.

<sup>18</sup> Rani ikoinai katobahuba'ari ai ahawai ai. Ai taraona haraina aomai tohakia hanona tebero pokina taba ikoikia aokiae tenuatae aka berokia katababai. <sup>19</sup> Au nanoimi kato bahuba'ari tabura Tirama keuhuna'u kawahi biai heremi.

### Banamo 'Abina Orena.

<sup>20</sup> Baibua Tiramana ehore Obi-apaka Iesu 'ari haukia baiatakiai ebamikirina, ia hanona miao banaibana 'abi'uaina apa'uana aruaruna ekiki oioi ba mamoe 'ima hauna apa'uanai eao. <sup>21</sup> Au nabahuba'ari, Tirama neiana ke-hore taba namokia ikoikiai kebenimi pokina ena nuatae akana katababaina paunai, Iesu Keriso atanai ia niaonamo aina akana aokai kebabaina. Keriso herenai nuabi kemiaho banaibana. Amen.

<sup>22</sup> Uaho'aba'u e, marere neiana arere benimi 'abikia hanona a'i tehoma'a, ia e'u batabura 'abikia neikia katoa'i taea tohanakia. <sup>23</sup> Naba'iobinimi uaho'abaka Timoteo wapura itunai aba tebakarahina, ia pemai biai rani-nai tararua patawhi pataihanimi.

<sup>24</sup> Te'uai ainimi haukia ikoikiai mai Tirama ena maearima ikoikiai herekiai e'u banamo 'abina katohina benakia. Weia Italia ai temiaho haukia ekia banamo 'abina tetiu ahina heremi.

<sup>25</sup> Tirama ena aoko'o hoana hanona ikoimiai heremiai kemi-aho. Amen.

## Marere IAKODO Ererena Hauna

### *Puka Aona Irerena 'Abina*

Puka neiana aonai 'abi namokia temiaho. Iakobo puka neiana ererena Tirama ena maearima keba'ibinakia taeara namokia neiakiai kateka'a. 'Abi ibabataikia bo'ona ererenakia maearima kebarainakia raonaraona mai aotipa katea'inakia mai ena 'abi kate'iobi harainakia. Iakobo hanona e'abi harai, maearima ha nia'ikakauma hauna hanona a'i kea'ikakauma 'abaea, ia hanona babai namokia maearima herekiae kebabai, pokina babai weiakia ia nibatohana ena a'ikakauma hanona etabura mai enamo.

### *Puka Paipana Apa'uakia*

- a. Roba iahu. (1.1)
- b. A'ikakauma mai aobero. (1.2-8)
- c. Uraru hauna mai kepu hauna. (1.9-11)
- d. Baihobo aonai. (1.12-18)
- e. Aia o'o mai aka babai. (1.19-27)
- f. A'itaeana hoana. (2.1-13)
- g. A'ikakauma mai aka. (2.14-26)
- h. A'ikakauma hauna mai maeana. (3.1-18)
- i. A'ikakauma hauna mai hanopaka. (4.1—5.6)
- j. 'Abi orekia. (5.7-20)

### *Banamo 'Abina.*

<sup>1</sup> Au Iakobo, Tirama mai Obiapaka Iesu Keriso ekia ta'ara ia'ina hau'u, marere neiana narerena niwahi Tirama ena maearima ikoimiai torama otaraina hanopaka haeai haeai toomiaho haumi heremi, e'u banamo 'abina nabenimi.

### *A'ikakauma Mai Aobero.*

<sup>2</sup> Uaho'aba'u e, atetua haeai haeai katekara'au heremi hanona aonamo tabanai katobaonakia.  
<sup>3</sup> Pokina to'iobina, atetua katehore emi a'ikakauma katehobona,

weiana hanona wai emi bapahihi keba apa'uana. <sup>4</sup> Emi bapahihi ena tabura ikoinal kebawaira tina haraina, weianai katobero 'aunimi, katonamo harai toha mai taba ha herenai a'i katokapu.

<sup>5</sup> Wai ha aobero okapu raninai Tirama konoina, ia hanona a'i nibaibata maearima ikoikiae niberuberu benakia, ia kehore aobero kebeni'o. <sup>6</sup> Ia Tirama konoina raninai koa'ikakauma aomu a'i kekai'au kai'au. Hau ha aona kekai'au kai'au hanona matoha roio roio 'abana, baura nihore niabuna niaoaina nimaiaina. <sup>7</sup> Hau uahomana hanona a'i keraonana ia taba ha Obiapaka herenai kea'ina. <sup>8</sup> Pokina aona nibaruana hauna ena aka ikoikiae aokiae hanona taeara hamonai a'i kekoru 'ini.

### *Uraru Hauna Mai Obia Hauna.*

<sup>9</sup> Tirama kehore uaho'abaka uraruna ha kea'i taeana 'ubiai raninai keaonamo wairai. <sup>10</sup> A Tirama kehore uaho'abaka nio-bia hauna kebaririna raninai ia abomo keaonamo, pokina obia weiana hanona ke'akauma matoha tubu taitaina ni'ororo ni'eho 'abana. <sup>11</sup> Beraura nitae, nirara kokopuna nihore tubu niba'ororona taitaina ni'eho ena nuabi abomo niore. Ihobonai obia hauna ena kepu nitabuna aonai ua ke'ari aiho.

### *Baihobo 'Abikia.*

<sup>12</sup> Atetua aokiae nibapahihi hauna hanona keaonamo, pokina atetua aonai etabura ekabanai buonai mauri banaibanai weiana Tirama e'abi'uai aina ia tiraona'au aina haukia herekiae hauna kea'ina. <sup>13</sup> Baihobo aokiae hau ha a'i ke'abi, "Tirama nihobona'u." Pokina ki'a Tirama kehobona hanona a'i ketaina, abomo Tirama hanona hau ha a'i nihobona. <sup>14</sup> Baihobo hanona hau ha kipona ena nuatae ki'a obona nihore aona niana ba ni'oina paunai nirama. <sup>15</sup> Nuatae ki'a obona nihore ki'a nibaramana, ki'a ni'omu 'au niapa'ua ba buabuana nirama hanona 'ari.

<sup>16</sup> Uaho'aba'u ki'ami e, raona weiana a'i kebahaoreanimi.  
<sup>17</sup> Beruberu tabakia namokia ikoikiai mai ibeni tabakia bero 'aukia ikoikiai hanona ubiai timai, weiana ea tabakia ebabainakia Tirama herenai timai, ia hanona a'i nihaeai abomo aiaia 'abanai a'i neibiu. <sup>18</sup> Kipona ena nuatae paunai ena 'abi tohanai ebaramanaka, ba taba ikoikiai ebaramanakia baiatakiai aika hanona wairai.

### Aia O'o Mai Aka Babai.

<sup>19</sup> Uaho'aba'u ki'ami e, neiana kato'obi haraina, maearima ikoinai 'abi ionai katenoanoa, ia ihinanai hanona katemahari mahari mai opurerai abomo katemahari mahari. <sup>20</sup> Pokina hau ha ena opuere hanona Tirama ena nuatae maurina berona aonai kemauri hauna a'i kebaraina. <sup>21</sup> Ua buonai hoahoa 'opukia ikoinai mai babai ki'a obokia ikoikiai aomiai temiaho haukia tomone'e 'akaumanakia, ia Tirama ena 'abi weiana aomiai ebatona hauna wai kebamaurinimi hauna tomoa'i taeana mai 'aiaunumi.

<sup>22</sup> Tirama ena 'abi tuona hauna akana katobabaina, ia 'abimo tuo'o 'abaeana, akana a'i tubabaina hanona kipomi tu'oi ahinimi. <sup>23</sup> Hau ha Tirama ena 'abi aiana niona ia akana a'i nibabaina hauna hanona ihobona ia kipona wairana oreore ai neihana 'abana. <sup>24</sup> Kipona wairana eihana epua ekaobo, a'i ehoma'a aba ereana ia ihana hanona aea homana. <sup>25</sup> 'A hau ha Tirama ena rauhubu weiana bero'auna mai maearima ki'ai erubunakia hauna emarereai haraina aia eona a'i ereanakia, haeamona akakia ebabai hauna hanona ena aka aonai Tirama ena banamo ketabu ahina.

<sup>26</sup> Hau ha aonai niraonana ia hanona Tirama nia'ikakauma haraina, iamo maeana a'i ne'ima haraina raninai ia hanona kipona ni'oi ahina, ba hau weiana ena a'ikakauma Tirama herenai hanona anina aha'i. <sup>27</sup> A'ikakauma hauna ena aka namona tohana mai berona

Hamaka Tirama wairanai hanona neiana, araobo mai wapu kababarainakia ekia hau hαιarai, haeamona kipoka kaha'ima 'ima harainaka hanopaka 'opuna a'i meba'opunaka.

## 2

### *Maearima Ikoikiai A'itaeana Hoana Ihobona Kahababaina Herekiai.*

<sup>1</sup> Uaho'aba'u e, eka Obiapaka Iesu Keriso hanona nuabi obiana, tua'ikakaumana raninai, maearima ihaihakiai taikia a'i katotai. <sup>2</sup> Hau ha Tirama ena mareea to'unai pekatoto imana mai hoeahoeana mai ena habuni namoabukia ebatoto, 'a uraru hauna ha ena habuni 'opukia ebatoto abomo pekatoto, <sup>3</sup> ba oi hau weiana habuni namokia ebatoto hauna nua'i taea haraina notibaha, "Emu imia'au namona neianai momia'au," 'a uraru hauna nohina bena, "Eiwa'a mokoroti 'ao neia ae'u pokinai momiati," raninai, <sup>4</sup> wai hanona aba tobeho, pokina kipomi baiatami tobahaeaina haeamona emi raona ki'a obonai baiata tohorena.

<sup>5</sup> Uaho'aba'u ki'ami e, aia'u tomona, Tirama ehore hanopakai uraru haukia etina'anakia a'ikakaumai kateobia, haeamona Tirama ena obia aiarana weiana aba e'abi'uaina ia tiraona'au aina haukia 'eukia hauna uraru haukia katea'ina. <sup>6</sup> 'A wai hanona uraru haukia toihā haonakia. Obia haukia hanona emi mauri tipoki aina mai bakai 'ekanai tiberi totonimi. <sup>7</sup> Ia tihore Iesu atana namona Tirama ebenimi hauna ti'abi ki'a bena.

<sup>8</sup> Rauhubu apa'uana Puka robenai hauna etibaha, "Heremu hauna koraona'au aina oi kipomu nuraona'au aini'o 'abana." Ua tubabai aiho raninai wai hanona aba tubabai harai. <sup>9</sup> 'A wai maearima ihaihakiai taikia tutai raninai wai hanona aba ki'a tubabaina, ba tubeho Tirama ena rauhubu tukabena. <sup>10</sup> Pokina hau ha rauhubu ikoikiai ke'ima

harainakia, ia hamona ekabena raninai ia aba ebeho ihobona rauhubu maikoinai ekabe orena 'abana.<sup>11</sup> Pokina Tirama etibaha, "A'i konabau," haeamona etibaha, "A'i koahuahu," ba pe a'i onabau, ia oahuahu raninai oi hanona Tirama ena rauhubu aba okabe hurina.<sup>12</sup> Taba ikoikiai aokiai kato'abi mai katobabai hanona katoraonana Keriso ena rauhubu weiana ki'ai erubunimi hauna kehore kebabakainimi.<sup>13</sup> Pokina maearima a'i koaoko'o ainakia raninai, Tirama ena bakai aonai a'i keaoko'o aini'o. Aoko'o hanona bakai etara haona.

### *A'ikakauma Mai Akana Hauna Enamo.*

<sup>14</sup> Uaho'aba'u e, hau ha ni'abi ia hanona mai ena a'ikakauma ia akana a'i nibabaina raninai, ena a'ikakauma weiana hanona ena namo taba? Ena namo aha'i. A'ikakauma uahomana hanona ia a'i kebamaurina.<sup>15</sup> Pe a'ikakauma haukia baiatakiai uaho'abamu ha 'ao haibumu ha herenai habuni 'ao aniani keani hauna aha'i,<sup>16</sup> ba oi ia pohina bena potibaha, "Mai baibuamu moao, haumu kehi-abuhiabu, mai koaniani harai," 'a enuatae ainakia tabakia ha a'i obeni 'apuana raninai, weiana ena namo hanona taba? Ena namo aha'i.<sup>17</sup> Taeara ihobonai a'ikakauma ikupaiiana mo, 'a akana aha'i hanona a'ikakauma tohana aha'i, weiana hanona aba e'ari a'i niaka.

<sup>18</sup> 'A hau ha ketibaha, "Hau ha hanona kea'ikakauma, 'a hau ha hanona keaka." 'A au natibaha, "Emu a'ikakauma weiana akana aha'i hauna mobaihana'u, ba au kahore e'u a'ikakauma mai akana hauna kabaihan'i'o."<sup>19</sup> Oi nua'ikakauma Tirama hanona hamona mo. Weiana hanona enamo. Auba ki'a obokia abomo ua tia'ikakauma aiho haeamona titau ki'a te'ururu 'ururu.<sup>20</sup> Ao 'abaea haumi e, a'ikakauma weiana akana aha'i hauna hanona ena namo aha'i\* kabaihanimi.<sup>21</sup> 'Aba'abaka Aberahamo hanona Tirama wairanai

ebero pokina ena a'ikakauma akana ebabaina, nahuna Isako itara robena ahanae ehore 'auna Tirama eberuberu bena.<sup>22</sup> Aba to'iohina ena a'ikakauma mai ena aka hanona teaka haeamo, ba ena babai weiana ehore ena a'ikakauma ebabero'auna.<sup>23</sup> Ba Puka robenai tererena 'abina aba etohana etibaha, "Aberahamo ehore Tirama ea'ikakaumana, ena a'ikakauma weiana buonai Tirama ia ea'i taeana bero haunai ebaona." Ba Aberahamo teaparina Tirama ena hau.<sup>24</sup> Ua buonai bariu aba to'iohina maearima hanona ena babai paunai Tirama ia nibatohana bero hauna, ia a'ikakauma ikupaiiana mo aha'i.

<sup>25</sup> Taeara ihobonai mo, Rahaba rea babi'ena abomo ena aka harai paunai Tirama ia ebatohana bero babi'ena, pokina ia ehore Iuda ekia ihaihapai haukia ebarainakia, haeamona taeara haeaiai eu hunakia temue.<sup>26</sup> Ua buonai hauani aonai auba aha'i hanona e'ari ihobonai, a'ikakauma abomo akana aha'i hanona aba e'ari.

## 3

### *Eka 'Abi Kaha'ima Harainakia.*

<sup>1</sup> Uaho'aba'u e, haumi bo'ona ba'iobi haumiai a'i katoao, pokina wai aba to'iohina, ai taba'iobi 'uai haumai hanona ibabakaimai hanona aba kepahihi ki'a baha ba maearima baika.<sup>2</sup> Aika ikoikai hanona rani bo'ona nahababai beho, ia hau ha a'i ke'abi rea raninai ia hanona kebero'au haeamona ia kipona hauanina maikoina kepokiae haraina ketaina.<sup>3</sup> Hoti pinakia ibirikia aurikia pinakiai kahabiri 'aunakia raninai ia aika aoka kateka'aina, aika kahanuatae hoti hauna maikoinai kahabaibiuna mai kahaba kakaiaronia hanona ketaina.<sup>4</sup> Haeamona aunohi rarina kahaihana, ia eapa'ua ki'a baha mai baura rarina niabuna re'a, hari papana nihore niharina, kapena hauna ena nuatae 'ekana

\* 2:20: (20) 'ao e'ari

ae'e hanona keaoaina mo weia.<sup>5</sup> Ihobonai mo maea hanona papana 'aki hauanikai nemiaho, ia niapa aka apa'uakia nibabai nya nih.

Iruba abomo kaharaonana, baubaea papana 'aki iamo keupa raninai arabu maikoinai ke'ara obo.<sup>6</sup> Maea hanona matoha iruba, ia hanona hauanikai nemiaho ki'ai ebonu, eka mauri maikoina kea'i ki'ana, ia nihore eka mauri maikoinai irubai niba'ara'auna, ena iruba hanona eiwa'a iruba ni'ara banai banai 'ekanai nimaiaina.<sup>7</sup> Maearima katehore mauri tabakia ikoikiai, mahi, roborobo, tikara tabakia haukia, mai 'aku aonai temiaho tabakia ikoikiai kateba mamatanakia hanona ketaina, ba ia tihere taba weiakia tiba mamatanakia.<sup>8</sup> Iamo hau ha maea kebamamatana hanona a'i ketaina, maea hanona ki'a nehina to'o baihana, 'ari muramuranai ebonu.<sup>9</sup> Maea neianai eka Obiapaka Hamaka nahabamanoma, haeamona maea neianai Tirama ihaihanai ebabainakia maearimakia nahaururua ainakia.<sup>10</sup> Pina hamonai banamo mai ururu 'abikia tikarahi. Uaho'aba'u e, weiiana a'i pahababaina hanona penamo.<sup>11</sup> 'Aku beina mai bei 'aki\* terarua ate hamonai a'i tiaru ahi.<sup>12</sup> Uaho'aba'u e, tuaba matiuna ororo buana a'i kebaramana, abomo 'aruhi matiuna tuaba buana a'i kebaramana. Haeamona 'aku beinai bei 'aki a'i kaharaina.

### *Aobero Tirama Herenai Emai Hauna.*

<sup>13</sup> Tai hanona wai baiatamiaeaobero toha mai obo niobo harai? Ia kehore ena mauri namonai mai ena babai haraiai weiiana kebahanimi mai 'aiaununa, weiiana hanona ena aobero hoana.<sup>14</sup> Aomiae wamuru ani ki'a temiaho raninai emi aobero a'i katoapaina, weiiana Tirama ena 'abi tohana a'i katobunina.<sup>15</sup> 'Aobero' uahomakia hanona Tirama herenai a'i timai, ia

hanona hanopaka 'euna mai tiaporoherenai timai.<sup>16</sup> Pokina wamuru mai ani ki'a temiaho 'ekanai hanona ripuripu mai aka ki'a haeai haeai abomo temiaho.<sup>17</sup> A aobero weiiana Tirama herenai nimai hauna ihaihaha koriuaina hanona hoahoa berona, murinai hanona baibua, 'aiaunu, bamamata, aoko'oai ebonu, babai namokia, ki'a taikia a'i nitai, mai ahu 'oi'oi aha'i.<sup>18</sup> Baibua tibabaina haukia tihere baibua uhona tibatona ni'omu nirewa buabuana hanona aka bero batiarina.

## 4

### *Hanopaka Ihatia'ana Hanona Tirama I'oatana.*

<sup>1</sup> Baiatamiae 'au mai baiara ikoikiai hanona ae'eai timai? Ekia mai 'ekana hanona oi aomu ena nuatae uhorenaweiakia haukia oi aomuai ti'au to'o baihana.

<sup>2</sup> Tonuatae taba katoa'i iamo a'i tua'inakia, ua buonai tuba'oru katoahuahu, taba tonua ki'ainakia iamo a'i tua'inakia, ua buonai tubaiala mai tu'au. Taba tonuatae ainakia haukia a'i tua'inakia pokina wai hanona Tirama a'i tunoina.<sup>3</sup> Haeamona taba tunpoi ai haukia a'i tutabu ahinakia pokina emi raonaraona hanona a'i tebero, tonuatae kipomi aomi katoba namonakia tabakia motunoiainkakia.<sup>4</sup> Tirama herenai aia a'i tubabua 'au haumi e, wai matoha nabau ki'a babi'ekia 'abakia, hanopaka ihatia'ana hanona Tirama i'oatana, wai weiiana a'i to'ioquina, 'u? Maearima tabana hanopaka kehauna hanona ia kipona Tirama ena 'ou haunai niao.<sup>5</sup> Puka robenai ererena etibaha, "Tirama Auba Robe aika aokai ehorotina hauna nihore aika neuhore ainaka." Wai turaonana 'abi neiana hanona anima aha'i, 'u?

<sup>6</sup> 'A Tirama ena aoko'o hoana nibaibenai hauna hanona nitabura hao tabura hao, Puka robenai ererena etibaha,

\* 3:11: (11) 'ao bei kumana mai bei mabina

“Tirama hanona  
apa haukia ni'oatanakia,  
'a'aiaunu haukia hanona  
ena aoko'o hoana nibenakia.”

Aot 3.34

<sup>7</sup> Ua buonai kato'aiaunu kipomi emi mauri Tirama katobena, 'eunai katoao, ia tiaporu kato'oatana hanona heremai kebeau 'akaumana. <sup>8</sup> Tomai Tirama herena, ia abomo kemai heremai. Ki'a haumi e, emi mauri aonai ki'a temiau haukia tomoutu obonakia matoha imami toutunakia 'abana, aomi tubaruanakia haumi e, aomi tomoa'ia'i harainakia emi hoahoa katebero. <sup>9</sup> Tomobabirabira, tomohai, tomohai 'ari ki'a, emi iriri hanona hai ai meao, emi aonamo hanona ao aro'ariai meao. <sup>10</sup> Obiapaka wairanai kipomi tomoba 'aiaununimi, weiana ia kehore kea'i taeanimi.

*Uaho'abaka A'i Kaha'uahinakia.*

<sup>11</sup> Uaho'aba'u e, kipomi batiatamiai a'i katobaitabu haoaina. Tabana uaho'abana Keriso aonai hauna ha nitabu haona 'ao nibapuma hoaina hauna hanona rauhubu nitabu haona mai nibapuma hoaina. Ba oi rauhubu nubapuma hoaina raninai oi hanona rauhubu a'i nuka'aina haumu ia nubapuma hoaina haumu. <sup>12</sup> Tirama ikupaiana mo rauhubu ebaibeni mai kebabakainakia ia mai ena hiabu kebamauri mai kebapururu. Ua buonai oi hanona emu bero aha'i heremuai hauna puma kobahoaina.

*Mara 'Euna A'i Kahapa.*

<sup>13</sup> Aia'u tomona, wai nya tu'abi aiho haumi totibaha, “Bariu 'ao mara hanona kahaeao aiara weianai ihau hamona kahamiaho, moni akana kahababaina mai moni bo'ona 'akina kahababai.” <sup>14</sup> A wai hanona mara emi mauriai taba kerama hauna a'i to'ibina. Emi mauri hanona ihobona 'abu 'abana, rani papana kewaira tina haeamona ke'akauma mue.

<sup>15</sup> Ua buonai wai hanona nya kato'abi aiho, “Obiapaka kenuatae raninai aika kahamauri oho aka neiana 'ao weiana kahababaina.”

<sup>16</sup> A bariu hanona wai kipomi tubapa'ua mai tuapa, bapa'ua nahomakia hanona babai ki'a.

<sup>17</sup> Ua buonai tabana aka berona ibabaina e'io'bina iamo a'i nibabaina hanona ki'a nibabaina.

## 5

*Obia Haukia Iba'io'bikia 'Abina.*

<sup>1</sup> Kepu heremi tebo'o haumi e, aia'u tomona, katohai 'ari ki'a baha pokina atetua rarina kemai heremi. <sup>2</sup> Emi kepu aba teburuburu abomo 'abi'abi emi habuni aba teani maranakia.

<sup>3</sup> Emi gold mai silba aba temotemote ba ekia motemote neiana kehore kebatohana wai hanona tobeho mai hauanimi irubai kepururu. Rani orena nimai iamo wai emi kepu tubararo ohomo.

<sup>4</sup> Tomobahu emi umai tebiraura haukia 'arakia a'i tohore obonakia haukia haeamona weiakia umai teueu haukia emi beho paunai tehai aiana aba ekara'au eao hiabu ikoikiai Obiapakanai haianai etoto puma kebahoainimi. <sup>5</sup> Wai hanopaka ahnai emi mauri hanona eobia ki'a baha haeamona mai aonamomi tomiaho, ba kipomi turo'onimi tubapa'uanimi ihobona tatu aiporona 'abanai tuo.\* <sup>6</sup> Wai tohore maearima ekia beho aha'i haukia weiakia a'i tebatetua 'apuanimi haukia puma tobahoainakia mai toahu 'arinakia.

*Kahabakiro Mai Kahabahuba'ari.*

<sup>7</sup> Ua buonai, uaho'aba'u e, katobapahihi keaomo Obiapaka kemue kemai. Katoraonana biraura hauna ena biraura anina namona ne'imana mai bapahihi 'abana niba'ima niaomo hiribo abarana niore iaia abarana nimai ba ena uma anina nirama.

<sup>8</sup> Wai abomimo aomi katobapahihiina mai emi buabeniai katokori

\* 5:5: (5) 'ao iahu'arina ranina ewairana.

'ini harai pokina Obiapaka ena mai hanona aba niherekai.

<sup>9</sup> Uaho'aba'u e, wai kipomi baiatamiai a'i kato'arara 'arara weiana a'i meaoainimi Tirama a'i meba bakainimi, iamo bakai hauna hanona aba pa'abi 'akonai ekoroti. <sup>10</sup> Uaho'aba'u e, wai hanona mahabanai haukia ekia hau haiara aokiae tebakiro hauna katoraonana murikiae kato'au, ia hanona Obiapaka ena 'abi tehinana ba tehau haiara. <sup>11</sup> Aika na'abi bapahihi haukia hanona tenamo. Iobu ena bapahihi orina aba to'ioquina Obiapaka ena namo hanona ia herenai aea homana. Obiapaka hanona aoko'o mai rabo haraiai ebonu.

<sup>12</sup> Uaho'aba'u e, taba apa'uana hanona neiana 'abi pumakiae a'i ko'abi 'uai, kupai 'ao hanopakai 'ao taba ha atanai emu 'abi'uai a'i kobatohana. Iamo ko'abi "e' re'a 'e tohanamo kohinana, 'ao ko'abi 'aha'i' re'a aha'i tohana mo kohinana, weianai a'i mobabai ki'a puma a'i mohoaina marikina.

<sup>13</sup> Baiatamiai hau ha nihau haiara re'a kebahuba'ari, hau ha baiatamiai niaonamo re'a banamo huikia kea'i. <sup>14</sup> Baiatamiai hau ha neinawa re'a Tirama ena mareai kiro haukia keaparinakia Obiapaka atana hiabunai ahana katebahuba'ari mai tehoroi katetaronä. <sup>15</sup> Ia a'ikakauma bahuba'arina kehore inawa hauna kebanamona Obiapaka kehore kebamikirina haeamona mai ena ki'a raninai kehina haonakia. <sup>16</sup> Ua buonai 'abami kipokia emi ki'a katohina pounakia abomo kipomi ha ha 'abami ahakiae katobahuba'ari, weiana emi inawa katenamo. Bero hauna ena bahuba'ari hanona ehiabu abomo mai anina. <sup>17</sup> Elia hanona maearima aika 'abaka, iamo ebahuba'ari tabura tabura abara a'i ketibo, ba abara hano ahana a'i etibo ihau aihau nawa 'abaihau. <sup>18</sup> Haeamona ebahuba'ari mue, weiana abara kupai etibo hano ebamapu mapuna, ba buabuana ebarama muena.

<sup>19</sup> Uaho'aba'u e, wai ha Tirama ena 'abi tohanai kekaobo ba 'abami ha kehore kemaiai muena raninai, <sup>20</sup> ki'a hauna weiana ena hoa ki'a obokiae kemueaina kemaiaina, ba Tirama kehore ki'a hauna aubana 'ariai kebamaurina abomo ena ki'a bo'ona kehina haonakia. Neiana katoraona haraina.

## Marere Kori'uaina PETERO Ererena Hauna

### Puka Aona Irerena 'Abina

Marere neiana hanona a'ikakauma haukia bo'ona atetua rarikia titabu ahi haukia kebarainakia ekia a'ikakauma keba taburanakia. A'ikakauma haukia nehina benakia ia hanona Iesu Keriso pouna namona kateraona 'inina. Weiana Iesu hanona e'ari haeamona emikiri mue, mai ena 'abi'uai ia kemue kemai. Ena 'abi'uai kateraona taburanakia mai bakirokia katebai'ima keaomo kemai. Weiana a'ikakauma haukia ikoikiai ekia a'ikakauma kehobonakia. Ua buonai ia hanona ekia a'ikakaumai katekorì 'ini keaomo Keriso kemue kemai. Ba rani weianai ia hanona 'arakia katea'i.

### Puka Paipana Apa'uakia

- a. Roba iahu. (1.1-2)
- b. Tirama ena bamauri teba'obi. (1.3-12)
- c. Mauri robena. (1.13—2.10)
- d. A'ikakauma haukia ekia hoa-hoa hau haiara aokiai. (2.11—4.19)
- e. 'Uai haukia ekia aka. (5.1-11)
- f. 'Abi orekia. (5.12-14)

### Banamo 'Abina.

<sup>1</sup> Au Petero Iesu Keriso ena iuhubeau hau'u, Tirama etina'animi haumi torama otaraina hano haeai ai tomiaho haumi, Ponto ai, Galatia ai, Kapadokia ai, Asia ai mai Bitunia ai tomiaho haumi narerebenimi. <sup>2</sup> Tirama aika hamaka ena 'obi 'uai ihobonai etina'animi ba Auba Robe hanona wai aba eba robeni-mi, weiana Iesu Keriso aiana katoka'aina ia aruarunai emi ki'a keutunakia. Nabahuba'ari Tirama ena aoko'o hoana mai baibua hanona heremai keapa'ua.

### Tirama Kahabanamona Buabenai Tohana Ebenaka.

<sup>3</sup> Eka Obiapaka Iesu Keriso Hamana Tiramana kahabanamona, ia ena aoko'o eapa'ua

paunai Iesu Keriso e'ari ena mikiri mue maurina aonai aika ebarama muenaka, ba buabenai tohana ebenaka. <sup>4</sup> Aika nahabuabena itau Tirama nahuna kebenakia. Banamo weiana hanona aba eba'oruna kupai ua'a wai 'eumi, a'i keki'a, a'i ke'opu, abomo a'i ke'akauma. <sup>5</sup> Tirama ena hiabu nihore ni'aeanimi emi a'ikakauma paunai keaomo bamauri weiana aba eba'oruna kebawaira tinana rani orenai hauna katoa'ina.

<sup>6</sup> Neiana buonai aomi kenamo katoaonamo ki'a baha, iamo bariu rani papana aomi tiaro'ari pokina baihobo haeai haeai tihobonimi paunai. <sup>7</sup> Baihobo weiana hanona emi a'ikakauma ena namo kebatohana. 'A a'ikakauma ena namo hanona gold weiana irubai tebanamona iamo aba ke'akauma hauna ena namo etara haona. Emi a'ikakauma weiana tebahobona tebanamona hauna hanona Iesu Keriso kewairatina berauranai ibanamomi, ia'i taeami mai imarikiaimi tabanai keao. <sup>8</sup> Iesu a'i toihā 'apuana iamo turaona'au aina. Bariu a'i toihana ia tua'ikakaumana ba tuaonamo aina, aonamo apa'uana mai namona weiana hanona 'abiai ihina haraina a'i ketaina. <sup>9</sup> Pokina emi a'ikakauma buabuana tua'ina, weiana hanona aubami ibamaurikia tabana.

<sup>10</sup> Mahabanai haukia weiakia Tirama ena aoko'o hoana wai heremai kekara'au hauna temahabanai haukia tehore bamauri weiana tetabu haraina abomo temarereai haraina. <sup>11</sup> Auba Robe Keriso euhuna hauna hanona mahabanai haukia aokiai emiaho, Keriso ena haiara mai ena nuabi weiana haiara murinai kemai hauna eba'iobinakia ihobonai ia hanona tebahobona kate'iobinda rani tabanai abomo hoana aea homana. <sup>12</sup> Tirama mahabanai haukia herekiai ebawaira tinana ekia aka hanona kipokia ekia namo paunai aha'i ia wai emi namo paunai, abomo bariu pou namona neiana hanona teiroro aina haukia tehore Auba Robe kupai euhu ririna emai hauna ena

baraibarai ai teba'ibinimi. Taba neiakia hanona aneru abomo tenuatae kateiha tinanakia.

*Mauri Robenai Kahamiaho.*

<sup>13</sup> Ua buonai aomi katoa'ia'i haraina, katoba'oru emi buabeni maikoina hanona Iesu Keriso kewaira tina raninai aoko'o hoana kekara'au 'eumiai. <sup>14</sup> Bariu aiao'o miorimiai katoao, hauanumi ekia nuatae babaikia ki'a obokia 'uainai a'i to'iobi raninai tobabainakia haukia a'i katababainakia. <sup>15</sup> 'A eaparinimi Tiramana erobe 'abana wai abomimo katorobe emi hoaho aikoikiai aokiai. <sup>16</sup> Puka robenai aba tererena,

"Wai hanona katorobe pokina au hanona narobe."

Lev 11.44, 45

<sup>17</sup> Wai tu'arara Hamaka, ia hanona maearima nibabakainakia raninai ihaihana enamo hauna a'i niraonana ia ha ha ena aka ena aka paukiai kebabakainakia. Ua buonai emi miao neia hanopakai hanona mai ta'umi katomiaho ihobona hano haeai haumi 'abana.

<sup>18</sup> Wai aba to'ibina, Tirama wai emi mauri ki'a obona weiana 'aba'abami tebenimi hauna aonai ebamaurinimi hanona hanopaka tabakia weiakia aba kate'akauma haukia silba 'ao gold 'abakiai a'i ekawanimi, <sup>19</sup> ia Keriso aruaruna namona 'akina mamoe nahuna weiana haunai mani'a 'ao ki'a ha aha'i mamoe 'abanai ekawanimi. <sup>20</sup> Tirama hanona aba wa'i baha hanopaka a'i erama baha aonai ia etina'ana, ba rani orena neianai ewaira tina wai paumiai.

<sup>21</sup> Wai Keriso paunai Tirama tua'ikakaumana, ia hanona Keriso 'ariai ebamikiri muena haeamona nuabi ebena. Ua buonai wai emi a'ikakauma mai emi buabeni hanona Tirama aonai nemiaho.

<sup>22</sup> Bariu Tirama ena 'abi tohana ia'itaeanai aubami aba toutu harainakia, uaho'abami kato raona'auai tohanakia mai taearena buonai, 'abami katoraona'au ainakia mai aomi ikoinai. <sup>23</sup> Wai

torama mue hanona uho weiana kepari haunai aha'i, iamo weiana a'i kepari hauna Tirama ena 'abi nimauri mai nemiaho banaibana haunai torama mue. <sup>24</sup> Pokina Puka robenai tererena 'abana, "Maearima ikoikiai hanona tubu 'abana, abomo ekia nuabi hanona tubu taitaina 'abana. Tubu ni'ororo taitaina ni'eho niobo." <sup>25</sup> 'A Obiapaka ena 'abi hanona kemiaho keaomo banaibana." Isa 40.6—8 'Abi neiana hanona pou namona weiana teiroro aina heremiai.

## 2

<sup>1</sup> Ua buonai wai kipomi ki'a akakia ikoikiai, bai'oi, ahu 'o'oi, wamuru, 'uahi'uahi ikoikiai katon'e 'akaumanakia. <sup>2</sup> Miori 'oru'oruna niramahi 'ae nenuatae 'abana, rani ikoinai auba ena bamarere namona katonuatae aina, weianai katoapa'ua keaomo bamauri katoa'ina. <sup>3</sup> Pokina wai hanona Obiapaka ena banamo aba tonobai 'apuana.

*Obiapaka Hanona Pihara Maurina, Wai Hanona Tirama Ena Maearima.*

<sup>4</sup> Katomai Obiapaka Iesu herena, ia hanona pihara maurina, hanopaka maearimakia tebaoaoaina 'a Tirama ehore pihara weiana etina'ana, ba eihana hanona enamo ki'a baha ia herenai. <sup>5</sup> Wai abomo pihara maurikia 'abana, Auba Robe ena hiabuai Tirama ena marea robenai katoao, wai hanona ia ena robe haumi emi mauri katobena baiben'i tabanai keao Tirama kehore mai aonamona kea'i taeanimi Iesu Keriso paunai.

<sup>6</sup> Puka Robenai na erere aihona, "Katoihana au pihara ha a'itaeania weiana hanona 'uni'uni piharana\* namona 'akina Siona oeonai nahorotina, taba ikoikiai ia ahanai katebakori 'aunakia,

\* 2:6: (6) 'ao itu ibakori'au piharana

ia kea'ikakaumana hauna hanona a'i kehaumaea."

Isa 28.16

<sup>7</sup> Ua buonai tua'ikakaumana haumi heremai hanona enamo ki'a baha, 'a ia a'i tia'ikakaumana haukia herekiai hanona pihara 'abaeana aba tererena 'abana, "Itu ibakorina haukia tebaki'a'ana piharana hanona aba itu 'uni'unina piharanai eao."

Sal 118.22

<sup>8</sup> Abomo,  
"Maearima pihara weianai  
tikai tiehe herea  
haeamona tiehe ta'erai ti'eho."

Isa 8.14

Tirama ena 'abi a'i teona a'i teka'aina paunai ia ti'eho, weiana hanona ia itaukia Tirama ena raona ihobonai.

<sup>9</sup> 'A wai hanona Tirama etina'animi maearimami, obia 'arana ena robe haumi, robe itubuna, maearima weiakia Tirama 'euna haumi. Tirama ea'i taeanimi hanona ena hoahoa namokia katohina pounakia paunai, weiana ia hanona wai wapura aonai eapari ahinimi ena ea namona 'akina aonai ebakatotonimi. <sup>10</sup> 'Uainai wai hanona Tirama ena maearima aha'i 'a bariu hanona wai aba Tirama ena maearima, 'uainai wai hanona Tirama a'i eako'o ainimi 'a bariu hanona Tirama ena aoko'o aba toa'ina.

### *Tirama Ena Ta'ara'i Hauka.*

<sup>11</sup> E'u raona'au haumi e, wai hanona hano haea mai kaoao 'abaea haumi hanopaka neiana aonai, nabahi ahinimi, hauanimi ekia hoahoa opukia a'i katababai, weiakia tihore aubami tehuarina. <sup>12</sup> A'i tia'ikakauma haukia baiatakiai emi hoahoa katobaberona, tia'i ki'animi aka ki'a haumiae tibaonimi haukia emi hoahoa namokia kateiha, weiana Tirama atana katebanamona ia ena mai raninai.

<sup>13</sup> Maearima ekia hiabu haukia ikoikiai aiakia katoka'ainakia, weiana hanona Obiapaka imarikiaina paunai, hanopaka obia 'arana aiana katona ia hanona

poki hauna, <sup>14</sup> abomo kabamani haukia aiakia katona, ia hanona poki hauna euhunakia tiaka ki'a haukia kateba haiaranakia, 'a babai harai haukia kateba namonakia. <sup>15</sup> Pokina Tirama ena nuatae hanona emi babai haraiai bapo'o po'o haukia ekia aotipa 'abikia kekaibunakia. <sup>16</sup> Rauhubu herenai to'abaea haumiae katomiaho, 'a emi miao 'abaea weiana aka ki'a ikaikauna tabanai a'i keao, wai hanona Tirama ta'arana ia'inai katoao. <sup>17</sup> Maearima ikoikiai katomariki ainakia, 'abami kato raona'au ainakia, Tirama katota'u aina, obia arana katomariki aina.

### *Keriso Ehiaira Ihobonai Kahaiara.*

<sup>18</sup> Ta'ara'i haumi e, emi poki haukia aiakia katoka'aina mai ta'umi, namo 'ao 'abi bero haukia herekiai mo aha'i ia albara haukia herekiai abomo. <sup>19</sup> Ena ki'a aha'i ia Tirama niraonana paunai hauhaiara nihoaina hauna weiana hanona Tirama ia kebanamona. <sup>20</sup> Katoaka ki'a kateahunimi aonai katobapahihi ena namo hanona taba? 'A aka namokia katobabai katohaiara aonai katobapahihi weiana hanona mai banamona Tirama wairanai.

<sup>21</sup> Neiana paunai Tirama wai eaparinimi. Keriso hanona ehau haiara wai paumiai, ehabonimi ibabatajai eao wai murinai katoao 'apunai katoka'a.

<sup>22</sup> "Keriso hanona ki'a ha a'i ebabaina abomo pinanai bai'oi 'abina ha a'i tetabu ahina."

<sup>23</sup> Tehinabe ki'ana ia aiakia a'i eba-muena, haiara eonobaina ia a'i ebaro 'arinakia, 'a ikoinai hanona beroai nibakai Tiramana imanai eutanakia. <sup>24</sup> Keriso hauaninai eka ki'a ehoainakia matiu ibiri ropo ubinai e'ari hanona ki'a 'eu-nai kaha'ari 'a bero 'eunai kahamauri. Ena imoa mani'akiai wai aba ebanamonimi.

<sup>25</sup> 'Uainai wai hanona e'akauma mamoea 'abana, ia bariu hanona

aba tomue tomai aubami i'imakia  
mai iha'inikia hauna herena.

### 3

#### *Hawainibe Haukia Mai Babi'ekia Ekia Abi.*

<sup>1</sup> Babi'e e, ihobona ta'ara'i haukia ekia poki haukia aia kia tika'aina 'abana, atawami aia kia katoka'ainakia, weiakia Obiapaka ena 'abi a'i tia'i taeana haukia hanona 'abiai aha'i iamo wai emi babai haraiai katobaraona kabena kia, <sup>2</sup> emi babai berokia mai mariki akakia kateiha paukiai. <sup>3</sup> Wai emi taitai hanona hauanumi kapena ibataitaina paunai aha'i, buimi taitaikia 'ao haiami 'abakia gold 'ao taba 'imarekia 'ao emi ibatoto 'arakia rarikia 'abakia aha'i. <sup>4</sup> A aomi tohakia haukia, raona namona 'aiaununa ena namo a'i ke'akauma haunai katoba taitainakia hanona Tirama wairanai ena namo eapa'ua. <sup>5</sup> Pokina 'uaina raninai robe babi'ekia weiakia ekia buabenai Tirama herenai haukia ua tetaitai aiho, atawakia aia kia teka'ai harainakia. <sup>6</sup> Sara atawana Aberahamo aiana eona mai eaparina ena obia. Wai abomo bero akana katobabaina mai rani ikoinai a'i katota'u hanona nahuna babi'emai katoao.

<sup>7</sup> Hau e, taeara ihobonai wai abomimo atawami kipokia katomiaho haeamo mai 'obi haraimi ia hanona hauani akakia te'abe'abe katomariki ainakia, pokina Tirama ena mauri tohana beruberuna kipokia katoa'i haeamona, ua homanai emi bahuba'ari taearana a'i mekaibau marikina.

#### *Aka Bero Paunai Kahahaiara.*

<sup>8</sup> 'Abi orena neiana, ikoiimiai aomi kehamomo, kipokia katoraonaraona, katoraona'au ainimi uaho'aba 'abakia, katoaoko'o ainimi, abomo kato 'aiaunu. <sup>9</sup> Ekia aka ki'a a'i katoba muena herekiai a'i katoaka ki'a, 'ao ekia 'abi ki'a 'arakia a'i katohore herekiai a'i kato'abi ki'a, 'a tia'i ki'anumi

haukia hanona katoba namonakia, pokina weiana paunai eaparinimi Tirama ena banamo katoa'ina.

<sup>10</sup> Pokina Puka robenai aba tererena,

"Hau ha kenuatae mauri namona mai rani namona keihana hanona maeana ke'ima haraina pinanai ki'a 'abina a'i kehinana, pinana paruanai bai'oi 'abina a'i kehina 'apuana.

<sup>11</sup> Ki'a kehabonakia aka namokia kebabainakia,

baibua ketabuna murinai ke'au.

<sup>12</sup> Pokina Obiapaka mahana hanona

aka bero haukia neihanakia, haiana hanona ekia noinoi nibahubahu ainakia,

'a Obiapaka wairana hanona aka ki'a haukia niwairanakia ni'oatanakia."

Sal 34.12-16

<sup>13</sup> Wai aka namona tonuaki'aina katobabaina hanona tai kehore wai keba haiaranimi? <sup>14</sup> Ia aka berokia katobabainakia mo katohau haiara raninai wai hanona katonamo Tirama wairanai. "Ekia bai'oata 'abikia a'i katota'u ainakia aomi a'i kearo'ari." <sup>15</sup> 'A Keriso hanona aomiai katomariki aina emi Obiapaka robena. Ba rani ikoinai katoba'oru, emi buabenai weiana aomiai nemiaho hauna anina katebakai bakai aina maearimakia ekia bakaibakai 'abina katobamuena mai baibuami abomo mai marikimi. <sup>16</sup> Rani ikoinai emi mauri aonai aomi kebero Tirama wairanai. Weiana maearima weiakia emi aka namokia Keriso aonai tubabai haukia tehinabe ki'anumi haukia aka weiakia katehore kateba haumaeanakia. <sup>17</sup> Pokina Tirama ena nuatae raninai aka namonai katohau haiara hanona enamo, emi aka ki'a paunai katohau haiara hanona a'i enamo.

<sup>18</sup> Pokina Keriso rani hamonai e'ari ki'a ia'lobokia akakia ikoinai paunai, ia beho aha'i hauna ehore beho haukia 'ekakiai e'ari pokina keaoainaka Tirama herena. Hauanina teahu 'arina, ia

aubai emauri mue. <sup>19</sup> Keriso hanona aubai eao tekaibunakia aubakia herekia eiroronakia. <sup>20</sup> Auba weiakia hanona 'uaina 'akinai Noa aunohi ebabaina raninai, maearima weiakia Tirama aiana a'i teka'aina ia aona eba pahihina eba'i'ima kateraona kabe haukia. Ia aunohi weiana aonai hanona a'i tebo'o, haukia 'ababani mo bei weiana aonai ebamaurinakia. <sup>21</sup> Ibabataina bei hanona 'uere robe weiana Iesu Keriso ena mikiri mue paunai wai nibamaurinimi hoana, hauanini 'opuna katoutuna paunai aha'i ia kato'abi'uai\* aomi mai mahamahakia Tirama wairanai. <sup>22</sup> Keriso hanona aba kupai ekara'au, bariu Tirama itipana tainai marikiaina 'ekanai emiati, aneru, obia aubakia mai hiabu haukia ikoikiai nipoki ainakia.

## 4

### *Eka Mauri Katehaeai.*

<sup>1</sup> Keriso hauanai ai ehaiara buonai, wai abomo raona weiana ihobonai aomi katoba taburranakia, pokina hauani kehaiara hauna hanona ki'a kehabonakia. <sup>2</sup> Ua buonai emi mauri ranikia ikoikiai aokiai hauani ena nuatae ki'a obokia a'i katobabai, ia Tirama ena nuatae akakia katobabainakia. <sup>3</sup> 'Uainai wai hanona rama haeai haukia ekia nuatae ihobokiai tomiaho. Maha pore-pore, nuatae ki'a obokia akakia tobabai, toinu 'ari, tobaripu ripu, tobapo'o po'o, kaiba'uku tokuti ainakia. <sup>4</sup> Bariu maearima weiakia hanona tetu'uta'u huri tehinabe ki'animi, pokina wai ia kipokia a'i tubahamomo a'i tubaripu ripu paunai. <sup>5</sup> A ia hanona ekia babai paukiai aba eba'oru mauri mai 'ari haukia kebakainakia Tiramana wairanai katekoroti ekia pou katehina. <sup>6</sup> Weiana paunai pou namona 'ari haukia herekiai eiroro aina, ia abokiamo hauanikia hanona bakai tea'ina maearima ikoikiai 'abana, 'a aubakia hanona

katemauri Tirama ena nuatae ihobona.

### *Tirama Ena Aoko'o Hoakia I'ima Haraikia Haukai Kahaao.*

<sup>7</sup> Taba ikoikiai ekia pua hanona aba nimai, ua buonai kipomi katoraona harainimi aomi katoba kironakia ba katobahuba'ari. <sup>8</sup> 'A apa'uana tohana hanona 'abami katoraona'au ainakia mai aomi ikoikiai, pokina raona'au hanona ki'a bo'ona nibahu abunakia. <sup>9</sup> Emi ituai 'abami ha ha katoa'i taeanakia ia a'i katoururu ainakia. <sup>10</sup> Tirama wai ha ha ena aoko'o hoanai beruberu ebenimi, weianai ha ha katobarainimi Tirama ena aoko'o hoana haeai haeai i'imana haumi namomiai katoao. <sup>11</sup> Hau ha keiroro raninai ia hanona 'abi weiana Tirama herenai nimai hauna ihobonai keiroro aina, haeamona hau ha nenuatae kebarai barai, weiana hanona Tirama tabura ebena hauna ihobonai keakaina. Taba weiakia ikoikia aokiai Tirama atana kahabanamona Iesu Keriso paunai. Nuabi mai hiabu ia 'euna keaomo banaibana. Amen.

### *Kahahaiara Keriso Ena Maearimai Nahaeao Paunai.*

<sup>12</sup> E'u raona'au haumi e, baihobo haiarana 'eumi katerama hanona a'i katokai'au kai'au a'i katoraona taba haeai ha 'eumiai erama. Aha'i. <sup>13</sup> A katoaonamo, pokina wai hanona Keriso ehau haiara 'abanai tuhau haiara, Keriso ena nuabai kewaira tina aonai katoaonamo wajrai. <sup>14</sup> Wai Keriso ena maearimai paunai tehinabe ki'animi raninai, banamona hanona wai 'eumi pokina Tirama ena Auba weiana nuabi Auba Robena hanona wai ahamiai. <sup>15</sup> A'i enamo wai ha kehau haiara ahuhu paunai 'ao bainao paunai 'ao aka ki'a paunai 'ao maearima haeai ekia aka aokiai nitoto paunai. <sup>16</sup> A wai ha kehau haiara Keriso ena maearima paunai, ia hanona a'i kehaumaea 'a Tirama kebanamona ata welana ea'ina paunai.

\* 3:21: (21) 'ao tiao

17 Pokina ranina aba ekara'au Tirama ena maearima herekiai bakai kea'i ramana. Aika keba'uai ainaka raninai weiakia Tirama ena pou namona a'i tea'i taeana haukia herekiai hanona aea kepua aiho? 18 Puka robenai na terere aihona,

"Aka bero haukia bamauri ia'inai katearo'ari raninai Tirama a'i tia'i taeana haukia mai ki'a haukia aea katekori 'ini aiho?"

19 Ua buonai weiakia Tirama ena nuatae paunai tihau haiara haukia hanona aka namokia mo katebabai, aubakia hanona ebabainakia Tiramana aia nibabua 'auna hauna imana aonai kateutanakia.

## 5

### *Tirama Ena Mamoe To'una Katoiha 'Ininakia.*

1 Wai baiatamiae Tirama ena marea kiro haumi nabahi ahinimi, au abomo kiro hau'u, Keriso ehau haiara hanona au maha'uai aihana, nuabina kewaira tina aonai au mai e'u itau. 2 Tirama ena mamoe to'una i'imakia haumiai katoao katoiha 'ini harainakia Tirama ena nuatae ihobonai. Baoao baoaoai a'i katobabaina, ia aomi mai nuatae tohanai katobabai. Moni paunai a'i katoaka ia aomi mai aonamonai katoiha 'ininakia. 3 Wai katoiha 'ininakia haukia herekiai ekia poki haumiai a'i katoao, ia herekiai ibabatai namokia haumiai katoao. 4 Weiana mamoe i'ima poki hauna Keriso kekara'au raninai wai hanona 'ara ibahuabuna\* nuabina a'i ke'akauma 'apua hauna katoa'ina.

5 Hau 'aru'arumi e, taeara ihobonai kiro haukia aiaikia katona, ikoimiai kipomi 'aiaunu ai katobarainimi, pokina Puka robenai ererena etibaha, "Tirama hanona apa haukia niwae'e ainakia, 'a 'aiaunu haukia hanona keaoko'o ainakia."

\* 5:4: (4) obia ibau'una

Aot 3.34

6 Ua buonai kipomi katoba'aera 'aeranimi Tirama ena hiabu ba'anai kato'aiaunu, rani kemai aonai ia kehore wai kea'i taeanimi. 7 Aomi ekia aro'ari ikoikiai Tirama herenai katohorotinakia, pokina ia hanona wai ne'imanimi.

8 Katoraona harai kato'ima 'ima harainimi. Emi 'ou hauna tiaporu hanona wai heremai nikabanai kabani neiki matoha mahi apa'uana atana laiona 'abana nibaitabu hau ha petonona hanona niraonana. 9 Emi a'ikakaumai katokori 'ini tiaporu katokaibuna, pokina to'iorina uaho'abami maikoinai hanopaka neiana aonai hanona hau haiara ihobona mo tihoaina. 10 Aoko'o hoana ikoinali pokina Tiramana weiana Keriso aonai eaparinimi ena miaho banaibana nuabina aonai kebaka totonimi hauna kehore wai rani papana mo katohau haiara, murinai ia kipona kebabero 'aunimi, keba pahihinimi, kebatuburanimi, keba kori 'ini harainimi. 11 Hiabu ikoikiai hanona Tirama 'euna keaomo banaibana. Amen.

### *Banamo 'Abina Orena.*

12 Sila ena baraibarai ai au marere papana neiana arere ko'ona. Au aihana ia hanona uaho'abaka tohana. Au arere benimi hanona aomi kabataburana mai kahina pouna Keriso paunai kahahau haiara hanona Tirama ena aoko'o hoana tohana. Wai aoko'o hoana neiana aonai katokori 'ini.

13 Tirama ena marea maearimakia Babulono ai temiaho wai kipokia Tirama ea'i taeanimi haukia tehore ekia banamo 'abikia tebenimi, Mareko a'ikakaumai naha'u abomo ena banamo 'abina ebenimi. 14 Raona'au hoana baipaunai ha ha emi banamo katobaibenai.

Au nabahuba'ari Keriso aonai tomiaho haumi ikoimiai baibua aonai katomiaho.

## Marere Ibaruana PETERO Ererena Hauna

### Puka Aona Irerena 'Abina

Marere neiana tererena ena pokina hanona a'ikakauma haukia kehina benakia ia hanona ba'iobi haukia bai'oikia baika robakia a'i kateahu 'apuana. Ia haukia hanona aba maearima kipokia tibahamomo ekia a'ikakauma mai ekia miao maurina namona katea'i ki'anakia. Puka neiana nihore maearima nehina benakia 'abi weiakia 'uainai iuhubeau haukia tebenakia haukia katea'i 'ininakia, pokina 'abi weiakia ia Tirama mai Obiapaka Iesu Keriso kate'iobi harainakia. Iuhubeau haukia hanona mahakiai Iesu teihana abomo haiakiai ena ba'iobi 'abikia aiakia teo'o. Maearima baika ti'abi Iesu hanona a'i kemue a'i kemai paunai, puka neiana ni'abi Iesu hanona kemue kemai toha, iamo bariu beronai a'i kemai, weiana anina hana nahomana. Tirama hanona nenuataea maearima ikoikiai kateraona kabe, ua buonai ia hanona nibai'ima mai bakirona (3.9).

### Puka Paipana Apa'uakia

- Roba iahu. (1.1-2)
- Tirama ena apari. (1.3-21)
- Ba'iobi haukia bai'oikia. (2.1-22)
- Obiapaka ena mai mue. (3.1-18)

### Banamo 'Abina.

<sup>1</sup> Au, Simona Petero, Iesu Keriso ena ta'ara'i mai Iuhubeau hau'u, e'u marere narerena niwahi weiami eka Tirama mai ibamaurika hauna Iesu Keriso ekia bero paunai a'ikakauma namo abuna toa'ina ihobona ai 'abamai haumi heremi. <sup>2</sup> Nabahuba'ari emi aotipa Tirama mai eka Obiapaka herekiai keapa'ua, weiana aoko'o hoana mai baibua 'eumiai hauna hanona keapa'ua hao apa'ua hao.

### Tirama Ena Apari Mai Ena A'itaea.

<sup>3</sup> Keriso hanona Tirama ena hiabuai taba ikoikiai kahanuatae ainakia haukia ebenaka weiakiai aika mauri tohana aonai kahamiaho mai Tirama ikutiaina kahamiaho, weiana hanona aika eaparinaka ena namo mai nuabi ebenaka Tirama ha'iobina paunai etaina.

<sup>4</sup> Taeara neianai ia ehore ibeni rarikia mai namoabukia e'abi'uai ainakia haukia ebenaka, weiana ibeni neiakia katehore hanopaka ena raonaraona ki'a obokia katea'i ki'anaka haukia herekiai kateba kaparenaka kahamai Tirama ihaihana aonai kahamiaho haeamo.

<sup>5</sup> Ibeni neiakia paukiai katababura, emi a'ikakauma ahanai babai namo katohore 'auna, haeamona emi babai namo ahanai aobero katohore 'auna, <sup>6</sup> emi aobero ahanai bakiro katohore 'auna, emi bakiro ahanai bapahihi katohore 'auna, emi bapahihi ahanai Tirama imarikiaina akana katohore 'auna, <sup>7</sup> emi aka Tirama imarikiaina hauna ahanai uaho'aba hoahoana katohore 'auna, emi uaho'aba hoahoana ahanai raona'au katohore 'auna.

<sup>8</sup> Babai namokia neiakia katobabai taburanakia 'eumiai kateao raninai, emi 'obi eka Obiapaka Iesu Keriso herenai hanona katetabura haeamona katebatohana. <sup>9</sup> Ia maearima ha neiakia a'i kebabainakia raninai ia hanona mahana tek'i'a, a'i neihaiha haeamona ena ki'a 'ai'aikia Tirama ehina haonakia haukia hanona aba ereanakia.

<sup>10</sup> Ua buonai uaho'aba'u e, Tirama eaparinimi mai etina'animi ena maearimai toao weianai kato tabura haeamona katobatohana. Weiana katobabaina raninai a'i kato'eho. <sup>11</sup> Taeara neianai wai hanona bero maikoina kebenimi eka Obiapaka mai bamauri hauna Iesu Keriso ena obia aiarana nemiaho banaibanai hauna aonai katokatoto.

<sup>12</sup> Ua buonai wai Tirama ena 'abi tohana aba to'iobi haraina haeamona toa'ina haunai aba tua'i to'o,

iamo rani ikoikiai hanona taba neiakia ikoikiai kabaraonanumi.<sup>13</sup> Au maurimauri'u hauani'uai namiaho oho aonai naraonana taba neiakia aomiai kabaraona muenimi hanona ebero.<sup>14</sup> Pokina eka Obiapaka Iesu Keriso ehinabe haraina'u ihobonai a'iobina hauani'u neiana hanona aba kahabona paunai.<sup>15</sup> E'u tabura tohana kahorotina emi taeara ha kababaina ba e'u 'ari murinai hanona taba neiakia ikoinai katoraona 'ininakia.

*Keriso Ena Nuabi Mahamai ai Taihana Haumai.*

<sup>16</sup> Eka Obiapaka Iesu Keriso ena hiabu mai ena mai hanopakai hauna 'abina taba'iobinimi aonai hanona hanopaka ena aotipa orina ha a'i takikipana, ia hanona ai mahamai tohanai mai ena hiabu hauna taihana.<sup>17</sup> Iesu mariki hoana mai nuabi Hamana Tirama herenai ea'ina aonai aia ha ea nuabina tohana aonai eriri emai etibaha, "Neiana hanona au Naha'u, e'u raona'au hauna, naonamoai ki'a bahana."<sup>18</sup> Weia oeo robenai Iesu kipokia tamiaho aonai ai kipomai tohana aia neiana kupai emai hauna taona.<sup>19</sup> Ua buonai mahabanai haukia 'abi tehinana hauna tabatohana. Wai abomo ekia 'abi katobahuai haraina hanona kenamo matoha ramepa eana wapura aonai ni'ara 'abana, keaomo kupa kebaeana ba raurani bihiuna aomiai kerara.

<sup>20</sup> Taba ikoikiai 'arakiai neiana hanona katoraona 'ini apa'uana, Puка robena 'abikia hanona mahabanai hauna ha kipona ena raona 'abina a'i ehinana.<sup>21</sup> Pokina mahabanai 'abina hanona maearima ha ena nuataeai a'i emai, ia maearima weiakia Auba Robe ena hiabu aonai temiaho haukia tehore Tirama raona ebenakia haukia 'abikia tehinana.

## 2

*Mahabanai Bai'oikia Haukia  
Ekia Hoahoа Ki'a Obokia.*

<sup>1</sup> 'Uainai Isaraela haukia baiatakiai mahabanai haukia bai'oikia baika temiaho ihobona mo ba'iobi haukia bai'oikia baika baiatamiai katewaira tina. Ekia ba'iobi bai'oikia weiakia emi a'ikakauma katea'i ki'ana haukia tiba'obiai, Obiapaka weiana aruarunai ekawanakia hauna tebuniaina, weiana kipokia ibapururukia akana tibabai noanoana.<sup>2</sup> Maearima bo'ona ia taikia katetai nabau hoakia katebabai, ba babai weiakia paukiai maearima Tirama ena 'abi tohana herenai kate'abi ki'a.<sup>3</sup> Ba'iobi haukia ekia ao'aea paunai bai'oi orikiai aomi kateani, iamo ekia bakai hanona aba wa'i baha e'oru nemiaho abomo ibapururukia hauna hanona eno'a nibai'ima.

<sup>4</sup> Pokina Tirama aneru tebeho haukia a'i eiha haonakia, ia iruba ni'ara banaibanoi 'ekana aonai ekapo totonakia, weia 'uri wapurana aonai\* temiaho bakai wapuna te'imana.<sup>5</sup> Tirama uru 'ai'aina a'i eiha haona, ia tou ebakarahina Tirama a'i timariki aina haukia ebapururunakia. Ia Noa bero eiroro aina hauna mai 'abana 'abaithau hamomo kipokia eba maurinakia.<sup>6</sup> Tirama ehore Sodoma mai Gomora aiara ki'a obokia puma ebahoainakia ba irubai ehuhu abunakia teaomo teabururu, weiana 'abana hanona Tirama a'i timariki aina haukia herekiae kerama.<sup>7</sup> Tirama ehore bero hauna Lota ebamaurina, ia hanona maearima weiakia rauhubu tikabenakia haukia ekia maha poreporeai aona eatetua.<sup>8</sup> (Pokina bero hauna Lota hanona weia baiatakiai emiaho mara mara ekia babai ki'a eihanakia mai 'urukia eo'o, ba babai weiakia tehore ia aona tebatetuana.)<sup>9</sup> Ua buonai Obiapaka hanona ia timariki aina haukia baihobo aokiae aea kebarobo mauri ai-honakia hauna e'iobina mai aka ki'a haukia puma ihoaina 'ekanai aea kebamiaho aihonakia keaomo bakai wapunai hauna abomo e'iobina).<sup>10</sup> Weiakia ahakiae

\* 2:4: (4) 'ao tabiri ai tebirinakia

hanona hauani ena raona akakia ki'a obokia tika'ainakia ia Tirama ena hiabu a'i timariki aina haukia hanona puma rarina katehoai ki'a bahana.

Ba'iobi haukia bai'oikia neiakia hanona tenuako'o mai tiapa, ekia mariki aha'i weiana nuabi haukia kupai temiaho haukia herekiae ti'abi ki'a.<sup>11</sup> Nuabi haukia weiakia ekia tabura mai ekia hiabu hanona teapa'ua ki'a baha ba ba'iobi haukia bai'oikia neiakia, iamo nuabi haukia hanona Obiapaka wairanai ba'iobi bai'oikia ia'i ki'akia 'abina a'i tehinana.

<sup>12</sup> A maearima nejakia hanona taba obokia a'i tiobo haukia ti'abi ki'a 'abi ki'a, ihobona mahi weiakia ekia raona aha'i ekia nataeai mo temiaho haukia 'abakia maearima ia kate a'inakia kateahu 'arinakia paunai terama, ia abomo katepururu matoha 'aki mahikia 'abana. <sup>13</sup> Ekia aka ki'a weiakia tibabai haukia 'arana ihobo katea'ina. Ia hanona mararanai tohakiae hauani hoahoakia ki'a obokia ibabaikia hanona tiaonamoai, ba kipokia katoaniani haeamona aonai abomo kateba haumaeani mai atami katea'i ki'anakia. <sup>14</sup> Aokia hanona maha poreporeai ebonu nabau mai babai ki'a ibabaikiae a'i tibaoao, babi'e aokia a'i tetabura haukia tiaoainakia ki'a 'ekanai, aokia teuhore mai ia hanona Tirama ena ururu aonai. <sup>15</sup> Ba'iobi haukia bai'oikia neiakia hanona taeara berona aba tereana mai tiaru 'abaea aru 'abaea Beor nahuna mahabanai hauna Balam murinai tika'a, ia hanona aka ki'a 'arana moniae kea'ina hauna eraona'auai ki'a bahana. <sup>16</sup> Ena babai ki'a paunai kipona ena doniki 'abi a'i ne'ioquina hauna ehore maearima maeakiae ia erikena, weiana mahabanai hauna aona ea ena ao'abaea weiana ka'ana niaoaina hauna ebapuana.

<sup>17</sup> Maearima neiakia hanona matoha ateate weiakia beikia te'ororo haukia 'abana ekia 'abi anina aha'i 'ao baura taburana 'auhao niabuao abuaona 'abana

abar a'i nimaiaina, ba Tirama 'eka ewapura ki'a baha hauna aba eba'oruna ia 'eukia. <sup>18</sup> Ekia apa mai po'o 'abikia tehina abomo maha porepore hoahoakia ki'a obokia tibabai maearima weiakia bariu mo beho 'ekakiae temiaho haukia baiatakiae tikarahi haukia katemue ainakia. <sup>19</sup> Ia ti'abi'uai weiakia hanona ki'a ta'arana a'i katea'i, iamo ia kipokia hanona ki'a akana weiana tibabaina hauna ta'arana ia'ina haukiae tiao, pokina taba ha maearima ena mauri nipoki aina raninai ia hanona weiana ta'arana ia'ina haunai niao. <sup>20</sup> Maearima hanopaka maurina 'opunai tikarahi timai eka Obiapaka Bamauri hauna Iesu Keriso te'ioquina haeamona temue hanopaka ena ki'a aonai ba nipoki ainakia raninai, maearima uahomakia hanona herekiae keki'a ki'a baha ba 'uainai mauri temiaho aina hauna. <sup>21</sup> Maearima uahomakia hanona taeara berona a'i pate'ioquina hanona penamo, ia te'ioquina haeamona rauhubu robena tebenakia hauna herenai tikaobo hanona a'i enamo. <sup>22</sup> Aobero 'abina ia herekiae hauna hanona etoha, "Waeha nemue kipona eaiora hauna niani, mai aiporo e'uere harai 'aki ia haeamona nemue niao tipuai neno tao'atao'a."

### 3

#### *Obiapaka Ena Mai 'Abi'uaina.*

<sup>1</sup> E'u hau ki'ami e, bariu neiana hanona e'u marere ibaruana narerena niwahi heremi, marere kori'uaina mai neiana ohi arerenakia hanona taba neiakiae nabaraona muenimi weiana emi raona raona katebero harai. <sup>2</sup> E'u nuatae hanona 'abi aba wa'i baha 'akinai mahabanai haukia tehinanakiae haukia mai rauhubu 'abikia weiakia eka Obiapaka mai Bamauri hauna ena iuhubeau haukia teuhore tebaibenai haukia katoraona 'ininakiae.

<sup>3</sup> Kori'uaina kato'iobi haraina weiana rani orekia aokiae bapo'o po'o haukia baika katekarahi,

ia ekia mauri hanona kipokia hauanikia ena nuatae ne'uai ainakia haukia, wai katebapo'onimi, <sup>4</sup> na kate'abi aiho, "Iesu e'abi'uai kemai, uhe? Ba ia ae'e? 'Aba'abaka aba te'ari ore, 'a taba ikoikiai hanona 'ekakiai mo hanopaka erama raninai emai mo bariu." <sup>5</sup> Iamo ekia 'abi hanona a'i tebero 'abi tohana hanona a'i tiraona 'inina, weiana wa'i baha 'akinai Tirama ena 'abiai kupa mai hanopaka terama, ba hanopaka hanona 'akupaka aonai ekara 'au erama mai 'aku ehore hanopaka ekakaiaronia. <sup>6</sup> Haeamona bei ehore hanopaka 'ai'aina touai ebapururuna. <sup>7</sup> Tirama ena 'abi hamonamo weiana ehore kupa mai hanopaka bariu temiaho haukia ea'i 'ininakia irubai kebapururunakia, ia keaomo Tirama a'i timariki aina haukia ekia bakai mai pururu wapunai.

<sup>8</sup> E'u hau ki'ami e, taba hamona neiana hanona a'i katoreana, Obiapaka wairanai wapu hamona mai ihau taha hamona (1,000) hanona ekia haeai aha'i, terarua hanona ihobo. <sup>9</sup> Obiapaka hanona a'i emahari ena 'abi'uai akakia ibabaikiai, baika tiraonana 'abana aha'i, ia hanona oi nibahuaini'o pokina a'i nenuatae hau ha a'i ke'akauma, ia nenuatae maearima ikoikiai ekia ki'ai kateraona kabe.

<sup>10</sup> 'A Obiapaka ena rani kemai hanona matoha bainao hauna 'abana, rani weianai hanona 'uru rarina 'akina kebua aonai kupa kate'akauma, kupa aona tabakia ikoikiai irubai kateara, haeamona hanopaka mai ahanai tabakia ikoikiai kate'akauma.\* <sup>11</sup> Taba ikoikiai hanona ua katepururu aiho raninai, wai hanona maearima aea homamiae patoao? Emi mauri hanona katerobe mai Tirama imarikiaina maurinai katomiaho. <sup>12</sup> Tirama ena mai wapuna to'imana aonai katoaka tabura wapu weiana ena mai kenoanoa. Wapumo weianai

hanona kupa kate'ara 'akauma mai kupa tabakia iruba hiabunai kateobo. <sup>13</sup> Ia aika hanona Tirama e'abi'uai aina hauna naha'imana, weiana hanona kupa mai hanopaka mahamahana aka bero haukia mo katemiaho aina 'ekana.

<sup>14</sup> Ua buonai, e'u hau ki'ami e, wapu weiana to'imana aonai katoaka tabura, ki'a a'i katobabai mai a'i katobeho Tirama wairanai haeamona mai baibuami ia kipokia katomiaho. <sup>15</sup> Katoraona 'inina eka Obiapaka ena bakiroai hanona aika kebamaurinaka. Uaho'abaka eka raona'au hauna Paulo aobero weiana Tirama ebena haunai 'abi ihobona erere benimi. <sup>16</sup> Ena marere ikoimai aokiai taba neiakia robakia eahunakia, taba baika hanona tepahihi mai obokia a'i kahaobo, weiana maearima ekia 'obi teko'iko'i haukia mai aokia a'i tepahihi haukia tihere 'abi anina tehina ku'a banaina ihobona Puka robena 'abina baika tibabaina 'abana. Weiana tibabaina hanona ia kipokia kateba pururunakia.

<sup>17</sup> Ua buonai, uaho'aba'u ki'ami e, wai neiana to'ibina hanona kato'ima 'ima harainimi, weiana rauhubu tikabena haukia ekia beho a'i temeba kaparenimi, a'i tomo'eho marikina. <sup>18</sup> Ia eka Obiapaka mai Ibamaurika hauna Iesu Keriso ena aoko'o hoana mai ia i'iobinai katoapa'ua. Nabahuba'ari nuabi hanona ia herenai bariu keao mo baibaibanai. Amen.

\* 3:10: (10) 'ao katewaira tina.

## Marere Kori'uaina IOANE Ererena Hauna

### Puka Aona Irerena 'Abina

Marere neiana ena poki hanona rua. Ioane nenuatae a'ikakauma haukia kebarainakia, weiana ia mai Tirama aika Hamaka, mai Nahuna Iesu Keriso ohi kipokia aokia kehamomo. Ibaruana hanona ia a'i nenuatae bai'oi haukia timai ti'oinkia ekia a'ikakauma Tirama herenai hauna katea'i parena. Maearima neiakia ekia hoahoa hanona wapurai temiaho ba na ti'abi aih, "Hanopaka neiana tabakia hanona a'i tenamo. Iesu hanona Tirama nahuna, ua buonai ia maearimai a'i kemai, hanopaka neiana tabakia kipokia a'i katemai-ho haeamo, aika maearima nahababaina 'abana hanona a'i ketai 'apuana." Haeamona ti'abi, "Maearima ha nenuatae kemai-ho harai Tirama herenai raninai, ia hanona hanopaka neiana tabakia a'i keaonamo ainakia, weiakia paukiai aona a'i kearo'ari."

Marere neiana ererena hanona ba'iohi neiakia aiakia tibahuai haukia nibaki'a tohanakia. Ia ni'abi Iesu hanona emai ia hanona maearima tohana, ba weiakia Iesu tia'ikakaumana haukia hanona Tirama katenuataeai tohana mai maearima abomo kateaonamo ainakia.

### Puka Paipana Apa'uakia

- Roba iahu. (1.1-4)
- Ea mai Wapura. (1.5—2.29)
- Tirama nahuna mai tiaporoh nahuna. (3.1-24)
- 'Abi tohana mai beho. (4.1-6)
- Raona'au hoana. (4.7-21)
- A'ikakauma ena hiabu. (5.1-21)

### Mauri 'Abina.

<sup>1</sup> Au bariu pou narere benimi hanona hau weiana popouna 'akinai emiaho hauna, weiana

hauna haiamaiai taona, mahamai taihana, mahamai tohanai taiha haraina mai imamaiai ta'i apuana. Ia hanona Mauri 'Abina Keriso weiana mauri pokina hauna. <sup>2</sup> Mauri neiana hanopakai ewaira tina, Mauri banaibana hauna Keriso neiana taihana paunai pouna tahinana tairoro aina heremai. Ia hanona Hamana ohi temiaho ba heremai ewaira tina. <sup>3</sup> Ai taba taihana abomo uruna taona hauna tairoro aina heremai hanona wai mai ai kipokia kahabahaeamo. Eka bahaeamo hanona Hamaka mai Nahuna Iesu Keriso aba aika kipokia. <sup>4</sup> Ai tarere benimi ena poki hanona kipokia kahaonamo haeamo.

### Tirama Hanona Ea.

<sup>5</sup> Pou Keriso herenai taona hauna bariu tairoro aina heremai hanona neiana. Tirama hanona ea, Ia aonai hanona wapura ha aha'i 'akina. <sup>6</sup> Aika paha'abi Tirama kipokia nahaba haeamo iamo wapura aonai nahaka'a raninai aika hanona nahabai'oi mai Tirama ena 'abi tohana a'i nahaka'aina. <sup>7</sup> Ia Tirama ea aonai nemiaho 'abana aika eai nahaka'a raninai aika hanona 'abaka kipokia kahabahaeamo, Nahuna Iesu aruarunai eka ki'a ikoikiai neutu obonakia.

<sup>8</sup> Aika paha'abi eka ki'a aha'i raninai aika kipoka nahabapo'onaka abomo Tirama ena 'abi tohana hanona aokai aha'i. <sup>9</sup> Ia aika eka ki'a Tirama wairanai kahahina pounakia raninai ia hanona aia ibabua 'auna hauna mai bero hauna ba eka ki'a kehina haonakia abomo eka beho ikoikiai keutu obonakia. <sup>10</sup> Aika paha'abi ki'a ha a'i hababaina raninai Tirama hanona bai'oi haunai nahabaona, abomo ena 'abi hanona aokai aha'i 'akina.

## 2

### Keriso Hanona Aika Ibaraika Hauna.

<sup>1</sup> Naha'u ki'ami e, au neiana narerena niwahi heremi hanona

wai ki'a ha a'i katobabaina paunai. Ia hau ha ki'a nibabaina raninai aika ibaraika hauna ha nemiaho Hamana kehina bena aika paukai, ia hanona bero hauna Iesu Keriso.  
<sup>2</sup> Ia kipona ena mauri ebaibeni bairarao tabanai eao eka ki'a ihina haona paunai, aika ikupaiaka mo paukai aha'i ia maearima ikoinai\* ekia ki'a paunai.

<sup>3</sup> Aika Tirama ehina benaka 'abikia nahaka'a ainakia raninai kaha'ioquina aika hanona Tirama ha'ioquina.

<sup>4</sup> Hau ha pe'abi petibaha, "Au Tirama a'ioquina," ia Tirama ena rauhubu a'i nika'ainakia raninai, hau weiana hanona bai'oi hauna, ia aonai Tirama ena 'abi tohana hanona a'i nemiaho. <sup>5</sup> Hau ha Tirama ena 'abi nika'ainakia hauna hanona Tirama niraona'auai† tohana. Weianai kaha'obi haraina aika hanona Tirama herenai nahamiaho. <sup>6</sup> Hau ha ni'abi ia Tirama herenai nemiaho hauna hanona Iesu emauriaina maurina ihobonai kemauri.

#### *Rauhubu 'Abina Mahamahana.*

<sup>7</sup> E'u hau ki'ami e, rauhubu 'abina neiana narerena niwahi hauna hanona mahamahana aha'i, ia rauhubu 'abina 'ai'aina aba 'uainai toa'ikakauma aonai toa'ina, rauhubu 'abina 'ai'aina neiana hanona aba to'ona 'abina. <sup>8</sup> Iamo rauhubu 'abina neiana hanona mahamahana, anina tohana hanona Keriso mai wai heremai aba nahaihana, pokina wapura hanona aba nikapare, ea tohana aba nirara.

<sup>9</sup> Hau ha ni'abi ia hanona ea aonai nemiaho, iamo uaho'abana 'arina a'i ni'ari hauna hanona bariu wapura aonai nemiaho ohomo. <sup>10</sup> Hau ha uaho'abana niraona'au aina hanona ea aonai nemiaho, ba herenai ki'a aha'i, hau ha a'i kebabehona. <sup>11</sup> Ia hau ha uaho'abana 'arina a'i ni'ari hauna hanona wapura aonai nemiaho mai wapura aonai nika'a. Wapura ehore ia mahana

aba ekaiabunakia buonai, aeana niao hanona a'i ne'ioquina.

<sup>12</sup> Naha'u ki'ami e, narere benimi ena pokī hanona emi ki'a Keriso atanai aba ihina hao.

<sup>13</sup> Hamamai haumi e, narere benimi ena pokī hanona wai hau weiana popounai emiaho emai mo bariu hauna aba to'ioquina.

Hau 'aru'arumi e, narere benimi ena pokī hanona wai hau ki'a obona aba toba'ehona.

<sup>14</sup> Naha'u e, narere benimi ena pokī hanona wai Hamaka to'ioquina. Hamamai haumi e,

narere benimi ena pokī hanona wai hau weiana popounai emiaho emaimo bariu hauna aba to'ioquina.

Hau 'aru'arumi e, narere benimi ena pokī hanona tutabura Tirama ena 'abi wai aomiai nemiaho ba hau ki'a obona aba toba'ehona.

<sup>15</sup> Hanopaka mai aonai temiahi tabakia ikoinai a'i katoraona'au ainakia, iamo hau ha hanopaka niraona'au aina raninai, ia hanona Hamaka a'i niraona'auai tohana. <sup>16</sup> Pokina hanopaka aona tabakia ikoikiai hanona hauani ena nuatae ki'a tabakia katebabai, maha ena nuatae ki'a tabakia kateiha, mai obia tabakia kateapainakia, uahomakia ikoikiai hanona Hamaka herenai a'i timai ia hanopaka herenai timai.

<sup>17</sup> Hanopaka mai aona inuatae aina tabakia ikoikiai aba ti'akauma ore, ia Tirama ena nuatae akana tibabaina haukia hanona katemaui banaibana.

#### *Keriso Ena 'Ou Hauna.*

<sup>18</sup> Naha'u e, hanopaka kepua ranina hanona aba ekara'au. Pou aba tonā Keriso ena 'ou hauna nimai, ia bariu Keriso ena 'ou haukia bo'okia hanona aba tewaira tina. Ua buonai aika ha'ioquina rani puana hanona aba

\* 2:2: (2) 'ao hanopaka maikoinai

† 2:5: (5) 'ao Tirama ena raona'au ia aonai

ekara'au. <sup>19</sup> Maearima weiakia hanona herekai tekarahi pokina ia hanona aika 'abaka tohakia aha'i. Ia aika 'abaka haukia raninai, aika kipokia pahamiaho haeamo. Iamo ekia ka'a oboai kaha'iobi haraina ia hanona aika 'abaka aha'i.

<sup>20</sup> Ia wai hanona Auba Robe weiiana Robe hauna Keriso ebaiben'i hauna aba toa'ina aomiai, ua buonai wai ikoimiai Tirama ena 'abi tohana to'ioquina.<sup>‡</sup> <sup>21</sup> Au wai narere benimi hanona Tirama ena 'abi tohana a'i to'ioquina paunai aha'i, ia wai hanona Tirama ena 'abi tohana aba to'ioquina. Ba wai aba to'ioquina bai'oi hanona Tirama ena 'abi tohana herenai a'i nimai. <sup>22</sup> Bai'oi hauna hanona tai? Ia hauna ni'abi Iesu hanona Keriso aha'i. Maearima uahomana hanona Keriso ena 'ou hauna, ia hanona Hama mai Nahu ohi nebuniainakia. <sup>23</sup> Hau ha Nahu nebuniaina hauna hanona ia herenai Hama aha'i. Hau ha Nahu nibatohana hauna hanona Hama abomo ia herenai.

<sup>24</sup> Popounai 'abi tona hauna hanona aomiai kemiaho. Tona 'abina weiiana katoka'aina raninai, wai hanona Nahuna aonai mai Hamana aonai katomiaho. <sup>25</sup> Neiana hanona Keriso kipona e'abi'uai aika 'euka, mauri naibabai kebenaka.

<sup>26</sup> Narere benimi weiakia ekia nuatae kate'oinimi haukia robakia ahuna. <sup>27</sup> Ia wai hanona Keriso ehore Auba Robe ebenimi aomiai nemiaho, ua buonai maearima ha a'i keba 'iobinimi re'a abetaina. Pokina Auba Robe hanona taba ikoinai niba'iobinimi, ena ba'iobi hanona tohakia, ia a'i nibai'oi. Auba Robe eba'iobinimi ihobonai rani ikoinai Keriso aonai katomiaho.

<sup>28</sup> Naha'u ki'ami e, bariu Keriso aonai katomiaho, pokina ia ena mue mai raninai aika hanona kahatabura abomo a'i kahahaumaea ia wairanai. <sup>29</sup> Wai to'ioquina Keriso hanona bero hauna raninai, kato'iobi haraina maearima weiakia bero akakia

tibabai haukia ikoikiai hanona Tirama nahuna.

### 3

*Tirama Nahunai Nahaeao Hauka.*

<sup>1</sup> Hamaraona harai, Hamaka ena raona'au herekai eapa'ua ki'a baha ba eaparinaka aika hanona Tirama nahuna. Aika hanona ia nahuna tohaka. Hanopaka haukia a'i te'iobinaka ena poki hanona ia Tirama a'i te'ioquina pau-nai. <sup>2</sup> E'u hau ki'ami e, bariu aika hanona Tirama nahuna, ia aika maearima aehomaka hanona a'i niwaira tina harai baha, iamo aika ha'ioquina Keriso kewaira tina raninai\* aika hanona ia 'abanai kahaeao, pokina ia tohana kahai-hana. <sup>3</sup> Maearima ikoinai Keriso herenai buaben'i neianai temiaho haukia hanona kipokia aokia ki'a keaha'i ihobona Keriso aona ki'a eaha'i 'abana.

<sup>4</sup> Hau ha ki'a nibabaina hanona Tirama ena rauhubu ni'oatana, pokina ki'a hanona rauhubu ni'oatana. <sup>5</sup> Ia wai aba to'ioquina Keriso ewaira tina hanona ki'a kea'i pare, ia aonai hanona ki'a ha aha'i. <sup>6</sup> Ua buonai hau ha Keriso ohi temiaho oioi hauna hanona ki'a a'i nibabai to'ona. Ia hau ha ki'a nibabai to'ona hauna hanona Keriso a'i eiha tinana abomo a'i e'ioquina.

<sup>7</sup> Naha'u ki'ami e, hau ha beho babai 'ekakiai a'i meaoainimi. Hau ha aka berona nibabaina hauna hanona ebero, ihobona Keriso ebero 'abana. <sup>8</sup> Ki'a nibabai to'ona hauna hanona Tiapor'o euna, pokina Tiapor'o hanona aba popounai ki'a ebabaina emai mo bariu. Tirama nahuna ewaira tina ena poki hanona neiana, Tiapor'o ena aka kebapururuna. <sup>9</sup> Hau ha Tirama nahunai niao hauna hanona ki'a a'i nibabai to'ona, pokina mauri mahamahana weiiana Tirama herenai emai hauna ia aonai nemiaho. Ia Tirama 'eunai erama paunai ki'a a'i kebabai

<sup>‡</sup> 2:20: (20) 'ao wai Tirama ena 'abi tohana ikoinai to'ioquina. \* 3:2: (2) 'ao ua kehoma raninai

to'ona.<sup>10</sup> Weiana Tirama nahuna mai Tiaporor nahuna baiatakia kaha'iobi haraina. Hau ha aka berona a'i nibabaina 'ao uaho'abana a'i niraona'au aina hanona Tirama nahuna aha'i.

*Aika Ha Ha Kaharaona'au ainaka.*

<sup>11</sup> 'Uainai toa'ikakauma aonai pou tona hauna neiana: Aika ha ha kaha raona'au ainaka.<sup>12</sup> Kaino 'abanai a'i katoao, ia hanona Tiaporor ena maearima, kipona hatina Abela eahu 'arina. Taba buonai Kaino Abela eahu 'arina? Pokina ia ena hoahoa hanona teki'a, ia hatina ena hoahoa hanona tebero.

<sup>13</sup> Uaho'aba'u e, hanopaka haukia 'arimi a'i kate'ari re'a, a'i katota'u ta'u huri.<sup>14</sup> Aika uaho'abaka naharaona'au ainakia paunai ha'ioquina aika hanona 'ari aonai aba hakarahi mauri mahamahana aonai hatoto. Ia hau ha ena raona'au aha'i hauna hanona 'ari aonai nemiaho ohomo.<sup>15</sup> Uaho'abana 'arina a'i ni'ari hauna hanona ahuahu hauna, wai to'ioquina ahuahu hauna aonai hanona mauri banaibaini a'i nemiaho.<sup>16</sup> Keriso ena mauri ebaiben iaka paukai. Neianai aika raona'au tohana hanona taba ha'ioquina. Ua buonai aika abomo eka mauri kahabaiben uaho'abaka paukiai.<sup>17</sup> Herenai taba tebo'o hauna uaho'abana neuraru hauna nei-hana iamo a'i nibaraina raninai, ha'ioquina Tirama ena raona'au hanona ia aonai a'i nemiaho.<sup>18</sup> Naha'u ki'ami e, eka raona'au hanona 'abiai mo mai pinakai mo a'i kahahina 'abaeana, ia eka raona'au hanona eka hoahoa tohanai kahabaiha baiha aina.

*Kahanuako'o Tirama Wairanai.*

<sup>19</sup> Taearea neianai kaha'ioquina aika hanona Tirama ena 'abi tohana kipokia nahamiaho, haeamona aoka ketabura Tirama wairanai.<sup>20</sup> Aoka kehinabe ki'anaka re'a, aika ha'ioquina Tirama hanona eapa'ua ki'a baha ba aika aoka mai ha'iobi tabakia maikoina, abomo ia

hanona taba ikoikiai ne'iobinakia.<sup>21</sup> E'u hau ki'ami e, aika aoka a'i kehinabe ki'anaka raninai aika mai taburaka Tirama wairanai kahakoroti.<sup>22</sup> Ba herenai taba ikoikiai kahanoi haukia kebenaka, pokina ena rauhubu 'abina nahaka'aina mai ibaonamona akana nahababaina.<sup>23</sup> Tirama ena rauhubu 'abina hanona neiana, aika Ia Nahuna Iesu Keriso atana kaha'ikakaumana mai ehina benaka 'abana, ha ha kaharaona'au ainaka.<sup>24</sup> Tirama ena rauhubu 'abina nika'aina hauna hanona Tirama aonai nemiaho, Tirama abomo ia aonai nemiaho. Tirama Auba Robe ebenaka paunai, aika ha'ioquina Tirama hanona aika aokai.

## 4

*Tirama Aubana Mai Auba Ki'a Obona.*

<sup>1</sup> E'u hau ki'ami e, Auba Robe tea'ina na tiho haukia ikoikiai ekia 'abi a'i katoba tohanakia, ia katohobo 'uainakia kato'ioquina auba weiana hanona Tirama herenai emai 'ao. Pokina mahabanai haukia bai'oiquia bo'okia hanopakai aba tewaira tina 'eka maikoinai.<sup>2</sup> A wai Tirama ena Auba Robe ea'ina hauna hanona taeara neianai ko'ioquina: Hau ha kehina pouna Iesu Keriso hanona hauaniai emai hanopakai raninai, auba weiana ia ea'ina hauna hanona Tirama herenai emai.<sup>3</sup> Ia auba ha Iesu neburiaina hanona Tirama herenai a'i emai. Auba weiana hanona Keriso ena 'ou hauna Tiaporor herenai emai. Pouna tona kemai ia aba emai bariu hanopaka neiana aonai.

<sup>4</sup> Naha'u ki'ami e, wai hanona Tirama 'euna, mahabanai haukia bai'oiquia toba'ehonakia, pokina Tirama ena Auba aomiai nemiaho hauna etabura ki'a baha ba tiaporor weiana hanopaka haukia herekiai.<sup>5</sup> Ia mahabanai bai'oiquia hanona hanopaka 'euna, ua buonai hanopaka 'abikia mo tehananakia hanopaka haukia ia aiaikia tiona.<sup>6</sup> Ia aika hanona Tirama 'euna, hau ha Tirama

e'ioquina hauna hanona aiaka keona, ia hau ha Tirama 'euna aha'i hauna hanona aiaka a'i keona. Ihaiha nahomanai 'abi tohana aubana mai bai'oi aubana hanona aba kaha'iobi ainakia.

### *Tirama Hanona Raona'au.*

<sup>7</sup> E'u hau ki'ami e, ha ha hamaraona'au ainaka, pokina raona'au hanona Tirama herenai emai. Niraona'au hauna hanona Tirama nahunai niao, abomo Tirama ne'ioquina. <sup>8</sup> 'A a'i niraona'au hauna hanona Tirama a'i e'ioquina, pokina Tirama hanona raona'au. <sup>9</sup> Tirama hanona ena raona'au na ebaiha aihonaka, Nahuna hamo hamona euhuna emai hanopakai, weiana ia paunai aika kahamauri. <sup>10</sup> Raona'au tohana hanona neiana: Aika Tirama a'i haraona'au aina, ia Tirama aika eraona'au ainaka paunai Nahuna euhuna emai aika eka ki'a ihina haona tabanai eao.

<sup>11</sup> E'u hau ki'ami e, Tirama hanona na eraona'au aihonaka buonai, aika abomo 'abaka ha ha ua kaharaona'au aihonakia. <sup>12</sup> Hau ha Tirama a'i eiha 'apuana, iamo aika 'abaka ha ha kaharaona'au ainakia raninai, Tirama hanona aika aokai nemiaho, ena raona'au hanona aba nitabura 'au aika aokai.

<sup>13</sup> Tirama Auba Robe ebekaka buonai, ha'ioquina aika hanona Tirama aonai nahamiaho haeamona ia abomo aika aokai nemiaho. <sup>14</sup> Tirama Nahuna euhuna emai hanopakai maearima ibamaurikia haunai eao, weiana ai aba taihana mai tahina pouna. <sup>15</sup> Hau ha ena 'abiai keba tohana Iesu hanona Tirama Nahuna raninai, Tirama hanona ia aonai nemiaho, ia abomo Tirama aonai nemiaho. <sup>16</sup> Tirama niraona'au ainaka hauna ha'ioquina mai na'a'ikakaumana.

'Abi tohana Tirama hanona raona'au. Hau ha maearima niraona'au aina hauna hanona Tirama aonai nemiaho, Tirama abomo ia aonai nemiaho. <sup>17</sup> Taeara neianai raona'au aokai aba nitabura 'au, ba weianai

aika hanona a'i kahata'u Tirama ena bakai wapuna aonai, pokina hanopaka neiana aonai eka mauri hanona Keriso ena mauri ihobona. <sup>18</sup> Tirama ena raona'au aonai hanona a'i kahata'u, Tirama ena raona'au taburana hanona ta'u maikoina neu'u ahinakia, pokina ta'u aonai puma raonana nemiaho. Ua buonai hau ha nita'u hanona ia aonai raona'au a'i nitabura harai baha.

<sup>19</sup> Aika ha ha 'abaka naharaona'au ainakia pokina Tirama aika eraona'auai 'uainaka paunai. <sup>20</sup> Hau ha ni'abi ia Tirama niraona'au aina iamo uaho'abana 'arina a'i ni'ari raninai, ia hanona bai'oi hauna. Hau ha uaho'abana nahaihana hauna a'i niraona'au aina hanona Tirama a'i nahaihana hauna keraona'au aina a'i ketaina. <sup>21</sup> Keriso rauhubu 'abina ebenaka hauna neiana: Tirama niraona'au aina hauna hanona uaho'abana abomo keraona'au aina.

## 5

### *A'ikakauma Haukia Hanopaka Ena Hoahoa Tiba'ehonakia.*

<sup>1</sup> Maearima weiana Iesu hanona Keriso nia'ikakaumana hauna hanona Tirama nahuna, Hama niraona'au aina hauna hanona nahuna abomo niraona'au ainakia. <sup>2</sup> Tirama naharaona'au aina mai ena rauhubu 'abikia nahaka'a ainakia raninai, neianai kaha'iobi haraina aika hanona Tirama nahuna naharaona'au ainakia. <sup>3</sup> Aika Tirama naharaona'au aina hanona ena rauhubu 'abikia nahaka'a ainakia. Abomo ena rauhubu 'abikia hanona a'i tepahihi aika herekai. <sup>4</sup> Pokina Tirama nahuna ikoinai hanona hanopaka hiabuna tiba'ehona. Aika Tirama naha'ikakaumana, hoahoa neianai hanopaka ena hiabu nahaba'ehona.

<sup>5</sup> Ua buonai hanopaka hiabuna tiba'ehona haukia hanona weiakia tia'ikakauma Iesu hanona Tirama Nahuna haukia mo ikupaiakia.

*Tirama Ehore Nahuna Pouna Ehinana.*

<sup>6</sup> Iesu Keriso hanona beiai mai aruaruai emai, beiai e'uere robe mai matiu ibiri ropo 'arunai e'ari. Ia hanona beiai mo a'i emai, ia beiai mai aruaruai emai. Auba Robe abomo nibatohana, pokina Auba Robe hanona Tirama ena 'abi tohana. <sup>7</sup> Ua buonai teaihau hanona Iesu tibatohana: <sup>8</sup> Auba Robe, bei, mai aruaru,\* teaihau ekia 'abi hanona hamona, Iesu hanona Tirama Nahuna.

<sup>9</sup> Aika maearima tebatohana 'abina naha'i taeanakia, ia Tirama ebatohana 'abina hanona eapa'ua ki'a baha pokina ia hanona Tirama, ebatohana 'abina hanona ia Nahuna pouna. <sup>10</sup> Maearima ha Tirama Nahuna nia'ikakaumana hauna hanona batoha 'abina neiana ia aonai nemiaho. Tirama a'i nia'ikakaumana hauna hanona Tirama bai'oi haunai nibaona, pokina maearima weiana hanona Tirama ebatohana 'abina Nahuna herenai e'uhina hauna a'i nia'ikakaumana. <sup>11</sup> Tirama ebatohana 'abina hanona neiana: Tirama hanona mauri banaibanai ebenaka, ba mauri neiana hanona Nahuna Iesu Keriso aonai nemiaho. <sup>12</sup> Tirama Nahuna ea'ina hauna hanona mauri aba ea'ina, 'a Tirama Nahuna a'i ea'ina hauna hanona mauri a'i ea'ina.

#### *Mauri Banaibanai.*

<sup>13</sup> Tirama Nahuna atana tua'ikakaumana haumi marere neiana narere benimi, pokina wai kato'io bina mauri banaibanai hanona aba toa'ina. <sup>14</sup> Aika hanona tabura neiana ha'ina Tirama wairanai, aika ia ena nutatae ihobonai kahanoina raninai aiaka niona. <sup>15</sup> Aika ha'io bina Tirama herenai taba taba kahanoai ainakia hanona aiaka niona raninai, ha'io bina haraina hanoiai tabakia hanona aba ha'inakia.

<sup>16</sup> Hau ha uaho'abana herenai k'i a weiana a'i keba'ari baihana hauna neihana raninai ahana kebahuba'ari, ba Tirama kehore uaho'abana weiana mauri kebena. Au maearima weia kia ekia ki'a a'i keaoainakia 'ari 'ekana hauna

na'uhina. Ia maearima baika ki'a ha tibabaina weiana keaoainakia 'ari 'ekana. Au ki'a weiana ahana kebahuba'ari hauna robana a'i nahuna. <sup>17</sup> Beho babai ikoinai hanona ki'a, ia ki'a baika hanona a'i tiaoainaka 'ari banaibanai 'ekana.

<sup>18</sup> Aika ha'io bina Tirama nahuna tiao haukia hanona ki'a a'i tibabai to'ona. Tirama Nahuna ni'aebunakia, hau ki'a obona ia a'i kea'i 'apuanakia. <sup>19</sup> Ha'io bina aika hanona Tirama nahuna, ia hanopaka maikoina hanona hau ki'a obona ena hiabu aonai.

<sup>20</sup> Abomo aika ha'io bina Tirama Nahuna emai hanona aoka ebaeana, weianai aika Tirama tohana kaha'io bina, haeamona aika hanona Tirama tohana aonai mai Nahuna Iesu Keriso aonai nahamiaho. Iesu Keriso hanona Tirama tohana abomo ia hanona mauri banaibanai pokina.

<sup>21</sup> Naha'u ki'ami e, bai'oi tiramakia herekiai kato'ima 'ima harainimi herekiai katokapare.

\* **5:8:** (8) baika te'abi, Hamana mai 'abi tohana mai Auba Robe teaihau

## Marere Ibaruana IOANE Ererena Hauna

### Puka Aona Irerena 'Abina

Marere neiana hanona 'kiro hauna' ererena eao 'babie ha mai nahuna' kipokia herekia. Babi'e neiana ibabataina hanona a'ikakauma maearimakia. Marere ererena ena nuatae hanona ia ha ha kateraona'au ainakia, haeamona ba'iobi haukia bai'oikia weiakia rani ikoinai Tirama ena 'abi tia'i ki'anakia haukia herekiai kate'ima'ima harainakia.

### Puka Paipana Apa'uakia

- a. Roba iahu. (1-3)
- b. Kaharaona'au. (4-6)
- c. Ba'iobi haukia bai'oikia. (7-11)
- d. 'Abi orena. (12-13)

### Banamo 'Abina.

<sup>1</sup> Au, Ioane Tirama ena marea ekia kiro hau'u, Tirama etina'ani'o babi'emu nahumu kipokia narere benimi, wai naraona'au ai tohanimi, aumo ikupaia' u aha'i, ia Tirama ena 'abi tohana te'iobina haukia ikoikiai abokiamo wai tiraona'au ainimi. <sup>2</sup> Pokina Tirama ena 'abi tohana hanona aika aokai nemiaho, haeamona aika herekai kemiaho keaomo banaibananai. <sup>3</sup> Raona'auai mai 'abi tohanai nahamiaho hanona Tirama aika Hamaka mai Nahuna Iesu Keriso katehore baraiharai apa'uana, aoko'o mai baibua katebenaka.

### Ha Ha 'Abaka Kaharaona'au ainakia.

<sup>4</sup> Ao'u enamo ki'a baha pokina pou aona nahumu baika hanona Hamaka ehina benaka akana kahababaina ihobonai Tirama ena 'abi tohanai temiaho. <sup>5</sup> Ua buonai, babi'e ki'amu e, bariu au wai narere benimi hanona rauhubu 'abina mahamahana aha'i, ia rauhubu 'abina aba 'uainai ha'ikakauma aonai haona hauna, ba au oi nanoini'o, aika ikoikai hanona ha ha 'abaka kaharaona'au ainakia. <sup>6</sup> 'Abaka

kaharaona'au ainakia hanona ihobona aika Tirama ena rauhubu 'abikia kahaka'a ainakia 'abana. Ena rauhubu 'abina neiana hanona aba popouna 'uruna tona, wai ikoimiai hanona raona'au aonai katomiaho.

### Keriso Ena 'Ou Haukia.

<sup>7</sup> Bai'oi haukia bo'ona aba tekarahi hanopaka maikoinai. Maearima weiakia hanona Iesu Keriso hauanai emai hauna a'i tibatohana. Maearima ua-homakia hanona bai'oi haukia mai Keriso ena 'ou haukia. <sup>8</sup> Kipomi kato'ima 'ima harainimi, weiana taba weiakia buokiai haka 'ari haukia ikoikiai a'i kato'ubo ainakia, weianai arami maikoina katoa'ina. <sup>9</sup> Hau ha Keriso ena ba'iobi a'i nika'aina mai ahana ba'iobi haeai nihore 'auna hauna hanona herenai Tirama aha'i. 'A hau ha Keriso ena ba'iobi nika'aina hauna hanona herenai Hamana mai Nahuna ohi temiaho. <sup>10</sup> Ua buonai, hau ha kemai heremi, ba'iobi neiana a'i kemai aina raninai, a'i katoa'i taeana emi itu aokiai, haeamona banamo 'abina ha a'i katohinana ia herenai. <sup>11</sup> Pokina hau ha maearima weiana ea'i taeana hauna hanona hau weiana ohi ena aka ki'a tibabai haeamona.

### Banamo 'Abina Orena.

<sup>12</sup> Kahina beni'o abikia hanona ebo'o, ia marere hamonai karerenia hanona a'i nanuatae. E'u buabenai hanona kawahi kai-hani'o ba hararua kahabaiwaira kaha'abi'abi, weiana eka 'abi kahabaore harainakia mai aonamoka.

<sup>13</sup> Uaho'abamu Tirama etina'ana babi'ena nahuna ekia banamo 'abina tiben'i'o.

## Marere Ibaihauna IOANE Ererena Hauna

### Puka Aona Irerena 'Abina

Marere neiana hanona 'kiro hauna' ererena eao haumo ha atana Gaio hauna herena. Ia hanona Gaio ebanamona pokina Gaio rani ikoinai a'ikakauma haukia ebarainakia. Ia Gaio ehina bena maearima ha weia, atana Diotrefe, ia hanona apa hauna weiana herenai ke'ima'ima haraina.

### Puka Paipana Apa'uakia

- a. Roba iahu. (1-4)
- b. Gaio ebanamona. (5-8)
- c. Diotrefe keihana. (9-10)
- d. Demeterio keraonana. (11-12)
- e. Abi orena. (13-15)

### Banamo 'Abina.

<sup>1</sup> Au, Ioane, Tirama ena marea ekia kiro hau'u, marere narerena niwahi e'u hau Gaio ki'amu heremu, au hanona naraona'auai tohani'o.

<sup>2</sup> E'u hau ki'amu e, au a'iobina aubamu ena mauri hanona enamo, ba nabahuba'ari weiana ihobonai taba ikoikiai hanona katenamo oi heremuai, haeamona oi hanona mai taburamu komiaho harai. <sup>3</sup> Uaho'abaka baika temai oi Tirama ena 'abi tohana nua'i taeana mai taearanai nuka'a hauna pouna tehinana bena'u raninai ao'u enamo ki'a baha. <sup>4</sup> Au naha'u Tirama ena 'abi tohana taearanai tika'a poukia nao'o hanona e'u aonamo niapa'ua ki'a baha haeamona aonamo weiana hanona e'u aonamo ikoinai etara haonakia.

### Gaio Hoahoa Namona Ebabaina.

<sup>5</sup> E'u hau ki'amu e, uaho'abaka weiakia a'i o'obi harai haukia\* baika obarainakia hanona enamo, weiana hanona emu a'ikakauma ai aka namona obabaina. <sup>6</sup> Ia

tehore emu raona'au pouna tehinana Tirama ena marea maearimakia neia haukia herekiae hoa-hoa namona obabaina. Kobarai harainakia ekia harima kateao aonai Tirama aona ibanamona taearanai. <sup>7</sup> Pokina maearima weiakia hanona Keriso ena aka paunai ekia harima tea'iramanataka'a, iamo a'i tia'ikakauma haukia herekiae hanona taba ha a'i titabu ahina. <sup>8</sup> Ua buonai aika abomo ia kahabarainakia, weiana kahababaina aonai, aika hanona Tirama ena 'abi tohana akana aba ia kipokia nahababaina.

### Diotrefe Hoahoa Ki'a Obona Ebabaina.

<sup>9</sup> Au aka neianai 'abi baika marere ha ai arerena ewahi Tirama ena marea maearimakia weiakia herekiae, iamo Diotrefe, ia hanona nenuatae ki'a baha Tirama ena marea maearimakia ekia 'uai haunai keao, ai aiamai a'i nia'i taeana. <sup>10</sup> Ua buonai au kawahi raninai, Diotrefe naia taba nibabaina hauna robana kahuna, heremai ai n'i'abi ki'a mai nibai'oi. Ia weiana mo aha'i ia nihore uaho'abaka tiwhi hanona a'i nia'i taeanakia, abomo weiakia tenuatae uaho'abaka katea'i taeanakia hanona niba'oronomia mai Tirama ena mareai nibakarahnakia.

### Demeterio Aka Namona Ebabaina.

<sup>11</sup> E'u hau ki'amu e, babai ki'a obokia ua homakia a'i kobabai, ia babai namokiamo kobabai. Babai namokia nibabai hauna hanona Tirama 'euna. Ia weiana babai ki'a obokia nibabai hauna hanona Tirama a'i e'iobi 'apuana.

<sup>12</sup> Maearima ikoikiae Demeterio ena babai harai pouna tehinana haeamona Tirama ena 'abi tohana nihore ia ena babai harai weiana nibatohana. Ai abomo ia ena babai harai poukia tahina, wai to'iobina ai emai 'abi hanona tohakia.

### Banamo 'Abina Orena.

\* 1:5: (5) 'ao weiakia tekaokao Keriso pouna tehinana haukia

<sup>13</sup> Kahina beni'o 'abikia hanona tebo'o, ia marere hamonai karerena hanona a'i anuatae.  
<sup>14</sup> E'u buabeni hanona rani a'i kehoma'a hanona kawahī kai-hani'o ba hararua kahabaiwaira kaha'abi'abi.

<sup>15</sup> Nabahuba'ari baibua here-muai kemiaho. Eka hau neia haukia ekia banamo 'abikia teuhunakia heremu. Eka hau naia haukia emai banamo 'abikia ha ha kobenakia.

## Marere IUDA Ererena Hauna

### *Puka Aona Irerena 'Abina*

Marere neiana ena poki hanona a'ikakauma haukia kebataburana kia kateaka tabura ekia a'ikakauma weiana Tirama ehore ena maearima ebenakia hauna kate'ima haraina (3). Ia kate'ima'ima harainakia pokina maearima bai'oikia baika ia baiatakiai ti'abi ia hanona a'ikakauma haukia.

### *Puka Paipana Apa'uakia*

- a. Roba iahu. (1-2)
- b. Ba'iobi haukia bai'oikia. (3-16)
- c. A'ikakauma taearana. (17-23)
- d. Banamo 'abina. (24-25)

### *Banamo 'Abina.*

<sup>1</sup> Au Iuda, Iesu Keriso ta'arana ia'ina hau'u mai Iakobo hatina, marere neiana narerena niwahi wai Tirama eaparinimi haumi ikoimiai heremi, wai hanona Tirama Hamaka niraona'au ainiimi mai Iesu Keriso ena iha'ini aonai temiaho. <sup>2</sup> Nabahuba'ari Tirama ena aoko'o, baibua mai raona'au maikoina 'eumiai keapa'ua.

### *Marere Ererena Ena Poki.*

<sup>3</sup> E'u hau ki'ami e, au anuatae ki'a baha Tirama ena bamauri hatabu ahina hauna pouna e'u marereai karerena kewahi heremi, iamo bariu naraonana marere karerena kewahi hanona kabataburanimi Tirama a'ikakauma weiana rani hamonai ebaibenai ena robe maearimakia ikoikiai 'eukia hauna huari aonai kato'ima haraina. <sup>4</sup> Pokina maearima baika aba bunianai tekatoto wai baiatamiai temiaho. Ia hanona eka Tirama ti'oatana ena aoko'o hoana pouna tia'i banai haeaina ia kipokia ekia nabau hoa hoakia ki'a obokia tabakiai tibaonakia mai Iesu Keriso eka Obiapaka

ikupaiana mo nipoki ainaka hauna tibaki'ana. Maearima neiakia ekia puma katehoaina pouna hanona aba wa'i baha Puka robenai ehina 'uaina.

### *Ba'iobi Haukia Bai'oikia.*

<sup>5</sup> Abi neiana aba to'lobina iamo au nanuatae kabaraona muenimi. Obiapaka\* ehore Isaraela haukia Aikupito hanonai 'arakia ebamaurina ia muriai weiakia a'i tea'ikakauma haukia ikoikiai ebapururunakia. <sup>6</sup> Haeamona aneru baika ekia bero tea'ina hiabuna ihobonai mo a'i temiaho ia kipokia ekia miao 'ekana tehabona, ia hanona aba tabiri weiana a'i kemohu banaibanai haunai tebirinakia wapura aonai temiaho, weia Tirama ehore parenakia katemiaho keaomo bakai apa'uana wapunai puma katehoaina. <sup>7</sup> Taeara ihobonaimo, Sodoma mai Gomora haeamona aiara herekiai haukia nabau akakia mai hoahoa ki'a obokia tebabainakia hanona iruba banai banai pumana tehoaina, ba ihaiha weiana hanona aika ikoikai ibaraonaka puma a'i hamahoaina paunai. <sup>8</sup> Ihobonaimo, maearima neiakia baiatamiai tetoto haukia abomo ba'iobi haukia bai'oikia neiakia ekia nibiai hoahoa 'opukia tibabai kipokia huanikia tia'i ki'anakia, Tirama ena hiabu tibaki'ana haeamona kupa anerukia nuabikia ti'abi ki'a benakia. <sup>9</sup> Mikaela aneru 'arakiai hauna hanona hoahoa uahomana a'i ebabai 'apuana. Tiapor ohi Mose e'ari huanina tebahiraha taeaina raninai 'abi pumakiai tiapor a'i ehinabe pahihina, ia ehina bena etibaha, "Obiapaka kehore oi kebatani'o."

<sup>10</sup> Ia maearima neiakia hanona taba obokia a'i tiobo haukia ahakiai ti'abi ki'a, mai ekia 'obi hanona ihobona mahi 'aki weiakia ekia raonaraona aha'i haukia 'abakia huanikia taikia titai, ekia hoahoa neiakia tihore ia kipokia tibapururunakia. <sup>11</sup> Ia herekiai

\* 1:5: (5) baika tererena, Iesu

hanona keki'a ki'a bahana. Pokina taeara weiana Kaino ena hoahoa ki'a obona taina tetai. Moni paunai kipokia teaoainakia beho weiana Balam ebabaina hauna aonai tetoto. Kora ebaki'a 'abana, ia abokiamo Tirama tebaki'ana, ua buonai taeara ihibonaimo ia abokiamo katepururu.

<sup>12</sup> Wai emi raona'au miato'ukia anianikia aokiae maearima neiakia titoto 'opu hoahoakia tibabai, ekia haumaea aha'i kipokia mo tiraonanakia. Ihobona matoha 'auhao weiakia baura nihore niabunakia nika'ainakia ia abara ha'i tibaiben, haeamona matoha matiu weiakia ekia bua'a ranina tohanai, iamo buabuakia ha'i tibaramanakia, matiu weiakia hanona mai ramukia aba ipuhu'au haeamona aba te'ari baihana.<sup>13</sup> Ia hanona matoha 'akuai roio nihara puni 'abana kipokia ekia haumaea hoahoakia tiwaira tina matoha 'uto'uto 'abakia, haeamona matoha bihiu weiakia tiaru 'abaea haukia 'abakia. Maearima weiakia hanona wapura banai banai aonai kate'ao.

<sup>14</sup> Enoka hanona Adamu ena uru iba'abaihau hamomona aonai hauna ena mahabanai 'abina aonai maearima neiakia robakia na eahu aihona, "Obiapaka hanona ena aneru robekia bo'ona 'akina kipokia katemai." <sup>15</sup> Maearima ikoikiae kebabakainakia, Tirama a'i temariki aina haukia ekia babai ki'a pumakia kebahoinakia, haeamona Tirama herenai te'abi ki'a haukia ikoikiae behoai kehorotinakia."<sup>16</sup> Maearima neiakia hanona teururu to'o baihana haeamona maearima baika tikaihanakia, kipokia ekia nuatae ki'a obokia taikia titai, kipokia tiapainakia, mai maearima baika tiba'amenakia herekiae taba namokia patea'i paunai.

*Tirama Ena Raona'auai Katomiaho.*

<sup>17</sup> E'u hau ki'ami e, eka Obiapaka Iesu Keriso ena iuhubeau haukia taba wairai kerama hauna

tehina benimi 'abikia katoraona 'ininakia.<sup>18</sup> Haiamiai te'abi tetibaha, "Rani orekia katemai raninai Tirama a'i timariki aina maearimakia baika katewaira tina bapo'o po'o 'abikia heremai katehinanakia haeamona kipokia ekia nuatae ki'a obokia taikia katetai."<sup>19</sup> Maearima neiakia robakia teahuna haukia hanona wai Tirama ena marea haumi baiatami ai hoa hore tibaramanakia, hanopaka maearimakia ekia nuatae taikia titai, Auba Robe aokiae a'i nemiaho.

<sup>20</sup> Ia, e'u hau ki'ami e, kipomi emi a'ikakauma robena ahanai emi mauri katobakori 'auna mai Auba Robe ena baraibarai ai katobahuba'ari. <sup>21</sup> Eka Obiapaka Iesu Keriso to'imana ena aoko'oai keaoainimi mauri banaibai aonai, kipomi Tirama ena raona'auai katomiaho.<sup>22</sup> Weiakia mai ekia raona kai'au kai'au haukia katoaoko'o ainakia.<sup>23</sup> Baika mauri pahihina matoha iruba 'abana aonai temiaho haukia mai taburami katabrainakia katekarahi katemauri, haeamona baika hauani ena aka ki'ai ekia mauri te'opu haukia katoaoko'o ainakia mai ta'uta'umi, ekia ki'a aonai a'i temeberi totonimi, ekia nabau hoahoakia ki'a obokia katobaki'anakia matoha habuni 'opukia 'arikia a'i tu'ari 'abana.

#### *Banamo 'Abina Orena.*

<sup>24</sup> Tirama hanona etabura kebarainimi ketaina a'i kato'eho, ba kemaihai harainimi ena nuabi aonai kebaka totonimi, weiana emi beho keaha'i ia wairanai mai emi aonamo keapa'ua.<sup>25</sup> Ia hanona Tirama hamona mo, ikupiana aika ibamaurika hauna. Iesu Keriso eka Obiapaka paunai Tirama herena nuabi, mariki hoana, tabura, mai ena hiabu katemiaho, 'uaina ranikia ikoikiae aokiae, emai bariu, keaomo banaibai. Amen.

## Keriso Ena 'Abi IBAWAIRA TINANA Ioane Herenai

### *Puka Aona Irerena 'Abina*

Puka neiana hanona rani weiana a'ikakauma haukia Obiapaka Iesu Keriso tea'ikakaumana paunai tebhaiara ki'anakia aonai ererena. Puka neiana ena poki hanona haiara weiana aonai ia kebataburankia ba ekia a'ikakauma a'i katehabona. Puka neiana aonai 'abi ibabataikia ebo'o, taba muriai katerama 'ao aba tirama haukia 'abikia ehina. Ibabatai weiakia ekia aka tohana hanona neiana. Iesu Keriso hanona Obiapaka, ba ia imanai Tirama kehore ena 'ou haukia ikoinai kehao hainakia, mai Satani abomo ua kehaohai aihona. Ba Iesu aka neiakia ikoikiai kebaorenakia hanona Tirama kehore weiakia tekori 'ini mai ekia a'ikakauma a'i teba'ehona haukia 'arakia namokia kebenakia. Ia hanona Tirama kipokia katemiao, puma mai haiara hanona keaha'i, pokina Tirama hanona taba ikoikiai kebahaeainakia katemahamaha.

### *Puka Paipana Apa'uakia*

- a. Roba iahu. (1.1-8)
- b. Mahabanai ikaikauna mai marea robe 7 ekia marere. (1.9—3.22)
- c. Puka iouna mai ikaiabu hoana 7. (4.1—8.1)
- d. Pihi 7. (8.2—11.19)
- e. Dragona mai aiahu mahikia rua. (12.1—13.18)
- f. Ihakia haeai haeai. (14.1—15.8)
- g. Tirama ena opuere puoukia 7. (16.1-21)
- h. Babulonia e'eho. (17.1—20.10)
- i. Bakai apa'uana orena. (20.11—15)
- j. Kupa, hanopaka, mai Jerusalema mahamahakia. (21.1—22.5)
- k. 'Abi orekia. (22.6-21)

### *Puka Pouma Ihinana 'Abina.*

<sup>1</sup> Au, Ioane, Iesu Keriso ebawaira tinana 'abina puka neianai narerena. Tirama ehore Iesu ebena ena ta'ara'i haukia herekiai rani a'i kehoma'a tabakia katerama haukia kebainhanakia. Weiana Iesu ena aneru ha euhuna, ena ta'ara'i hauna Ioane ebaihana.<sup>2</sup> Weiana Ioane ehore Tirama ena 'abi mai Iesu Keriso ena 'abi aiakia eo'o mai eihanakia tabakia ikoikiai ehina pounakia.

<sup>3</sup> Mahabanai 'abikia neiakia katetuabi haukia hanona tenamo, abomo puka neianai terere 'abikia kateona mai aokia ikoinai kateka'aina haukia hanona tenamo, pokina taba neiakia ikoikiai katerama ranina hanona aba herekai.

### *Ioane Marere Ererena Tirama Ena Marea 'Abaihau Hamomo Herekiai.*

<sup>4</sup> Au Ioane Tirama ena marea 'abaihau hamomo Asia hanonai narerebenimi. Bariu nemiaho, 'uainai abomo emiaho, haeamona wairai kemai Tiramana, mai ena obia imia'auna wairanai auba 'abaihau hamomo tekoroti haukia,<sup>5</sup> mai Iesu Keriso kipokia ekia aoko'o hoana mai baibua ahamiai kemiaho. Iesu Keriso hanona Tirama ena 'abi maikoina nehina pou haraina hauna, 'ariai mikiri mue kori'uaina hauna abomo hanopaka obiakia 'arakia ikoikiai ekia poki.

Eraona'au ainaka paunai ena 'ari aruarunai eka ki'a herekiai erubunaka.<sup>6</sup> Ena obia aiarana mai ena robe haukai ebaonaka Hamana Tirama ena aka kababai. Iesu Keriso herenai nuabi mai hiabu katemiao keaomo banaibana. Amen.

<sup>7</sup> Tomoihana Iesu hanona 'auhao ai nimai, maearima ikoikiai mahakia hanona ia kateihana, robuna tekomona haukia abomo kateihana, hanopaka itubukia maearimana ikoikiai ia paunai katehai 'ari. 'Abi tohana, neiana hanona kerama toha. Amen.

<sup>8</sup> Obiapaka Tirama ni'abi netibaha, "Au hanona Alepa mai Omega, Kori'uaina mai Murihaina. Au hanona bariu namiaho 'uaina abomo amiaho, haeamona wairai kamai, hiabu ikoinai Tiramana."

*Ioane Keriso Eihana.*

<sup>9</sup> Au, Ioane, wai uaho'abami kipokia nahamiaho haeamo, ena obia aiarana aonai mai hau haiara hamona aonai mai bapahihika Iesu paunai. Tirama ena 'abi mai Iesu pouna ahina waira tinana paunai Patamo kerebuuanai tehorotina'u namiaho. <sup>10</sup> Weiana Obiapaka ena beraurai Auba Robe hanona au ao'u ebabonu 'auna, weiana muri'u ai aia ha apa'uana matoha pahi 'uruna 'abana aona, <sup>11</sup> ia etibaha, "Neiakia noihanakia tabakia hanona puka ai morerenakia kouhuna keao Tirama ena marea 'abaihau hamomo aiara neiakiai temiaho haukia herekia, Epeso, Semurana, Peregamo, Tuatira, Sadi, Piladelpia, mai Laodikea."

<sup>12</sup> Weiana akori kabe e'abi bena'u hauna kaihana na ahoma. Iamo gold ramepaki 'abaihau hamomo tekoroti ai-hanakia. <sup>13</sup> Ramepa baiatakiai hau ha ekoroti, ia ihana matoha Maearima nahuna 'abana, ena habuni hanona ehoma'a eaomo aena etaro abunakia, haharanai hanona gold 'apana e'aberena. <sup>14</sup> Arana mai buina hanona tepore obo harai matoha poame 'abana 'ao 'auhao porena 'abana. Mahana ihakia hanona matoha iruba neupa 'abana. <sup>15</sup> Aena hanona matoha kopa iruba aonai nibaubaea ne'imare 'imare 'abana. Aiana hanona matoha roio rarikia tihara puni 'urukia 'abana. <sup>16</sup> Imana itipanai bihiu 'abaihau hamomo ea'inakia, kareba ha mahana abira abira teara hauna pinanai ekarahi. Mai wairana ihana hanona matoha atiaha beraura nirara eana 'abana.

<sup>17</sup> Ia aihana raninai a'eho aena pokinai a'umuti, matoha a'ari 'abana. 'A ia ehore imana itipana hau'u ai ehao'au, e'abi etibaha, "A'i mota'u, au hanona kori'uaina mai murihaina. <sup>18</sup> Au hanona mauri hau'u, au a'ari iamo amauri haeamona kamauri banaibanai. Au hanona ki a'ina weiana mai e'u hiabu 'ari haukia ekia 'eka kakaiaka kamaiainkia katemauri. <sup>19</sup> Ua buonai noihanakia tabakia morenakinia, neiakia hanona bariu temiaho tabakia haeamona wairai katerama tabakia. <sup>20</sup> Bihiu 'abaihau hamomo ima'u itipanai mai gold ramepaki 'abaihau hamomo oihanakia. Neiakia hanona 'abi bunikia ba anikia hanona nahomana, bihiu 'abaihau hamomo hanona Tirama ena marea 'abaihau hamomo ekia aneru,\* mai gold ramepaki 'abaihau hamomo hanona Tirama ena marea 'abaihau hamomo."

*Marere Keao Epeso ai.*

## 2

<sup>1</sup> Ia e'abi etibaha, "Tirama ena marea Epeso aiaranai hauna ena aneru na korere beni aihona.

Hau weiana bihiu 'abaihau hamomo imana itipana aonai ea'inakia haeamona gold ramepaki 'abaihau hamomo tekoroti baiatakiai nikabanai kabanai hauna ena 'abi neiana.

<sup>2</sup> Au oi emu babai, emu aro'ari mai emu bapahihia hanona a'iohinakia. Haeamona a'iohina aka ki'a haukia a'i oihia haonakia, weiakia kipokia iuhubeau haukia ai tebaonakia haukia 'a ia hanona iuhubeau haukia tohakia aha'i, ba obahobonakia hanona o'iohinakia bai'oi haukia. <sup>3</sup> Oi hanona obapahihia, mai atetua aokiai au ata'u paunai obakiro, a'i ohaba 'apua.

<sup>4</sup> Iamo emu ki'a hanona neiana, emu raona'au kori'uaina au here'uai hauna aba ohabona.

<sup>5</sup> Ua buonai 'eka weianai o'eho

\* **1:20:** (20) 'ao iuhubeau

hauna moraonana, koraona kabe, aka weiakia obabai 'uainakia haukia kobabai mue-nakia. Emu ki'ai a'i koraona kabe raninai, au hanona kawahī emu ramepa ena koroti 'ekanai ka'i obona.<sup>6</sup> 'A emu namo hamona hanona neiana. Nikolaita haukia ekia hoahoa 'arikia a'i nu'ari, ihobona au abomo ekia hoahoa 'arikia a'i na'ari 'abana.

<sup>7</sup> Mai haiana hauna kehore Auba Robe ena 'abi Tirama ena marea maearimakia nehina benakia hauna aiana keona. Ena a'ikakauma ketabura, ki'a aokiae kekabanai hauna hanona bero kabena mauri nibaibenī matiuna buabuana keani, matiu weiana hanona Tirama ena uma nuabina aonai ni'omu."

#### *Marere Keao Semurana ai.*

<sup>8</sup> Ia e'abi mue etibaha, "Tirama ena marea Semurana aiaranai hauna ena aneru na korere beni aihona.

Hau weiana Kori'uaina mai Murihaina hauna, e'ari haeamona emauri mue hauna ena 'abi neiana.

<sup>9</sup> Emu hau haiara mai emu uraru hanona aba a'iobinakia. Iamo oi hanona aba kepu haumu. Maearima weiakia kipokia Iuda haukiai tibaonakia haukia ekia 'abi ki'a oi heremuai hanona a'iobinā, ia hanona Iuda haukia tohakia aha'i, ia Satani ena marea haukia.<sup>10</sup> Aba kohau haiara iamo haiara weiana a'i kota'u aina. Haiamuai na'abi, Tiaporō kehore wai baika kehobonimi weiana wapura itunai kekaiabunimi ba wapu harauhaea katohau haiara. Iamo oi hanona emu a'ikakauma au here'uai hauna koa'i 'inina keaomo ko'ari re'a, ba au kahore mauri kabeni'o matoha 'uai hoana kobau'una 'abana.

<sup>11</sup> Mai haiana hauna kehore Auba Robe ena 'abi Tirama ena marea maearimakia nehina benakia hauna aiana keona. Ena a'ikakauma ketabura, ki'a aokiae kekabanai hauna hanona 'ari ibaruuanai a'i kehaiara 'apua."

#### *Marere Keao Peregamo ai.*

<sup>12</sup> Ia e'abi mue etibaha, "Tirama ena marea Peregamo aiaranai hauna ena aneru na korere beni aihona.

Hau weiana kareba mahana abira abira teara ea'ina hauna ena 'abi neiana.

<sup>13</sup> Emu miaho 'ekana hanona a'iobinā, Satani ena obia imia'auna hanona naia. Iamo oi ohore au ata'u oa'i 'inina, baiatamiai Antipa aia ibabua 'au hauna au pou'u ehinana hauna, ba Satani ena miaho 'ekana weianai teahu 'arina aonai abomo emu a'ikakauma au here'uai hauna a'i obuniai aina.

<sup>14</sup> Iamo emu ki'a baika hanona neiakia. Maearima baika naia hanona mahabanai hauna Balam ena ba'iobi 'abikia tika'ai ohonakia, hau weiana ehore Balak eba'iobinā, ba ena ba'iobi bai'oina weianai Isaraela haukia tebabai ki'a, weiana ia tehore kaiba'uku ibarobekia anianikia teani mai nabau hoa-hoakia ki'a obokia tebabainakia.

<sup>15</sup> Taeara ihobonai mo baika naia heremai hanona Nikolaita haukia ekia ba'iobi 'abikia bai'oikia abomo tika'ai ohonakia mai ki'a ihobokiamo tibabainakia.<sup>16</sup> Ua buonai to-moraona kabe. Keaha'i raninai, au kipo'u kawahī biai, pina'u karebanai kahu 'arinakia.

<sup>17</sup> Mai haiana hauna kehore Auba Robe ena 'abi Tirama ena marea maearimakia nehina benakia hauna aiana keona. Ena a'ikakauma ketabura, ki'a aokiae kekabanai hauna hanona aniani atana mana baika tebuni haukia ia kabena, abomo au kahore pi-hara porena ha ahnai ata maha-mahana ha irere'au hauna ia kabena. Pi-hara ia'ina hauna mo kipona ata weiana ke'iobinda."

#### *Marere Keao Tuatira ai.*

<sup>18</sup> Ia e'abi mue etibaha, "Tirama ena marea Tuatira aiaranai hauna ena aneru na korere beni aihona.

Tirama Nahuna weiana mahana ihakia hanona matoha iruba neupa 'abana, aena hanona

matoha kopa ne'imare 'imare 'abana hauna ena 'abi neiana.

<sup>19</sup> Au hanona oi emu babai a'io bina. Emu raona'au, emu a'ikakauma, emu baraibarai, mai emu bapahihi hanona a'io binakia. Haeamona bariu emu babai neiakia hanona emu babai 'a'iakia tetara haonakia.

<sup>20</sup> Iamo emu ki'a hanona neiana, oi hanona babi'e weiana atana Isabela kipona mahabanai babi'enai nibona babi'ena hanona noiha haona. Ia ena ba'io biai e'u ta'ara'i haukia nibaka'a ki'anakia niaoainakia maha porepore akakia ki'a obokia tibabai haeamona kaiba'uku ibarobekia anianikia tiani. <sup>21</sup> Au hanona ia ena rani aba ha abena ena maha porepore hoahoakia weiakiai keraona kabe. Ia a'i nenuatae. <sup>22</sup> Ua buonai au kahore inawa itaranai kakapo 'auna weia kehaiara 'ari ki'a baha, haeamona weiakia ia kipokia tinabau haukia a'i kateraona kabe raninai, ia abokiamo kabahaiara ki'a hanakia. <sup>23</sup> Ia nahuna abokiamo kahuahu 'arinakia. Weianai hanona Tirama ena marea haukia ikoikiai kate'io bina, au hanona maearima aokia mai ekia raonaraona bunikia natabu ahinakia hau'u, mai au kahore wai ha ha emu babaimo ihobokiai 'arami kabamuena.

<sup>24</sup> 'A bariu wai harina maikoina Tuatirai babi'e naiana ena ba'io baki uahomakia a'i tuka'ainakia mai Satani ena buni tabakia tohakia na tiho haukia a'i to'io bini haumi, nahina benimi ahamiai puma ha a'i kahore 'auna. <sup>25</sup> Iamo wai taba namona aba toa'ina hauna katoa'i 'ini haraina keaomo au kawahi.

<sup>26</sup> Ena a'ikakauma ketabura, ki'a aokiai kekabanai hauna haeamona e'u nuatae akana kebabai haraina keaomo puanai hauna hanona hiabu kabena, ia kehore hanopaka maearimakia keobia ainakia. <sup>27</sup> Ia auri ikai'ininai kepoki ainakia,

keahu 'iti'itinakia matoha uro 'abana.' Ihobona au Hama'u herenai hiabu a'ina 'abana.

<sup>28</sup> Au kahore raurani bihiuna abomo ia kabena. <sup>29</sup> Mai haiana hauna kehore Auba Robe ena 'abi Tirama ena marea maearimakia nehina benakia hauna aiana keona."

### 3

*Marere Keao Sadi ai.*

<sup>1</sup> Ia e'abi etibaha, "Tirama ena marea Sadi aiaranai hauna ena aneru na korere beni aihona.

Auba 'abaihau hamomo weiakia Tirama ena aka tibabaina haukia mai bihiu 'abaihau hamomo ea'inakia hauna ena 'abi neiana.

Au emu babai hanona a'io binakia, robamu teahuna tetibaha, "Tirama ena marea neiana hanona nimauri," iamo oi hanona aba o'ari. <sup>2</sup> Ua buonai mono'a, heremuai temiaho tabakia aba kate'ari baihana haukia mobataburanakia, pokina emu babai bero'auna ha e'u Tirama wairanai a'i atabu ahina. <sup>3</sup> Taba oa'ina mai ona hauna moraona 'inina, moka'ai haraina, abomo emu ki'ai moraona kabe. Iamo a'i kono'a raninai au hanona bainao hauna 'abana kawahi, e'u wahi beraurana hoana hanona a'i o'io bina.

<sup>4</sup> Iamo naia Sadi ai hanona Tirama ena maearima baika ekia habuni a'i teba'opunakia weiakia hanona ekia hoaho tenamo, ia hanona mai ekia bero habuni porekia katebatotonakia au kipokia kataka'a haeamo.

<sup>5</sup> Taeara ihobonai ena a'ikakauma ketabura, ki'a aokiai kekabanai hauna hanona habuni porena kebatotona, ia atana abomo mauri pukanai a'i kakakina, 'a Hama'u wairanai mai ena aneru wairakiai ia atana kahinana. <sup>6</sup> Mai haiana hauna kehore Auba Robe ena 'abi Tirama ena marea maearimakia nehina benakia hauna aiana keona."

*Marere Keao Piladelpia ai.*

<sup>7</sup> Ia e'abi mue etibaha, "Tirama ena marea Piladelpia aiaranai hauna ena aneru na korere beni aihona.

Erobe mai 'abi tohana hauna, mai Davida ena ki ea'ina hauna, ia taba ekaikauna hanona hau ha a'i kekaikabuna, haeamona ia taba ekaikabuna hanona hau ha a'i kekaikauna hauna ena 'abi hanona neiana.

<sup>8</sup> Au hanona oi emu babai a'iobina. Moihana, au pa'abi ha oi wairamu ai aba akaikauna, weiana hau ha kekaikabuna hanona a'i ketaina. A'iobina emu tabura hanona a'i eapa'ua, iamo e'u 'abi aba o'ima haraina mai ata'u a'i obuniaina.

<sup>9</sup> Moihana, weiakia kipokia Iuda haukiai tibaonakia haukia hanona tibai'oi, ia hanona Iuda haukia tohakia aha'i, ia Satani ena marea haukia. Au kahore maearima weiakia kamaiaiakia oi aemu pokinai katekaipehu, kate'iobina au hanona oi naraona'au aini'o. <sup>10</sup> Pokina oi ohore e'u bahiahi 'abina weiana atetua aokiai kobapahihi hauna aba o'ima haraina, ua buonai au kahore oi abomo ka'ima haraini'o hanopaka ena atetua ranina kemai aonai, weiana hanona maearima ikoinai kahobonakia hanopaka neiana ahnai. <sup>11</sup> Au hanona aba kawahi, emu a'ikakauma aonai kotabura harai, weiana hau ha a'i mehore emu 'uai hoana 'aramu ai obau'una hauna a'i mepuhu boini'o.

<sup>12</sup> Ena a'ikakauma ketabura, ki'a aokiai kekabanai hauna hanona e'u Tirama ena marea robe kupuanai kabaona, ba ia hanona 'eka weiana a'i kehabona. Au kahore ia ahnai e'u Tirama atana, mai e'u Tirama ena aiara, weiana Ierusalema mahamahana, e'u Tirama herenai weia kupa ai keriri hauna atana karerenakia, mai au ata'u mahamahana abomo ia ahnai karerena.

<sup>13</sup> Mai haiana hauna kehore Auba Robe ena 'abi Tirama ena marea maearimakia nehina benakia hauna aiana keona."

*Marere Keao Laodikea ai.*

<sup>14</sup> Ia e'abi mue etibaha, "Tirama ena marea Laodikea aiaranai hauna ena aneru na korere beni aihona.

Amen pokina hauna, aia ibabu'auna hauna, mahanai eihana ehina pouna hauna tohana, mai Tirama ebabainakia tabakia ikoinai pokina hauna ena 'abi hanona neiana.

<sup>15</sup> Au hanona oi emu babai a'iobina, oi hanona a'i o'amari mai a'i ohiabu. Au e'u nuatae hanona kohiabu toha 'ao ko'amari toha. <sup>16</sup> Iamo

oi hanona ohiabu hiabu, a'i ohiabu toha mai a'i o'amari toha. Ua buonai au kahore

pina'u ai ka'atoti ahini'o. <sup>17</sup> Oi nu'abi notibaha, 'Au hanona kepu hau'u, e'u taba tebo'o, taba ha a'i akapu.' Iamo a'i o'iobina oi hanona oki'a ki'a baha, kateaoko'oai ki'an'i'o, nouraru, mahamu teki'a, abomo maihaumu. <sup>18</sup> Au oi narobeni'o, here'uai gold kokawana aba irubai tebamaha mahana hauna, ba kepu haumu tohamuai koao. Here'uai habuni porena abomo kokawana koba-tona, weiana mai haumu emu haumaea kepu, mai here'uai maha muramurana kokawana, weianai mahamu koutunakia ba taba koihanakia ketaina.

<sup>19</sup> Au naraona'au ainakia haukia hanona narikenakia mai na'atinakia, ua buonai bero akakia konuataeai ki'a bananakia, mai ki'ai koraona kabe.

<sup>20</sup> Moihana, au hanona pa'abi 'akonai akoroti, naharahara. Hau ha aia'u keona abomo pa'abi kekaikauna raninai, ia 'eunai kakatoto herenai kataniani mai ia au here'uai kataniani. <sup>21</sup> Ena a'ikakauma ketabura, ki'a aokiai kekabanai hauna hanona bero kabena e'u

obia imia'auna ahanai katamiati haeamo, ihobona au atabura, ki'a aokiae akabanai, ba Hama'u ohi ena obia imia'auna ahanai tamati haeamo 'abana.<sup>22</sup> Mai haiana hauna kehore Auba Robe ena 'abi Tirama ena marea maearimakia nehina benakia hauna aiana keona."

## 4

### *Tirama Tekuti aina Kupai.*

<sup>1</sup> Taba neiakia murikiae, maha'u eao kupai pa'abi ha ikaikau waira'uai ekoroti aihana. Ba aia weiana ehinabe 'uaina'u 'uruna matoha pihi 'uruna 'abana hauna e'abi etibaha, "Mokara'au omai neia, taba neiakia murikiae katerama haukia kabaihane'o."<sup>2</sup> Au hanona beronai mo Auba Robe ao'u ebabonu 'auna, ba waira'uai hanona obia imia'auna ha kupai aihana mai hau ha imia'au weiana ahanai emia'au.<sup>3</sup> Emia'au hauna ihaihana hanona ea ki'a baha matoha pihara namoabukia atakia daiamond hauna eiroro mai rubi hauna ebiro haukia 'abana, 'opa eholo obia imia'auna weiana ekakiarona, ihaihana hanona ea ki'a matoha pihara namoabuna atana emerald hauna ekupa 'abana.<sup>4</sup> Obia imia'aukia ikoinai haraurua bani obia imia'auna apa'uana tekai kakaiarona abomo kiro haukia haraurua bani obia imia'aukia weiakia ahakiae temia'au, habuni pore obokia tebatoto mai 'arakiae hanona obia ibau'ukia gold ai ibabai haukia tebau'unakia.<sup>5</sup> Obia imia'auna weianai hanona kupa 'imarekia, 'uru rarikia mai kupa niro'u 'urukia ao'o. Obia imia'auna wairanai ramepa 'abaihau hamomo teara mai upa upakia. Neiakia hanona Tirama ena auba te'abaihau hamomo.<sup>6</sup> Abomo obia imia'auna wairanai hanona 'aku nemiaho, eiroro waira 'akinai matoha pihara namoabuna atana kristal 'abana.

Ibuana hanona mauri tabakia ikoinai bani obia imia'auna tekori kakaiarona, ia wairakiae mai

murikiae hanona maha 'abaeana teka kaiaronakia.<sup>7</sup> Mauri tabana kori'uaina hanona ihana matoha mahi atana laiona 'abana, iburana hanona ihana matoha poromakau nahu 'abana, ibaihauna wairana hanona ihana matoha maearima wairakia 'abana, ibabanina hanona ihana matoha po'i nirobo 'abana.<sup>8</sup> Ia mauri tabakia bani weiakia hanona ha ha banikia 'abaihau, ba banikia weiakia aokiae mai kapekiae hanona mahakia mo 'abaeana. Ia hanona mararani mai rabi a'i tiarai ia ti'abi to'ona tetibaha,

"Erobe, erobe, erobe. Obiapaka hiabu ikoinai Tiramana hanona erobe. Ia hanona 'uainai emiaho, bariu nemiaho, haeamona wairai kemai hauna."

<sup>9</sup> Mauri tabakia neiakia tihore mauri banaibana Tiramana obia imia'auna ahanai emia'au hauna herenai nuabi mariki mai namo 'abina tibena aonai,<sup>10</sup> kiro haukia haraurua bani tihore obia imia'auna ahanai emia'au hauna wairanai tikaipahu mauri banaibana Tiramana tekuti aina. Ekia obia ibau'ukia 'arakiae tibau'unakia haukia tia'i obonakia obia imia'auna wairanai tibaenotina, ba ti'abi tetibaha,<sup>11</sup> "Emai Obiapaka emai Tiramana e, oi hanona mai emu bero nuabi mai mariki mai hiabu koainakia. Pokina oi ohore taba ikoikiae obaramanakia. Emu nuatae paunai taba ikoikiae terama ba temiaho."

## 5

### *Ioane Puka Iouna Ha Eihana Mai Ikaiahu Hoana.*

<sup>1</sup> Epuia obia imia'aunai emia'au hauna aihana imana itipanai hanona puka iouna ha ea'ina, aonai mai kapenai marere tererenakia, puka kapena hanona ikaiahu hoakia ba weiakia hanona 'abaihau hamomo puka kapenai.

<sup>2</sup> Ba aneru taburana ha aihana eio aota etibaha, "Tai mai ena bero hauna kehore puka ahanai

ikaiabu hoahoakia neiakia keba pa'anakia ba kekaikauna?"<sup>3</sup> Iamo hau ha kupai 'ao hanopakai mai hanopaka ba'anai ha a'i etaina puka iouna weiana kekaikauna abomo aona keihana.<sup>4</sup> Weiana au ahai, ahai 'ari ki'a baha pokina hau ha a'i ebero harai puka iouna weiana kekaikauna abomo aona keihana.<sup>5</sup> Ia kiro hauna ha ehina bena'u etibaha, "A'i kohai, Iuda itubuna ena Laiona weiana Davida ena rama ramuna hauna 'ou haukia eahu parenakia hauna, ia kehore puka iouna ahnai ikaiabu hoakia 'abaihau hamomo keba pa'anakia puka kekaikauna."

### *Ioane Mamoe Nahu Eihana.*

<sup>6</sup> Weiana obia imia'auna 'ekana ibuanai Mamoe nahu ha ekoroti aihana ihana matoha 'uainai teahu 'arina 'abana, mauri tabakia bani mai kiro haukia weia tekori kakaiaronia, ia 'eana hanona 'abaihau hamomo mahana abomo 'abaihau hamomo, mahana weiakia hanona Tirama ena auba 'abaihau hamomo euhunakia teao hanopaka ikoinai haukia.<sup>7</sup> Mamoe nahu hanona eao obia imia'aunai emia'au hauna imana itipanai puka iouna weiana ea'ina.<sup>8</sup> Puka weiana ea'ina raninai mauri tabakia bani mai kiro haukia harau rua bani hanona Mamoe nahu wairanai tekaipehu. Ia ha ha mai ekia kita atana hap abomo mai ekia gold puou puoukia aokiae muramura timikia 'orimokiae tebabonunakia, teba'aranakia timikia tehao, weiakia hanona Tirama ena robe maearimakia ekia bahuba'ari ai.<sup>9</sup> Weiana hui mahamahana ha tea'i taeana tehuiaina tetibaha, "Oi hanona mai emu bero puka iouna koa'ina abomo ikaia'buna hoahoakia kobapa'anakia. Pokina oi teahu 'arini'o, ba emu 'ari aruarunai maearima okawanakia Tirama 'euna, itubu ikoikiae, maea ikoikiae, maearima ikoikiae, mai hano ikoikiae herekia.<sup>10</sup> Oi ohore obia 'arakia haukiai

mai robe akana tibabaina haukiai obaonakia eka Tirama ta'arana katea'i, mai hanopaka katepoki aina."

### *Ikoikiae Tirama Mai Mamoe Nahu Tekuti ainakia.*

<sup>11</sup> Ba maha'u eao aneru bo'ona 'akina ahanakia mai aiaakia aona, ia tehore obia imia'auna mai mauri tabakia bani mai kiro haukia tekori kakaiaronakia, tebo'o ki'a baha taha taha.<sup>12</sup> Tehui aota tetibaha, "Mamoe nahu 'uainai teahu 'arina hauna, bariu mai ena bero, hiabu, kepu, aobero, mai tabura kea'inakia abomo mariki, nuabi, mai banamo kea'inakia."

<sup>13</sup> Ba mauri tabakia ikoikiae weiakia kupai, hanopakai, hanopaka ba'ana abomo 'aku-pakai mai aokiae temiaho haukia ikoikiae aiaakia aona tehuiaina, "Obia imia'auna ahnai emia'au Tiramania abomo Mamoe nahu herekiae banamo, mariki, nuabi, mai hiabu katemiaho, bariu keaomo banaibana."

<sup>14</sup> Weiana mauri tabakia bani te'abi tetibaha, "Amen." Ba kiro haukia tekaipehu ia tekuti aina.

## 6

### *Mamoe Nahu Puka Ikaiabu Hoakia 'Abaihau Ea'i Obonakia.*

<sup>1</sup> Epua Mamoe nahu aihana, puka iouna ahnai ikaia'bun hoakia 'abaihau hamona hauna ea'ina, ia ehore ikaia'bun hoana kori'uaina ea'i obona. Ba mauri tabakia bani 'abakia ha aiana aona, matoha kupa niro'u 'abana, e'abi etibaha, "Omai."<sup>2</sup> Maha'u eao hanona waira'uai hoti porena ha aihana, ba ahnai emia'au hauna hanona hunu ha imanai ea'ina, obia ibau'una ha tebena, ba hotiai ebeau ahi, ihaihana matoha arawai hauna, ia ehore 'ou haukia eba 'ehonakia, haeamona mai hiabuna niao bo'ona keba'ehonakia.

<sup>3</sup> Mamoe nahu ikaia bu hoana ibaruana ea'i obona raninai mauri tabana ibaruana aiana aona, e'abi etibaha, "Omai." <sup>4</sup> Ba hoti ha ekarahi hauna hanona ebiro. Ahanai emia'au hauna hanona hiabu tebena baibua hanopakai kea'i parena, weiana maearima kipokia 'abakia kateahuahu 'arinakia. Ia hanona kareba apa'uana ha tebena.

<sup>5</sup> Ba Mamoe nahu ikaia bu hoana ibaihauna ea'i obona raninai, mauri tabana ibaihauna aiana aona, e'abi etibaha, "Omai." Ba maha'u eao hanona hoti 'umu obona ha aihana, ahanai emia'au hauna hanona puma ihobokia tabana ha imanai ea'ina. <sup>6</sup> Ba matoha aia ha 'abana mauri tabakia bani baiatakiai aona, e'abi etibaha, "Moao emu aka mobabaina, arobo rarina kerama. Weiana maearima wapu hamona niaka monina nia'ina hanona witi kaputi hamona kekawana, mai maearima wapu hamona niaka monina nia'ina hanona aniani atana bali kaputi aihau kekawanakia, iamo olibe matiukia mai bine haharukia a'i koa'i ki'anakia."

<sup>7</sup> Ba Mamoe nahu ikaia bu hoana ibabanina ea'i obona raninai, mauri tabana ibabanina aiana aona, e'abi etibaha, "Omai." <sup>8</sup> Maha'u eao hanona hoti hauna a'aeabuna ha aihana, ahanai emia'au hauna atana hanona 'Ari, mai 'ari haukia ekia 'eka hanona ia murinai ni'au. Hiabu hanona terarua tebenakia, ba hanopaka maearimakia iwate paipa bani aonai paipa ha hanona kateahu 'arinakia, maearima weiakia hanona huari aonai karebai kate'ari, arobo aonai mare'a ai kate'ari, inawai kate'ari, mai hanopaka ena ahuahu mahikiai kate'ari.

<sup>9</sup> Mamoe nahu ikaia bu hoana ibaimana ea'i obona raninai, maha'u eao itara robena ba'anai Tirama ena 'abi buonai mai ena 'abi ihina pouna paunai teahu 'arinakia haukia aubakia

aihanakia. <sup>10</sup> Ia hanona teio aota tetibaha, "Taba ikoikiai Obiapakana e, oi hanona orobe mai toha tohana, rani tabanai hanopaka haukia kobakainakia, puma kobahoainakia emai 'ari aruarumai paunai?" <sup>11</sup> Weiana habuni homa'akia pore obokia ha ha tebenakia, ba ehina benakia katebai'ima rani papana kehoma'a 'apua keaomo 'abakia ta'ara'i haukia mai uaho'abakia Keri'o ena aka tibabaina haukia iahu'arikiai ia teahu 'arinakia ihobona, weiana ituabikia ranina ketaina.

<sup>12</sup> Ba Mamoe nahu aihana ikaia bu hoana iba'abaihauna ea'i obona raninai, kanokau rarina eka'a hano eibiu ki'a, beraura ewapura habuni 'umuna 'abana, haeamona nawa hanona ebiro aruaru 'abanan eao, <sup>13</sup> mai bihiu kupai te'eho hanopaka ahanai matoha baura rarina eabu'au 'ororo buabuana a'i te'aiba haukia eba'ehonakia 'abana. <sup>14</sup> Kupa abonomo e'akauma matoha 'ire teouna 'abana, haeamona oeo mai kereibua ikoikiai 'ekakiai teibiu. <sup>15</sup> Ba hanopaka ena obia 'arana haukia, obia haukia, huari poki haukia, kepu haukia, hiabu haukia, ta'ara'i haukia, haeamona ta'ara a'i tia'i haukia ikoikiai hanona oeo urikia aokiai mai oeo piharakia baiatakiai tepihi. <sup>16</sup> Ia tehore oeo mai pihara apa'uakia teaparinakia tetibaha, "Tomo'eho tomobahu abunamai, obia imia'auna ahanai nemia'au Hauna wairanai mai Mamoe nahu ena opuere herekiai tomoba buninamai. <sup>17</sup> Pokina ekia opuere wapuna apa'uana aba ekara'au. Tai he kekoroti?"

## 7

*Tirama Ena Ta'ara'i Haukia  
144,000 Paukia Ahakiai Mani'a  
Tea'ina.*

<sup>1</sup> Weiana murinai aneru bani aihankia, hanopaka 'uni puakia bani tekori abunakia, hanopaka ena baura bani tehe abunakia,

baura ha a'i keabu hano ai 'ao 'aku 'ao matiu a'i keabunakia.  
<sup>2</sup> Ba aneru haeai ha aihana, taetana tainai ekara'au mai mauri Tiramana ena taba ha ea'ina weianai tabakia kebamani'anakia Tirama 'euna. Weiana eio aota aneru bani weiakia Tirama ehore hiabu ebenakia hanopaka mai akupaka katea'i ki'anakia haukia ehina benakia etibaha,  
<sup>3</sup> "Wai hanopaka mai 'akupaka abomo matiu a'i katoa'i ki'anakia keaomo eka Tirama ena ta'ara'i haukia paukia ahakiai mani'a ha katahore 'auna."  
<sup>4</sup> Weiana tebamani'ana haukiai ekia bo'o tetuabina aiakia aona hanona taha ikoinai hinabu hamomo bariabui bani (144,000), ia hanona Isaraela itubukia harauhaea rua herekiae tekarahi.  
<sup>5</sup> Paukia ahakiai tebamani'anakia haukia,

Iuda itubunai hanona taha harauhaea rua (12,000).

Ruben itubunai hanona taha harauhaea rua (12,000).

Gad itubunai hanona taha harauhaea rua (12,000).

<sup>6</sup> Asere itubunai hanona taha harauhaea rua (12,000).

Napatali itubunai hanona taha harauhaea rua (12,000).

Manase itubunai hanona taha harauhaea rua (12,000).

<sup>7</sup> Simeona itubunai hanona taha harauhaea rua (12,000).

Lebi itubunai hanona taha harauhaea rua (12,000).

Isakara itubunai hanona taha harauhaea rua (12,000).

<sup>8</sup> Sebuluna itubunai hanona taha harauhaea rua (12,000).

Iosepa itubunai hanona taha harauhaea rua (12,000).

Mai Beniamina itubunai hanona taha harauhaea rua (12,000).

*Maearima To'una Rarina 'Akina  
Mai Ekia Habuni Porekia Tirama  
Tekuti aina.*

<sup>9</sup> Taba neiakia murikiae maha'u eao maearima to'una rarina 'akina aihana pahatuabinakia a'i petaina, ia hanona hano haeai haeai, itubu haeai haeai, rama haeai haeai, mai maea haeai

haeai ikoikiae aokiae tekarahi, ia ikoikiae hanona obia imia'auna wairanai mai Mamoe nahu wairanai tekoroti, ekia habuni hanona tehoma'a tepore obo, abomo imakiae hanona matiu raukiae matoha tonu 'ari'arina 'abakia tea'inakia.  
<sup>10</sup> Ba teio aota tetibaha,

"Bamauri hanona aika eka Tirama obia imia'aunai nemia'au Hauna mai Mamoe nahu herekiae nimai."

<sup>11</sup> Weiana aneru ikoikiae weiakia obia imia'auna, kiro haukia, mai mauri tabakia bani tekori kakaiaronakia haukia tehore obia imia'auna wairanai tekaipahu wairakia hano teao Tirama tekuti aina,  
<sup>12</sup> tetibaha, "Amen.

Banamo, mai nuabi, mai aobero, mai namo 'abina, mariki, mai hiabu, mai tabura hanona eka Tirama 'euna keaomo banaibanai.

Amen."

<sup>13</sup> Weiana kiro hauna ha ebakaina'u etibaha, "Habuni homa'akia pore obokia tebatotonakia haukia hanona tai? Abomo ae'eai temai?"  
<sup>14</sup> Au ena 'abi abamuena atibaha, "Hau apa'uana e, oi o'lobina." Haeamona ehina bena'u etibaha, "Neiakia hanona hau haiara apa'uakia aokiae tekabanai harai temai haukia, ekia habuni hanona Mamoe nahu aruarunai teutunakia ba tebaporenakia.  
<sup>15</sup> Ua buonai,

Ia hanona Tirama ena obia imia'auna wairanai tikoroti, abomo ena marea robe aonai ia ena aka tibabaina rabi mai mararani.

Ba obia imia'auna ahanai nemia'au Tiramana kehore ekia i'auai keao ke'aeanakia mai ke'abanakia.

<sup>16</sup> Ia hanona mare'a a'i kate'ari mue, 'akokia a'i kate'ororo mue.

Beraura 'ao hiabu haeai ha ia haukia a'i kebapetanakia.

<sup>17</sup> Pokina Mamoe nahu obia imia'auna ibuana tohanai nemiaho hauna

kehore ke'imana kia mamoe  
i'mana hauna 'abana,  
ia kehore ke'uai ainakia mauri  
beina 'uriāi nebuti hauna  
herenai,  
ba Tirama kehore mahakia beikia  
ikoikiai mahakiai keutu  
'ororonakia."

## 8

*Puka Ikaiahu Hoana Iba'abaihau Hamomona Ea'i Obona. Aneru Ha Mai Gold Urona.*

<sup>1</sup> Ba Mamoe nahu Puka ikaiahu hoana iba'abaihau hamomona ea'i obona raninai, kupai 'uru ha a'i ebua 'apua eaomo beraura hoana abirana ha 'abana. <sup>2</sup> Weiana Tirama wairanai tikoroti anerukia 'abaihau hamomo aihanakia, ba pihi 'abaihau hamomo aneru weiakia tebenakia.

<sup>3</sup> Aneru haeai ha emai itara robena herenai ekoroti. Imanai hanona gold urona ha ea'ina aonai muramura timina 'orimona tekina hauna. Ba muramura timina 'orimona bo'ona tebena mai Tirama ena robe haukia ikoikiai ekia bahuba'ari kipokia keba haeamonakia gold itaranra robena weiana obia imia'auna wairanai hauna ahanai keberuberu ainakia. <sup>4</sup> Weiana aneru imanai muramura timina 'orimona ni'ara hiabuna mai robe haukia ekia bahuba'ari kipokia tekara'au Tirama wairanai. <sup>5</sup> Ba aneru ehore uro weiana ea'ina, aonai itara robena irubanai ebabonuna, ba hanopakai ekapo'auna hanona kupa ero'u mai e'imare, 'uru rarikia tebua, mai hano ekaukau.

*Aneru Bani Ekia Pihi Teubaina.*

<sup>6</sup> Ba aneru 'abaihau hamomo weiakia teba'oru ekia pihi kate ubainakia.

<sup>7</sup> Aneru kori'uaina ehore ena pihi eubaina, weiana abara pihara 'abakia mai iruba aruaru kipokia teba hamomo te'eho hanopaka ahanai abara netibo 'abana. Rani weianai hanopaka iuate paipa aihau aonai paipa ha e'ara obo mai matiu ikoinai iuate paipa aihau

aonai paipa ha e'ara ore, haeamona tubu ikoinai te'ara ore.

<sup>8</sup> Aneru ibaruana ehore ena pihi eubaina, weiana taba ha ihana matoha oeo apa'uana ha 'abana mai irubana 'akuai tekapo uhuna. Weiana 'akupaka iuate paipana aihau aonai paipa ha hanona aruaruai eao, <sup>9</sup> ba 'aku aonai mauri tabakia iuate paipana aihau aonai paipa ha hanona te'ari, mai aunohi ikoikiai iuate paipa aihau aonai paipa ha hanona tepururu.

<sup>10</sup> Aneru ibaihauna ehore ena pihi eubaina, weiana bihiu apa'uana ha ni'ara matoha toti 'abana kupai e'eho, ba ate ikoikiai iuate paipa aihau aonai paipa ha mai bei ekia buti 'ekakia ahakiai e'eho. <sup>11</sup> Bihiu weiana atana hanona 'Mabi'. Ba bei ikoikiai iuate paipa aihau aonai paipa ha hanona temabi ki'a. Ba maearima bo'ona bei weiana teinu hanona te'ari, pokina bei aba emabi.

<sup>12</sup> Aneru ibabanina ehore ena pihi eubaina, weiana beraura iuate paipana aihau aonai paipa ha, mai nawa iuate paipana aihau aonai paipa ha, haeamona bihiu ikoikiai iuate paipa aihau aonai paipa ha tepoanakia, weiana ea iuate paipana aihau aonai paipa ha hanona ewapura, ba mararanai iuate paipana aihau aonai paipa ha, mai rabi iuate paipana aihau aonai paipa ha hanona a'i ea.

<sup>13</sup> Ba po'i ha aihana kupa baiatanai erobo, aiana aona eio aota etibaha, "Keki'a, keki'a. Hanopaka ahanai temiaho haukia ikoikiai herekiai hanona keki'a ki'a bahania, pokina aneru haeai aihau ekia pihi aba kateubainakia."

## 9

*Aneru Ibaimana Ena Pihi Eubaina.*

<sup>1</sup> Weiana aneru ibaimana ehore ena pihi eubaina, ba au bihiu ha aihana kupai aba e'eho hanopakai, bihiu weiana

hanona 'uri 'ourana 'akina a'ena aha'i hauna kina tebena.<sup>2</sup> Ba bihiu weiana ehore 'uri 'ourana ekaikauna, weiana 'uriai hiabu 'umuna ekara'au matoha iruba rarina 'akina hiabuna nikara'au 'abana. Weiana 'uri hiabuna ekara'au beraura mai kupu ebawapuranaxia.<sup>3</sup> Weiana hiabu aonai pekau tekarahi teriri hanopaka ahanai, ia hanona hiabu ebenakia matoha hara nikainaka nahahaia 'abana.<sup>4</sup> Iamo ehina benakia hano tubuna abomo 'anoai tiomu tabakia mai matiu ha a'i katea'i ki'a, 'a maearima weiakia paukia ahakia Tirama ena mani'a aha'i haukia mo katea'i ki'anakia.<sup>5</sup> Ia pekau ehina benakia maearima a'i kateahu 'arinakia, iamo kateba haiaranakia weiana nawa ima aonai katehaiara ihobona hara nikainaka ena haiara 'abana.<sup>6</sup> Wapu weiakia aokiai maearima hanona 'ari katetabuna iamo a'i katetabu ahina, katenuatae ki'a baha pate'ari iamo 'ari hanona ia herekiai kebeau pare.

<sup>7</sup> Pekau weiakia ihaihakia hanona matoha huari hotikia 'abakia teba'orunakia huari kateao, arakiai hanona taba ha tebau'una matoha obia ibau'una gold ai tebabaina 'abana, wairakia hanona matoha maearima wairakia 'abana.<sup>8</sup> Buikia hanona matoha babi'e buikia homa'akia 'abana, nihekia hanona matoha mahi atana laiona nihekia 'abana.<sup>9</sup> Haharakiai hanona auri panabanai te'aeanakia, ia banikia 'urukia hanona matoha hoti bo'ona 'akina mai kori'au tabakia atakia kariota hotiai teberinakia tebeau huari tiao 'urukia 'abana.<sup>10</sup> A'arekia hanona mai 'inikia matoha hara a'arekia 'abakia, mai a'arekia aokiai hanona mai ekia hiabu maearima nawa ima kateba haiaranakia.<sup>11</sup> Ia hanona mai ekia obia 'arana ha, 'uri 'ourana weiana aneruna, ia atana Heberu maeakiai hanona Abadon, 'a Helene maeakiai atana Apoluona, anina hanona Bapururu hauna.

<sup>12</sup> Atetua ki'a obona kori'uaina

aba eore, murinai haeamona ate-tua ki'a obokia rua naha'imana katemai.

### *Aneru Iba'abaihauna Ena Pihi Eubaina.*

<sup>13</sup> Aneru iba'abaihauna ehore ena pihi eubaina, ba aia ha aona 'uruna hanona Tirama wairanai itara robena gold ai tebabaina haunai 'ea bani herekiai weia ekarahi.<sup>14</sup> Aia weiana ehore aneru iba'abaihauna pihi ea'ina hauna ehina bena etibaha, "Aneru bani weiakia Efarate ate apa'uana haianai aba tebirinakia haukia korubu ta'inakia."<sup>15</sup> Ba aneru weiakia bani terubunakia, anerukia weiakia hanona aba teba'oru tiba'iima ihau weiana aonai nawa weiana aonai wapu weiana aonai beraura hoana weianai katekarahi hanopaka maearimakia iwate paipana aihau aonai paipa ha kateahu 'arinakia.<sup>16</sup> Aneru bani weiakia ekia huari haukia mai hotikia tetuabinakia aiakia aona hanona ikoinai kerepu hinabu rua 'abana.

<sup>17</sup> Weiana e'u mahabanai ai, hotikia mai huari haukia weiakia hotikia ahakiai temiau haukia aihanakia, haharakia i'aeakia hanona tebiro, matoha iruba, tepurutoni, mai tea'aeabu, 'a hoti arakia hanona matoha mahi atana laiona arakia 'abana, abomo pinakiai iruba, hiabu, mai pihara atakia salpa mai irubakia tekarahi.<sup>18</sup> Taba ki'a obokia aihau weiakia hoti pinakiai tikarahi haukia tehore hanopaka maearimakia iwate paipana aihau aonai paipa ha teahu 'arinakia, taba weiakia hanona iruba, hiabu, mai pihara atakia salpa.<sup>19</sup> Pokina hoti ekia hiabu hanona pinakia ai mai a'arekia ai temiaho, a'arekia hanona matoha 'erau 'abana mai arakia ba weianai maearima tea'i ki'anakia.

<sup>20</sup> Maearima harina taba ki'a obokia aihau neiakiai a'i te'ari haukia hanona a'i teraona kabe baha, imakiai tebabainakia tabakia a'i temurinakia, auba

ki'a obokia ikitiaikia a'i teba puanakia, kaiba'uku weiakia gold, silba, kopa, pihara, mai matiu ai tebabainakia haukia, weiakia a'i teihaiha, aia a'i tio'o, a'i tika'a tabakia ikitiaikia a'i tehabona.<sup>21</sup> Ekia ahuahu hoakiai, ekia nepu hoakiai, ekia nabau hoahoakia ki'a obokiai, mai ekia bainao hoahoakiai a'i teraona kabe 'apua.

## 10

### *Aneru Ha Mai Puka Iouna Papana Ha.*

<sup>1</sup> Weiana aneru taburana ha aihana kupai eriri nimai hauanina 'auhao ai ero'abuna, arana ubinai hanona 'opa, wairana hanona ea matoha beraura, ia aena ihakia hanona matoha iruba bero berokia 'abakia. <sup>2</sup> Imanai hanona puka iouna papana ha aba ikaikau hauna ea'ina. Aena itipana hanona 'aku ahanai ehe'au ia awarina hanona hanopaka ahanai ehe'au. <sup>3</sup> Aneru weiana eio aota matoha mahi atana laiona ni'arara 'abana. Ba eio raninai, kupa rani 'abaihau hamomo ero'u, ro'u ha ha 'abi tehinana. <sup>4</sup> Ba ro'u 'abaihau hamomo te'abi'abi nonoa hanona aiakia karerena nahoma, iamo aia ha kupai emai aona etibaha, "Ro'u 'abaihau hamomo te'abi hauna kobunina, a'i korerenakia."

<sup>5</sup> Weiana aneru aihana hauna 'aku ahanai mai hanopaka ahanai ekoroti hauna ehore imana itipana etiu taeana kupa. <sup>6</sup> Ba aneru weiana ehore miao banaibanai Tiramana weiana kupa mai aona tabakia ikoinai mai hanopaka mai aona tabakia ikoinai mai akupaka mai aona tabakia ikoinai ebabainakia. Tiramana atanai e'abi 'uai etibaha, "Rani hanona aba keore, Tirama hanona a'i kebai'ima homa'ana." <sup>7</sup> Iamo aneru iba'abaihau hamomona ena pihi keubaina raninai, Tirama ena raona bunina hanona ketohana, Pou namona neiana hanona ena mahabanai haukia ia ta'arana tea'i haukia ehina benakia."

### *Ioane Puka Iouna Papana Eana.*

<sup>8</sup> Ba aia weiana kupai ao uaina hauna haeamona ehinabe muena'u etibaha, "Moao aneru weiana 'akupakai mai hanopakai ekoroti hauna imanai puka iouna weiana ekaikau hauna koa'ina." <sup>9</sup> Ua buonai aeao aneru weiana herena ba anoina puka iouna papana weiana kebena'u. Ba ia au ehina bena'u etibaha, "Moa'ina moana mo'orumuai hanona kemabi, 'a pinamuai hanona kekuma kuma matoha hoho beina 'abana." <sup>10</sup> Ba aneru imanai puka iouna papana weiana a'ina ani obona, weiana pina'uai hanona ekuma kuma matoha hoho beina 'abana, iamo ani obona murinai mo'oru'uai hanona emabi.

<sup>11</sup> Ba ehina bena'u etibaha, "Oi hanona mahabanai 'abina kohina muena, weiana maearima haeai haeai, hano haeai haeai, maea haeai haeai, mai obia arakia haeai haeai haukia robakia koahuna."

## 11

### *Pou Hina Haukia Rua.*

<sup>1</sup> Epuia, hiribo ha matoha ikai'ini 'abana ebena'u ba ehina bena'u etibaha, "Omkiri, Tirama ena marea robe mai itara robena kohobonakia, abomo aonai maearima tibahuba'ari haukia kotuabinakia. <sup>2</sup> A marea robe ara aonai ena i'aea huri 'ekana atapakai hauna hanona a'i kohobona, pokina Tirama ena maearima aha'i haukia aba ebenakia ia hanona nawa bariabui rua aiara robena katehe hai ehe haina. <sup>3</sup> Iamo au pou'u iihinana haukia rua hiabu kabenakia, pute habunikia weiakia aoko'o katebaiha baihaina haukia katebatotonakia, weiana wapu taha hamomo hinabu rua imabui harau haea (1,260) weia mahabanai 'abina katehinana."

<sup>4</sup> Neiakia hanona olibe matiukia rua mai ramepa rua hanopaka ikoinai Obiapakanai wairanai tekroti haukia. <sup>5</sup> Ba hau ha kenuatae terarua kea'i ki'akia raninai,

terarua pinakiai iruba katekarahi weiakia ekia 'ou haukia keahu 'ari orenakia, weiana maearima tabana ia'i ki'akia kenuatae aina hanona ia abomo ua ke'ari aiho.<sup>6</sup> Ia terarua hanona mai hiabukia kupa katekaiaabuna, weiana ekia mahabanai 'abina ihinana beraurakia aokiae hanona abara a'i ketibo. Abomo mai hiabukia bei 'aki katebahaeaina aruaruai keao, weiana katenuatae raninai atetua ibaramana akakia haeai haeai hanopakai kateba ramanakia.

<sup>7</sup> Ekia pou hina 'abina weiana katebaorena kepua murinai, aiahu mahina weiana 'uri e'oura ki'a aonai kekara'au hauna kehore terarua kehuari benakia keahunakia keahu 'arinakia. <sup>8</sup> Weiana terarua te'ari hauanikia hanona aiara apa'uana Ierusalema airabuanai katenoti. Weiana hanona terarua ekia Obiapaka matiu ibiri ropo ubinai e'ari 'ekana, aiara weiana 'abi ibabatainai atana tehinana, Sodoma 'ao Aikupito. <sup>9</sup> Wapu aihau mai abirana ha aonai maearima haeai haeai, itubu haeai haeai, maea haeai haeai, mai hano haeai haeai haukia katemai 'ari hauanikia weiakia rua kateihanakia, iamo katehina benakia a'i kate horenakia. <sup>10</sup> Hanopaka haukia hanona hau rua ekia 'ari paunai kateaonamo ki'a baha, abomo maearima ha ha beruberu tabakia katebaiben, pokina mahabanai haukia weiakia rua tehore hanopaka haukia tebaha-iarai ki'anakia.

<sup>11</sup> Iamo wapu aihau mai abirana ha weiakia teore murinai, mauri nibaibenai maeabuna Tirama herenai emai terarua aokiae etoto, weiana temikiri tekoroti. Ua'a teihanakia haukia ikoikiae hanona teta'u ki'a. <sup>12</sup> Ba aia apa'uana ha kupai emai teona, eapari etibaha, "Tomokara'au tomai neia." Weiana terarua hanona i'oatakia haukia wairakiae 'auhao ha aonai tekara'au teao kupa. <sup>13</sup> Beraura hoana weianai kanokau apa'uana ha eka'a,

weiana aiara apa'uana iwate paipana harau haea aonai paipa ha maikoina hanona ebapururuna, abomo kanokau ehore maearima ikoinai taha 'abaihau hamomo (7,000) eba'arinakia. Maearima harina weiakia a'i te'ari haukia hanona tetu'u ki'a baha, kupa Tiramana atana tea'i taeana.

<sup>14</sup> Weiana hanona atetua ki'a obona ibaruana, aba ekapo raina. Iamo tomobahu, atetua ki'a obona ibaihauna hanona aba kemai.

*Aneru Iba'abaihau Hamomona Ena Pihi Eubaina.*

<sup>15</sup> Epua, aneru iba'abaihau hamomona ehore ena pihi eu-baina. Weiana aia apa'uakia kupai te'abi tetibaha, "Hanopaka ipokaina hiabuna hanona aba eka Obiapaka mai ena Keriso 'eukiae eao. Ia hanona obia 'aranai eao hanopaka kepoki aina keaomo banaibananai."

<sup>16</sup> Weiana kiro haukia haraurua bani Tiramana wairanai ekia obia imia'aukiae temia'au haukia te'umuti tekuti Tiramana tebanamona tetibaha,

<sup>17</sup> "Obiapaka Hiabu ikoinai Tiramana e, oi nomiaho mai 'uainai omiaho. Ai tahore namo 'abina tabeni'o. Pokina emu hiabu apa'uana aba oa'ina. Emu obia aiarana nupoki aina.

<sup>18</sup> Hano haeai haukia teopuere, iamo oi emu opuere ranina ekara'au.

Ba aba te'ari haukia oi emu bakai aonai katewaira tina kobabakainakia ranina aba ekara'au. Emu ta'ara'i haukia weiakia mahabanai haukia, mai emu maearima robekia, mai oi atamu timariki aina haukia papakia eaomo apa'uakiae epua, ikoikiae 'arakia namokia kobenakia ranina aba ekara'au. Abomo hanopaka tea'i ki'ana haukia kobapururunakia ranina aba ekara'au."

<sup>19</sup> Weiana murinai aneru Tirama ena marea robe kupa hauna tekaikauna, ba ena rauhubu mauana marea robe aonai hauna aihana. Weiana kupa te'imore, 'uru rarikia tebua, kupa ero'u, kanokau eka'a, mai abara etibo pihara 'abakia.

## 12

### Babi'e Ha Mai Mahi Ha Atana Dragona.

<sup>1</sup> Epuia, hoa apa'uana ha kupai ewaira tina. Babi'e ha ena habuni ibatoto hanona beraura, mai nawa hanona ia 'apuna ba'akiai, mai bihiu harauhaea rua hanona ena obia ibau'unai temiaho aranai ebau'una. <sup>2</sup> Ia hanona mai nuana ba mai hiarana nihai ihobona aba kemauri. <sup>3</sup> Ba hoa haeai mo ha kupai ewaira tina. Mahi ha weia atana dragona 'erau 'abana rarina 'akina birona weia 'arana ikoinai 'abaihau hamomo, 'arana ha ha ahakiai hanona obia ibau'ukia, haeamona 'eana hanona ikoinai harau haea. <sup>4</sup> A'arenai kupa bihiukia iuate paipana aihau aonai paipa ha kupai etaro ahinakia hanopakai ekapo 'aunakia.

Mahi weiana hanona babi'e aba kemauri hauna wairanai ekoroti, nibai'ima babi'e miori kebaramana hanona keana. <sup>5</sup> Ba babi'e emauri nahuna hanona hau papana, miori weiana hanona hanopaka maearimakia ikoikiai auri ikai'ininai kepoki ainakiai, ba miori hanona tea'i parena teaoaina Tirama herena mai ena obia imia'aunai. <sup>6</sup> Babi'e hanona ebeau 'akaumana eao hano'akunai, Tirama 'eka ha aba eba'oruna ia 'euna, weia ia kateiha 'inina keao wapu ikoinai taha hamomo hinabu rua imabui harau haea (1,260).

<sup>7</sup> Epuia kupai huari erama, Mikaela mai ena aneru kipokia mahi atana dragona tehuarina, mahi weiana ena aneru kipokia tehore Mikaela tehuarina. <sup>8</sup> Iamo mahi ena tabura hanona a'i etaina, ba ekia 'eka kupai hauna

teba'akaumana. <sup>9</sup> Mahi rarina 'akina weiana hauna kupai tekapo ahina. (Ia hanona 'erau 'ai'aina weiana atana hanona Tiaporao'ao Satani, hanopaka maikoina ni'oi ahina hauna.) Ia hanona tekapo ahina eriri hanopakai mai ena aneru kipokia.

<sup>10</sup> Ba aia ha rarina 'akina kupai aona e'abi etibaha,  
"Bariu eka Tirama ena bamauri, ena hiabu, mai ena obia aiarana, mai Keriso ena hiabu hanona aba tewaira tina, pokina uaho'abaka ekaiahinakia hauna, weiana rabi mai mararanai Tirama wairanai ekaiahinakia hauna hanona aba tekapo ahina.  
<sup>11</sup> Uaho'abaka tehore Mamoe nahu ena 'ari aruarunai mai 'abi tohana ihinana paukiai tiaporao weiana teahu parena. Ia kipokia ekia mauri hanona a'i teraona'au aina iamo tenuatae kate'ari.

<sup>12</sup> Ua buonai tomoaoanamo ki'a, wai kupa mai kupai tomiaho haumi.

Iamo wai hanopaka mai 'akupaka heremai hanona keki'a ki'a baha, pokina Tiaporao hanona aba eriri ewahi heremi, niopuere ki'a baha, pokina e'ioquina ena rani hanona aba eko'o ko'o."

<sup>13</sup> Dragona weiana e'ioquina ia hanona aba tekapo ahina eriri hanopakai hanona ia ehore babi'e weiana miori ebaramana hauna ebatusuana. <sup>14</sup> 'A babi'e hanona po'i apa'uana ha banina rua tebena, weiana ia kehore kerobo keao hano'akuna ena 'eka ha, aba teba'oruna weia kateiha 'inina ihau aihau mai abirana ha aonai, 'erau weiana ia a'i ketabu ahina. <sup>15</sup> Ba 'erau weiana pinanai hanona bei emama ahina matoha ate 'abana weiana babi'e murinai earu eao kearukaumana. <sup>16</sup> Iamo hanopaka ehore babi'e ebaraina, hanopaka pinana ekaikauna tou beina

weiana dragona pinanai earu emai hauna maikoinai etono 'au orena.<sup>17</sup> Dragona hanona babi'e eopuereai ki'ana, ba eao babi'e nahuna ikoikiai kehuarinakia. (Weiakia hanona Tirama ena rauhubu 'abikia tika'aina haukia mai Iesu ehina pounakia 'abikia tia'i taeana haukia.)

## 13

### *Aiahu Mahikia Rua Tekara'au.*

<sup>1</sup> Epua, maha'u eao hanona aihu mahina ha 'akuai ekara'au aihana. Ia hanona 'eana hau rau haea mai 'arana 'abaihau hamomo, ba 'eana korikiai hanona mai ekia obia ibau'ukia harau haea, 'ara ha ha ahakiai hanona Tirama ibaki'ana 'abikia atakiai tererenakia.<sup>2</sup> Aiahu mahina weiana aihana ihana hanona matoha puti 'aki apa'uana atana taiga 'abana aena ihakia hanona matoha mahi atana bea aena 'abana, mai pinana ihana matoha mahi atana laiona pinana 'abana. Ba mahi weiana atana dragona hauna ehore kipona ena tabura, mai ena obia imia'auna, mai hiabu apa'uana aihu mahina weiana ebena.<sup>3</sup> Aiahu mahina weiana aihana 'arana ha hanona matoha imoai e'ari 'abana iamo imoa weiana haeamona enamo, ba hanopaka mai'koinai tetu'uta'u huri mahi murinai teka'a.<sup>4</sup> Maearima dragona tekuti aina, pokina ia ehore ena hiabu aihu mahina ebena, abomo aihu mahina tekuti aina, te'abi tetibaha, "Tai hanona aihu mahina neiana 'abana? Tai mai ena tabura ia kehuarina?"<sup>5</sup>

<sup>5</sup> Aihu mahina hanona bero tebena apa 'abikia, mai Tirama ibaki'ana 'abikia kehina, hiabu tebena nawa bariabui rua aokiai hoahoa weiana kebabaina.<sup>6</sup> Pinana ekaikauna Tirama ibaki'ana 'abikia ehina, mai atana abomo e'abi ki'a bena, Tirama ena miaho 'ekana mai weiakia kupai temiaho haukia ikoikiai abomo e'abi ki'a benakia.<sup>7</sup> Ia

hanona hiabu tebena Tirama ena robe haukia kehuarinakia keahunakia, ba bero tebena itubu ikoikiai, maearima ikoikiai, maea ikoikiai abomo hano maikoinai kepoki ainakia.<sup>8</sup> Maearima ikoikiai hanopaka ahanai temiaho haukia, weiakia Tirama hanopaka ebakorina murinai atakia Mamoe nahu ena mauri pukanai a'i tererena haukia ikoikiai hanona aiahu mahina weiana katekuti aina. Mauri pukana weiana hanona Mamoe nahu 'uainai teahu 'arina hauna 'euna.

<sup>9</sup> Mai haiana hauna kehore aia neiana keona.

<sup>10</sup> Tirama nenuatae hau ha katea'ina  
katebawapurana raninai,  
hau weiana hanona katea'ina  
katebawapurana.

Haeamona Tirama nenuatae hau ha  
akiuai ke'ari raninai,  
hau weiana hanona akiuai  
kateharana ba ke'ari.  
Neiana buonai Tirama ena robe  
maearimakia hanona bakiroai  
mai a'ikakaumai katemiaho.

<sup>11</sup> Epua, aihu mahina haeai ha aihana, hano aonai ekara'au, 'eana hanona rua matoha mamoe nahu 'abana, ia e'abi aiana hanona matoha mahi atana dragona 'abana.<sup>12</sup> Ia hanona aihu mahina weiana kori'uaina hauna herenai emiaho ena hiabu ihobonai eaka, hiabu neianai hanopaka mai temiaho aina maearimana ikoikiai ebahi ahinakia mahi kori'uaina weiana 'aranai imoa enamo hauna katekuti aina.<sup>13</sup> Aihu mahina ibaruana ehore bata'uta'u huri akakia apa'uakia ebabainakia, ha hanona maearima ikoikiai wairakia tohanai iruba weia kupai euhu ririna emai hanopakai.

<sup>14</sup> Pokina bero ea'ina bata'uta'u huri akakia weiakia aihu mahina kori'uaina herenai emiaho aonai ebabainakia haukiai hanopaka haukia e'oinakia. Aihu mahina ibaruana ehore hanopaka maearimakia ebahi ahinakia kaiba'uku ha katebabaina aihu mahina kori'uaina imarikiaina paunai,

weiana akiuai imoa ea'ina ba emauri mue hauna.<sup>15</sup> Aiahu mahina ibaruana hauna bero ea'ina, kaiba'uku weiana mauri maeabuna ebena ke'abi'abi, mai hiabu ebena kaiba'uku kehore maearima kehina benakia weiakia kaiba'uku a'i katekutia hanona haukia ikoikiai kateahu 'arinakia.

<sup>16</sup> Haeamona aiahu mahina ibaruana ehole maearima ikoikiai ebahi ahinakia, papakia mai apa'uakia, obia huakia mai ururu haukia, ta'ara a'i tia'i haukia mai ta'ara tia'i haukia, ikoikiai hanona mani'a ha imakia itipanai 'ao paukia ahakiai katea'ina.

<sup>17</sup> Maearima mani'a weiana a'i kea'ina hauna hanona taba ha a'i kekawana mai taba ha a'i kekawakawai 'apuana, mani'a weiana hanona aiahu mahina weiana atana 'ao atana irere ituabina hauna.<sup>18</sup> Maearima mai ena aobero hauna ata ituabi neiana ke'ibina hanona ketaina, aobero hauna kehore aiahu mahina ata ituabina keraonana, pokina tuabi tuabi neiana hanona maearima ha atana ituabina ihobona, tuabi tuabi neiana hanona hinabu 'abaihau imabui harau haea reana 'abaihau (666).

## 14

### Mamoe Nahu Ena Maearima Hui Mahamahana Tea'ina.

<sup>1</sup> Epuia, maha'u eao hanona mamoe nahu aihana, Siona Oeona ahanai ekoroti, herenai hanona maearima ikoinai taha ikoinai hinabu hamomo bariabui bani (144,000) weiakia paukia ahakiai ia atana mai Hamana atana tererenakia haukia.<sup>2</sup> Ba 'uru namona ha aona kupai emai, 'uruna matoha ate bo'okia tiarua mai kupa niro'u 'uruna 'abana. 'Uru weiana aona hanona matoha kita ahu haukia ekia kita atakia hap tipapura ainakia 'abana.<sup>3</sup> Ba maearima weiakia tehole Tirama ena obia imia'auna mai mauri tabakia bani mai kiro haukia wairakiai, hui mahamahana ha tea'ina. Tai ha hui weiana

kemarere aina a'i ketaina ia weiakia haukia 144,000 hanopaka herenai aruarunai ekawanakia naukia mo te'ibina.<sup>4</sup> Maeearima weiakia hanona babi'e kipokia a'i tenabau haukia, ekia mauri aonai hanona ki'a herenai te'abaea harai, ia Mamoe nahu aeana niao hanona murinai ti'au haukia, mai hanopaka maearimakia baiatakiai ia ekawanakia, mai baibenitabakia kori'uaikiai teao Tirama mai Mamoe nahu herekiai.<sup>5</sup> Bai'oi 'abina ha pinakiai a'i tehina, ia hanona herekiai beho aha'i.

### Aneru Aihau Bakai Ranina Pouna Tehinana.

<sup>6</sup> Epuia, aneru haeai ha kupa baiatanai erobo aihana, ia hanona Pou namona nemiaho banaibanai hauna ea'ina, weiana hanopakai temiaho haukia herekiai keiroro aina, hano ikoikiai, itubu ikoikiai, maea haeai haeai, mai maearima ikoikiai herekiai.<sup>7</sup> Ia ehole e'abi aota etibaha, "Tirama tomota'u aina mai ia atana tomobanamona, pokina maearima ikoinai kebabakinakia ranina aba etaina, ia hanona kupa, hanopaka, 'aku-paka, mai bei hanoai tebuti haukia ebabainakia hauna, tomokutiaina."

<sup>8</sup> Ba aneru ibaruana ha aneru kori'uaina murinai erobo, e'abi aota etibaha, "Aba e'eho! Babulonia aiara apa'uana, aba e'eho. Ia ehole ena biai hano ikoikiai maearimakia ebainu 'arinakia, bia weiana hanona ena maha pore-pore hoahoakia."

<sup>9</sup> Ba aneru ibaihauna ha aneru rua te'uai haukia murikiai erobo, e'abi aota etibaha, "Hau ha aiahu mahina mai ena kaiba'uku nekuti ainakia, mai ia pauna ahanai 'ao imana ahanai mahi ena mani'a nia'ina hauna,<sup>10</sup> ia abomo Tirama ena opuere wainina keinu, weiana Tirama ia keopuere aina puma kebahaoi ki'ana matoha waini weiana kaputi aonai aba teheina bei kipokia a'i tebahaemona hauna 'abana. Ki'a hauna weiana hanona aneru robekia mai

Mamoe nahu wairakiai kehaiara iruba mai pihara atana salpa mai irubana aokiai.<sup>11</sup> Iruba weianai tihaiara hiabuna hanona kekara'au to'ona keaomo banaibana. Aiahu mahina weiana mai ena kaiba'uku tekuti aina haukia 'ao mahi atana mani'ana tea'ina haukia hanona ekia, arai ranina ha aha'i, mararani mai rabi katehaiara mo."

<sup>12</sup> Neiana buonai Tirama ena robe haukia weiakia ena rauhubu 'abikia tika'ainakia mai Iesu tia'ikakaumana haukia hanona bakiroai katemiaho.

<sup>13</sup> Ba aia ha kupai aona e'abi etibaha, "Abi neiana morerena. Bariu keaomo wairai aonai weiakia Obiapaka aonai ti'ari haukia hanona tenamo." Aubu Robe abomo e'abi etibaha, "Abi tohana, ekia aro'ariai katearai, pokina ekia hoahoa namokia katehore ia kate'abanakia."

### *Hanopaka Ena Ariari Ranina Ekara'au.*

<sup>14</sup> Epuia, maha'u eao hanona 'auhao ha porena waira'uai aihana, 'auhao weiana ahnai hanona hau ha ihana matohu Maearima nahuna 'abana emia'au, 'arana ahnai hanona obia ibau'una gold ai tebabaina hauna, ba imanai hanona iraburabu tabana ha nihena eara hauna ea'ina.<sup>15</sup> Ba aneru haeai ha marea robeai ekarahi emai ba 'auhao ahnai emia'au hauna eaparina aiana 'ubiai etibaha, "Emu iraburabu moa'ina moariari aina, pokina witi iarinia ranina aba ekara'au, hanopaka witina hanona aba te'oru harai."<sup>16</sup> Ua buonai 'auhao ahnai emia'au hauna ehore ena iraburabu tabana eraburabu aina, ba witi hanopakai hauna maikoina earina.

<sup>17</sup> Ba aneru haeai ha marea robe kupai hauna aonai ekarahi, ia abomo imanai iraburabu tabana ha nihena eara hauna ea'ina.<sup>18</sup> Haeamona aneru haeai ha weiana iruba nipoki aina hauna itara robenai emai ba aneru weiana imanai iraburabu nihena

eara hauna ea'ina hauna eaparina, aiana 'ubiai etibaha, "Emu iraburabu moa'ina hanopaka ena bine haharuuanai bine buabuakia moarinakia, pokina hanopaka ena bine buabuakia hanona aba te'aiba harai."<sup>19</sup> Ba aneru weiana ehore ena iraburabu tabana hanopaka ahnai eraburabu aina, hanopaka ena bine buabuakia ekabe hurinakia, eba raronakia ba ekapo utanakia bine buabuakia imutukia 'ekanai, weiana hanona Tirama ena opuere 'ekana.<sup>20</sup> Ba aiara kapenai bine buabuakia imutuna 'ekanai temutunakia, ba imutu 'ekanai aruaru earu ahi, earu eao ena ro'e hanona hoti ekoroti pinana ihobona, 'a ena homa'a hanona kilometra hinabu aihaus.

## 15

### *Aneru 'Abaihau Hamomo Ia'i Ki'akia Tabakia Orekia 'Abaihau Hamomo Tea'inakia.*

<sup>1</sup> Epuia, au bata'uta'u huri hoana haeai ha apa'uana kupai aihana. Aneru 'abaihau hamomo imakiai hanona maearima ia'i ki'akia tabakia ki'a obokia 'abaihau hamomo tea'inakia, neiakia hanona orekia, murikiai hanona haeai ha a'i kerama, weiana Tirama ena opuere hanona keore.

<sup>2</sup> Haeamona maha'u eao taba ha aihana, ihana matohu 'akupaka weiana eiroro wairai ihobona karati mai irubana 'abana. Maearima weiakia aiahu mahina mai ena kaiba'uku mai atana irere ituabina hoana teahu parenakia haukia ikoikiai weia 'aku haianai tekoroti, Tirama kita atakia hap ebenakia hanona imakiai tea'inakia.<sup>3</sup> Ia hanona Mose weiana Tirama ena ta'ara'i hauna ena hui ha mai Mamoe nahu ena hui abomo ha tehuiaina tetibaha, "Obiapaka

hiabu ikoinai Tiramana e, emu aka teapa'ua ki'a baha, bata'uta'u huri akakia nubabai. Uru ikoikiai ekia Obia 'arana e, emu taeara hanona tebero wairai

abomo toha tohakia.  
<sup>4</sup> Obiapaka e,  
 ikoikiai hanona oi  
 kateta'u aini'o, mai oi  
 atamu katea'i taeana.  
 Pokina oi ikupaiamu  
 hanona orobe.  
 Hano ikoikiai hanona katemai  
 oi wairamuai katekuti aini'o.  
 Pokina oi emu babai berokia  
 hanona aba tewaira tina."

<sup>5</sup> Neiakia murikiai maha'u eao  
 kupai marea robe aihana ikaikau  
 emiaho, weiana hanona Tirama  
 ena rauhubu emiaho paraboana.  
<sup>6</sup> Ba aneru 'abaihau hamomo aba  
 teba'oru maearima ia'i ki'akia  
 tabakia ki'a obokia 'abaihau  
 hamomo katebabainakia haukia  
 marea robeai tekarahi, habuni  
 namokia tohakia atakia linen mai  
 'imare 'imarekia tebatotonakia,  
 mai gold 'apakia haharakiai  
 te'aberenakia. <sup>7</sup> Weiana mauri  
 tabakia bani baiatakiai ha ehore  
 gold puoukia 'abaihau hamomo  
 ea'inakia aneru 'abaihau hamomo  
 weiakia ebenakia, puou weiakia  
 aokiai hanona Tirama weiana  
 kemiaho banaibnai hauna ena  
 opuere ebonu. <sup>8</sup> Ba Tirama  
 ena nuabi mai ena hiabu pau-  
 nai iruba hiabuna marea robe  
 aonai ebabonu 'auna, hau ha  
 a'i kekatoto 'apua keaomo aneru  
 'abaihau hamomo weiakia kate-  
 hore maearima ia'iki'akia tabakia  
 ki'a obokia 'abaihau hamomo  
 katebaore harainakia.

## 16

### Tirama Ena Opuere Puoukia 'Abaihau Hamomo Tebakiki Oioinakia.

<sup>1</sup> Epuia, aia ha marea robeai  
 aona aneru 'abaihau hamomo  
 ehinabe 'aotanakia etibaha,  
 "Tomoao, Tirama ena opuere  
 puoukia 'abaihau hamomo haukia  
 katobakiki oioinakia hanopaka  
 ahnai."

<sup>2</sup> Ua buonai aneru kori'uaina  
 eao ena puou hano ahnai ebakiki  
 oina, ba tua ki'a obokia mai ha-  
 iarakia maearima weiakia aiahu  
 mahina ena mani'a tea'ina haukia

mai ena kaiba'uku tekuti aina  
 haukia ahakiai terama.

<sup>3</sup> Aneru ibaruana ehore ena  
 puou 'aku ahnai ebakiki oina, ba  
 'aku ebaebo matoha 'ari hauna  
 aruaruna 'abana, ba taba weia  
 'aku aonai temiaho haukia ikoikiai  
 te'ari.

<sup>4</sup> Aneru ibaihauna ehore ena  
 puou ate mai bei hanoai tebuti  
 haukia ahakiai ebakiki oina, ba  
 tebaebo aruaru ai teao. <sup>5</sup> Ba  
 bei nipoki ainakia aneruna aiana  
 aona e'abi etibaha,  
 "Robe Tiramana e,  
 oi nomiaho mai 'uainai  
 omiaho haumu,  
 emu bakai neiakiai ki'a haukia  
 puma obahoainakia hanona  
 obero ki'a baha.

<sup>6</sup> Pokina ia tehore emu  
 robe haukia mai mahabanai  
 haukia

teahu 'arinakia aruarukia  
 tebakiki oinakia,  
 ba oi ohore aruaru obenakia  
 kateinu hanona ekia ki'a  
 'arana obamuena."

<sup>7</sup> Ba aia ha itara robenai emai aona  
 e'abi etibaha,  
 "E, 'abi tohana,  
 Obiapaka  
 hiabu ikoinai Tiramana e,  
 oi emu bakai weiana ki'a haukia  
 puma obahoainakia hanona to-  
 hakia mai tebero."

<sup>8</sup> Aneru ibabanina ehore ena  
 puou beraura ahnai ebakiki oina,  
 ba beraura bero tebena irubanai  
 maearima keba'aranakia. <sup>9</sup> Hiabu  
 rarina 'akina ehore maearima  
 eba'aranakia, ba Tirama weiana  
 maearima ia'iki'akia neiakia  
 ebaramanakia hauna atana  
 teururu aina haeamona raona  
 kabe a'i tenuatae aina mai ia a'i  
 tebanamona. <sup>10</sup> Aneru ibaimana  
 ehore ena puou aiahu mahina  
 ena obia imia'auna ahnai ebakiki  
 oina, ba mahi weiana ena obia  
 aiarana maikoina ewapura abuna,

weiana maearima tehaiara ki'a  
 baha paunai maeakia te'urinakia,  
<sup>11</sup> mai ekia haiara mai ekia tua  
 paukiai Tirama weiana kupai  
 nemiaho hauna teururu aina,

mai ekia aka ki'ai kateraona kabe hanona a'i tenuatae.

<sup>12</sup> Aneru iba'abaihauna ehore ena puou Eufrate atena apa'uana ahanae ebakiki oina, ba ate beina e'ororo 'au, taetana tainai obia 'arana haukia ekia taeara eba'oruna katemai. <sup>13</sup> Ba auba ki'a obokia\* aihau aihanakia ihakia matoha hobu 'abakia, ia hanona mahi atana dragona hauna pinanai, mai aiahu mahina pinanai, mai mahabanai hauna bai'oina pinanai tekarahi. <sup>14</sup> Ia hanona tiaporo aubakia ki'a obokia, hoa mai bata'uta'u huri akakia tibabai, ba ia hanona tikarahi hanopaka maikoina ena obia 'arana haukia katebararonakia Hiabu ikoinkai Tirama na ena bakai wapuna apa'uana kemai raninai katehuarina.

<sup>15</sup> Weiana aia ha aona e'abi etibaha, "Tomobahu, au hanona bainao hauna 'abana kawahi. Hau ha eno'a nemiaho mai ena habuni ebatotona nemiaho hauna hanona enamo, weiana ia hauna 'abaeania'i kekabanai kabanai, haeamona mako wairakiai a'i kehaumaea."

<sup>16</sup> Ba auba ki'a obokia aihau weiakia tehore obia 'arana haukia tebararonakia eka weiana Heberu maeakiai atana teaparina 'Aramagedono' haunai.

<sup>17</sup> Aneru iba'abaihau hamomona ehore ena puou maeabu aonai ebakiki oina, ba marea robe aonai obia imia'auna ahanae aia ha emai e'abi 'ota etibaha, "Aba eore." <sup>18</sup> Ba kupa e'imare, ero'u, 'uru rarikia tebua, mai kanokau ki'a obokia 'akikia teka'a, kanokau ua homana ha a'i eka'a 'apua ua'i baha 'akinai maearima hanopakai erama raninai emai mo bariu, kanokau neiana hanona ki'a obona tohana. <sup>19</sup> Weiana aiara apa'uana atana Babulonia hanona epa'a paipana aihau, mai hano ikoikiai aiarakia apa'uakia hanona tepururu. 'A Tirama hanona Babulonia aiara apa'uana ena ki'a eraona 'inina, ba ia

ehore ena kaputi ai Babulonia ebainuna, kaputi weiana hanona Tirama ena opuere ki'a obona waininai ebonu 'auna. <sup>20</sup> Ba kereibua ikoikiai te'akauma, mai kobio hanona wairakia aha'i. <sup>21</sup> Abara kupai te'eho matoha pihara apa'uakia, ekia puma hanona kilogram imabui 'abana hanona kupai te'eho maearima teahu ki'anakia, ba maearima tehore Tirama teururu aina pihara abarana weiana paunai, pokina ena ia'iki'a neiana hanona eki'a ki'a baha.

## 17

### *Rea Babi'ena Apa'uana Ena Puma Kehoaina.*

<sup>1</sup> Epua, aneru 'abaihau hamomo weiakia puou 'abaihau hamomo tea'inakia haukia 'abakia ha emai here'u ehina bena'u etibaha, "Omai, au kahore rea babi'ena apa'uana ena puma kehoaina hauna kabaihani'o, ia hanona bei bo'ona 'arakiai nemiasi. <sup>2</sup> Hanopaka ena obia 'arana haukia rea babi'ena weiana kipokia tenabau, hanopaka maearimakia abomo ia kipokia tenabau matoha biai teinu 'ari 'abana."

<sup>3</sup> Ba Auba Robe ao'u ebabonu 'auna, aneru weiana ehore eaoaina'u hano'akuna, weia babi'e ha aihana, aiahu mahina ha birona ahanae emia'au. Mahi weiana hauna maikoinai ata tererenakia weiakia hanona 'abi ki'a obokia Tirama herenai, mahi weiana 'arana hanona 'abaihau hamomo 'eana harau haea.

<sup>4</sup> Babi'e weiana hanona habuni apupuna mai birona ebatotona, gold mai pihara namoabukia 'imare 'imarekiai, mai kutu 'imare 'imarekiai ebataitaina, imanai hanona gold 'erena ha, aonai hanona ena aka ki'a obokia mai ena nabau hoahoakia 'opukiai ebonu. <sup>5</sup> Ia pauna ahanae hanona ata bunina ha tererena,

\* **16:13:** (13) 'ao 'opukia

**'BABULONIA APA'UANA,  
HANOPAKA ENA REA BABI'EKIA  
IKOIKIAI MAI TABA KI'A OBOKIA  
MAIKOINAI HINAKIA.'**

<sup>6</sup> Ba babi'e weiana aihana hanona Tirama ena robe haukia mai Iesu pouna tehinana haukia eahu 'arinkakia mai aruarukiai einu 'ari. Aihana raninai ata'uta'u huri.

<sup>7</sup> Ba aneru weiana ehina bena'u etibaha, "Aehoma buonai nuta'uta'u huri? Au kahore babi'e naiana 'abina bunikia mai mahi weiana ahanai emia'au 'arana 'abaihau hamomo 'eana harau haea hauna anina kaba'iobini'o.

<sup>8</sup> Ba aihu mahina naiana oihana hauna hanona 'uainai emiaho, ia bariu hanona a'i nemiaho, ia hanona 'uri 'ourana weiana a'ena aha'i haunai kekara'au kemai, ba keao kepururu baihana. Maearima weiakia hanopaka erama emaimo bariu hanopakai temiaho haukia, weiakia atakia mauri pukana aonai a'i tererenakia haukia, mahi weiana kateihana hanona kateta'uta'u huri, pokina ia hanona 'uainai emiaho, bariu a'i nemiaho, haeamona kemai mue.

<sup>9</sup> "Maearima mai ena aobero hauna hanona neiana obona keobo, aihu mahina arana 'abaihau hamomo hanona oeo 'abaihau hamomo, aiara weiakia babi'e epoki ainakia, mai obia 'arakia haukia 'abaihau hamomo. <sup>10</sup> Weiakia haukia ima hanona aba tepururu, ia ha hanona bariu nemiaho, ha hanona a'i nimai baha, ia weiana kemai raninai rani papana mo kemiaho. <sup>11</sup> Aihu mahina weiana 'uainai emiaho ia bariu a'i nemiaho hauna hanona obia 'arana hauna iba'ababanina, weiakia 'abaihau hamomo haukia 'abakia ha, ba ia abomo kepururu.

<sup>12</sup> "Aihu mahina 'eana harau haea weiakia oihanakia hanona obia 'arakia haukia harau haea, iamo obia 'arakiai haukia weiakia ekia aiara a'i tia'i bahanakia, ia aihu mahina kipokia obia hiabuna katea'ina beraura hoana hamona aonai. <sup>13</sup> Obia 'arana

haukia weiakia harau haea ikoikiai ekia raona hanona kehamona, ba ekia tabura mai ekia hiabu aihu mahina katebena. <sup>14</sup> Ba ia haukia hanona Mamoe nahu katehuarina, ia Mamoe nahu kehore keahu 'iti'itinakia, pokina ia hanona obia ikoikiai ekia Obiapaka mai obia 'arana haukia ekia Obia 'arakiai hauna, ia ti'abana haukia weiakia eaparinakia mai etina'anakia, mai aia ibabua 'au haukia hanona Mamoe nahu kipokia huari aonai ekia 'ou haukia kateahu 'iti'itinakia."

<sup>15</sup> Weiana aneru haeamona ehina bena'u etibaha, "Bei weiakia oihanakia ahakiai rea babi'ena emia'au, hanona maearima haeai haeai, rama haeai haeai, hano haeai haeai, mai maea haeai haeai haukia. <sup>16</sup> Aihu mahina mai 'eana harau haea oihanakia haukia hanona rea babi'ena weiana 'arina a'i kate'ari, ena taba ikoikiai katea'i obonakia maihauna katehabona, bitiona kateana, iruba ai katehuhuna ke'ara obo. <sup>17</sup> Pokina Tirama obia 'arana haukia weiakia aokiai hanona nuatae ehorotina ena raona ikoinai katebaorena, weiana aokia katebahamomona ekia hiabu aihu mahina katebena keobia aina, keaomo Tirama ena 'abi ketohana. <sup>18</sup> Babi'e weiana oihana hauna hanona aiara apa'uana, weiana hanopaka ena obia 'arana haukia ikoikiai nipoki ainakia."

## 18

*Babulonia Aiara Apa'uana Aba E'eho.*

<sup>1</sup> Neakia murikiai aneru haeai ha aihana kupai eriri emai. Ia ena hiabu hanona eapa'ua ki'a baha weiana ena nuabi ehore hanopaka maikoinai ebaea obona. <sup>2</sup> Aiana taburanai eio aota etibaha, "Babulonia aiarana apa'uana aba e'eho, aba e'eho! Ia hanona tiaporo mai auba ki'a obokia\* ikoikiai ekia

\* 18:2: (2) 'ao 'opukia

kaimue 'ekanai eao,  
roborobo 'opukia mai  
'arikia a'i ti'ari haukia  
ekia paparo'ai eao.

<sup>3</sup> Pokina hanopaka maearimakia  
ikoikiae ia kipokia nabau  
hoahoakia ki'a obokia tebabai  
matoha ena bia pahihinai  
teinu 'ari 'abana.

Hanopaka ena obia 'arana haukia  
abomo ia kipokia aba tenabau,  
haeamona hanopaka ena  
kawakawa haukia hanona  
enuatae ki'a tabakia  
weiakia arakia rarikiae  
ekia obia aba tebapa'uanakia."

<sup>4</sup> Ba aia haeani ha aona etibaha,  
"E'u maearima e,  
aiara naiana aonai  
tomokarahi tomai.  
Ia kipokia ki'a akakia

a'i tomobabai haeamo marikina.  
Ia kipokia ia'iki'ana pumana  
a'i tomohuai haeamona marikina.  
<sup>5</sup> Pokina ena ki'a hanona  
aba ero'ana eaomo kupa,  
mai Tirama hanona ia ena babai  
ki'a ikoikiae niraona 'inakia.

<sup>6</sup> Ena baiben'i ihobonai  
katobeni muena.  
Taba ebabaina hauna 'arana  
rani rua katohorena.  
Emi 'ere aokiae muramura  
pahihina eba'oruna  
katoiu ihobonai,  
ia ena 'ere aonai  
muramura pahihina katoba'oruna  
hanona ena tabura katoba  
kabanaina rani rua.

<sup>7</sup> Ia kipona taba weiakia  
'arakia rarikiae enuatae ki'a  
mai ena nuabi ebena ihobokiae mo  
katobahaiarana mai katobahaina.  
Pokina kipona aonai  
niapa netibaha,

'Au hanona obia 'arakia  
babie'e'u mo ha qamiatu,  
au hanona wapu aha'i,  
mai au hanona a'i kahai 'apua.'

<sup>8</sup> Ua buonai wapu hamona aonai  
ia ia'iki'ana akakiae ikoikiae  
ketabu ahinakiae,  
'ari, hai mai arobo.

Haeamona ia hanona iruba aonai  
ke'ara obo.  
Pokina Obiapaka Tirama

ia nibabakaina hauna hanona  
etabura ki'a baha.

<sup>9</sup> "Hanopaka ena obia 'arana  
haukia ia kipokia tenabau mai  
ena kepu teaonamoai haeamo  
haukia hanona iruba weiana  
hiabuna nikara'au kateihana  
raninai katehai 'ari ki'a baha.  
<sup>10</sup> Ena hau haiara paunai, kateta'u  
ki'a atau'ai katekoroti katehai  
kate'abi,

'Eki'a ki'a baha,  
eki'a ki'a baha.  
Babulonia aiara apa'uana  
mai taburana e,  
beraura hoana hamona 'akimo  
aonai puma ohoaina.'

<sup>11</sup> "Hanopaka ena kawakawa  
haukia abomo katehai 'ari ki'a  
baha, pokina ekia kawakawa  
tabakiae hanona hau ha a'i  
kekawanakiae.  
<sup>12</sup> Kawakawa

tabakiae weiakiae hanona gold  
mai silba, pihara namoabukiae  
mai kutu 'imare'imarekiae, habuni  
namoabukiae, habuni apupukiae,  
habuni nibinibikiae ta'eta'ekiae,  
habuni birokiae, matiu timikiae  
namokiae haeaihaeai, mahi atana  
elephant 'eanai tebabai tabakiae  
ikoikiae, matiu 'arakiae rarikiae  
haukiae, kopa, auri mai pihara  
pahihina namonai tebabainakiae  
tabakiae,  
<sup>13</sup> weiakiae aniani timikiae  
ibanamokiae muramurakiae atakiae  
sinemon mai spaisi, muramura  
timikiae 'orimokiae atakiae insense  
mai mira, mai muramura tabu  
rana hauani katetaronae hauna,  
waini mai olibe hohona, parawa  
namokiae, witi, poromakau mai  
mamoe, hoti, mai kariota, ta'ara'i  
haukiae, mai maearima ekiae mauri.

<sup>14</sup> Taba tikawakawai haukiae  
weiakiae katehina bena katetibaha,  
'Babulonia e,  
taba namokiae onuatae ainakiae  
haukiae te'akauma,  
mai emu obia tabakiae mai  
emu nuabi tabakiae ikoikiae  
hanona aba te'akauma,  
ba a'i kotabu ahi muenakiae.'

<sup>15</sup> "Kawakawa haukiae taba  
weiakiae ia herenai tekawa  
kawainakiae ba monikiae teobia  
haukiae atau'a 'akinai katekoroti,

kateta'u haiara weiana ki'a obona paunai katehai 'ari ki'a baha.  
<sup>16</sup> Kate'abi katetibaha,  
 'Eki'a ki'a baha,  
 aiara apa'uana herena eki'a ki'a baha.  
 Habuni namoabukia,  
 apupukia, mai birokia  
 obatotonakia, gold,  
 pihara namoabukia 'imarekia,  
 mai kutu 'imarekiai otaitai.  
<sup>17</sup> Beraura hoana hamona aonai  
 emu obia tabakia neiakia ikoikiai hanona aba tepururu.'

"Aunohi kapena haukia ikoikiai  
 mai tehe'au tiharima haukia ikoikiai, aunohi ai tiaka haukia ikoikiai mai ekia mauri 'akuai tikaoao aina haukia ikoikiai atau'ai katekoroti.  
<sup>18</sup> Ia ni'ara hiabuna nikara'au kateihana raninai kateio katetibaha,  
 'Aiara tabana hanona aiara apa'uana neiana 'abana?"  
<sup>19</sup> Arakiai apuroro katehore 'aunakia katehai 'ari ki'a baha katetibaha,  
 'Eki'a ki'a baha,  
 aiara apa'uana herenai eki'a ki'a baha,  
 mai ekia aunohi 'aku kapenai haukia ikoikiai oi emu obia tabakiai kepu haukiai teao, 'a beraura hoana hamona 'akimo aonai oi aba opururu.

<sup>20</sup> Tomoaonamo.  
 Kupa, mai Tirama ena robe haumi, mai iuhubeau haumi, mai mahabanai haumi e, tomoaonamo ki'a baha, Tirama ehore ia puma ebahoaina pokina ia wai heremai etbabai ki'a paunai."

<sup>21</sup> Ba aneru taburana ha ehore iata rarina 'akina ha ea'i taeana 'aku aonai ekapo uhuna ba e'abi etibaha,  
 "Taeara neiana ihobonai Babulonia aiara apa'uana 'aku aonai katekapo uhuna, ba a'i kateiha muena.  
<sup>22</sup> Kita atana hap tipapura aina haukia ekia 'uru namokia, mai hui a'itaea haukia,

marori mai pihi ubai haukia 'urukia namokia oi aomuai a'i kateo muena.  
 Oi aomuai aka haeai haeai tibabai haukia ha a'i katetabu ahi muena.  
 Oi aomuai tonia tiorina 'uruna a'i kateo muena.  
<sup>23</sup> Ramepa eana ha oi aomuai a'i ke'ara mue.  
 Hawainiibe mahamaha hauna mai babi'ena aiakia oi aomuai a'i kateo'o muenakia.  
 Neiakia katerama pokina emu kawakawa haukia hanona hanopaka ena maearima apa'uakiai teao, oi emu nepuai hanona hanopaka maearimakia o'oi ahinakia.  
<sup>24</sup> Babulonia aiara apa'uana hanona puma ehoaina pokina ia aonai mahabanai haukia mai Tirama ena robe haukia aruarukia tetabu ahinakia, mai hanopaka ahana teahu 'arinakia haukia ikoikia aruarukia."

## 19

### Kupa 'Ubinai Teio, Haleluia!

<sup>1</sup> Neiana murinai, au 'uru ha aona 'uruna matoha maearima to'una rarina kupa 'ubinai teio tetibaha,  
 "Haleluia! Hamabanamona. Bamauri, nuabi, mai hiabu hanona eka Tirama 'euna.  
<sup>2</sup> Pokina ena bakai hanona tohana mai ebero. Tirama ehore rea babi'ena apa'uana puma ebahoaina, ena maha porepore babai ki'ai hanopaka ea'i ki'ana paunai. Tirama ena ta'ara'i haukia teahu 'arinakia aruarukia 'arakia aba ebamuena."

<sup>3</sup> Haeamona teio mue tetibaha, "Haleluia! Hamabanamona. Aiara apa'uana ni'ara mai hiabuna nikara'au a'i kepu 'apua keaomo banaibani."  
<sup>4</sup> Ba kiro haukia harau rua bani mai mauri tabakia bani tekaipehu

Tirama weiana obia imia'auna  
ahawai emia'au hauna tekuti aina,  
ba teio tetibaha,  
“Amen, Haleluia!”

*Mamoe Nahu Ena Hawainibe Tatuna.*

<sup>5</sup> Ba weia obia imia'aunai aia ha  
emai etibaha,

“Ena ta'ara tua'ina haumi  
ikoimiai mai maearima ikoimiai  
weihami papana mai apa'uana  
ia tumariki aina haumi ikoimiai,  
eka Tirama hamabanamona.”

<sup>6</sup> Ba 'uru ha aona, 'uruna matoha  
mako rarina 'akina 'ao roio rarikia  
tihara puni 'ao kupa niro'u 'uruna  
rarina 'abana teio tetibaha,  
“Haleluia! Hamabanamona.

Pokina Obiapaka aika eka  
Tirama hiabu ikoinai hauna  
nihore aika nipoki ainaka.

<sup>7</sup> Aoka kenamo, kahaonamo ki'a,  
ia nuabi kababena.

Pokina Mamoe nahu ena  
hawainibe ranina aba ekara'au,  
haeamona keatawana babi'ena  
abomo aba eba'oru.

<sup>8</sup> Habuni namona atana linen  
erau'a mai ne'imare hauna  
tebena kebatotona.”

(Habuni namona weiana anina  
hanona Tirama ena robe haukia  
aka berona tebabaina haukia.)

<sup>9</sup> Ba aneru ehina bena'u  
etibaha, “Abi neiana morerena.  
Tebeaubeau benakia Mamoe nahu  
ena hawainibe tatuna aonai temai  
haukia hanona tenamo.” Haeamona  
e'abi mue etibaha, “Neiakia  
hanona Tirama pinana 'abikia  
tohakia.” <sup>10</sup> Weiana au aneru  
weiana aena pokinai akaipehu  
kakuti aina, 'a ia au ehina bena'u  
etibaha, “A'i kokuti aina'u! Au  
hanona ta'ara'i hau'u 'abaea'u,  
oi 'abamu mai uaho'abamu Iesu  
ena pou tehinana haukia 'abakia.  
Tirama ikupaijanamo kahakuti  
aina! Pokina Iesu ihina pouna  
hanona mahabanai hiabunai.”

*Hoti Porena Ahanai Emia'au  
Hauna.*

<sup>11</sup> Epua, au kupa ekaikau  
hoti pore obona ha waira'uai  
aihana, ahanai emia'au hauna  
atana hanona 'AIA IBABUA'AU'

mai 'TOHA TOHANA' Ia hanona  
bero paipanai nibabakai mai  
nehuari. <sup>12</sup> Mahana ihakia hanona  
matoha iruba neupa 'abana,  
aranai hanona obia ibau'ukia  
bo'okia, ia ahanai hanona ata ha  
irere'au ba hau ha ata weiana  
a'i e'ioquina, 'a ia kipona mo  
e'ioquina. <sup>13</sup> Ena habuni homa'ana  
ebatotona hauna hanona earuaru  
obo. Ia atana tehinana hanona  
'TIRAMA ENA 'ABI'. <sup>14</sup> Kupa  
ena huari haukia ia murinai  
te'au, hoti porekiai temia'au,  
habuni namokia atakia linen  
tebatotonakia, tepore obo mai  
terau'a. <sup>15</sup> Pinanai hanona kareba  
nihena eara hauna nikarahi, ena  
aka hanona hano haeai haeai  
haukia keahu 'iti'itinakia, ba  
ia kehore auri ikai'iniai kepoki  
ainakia. Hiabu ikoinai Tiraman  
ena opuere kebatohana 'ekana  
bine buabuana ibahari 'iti'itina  
'ekanai kehe 'iti'itinakia. <sup>16</sup> Ena  
habuni ahanai 'apena tainai  
hanona ata neiana ererena,

‘OBIA 'ARANA HAUKIA IKOIKIAI  
EKIA OBIA 'ARAKIA HAUNA MAI  
OBIA IKOIKIAI EKIA OBIAPAKA.’

<sup>17</sup> Ba aneru ha beraura aonai  
ekoroti aihana, roborobo kupa  
baitanai tirobo haukia ikoikiai  
eapari 'aotanakia etibaha, “Tomai,  
Tirama ena tatu apa'uanai to-  
moto'u. <sup>18</sup> Weiana wai hanona  
obia 'arana haukia, huari pokia  
haukia, mai tabura haukia bitiokia  
katoani, hoti mai hoti ai temia'au  
haukia bitiokia katoani, mai  
maearima ikoikiai weiakia ta'ara  
tia'i haukia mai ta'ara a'i tia'i  
haukia, papakia mai apa'uakia  
bitiokia katoani.”

<sup>19</sup> Ba aiahu mahina weiana mai  
hanopaka ena obia 'arana haukia  
mai ekia huari haukia kipokia  
teto'una aihankia, tenuatae  
hoti porenai emia'au hauna ena  
huari haukia kipokia katehuari.

<sup>20</sup> Iamo aiahu mahina teahuna  
tea'i maurina, ena mahabanai  
hauna bai'olina ohi. Mahabanai  
hauna bai'olina weiana  
hanona aiahu mahina wairanai  
bata'uta'u huri hoahoakia ebabai

hauna, hoahoa weiakiai aiahu mahina mani'ana tea'ina mai ena kaiba'uku tekuti aina haukia e'oi ahinakia. Weiakia terarua mauri maurikia iruba 'obuna weiana pihara mai irubana atana salpa ni'ara banaibananai 'ekanai tekapo uhunakia.<sup>21</sup> Weiana hoti porena ahanai emia'a'u hauna ehore pinanai kareba ekarahi haunai 'ou haukia ikoikiai eahu'ari orenakia, ba roborobo ikoikiai bitio weiakiai teani 'ari.

## 20

### *Keriso Kipokia Kateobia Ihau Taha Hamona.*

<sup>1</sup> Epuia, aneru ha kupai ekarahi eriri emai aihana, imanai hanona 'uri 'ourana a'ena aha'i hauna kina mai tabiri apa'uana ha ea'inakia.<sup>2</sup> Ia ehore mahi atana dragona weiana 'erau 'ai'aina hauna ea'ina, mahi weiana hanona Tiaporor 'ao Satani, ba tabiriai ebiri 'inina ihau ikoinai taha hamona kemiahō aina.<sup>3</sup> Aneru weiana ehore mahi weiana 'uri 'ourana a'ena aha'i hauna aonai ekapo utana ba ekaibau 'inina, mai ahanai rauhubu hoana ehorotina, weiana ia hanopaka maearimakia a'i me'oinakia keaomo ihau taha hamona, weiana murinai hanona kerubuna kemiahō rani papana.

<sup>4</sup> Epuia, obia imia'aukia ai-hanakia, ahakiai temia'au haukia hanona hiabu tea'ina katebabakia. Haeamona weiakia Iesu pouna tehinana mai Tirama ena 'abi tehinana paukiai 'akokia tekabe hurinakia haukia aubakia aihanakia.<sup>5</sup> Ia hanona aiahu mahina weiana 'ao ena kaiba'uku a'i tekuti aina mai ena mani'a paukia ahakiai 'ao imakia ahakiai a'i tea'ina haukia. Ia hanona temauri mue Keriso kipokia teobia ihau ikoinai taha hamona.<sup>6</sup> Neiana hanona 'ariai mikirimue kori'uaina. ('Ari haukia harina maikoina hanona a'i temauri mue eaomo ihau ikoinai taha ha ekabanai.)<sup>7</sup> Maearima weiakia mikiri mue kori'uaina aonai katemiaho haukia hanona tenamo

mai terobe. 'Ari ibaruana hanona ena hiabu aha'i ia herekiai, 'a ia hanona Tirama mai Keriso ekia robe akakia ibabaikia haukiai kateao, mai kipokia kateobia haeamo keaomo ihau ikoinai taha hamona.

### *Satani Iruba 'Obunai Tekapo Uhuna.*

<sup>7</sup> Ba ihau ikoinai taha hamona keore murinai hanona Satani ena wapura 'ekanai katerubuna.<sup>8</sup> Satani kekarahi keao hanopaka maikoinai hanopaka maearimakia ke'oinkakia, weiakia itubu rua Gog mai Magog kebato'unakia huari kateao. Ekia bo'o hanona kebo'o ki'a baha matoha poe 'anona 'abana.<sup>9</sup> Hanopaka maikoinai tekabananai teao Tirama ena maearima temiaho 'ekana mai ena raona'a'u aiarana tekori kakaiaronia. Iamo iruba kupai eriri 'eho huari haukia weiakia maikoinai eba'ara obonakia.<sup>10</sup> Ba tiaporor weiana ia e'oi ahinakia hauna hanona weia pihara mai irubana atana salpa ni'ara 'obuna aonai tekapo uhuna, aiahu mahina mai mahabanai hauna bai'oina tekapo uhunakia 'ekana. Weia teaihau puma kate hoaina mararani mai rabi keaomo banaibananai.

### *Obia Imia'auna Apa'uana Porenai Emia'aau Hauna Ena Bakai.*

<sup>11</sup> Epuia, obia imia'auna apa'uana pore obona ha mai ahanai nemia'au hauna aihana. Hanopaka mai kupa hanona wairanai tekaobo tai ha a'i eiha muenakia.<sup>12</sup> Ba 'ari haukia aihanakia apa'uakia mai papakia Tirama ena obia imia'auna wairanai tekoroti, ba aneru puka tekai kaunakia, baiatakiai puka haeai ha abomo tekaikauna weiana hanona mauri pukana. 'Ari haukia ekia babai puka aokiae irere ihobokiae eba bakainakia.<sup>13</sup> 'Aku aonai te'ari haukia 'aku ehore euhu 'aunakia, haeamona 'ari mai 'ari haukia ekia 'eka tehore ekia 'ari haukia

teuhu 'aunakia. Ba maearima ikoinai hanona ha ha ekia babai ihobohobokiae ebabakainakia.<sup>14</sup> Murinai 'ari mai 'ari haukia ekia 'eka abomo iruba 'obuna aonai tekapo uhunakia. Iruba 'obuna weiana hanona 'ari ibaruana.<sup>15</sup> Maearima weiakia atakia weia mauri pukana aonai irere aha'i haukia ikoikiae hanona iruba 'obuna aonai tekapo uhunakia.

## 21

### *Kupa Mahamahana Mai Hanopaka Mahamahana.*

<sup>1</sup> Epua, maha'u eao kupa mahamahana mai hanopaka mahamahana aihankia, pokina kupa kori'uaina mai hanopaka kori'uaina aba te'akauma, 'aku-paka abomo wairana aha'i.<sup>2</sup> Ba aiara robena aihana, Ierusalema mahamahana, Tirama herenai kupa 'ubinai eriri emai. Aihana ihana matoha hawainibe mahamahana babi'ena tebatatai haraina teba'oruna atawana 'euna 'abana.<sup>3</sup> Ba aia ha obia imia'aunai emai aona e'abi 'aota etibaha, "Bariu Tirama ena miahoe'ekana hanona maearima herekiae, Tirama hanona ia kipokia katemiaho, ia hanona Tirama ena maearimai kateao, Tirama kipona hanona ia herekiae kemiaho, haeamona ekia Tirama ai keao.<sup>4</sup> Ia kehore mahakia beikia ikoikiae mahakiae keutu obonakia, ba maearima a'i kate'ari mue, a'i kateaoko'o mue, a'i katehai mue, mai a'i katehaiara mue, pokina taba 'ai'aikia weiakia hanona aba te'akauma baihana."

<sup>5</sup> Epua, obia imia'auna ahnai emia'au Tiramana e'abi etibaha, "Tomobahu, Au taba ikoikiae aba nababai maha mahanakia!" Haeamona ehina bena'u etibaha, "Abi neiana hanona morerena pokina 'abi neiakia hanona toha tohakia mai aokia tohakiae katea'i taeanakia."<sup>6</sup> Ba haeamona ehina bena'u etibaha, "Taba ikoikiae aba ababai orena. Au hanona Alepa mai Omega, Kori'uaina

mai Murihaina. Ia'iramanai mai Ibapuana hau'u. Hau ha 'akona ni'ororo hauna au kahore mauri beina nebuti 'arana aha'i hauna kabena keinu.<sup>7</sup> Ena a'ikakauma ketabura, ki'a aokiae kekabanai hauna hanona itauna neiakia ikoikiae kea'inakia, ba au hanona ia ena Tirama ai kaeao, ia hanona au naha'u ai keao.

<sup>8</sup> Iamo 'ubo haukia, a'i tia'ikakauma haukia, aka ki'a haukia, ahuahu haukia, nabau haukia, nepu haukia, kaiba'uku tekuti aina haukia, mai bai'oi haukia ikoikiae ekia 'eka hanona iruba 'obuna weiana pihara mai irubana atana salpa ni'ara banaibanae 'ekana aonai. Neiana hanona 'ari ibaruana."

### *Ierusalema Mahamahana.*

<sup>9</sup> Epua, aneru ha emai here'u, ia hanona aneru 'abaihau hamomo weiakia puou 'abaihau hamomo aokiae ia'iki'a tabakia orekia 'abaihau hamomo tebabonunakia tea'inakia haukia 'abakia ha, ba ehina bena'u etibaha, "Omai neia, au kahore hawainibe mahamahana babi'ena kabaihani'o, ia hanona Mamoe nahu atawana."<sup>10</sup> Weiana Auba Robe ao'u ebabonu 'auna ba aneru ea'ina'u eaoaina'u oeo ha apa'uana ba'ona 'ubinai, ba aiara apa'uana robena, Ierusalema, ebaihana'u Tirama herenai kupa 'ubinai neriri nimai.<sup>11</sup> Tirama ena nuabi hanona aiara neiana ebaea obona, ena 'imare hanona matoha pihara namoabuna atana daiamond 'abana, eiroro ki'a matoha karati 'abana.<sup>12</sup> Aiara neiana ena ara hanona eapa'ua mai ero'e, pa'abina hanona harau haea rua, pa'abina ha ha herekiae hanona aneru ha ha tikoroti temiaho haukia ikoinai harau haea rua. Pa'abina ha ha ahakiae hanona Israela itubuna harau haea rua atakia ha ha tererenakia.<sup>13</sup> Pa'abi aihau hanona taetana tainai, ha aihau hanona tototaina tainai, ha aihau hanona ahitaina tainai, ha aihau hanona tibotaina tainai.<sup>14</sup> Aiara apa'uana arana ena kori'au piharakia hanona

harau haea rua, ahakiai Mamoe nahu ena iuhubeau haukia harau haea rua atakia tererenakia.

<sup>15</sup> Aneru weiana ehina bena'u hauna imanai hanona ikai'iini ha gold ai tebabaina hauna ea'ina, ba aiara apa'uana, mai ena pa'abi, mai ena ara kehobonakia. <sup>16</sup> Aiara ebakorina 'uni'unina bani baiatakia hanona teihobo, ena homa'a mai ena mata abomo ihobo, ikai'iniai aiara ehabona ba ena homa'a etabu ahina hanona kilometra taha rua hinabu rua (2,200), ena ro'e abomo teihobo. <sup>17</sup> Aneru ehore ara ena imuki\* ehabona hanona meta imabui harau haea 'abaihau (66), aneru hanona maearima ekia hobohobo ihobonai ua ehabo aihona.

<sup>18</sup> Ara hanona pihara namoabuna atana daiamond ai ebakorina, ba aiara apa'uana hanona gold tohanai ebabaina eiroro ki'a matoha karati 'abana. <sup>19</sup> Aiara ebakorina arana ena kori'au piharakia hanona pihara namoabukia haeaihaeai ikoinai harau haea rua ai ebataitainakia, pihara namoabukia atakia hanona neiakia, kori'uaina hanona diamond, hauna eiroro, ibaruna hanona sapαιa, hauna epurutoni, ibaihauna hanona kalakedo, hauna e'apuro, ibabanina hanona emerald, hauna ekupa, <sup>20</sup> ibaimana hanona sadonu, hauna ebiro-biro, iba'abaihauna hanona rubi, hauna ebiro, iba'abaihau hamomona hanona krusolito, hauna ewaima, iba'ababanina hanona berulio, hauna ekupa, iba'ababani hamomona hanona topasio, hauna eiroro, ibaharau haeana hanona krusoparaso, hauna ekupakupa, ibaharau haea hamomona hanona huakinto, hauna epurutoni, mai ibaharau haea ruana hanona ametuso, hauna e'apupu. <sup>21</sup> Ara pa'abikia harau haea rua ba pa'abi ha ha hanona kutu porekia rarikia 'imare 'imarekiai tebabainakia.

\* 21:17: (17) 'ao bao

Aiara ibuana taearakia ikoikia hanona gold tohana 'abaeana, teiroro ki'a matoha karati 'abana.

<sup>22</sup> Au aiara weiana aonai Marea Robe ha a'i aihana, pokina Obiapaka hiabu ikoinai Tiramana mai Mamoe nahu hanona aiara Marea Robena. <sup>23</sup> Aiara apa'uana weiana hanona beraura 'ao nawa eakia a'i nenuatae, ia ahanai a'i kerara, pokina Tirama ena nuabi hanona aiara nibaeana Mamoe nahu hanona aiara ena ramepai niao. <sup>24</sup> Hanopaka maearimakia aiara eanai kateka'a, haeamona hanopaka ena obia 'arana haukia hanona ekia nuabi haeai haeai kateaoainakia ia aonai. <sup>25</sup> Pa'abi hanona rani ikoinai a'i katekaibau 'apuana, pokina rabi hanona weia aha'i. <sup>26</sup> Hanopaka maearimakia hanona ekia nuabi tabakia mai ekia obia tabakia aiara weiana aonai katekatoto ainakia. <sup>27</sup> Iamo opu tabana ha a'i ketoto mai hoahoia ki'a obokia tebabai haukia 'ao bai'oi haukia ha hanona aiara weianai a'i kekatoto 'apua, iamo weiakia atakia Mamoe nahu ena mauri pukanai tererenakia haukia mo katekatoto.

## 22

### Mauri Beina Atena.

<sup>1</sup> Epua, aneru weiana ehore mauri beina atena eba ihana'u, eiroro wairai matoha karati 'abana. Ba Tiramana mai Mamoe nahu ekia obia imia'aunai eharu riri emai, <sup>2</sup> ba aiara taearana apa'uana ibuanai eharu ririna. Ate 'arana abira abira hanona matiu weiakia mauri tibaiben'i haukia tekroti, ihau hamona aonai hanona rani ikoinai harau haea rua buabuakia tiba ramanakia, nawa ha ha aokiae tebua'a. Ia raukia hanona hanopaka maearimakia ikoikiai ekia inawa ibanamokia tabakia. <sup>3</sup> Aiara weiana aonai hanona Tiramana ena ururu ba'anai temiaho tabakia ha weia a'i kahatabu ahina. Pokina Tirama mai Mamoe nahu ekia obia imia'auna hanona

aiara weiana aonai kate miaho. Ena ta'ara'i haukia katehore ia katekutia aina, <sup>4</sup> ba ia wairana kateihana, haeamona Tirama atana hanona paukia ahakiai irere 'au. <sup>5</sup> Rabi ha weia keaha'i, ramepa 'ao beraura eakia hanona a'i katenuatae ainakia, pokina Obiapaka Tirama kehore ea kebenakia. Haeamona ia hanona obia 'arana haukiai kateao katepoki keaomo banaibani.

*Iesu Aba Kemai.*

<sup>6</sup> Epuia, aneru weiana ehina bena'u etibaha, "Abi neiakia hanona toha tohakia mai kateba tohanakia. Obiapaka Tirama weiana mahabanai haukia aubakia niba taburanakia ia pouna tehinana hauna ehore ena aneru euhuna taba aba katerama haukia ena ta'ara'i haukia keba ihanakia."

<sup>7</sup> Iesu e'abi etibaha, "Tomobahu, Au hanona aba kawahi, mahabanai 'abikia puka neiana aonai tika'ainakia haukia hanona tenamo."

<sup>8</sup> Au Ioane hanona taba neiakia aihanakia mai 'urukia ao'o. Ba aia ao'o mai aihanakia murinai, taba neiakia ebaihana'u aneruna aena pokinai akaipetu kakutia aina nahoma. <sup>9</sup> Iamo ia ehore au ehina bena'u etibaha, "A'i kokuti aina'u. Au hanona ta'ara'i hau'u oi 'abamu mai uaho'abamu mahabanai haukia 'abakia mai puka neiana 'abina te'ima haraina haukia ikoikiai 'abakia. Oi hanona Tirama ikupaiana mo kokuti aina." <sup>10</sup> Haeamona aneru weiana ehina bena'u etibaha, "Puka neiana ena mahabanai 'abikia a'i kokaiabunakia, pokina neiakia ikoikiai katerama ranikia hanona aba herekai. <sup>11</sup> Maearima weiakia ki'a akakia tibabai haukia hanona hoahoa 'opukia temebabai, weiakia hoahoa 'opukia temebabai, weiakia bero akakia tibabai haukia hanona bero akakia temebabai, weiakia tirobe haukia hanona temerobe."

<sup>12</sup> Iesu e'abi etibaha, "Tomobahu. Au hanona aba kawahi. Au kahore ikoimiai emi babai ihobokiai ha ha 'arami kabenimi paunai, 'arami hanona kawahia ainakia. <sup>13</sup> Au hanona Alepa mai Omega, Kori'uaina mai Murihaina, taba ikoikiai ia'iramakia mai ibapuakia hau'u."

<sup>14</sup> Ekia habuni teutunakia haukia hanona tenamo, weiana ia hanona bero katea'ina mauri nibaiben'i matiuna buabuana kateani, mai aiara weiana Ierusalema mahamahana pa'abina aonai katekatoto. <sup>15</sup> A aiara weiana kapenai hanona maearima weiakia waeha 'abakia haukia, nepu ba'ari haukia, nabau hoahoakia ki'a obokia tibabai haukia, ahuahu haukia, kaiba'uku tekutia haukia, mai maearima weiakia bai'oi 'arina ti'ari ekia 'abi abiai mai ekia hoahoa tibai'oi haukia ikoikiai. <sup>16</sup> "Au Iesu hanona e'u aneru auhuna ewahi 'abi tohakia neiakia kebaiben'i wai\* Tirama ena marea haumi heremi. Au hanona Davida obia 'arana hauna Ramuna mai ena rama hau'u. Au hanona raurani bihiuna 'imarena."

<sup>17</sup> Auba Robe mai hawaiinibe mahamaha babi'ena ohi ti'abi tetibaha,

"Omai!"

Tabana aia neiana niona hauna abomo me'abi metibaha,

"Omai!"

Tabana 'akona ni'ororo hauna hanona kemai. Abomo tabana nenuatae hauna hanona kemai mauri beina 'arana aha'i hauna keinu.

<sup>18</sup> Puka neiana ena mahabanai 'abikia tiona haukia ikoikiai narobenakia. Hau ha 'abi neiakia ahakiai 'abi haeai ha kehore 'auna raninai, Tirama kehore ia'iki'a tabakia puka neiana aonai irere haukia ia ahana kehore 'aunakia.

<sup>19</sup> Ba hau ha mahabanai pukana neiana aonai 'abi ha kea'i parena raninai, Tirama kehore ia ena itau weiakia mauri nibaiben'i matiuna ahana hauna mai aiara robena aonai hauna, weiakia puka neiana

\* 22:16: (16) 'ao oi

aonai robakia teahu haukia, ia  
herenai kea'i parenakia.

<sup>20</sup> Iesu, taba neiakia 'abikia ne-  
hina pounakia hauna netibaha,  
“Abi tohana,  
au hanona aba kawahī.”

Amen. Obiapaka Iesu e,  
'omai.

<sup>21</sup> Nabahuba'ari, Obiapaka Iesu  
ena aoko'o hoana hanona Tirama  
ena maearima ikoimiai heremiai  
kemiaho. Amen.